

SC. SUP. 23. PL. 5.







R. P. Fr. VINCENTII
CONTENSON,
 ORDINIS PRÆDICATORUM
 Sacræ Theologiæ Professoris;
**THEOLOGIA MENTIS
 ET CORDIS:**

S E V

Speculatio universæ Sacræ Doctrinæ,
 pietate temperata; è Patribus, Doctore
 potissimum Angelico derivata.

T O M U S I V.

*Virtutum tum generatim, tum speciatim
 & tandem theologicarum decorem,
 vitiorum deformitatem exponens.*

Lucere vanum, ardere parum: lucere & ardere
 perfectum. Bern. serm. de nat. I. an. Bapt.

*ex libro
 Van
 pastoris in*



*petrus f. ome
 Bern. b. n. i. c. e. p.
 Rev. c. l. g. h. m.*

LUGDUNI,
 Sumpt. LAUR. ARNAUD, PETRI BORDE,
 JOANNIS, & PETRI ARNAUD.

M. D C. L X X X I.
 Cum Approbat. & Privilegio Regis.

Index Dissertationum,

perfundere potest eximius variarum virtutum apparatus.	19
Primum virtutis subiectum, intellectus.	20
Voluntas secundum virtutis subiectum, sed non in ordine ad bonum proprium.	23
Tertium virtutis subiectum, appetitus sensitivus.	29
REFLEXIO.	32
SPECVL. III. Duplex præcipua proprietas virtutum moralium, mediocritas & connexio.	34
Altera virtutum proprietas, & connexio.	40
Corollarium. Virtutes sine charitate nec perfectæ sunt, nec simpliciter veræ.	47
Inæqualitas & duratio virtutum.	59
REFLEXIO.	61
CAPVT II. Divisio & pictura virtutum.	64
SPECVL. I. Traditur multiplex divisio virtutum.	65
REFLEXIO.	68
SPECVL. II. Virtutum moralium infusarum necessitas stabilitur.	70
REFLEXIO.	79
SPECVL. III. Donorum Spiritus sancti necessitas, & characteres declarantur.	82
REFLEXIO.	86
Monita duo.	90

DISSERTATIO II.

De virtutibus theologicis : & primum de Fide. 94

CAPVT I. **D**E Fidei natura & dignitate. 97
Præmittitur significatio Fidei, ejusque necessitas præsupponitur. 98

SPECVL. I. Fides solum Deum, solique Deo credit, ac divinæ duntaxat innititur authoritati. 103

REFLEXIO. 115

SPECVL. II. Variæ objecti fidei condiciones &

Capitulum , & Speculationum.

<i>& doctores exponuntur.</i>	117
Prima conditio objecti Fidei , propositio Ecclesie Catholice.	ibid.
Secunda conditio objecti Fidei , formalis , vel virtualis revelatio ab Ecclesia declarata.	119
Tertia objecti Fidei dos , certitudo.	121
Proponuntur , & solvuntur objecta.	123
<i>Corollarium.</i> De restrictionibus mentalibus.	130
Prosequutio objectionum.	133
Quarta Fidei conditio , obscuritas intermicans , id est evidenter credibilis.	135
Quæres , utrum sicut objectum Fidei compatitur accidentem credibilitatem , ita compatia- tur etiam evidentiam in attestante ?	142
REFLEXIO.	1, 2
SPECVL. III. Conveniens est articulorum Fidei distinctio & numerus , cui decursu temporis nullum cremen- tum, sed explicatio accessit.	154
Quæres quid sit Symbolum , & quare varia in Ecclesia circumferantur ?	159
An procedente tempore Fidei articuli cremen- tum acceperint ?	162
Illustratur hæc doctrina ex Vincētio Lyrinēsi.	165
Corollaria momentosa de natura , divisione , & dignitate Fidei.	174
<i>Corollarium I.</i> Apostolica Fidei definitio.	ibid.
<i>Corollarium II.</i> Aliæ Fidei definitiones.	177
<i>Corollarium III.</i> Fidei divisio in formatam & in- formem.	178
<i>Corollarium IV.</i> Fides formata & informis idem habitus.	182
<i>Corollarium V.</i> Variæ Fidei prærogativæ & do- ctes.	187
Prima prærogativa: Perfectio virtutis Fidei.	ibid.
Secunda Fidei dos : Præminatus virtutum.	192

Index Dissertationum.

Tertia Fidei prærogativa: Certitudo.	194
REFLEXIO.	202
CAPVT II. De actu, subjecto, causa & effectibus Fidei, aliisque ad eam spectantibus.	205
SPECVL. I. Nec actus interior Fidei sine piæ voluntatis motione; nec actus exterior confessionis sine influxu Fidei interioris elicitur.	207
REFLEXIO.	216
SPECVL. II. Fide supernaturali perfusus est intellectus Angelicus in via: non remanet in cadæmonibus, nec in hominibus damnatis, & multò minùs in hæreticis invenitur.	218
Fides non perseverat in damnatis.	233
Procul ab hæreticis Fides.	239
Solvuntur aliquæ instantiæ.	240
Quæres, quænam sit causa Fidei?	246
Quæres secundo, quinam sint Fidei effectus?	249
Quæres tertio, quænam dona virtuti Fidei respondent?	251
REFLEXIO.	259
SPECVL. III. Præcepta Fidei, cum interioris, tum exterioris expenduntur.	262
Fides supernaturalis necessaria.	263
In lege nova simpliciter est necessaria fides Salvatoris.	268
Objecta solvuntur.	276
Præceptum confessionis Fidei.	284
Corollaria practica.	289
REFLEXIO.	305

DISSERTATIO III.

De virtute Spei, & dono Timoris. P. 307

CAP. I. **V**irtutis Spei objectum, subjectum & præcepta traduntur. 309

SPE.

Capitulum, & Speculationum.

SPECVL. I. Ad solum Deum summum bonum, visione futurâ possidendum tendit Spes : soli Deo innititur , ut ipsum assequatur.	311
Solvuntur objectiones.	315
Confectaria momentosa.	324
Reflexio.	335
SPECVL. II. In solis Catholicis, tametsi peccatoribus, Spes Christiana invenitur.	337
REFLEXIO.	347
SPECVL. III. Usque adeò in divina misericordia sperare , & ut ait Scriptura , super sperare præcipimur, ut factâ etiam damnationis revelatione, adhuc beatitudinem sperare possemus, & teneremur.	349
REFLEXIO.	367
CAPVT II. De sacro Domini timore.	369
SPECVL. I. Timor malum timet, & à Deo timet. Dividitur in filialem, seu castum; initialem, servilem & mundanum.	371
REFLEXIO.	376
SPECVL. II. Timoris mundani & servilis labe percensentur.	378
REFLEXIO.	389
SPECVL. III. Timoris filialis dotes & sacræ delicia.	390
Præceptum timoris.	402
REFLEXIO.	404

DISSERTATIO IV.

De charitate.	406
CAPVT I. E Xistentia, essentia, & objectum charitatis exponuntur.	407
SPECVL. I. Existentia charitatis demonstratur. ibid.	
REFLEXIO.	415

Index Dissertationum,

SPECVL. II. Per charitatem veram & strictam cum Deo amicitiam inimus..	417
<u>Fit satis objectis.</u>	<u>420</u>
REFLEXIO:	433
SPECVL. III. Eadem specie charitas diligit & Deum propter ipsum, & amicos in Deo, & inimicos propter Deum.	437
<u>Tria corollaria derivantur.</u>	<u>447</u>
REFLEXIO.	453
CAP. II. De augmento & gradibus charitatis.	456
SPECVL. I. Quilibet actus charitatis augmentum habitus meretur: illud tamen non consequitur actus remissus.	461
<u>Actui remisso non statim confertur augmentum habitus.</u>	<u>466</u>
REFLEXIO:	487
SPECVL. II. Habitus charitatis semper actu augetur per actum æqualem, & à fortiori per interiorem in hac vita eliciendum; augetur; inquam, secundum totam actus intensi latitudinem.	489
REFLEXIO.	497
SPECVL. III. Latitudo & terminus augmenti charitatis, necnon gradus illius explicantur; an etiam possit diminui resolvitur.	499
<u>Quæres primò, quantum charitas augeri possit.</u>	<u>ib. d.</u>
<u>Quæres rursum, an charitas viæ possit adæquare charitatem patriæ?</u>	<u>501.</u>
<u>Quæres tertio, quot sint gradus & status charitatis?</u>	<u>504.</u>
<u>Quæres quarto, utrum charitas, sicut augeri potest, ita diminui valeat?</u>	<u>508.</u>
REFLEXIO.	515
DISSECTA.	

DISSERTATIO V.

Appendix.

Commendatio Fidei & Religionis Catholica, seu Romana: ejusdemque triumphus de infidelibus reportatus. pag. 513

§. i.	Primum Ecclesiæ seculum.	519
§. ii.	Secundum Ecclesiæ seculum.	527
§. iii.	Tertium Ecclesiæ seculum.	531
§. iv.	Quartum Ecclesiæ seculum.	543
§. v.	Quintum & sextum Ecclesiæ seculum.	551
§. vi.	Seculum septimum, octavum & nonum.	557
§. vii.	Decimum, undecimum, & duodecimum Ecclesiæ seculum.	562
§. viii.	Decimumtertium Ecclesiæ seculum.	565
§. ix.	Decimumquartum & decimumquintum Ecclesiæ seculum.	571
§. x.	Decimumsextum & decimum septimum Ecclesiæ seculum.	575
	Monitum & reflexio.	578

DISSERTATIO VI.

Appendix.

Commendatio & elogium Charitatis. pag. 585

P	Primum elogium: Charitas vita nimæ.	ibid.
	Secundum elogium: Charitas facit & confert effectum infinitum.	587
	Tertium elogium: Minimus charitatis gradus habet statum virtutis simpliciter.	588
	Quartum charitatis elogium: Charitas gratuitum Dei donum est.	591
	Quintum charitatis elogium: Effusio, seu extensio charitatis ad diversa objecta.	598

Quæres,

Index Dissertationum,

Quæres, utrum homines, tum in lege naturæ,
tum in lege scripta à Moyse inimicos dilige-
re tenerentur. 604

Sextum elogium: Ordo Charitatis. 615

REFLEXIO. 639



APPENDIX UNICA.

Ad librum septimum.

Seu brevis de peccatis tractatio. p.643

Præloquium. ibid.

DISSERTATIO I.

De vitiis & peccatis generatim. 646

CAPVT I. **P**Eccatorum contrarietas, deformi-
tas, & malitia exponuntur. 647

SPECVL. I. Vitii, seu peccati habitualis horrores
& contrarietates repræsentantur: 648

Prima vitii hostilitas. ibid.

Secunda vitiorum hostilitas. 651

Tertia vitiorum hostilitas. 655

REFLEXIO. 661

SPECVL. II. Peccati actualis, tum commissionis,
tum omissionis malitia & deformitates de-
scribuntur. 664

Malitia peccati commissionis. 665

Malitia peccati omissionis. 667

Quæres, quandonam incipiat malitia omisso-
nis, quandonam consummetur? 674

Quæres rursum, an peccatum omissionis, &
commissionis distinguantur. 677

REFLEXIO: 679

SPECVL. III. Specifica peccatorum distinctio, nec-
non.

Capitulum, & Speculationum,

non eorum inæqualitas, potissimum ex ob-
jecto petenda est, & deinde ex circumstantiis. 683

REFLEXIO. 695

CAPVT II. De variis & specialibus peccatorum
divisionibus. 698

SPECVL. I. Peccatorum multiplex divisio sub
brevitate transcurritur. 699

REFLEXIO. 709

SPECVL. II. Divisio peccati in mortale & veniale
operosius explicatur. Verum utriusque dis-
crimen est, quod mortale repugnat Dei gra-
tiæ & amicitia, quam veniale compatitur. 712

REFLEXIO. 727

SPECVL. III. Præfiniuntur regulæ, quibus pecca-
tum mortale à veniali discernatur. 731

DISSERTATIO II.

De causis peccatorum. pag. 745

CAPVT I. DE internis peccatorum causis. 746

SPECVL. I. **D** Non solum voluntati, sed etiam
appetitui sensitivo, imò & rationi inesse pec-
carum, nedum quoad materiale, sed etiam
quoad formale, probabilius est. 747

Prima pars de appetitu sensitivo. 748

Altera pars de ratione. 758

REFLEXIO. 760

SPECVL. II. Ad peccatum etiam concurrunt ex
parte intellectus ignorantia, ex parte appeti-
tus passionibus, ex parte voluntatis malitia. 761

REFLEXIO. 773

SPECVL. III. Nullum unquam contingit in vo-
luntate peccatum absque prævio intellectus
defectu. 776

REFLEXIO. 780

CAPVT

Index Dissertationum, &c.

CAPVT II. De externis peccatorum causis. 781

SPECVL. I. Nullus Catholicus peccatum originale negare potest, quod in omnes & singulos intrinsecè transfunditur. 784

REFLEXIO. 796

SPECVL. II. Septem corollaria ex præjactis fundamentis derivantur. 797

REFLEXIO. 805

SPECVL. III. Peccatum originis de formali priuationem iustitiæ; de materiali verò concupiscentiam importat. 807

REFLEXIO. 817

DISSERTATIO III.

Peccati effectus recensentur. pag. 819

Primus peccati effectus: Diminutio inclinationis naturalis ad bonum. 820

Secundus peccati effectus: Ignorantia mentis. 822

Tertius peccati effectus: Malitia voluntatis. 826

Quartus peccati effectus: Libido, & amor sensibilis voluptatis in parte concupiscibili. 827

Quintus peccati effectus: Difficultas recti, & torpor appetitus irascibilis. 833

Sextus peccati effectus: Mors & aliæ vitæ hujus ærumnæ. 835

Septimus peccati effectus: Macula & turpitude animæ peccantis. 840

Octavus peccati effectus: Infamia. 852

Nonus peccati effectus: Nova peccata. 855

Decimus peccati effectus: Reatus pœnæ. 859

REFLEXIO. 860

LIB. VII.



LIBER SEPTIMVS.

De Deo primo Exemplari:
seu de Virtutibus, quibus
divinam perfectionem
exprimimus.

PRÆLOQVIUM.

NON esset immaculata Ethica nostra, proindeque nec Christiana, nisi à Deo ipso virtutum Domino esset expressa. Nobis planè divinæ bonitatis, cæterarumque perfectionum exemplar ad imitandum exponere æquum est, quibus voce Veritatis præcipitur: *Esote perfecti sicut Pater vester coelestis perfectus est.* Quis enim dubitare potest hominem gratiâ, & baptismo regeneratum, in consortium naturæ divinæ proVectum, æternæ hæreditatis candidatum, humanis tantum pollere debere virtutibus?

Non inficiamur quidem, homini supra bruta animantia erecto morales necessarias esse virtutes, quibus non minùs ornatur animus, quàm aptâ membrorum figurâ coloris suavitate tempe-

ratâ corpus decoretur. Exigit prorsus natura rationalis præclarissimo illo, & instructissimo virtutum omnium armamentario, & beatissimâ copiâ habituum adornari, quibus erga Deum *piè*, erga proximum *jussè*, erga seipsam *sobriè* vivat. Illis enim destituta nec jus suum cuique servaret, nec libidines cohiberet, nec ulla pietatis officia impenderet; sed suæ conditionis oblita in terra reperet, & cum brutis in cœno volutaret.

Verùm his intra naturalis ordinis ambitum inclusis virtutibus Ethica Christiana contenta non est: ad cœlum tendit, quæ scit sibi genus esse de cœlo, ut cœlestem ducat vitam homo cœlestis patriæ civis futurus. Sicut enim aqua insitâ vi cōmovetur, unde delapsa est; ita Philosophia Christiana, quam Unigenitus, qui est in sinu Patris, devexit è cœlis, quasi fons aquæ salientis in vitam æternam ad cœlum suspirat, ubi teste Augustino, *Premium virtutis erit ipse, qui virtutem dedit.*


Quapropter sicut alia nobis implenda sunt officia, quæ Christiani sumus, nobiliori etiam virtutum suppellectili indigemus, quibus Filii Dei personam geramus, charitatis legi obtemperemus, & ad felicitatem Dei visione obtinendam perveniamus.

Ipsi etiam Philosophi Platonici, qui omnium proximè ad Christianismi veritates accesserunt, hanc tenebras inter infidelitatis affulgentem sibi veritatem quadantenus agnoverunt, dum virtutes morales in *politicas*, *purgativas*, *purgati animi*, & *exemplares* diviserunt. Quia nimirum ut homo in rebus humanis gerendis benè se habeat, per virtutes politicas; ut pravos affectus mundet, & veluti runcinet, per virtutes purgatorias; ut denique ex abundantia contemplationis cupidi-

tates omnes & passionēs non amplius sentiantur, & ferè ignorentur, per virtutes purgati animi respiciendum est ad virtutes exemplares, quæ in ipsa divina mente consistunt, à quarum exemplo reliquæ omnes per ordinem defluunt. Nam sicut rerum aliarum, multò magis virtutum ideas in Deo esse credendum est. Vide S. Thomam *quest. 61. art. 5.* hanc divisionem præclare de more exponentem.

Hac de causa, ne reptet, vel à vero exeret Ethica nostra, Deum semper intuetur, & archetypum illum absolutissimum præ oculis habens, primò de virtutibus generatim, deinde de singulis moralibus speciatim, tandem de theologicis unum Deum inspicientibus sermonem instituet. Ut autem virtutis decorem per se splendidum nostris vel privatis affectibus, vel dissertationum nostrarum tenuitate non obscuramus, unis D. Thomæ vestigiis inhærebimus, de quo verius, quàm de Bruto pronuntiari potest: *In ipsius libris non tam hominem, quàm ipsam virtutem videri loquentem.* Quia ejus lepores dum describit, reddit amabiles; nec potest ejus amorem cordi non imprimere, dum ejus honestatem ob oculos ponit. Virtus enim, ut aiebat Plato, *si oculis cerneretur, mirabiles sapientia amores excitaret.*

Dissertationem aliquam præambulam commendatoriam, quâ legentis animus ad totius tomi lectionem veluti inescetur, hîc de more non prælibamus, quia eam in finem hujus libri rejiciemus, ubi fidei, spei & charitatis elogia subjiiciemus. Maximè quia is est virtutis decor, ea pulchritudo, ut nullo adventitio honestamento egeat, quæ se nativâ specie commendat.



DISSERTATIO I.

De virtutibus generatim, &
singulatim.

Variæ sunt nominis virtutis descriptiones. Primò etenim virtus accipitur latè pro quacumque perfectione ad operandum ordinata; hoc modo dicitur à Philosopho dispositio perfecti ad optimum, idest ad operationem eliciendam instituta. Sic sanitas, robur, & gratia possunt dici virtutes, quia ad agendum conferunt. Tunc verò censetur res perfecta, quando bonitatem suam potest actione diffundere; & ideo actio dicitur quid *optimum*, quia per illam bonum est sui diffusivum, quod non solum optimum, sed & divinum est.

Secundò strictiùs sumitur pro facultate ad operandum ordinata; quo pacto calor, virtus vegetativa, nutritiva, sensitiva, aliaque id genus dicuntur virtutes naturales.

Tertiò denominatur aliquando virtus ab objecto circa quod versatur: hoc modo dicitur à Philosopho *ultimum potentia*; natura enim alicujus facultatis optimè explicatur per id, ad quod se extendit: hoc modo id quod credimus, fides nuncupatur.

Quartò aliquando accipitur pro actu secundo, ut cùm dicitur ab August. *Bonus usus liberi arbitrii*. Cùm enim virtus tota, quanta est, ad actum eliciendum proclivis sit, non immeritò ab operatione

Essentia virtutis.

operatione nomen sortitur, sine qua sterilis est, & vix nomen virtutis meretur.

Ultimò, & propriè sumitur pro aliqua vi & facultate, quæ est in creatura rationali ad benè operandum; & de hac impræsentiarum sermonem instituimus.

CAPVT I.

De essentia, subjecto, & proprietatibus virtutum.

MUltæ circumferuntur virtutis definitiones. Primò enim dicitur ab Aristotele: *Habitus qui bonum facit habentem, & opus ejus bonum reddit.* Quâ definitione duplex virtutis habitudo declaratur; altera ad subjectum, altera ad operationem. Sola namque virtus bonos facit, ut ipsimet Philosophi agnoverunt, quos inter Seneca epist. 77. sic discurret: *Conditio rerum eadem & hominum est. Navis bona dicitur, non quæ pretiosis coloribus picta est, nec cui argenteum, aut aureum rostrum est, nec cujus tutela arbore celata est, nec quæ opibus Regiis pressa est; sed stabilis, firma, & juncturis aquam excludentibus spissa, ad ferendum incursum maris solida, gubernaculo parens, velox & consentiens vento. Gladium bonum dicitur, non cui deauratus balteus, nec cui vagina geminis distinguitur; sed cui & ad secandum subtilis acies, & mucro munimentum omne rupturus. Regula non quàm formosa, sed quàm recta sit, quaritur. Ergo in homine quoque nihil ad rem pertinet, quantum aret, quantum sceneret, à quàm multis salutetur, quàm pretioso incumbat.*

lecto ; sed quàm bonus sit : bonus autem est, si ratio recta est. Hac vocabitur virtus, hoc est honestum, & unicum hominis bonum.

Secundò definitur ab eodem Aristotele : *Habitus electivus in mediocritate consistens, prout sapiens & prudens determinaverit.* Quæ definitio convenit solis virtutibus moralibus, residenti- bus in appetitu electivo, & in medio consisten- tibus ; medio, inquam, non mathematico, sed juxta sapientis discretionem determinato.

Tertiò definitur à D. Aug. *Bona qualitas men- tis, quâ rectè vivitur, quâ nullus malè utitur, quam Deus in nobis sine nobis operatur.* Dicitur bona qualitas, non bonitate solum transcenden- tali communi omnibus entibus, sed morali, & naturæ rationali, ac christianæ eximia. Additur, *quâ rectè vivitur* ; quia virtus est principium rectæ operationis, nec potest ad actum pravum vel tantisper vitiatum, quâ tale, inclinare ; arbor enim bona, & tam bona, qualis est virtus, non potest malos fructus facere : unde argumentum est satis convincens, animum destitutum esse virtutibus, si eas non fundat in opera : & de sin- gulis verum est, quod de charitate dicit Magnus Gregorius : *Probatio dilectionis exhibitio est ope- ris. Non sibi aliquis credat quidquid sibi animus sine testatione operis respondet. De dilectione Cen- ditoris mens, lingua, & vita requiritur.* Additur, *quâ nullus malè utitur*, per quod distinguitur virtus ab habitu opinionis, & fidei humanæ, quæ sæpè sæpius in malum proclives sunt. De- nique dicitur, quod *eam Deus in nobis sine nobis operatur*, quia ut constabit ex dicendis, vix ac ne vix quidem in statu naturæ corruptæ ullæ dantur virtutes simpliciter tales, præter eas, quas

quas Deus liberaliter infundit, vel ad quas nobis asciscendas infuso auxilio opitulatur.

Ex his perspicua satis maneret virtutis essentia; nisi illud, quod in his definitionibus supponitur, à multis negaretur, vel in dubium vocaretur, ut patebit sequentibus speculationibus.

SPECVLATIO I.

Virtus est essentialiter habitus operativus actus boni, quoad totum quod reperitur in illo.

Explicantur, & probantur singula. In primis virtus dicitur *habitus essentialiter*, quia habitus ut sic, seu in communi, per se dividitur in virtutem, & vitium, quia per habitum disponitur, & fit habilis potentia: per virtutem autem facultates naturæ rationalis convenienter disponuntur, sicut per vitium inconvenienter. Ergo virtus est essentialiter habitus. Verbi gratiâ, habitus temperantiæ habet essentialiter, quod disponat, faciliat, & determinet subjectum ad eliciendam operationem moraliter bonam, non minus quàm virtus intellectualis essentialiter tendit ad bonum intellectus, quod est verum.

Unde refutata manet sententia Scoti, qui licet concedat virtutem humanam esse habitum operativum boni propter torrentem Doctorum; censet tamen bonitatem non esse differentiam essentialem habitus virtutis, sed accidens illius, nimirum relationem in habitu illo fundatam. Unde infert, divisionem habitus in bo-

num, & malum, non esse divisionem generis in species, sed subiecti in accidentia. Sed id ex dictis refutatum manet, quia virtus moralis est habitus essentialiter inclinans in objectum consonum rationi: maximè quia illa relatio conformitatis, quam habitui superaddit, supponit virtutem, quia nisi habitus in bonum propenderet, minimè relatio illa resultaret: ergo relatio illa non virtutem constituit, sed constitutam supponit.

Secundò dicitur item virtus habitus operativus actus boni; quia omnis perfectio superaddita alicui potentiae, attemperatur exigentiæ, & conformatur naturæ ipsius. Ergo sicut facultates naturæ rationalis sunt operativæ, ita & virtus est similiter operativa. Ex quibus refellitur sententia Durandi asserentis, habitum virtutis nihil producere ejus, quod est in actu bono, sed dispositivè tantum se habere, removendo impedimenta, quibus retardatur facilitas agentis: sed hoc non sufficit, quia ut dictum est, complementum potentiae activæ perficiens potentiam in genere causæ effectivæ, activum esse necesse est.

Tertiò dicitur virtus operativa actus boni quoad totum, quod in ipso reperitur; quia cum potentia rationalis sit productiva actus, nedum in genere entis, sed etiam in genere moris, ut perfectio sit conformis exigentiæ sui perfectibilis, oportet quod habitus utramque rationem attingat. Licet enim potentia possit se solâ & substantiam, & moralitatem actus attingere, non tamen promptè, faciliter, & expedite. Actus etiam non solum est difficilis, quia bonus est moraliter; sed etiam in esse physico arduus est. Verbi gratiâ non sola bonitas actus temperantiæ difficile efficitur;

ficitur, sed ipsa etiam entitas actus repugnat sensualitati; cujus repugnantia vincenda deservit habitus, qui nec virtutis nomen meretur, nec rationem habet, nisi bonos fundatur in actus, ut antea diximus, & iterum inculcare placet; quia: ut ait August. lib. 4. contra Jul. cap. 3. *Nulla modo homines sunt steriliter boni; sed qui boni non sunt, possunt esse alii minus, alii magis mali.*

Unde virtus, quæ nihil agit, similis est lyrae, quam nemo pulsat; gladio, qui nunquam exercitur ut fulgeat; navi otiosæ, quæ semper consistit in portu. Vera autem virtus similis est agro pleno, quo nihil pulchrius, cum seges fluctuat, cum poma rutilant, cum uvarum ferta dependent, cum baccis onusta virescit olea, & viridanti gramine montium vertices, & collium humilia vestiuntur.

Ex quibus refutata manent plurima multorum placita, quorum alii existimant habitum concurrere duntaxat ad intensiorem actus, confortando potentiam ut plenius, & vividius operetur. Sed hoc rejicitur, quia existente habitu possumus elicere actum minus intensum eo, quo productus est habitus; nec tenemur secundum totam illius latitudinem operari, cum habitibus utamur prout volumus.

Alii cum Scoto censent, habitum concurrere solum ad substantiam actus. Sed hoc sine negotio rejicitur, quia actus assimilantur habitui, unde sicut actus bonus est tendentia in objectum bonum; ita sub eadem ratione illum producit habitus, qui proinde non minus bonitatem efficit quam entitatem.

Vasquez arbitratur habitum ad solam facilitatem concurrere; quod rejicitur, quia habitus

non reddit-facilem actum, nisi quia dat potentia virtutem completam ad speciem tam physicam, quam moralem producendam : si enim potentia ad utramque esset adundè completa, facile actum illum eliceret, ut patet in potentiis naturalibus, quæ non egent habitu, quia sunt ad actus instructissimæ : ergo similiter si facultates naturæ rationalis essent sufficienter ad actus bonos eliciendos apparatus, non indigerent habitus adiumento facilitatem conferente. Maximè quia virtutes non distinguuntur penes diuersam facilitatem, sed per multiplicem moralem bonitatem, quam efficiunt in actibus, & respiciunt in obiectis.

Suarez denique contendit, virtutem non concurrere ad intensiorem actus, sed ad solam substantiam, & bonitatem. Sed refellitur, quia habitus non parum confert, ut potentia promptius & expeditius in actus intensiores prorumpat; habitus enim, & potentia sibi mutuò opitulantur in ordine ad actum intensiorem, quia per modum vnius totalis causæ concurrunt : & sicut habitus tribuit potentia posse facile attingere actum, ita potentia tribuit habitui vim attingendi actum intensiorem propter influxus indiuisibilitatem. Uno verbo omnes illæ sententiæ refelluntur, quia ut ostendimus, habitus concurrat ad totum, quod in actu est, quia licet potentia se solâ totum posset quod est in actu efficere, non tamen completè, & perfectè sine habitu; quia si id posset, habitu minimè egeret : per quod differt habitus naturalis à supernaturali; nam potentia se sola neque perfectè, neque imperfectè potest actus supernaturales elicere, nisi infusa sit ornata virtutibus, quæ propterea dicuntur dare simpliciter

pliciter posse, sicut habitus naturales dant facilius operari.

Quares quid sit facilitas in actu?

Respondeo, id melius experienciâ percipi, quàm verbis declarari: & præsertim in actibus bonis mallem sentire facilitatem, quàm scire ejus definitionem, quam reverà soli norunt qui eam sentiunt viri sancti, qui (ut ait Scriptura) induunt fortitudinem, assument pennas ut aquilæ, volant, & non deficiunt; in qua facilitate, & promptitudine solida devotio posita est ad opera sancta proclivis, vitæ spiritualis condimentum, virtutum flos, charitatis flamma, Christi que bonus odor, quo perfusi viam mandatorum currimus, nec fingimus laborem in præcepto.

Nonnulli arbitrantur facilitatem illam actua-lem, & desiderandam bonorum operum pronitatem, esse modum quandam actui superadditum, à potentia ut affectû habitû prodeuntem, quod dicitur facilis: & in eo relucet facilitas communicata potentiæ per habitum, quia, inquit, omnis actus dicit intrinsecum respectum dependentiæ ad suum principium activum: ergo à diverso principio diversum hauriunt dependentiæ modum: sed potentia ut habitu instructa, est principium distinctum à seipsa nudè sumpta: ergo in actu procedente à potentia virtute decorata est aliquis modus, qui non reperitur in actu procedente à potentia nudata virtutibus. Alii verò hac ratione non urgeri se credunt; quia, inquit, effectus formalis habitus est complere potentiâ, & tollere difficultatem, quam patitur ob intrinsecam indifferentiam, & indeterminationem,

quam habet in ordine ad exercitiū, unde oritur retardatio, & difficultas: sed id præstat habitus. inclinando potentiam ad operationem, quia virtus est essentialiter ipsa facilitas, & eius effectus. formalis est reddere potentiam promptam, & expeditam, necnon inclinam, & propensam ad actum promptè, & expeditè eliciendum; ex qua propensione continuo, & veluti sponte fuit actus, qui ideo solum dicitur facilis, quia potentia à qua dimanat, est perfecta, determinata, & expedita, sicut prius dicebatur difficilis, quia potentia indeterminata erat, & impedita. Et certè actus potentiarum naturalium, quæ de se sunt omni complemento instructæ, nec indigent habitus accessione, dicuntur faciles, quia à potentia completa proficiuntur: igitur facilitas, vel difficultas actus non est modus ullus adventitius, sed denominatio extrinseca à potentia determinatione, vel indeterminatione respectivè perita, ratione cujus actus dicitur facilis, firmus, constans, delectabilis, connaturalis.

Denique nihil relucet in actu ex habitu, quod non reluceat in actu causante habitum, cum habitus generet actus similes iis, quibus genitus est: in actibus autem habitum generantibus nullus facilitatis modus elucet; unde eatenus ambo distinguuntur, quatenus alii à potentia completa, alii ab incompleta derivantur.

Probabilis utraque sententia, sed in tam levi diffidio componendo, vel decidendo non immeror; iudiciū sit penes lectorem. Si autem secundæ sententiæ adhæreas, respondebis argumento primæ distinguendo consequens: à diverso principio diversum hauriunt dependentiæ modum, si illud principium diversum sit tantum
comple:

complementum potentiae, & detur ad idem producendum, ad quod potentia est instituta, nego; quia totum quod est in effectu, utrique responderet: si illud principium non sit complementum potentiae, nec detur ad id ipsum producendum, ad quod efficiendum nata est potentia, concedo. Sic autem est, quod habitus naturalis est complementum potentiae ut potentia est, & illud idem attingit, ad quod attingendum potentia est comparata. Unde habitus naturalis facilitatem quidem accerset potentiae, sed non actui, nisi quatenus potentiam determinat, roborat, inclinatur; per quod distinguitur ab habitu supernaturali, qui non solum iuvat potentiam ut bene agat, sed eam ad aliquid efficiendum evehit, quod est extra sphaeram facultatis creatae; modum intelligo supernaturalitatis, cui eliciendo tota natura est impar.

Quaeres rursum, quid per se primò respiciat habitus virtutis; num entitatem, num actus. honestatem, seu moralitatem?

Respondeo habitum virtutis per se primò respicere actus bonitatem, seu moralitatem tanquam terminum formalem; secundariò verò ejusdem entitatem tanquam terminum materialem; quia habitus est per se, & essentialiter in genere moris, cum sit ad bene moraliter operandum essentialiter ordinatus: ergo primò, per se, & essentialiter actus moralis honestatem respicit, & producit.

Dices: Ergo deficiente actus moralitate, vel facta

factâ impossibili, evanesceret habitus, vel saltem in nullum actum profiliret; hoc dici nequit, nam. charitas, quæ nunquam excidit, actus amoris in patria producit, & egressu faciles, & perfectione consummatos; qui tamen morales non sunt, cum libertate careant, cui moralitas subnixa est: ergo moralitas actus non est proprius, & caracteristicus habitus operatiui effectus.

Respondeo, actus amoris in patria ab habitu charitatis elicitos eodem modo esse morales, quo humani sunt; sed quocunque tandem modo dicantur tales, hoc unum certum est, amorem patriæ nedum honestum, sed cumulum esse, & coronamentum honestatis, ac proinde ab habitu virtutis effluere, qui honestatem primariò respicit, primariò producit. Nec obest, quod amor ille non sit actus humanus, liber, & moralis, quia ut aliàs dictum est, actus ille humanus est, subindeque moralis, si non formaliter, saltem eminenter; quia non est necessarius ob ligamen arctatæ potentia, ut contingit in omnibus indeliberatis, sed ob plenitudinem voluntatis, quæ summo bono satiata, felici necessitate ei connectitur, cui adherere bonum, & summum bonum est; nec ad illud cæco fertur impetu voluntas, sed lumine gloriæ, & beata visione præeunte illum amat, quo se videt impleri; vinciturque indifferentia cordis humani, non injectis vinculis, sed præsentia boni vniuersalis plenitudinis, & inundantis libertatis capacitatem.

Addunt alij, illud intèresse discrimen virtutes theologicas inter, & morales, quod quia prioribus modum præscribit, præfiniturque prudentia quæ est proxima moralitatis regula, ideo aliquid morale tanquam speculatiuum respiciunt, quo
deficiente

ficiente deficiunt : posteriores verò, seu theologicae, cum per se sint à regulis morum immunes, vel melius, sint supra omnes regulas, & modos à prudentia præfixitos, non respiciunt per se primò aliquid morale, sed in Deum unice feruntur, cujus veritati fides, cujus fidelitati spes, cujus bonitati charitas adhærescit, ejusque modus est esse sine modo. Nec sequitur, habitum charitatis viæ, vel distingui ab eo, qui est in patria, vel saltem aliquo modo, vel realitate affici, quibus possit moralitatem efficere : non sequitur, inquam, quia licet habitus charitatis non contineat formaliter moralitatem, eam tamen continet eminenter, & illam potest actu impertire, si aliunde habeat libertatem. Hæc secunda responsio formulis scholæ magis est fortassis consentanea ; prima verò clarius est, & expeditior.

Quæri hic solet, vtrum actus à virtute procedens possit aliquâ circumstantiâ infici, & prauitatis labe sordidari. Sed hæc controversia ex his, quæ tomo superiori operosius de mixtura boni, & mali in actibus moralibus disputata sunt, abundè manet elucidata.

R E F L E X I O.

Virtus est habitus operatiuus, & nihil est aliud actus virtutis, inquit S. Thomas, quàm bonus usus liberi arbitrii. Ergo te nudum virtutibus, lector, fâtere, & miserum, & miserabilem, si torpentem animum tuum, ac terræ in hærentem, ad rectè operandum nec impellunt minæ, nec præmia inuitant. Splendeas licet scitætiarum ornatu ; emineas etiam signorum gloria, si bona opera nec benè, nec crebrò elicias.

arbor

arbor es arida, excidenda citò, & in ignem mit-
tenda ; quia ut ait Gregorius lib. 1. dial. cap. 12.
*vita vera existimatio in virtute est operum, non
in ostensione signorum.* Auro te licèt, & margari-
tis, geminisque condecòres, sine Christi deco-
re, qui virtus est, deformis es. Referta sit num-
mis arca tua, affluant divitiæ, redundant horrea
frumento, & cellaria vino ; sint palatia tua com-
posita, circum ornata ut similitudo templi ; sint
promptuaria plena, eructantia ex hoc in illud ;
sint oves tuæ fœtosæ, abundantes in egressibus
tuis, bovesque crassæ : beatum te dicant cui hæc
sunt ; reapse tamen & pauper es, & indigus, &
egenus, si virtutibus orbaris ; quia ut tradit Au-
gustinus lib. de vit. beat. *Et major, & miserabi-
lior egestas nulla est, quàm egere sapientiâ.* Favet
Gregorius hom. 15. in Evangelium : *Fallaces sunt
divitiæ, quæ nobiscum diu permanere non possunt.
fallaces sunt, quæ mentis nostræ ineptiam non ex-
pellunt ; sola autem divitiæ vera sunt, quæ nos
divites virtutibus faciunt.* Virtus ad operandum
& ciet fortiter, & inclinât suaviter ; & tu dor-
mis ? & tu somnos capis matutinos ? & tu volu-
ptatum pestiferâ dulcedine distineris ac diffuis,
cui præcepit Spiritus sanctus, quæcunque pos-
sunt manus tuæ, instanter agere ; & dum tempus
habet, bonum operari. An nescis, quod ut ait
Fulgentius serm. 1. de dispensationibus Domini :
*Et si non possunt omnes arbores æquales fructus af-
ferre, nulla tamen debet in agro dominico sterilis
permanere ?* An ignoras ficum non ferentem fru-
ctus, terribili Salvatoris iræ, & diris execratio-
nibus subjacuisse, & arefactam interiisse ?

Sed enim, inquis, asperæ sunt virtutum semi-
næ, dura cum concupiscentiâ lucta, arduumque,

ac salebrosū iter honestatis. Ita planē, sed non credis, quod regnum cœlorum vim patitur, & violenti rapiunt illud. Disce à Paulino epist. 38.

Quod pramiū gloriæ virtus capere, nisi victrix non potest, non habitura victoriæ facultatem, nisi cum aliqua prius difficultate certaverit. Nunquid legisti in aureo libro de imitatione Christi, qui semper piorum manibus teritur, & oculis obversatur: *Tantum proficies, quantum tibi ipsi vim intuleris.*

Quin etiam vide quā fallaris: duræ tibi videntur semitæ pietatis, quia virtute cares: ipsa namque virtus difficultatem vincit, facilitatem conciliat, suavitatem infundit, concupiscentias frænat, cor inungit, cœlestique dulcedine arctæ vitæ amaritudines condire non cessat. Si modicam, inquit Thomas à Kempis lib. 1. cap. 11. *violentiam faceremus in principio, tunc postea cuncta possemus facere cum levitate, & gaudio.* Maximè quia amor Dei, qui est formā virtutum, nullam invenit difficultatem; vel si invenit, sine mora vincit. *Nihil est tam durum, atque ferreum* (inquit Augustinus de moribus Eccl. cap. 22.) *quod non amoris igne vincatur, quo cum se anima rapit in Deum, super omnem carnificinam libera, & admiranda volitabit pennis pulcherrimis, & integerrimis, quibus ad Dei complexum amor castus innititur.* Et certè si tantus est impetus animæ nostræ, ut ad ea, quæ diligit, indefesso cursu per immania quæque tendat, argumento sanè nobis est, quā sint omnia perferenda, ne deseramus Deum, si tanta homines, ut Deum deserant, suaviter perferunt. Ergo à Deo divinam postula virtutem amoris, si vim refugis sentire laboris. *Nullo modo enim sunt onerosi labores*

amantium (inquit Augustinus lib. de bon. vī-
 duit. cap. 21.) *sed etiam ipsi delectant* : nam in eo
 quod *amatur*, aut non laboratur ; aut si laboratur,
 & labor *amatur*. Consideret (addit lib. de nat.
 & grat. c. 69.) non potuisse divinitus dici : Man-
 data *gravia* non sunt ; nisi quia potest esse cordis
 affectus, cui *gravia* non sunt. Quomodo enim est
grave, cum sit dilectionis mandatum ? Aut enim
 quisque non diligit, & ideo *grave* est ; aut diligit,
 & *grave* esse non potest. Succinit eius discipulus
 Aquinas 1. 2. quæst. 32. art. 6. *Omnia*, quæ faci-
 mus, vel patimur propter amicum, *delectabilia*
 sunt, quia amor præcipua causa delectationis est :
 omne enim *amatum* (addit ad 3.) fit *delectabile*
amanti, eo quod amor est quadam unio, vel con-
 naturalitas amantis ad amatum. Igitur per vir-
 tutes elige illud verum, & vnum bonum, quod
 feratur tota voluntas, quæ in plures distenta di-
 videbatur. Delectare in Domino, & citò in
 bona opera prorumpes : delectatio quippe om-
 nium motuum origo est : & sicut teste Augu-
 stino lib. 22. contra Faust. c. 28. Si nihil delectaret
illicitum, nemo peccaret, ita si te virtutum ope
 delectant licita, si te delectet totius consolatio-
 nis Deus, absque negotio paries fructus hono-
 ris, & honestatis ; quia ut idem Pater in expo-
 sitione Epistolæ ad Galat. docet : Quod ampliùs
 nos delectat, secundùm id operemur necesse est. Et
 iterum : Manifestum est certè secundùm id nos
 vivere, quod sectati fuerimus : sectabimur autem
 quod ampliùs dilexerimus.

SPECVLATIO II.

Intellectum, voluntatem, & appetitum sensitivum, quæ rationi subiectum, perfundere potest eximius variarum virtutum apparatus.

EXplicatâ essentiâ, & notione virtutis, subiectum eius interpretamur, quod ad eius naturam penetrantiùs vestigandam non parum manuducit. Sed illud in primis supponimus, virtutem nec in potentiis merè naturalibus, nec in membris externis, nec in sensibus internis secundùm se spectatis, & ex instinctu naturæ operantibus vllatenus reperiri. Quia nimirû omnes illæ facultates nullo modo sunt ad bonè, vel malè agendum indifferentes, sed unicæ sunt actioni, unico agendi modo alligatæ; si enim recta & integra sit qualitatum naturalium constitutio, semper bonè agent; si mala, vel vitiata, malè semper & vitiosè. Vnde ex frequentia actuum per se maiorem facilitatem non acquirunt, sed ad summum per accidens, non generatione vllius habitus, sed remotione impedimentorum; quatenus illæ potentiæ exercent operationes suas mediis qualitatibus naturalibus, calore, frigore, speciebus ab obiectis impressis; pro quarum meliori, vel deteriori dispositione magis, vel minùs sunt ad operandum expeditæ. Sic potentia nutritiva faciliùs cibos concoquit assuetos, insolitos ægrè digerit.

digerit ; quia sicut ab assuetis non fit passio, ita ab inassuetis turbatur naturalis habitudo. Sic instrumenta etiam externa usu fiunt politiora, & aptiora : sic quævis organa otio torpentia & veluti obstupefacta, usu excitantur, atque ad agendum propelluntur : sic aves nonnullæ iteratorum verborum species retinentes, ad loquendum instituuntur ; sed his vocalis assuetæ, nec liberè garriunt, nec quæ loquuntur percipiunt. Hoc supposito videamus, quomodo intellectus, voluntas, & appetitus sensitivus, virtutis sedes, ac subiectum esse possint.

Primum virtutis subiectum intellectus.

Primò quidem de intellectu res est facilis; cum enim intellectus habeat indifferentiam, non quidem libertatis, sed perfectibilitatis, & sit indifferens ad intelligendum benè, vel malè, sæpeque objectum attingat sub ratione falsi, vel verisimilis, procul dubio indiget habitu & virtute intellectuali, ut inclinetur, determinetur, ac firmetur in assequutione, & possessione veri, & cognitione habitudinis prædicati cum subiecto : difficilis namque est inquisitio, & multò magis intentio veritatis, quæ licèt per se luceat, tantis tamen tenebris obvolvitur animus, in tot præjudicia affectuum corruptione distrahitur ratio, adeoque multiplici adultærantium probabilitatum colore veluti pigmentorum illita falsitas persæpe fucatur, ut nisi virtutum intellectualium ope muniremur, veritatem citò, nec promptè, nec sine alicujus permixtione erroris addisceremus.


Illud

Illud porò sciendum, habitus intellectuales, virtutis simpliciter talis nomen nec reverà mereri, nec à Theologis hactenus obtinuisse. Cùm enim veritas naturalis, ad quam inclinant, sæpè nimis vitio voluntatis compatiatur, habitus intellectualis, quo veritas acquiritur, non facit simpliciter bonum habentem, sed secundùm quid, & cum addito, putà bonum Philosophum, bonum Oratorem: nomen quippe virtutis ad significandum rectitudinis moralis principium impositum est, quanvis deinde ad significandam quamlibet aliam etiam physicam rectitudinem translatum sit.

Hinc tam sollicitè præberi sibi cor humanum petit Deus, tanquam præcipuum, & ferè unicū hominis bonum: hinc pax hominibus bonæ voluntatis denunciatur: hinc teste Bernardo lib. de grat. & liber. arbit. *Creari quodammodo nostri per liberam voluntatem, quasi Dei efficiuntur per bonam voluntatem.*

Hinc, teste eodem Patre, nihil odit, aut punit Deus quàm propriam voluntatem: *Cesset voluntas propria*, inquit, *& infernus non erit*: est autem voluntas perversè propria, cum non est communis Deo & hominibus; sed est nostra tantùm, quando nimirum quod volumus, non ad honorem Dei, non ad utilitatem fratrum, sed propter nosmetipsos facimus, propriis intendentes satisfacere motibus animorum.

Hinc exigua in speciem opera de promptæ voluntatis thesauro manantia, apud Deum grandia sunt, & ut ait Magnus Leo serm. 2. *Nunquam merito caret etiam in tenui facultate bona voluntatis opulentia.* Quin ipsa efficacis voluntatis desideria Deo accepta sunt, si procedant de corde bono,



peraddita ad attingendum bonum rationis proprii suppositi. Ratio est : cùm habitus ad hoc sit duntaxat ordinatus, ut potentiam ultimò compleat, determinet, & facilius, in illa solùm potentia opus est habitu, quæ non est proportionata, determinata, completa, & expedita ad objectum bonum : atqui voluntas est proportionata, determinata, completa, & expedita ad attingendum bonum rationis, saltem privatum; cùm enim voluntas sit ipsamet inclinatio rationalis, seu inclinatio in bonum rationis, vel ad nullum, vel ad proprium bonum inclinatur, nec indiget alio, quo inclinetur ; quia quod est per se tale, non indiget fieri tale per aliud, maxime cùm proprii suppositi bonum nihil habeat excedens proportionem, aut vires voluntatis, unde non est per se difficile voluntati : virtus autem non nisi ad vincendam difficultatem ex natura, seu arduitate objecti petitam exigitur. Ergo voluntas non indiget virtute superaddita ad prosequendum bonum proprium, benè tamen ad attingendum bonum alienum, à cuius prosecutione vel retardari, vel omninò diuertere potest voluntas per aliquid in se existens, inclinationem nimirum in bonum proprium, quæ est primum vivens, & ultimum moriens, quæ ve sæpe bono alieno adversatur.

Dices, voluntas non est sufficienter completa ad attingendum bonum rationis ; tum ob ingentiam ad bonum, & malum indifferentiam ; tum ob intimam in bonum delectabile, quod sæpè honesto adversatur, propensionem ; tum quia si vitii capax est voluntas post repetitos actus peccati, quidni subiectum virtutis contrariæ esse poterit ? Tum demùm quia voluntas naturam, & condi-

conditionem intellectus sequitur, modum agendi imitatur, & eadem proportionaliter habituum suppellectili instruitur. Intellectus autem ad attingendum quodcunque verum indiget habitu virtutis, etiam ad prima principia; ad speculativa habitu intelligentiæ, ad practica synteresi: ergo similiter ad quodcunque bonum obtinendum accessione virtutis opus habet voluntas.

Respondeo virtutem non dari ad tollendam, vel ligandam indifferentiam, quæ est de essentia libertatis, sed ad eam in unam partem, bonam nimirum, inclinandam. Cum ergo voluntas suapte sit naturâ in bonum rationis propensissima, imò sit ipsamet propensio rationalis, non indiget adventitio illo habitu flectente voluntatem in bonum proprium, cujus amor in intimis visceribus, & medullis voluntatis indivulsè insitus est, estque prima tunica quam induit, ultima quam exiit cor humanum. Nec obest quod etiam in bonum delectabile proclivis sit, quia illud bono honesto proprio subicere potest; in appetitu quippe rationali, quæ est voluntas, præminet amor boni rationalis, nec circa hoc paritur illam intrinsecam difficultatem ortam ex excessu, & impropotione objecti, sed ex extrinsecis duntaxat impedimentis, & immoderatis passionibus appetitus, qui solus proinde debet virtutibus temperari.

Fatentur tamen nostri Thomistæ, in voluntate ordinandos esse habitus continentię, & perseverantię, ut eam, quam à passionum conflictu peripit, difficultatem evincat; non quòd voluntas non sit satis in proprium bonum inclinata, sed quia ex passionum nebulis, & æstibus paritur, & uti instillatur inordinatum de finibus virtutis.

factâ impossibili, evanesceret habitus, vel saltem in nullum actum profiliret; hoc dici nequit, nam charitas, quæ nunquam excidit, actus amoris in patria producit, & egressu faciles, & perfectione consummatos; qui tamen morales non sunt, cum libertate careant, cui moralitas subnixa est: ergo moralitas actus non est proprius, & characteristicus habitus operatiui effectus.

Respondeo, actus amoris in patria ab habitu charitatis elicitos eodem modo esse morales, quo humani sunt; sed quocunque tandem modo dicantur tales, hoc vnum certum est, amorem patriæ nedum honestum, sed cumulum esse, & coronamentum honestatis, ac proinde ab habitu virtutis effluere, qui honestatem primariò respicit, primariò producit. Nec obest, quod amor ille non sit actus humanus, liber, & moralis, quia vt al'às dictum est, actus ille humanus est, subindeque moralis, si non formaliter, saltem eminenter; quia non est necessarius ob ligamen arctatæ potentiæ, ut contingit in omnibus indeliberatis, sed ob plenitudinem voluntatis, quæ summo bono satiata, felici necessitate ei connectitur, cui adhærere bonum, & summum bonum est; nec ad illud cæco fertur impetu voluntas, sed lumine gloriæ, & beata visione præeunte illum amat, quo se videt impleri; vinciturque indifferentia cordis humani, non injectis, sed præsentia boni vniuersalis explentis, & inundantis libertatis capacitatem.

Addunt alij, illud intèresse discrimen virtutes theologicas inter, & morales, quod quia prioribus modum præscribit, præfiniturque prudentia quæ est proxima moralitatis regula, ideo aliquid morale tanquam speculatiuum respiciunt, quod
deficiente

iente deficiunt : posteriores verò, seu theolo-
gæ, cum per se sint à regulis morum immu-
s, vel meliùs, sint supra omnes regulas, &
modos à prudentia præfinitos, non respiciunt
se primò aliquid morale, sed in Deum unice
runtur, cujus veritati fides, cujus fidelitati-
es, cujus bonitati charitas adhærescit, ejusque
modus est esse sine modo. Nec sequitur, habi-
m charitatis viæ, vel distingui ab eo, qui est
patria, vel saltem aliquo modo, vel realitate
fici, quibus possit moralitatem efficere : non
quitur, inquam, quia licet habitus charitatis
on contineat formaliter moralitatem, eam ta-
men continet eminenter, & illam potest actu
mpertire, si aliunde habeat libertatem. Hæc se-
unda responsio formulis scholæ magis est for-
mæ consentanea ; prima verò clarior est, &
expeditior.

Quæri hîc solet, utrum actus à virtute proce-
dens possit aliquâ circumstantiâ infici, & prauita-
tis labe sordidari. Sed hæc controversia ex his,
quæ tomo superiori operosius de mixtura boni,
& mali in actibus moralibus disputata sunt,
abundè manet elucidata.

R E F L E X I O.

Virtus est habitus operativus, & nihil est
aliud actus virtutis, inquit S. Thomas, quàm
bonus usus liberi arbitrii. Ergo te nudum vir-
tutibus, lector, fâtere, & miserum, & miserabi-
lem, si torpentem animum tuum, ac terræ in-
hærentem, ad rectè operandum nec impellunt
minæ, nec præmia inuitant. Splendeas licet sci-
tiarum ornatu ; emineas etiam signorum glo-
riâ, si bona opera nec benè, nec crebrò elicis,
arbor.

arbor es arida, excidenda citò, & in ignem mit-
tenda; quia ut ait Gregorius lib. 1. dial. cap. 12.
*vita vera existimatio in virtute est operum, non
in ostensione signorum.* Auro te licèt, & margari-
tis, geminisque condecres, sine Christi deco-
re, qui virtus est, deformis es. Referta sit num-
mis arca tua, affluant divitiæ, redundant horrea
frumento, & cellaria vino; sint palatia tua com-
posita, circum ornata ut similitudo templi; sint
promptuaria plena, eructantia ex hoc in illud;
sint oves tuæ fœtosæ, abundantes in egressibus
tuis, bovesque crassæ: beatum te dicant cui hæc
sunt; reapse tamen & pauper es, & indigus, &
egenus, si virtutibus orbaris; quia ut tradit Au-
gustinus lib. de vit. beat. *Et major, & miserabi-
lior egestas nulla est, quàm egere sapienciâ.* Favet
Gregorius hom. 15. in Evangelium: *Fallaces sunt
divitiæ, quæ nobiscum diu permanere non possunt:
fallaces sunt, quæ mentis nostræ ineptiam non ex-
pellunt; sola autem divitiæ vera sunt, quæ nos
divites virtutibus faciunt.* Virtus ad operandum
& ciet fortiter, & inclinat suaviter; & tu dor-
mis? & tu somnos capis matutinos? & tu volu-
ptatum pestiferâ dulcedine distineris ac dissais,
cui præcepit Spiritus sanctus, quæcunque pos-
sunt manus tuæ, instanter agere; & dum tempus
habes, bonum operari. An nescis, quod ut ait
Fulgentius serm. 1. de dispensationibus Domini:
*Et si non possunt omnes arbores æquales fructus af-
ferre, nulla tamen debet in agro dominico sterilis
permanere? An ignoras ficum non ferentem fru-
ctus, terribili Salvatoris iræ, & diris execratio-
nibus subjacuisse, & arefactam interiisse?*

Sed enim, inquis, asperæ sunt virtutum semi-
na, dura cum concupiscentiâ lucta, arduumque,

alebrosum iter honestatis. Ita planè, sed non
 is, quod regnum cœlorum vim patitur, &
 enti rapiunt illud. Disce à Paulino epist. 38.
ad primum gloria virtus capere, nisi victrix
potest, non habitura victoria facultatem, nisi
aliqua prius difficultate certaverit. Nunquid
 sti in aureo libro de imitatione Christi, qui
 per piorum manibus teritur, & oculis ob-
 scuratur: *Tantum proficies, quantum tibi ipse*
intuleris.

Quin etiam vide quàm fallaris: duræ tibi vi-
 atur semitæ pietatis, quia virtute cares: ipsa
 inque virtus difficultatem vincit, facilitatem
 conciliat, suavitatem infundit, concupiscentias
 enat, cor inungit, cœlestique dulcedine arctæ
 amaritudines condire non cessat. Si modi-
 um, inquit Thomas à Kempis lib. 1. cap. 11.
volentiam faceremus in principio, tunc postea
facile possemus facere cum levitate, & gaudio.
 Eximè quia amor Dei, qui est forma virtutum,
 nullam invenit difficultatem; vel si invenit, sine
 ora vincit. *Nihil est tam durum, etæne ferreum*
 inquit Augustinus de moribus Eccl. cap. 22.)
quod non amoris igne vincatur, quo cum se anima
capit in Deum, super omnem carnificinam libera,
et admiranda volitabit pennis pulcherrimis, &
tegeatrimis, quibus ad Dei complexum amor ca-
ritatis innititur. Et certè si tantus est impetus ani-
 mæ nostræ, ut ad ea, quæ diligit, indefesso cursu
 per immania quæque tendat, argumento sanè
 nobis est, quàm sint omnia perferenda, ne dese-
 amus Deum, si tanta homines, ut Deum dese-
 ant, suaviter perferunt. Ergo à Deo divinam
 oscula virtutem amoris, si vim refugis sentire
 laboris. *Nullo modo enim sunt onerosi labores*

amantium (inquit Augustinus lib. de bon. vi-
duit. cap. 21.) *sed etiam ipsi delectant : nam in eo*
quod amatur, aut non laboratur ; aut si laboratur,
& labor amatur. Consideret (addit lib. de nat.
& grat. c. 69.) *non potuisse divinitus dici : Man-*
data gravia non sunt ; nisi quia potest esse cordis
affectus, cui gravia non sunt. Quomodo enim est
grave, cum sit dilectionis mandatum ? Aut enim
quisque non diligit, & ideo grave est ; aut diligit,
& grave esse non potest. Succinit eius discipulus
Aquinas 1. 2. quæst. 32. art. 6. Omnia, quæ faci-
mus, vel patimur propter amicum, delectabilia
sunt, quia amor præcipua causa delectationis est:
omne enim amatum (addit ad 3.) *fit delectabile*
amanti, eo quod amor est quadam unio, vel con-
naturalitas amantis ad amatum. Igitur per vir-
tutes elige illud verum, & unum bonum, quod
feratur tota voluntas, quæ in plures distenta di-
videbatur. Delectare in Domino, & citò in
bona opera prorumpes : delectatio quippe om-
nium motuum origo est : & sicut teste Augu-
stino lib. 22. contra Faust. c. 28. Si nihil delectaret
illicitum, nemo peccaret, ita si te virtutum ope
delectant licita, si te delectet totius consolatio-
nis Deus, absque negotio paries fructus hono-
ris, & honestatis ; quia ut idem Pater in expo-
sitione Epistolæ ad Galat. docet : Quod ampliùs
nos delectat, secundùm id operemur necesse est. Et
iterum : Manifestum est certè secundùm id nos
vivere, quod sectati fuerimus : sectabimur autem
quod ampliùs dilexerimus.

SPECVLATIO II.

Intellectum, voluntatem, & appetitum sensitivum, quæ rationi subiectum, perfundere potest eximius variarum virtutum apparatus.

Explicatâ essentiâ, & notione virtutis, subiectum eius interpretamur, quod ad eius naturam penetrantiùs vestigandam non parùm conducit. Sed illud in primis supponimus, virtutem nec in potentiis merè naturalibus, nec in membris externis, nec in sensibus internis secundùm se spectatis, & ex instinctu naturæ operationibus ullatenus reperiri. Quia nimirum omnes hæc facultates nullo modo sunt ad bonè, vel malè agendum indifferentes, sed unicæ sunt actioni, unico agendi modo alligatæ; si enim recta & integra sit qualitas naturalium constitutio, semper bonè agent; si mala, vel viciata, malè semper vitiosè. Vnde ex frequentia actuum per se maiorem facilitatem non acquirunt, sed ad summum per accidens, non generatione ullius habiles, sed remotione impedimentorum; quatenus hæc potentiæ exercent operationes suas mediis qualitatibus naturalibus, calore, frigore, specieuus ab obiectis impressis; pro quarum meliori, vel deteriori dispositione magis, vel minùs sunt ad operandum expeditæ. Sic potentia nutritiua faciliùs cibos concoquit assuetos, insolitos ægrè digerit.

digerit ; quia sicut ab assuetis non fit passio, ita ab inassuetis turbatur naturalis habitudo. Sic instrumenta etiam externa usu fiunt poltiora, & aptiora : sic quævis organa otio torpentia & veluti obstupefacta, usu excitantur, atque ad agendum propelluntur : sic aves nonnullæ iteratorum verborum species retinentes, ad loquendum instituntur ; sed his vocalis assuetæ, nec liberè garriunt, nec quæ loquuntur percipiunt. Hoc supposito videamus, quomodo intellectus, voluntas, & appetitus sensitivus, virtutis sedes, ac subiectum esse possint.

Primum virtutis subiectum intellectus.

Primò quidem de intellectu res est facilis; cum enim intellectus habeat indifferentiam, non quidem libertatis, sed perfectibilitatis, & sit indifferens ad intelligendum bene, vel malè, sæpeque objectum attingat sub ratione falsi, vel verisimilis, procul dubio indiget habitu & virtute intellectuali, ut inclinetur, determinetur, ac firmetur in assequutione, & possessione veri, & cognitione habitudinis prædicati cum subiecto : difficilis namque est inquisitio, & multò magis intentio veritatis, quæ licet per se luceat, tantis tamen tenebris obvolvitur animus, in tot præjudicia affectuum corruptione distrahitur ratio, adeoque multiplici adulterantium probabilitatum colore veluti pigmentorum illita falsitas persæpe fucatur, ut nisi virtutum intellectualium ope muniremur, veritatem citò, nec promptè, nec sine alicujus permixtione erroris addisceremus.


Illud

Illud porò sciendum, habitus intellectu les, virtutis simpliciter talis nomen nec reverà mereri, nec à Theologis hætenus obtinuisse. Cum enim veritas naturalis, ad quam inclinat, sæpè nimis vitio voluntatis compatiatur, habitus intellectualis, quo veritas acquiritur, non facit simpliciter bonum habentem, sed secundùm quid, & cum addito, putà bonum Philosophum, bonum Oratorem: nomen quippe virtutis ad significandum rectitudinis moralis principium impositum est, quanvis deinde ad significandam quamlibet aliam etiam physicam rectitudinem translatum sit.

Hinc tam sollicitè præberi sibi cor humanum petit Deus, tanquam præcipuum, & ferè unicum hominis bonum: hinc pax hominibus bonæ voluntatis denunciatur: hinc teste Bernardo lib. de grat. & liber. arbit. *Creari quodammodo nostri per liberam voluntatem, quasi Dei efficiuntur per bonam voluntatem.*

Hinc, teste eodem Patre, nihil odit, aut punit Deus quàm propriam voluntatem: *Cesset voluntas propria, inquit, & infernus non erit*: est autem voluntas perversè propria, cum non est communis Deo & hominibus, sed est nostra tantùm, quando nimirum quod volumus, non ad honorem Dei, non ad utilitatem fratrum, sed propter nosmetipsos facimus, propriis intendentes satisfacere motibus animorum.

Hinc exigua in speciem opera de promptæ voluntatis thesauro manantia, apud Deum grandia sunt, & ut ait Magnus Leo serm. 2. *Nunquam merito caret etiam in tenui facultate bona voluntatis opulentia.* Quin ipsa efficacis voluntatis desideria Deo accepta sunt, si procedant de corde bono,



bono, & optimo : & effectu sine culpa dum carent, nullâ tamen mercede fraudantur. *Mens boni studii, ac pii voti*, inquit Saluianus initio de prouid. *etiamsi effectum non inuenerit cœpti operis, habet tamen pramium voluntatis. Cùm tantum non possumus, quantum volumus, operari* (addit Gregorius hom. 16. in Ezech. & 5. in Euang.) *omnipotenti Deo occulta amoris nostri sufficiunt. Ante Dei oculos nunquam est vacua manus à munere, si fuerit arca cordis repleta bona voluntate; nihil quippe offertur Deo ditius bona voluntate.*

Dices : Prudentia est virtus intellectualis, cùm ejus sit dirigere, bene consiliari, & imperare ; imò est regina, & auriga virtutum moralium : ergo datur habitus intellectualis perfectam virtutis rationem obtinens.

Respondeo quod licet intellectus secundum se spectatus non sit capax nisi virtutis secundum quid ; tamen prout mouetur à voluntate potest esse subiectum virtutis simpliciter, & tendere ad bonum morale, quod est obiectum virtutis. Sic prudentia respicit verum non speculatiuè, & sub ratione conformitatis ad rem enuntiatam, sed prout est consonum appetitui recto : quod ex eo magis patet, quod interdum in discursu prudentiali potest esse falsitas speculatiua, & ignorantia recti, vt quando Iacob sic arguebat : Licitum est accedere ad suam : Lia est mea : ergo. Vbi minor erat falsa per ordinem ad rem enuntiatam, non tamen per ordinem ad appetitum rectum

*Voluntas secundum virtutis subjectum,
sed non in ordine ad bonum
proprium.*

Secundò certum est, virtutes voluntati esse necessarias, tum in ordine ad bona supernaturalia quæ excedunt proportionem voluntatis, tum ad promptè amandum bonum alienum ordinis naturalis: licet enim illud bonum sit rationi consonum, tamen quia amor sui, qui prima hominis perditio fuit, semper in homine dominatur, in iustis quoque ad agonem perseverat, & tam subtiliter, tam callidè, tam grātè insidiatur, ut operacuncta pervadat, intentiones secretiores corrumpat, amorem Dei sæpè inveniatur. Vnde dixit Philosophus: *Amabile bonum, unicuique autem proprium.* Inde est, quod ad depurandum, vincendumque amorem necessaria est virtus iustitiæ, eique affines, ut non obstante proprii amoris pondere, alienis etiam utilitatibus consulamus. Imò tam infitum est, tam affectibus nostris infeminatum concupiscentiæ virus, ut ad illud penitus curacuandum non sufficiat virtutis moralis studium, nisi gratia virtutum conatus & præueniat, & roboret, & confirmet, ut alibi dicemus. *Licet, inquit Bernardus serm. 2. in cæn. Dom. damnationem abstulerit Christus, tamen ad humiliandos nos concupiscentiam adhuc patitur vivere in nos, & graviter affligere nos, ut sentiamus quid nobis gratia præstet, & semper illius auxilium requiramus.*

Docet tamen. S. Doctor *quæst. 1. de virtut. artic. 5.* voluntatem nullâ indigere virtute superaddi

peraddita ad attingendum bonum rationis proprii suppositi. Ratio est : cùm habitus ad hoc sit duntaxat ordinatus, ut potentiam ultimò compleat, determinet, & faciliter, in illa solùm potentia opus est habitu, quæ non est proportionata, determinata, completa, & expedita ad objectum bonum : atqui voluntas est proportionata, determinata, completa, & expedita ad attingendum bonum rationis, saltem privatum; cùm enim voluntas sit ipsamet inclinatio rationalis, seu inclinatio in bonum rationis, vel ad nullum, vel ad proprium bonum inclinatur, nec indiget alio, quo inclinetur ; quia quod est per se tale, non indiget fieri tale per aliud, maximè cùm proprii suppositi bonum nihil habeat excedens proportionem, aut vires voluntatis, unde non est per se difficile voluntati : virtus autem non nisi ad vincendam difficultatem ex natura, seu arduitate objecti petitam exigitur. Ergo voluntas non indiget virtute superaddita ad prosequendum bonum proprium, benè tamen ad attingendum bonum alienum, à cuius prosecutione vel retardari, vel omninò diverti potest voluntas per aliquid in se existens, inclinationem nimirum in bonum proprium, quæ est primum vivens, & ultimum moriens, quæve sæpe bono alieno adversatur.

Dices, voluntas non est sufficienter completa ad attingendum bonum rationis ; tum ob ingentiam ad bonum, & malum indifferentiam ; tum ob intimam in bonum delectabile, quod sæpè honesto adversatur, propensionem ; tum quia si vitii capax est voluntas post repetitòs actus peccati, quidni subjectum virtutis contrariè esse poterit ? Tum demùm quia voluntas naturam, & condi-

conditionem intellectus sequitur, modum agendi imitatur, & eadem proportionaliter habituum supellectili instruitur. Intellectus autem ad attingendum quodcumque verum indiget habitu virtutis, etiam ad prima principia; ad speculativa habitu intelligentiæ, ad practica synteresi: ergo similiter ad quodcumque bonum obtinendum accessione virtutis opus habet voluntas.

Respondeo virtutem non dari ad tollendam, vel ligandam indifferentiam, quæ est de essentia libertatis, sed ad eam in unam partem, bonam nimirum, inclinandam. Cum ergo voluntas suapte sit naturâ in bonum rationis propensissima, imò sit ipsamet propensio rationalis, non indiget adventitio illo habitu flectente voluntatem in bonum proprium, cujus amor in intimis visceribus, & medullis voluntatis indivulsè insitus est, estque prima tunica quam induit, ultima quam exuit cor humanum. Nec obest quod etiam in bonum delectabile proclivis sit, quia illud bono honesto proprio subicere potest; in appetitu quippe rationali, quæ est voluntas, præminet amor boni rationalis, nec circa hoc patitur illam intrinsecam difficultatem ortam ex excessu, & inproportionè objecti, sed ex extrinsecis duntaxat impedimentis, & immoderatis passionibus appetitus, qui solus proinde debet virtutibus temperari.

Fatentur tamen nostri Thomistæ, in voluntate ponendos esse habitus continentię, & perseverantię, ut eam, quam à passionum conflictu peripit, difficultatem evincat; non quòd voluntas non sit satis in proprium bonum inclinata, sed quia ex passionum nebalis, & æstibus paritur, & luti instillatur inordinatum de finibus virtutis.

eum iudicium; qualis enim unusquisque est, talis & finis videtur ei. Et quia voluntas naturaliter sequitur ductum rationis, ne à ratione perversis præjudiciis occupata in malum apparentis boni specie fucatum præceps ducatur, indiget aliquo continente, & in bono firmante, ut voluntas puram veritatem inter privatorum præjudiciorum tenebras in parte superiore intermicantem inconcussa diligat, & in fide stabilis, & in opere efficax perseveret. Non enim sufficit bene incipere, nisi studeat quis in bono opere perseverare; & in cassum bonum agitur, si ante terminum vitæ deseratur; frustra velociterque currit, qui priusquam ad metas deveniat, deficit. Illam autem intrepidam, & immobilem in bono etiam proprio retinendo firmitatem tot passionibus impugnatam, tot privatorum affectuum, & corrupti iudicii anteoccupationibus attentatam continentia pugnans defendit, perseverantia coronat. Certè sicut voluntas in medio insidiatorum, in confictu præliorum est, inter tot tentationum experimenta, & tot hostium certamina nullam sperare posset in congressione victoriam, nisi prædictorum foret instructa munimine; quia si plerumque navem incautè religatam etiam de sinu tutissimi litoris unda excutit, cum tempestas excrevit; multò faciliùs voluntatem tot adversarii aut tribulationibus frangerent, aut illicitis mollirent, aut tædio tandem fatigarent, & ut loquitur Gregorius, voluptate cor perforante facilè persuasionis gladius ad intima rectitudinis munimina irrumperet, nisi continentiae robur, & perseverantiae vigor voluntatem pendulam figerent. infirmam confirmarent.

Ad id, quod dicitur, voluntatem non minùs esse

esse capacem virtutis, quàm vitii intra sphaeram boni proprii: respondeo esse disparitatem; quia cum voluntas suapte natura in vitia, bono præsertim proprio contraria, propensa nequaquam sit, vitium enim est contra naturam, & rationem; quid mirum si actibus malis generetur in voluntate habitus vitii inclinationem inclinatam inflectens; & pervertens? At verò voluntas in bonum proprium prona est, unde nullo indiget aditamento virtutis bonum proprium inquirentis; sed debet sibi permitti, & à passionum turba segregari, ut rationis ducatum sponte sequatur: quia nihil est in voluntate, quod possit inclinationem in bonum proprium retardare; si quis verò sit obex, totus se ex parte appetitus tenet, cuius & impetus, & insultus solo continentiae, & perseverantiae vigore superabit, & iteratis actibus ad generandum in appetitum sensitivum fortitudinis, & temperantiae habitum disponet.

Ad id, quod ultimò dicitur de proportionem, similitudinem, & æquali ornatu intellectus, & voluntatis, cæteris paribus verum est, sed est in hoc puncto discrimen: quia intellectus de se, & ut sic dicam, à nativitate non est in actu primo ad cognitionem veri sufficienter instructus, sed est veluti tabula rasa, indigetque specierum, & habituum supellectile, quâ veritatem assequatur: at voluntas est essentialiter inclinatio in bonum rationis, saltem domesticum, quia vel nihil amat, vel bonum rationi suæ consonum amat; cum teste Philosopho, *amicabilia ad alterum veniant ex amicabilibus ad seipsum*. Quamobrem repetitis à voluntate virtutum actibus nullus producit habitus, sed sola explicatur inclinatio voluntatis, dum in actus funditur; sicut nulla in la-

pide generatur habilitas, quàmlibet iterè in centrum projiciatur; nullum accrescit facultati sensitivæ, nutritivæ, aliisque virtutis augmentum per iteratas operationum suarum vices, quia satis sunt ad functiones suas à natura paratæ, satis munitæ, satis, & sæpè plusquam satis inclinatæ.

Scio nonnullos arbitrari, nunquam ex perverforum actuum frequentia, quantaquanta sit, generari pravam in voluntate habitum bono honesto proprii suppositi oppositum, renitente & impediante intimâ in proprium bonum inclinatione, quam comparant lapidi, qui propriâ naturâ ad motum deorsum propensas, quantumcunque sursum dejiciatur, nunquam tamen ascendendi facilitatem acquireret.

Verùm prior responsio, & solidior est, & experientia conformior; plures enim ita corrupti cernimus judicii, adeoque perditæ voluntatis, ut sponte suâ in peccatum & labantur, & labi ament, & non labi præ voluptate aggravante non possint. *Tanta est cecitas hominum*, inquit August. lib. 3. conf. cap. 3. *de cecitate etiam glorianrium. Ex voluntate*, addit lib. 8. cap. 5. *perversa facta est libido; & dum servitur libidini, facta est consuetudo; & dum consuetudini non resistitur, facta est necessitas. Lex peccati est violentia consuetudinis, quâ trahitur, & tenetur etiam invitus animus eo merito, quo in eam volens illabitur.*

In hujusmodi autem perverforum hominum voluntatibus nullum dari vitii habitum inclinantem in malum, & propensionem nativam in bonum ferè extinguentem, nemo rationabiliter cat inficias. Nec est simile de lapide, quia prævalente propensione ad centrum, semper resistit motui sursum, qui ei semper violentus est: at voluntas

voluntas assueta peccato, nedum vim non patitur dum peccat, sed non magnam vim pateretur, si sibi à peccato temperaret.

Tertium virtutis subiectum appetitus sensitivus.

Denique admittimus virtutes in appetitu sensitivo, prout natus est obedire rationi. Cujus ratio est, quia appetitus sensitivus in homine virtutis est capax, & indigus. Capax quidem, quia ut aliqua potentia sit capax virtutis, tria requiruntur: primò, quod sit apta moveri & regulari à superiori: secundò, quod non sit uni operandi modo alligata: tertio, quod sit operis perfecti elicitiva. Appetitus autem sensitivus, prout est in homine, & est à ratione mobilis, & dirigibilis, nec est ad unicuique agendi modum determinatus, sed modò juxta rationem operatur, modò exorbitat; & denique opus elicit morali perfectione consummatum, quando passiones irascibilis, & concupiscibilis temperantiâ, & fortitudine ad medium reductæ sunt. Indiget etiam appetitus sensitivus virtutum apparatu, solus namque appetitus difficultatem patitur in exercitio virtutum, quia moderatio passionum voluntatis inclinationi consona est, sed appetitui dura, & difficilis; quam difficultatem virtutes superant, tum efficienter eliciendo actus oppositos passionibus immoderatis; tum formaliter ipsum inclinando, & sui communicatione impertiendo pronitatem in objecta bona. Unde sic breviter formatur discursus: Ponenda est virtus in subiecto capaci, & indigenti: sed appetitus sensitivus, prout est in homine, est capax eliciendi actus virtutum mo-

ralium, scilicet passiones moderatas; indiget etiam virtutibus, ut passiones illas ad medium revocet: ergo in appetitu sensitivo resident virtutes morales moderantes timores, & audacias in discrimine vitæ, & cohibentes delectationis libidinem in cibis, & venereis.

Dices: Appetitus sensitivus nequit attingere objectum virtutis, quod est bonum honestum; tum quia objectum adæquatum appetitus sensitivi est bonum sensibile, & delectabile; tum quia appetitus non potest ferri, nisi in bonum propositum à sensu; sensus autem nequit proponere practicè bonum honestum, quod est officium prudentiæ, cujus actus in sensu non invenitur. Tum quia objectum virtutis non attingitur nisi à potentia libera, quæ sit capax bonitatis moralis, & ideo virtus definitur habitus electivus, quia actus virtutis est actus liberæ electionis versantis circa bonum honestum; electio autem est actus voluntatis, non appetitus sensitivi.

Respondeo appetitum sensitivum, ut est in homine natus obedire rationi, posse attingere bonum honestum ex conjunctione ad voluntatem, & imperio rationis intra limites proprii objecti, subindeque ferri posse in bonum honestum singulare. Illud enim naturæ ingenium est, ita rerum ordines infibulare & mutuis catenis alligare, ut inferiora ad superiorum, quibus immediate subsunt, perfectiones accedant, easque exprimant & imitentur, secundum celebrem illam Dionysii maximam: *Supremum infimi attingit infimum supremi*. Unde sicut in perfectioribus plantis quædam relucet imitatio sensus animalibus proprii, & in nobilioribus animantibus splendent humanæ rationis ac prudentiæ vestigia; sic à fortiori

fortiori appetitus sensitivus in homine dotes voluntati eximias fin exscribere, saltem adumbrare facile potest, cum sit omnium sensitivarum facultatum suprema, & voluntati intimè conjuncta. Unde fit, actus appetitus in homine participare libertatem, nedum extrinsecam, quatenus potest à ratione vel imperari, vel impediri; sed etiam intrinsecam, licet imperfectam, & ex conjunctione ad rationem, & ex influxu voluntatis ipsum applicantis.

Nec obest, quod appetitus dirigatur cognitione sensus: non obest, inquam, quia ipsa cogitativa, quæ appetitum dirigit, ex unione ad rationem participat etiam indifferentiam ad discernendum unum ab alio, & potest attingere bonum spirituale singulare, saltem implicite, & in actu exercito: docet enim D. Thomas 2. 2. *quæst.* 49. *art.* 2. cogitativam posse cognoscere minorem syllogismi prudentialis, & consequenter conclusionem; ac proinde in virtute maioris potest intellectus movere appetitum ad illud bonum honestum, quod cogitativa in actu exercito apprehendit; licet ipsum nequeat in actu signato, & speculando investigare. Ex quo fit, appetitum in homine immediate quidem per sensum dirigi, mediate tamen à ratione, & prudentia in ea existente regulari.

Ex quibus etiam patet ad ultimam probationem; nam per illud libertatis intrinsecæ stillicidium ex conjunctione, & influxu voluntatis, & rationis in appetitum derivatum, convenit etiam appetui quædam imitatio electionis; unde virtus in eo residens habitus electivus merito dici potest. & quatenus elicit actum appetitus, in quem derivatur ordo rationis; & quatenus mo-

deratur passiones appetitus, quæ electionem voluntatis perturbant; & quatenus actus appetitus ad mediocritatem reductus, est consuminatio electionis voluntatis. Quomodo autem appetitus possit esse subjectum virtutum moralium infusarum, alibi ex professo tradetur.

Id etiam pro solutione multarum objectionum advertendum, quasdam esse virtutes morales, quæ non solum passiones moderantur, sed etiam alterum respiciunt; ideo eas geminare necesse est, & alteram in voluntate, alteram in appetitu collocare.

Sic humilitas prout importat subjectionem ad Deum, estque pars justitiæ, residet in voluntate; prout verò moderatur inordinatum excellentiæ appetitum, residet in appetitu. Sic liberalitas, & magnificentia, quatenus temperant passiones pecuniam inordinate amantes, in appetitu inhærent; quatenus verò se extendunt ad alios, in quorum utilitatem sumptus fiunt, in voluntate recipiuntur.

REFLEXIO.

Quid injustam excusationem proferes, quod malus sis, qui potentias omnes, & singulas invictarum, & invincibilium virtutum munimento vallare potes? An fortè circumstantis nos peccati insidias timebit ratio, quam regit prudentia, virtus illa oculata, quæ ut ait Bernardus lib. i. de consider. cap. 8. *inter voluptates, & necessitates media quasi quadam arbitra sedens, utrimque certis limitibus determinat fines, istis assignans, & præbens quod sat; illis quod nimis demens?* An voluntatem tentabit, concutietve peccatum, quam firmat justitia, quod suum est unicuique tribuens.

tribuens? An appetitum infrunita turbabit passionum vis, quem innumerabilis virtutum honestas moderatur? Ergo macte animo, Lector, intrepidus resiste, quem fortissimarum virtutum chorus circumagit ut protegat, adest ut pugnet, roborat ut defendat. Nec turberis, si interdum oneri cedas, vel inter pugnandum saucieris: ne despondas animum, si post justificationem superfunt adhuc, molestæque sollicitant insidiantes hostes, nec desint foris pugnae cum peccatoribus, intus cum perturbationibus. Lenta est enim virtutis operatio, imitaturque naturam dispensantem se incrementis fallentibus? Quid trepidas? quid formidas? quid deficis? Non tibi data est virtutum beatissima copia, ut otieris, sed ut pugnes; quia fecunda peccatorum radix concupiscentiâ mortificari potest, interfici non potest; & ut ait August. serm. 43. de temp. *Quotidie minui potest, finire non potest.*

Porrò omnes potentiae virtutibus instruuntur, ut appetitus inserviat voluntati, voluntas rationi, ratio Deo obtemperet, utque tota hominis vita, ut ait Seneca, *unius coloris sit.* Quid iustius, quam ut homo in omnibus potentiis suis Deo serviat? cui nolens servit etiam dum refugit servitutem. Quia ut ait August. *Serviunt nolentes: ejus dispositioni, qui volentes non subiecti sunt ejus praecepto.* Ergo non solum omnia ossa mea, sed & omnes animae vires virtutibus ornatae Deo dicent, *Domine quis similis tibi?* Nec tuam timor servitutem, quia non tibi necessitas, sed charitas servit; dumque tibi servit, regnat, quia passionibus principatur; & ideo dicitur, quod servite Deo, regnare est. *Vis serviat anima tua caritati,* inquit Augustinus, sermone 43. de verbis

Apostoli, Deo serviat anima tua : debes regi ut possis regere.

SPECVLATIO III.

Duplex præcipua proprietas virtutum moralium, mediocritas, & connexio.

PRima probatur ratione (Patrum enim testimonia in reflexione referemus.) Necessitas constituendi medium in aliquo objecto provenit ex eo, quod indiget regulâ & mensurâ, quia nimirum vergere in excessum, vel defectum potest; sicque opus est moderatione rationis, ut in ejus prosecutione nec deficiamus, nec excedamus : sed omne objectum virtutis moralis indiget hujusmodi regulâ, & mensurâ; cùm ejus bonitas consistat in conformitate ad regulas rationis, & legis : ergo virtutes morales consistunt in medio, seu sunt habitus electivi in mediocritate consistentes.

Dices : Sunt aliquæ virtutes, quæ per se ad aliquid magnum & quasi extremum operandum inclinant; nam magnificentia in extremis sumptibus exercetur, virginitas ab omni prorsus venere, & carnalis delectationis sensu voluntariè abstinet : humilitas omnibus, & semper se inclinat, nec locum sitis infimum reperit, quò se dejiciat : poenitentia irremediabilibus lacrymis peccata deflet. Ergo virtutes morales in mediocritate non consistunt.

Respondeo virtutes illas enumeratas absolutè quidem, & magna ex parte respectu objecti quasi extrema

extrema operari ; in illis tamen mediocritatem à ratione præstitutam servare. Verbi gratiâ , magnos thesauros effundit magnificentia , sed in ordine ad Dei gloriam,rel regni sui splendorem eos Rex sine excessu sumptus facit. Virginitas etiam omnes voluptates rejicit , & omnia arbitratutur ut stercora ; sed hoc proportionatum est amorì & contemplationi sponsi cœlestis : excessus tamen vel nimix macerationis corpus in servitutem redigentis , vel nimix solitudinis specie tuendæ virginitatis , & alios similes moderatur. Quod idem dic de humilitate animum quidem deprimente , & exteriores humiliationes exercente : fatuitates tamen , quas aliqui specie humilitatis affectant , resecat , & tanquam indignas christiana gravitate aspernatur. Idem etiam de pœnitentia liquet , quæ licet propter amorem Dei summè dilecti sine modo doleat voluntate , sensibilem tamen dolorem nimium , nimiam etiam corporis castigationem temperat. Unde prudentissimus Paulus incestuosum pœnitentem abundantiori tristitia absorberi non vult , imò præcipit ut ei donetur , eique fiat objurgatio consolatione temperata,ut patet 2.*Cor.* 2. Quod observari velim ab illis austeris animarum , non tam rectoribus , quàm tortoribus ; confessariis , inquam , imprudentissimis , qui pœnitentes erubescerites , & pudore perfusos opprimunt , non arctarum Evangelij maximarum sacro , & nunquam deserendo rigore ; sed verbis duris , inconditis , imperio , & impatientis animi cacozelo reseritis. Quantò melius Samaritani à Veritate laudati charitatem æmularentur , qui sauciati plagis vinum effudit , & oleum : vinum forte , & robur. *Inviolata Ethica Christianæ* , nullis cor-

ruptelis pervia; sed oleum eloquiorum dulciorum super mel & favum: vinum expurgans laxitatem putredinem; oleum ingerens spiritus dulcedinem: vinum pungens, ut timeant; oleum leniens, ut magis ament quem formidant Deum. Cogitent confessarii se illius personam gerere, qui simul & arctam viam prædicavit, & quotidianam crucem injunxit; vim sibi inferre præcepit, & simul omnes laborantes à se reficiendos ad se vocavit, & vicariis suis tam humane, & amanter dixit: *Discite à me, quia mitis sum, & humilis corde.* Porro hac appendice absit ut eos carpam, qui & absolutionem in peccata recidentibus denegant, & incorruptas sequuntur Ecclesiæ leges: quin illi, sicut Dei lumine, & prudentiâ spiritus perfusiores, ita & mansuetudine mitiores esse solent.

Sed illud observandum, quod quia objectum justitiæ est indivisibile, nec potest ullâ omnino circumstantiâ variari, cum de ejus ratione sit, ut tantum reddatur quantum debetur, si fieri potest; ideo medium justitiæ dicitur medium rei; faciendo æqualitatem rei ad rem; æqualitatem, inquam, vel quantitatis ad quantitatem, vel proportionis ad proportionem. Primam servat justitia commutativa, mutuanti decem nummos decem pariter reddens: secundam servat justitia distributiva, dâns cuique non æqualiter, sed juxta meritum, & dignitatem: verbi gratiâ habenti meritum ut unum, præmii gradum unum largitur: habenti verò meritum ut decem, totidem præmii gradus impertitur: at verò aliæ virtutes dicuntur consistere in medio rationis, quia earum objectum non est ita fixum, ut variari non possit pro loco, tempore, personâ, aliisque circumstan-

cunstantiis ad arbitrium boni viri, & prudentis. V.g. in obiecto temperantiæ non potest rigidè, & strictè præscribi omnibus, & singulis eadem cibi quantitas, sed diversa pro diversitate temporis, complexionis, status, &c. Similiter in obiecto fortitudinis non potest una, & certa regula præfiniri in aggreffione & fuga observanda, sed eximiâ prudentiâ opus est.

Dices: Etiam justitia servat, & respicit medium rationis; actus enim justitiæ non secus ac aliarum virtutum debet ad rationis regulas exigi, ut debitum suo tempore, & loco, & purâ satisfaciendi intentione reddatur.

Respondeo ita esse; non enim denegamus justitiæ medium rationis ex generali virtutis moralis ratione illi conveniens; sed ei medium rei addimus ex propria ipsius specie, conditione, & caractere.

Observandum rursus est aliud discrimen, quod justitiam inter, & alias virtutes morales intercedit. Nimirum justitia nequit esse media inter duo vitia extrema pertinentia ad propriam materiam, quia nimirum non peccamus contra justitiam dum plus reddimus quàm debemus, sed duntaxat dum minùs solvimus: est tamen media inter vitia pertinentia ad alienam materiam, dum nimirum actus justitiæ vitiuntur per illum excessum, quo etiam aliæ virtutes violantur. Verbi gratiâ peccatur contra prudentiam, si solutio fiat præmature tempore cum nocumêto proprio ex nimio promptè aliis satisfaciendi desiderio, peccatur contra liberalitatem, si solutio cum prodigalitate fiat, ac nimio excessu, & profusione; & tunc valor illud Scripturæ oraculum: *Noli esse nimium justus*. At verò aliæ virtutes morales in-

ter duo vitia extrema propriam materiam concernentia siue sunt, quia elici actus vitiosi possunt, siue deficient, siue intra propriam lineam excedant, ut patet in actu liberalitatis medio inter prodigalitatem, & avaritiam; in actu prudentiæ medio inter imprudentiam, & astutiam; & sic de aliis.

Observandum tertio, medium etiam in aliis virtutibus quadantenus inveniri. In primis virtutibus intellectualibus facile hæc doctrina applicari potest, quia à veritate, quæ est earum objectum, potest quis recedere affirmando plus, vel minus, quàm res se habeat; unde medium scientiæ, & sapientiæ est medium rei; artis verò est medium rationis à prudentia præfinitum; nam medicus portiones distribuit secundum prudentiam; & architectus aliter, & aliter ædificat pro loco, tempore, aliisque necessitatibus, & circumstantiis.

Quoad virtutes autem theologicas docent communiter Doctores, eas non consistere in medio per se, & ex parte objecti formalis, quia ut docent Patres, modus diligendi Deum, est illum sine modo diligere, eumque sine discretionem, & termino esse amandum, qui in finem, & sine fine dilexit nos: licet enim contra Deum possumus deficiendo peccare, si non satis in eum credamus, speremus, amemus; non tamen in iis officiis implendis possumus excedendo peccare nimia fide, spe, dilectione in eum, cujus veritas, virtus, & bonitas sunt infinitæ; unde & beatus dicitur qui in mandatis ejus capit nimis.

Fatentur tamen iidem Doctores, per accidens posse in illis excessum contingere, si nimirum in earum virtutum actibus eliciendis tempus illud

imper-

impendatur, quod esset aliis subeundis functionibus insumendum. Intempestivè, verbi gratiâ, sacris contemplationis affectibus operam navaret, quem subveniendi proximo extremè laboranti præceptum fraternæ charitatis. urgeret. Charitas namque non solùm flagrare in corde, sed monstrari debet in opere; nec enim verè Deus sine proximo, nec proximus verè diligitur sine Deo. Quavis enim debeamus amare in creatura creatorem, & in factura factorem, ne teneat nos quod factum est, & amittamus eum, à quo omnia facta sunt; tamen Deum propter Deum. sæpè relinquimus, & quos Deum in oratione audire, & in lectione divina discere invitat suavitas veritatis, proximum docere cogit necessitas charitatis. Potest etiam excessus per accidens obvenire, si supra ingenii, vel corporis vires, nimia erga divina applicatione vires frangimus, & obsumus sanitati: unde ortum habet gravissimum illud, ac maximè necessarium vitæ christianæ & spiritalis. præceptum, quo mopenitur infirmus nondum in charitate radicatus, ne majora viribus audeant. Nam ut ait Bernardus serm. ad Frat. de monte Dei: *Cùm nullum finem, vel terminum habere debeat devotio amantis; tamen terminos suos, & fines, & regulas habere debet actio operantis.* Et Thomas à Kempis lib. 3. c. 7. *Quidam incauti propter devotionis gratiam seipso destruxerunt; quia plus agere voluerunt, quàm potuerunt, non pensantes suæ parvitatæ mensuram, sed magis cordis affectum sequentes, quàm rationis judicium: & quia majora præsumpserunt, quàm Deo placitum sit, idcirco gratiam citò perdiderunt, facti sunt inopes, & viles relictæ, qui in cælum posuerunt nidum sibi, ut humiliati & depauperati discant*

*discant non in aliis suis violare, sed sub pennis
meis sperare.*

Altera virtutum proprietas, connexio.

Secunda proprietas virtutum moralium est quod nunquam perfectè possunt comparari, nisi omnes simul habeantur; unde virtutes morales in statu perfectò inſimam habent inter se, & cum prudentia connexionem.

Antequam stabiliatur hæc proprietas, præ oculis habendum est, virtutes morales polle, & debere considerari vel in statu perfectò, vel imperfectò. Tunc habet virtus statum imperfectum, vel quando non pertingit ad rationem habitus etiam quoad essentiam, sed quandam sortitur rationem dispositionis ortæ vel ex naturali temperamenti complexione, vel ex actuum imperfectorum frequentia; vel si essentialem habitus rationem obtineat, solum tamen dispositionis modum habet, quia nondum satis firmiter subiecto inhæret, nec satis altis radicibus nititur.

In his sensibus non intelligitur sententia nostra: non quidem in priori; ex naturali enim insitæ indolis propensione potest quis in unam magis quàm in aliam virtutem esse proclivis: nec etiam in posteriori (quâ in re multi decepti sunt.) Certum quippe est, essentiam virtutis moralis non esse relativam, sed absolutam, sicque ad essentiam unius aliam necessariò non exigi.

Tunc autem dicuntur virtutes habere statum perfectum, vel quando sunt in gradu heroïco, & de hoc etiam non est lis; neque enim necesse est omnes virtutes esse præcellentes: vel quando sunt in gradu convenienti, & consono vitæ honestæ.

honestæ, in quo nimirum firmant animum contra passiones ingruentes, & imminentes peccandi occasiones, pariuntque delectabilem prompti animi suavitatem, quâ victis difficultatum obicibus, expeditè, & alacriter virtutum opera exerceamus : & in hoc sensu intelligitur nostra doctrina Patrum dictis in reflexione referendis prorsus consentanea ; & in hoc puncto situm est controversiæ totius momentum.

Ratio autem fundamentalis hujus necessariæ virtutum connexionis sic formatur : Tunc virtus habet statum perfectum, quando inclinatur ad promptè, & delectabiliter in propria materia operandum : sed id nequit virtus ulla moralis præstare, nisi adsit virtutum omnium comitatus. Tum quia nisi appetitus sit rectè dispositus circa objecta omnium virtutum, ægrè admodum actus in propria materia exercebit, ob quotidianum occupationum, & tentationum concursum, & conflictum, quo virtus vel convelleretur planè, vel certè concutietur, nisi aliarum fuerit virtutum satellitio roborata. V.g. quantumvis pudica sit, & casta mulier, si avara sit, vel timida, facilè à pudicitie proposito, vel divitiarum illicitis suasa, vel pœnarum minis deterrita avocabitur. Tum quia non potest esse virtus moralis in statu perfecto, nisi adsit perfecta prudentia, sine qua rectum non erit iudicium, & consilium, perversaque subinde erit electio mediorum : atqui non potest esse perfecta prudentia absque omnium virtutum apparatu, quibus absentibus nec appetitus erit rectus circa fines ; deficiente autem rectâ finis intentione cespitat prudentia in mediorum eligendorum iudicio ; nec poterit medium virtutis conservari inter, & adversus innu-

mera

mera, à quibus impetitur, & corrumpitur, nisi contra tot hostes, & circumstantes peccatum cæterarum virtutum copiis auxiliaribus virtus quæque muniat. Ergo intima est, indivulsa, & indissolubilis virtutum in statu perfecto concatenatio.

Dices: si nostra sententia sit vera, non poterit quis habere virtutem in statu perfecto, nisi frequentatis prius omnium virtutum actibus: debebunt etiam in instanti omnes virtutes comparari, & deperditâ unicâ cæteræ quæque statum perfectionis deperdent. Hoc autem triplex consequens absurdum videtur, & falsum. Primum quidem, quia actus nonnullarum virtutum, sin nunquam, certè rarò contingunt, quia exercendi occasio non occurrit: sic pauper nequit in actus magnificentiae, nec conjugatus in actus virginitatis prorumpere. Secundum etiam, quia omnium virtutum actus exerceri simul nec solent, nec possunt. Tertium pariter, quia pereunte unâ virtute, nihil aliis intrinsicum deperit, sicut nihil eis nec quoad extensionem, nec quoad intensiorem fuerat ex societate, & conjunctione adjectum: ergo necessaria non est virtutum moralium connexio.

Respondeo virtutes morales esse in duplici genere. Quædam enim sunt ordinariæ communes, & vulgares, quarum exercitium quotidie, vel frequenter occurrit, ut prudentia, justitia, temperantia, &c. Aliæ extraordinariæ, quarum actus à communi usu alieni sunt, & infrequentes earum exercendarum occasiones: tales sunt virginitas, & magnificentia; vel ob circumstantiam intervenientem opus habent difficillimum, & actum exigunt communem, & solitum operandi mo-
dum

dum excedentem, & vocantur virtutes heroïcæ, non quòd distinguantur specie à communibus, sed quia eminentem perfectionis non communis gradum obtinent; & has cum ordinariis saltem in actu secundo non esse connexas haud inficiamur, cum sapius ultra facultatem sit earum actus elicere; quanvis in actu primo connexas esse fateamur, in proxima nimirum dispositione, & animi præparatione, quæ ex virtutis & honesti legibus ita est animus comparatus, ut si per statum liceret, vel si se daret occasio, vel si urgeret præceptum, insolitarum illarum virtutum actus ederet, objectosque emergentium difficultatum obices superare.

Nemo ergo causetur, nemo inde excusationem obtendat, quod virtutes rarò occurrentes & inconsuetas non sibi paret; citò enim obviam veniunt virtutum saltem principaliùm materiæ, circa quas si se exerceat vir studiosus, brevi virtutes omnes assequetur, acquisitis enim virtutibus ut plurimum occurrentibus, aptatur animus, & quadantenus fingitur, ac formatur ad cæteras quasque virtutes, quas virtualiter, & quasi in proxima radice aut dispositione, in virtutum cardinalium, seu præcipuarum acquisitione comparavit.

Nec est inconveniens, quod in eodem temporis instanti acquiratur cumulatus perfectionis virtutum status; ad quod non requiritur ut omnes simul earum actus eliciantur, sed sat est si successivè id fiat, & tunc ultimâ virtute acquisitâ, omnes statum perfectum obtinebunt, quia v'm attingendi promptè, & facilè mediis in quacunque materia sortientur, nec ullam ex transverso irruentem molestiam vel non experientur
placè,

planè, vel certè patientur, vel saltem superabunt.

Non est etiam inconueniens, sed certum prorsus, quod pereunte unâ virtute, imminuitur, & deflorescit cæterarum virtutum nitor, quarum licèt non absumatur, vel ad nihilum redigatur essentia, deprimitur tamen perfectionis earum status, marcescit decor, infirmatur vigor; quia juxta commune adagium, *Virtus unita fortior est seipsâ dispersâ*. Certè sicut cadente fornicis tholo, seu umbilico, nutat, vel rimas agit arcuatum ædificium; & sicut dissolutis copiis, vel dispersis, disturbatisque militibus imminet exercitui clades; ordinatæ verò, colligatæque intrepidorum militum aciei affulget spes victoriæ: sic diuisum spiritale virtutum regnum desolabitur, & unius virtutis interitus aliarum infirmitas est; quia vitium in cor irrepens, dum unam virtutem, sibi nimirum aduersam interimit, alias inficit, & debilitat, & earum sensim fundamenta suffodiens, vel eas tandem convellet, vel saltem concutiet; culpa enim culpam parit; & peccatum, quod per pœnitentiam non deletur, suo pondere in aliud trahit; ac tandem spiritualis resolutio usque ad materiam primam miserabiliter continget, totius nimirum jactura pietatis, & funestum virtutum omnium naufragium: assimilabiturque anima adhuc vivens cadaveri vitâ functo, quia nullus in ea pietatis sensus, nullus christianæ vitæ spiritus micabit; nihil, quæ Dei sunt, sapiet, recedetque ab ea animæ anima Deus cordis nostri. Intravit autem mors per fenestram unam, quia permissio uni culpæ mortali aditu, sese insinuans peccatum unicam quidem virtutem in principio abegit, seque

seque in ejus locum suffecit; sed aliarum deinde virtutum ruinam paulatim machinatum, honestatis sedem in vas stercoreum commutavit; & anima veluti regina vestitu deaurato gratiæ adornata, circumdata virtutum varietate, ancilla effecta est, passionum ligata catenis, & funes peccatorum circumplexi sunt eam.

Instabis: Nihil reale advenit uni virtuti ex conjunctione, & societate alterius: ergo nihil deperit ex recessu illius, subindeque cum illa non erit ipsius connexa perfectio.

Respondeo, non deesse qui velint prudentiam in statu perfecto importare modum extensionis ad objecta omnium virtutum moralium, quem modum ei asserunt, dum elicetur consummatus prudentiæ numeris omnibus absolutæ actus; adduntque alias virtutes in statu perfecto importare modum subordinationis ad prudentiam ita perfectam. Sed eo placito in sua probabilitate relicto, necesse non est ut una virtus ex conjunctione ad aliam recipiat aliquam ex ejus consortio intrinsecam perfectionem, quia satis, superque acquiritur status perfectus per simultaneam cæterarum virtutum in eodem subjecto existentiam, quâ positâ facile actus exeret; sicut auriga currum juvante socio facilius trahit, & exercitus adauctis copiis promptius vincit.

Insistes: Duo hætenus supposuimus, quæ valdè incerta sunt. Primò, quomodo verum est, quamlibet virtutem pendere à prudentia perfecta, cum ipsamet prudentia pendeat ab omnibus virtutibus, sine quibus rectum judicium non foret in eligibilibus: quin datâ illâ virtutum à prudentia connexionem, quid vetat dicere cum Scotto, tot dari prudentias parciales, quot sunt prudentiæ

dentia, & quamlibet virtutem posse acquirere suæ veluti lineæ, & sphaeræ perfectionem beneficio correspondentis sibi partialis prudentiæ. Supposuimus secundò, virtutes morales rectè disponere appetitum circa finis intentionem; ad quod tamen sufficit congenita singulis in bonum honestum inclinatio, nec finem respiciunt virtutes, quæ sunt habitus electivi; electio enim circa media occupatur.

Respondeo, certissima esse illa duo præsupposita doctrinæ nostræ principia. Quid enim firmitus, & verius, quàm virtutes perfectas à prudentia pendere, ejusque directione egere, quæ à Philosopho, *operantis oculus*, à Chrysostomo, *lucerna anima*, & *regina cogitationum* appellatur. Et certè non minùs prudentiæ moderamine egent virtutes, quàm Logicæ directione cæteræ scientiæ, quæ tamen sine prælucente Dialecticæ face nequeunt in statu perfectò comparari.

Nec uliatenus inconvenit admittere mutuam prudentiam inter, & cæteras virtutes morales in diverso genere causæ dependentiam, quâ virtutes prudentiæ in genere causæ directivæ, & veluti formalis extrinsecæ subordinentur; prudentia verò aliis virtutibus in genere causæ dispositivæ egeat, quia ut rectum possit, & incorruptum de rebus omnibus in singulisque negotiis judicium ferre, opus omnino est appetitum circa fines virtutum omnium ornamento rectè disponi: opus est etiam, ut prudentia sit totalis, idest quæ ad materiam omnium virtutum se extendere possit, ut omnia extrema, quibus potest corrumpi medium virtutis, rescindat, quæ extrema per omnia virtutum genera divagantur.

Porro

Porro non eâ solùm de causa virtus habitus electivus nominatur , quasi circa mediorum duntaxat electionem tota occupetur , sed quia eam maximè juvat , difficultates operationis frangit , salebras exequutionis mollit , & lævigat , & ad praxim præcipuè inclinat.

Adde duplicem esse finis intentionem ; aliam quâ finis intenditur in communi , & abstractè , ut cum quis proponit studiosè vivere ; aliam quâ quæritur finis veluti concretus , & ad certam materiam determinatus : ad priorem intentionem sufficit rectitudo naturalis , ad posteriorem requiritur habitus virtutis : sed quia hæc secunda similitudinem præfert electionis , rectè virtus circa illam versans habitus electivi nomen sortitur. Per quæ patet responsio ad id , quod contra secundam suppositionem objectum est.

COROLLARIUM. *Virtutes sine charitate nec perfecta sunt , nec simpliciter vera.*

Ex his infero , in statu naturæ lapsæ nullas dari simpliciter tales virtutes , nec statum perfectionis obtinere , nisi cum charitate connexæ sint. Tum quia non potest homo in statu elevationis , in quo sumus , esse privatus charitate , nisi peccato mortali infectus sit : perfecta autem prudentia , sine qua diminuta est omnis virtus , cum peccato mortali consistere nequit , nec potest promptè , & integrè in quacumque materia , & eventu , & contra quæcumque impediencia de quovis negotio judicare ; quia corrupto per peccatum appetitu , obscuratur ratio ,

&

& iudicium depravatur, ut sæpè diximus: corrupto autem iudicio perfecta nequit esse virtus, quæ ideo, teste S. Thoma *quest. 55. art. 2. ad 1.* assimilatur sanitati, & pulchritudini; quia sicut per istas debitè disponitur corpus, ut rectè operetur, unumquodque enim quale est, talia operatur; ita virtus est quædam ordinata animi dispositio, quâ totus homo interior componitur, & disciplinæ rationis subicitur, ut sanata appetitus infirmitate, sanum de rebus iudicium feratur.

Tum quia sicut se habent prima principia in speculabilibus, ita fines in operabilibus: unde sicut illa scientia perfectione sui status caret, quæ licèt reducat conclusiones in aliqua principia, in prima tamen indemonstrabilia ea resolvere non potest, qualis est scientia subalternata in absentia subalternantis; ita virtutes morales, quæ perficiunt quidem voluntatem in ordine ad fines particulares, non tamen important ordinem subiectionis ad ultimum finem, habebunt quidem essentiam, sed non statum perfectæ virtutis: at sine charitate homo non est rectè dispositus circa ultimum finem; inò est ab eo aversus, à cuius tamen amore ducenda sunt vitæ moralis primordia: ergo sine charitate nulla potest esse simpliciter vera virtus, quia sine charitate deest subordinatio ad perfectam prudentiam, & verum finem, in quem omnes, quæ veræ sunt virtutes, collimant: unde virtus, teste Aug. *lib. de morib. Eccl. c. 15.* est *ordo amoris*: & *lib. 83. quest. quest. 30.* est *ordinatio, quâ fruendis fruimur, & utendis utimur.* Quia nimirum per virtutem ordinatur amor in nobis, ut exponit S. Thomas *quest. 55. art. 1. ad 4.*

ad 4. perversus autem ordo est, qui à Deo virtutum Domino non exorditur, nec eo studet frui summo bono.

In summa, non est virtus nisi benè utamur libero arbitrio; unde sententiosè S. Thomas *q. citata, art. 1. ad 3. dixit: Nihil est aliud actus virtutis, quam bonus usus liberi arbitrii.* Non est autem simpliciter bonus usus liberi arbitrii, nisi tendat ad optimum, cum virtus sit dispositio perfecti ad optimum: optimum autem, ad quod disponi debet homo per virtutem, Deus est, cui assimilari debemus, quive est ultimus finis noster: summa autem assimilatio hominis ad Deum, est secundum operationem: Deus autem in omnibus operationibus propter seipsum agit: igitur perfectio virtutum omnium est ad eum tendere, illique amore uniri, qui omnium bonorum principium est, & centrum.

Quin etiam non solum docet S. Præceptor, virtutes non esse perfectas sine charitate, sed nec esse simpliciter veras virtutes, ut videre est 2. 2. *quest. 23. art. 7.* quia cum virtus sit dispositio perfecti ad optimum, ille habitus deficit à vera ratione virtutis, quæ est in subjecto, quod non solum non subordinatur summo bono, sed ab eo positivè aversum est: sine charitate autem homo non ordinatur in ultimum finem, sed ab eo aver- sus est, non solum ut authore supernaturali, sed etiam naturali; exigit enim ratio naturalis, ut Deo omnia supponamus: ergo sine charitate homo non est bonus simpliciter & verè, nec ejus opus verè simpliciter bonum. Idipsum magis confirmat S. Magister *in solut. ad 2. ibi: Dicendum, quod cum finis s. habeat in agibilibus sicut principium in speculabilibus; sicut non potest sim-*

placiter esse vera scientia, si desit recta existimatio de primo, & indemonstrabili principio: ita non potest esse simpliciter vera iustitia, aut vera castitas, si desit ordinatio debita ad finem, qua est per charitatem, quantumcunque aliqua se recte circa alia habeat. Vides S. Doctorem virtutis nedum statum, sed etiam veritatem denegare carenti charitate; sicut nec vera, nec solida est scientia in habente falsam æstimationem de primo principio.

Hanc doctrinam luculenter docet, & ex professo probat variis in locis Augustinus. Nam *lib. 1. retract. cap. 3.* revocat quod dixerat *lib. 1. de ordine, cap. 3.* ibi: *Philosophos non vera pietate praeitos virtutis luce fulsisse.* Legendus est *lib. 4. contra Iul. cap. 3.* ubi nostram sententiam elegantius quàm dici possit, demonstrat. Noveris itaque, inquit, non officiis, sed finibus à vitiis discernendas esse virtutes. Officium autem, quod faciendum est, finis verò propter quod faciendum est. *Vera virtutes Deo serviunt in hominibus, à quo donantur hominibus. Quidquid boni sit ab homine, & non propter hoc fit, propter quod fieri debere vera sapientia precipit, etsi officio videatur bonum, ipso non recto fine peccatum est.* Quia ut deinde tradit, sicut per amorem Creatoris benè quisque utitur etiam creaturis; ita sine amore Creatoris nullus quisquam benè utitur creaturis. Idipsum repetit *lib. 1. operis iam perfecti*, cuius verba mutuatur, & exscribit Concilium Arausic. can. 17. *Fortitudinem Gentilium mundana cupiditas, fortitudinem Christianorum Dei charitas facit; qua diffusa est in cordibus nostris, non per voluntatis arbitrium, sed per Spiritum sanctum, qui datus est nobis.*

Quam

Quam doctrinam adeo veram existimavit Divinus Doctor, adeoque indivulsam ab amore putavit esse omnem virtutem, ut crediderit varias virtutes nihil aliud esse, quàm unum amorem varios in motus transfusum, atque in varios affectus mutatum & conversum. *Quod si virtus ad beatam vitam nos ducit* (inquit lib. de moribus Eccl. cap. 15.) *nihil omninò esse virtutem affirmaverim, nisi summum amorem Dei.* Namque id quod quadripartita dicitur virtus, ex ipsius amoris vario quodam affectu, quantum intelligo, dicitur. Itaque illas virtutes (qua ita utinam sint in mentibus suis, ut nomina in ore sunt omnium) sic etiam definire non dubitem, ut temperantia sit amor, integrum se prabens ei quod amatur; fortitudo amor faciliè tolerans omnia, propter quod amatur; iustitia amor soli amato serviens, & propterea rectè dominans; prudentia amor ea, quibus adjuvatur, ab eis quibus impeditur, sagaciter seligens. Sed hunc amorem non cujuslibet, sed Dei esse diximus, id est, summi boni, summa sapientia, summaque concordia. Et cap. 25. rationem S. Thome superiùs allatam sic illustrat. Sequitur profectò, quoniam summum bonum appetere, est benè vivere, ut nihil sit aliud benè vivere, quàm toto corde, totâ animâ, totâ mente Deum diligere, à quo existit, ut incorruptus in eo amor, atque integer custodiatur, quod est temperantia; & nullius frangatur incommodis, quod est fortitudinis; nulli aliè serviat, quod est iustitia; vigilet in discernendis rebus, ne fallacia paulatim, dolusque subrepat, quod est prudentia.

Quomodo ergo in sententia Augustini sine amore Dei posset esse virtus, cum doceat virtutes nihil aliud, quàm varium esse amoris affe-

Etum in non appetendis istis temperantem, in a nittendis, & duris simul facile ferendis fortem, in Dei obsequio justum, & ob hoc bene imperantem ceteris, quæ homini subiecta sunt, & in discernendis iis, quibus juvamus in Deum, ab iis quibus impedimur discernentem? Sicut enim in sententia ejusdem Patris, variarum animæ passionum causa amor est, vel potius, omnes illi motus sunt amor in varias veluti facies transformatus; amor inhians habere quod amat, cupiditas est; habens quod amat, eoque fruens, lætitia est; fugiens quod ei adversatur, timor est; idque si acciderit sentiens, tristitia est: ita similiter virtutes sunt amor ipse varios sese in effectus fundens, variasque in formas transfigurans; quia virtutum effectus formalis est animi rectitudo:

Recta autem voluntas est bonus amor; & voluntas perversa, malus amor, inquit Augustinus. Et epist. 52. In hac vita virtus non est, nisi diligere quod diligendum est: id eligere prudentia est; nullis inde avelli molestiis, fortitudo est; nullis illecebris, temperantia est; nullâ superbiâ, justitia est.

Scio Scotum, Gabrielem, & Durandum contendere, admitti posse virtutes simpliciter sine charitate. Scio etiam Cajetanum mediam inire viam, *Discretè, inquit, in hac materia loquendum est, ne risum gentibus excitemus, & Philosophis stomachum.* Additque, sine charitate reperiri posse in homine veras virtutes, & perfectione humanâ ordinatas, ratione cujus à Philosophis quidem, sed non à Theologis virtutis nomenclaturâ insigniri possunt. Quia Theologus finem respicit altiorem, nimirum supernaturalem; Philosophus verò sistit intra limites naturalis honestatis; & ideo

ideo quod secundum Philosophos est bonum simpliciter, secundum Theologos bonum duntaxat secundum quid reputatur. Sicut enim, ait, si medicus videat infirmum secundum principia artis non moriturum, Astrologus verò ex syderum affectione inferat eum citò animam acturum, uterque verum dicit, licet sibi in speciem contradicant, quia uterque mortem futuram, vel non futuram juxta diversæ scientiæ principia prænuntiat: ita similiter Philosophus ex propriis principiis affirmans virtutes studio humano comparatas esse simpliciter virtutes, verum profert; & Theologus id pernegans, verum etiam dicit, propter diversa utriusque principia.

Verum hæc S. Thomæ, & Patrum sententiæ nequaquam obsunt, nec de delicata Philosophorum teneritudine, cujus tantoperè Cajetanus rationem haberi vult, laborandum est; sed eorum potius objurganda superbia, quæ propriis juribus & studiis virtutis partum asserens, tanto periculosius turgescit, quanto sibi de virtutum specie blanditur. Præsertim quia bona, quæ agere videtur, corrumpit vanæ gloriæ amor; qui autem magis hominum, quam Dei gloriam querit, non benè bonum facit, quia non bona voluntate facit. Floccifacienda ergo, vel potius miseranda est superborum Philosophorum justitia, ut enim ait August. lib. 3. cont. Jul. & lib. 3. de liber. arb. *Quomodo sunt verè justī, quibus vilis est humilitas veri justī? Quid tam opus habens misericordiā, quàm miser? & quid tam indignum misericordiā, quàm superbus miser?* Et tractat. 43. in Joan. Dicant ergo Pagani: *Benè vivimus. Si per ostium non inirant; quid eis prodest unde gloriantur?* Ad hoc enim debet unicuique prodesse

benè vivere, ut detur illi semper vivere; nam cui non datur semper vivere, quid prodest benè vivere? Quia nec benè vivere dicendi sunt, qui finem benè vivendi vel per cecitatem nesciunt, vel per inflationem contemnunt.

Nec obest, quòd Philosophi de virtutibus, & vitiis subtilia multa tractent, dividentes, definientes, ratiocinantes, acutissimè concludentes, libros implentes, suam sapientiam buccis concrepantibus ventilantes, ut etiam discipulis dicere audeant: Nos sequimini, sectam nostram tenete, si vultis benè vivere. Nam ut ait Ambrosius, *præclara verba proferunt, verba tamen: & sæpè, ut observat Augustinus lib.10. confess.c.38. Sermo ore procedens, & facta qua innotescunt hominibus, habent tentationem periculosissimam ab amore laudis, qui ad privatam quandam excellentiam contrahere emendicata suffragia tentat.* Quare in Philosophis imperfecta tantum virtutum simulachra admittenda sunt. Et sicut in casu Cajetani Medicus non mentitur quidem, dum asserit ægrum non obiturum, cui juxta artis suæ principia mors non imminet, simpliciter tamen fallitur, si infirmus moriatur; & Astrologus simpliciter verum enuntiat, supponimus enim ægrotum è vivis discessurum: ita Philosophus simpliciter fallax est, dum sibi de virtutum copia blanditur pauper & superbus; quin in praxi reverà mentitur iniquitas sibi, nam virtutes quidem definit, dividitque Philosophia; sed solidarum virtutum praxim absque charitate non experitur.

Dices: Charitas est extra essentiam virtutum moralium, & forma extrinseca illarum, à qua mutuantur solum ordinem ad finem supernaturalem.

ralem, & vim promerendi præmium spiritale, & divinum: quæ omnia virtutibus moralibus extrinseca & accidentaria sunt: ergo sine charitate virtutes morales essentialem virtutis rationem simpliciter obtinent, tametsi ab externis, & adventitiis ejus ornamentis deserantur; status quippe naturalis omni debitæ perfectionis complemento independenter à supernaturalibus cumulat. Unde Aristoteles, alique Philosophi virtutes morales perfectas absque ordine ad finem supernaturalem sibi ignotum cognoverunt: ergo sine ordine illo dari, & inveniri possunt.

Respondeo, quod licet finis supernaturalis, & ordo ad illum sit extra essentiam virtutum moralium, tamen quia creatura rationalis est elevata ad finem supernaturalem, ideo licet relatio in finem supernaturalem sit extrinseca, est tamen debita, ut virtus sit simpliciter talis; quia bonum simpliciter ex integra causa, maximè verò ex ordine ad finem operantis pensari debet. Præsertim quia sine amore Dei nec declinare à malo, nec facere bonum homo diu, & facile potest potentiâ saltem consequenti, & in actum redacta: unde ad firmandum in virtutum obcundis officiis animum, ad resistendum temptationibus, ad dirigendos, componendosque humanæ vitæ mores, ab amore finis exordiendum est; qui sanè amor in statu naturæ corruptæ sincerus esse nequit, aut firmus, nisi diffundatur charitas in cordibus nostris per spiritum sanctum. Non inficiamur quidem hominem sine charitate posse elicere actus secundum quid, & ex objecto bonos, ordinatos nimirum ad aliquem bonum finem particularem: quia cum semina honestatis non penitus extincta sint, nec obliterateda prorsus

divinæ imaginis lineamenta; & liberum arbitrium peccato quidem infirmatum & fauciatum sit, non verò ad nihilum redactum, possunt Gentiles v. g. pro patria servanda, aut liberanda certare, nudum vestire, famelicum pascere; & quanvis si respiciatur quo fine id faciant, si discutatur motivum eorum, vix in illis opera inveniuntur, quæ justitiæ debitam laudem, defensionemve mereantur, ut ait Augustinus; tamen ipsos præsertim auxilio Dei moventis adjutos ob superstitem beatitudinis, & justitiæ amorem ab operis honestate posse inescari fatetur etiam non semel Augustinus, qui & ipsorum bona ex objecto opera, dona Dei esse *epist. 130.* affirmat. Hæc, inquam, non inficiamur; contendimus tamen actus illos non esse simpliciter bonos, nec à virtute simpliciter tali proficere, quia illis debita in finem ultimum ordinatio deest; debita, inquam, non ad hoc ut actus sit moraliter bonus secundum quid, cum aliquam ex objecto hauriat honestatem; sed ut sit simpliciter, & perfectè bonus, nihilque *ex plenitudine essendi*, ut loquitur S. Thomas, ei desit.

Non inficiamur etiam, Philosophos virtutis moralis essentiam, partesque speculative agnovisse, sed eas verè & simpliciter acquisivisse negamus, sicut speculative cognoscentes Deum non sicut Deum glorificaverunt. Quia ea sola opera bona simpliciter, & fructus virtutum dicenda sunt, quæ fiunt per dilectionem Dei: neque enim veraciter, atque sinceriter bona agimus, ut docet Augustinus, nisi veræ delectatione justitiæ, quæ est in fide Christi; nam sine fide impossibile est placere Deo. Et certè si absque charitate, & gratiâ vera posset esse justitia, gratis Christus mor-

tuus.

tuus esset, ut ex Apostolo discarrit idem Augustinus *lib. 3. cont. Iul. cap. 3.* Et si vitium est male misereri, idest non attentis à prudentia circumstantiis; vitium etiam, & peccatum omissionis; saltem est, infideliter, & non propter Deum misereri, ut ibidem argumentatur S. Doctor: misereri autem propter Deum sine amore Dei quis potest? Quare perfectio naturalium virtutum ob corruptionem naturæ, & status nostri elevationem, à supernaturalibus pendet: sicut natura semel agra artificialibus medicinæ remedijs, eget, quibus nequaquam indigeret, si in sua naturali incolumitate permansisset.

Hac de causa pulchrè & solidè dixit Joannes à S. Thoma disput. 17. de virtut. art. 2. *ex defectu charitatis virtutes acquisitas in nobis vulnerari, & rationem, habitus difficilè mobilis amittere.* Quia nimirum remotâ charitate nequit virtus, ulla facere habentem simpliciter bonum, cùm existens in peccato mortali sit simpliciter malus: non potest etiam virtus moralis firmum habere motivum in eo quod facit; quia firmitas motivum ex amore finis proficiscitur: unde in amore, & efficaciâ mediõrum confirmamur, & cessante, & multò magis amissõ amore finis, languet, & torpet voluntas in electione mediõrum; sicut destructo principio assensus, conclusionis firmitudinem destrui necesse est, tamen ex aliqua credulitate, assuefactione, vel probabilitate perseverare possit. Ergo virtutes sine charitate non possunt dici habitus, sed tantum dispositiones; quia cùm non sint in charitate radicatæ, vel fundatæ, fiunt facilè mobiles. Unde licet homo in statu peccati possit actum elicere virtutis perfectæ, perfectione ex parte operis se tenente; non ta-

men ex parte operantis, quia cum proprium bonum super omnia diligat, & propriam voluntatem omnibus præferat, cum se dabit occasio, virtutis opus deseret, si ejus prosecutioni proprium bonum quod adorat, obsistat. Quare licet virtutes remotâ charitate non amittant essentiam, amittunt tamen statum, & firmitatem virtutis; quia ablata ad ultimum finem conversione, non potest electio mediorum firma consistere.

Nec illi doctrinæ repugnat D. Thomas, ut existimat Gonerus noster, cum totam hanc doctrinam ex articulo 7. quæst. 23. 2. 2. tradat, ubi disertissimè ait: *Liberatio patria in actu fortitudinis, vel quid simile, erit quidem vera virtus, sed imperfecta sine charitate; quia deficit ordinatio in verum ultimum finem: & hac ratione non est vera virtus simpliciter sine charitate.* Ubi clarè docet, & virtutem sine charitate esse veram virtutem imperfectam, idest habentem rationem dispositionis, non firmitatem, & immobilitatem habitui eximiam; & non esse veram virtutem simpliciter, quia non potest specifica ratio firmitatis in virtute permanere, quando amor finis naturalis, qui est totius vitæ moralis basis, & cardo, desinit: per peccatum autem mortale homo nedum à fine supernaturali, sed etiam à naturali averfus est, & in pravam finem conversus; unde nobilitatem, & instabilitatem acquirit, juxta illud: *Peccatum peccavit Ierusalem, propterea instabilis facta est.* Unde quando S. Doctor quæst. 65. art. 2. ait, quod *virtutes morales, prout sunt operative boni in ordine ad finem, qui non excedit facultatem naturalem hominis, possunt per opera humana acquiri, & sic acquisita sine charitate esse possunt, sicut fuerunt in multis gentibus.* ibi:

ibi manifestè loquitur de virtutibus imperfectis, quæ possunt finem naturalem proximum respicere, & aliquem actum ex objecto bonum elicere, sed non per modum habitus ex specie sua difficilè mobilis, defectu amoris finis, qui totius est vitæ mōralis firmamentum.

Inæqualitas & duratio virtutum.

Dixi in speculatione, duplicem esse præcipuam virtutum proprietatem, ut innuerem esse alias minùs præcipuas, æqualitatem nimirum, & durationem, de quibus S. Doctor *quæst.* 66. & 67. diffusè sermonem habet. Totius eius doctrinæ medulla est, virtutes specie differentes, perfectione etiam differre; diversæ enim rerum essentix sunt sicut numeri, quorum tota ratio inæqualitate constat: si verò virtutes sint ejusdem speciei, possunt esse in diversis subjectis, vel etiam in eodem subjecto secundum diversa tempora inæqualis perfectionis intensivæ; nam in uno potest esse magis radicata virtus, quàm in alio; & in eodem etiam virtus suscipit varia crementa, & decrementa. Unde omnibus modis falsa est Stoicorum sententia, existimantium virtutes omnes habere numeros suos, unius statux ubique esse, nec remitti, nec intendi posse, ut patet ex Seneca *epist.* 7.

Hoc posito primas dat S. Thomas prudentiæ, quia est rationi propinquior, cæterasque omnes virtutes regit. Secundum locum dat justitiæ, quia subjectum, & objectum nobilius habet temperantiâ & fortitudine; nam & voluntati insidet, & bonum alienum, quo homo nedum in se, sed etiam erga alios sui diffusionem perficitur, respicit.

Tertiam sedem fortitudini asserit, quia virtus eo: maior est, quò in ea majus rationis bonum relucet; in virtute autem tantò magis relucet rationis bonum, quantò circa majora motus appetitus subditur rationi. Maximum autem in his, quæ ad hominem pertinent, est vita, à qua omnia alia dependent: unde fortitudo, quæ appetitivum motum subdit rationi in his, quæ ad vitam, & mortem pertinent, primum locum tenet inter virtutes morales, quæ sunt circa passionès.

Hæc vera sunt initâ comparatione virtutum moralium inter se; nam cæteroquin non solum theologicæ, quarum objectum Deus est; sed etiam intellectuales, quarum objectum est veritas, & subjectum ratio, moralibus antecedunt. Porro sicut inter intellectuales sapientia, quæ de omnibus per causas altissimas judicium fert, & Deum causarum altissimam contemplatur, cæteris præstat; ita inter theologicas primum locum occupat charitas, quæ circa Deum propinquius, & immediatius occupatur, ut alibi tradimus.

De duratione verò virtutum pauca hæc dicenda sunt, quia an remansuræ sint virtutes theologicæ post hanc vitam, alibi ex professo discutimus; non remanere verò morales quoad materiale delectationum, commutationum, aliorumque id genus, æquè constans est, ac remanere eas quoad formale, consonantiâ nimium appetitus cum ratione, quâ prudentia totum hominem reget sine errore, fortitudo constantem reddet sine molestia, temperantia sine libidinum repugnantia castum, & justitia de bonis alienis gaudetem. Vel prudentia omnia in Deum diriget, divinaque, quasi sola essent, intuebitur: temperantia
cupidita

cupiditates non reprimet, sed de pacatis exultabit: & fortitudo passiones non vincet, sed victoriæ fructus gustabit: iustitia omnibus omnia facta erit, de aliorum felicitate beata.

R E F L E X I O.

Ex hac gemina virtutum proprietate, nullor (ni fallor) monente, sed sponte sua fluente con-
sequutione deducis, Lector optime, quàm nudi-
simus, quàm miseri, quàm miserabiles, quàm ve-
rerarum virtutum præfidiis deserti. Insidiatur,
teste Augustino, virtutibus, bonisque operibus
superbia, ut pereant; sed quomodo potest quis
ex virtutibus superbire, qui virtutem novit.
Profectò postquam accepimus virtutem in me-
dio consistere, virtutesque omnes esse connexas,
nec ullam habere, qui vel una caret, longè con-
sultius est infirmitatis, paupertatisque nostræ
conscientiæ animum demittere, quàm superbos
illos pauperes imitari, quos sibi præcipuè ex-
os divina sapientia testatur.

Virtus in medio sita est. quî igitur vel de una
virtute gloriabimur, qui in omnibus cæco impe-
tu agimus, & ruimus; qui passione movemur, &
zelum putamus, quosque tantoperè proprius
amor excæcat, ut in praxi penitus ignoremus,
non modò quid christiana virtus, quid Evangelii
sanctimonia, sed omninò quid ingenui hominis
honestas postulet. Ut medium virtutis servemus
monet Proverbiorum 4. Spiritus sanctus: *Dirige
semitam pedibus tuis, & omnes viæ tuæ stabilien-
tur: ne declines ad dexteram, neque ad sinistram.*
Nos verò hos præscriptos limites transilientes
obliqui meritò dicimur, & oborti, ut notat Basi-
lius.

lius in *Psal.7.* Quia à virtutis medio, vel ad excessum divagamur, vel defectu desectimus. Si virtutum harmonia ædificio aptè commensurato, ad omnem artis proportionem exacto, ad amussim, regulam, lineamque accuratè expenso comparatur; si assimilatur humani corporis structuræ, pulchritudini, & symmetriæ, dicente Isidoro Pelusiota lib.3. epist. 131. *Vt corporea pulchritudinis norma membrorum apta proportio est; ita etiam extrema spiritualis pulchritudinis linea in virtutum mediocritate consistit:* si, teste Bernardo, in omnibus curandum sit, *ne quid nimis;* omnemque operationem trina hæc debeat præcedere consideratio, *an liceat, an deceat, an expediat:* si, teste Augustino lib. de quant. anima, cap. 16. *virtus circulus est*, æqualiter ad centrum; sive medium se habens, quia sicut in circulo nihil exuberans, nihil inflexum, nihil curvum, nihil recurvum, nihil prorum, nihil sinuatam apparet; ita virtus, tametsi summitas sit super vicia eminens, medietas tamen est in meditullio virtutum sita, decorem ubique servans, quòd neque excedit, neque deficit: Si, inquam, ita sit, an præsumemus unam nobis comparasse virtutem, qui bona non custodimus sine tenacitate & avaritia, nec effundimus sine prodigalitate, nec tristes sumus sine dejectione, nec hilares sine dissolutione, nec maturi sine aliorum onere, & gravitate. Nam ut 2. part. Past. cap. 9. observat Gregorius: *Sæpè sub parcemonia nominè se tenacia palliat; contraque se effusio sub appellatione largitatis occultat: sæpè inordinata remissio pietas creditur, & effrenata ira spiritualis zeli virtus aestimatur: sæpè precipitata actio velocitatis efficacia, atque agendi tarditas gravitatis consiliū putatur.*

Rursum si virtutes connexæ sint, ut qui unam habet, plures habere videatur, inquit Ambrosius lib. 5. in Luc. Si una virtus sine aliis aut omnino nulla est, aut imperfecta; quia nec prudentia vera est, qua iusta, temperans, & fortis non est; nec perfecta temperantia, qua fortis, iusta, & prudens non est, &c. ait Magnus Gregor. lib. 22. Moral. cap. 1. Si teste Augustino epist. 28. Ubi est una vera aliqua virtutum, & alia similiter sunt; ubi autem alia desunt, vera illa una non est, etiamsi aliquò modo similis esse videatur. Quod explicat exemplo Catilinæ, qui licet magna à suis præditus fortitudine videretur; Sed hac, inquit, fortitudo prudens non erat, mala enim pro bonis eligebat; temperans non erat, corruptelis enim turpissimis fœdabatur; iusta non erat, nam contra patriam conjuraverat: & ideo nec fortitudo erat, sed duritia; sibi, ut stultos falleret, nomen fortitudinis imponebat: nam, si fortitudo esset, non vitium, sed virtus esset: si autem virtus esset, à cæteris virtutibus tanquam inseparabilibus comitibus nunquam relinqueretur: Si, inquam, vera est tot Patrum calculo probata doctrina, quis asserere audeat, vel unica se præditum esse virtute, qui tot sibi cernit deesse virtutes, quive tot fœdari se sentit maculis peccatorum? Si Sancti, teste Venerabili Beda, magis humiliantur de virtutibus, quas non habent, quàm de virtutibus quas habent, gloriantur, quomodo gloriabuntur peccatores? Certè si magnus est, ut docet Bernardus serm. 70. in Cant. qui tria, vel quatuor lilia edificare potest, vide quàm parvus sis, quantaque tibi insit causa timendi, qui nec adhuc unum lilium ædificasti. Maximè quia cum veræ virtutes à charitate pen-

deant

deant, nihil profunt humani conatus, nihil Deo placent, nisi eos ipse Deus spiritu suo in nobis operetur. Heu quot, & quanti se divites virtutibus credent, & nihil inveniunt in manibus suis. humani enim actus ab amore sui orti, ita nunquam vicini sunt actibus charitatis, ut ab illis internosci nequaquam possint; & cum semper nos lateat, utrum verus in nobis Dei amor inhabitet, an etiam quæ benè agerè nobis videamur, non sincera Dei charitas, sed occultus nostri amor efferat, quid superest, nisi ut vereamur omnia opera nostra, quia nimirum, ut ait Isidorus lib.2. Sent. cap. 27. *Sape quæ apud hominum iudicium bona apparent, apud examen diligentissimi, & acutissimi iudicis reproba deteguntur.* Et Augustinus lib.22. de civit. cap.33. *Vigiis continuis excubantes, ne opinio verisimilis fallat, ne decipiat sermo versutus, ne se tenebra alicujus erroris ostendant, ne quod bonum est, malum, aut quod malum est, bonum esse credatur.*

C A P V T II.

Divisio & pictura virtutum.

EXposita virtutum naturâ, objicienda oculis est earum tabella, seu multiplex virtutum decor expandendus, quo uno verè homo ornatur: ut enim tradit Augustinus epist. 73. *Fucari pigmentis, quo vel rubicundior, vel candidior appareas, adulterina fallacia est. Verus ornatus, maxime Christianorum, & Christianarum, non tantum nullus fucus mendax, verum ne auri quidem, vestisque pompa, sed mores boni sunt.*

SPECVLATIO I.

*Traditur multiplex divisio
virtutum.*

Primò dividuntur virtutes in intellectuales, morales, & theologicas. Virtus intellectualis est illa, quæ perficit intellectum in ordine ad verum. Virtus moralis est illa, quæ voluntatem & appetitum afficit ad attingendum honestum. Virtus theologica est illa, quæ circa Deum propter Deum unice occupatur.

Secundò virtus intellectualis subdividitur in intelligentiam primorum principiorum, sapientiam, scientiam, prudentiam, & artem. Quia virtus intellectualis est habitus inclinans ad verum: ergo juxta distinctionem veri debent etiam distingui virtutes intellectuales. Verum autem est duplex; speculativum, & practicum: speculativum autem vel est propositio per se nota, & primum principium ex penetratione terminorum manifestum; & circa illud versatur habitus primorum principiorum: vel habetur per discursum ex altissimis causis, & circa illud sapientia occupatur: vel ex determinatis principiis in certa materia deducit conclusiones; & talis habitus dicitur scientia. Verum autem practicum dicitur tale per conformitatem ad appetitum rectum, vel rectitudine simpliciter, qualis est moralis; vel rectitudine secundum quid, qualis est artificialis. Ad dirigendam ergo cognitionem veram per conformitatem ad appetitum rectum, simpliciter ponitur prudentia; ad

ad rectitudinem verò secundùm quid obtinendam ponitur ars; illa versatur circa agibilia ab homine in ordine ad finem humanæ vitæ, ista circa factibilia, seu externa facta, quorum bonitas in conformitate ad ideam artificis sita est. Quod dixi prudentiam dirigere cognitionem veram, non ita intelligendum, quasi actus perfectissimæ prudentiæ, qui est actus imperii intimantis executionem, sit verus, aut falsus secundùm se; sed quatenus habet adjunctam synesin, quæ est principium elicitivum iudicii prudentialis antecedentis electionem.

Tertiò habitus intellectuales variè etiam subdividuntur. Nam habitus primorum principiorum alius dicitur intelligentis, alius synteresis: prior attingit principia speculativa, quæ deserviunt scientiis; posterior principia moralia, quibus tota vita humana subnixa est. Similiter sapientia alia est divina, & supernaturalis, scilicet Theologia; alia humana, & naturalis, scilicet Metaphysica. Scientia pariter subdividitur in eam, quæ abstrahit à materia intelligibili, ut Logica, & Metaphysica; & illam, quæ abstrahit à materia sensibili, ut Mathematicæ disciplinæ; & eam quæ abstrahit à materia singulari, ut Physica, & Medicina; cuius divisionis notitia operosius traditur in Philosophia. Denique hæc alia est liberalis, alia mechanica. Artes liberales sunt Grammatica, Rhetorica, Dialectica (quæ licet sit vera scientia, similitudinariè tamen dicitur ars, ut docent Philosophi;) Arithmetica, Musica, Geometria (sub quæ Cosmographia, Geographia, Hydrographia, Topographia continentur,) & Astrologia. Artes verò mechanicæ sunt quæ

à viris abjectæ, & contemptæ conditionis exercentur, nimirum agricultura, ars venatoria (ad quam piscatoria reducitur;) militaris, navalis, chirurgica (sub qua barbitonforia comprehenditur;) textoria (ad quam revocatur sartoria, & futoria,) fabrilis, sub qua comprehenduntur aurificia, argentaria, tignaria, sculptrix, & similes. Complectuntur omnes illas artes duo sequentes versiculi.

Lingua, tropus, ratio, numerus, tonus, angulus, astra:

Rus, nemus, arma, rates, vulnera, lana, faber.

Quartò virtutum moralium aliæ versantur circa passiones, ut fortitudo, & temperantia; aliæ circa operationes, ut justitia, & ei affines. Cum enim duplex sit appetitus in homine, qui potest pati difficultatem circa bonum rationis, sensitivus circa proprium, rationalis verò circa alienum, ut ex suprà dictis constat, relinquitur appetitum indigere virtute, sensitivum quidem concupiscibilem temperantiâ passionum ætus cohibente, irascibilem verò fortitudine stimulante ad magna aggrediendum, sustinendumque; rationalem quoque justitiâ, quæ bono alieno proximi, sublato proprii emolumentum quovis prætextu, provideat.

Quintò celebris est divisio virtutum moralium in quatuor cardinales, prudentiam, justitiam, fortitudinem, temperantiam. Dicuntur autem cardinales, quia ut tradit S. Thomas *q. de virtut. art. 1.* super eas volvitur tota conditionis humanæ ratio, eisque veluti cardinibus universa vitæ honestæ & politicæ series, & mores subnixa est. Unde à Gregorio appellantur *quatuor anguli*
spiritualis

spiritalis adficii : ab Ambrosio assimilantur *quatuor fluvii paradisi terrestres*, quorum amœnissimis fluentis totus animus irrigatus fecundatur ; ab aliis *quatuor rotis mystici currus Ezechielis*, quibus vectus animus suaviter viam mandatorum Dei currit, ne offendit ; ab aliis *quatuor precipuis aeris ventus*, quibus perflatâ animi regione, liquefcit gelu cordis duri, fluunt pietatis aquæ, & universa aromata sanctitatis ; ab aliis *quatuor elementis*, quibus parvus mundus constat, & subsistit.

Sexto virtutum aliæ sunt acquisitæ, aliæ infusæ : acquisitæ sunt illæ, quæ studio, & actibus iteratis comparantur : infusæ sunt illæ, quibus in instanti justificationis simul cum gratia animæ potentia perfunduntur. De prioribus non est difficultas ; de posterioribus dubitarunt olim aliqui Theologi, contra quos speculatione sequenti.

REFLEXIO.

Tam varium tot virtutum apparatus necessarium esse facile confessus fueris, Lector, si perpende-
ris circumstare utrimque virtutem vitia, quæ virum bonum & citò fallere, & specioso virtutis colore, prætextuque in peccatum præcipientem agere possunt. Quantâ arte opus est, ne virtutum specie in vicina utrimque vitia impingamus ? Nam ut fusè, præclareque prosequitur Magnus Gregorius 3. p. *Pastoral. cap. 2. & 3.* dum superbis prædicatur humilitas, timidus augetur metus ; & dum timidus inspiratur securitas, in superbis crescit effrenatio. Dum otiosis, ac torpentibus bonis operis necessaria sollicitudo inculcatur, inquietis immoderatæ actionis licentia

tia augetur; & dum inquietis imponitur modus, otiosis fit torpor securus. Dum impatientis animi exstinguimus iram, remissorum fovemus incuriam; & dum lenes ad zelum accendimus, iracundorum ignem excitamus. Dum tenacibus suademus tribuendi largitatem, prodigis effusionis fræna laxamus; & dum prodigos parcitatem docemus, tenacibus periturarum rerum amor & custodia nimia obvenit. Quid ergo mirum, si tanta virtutum supellectile indigeamus, qui nec virtutem operari, nec ferè de virtute possumus loqui, quin in aliquod extremum incurramus? ideoque monet prælaudatus Gregorius: *Sic prædicanda sunt bona, ne ex latere jubeantur mala; sic laudanda sunt bona summa, ne despiciantur ultima; sic nutrienda sunt ultima, ne dum sufficere credantur, nequaquam tendatur ad summa.* Hinc ibidem docet, rectorem animarum, & prædicatorem, palæstrarum more in diversi lateris artes debere se vertere, & medicos imitari, qui tanta discretionis arte se temperant, ut uno, eodemque tempore & languori obvient, & debilitati, ne fortibus remediis curato morbo, languor cum vita deficiat.

Illud etiam monere lectorem operæpretium hic est, ut si harum omnium, vel certè præcipuarum decore virtutum ornatum se videat, interim timere ne cesset, magnaue cura satagat, ut sacri metus laceratione se mordeat. Sæpe enim contingit, ut bene agentis mens providæ circumspectionis curam abjiciat, atque in sui confidentia securæ requiescat. Præclare Greg. 4. p. Pastoral. *Quibusdam sæpe magnitudo virtutis occasio perditionis, ut cum de confidentia virium inordinatè securi sunt, inopinatè per negligentiam morerem*

rerentur. Hinc superbiens anima dicitur: Quo pulchrior es, descende. Quasi aperte diceretur: Quia ex virtutum decore te elevas, ipsâ tuâ pulchritudine impelleris, ut cadas. Hinc sub Hierusalem specie, virtute superbiens anima reprobatur. Perfecta eras in decore meo, quem posueram super te, dicit Dominus; & habens fiduciam in pulchritudine tua, fornicata es in nomine tuo. Fiduciâ quippe pulchritudinis sua animus attollitur, cum de virtutum meritis lata apud se securitate gloriatur. Unde necesse est, ut cum virtutum nobis copia blanditur, ad infirmitatem suam mentis oculus redeat, ne recta qua agit, sed qua agere negligit, respiciat.

SPECVLATIO II.

Virtutum moralium infusarum necessitas stabilitur.

DE hac veritate dubitarunt quidam antiqui, sed jam sententia de virtutibus moralibus infusis est dogma fidei à Theologis nullo refragante susceptum, traditum in Catechismo Romano part. 2. titulo de Bapt. num. 50. Huic, inquit, idest gratiæ, additur nobilissimus virtutum omnium comitatus, que cum gratia divinitus infunduntur. Quare cum Apostolus ad Titum ait: Salvos nos fecit per lavacrum regenerationis, & renovationis Spiritus sancti, quem effudit in nos abundè per Iesum Christum Salvatorem nostrum; D. Augustinus verba illa, abundè effudit, explanans: Nimirum, inquit, ad remissionem peccatorum, & copiam virtutum. Confirmatum

tum etiam fuit hoc dogma in Concilio Vienneſi, tanquam probabilius, & dictis Sancto-
rum conformius.

Et meritò, ait enim Ambroſ. lib. 6. Hexaëm. cap. 7. *Attende qualem animam, ac mentem habeas, cui dixit Deus: Ecce ego, Ierufalem pinxi muros tuos. Illa anima à Deo pingitur, qua habet in ſe virtutum gratiam contentam.* Adſtipulatur Hieronym. præfat. in lament. Jerem. *Non auri, inquit, & argenti metallis, ſed virtutibus radiabat anima lapſa in peccatum.* Sed quis clariùs Auguſtino loquutus eſt, vel loqui potuit? Sic enim tract. 8. in 1. epiſt. Ioan. ſcribit: *Affectus charitatis, ſanctitas pietatis, incorruptio caſtita-
tis, modeſtia ſobrietatis, intus ſunt omnes hæc virtu-
tes, quas nominavi: quis autem ſufficit omnes no-
minare? Quasi exercitus eſt Imperatoris, qui ſedet intus in mente tua: quo modo enim Impera-
tor per exercitum ſuum facit quod ei placet, ſic Dominus Ieſus Chriſtus incipiens habitare in men-
te per fidem, utitur iſtis virtutibus, ſed quaſi miniſtris ſuis.* Quod ſi alibi sæpè S. Doctor tradat varias virtutes nihil aliud eſſe, quàm unum amorem in varios affectus tranſmutatum, id in duplici ſenſu verum probatur: primùm, quia in omni actu virtutis, imò & in quolibet voluntatis actu intermixtus eſt amor alicujus boni: quia ut diſcurrit S. Thomas 1. 2. quæſt. 28. art. 6. *Omne agens agit propter finem aliquem; finis au-
tem eſt bonum deſideratum, & amatum unicui-
que: unde manifeſtum eſt, quod omne agens, quod-
cumque ſit, agat quancunque actionem ex aliquo amore.* Deinde quia charitas eſt omnium forma virtutum, & ſpiritualium motuum origo; unde in ipſam virtutum infuſarum operationes me-
ritò

ritò refunduntur. Idem apertissimè tradit Magn. Gregor. *hom. 5. in Ezechiel.* ubi docet, qualdam virtutes manere quandiu gratia manet, nempe fidem, charitatem, castitatem, humilitatem, justitiam, misericordiam; alias verò, ut gratis datis, quandoque subtrahi, gratiâ sanctificante nequaquam amissâ.

Ratio verò fundam. talis necessitatis harum virtutum à D. Thoma posita est, quæ sic expenditur, & simul ab adversariorum instantiis vindicatur. Homo in ordine naturali constitutus, & per gratiam supernaturalem in consortium naturæ divinæ vocatus, indiget etiam supernaturalibus facultatibus, quibus modo divino inter humana operetur, ad finem supernaturalem tendat, & circa fines proximos, & intermedios hujus ordinis promptè, suaviter, & constanter operetur: si enim operari sequitur esse, & unumquodque sit propter operationem, esse divinum, ad quod per gratiam evahimur, facultates exigit divinorum attributorum imagines, potentiis naturalibus majores, & altiores, ut supernaturales operationes eliciat. Et certè æquè perfectè providit Deus ordini gratiæ, ac naturæ, quam tamen ornavit Deus virtutibus necessariis ad finem vitæ humanæ mediis idoneis asciscendum. Atqui ut homo constitutus in ordine supernaturali possit supernaturali, & modo divino tam circa finem ultimum, quàm circa proximos, & intermedios operari, indiget additamento virtutum Theologicarum quidem, ut circa finem, Deum scilicet, immediatè occupetur; moralium verò, ut circa fines proximos christianè, & supernaturaliter versetur. Ergo gratiam habitualement comitatur innumerabilis virtutum honestas, quibus ni-
hil

hil utilius in vita hominis , ut ait Scriptura.

Dices : Quid opus est virtutibus supernaturalibus , quando objectum non est ordinis supernaturalis ? Objectum autem virtutum moralium non est quid supernaturale, sed morale, quod intra sphaeram objecti naturalis includitur , quodve proinde à virtute ordinis naturalis, vel moralis respicitur ; cum certum sit virtutes sicut specificari , ita distingui , & multiplicari per ordinem ad objectum formale diversum.

Sed contra , inde instauratur ratio S. Thomæ : virtutes multiplicantur penes objecta : sed virtutes morales acquisitæ procedunt ex objecto formali , seu motivo naturali ; morales verò christianæ motivo supernaturali cientur : v.g. temperantia acquisita passiones appetitus concupiscibilis juxta regulam rationis humanæ in ordine ad bonum naturæ, salutem corporis , & liberum rationis naturalis usum moderatur ; infusa verò secundum regulam fidei , & prudentiam spiritus, quæ non rarò arctiorem exigit parcitatem, quam præscribat regula naturalis, dum imponit abstinencias, jejunia, carnisque mortificationem, quam in corpore nostro præcipimur circumferre, reclamet licet ratio specie discretionis, & medicina prætextu sanitatis ; quia Galenus, & Hippocrates docent servare , Christus verò perdere vitam, ut in æternum custodiamus eam. Fortitudo acquisita componit passiones irascibilis, firmatque contra pericula appetitum in ordine ad bonum naturale, putà patriæ conservationem, aut liberationem ; fortitudo verò christiana in ordine ad finem supernaturalem, putà conservationem fidei , & religionis , reddit intrepidum.

Reges etiam, Præsides, ac tortores in causa Dei aspernatur. Justitia naturalis, & acquisita ponit medium, jusque servat, unicuique juxta regulas civiles, ut in hominum societate pax servetur: christiana verò medium ponit inter homines, ut sunt cives Sanctorum, & domestici Dei; sub qua ratione longè majorem à nobis exigit perfectionem, ut nimirum condonemus injurias, beneficiamus inimicis, maledicentibus benedicamus, pro persequentibus oremus; maximas etiam mundi, sæculi, & reipublicæ sæpè nimias usuras, obsecrationes, tolerantias spernamus. Prudentia humana in negotiis discretè procedit, pericula corpori, fortunis, & rationi imminentiæ præcavet, & lumine humano quæ sua sunt, moderatè tamen, quærit, & invenit: christiana prudentia lumine divino omnia moderatur, humana, & temporalia vel floccifacit penitus, vel negligit valde, vel certè sine amore utentis modestiâ tractat: æternis, & uni necessariò intenta, quæ ad verum finem ducunt & seriò quærit, & fideliter exequitur; quæ verò vel ab eo avertunt, vel assequutionem retardant, toto nisu refugit, toto studio pro virili declinat. Hanc rationem compendiosè S. Thomas complexus est *q. i. de virtut. art. 10. ad 8.* his verbis: *Temperantia acquisita, & infusa conveniunt in materia, utraque enim est circa delectabilia tactus, sed non conveniunt in forma effectus, vel actus; licet enim utraque quærat medium, tamen aliâ ratione quærit medium temperantia infusa, quàm temperantia acquisita: nam temperantia infusa exquirat medium secundum rationes legis divinæ, quæ accipiuntur ex ordine ad ultimum finem; temperantia autem ac-*
quisita

quisita accipit medium secundum inferiores rationes in ordine ad bonum presentis vite. Hanc etiam rationem insinuare videtur Apostolus 1. Cor. 8. Omnis, inquit, qui in agone contendit, ab omnibus se abstinere: & illi quidem ut corruptibilem coronam accipiant, nos autem incorruptam. Ubi divinus Apostolus agonem Christianum à politico discernit ex eo, quod unus ad corruptibilem coronam, alter ad incorruptam tendit, tamen ad utramque fortitudinis virtute circa objectum arduum occupata opus sit.

Instabis: Ad illa omnia munia sufficiunt virtutes acquisitæ cum ordinatione & imperio virtutis theologicæ præstituentis finem supernaturalem: ergo supervacaneus est virtutum supernaturalium apparatus.

Respondeo, quod licet actus naturales possint ordinari in finem ultimum supernaturalem, non possunt tamen elici actus intrinsecè supernaturales, nisi à virtute supernaturali: actus autem virtutum christianarum sunt intrinsecè supernaturales, sicut & earum objecta, ut ostensum fuit: unde non sufficiunt virtutes acquisitæ imperio charitatis in finem extrinsecum relatæ, sed exiguntur infusæ. Quare licet charitas sit inclinatio generalis ad omne bonum supernaturale, ac proinde in bonum iustitiæ, fortitudinis, & cæterarum, quia se habet sicut voluntas in ordine naturæ, quæ est inclinatio ad omne bonum naturale; quia tamen ad illa omnia inclinatur charitas sub ratione boni divini ut sic, non tamen sub multiplici ratione particulari, sub qua bonum attingitur ab aliis virtutibus moralibus, quarum objecta non habent rationem puri medii, sed

finis intermedii propriâ & specificâ bonitate præditi, ideo præter charitatem desideratur virtutum christianarum beatissima copia, nec sufficit acquisitarum supellex.

Urgebis : Motivum intrinsecum virtutis omnis moralis etiam possibile est naturale , v. g. objectum formale temperantiæ est mediocritas in cibo & potu , quæ non excedit ordinem naturæ : quod verò hæc mediocritas ordinetur in finem supernaturalem , actui & objecto virtutis extrinsecum est , species autem virtutis non ex fine externo , in quem potest referri ; sed ex objecto , ad quod intraneam , & non adventitiam importat habitudinem , pensanda est , aliàs etiam virtus acquisita ex relatione in finem supernaturalem , quæ potest ejus actibus ex imperiò charitatis obvenire , ad ordinem supernaturalem pertineret , quod nemo dicit.

Respondeo , quod cum dicimus virtutes morales infusas , seu virtutes christianas speciem sortiri ab ordine ad finem ultimum supernaturalem , non est sermo de ordine actuali , qui accedere etiam actibus virtutum acquisitarum ex imperio charitatis sæpè solet ; sed de relatione radicali , & connaturali , cui ex principiis intrinsecis debita est relatio actualis ob intrinsecam proportionem , exigentiam , & commensurationem ad objectum supernaturale , cujus virtus acquisita capax non est , nisi ad summum potentiâ obedientiali , non naturali . Nec obest , quod virtutes infusæ circa eandem materiam versentur atque acquisitæ ; non obest , inquam , quia infusæ objectum illud materiale sub altiori ratione respiciunt , nempe sub regula fidei in ordine ad vitam

æternam

æternam consequendam. Cum enim objectum virtutis sit res agenda, prout subest regulis, planum est materiam circa quam versantur virtutes infusæ, esse specie diversam ab ea, quam respiciunt acquisitæ, & politicæ; priores enim respiciunt objectum ut subest regulis, & præceptis supernaturalibus; posteriores verò ut subest regulis vitæ civilis. Et certè hac objectione, si aliquid valeret, probaretur etiam, non dari dona Spiritus sancti, quorum aliqua versantur circa materias morales, ut donum fortitudinis, pietatis, & consilii.

Urgebis: Si darentur virtutes infusæ supernaturales, possemus per actus earum virtutum similes virtutes supernaturales elicere; nam actus generant habitus. Consequens autem nemo admittit: ergo hujusmodi virtutes morales infusæ admittendæ sunt.

Respondeo hoc argumento, seu potius sophismate probatum etiam iri, si quid efficeret, non dari virtutes theologicas, ne ab actibus suis generentur. Discendum ergo, per frequentatos virtutum infusarum actus non generari habitus; cujus rationem assignant aliqui, quos sequitur Gonet, quia habitus genitus nec esset ejusdem speciei cum infuso, cum nequeant duo accidentia solo numero distincta esse in eodem subjecto; nec distinctæ speciei, quia actus generant habitus sibi similes, eandemque in illos transfundunt, quam acceperunt perfectionem. Verùm hæc ratio probat quidem actus virtutum infusarum non generare habitum distinctum; sed non ostendit, habitum præexistentem non posse actibus saltem intensius augeri; nec novos gra-

us, vel radicationis modis acquirere ampliores.

Quare dicendum, illud esse virtutum infusarum privilegium eximium, ut non possint nisi à Deo, sicut produci, ita & augeri: tàm quia cum sint proprietas gratiæ, quæ à solo Deo producitur, & intenditur, ejus etiam naturam sapiunt, ut sicut Deus solus consortium suæ naturæ donat, & novis accessionibus adauget; ita solus consortium suorum attributorum in virtutibus infusis scriptorum impertitur, & accrescere facit. Tum quia virtutes supernaturales habent rationem potentiæ, cum dentur ut simpliciter possimus in ordine supernaturali operari: potentiæ autem non suscipiunt magis, & minus frequentiam actuum, sed actione solius Creatoris.

Instites: Non potest assignari subjectum harum virtutum infusarum; non enim in voluntate subjectantur, in qua nec acquisitæ recipiuntur: non potest etiam subjectum earum esse appetitus sensitivus, quia cum illæ virtutes infusæ sint supernaturales, consequenter spirituales sunt, & immateriales; subindeque omne corporeum excedentes, & subjectum corporeum refugientes.

Respondeo virtutes illas, quantumvis infusas, quæ circa passiones moderandas occupantur, in appetitu sensitivo recipi; in illa quippe potentia virtutes subjectantur, cujus actus mediis illis virtutibus eliciuntur: appetitus autem sensitivus mediis virtutibus infusis elicit moderatos, & christianos timores, temperatas audacias, modestum delectabilium gustus, & tactus usum: ergo
in

in appetitu sensitivo virtutes illæ recipiuntur. Nec obest, quod sint spirituales, & immateriales, utpote proprietates gratiæ sanctificantis, cujus conditionem sapiunt, & exprimunt. Non obest, inquam, quia etiam anima rationalis, tametsi immaterialis sit, & spiritualis, in corpore tamen recipitur. Nec est inconueniens, formam perfectioris ordinis recipi in subiecto inferiori, ut istud evehat, attollat, & perficiat. Certè postquam Verbum caro factum est, & purus spiritus nedum animam, sed & carnem hypostaticè sibi univit, quid refugiemus dicere, virtutes appetitum sensitivum, & corporeum posse perficere? :

REFLEXIO.

Si in justificatione infunditur tam præclara, tam opulenta omnigenarum virtutum suppellex, cur in peccatore, si Superis placet, converso tanta permanet christianè operandi difficultas, labor tantus, tædium tantum? Quis ibi credat esse radicem, ubi nulla planta decaulescit, nulla arbor pubescit, nullus ramus germinascit, nullus fructus editur? Quis sibi suadeat ibi ardere ignem nullus ubi calor sentitur? Ergo cum post justificationem easdem benè agendi difficultates experiantur homines viriis ante conversionem assueti, semperque eas experirentur, nisi jugi, & indefessâ operâ virtutibus acquirendis insudarent, frustra fingimus cœlestem infundi facilitatem, cum habituum vitiosorum studio pedetentim extirpandorum impedimenta perseverent.

Scio communiter Theologos ab ea se dis-

facultate expedire, dicentes per virtutes infusas facilitatem quidem intrinsecam infundi, quâ completur, perficiturque potentia, sed non semper facilitatem extrinsecam ingenerari ex remotione impedimentorum proficiscentem. Cum enim peccator sit vitiis assuetus, alligeturque non ferro alieno, sed ferreâ voluntate, & pravorum operum usu, non potest statim funes peccatorum dirumpere, & sæpè post conceptum in resistendo laborem parit postea iniquitatem.

Verum ut addam quod reverà sentio, fateor hoc argumento convinci, rarissimas esse de corde puro, & optimo conversiones, frequentesque esse falsas plerorumque hominum pœnitentias. Etenim juxta Scripturæ, Patrumque doctrinam, qui toto corde ad Dominum convertuntur, statim in Domino delectari incipiunt, amarescunt quæ dulcia paulò antè videbantur, ab his abhorrent quæ insectabantur; quod si quandoque sentiant concupiscentiam ad præterita revocantem, & repugnantem legi mentis suæ, eam pro virili comprimunt, & comprimendo gaudent: tantamque in se mutationem mirati, exclamant: *Digtus Dei est hic, hæc mutatio dextera Excelsi.*

Itaque qui seriò, & sincerè convertuntur, Spiritus sancti fervore concepti fiunt & in fide stabiles, & in opere efficaces, præventique in benedictionibus dulcedinis, corde per virtutes infusas dilatato, viam mandatorum Dei currunt fortiter, suaviter, permanentes, ut patet in verè pœnitentibus, non fictè conversis, quos experientia docet magis esse alacres, & erectos ad insectanda virtutis opera, & creatos in Christo Jesu in operibus bonis, quæ sursum sunt sapere,
non

non quæ super terram; illisque vesanas voluptates displicere, quarum antea illicitis tenebantur. Unde si remaneat eadem bene operandi difficultas, eadem malè operandi facilitas, & præsertim si iterentur flagitia, si eadem, & fortè major sit in peccata prolapsio, si contingat frequens spiritalis morbi redeuntis accessus, argumento est, productam nequaquam esse novam creaturam; quia operari sequitur esse, & idem manens idem, semper facit idem. Cum his tamen stat, verè poenitentes nonnullam, & sæpe gravem in parte inferiori experiri difficultatem, quia ab inassuetis fit passio, remanentque post conversionem impedimenta sensim auferenda; sicut convalescente infirmo expellitur quidem venenum, abigiturque mortis periculum, remanent tamen infirmitatis reliquæ paulatim, & cum regimine artis removendæ, curandæ, & perficiendæ.

Quare innumeri sæpè, misereque falluntur; dum putant se justificationis beneficium sibi statim comparare, si vitæ exornologesi, seu piaculari confessione peractâ, nec vitâ mutatâ, sacerdotali absolutione, cujus dilationis impatientes sunt, muniantur. Etenim teste Hieronymo. in cap. 16. Matth. *Apud Deum non sententia sacerdotum, sed reorum vita queritur.* Non quòd sacerdotum sententiam nolit Deus, qui eis tam disertè remittendorum, retinendorumque peccatorum contulit potestatem; sed quia frustra illis impenditur absolutio, frustra illis datur venia delictorum, in quibus perdurat amor iniquitatum; perdurat autem quandiam permanet frequentia lapsuum.

Unde D. Thomas *quæst. 1. de virtut. artic. 10. ad 16.* verè dixit : *In eo qui habet habitum intemperantia , cùm conteritur , non remanet cum virtute temperantia infusa habitus intemperantia in ratione habitus , sed in via corruptionis quasi dispositio quadam.* Quando ergo post sacramentalem confessionem non corrumpitur habitus pravus , sed novis prolapsionibus intenditur , firmatur , radicitur , juxta veridicam Angelici Doctoris sententiam , argumento est falsam fuisse pœnitentiam , fictam contritionem , & utinam non sacrilegam confessionem.

SPECVLATIO III.

Donorum Spiritus sancti necessitas, & characteres declarantur.

NEcessitas quidem , quia per dona Spiritus sancti intelligimus aliquid supernaturale infusum , ratione cujus disponimur & habiles efficimur , ut divinitus moveamur ad exercendas operationes regulas omnes prudentiæ , tum acquisitæ , tum infusæ excedentes. Atqui fatendum necessario est , dari aliquid distinctum à virtutibus , quo efficiamur promptè mobiles ab operatione divina : quia omne quod movetur , proportionatum suo debet esse motori , hoc est debet rectè disponi , ut à suo motore promptè , facile , & suaviter moveatur ; anima autem nostra ad bonum à triplici motore cieri potest , à ratione , à fide , ab inspiratione & instinctu speciali Dei ad aliquid præter communes regulas
permo

permovente : animus porrò noster per virtutes acquisitas est facilè mobilis à ratione , per infusas à fide : ergo sunt necessaria alia dona, quibus homo facilè & veluti connaturaliter moveatur à Spiritu sancto , qui est auctor rationis, & fidei, & solitos earum limites ob fines altiores potest transilire. Unde sicut virtutes acquisitæ respiciunt honestum dirigibile per regulas prudentiæ humanæ acquisitæ, virtutes infusæ dirigibile per regulas prudentiæ christianæ, modo tamen humano & ordinario, supposito nimirum consilio, & prævia deliberatione rationis : ita dona respiciunt honestum dirigibile instinctu Spiritus sancti regulas communes prætergrediente.

Ex quibus convulsa manent argumenta Vasquesii, existimantis dona nullatenus à virtutibus infusis distingui. Licet enim virtutes infusæ ad recipiendas divinas inspirationes ordinarias disponant, non tamen ad insolitas, & præfinitos à prudentia christiana limites transilientes, quibus homo supra modum humanum elevatur. Quod si aliquando virtutes infusæ in actus heroïcos prorumpant, ut cum Abraham in spem contra spem credidit, cum Pastor dat animam suam pro ovibus suis ex charitate dilectis, vel alia similia, vel majora elicit ; tum cum virtutibus dona concurrunt ad operis tam ardui insolitam granditatem. Dona namque supponunt virtutes, easque perficiunt ; neque enim Spiritus sanctus ad opera ultimæ perfectionis ciet leges communes non servantes, nec illos ad sublimi applicat, in quibus non habitat ; non habitat verò sine charitate, nec est charitas sine aliarum virtutum infusarum comitatu.

Dices : Sicut opera extraordinaria , ad quæ à Spiritu sancto propellimur , rara sunt & incon-
suetæ, ita non est opus dono habituali permanen-
te à virtutibus discreto, sed auxilii actualis novo
& copiosiori impullu , quo à divino spiritu ad
illa agamur, quæ rarò agenda sunt ; si enim in-
funderetur aliquid habituale connaturaliter &
permanenter nos reddens ad divinas impressio-
nes idoneos, semper etiam & connaturaliter in-
operationes extraordinarias possemus erumpe-
re, cum habitibus prout volumus, utamur ; quod
tamen est contra rationem operationis extraor-
dinariæ, quæ est de rarò contingentibus. Ergo
supervacanea est donorum illorum accessio.

Respondeo , quod etsi donis Spiritus sancti
non nisi ad opera extraordinaria, quæ rarò con-
tingunt, disponamur ; decet tamen non esse sem-
per paratos , atque adeo his donis permanenter
instructos , ut spiritum , qui ubi vult spirat, ve-
nientem excipiamus, atque illò eamus, quò divi-
nus impetus fert. Et licet ad hæc auxilium trans-
eunt communicatum sufficeret, molius tamen,
suavius , & connaturalius divinorum perfusione
donorum ad divina elicienda , patiendaque ap-
tamur. Et quid mirum , si in justificatione dona
sua confert Spiritus sanctus , qui seipsum dat,
eum sit donorum primum, & ratio donandi alia
divinus amor , Spiritui sancto ex vi suæ proces-
sionis eximius ? Accedit quod licet hæc dona ad
aliquid extraordinarium disponant , plures ta-
men Sancti sunt , in quibus hæc extraordinaria
ordinaria sunt ; nam in aliis donum orationis,
quod sine dono intellectus, scientiæ, & sapientiæ
non est, ita abundat, ut statim absque meditatio-

ñs circuitu toti rapiantur in Deum, & sibi suaviter elapsi, divinoque amore feliciter ebrii, in abyſſo Divinitatis natent. Alii dono consilii præditi in dubiis præsentissima & juxta solidissima præbent responsa. Alii ita fortitudinis dono intrepidi, ut inter opprimentes ferè foris pugnas, intusque timores, nec aduersis frangantur, nec prosperis extollantur, inter fluctuantesque causas & personas nullâ inclinatar mentis vicissitudine concutiantur. Alii timoris dono ita configunt carnes suas, ita in præsentem Dei Majestatem reverentiâ afficiuntur, ut sensibiles sacri tremoris motus continenter experiantur. Ad quæ omnia habituale donum corda nostra permanenter disponens desideratur.

Quantum verò ad speciales doni cujuscunque differentias & notiones plura dicemus dum de virtutibus theologicis. Unde breviter sciendum; his septem donis totum hominem, omnes eius potentias, earumque operationes rectitudinem obtinere: ratio enim sapientiâ, intellectu, consilio, & scientiâ perficitur, apprehendens intellectu veritatem, de ea per altissimas causas judicans sapientiâ, per inferiores scientiâ, eamque ad praxim consilio deducens. Voluntas verò in cultum divinum exercendum, amplificandumque, & in bonum alienum proximi diligendum pietate inclinatur. Appetitus verò sensitivus in timore periculorum fortitudine roboratur; concupiscentia verò delectabilium timore desideria carnalia configente frænatur. Donis perficientibus intellectum perficitur mens, ut veritates divinas, speculativas & practicas nõ tam discursu, inquisitione, & examine, quàm connaturalitate,

pertate spiritus terrenorum bonorum nugas nihili facit. Beatus qui inordinatas appetitus irascibilis passiones lance pensat æquali, nec læsus lædit, nec à malo vincitur, sed vincit in bono malum; mitis ad loquendum, tener ad compatiendum, facilis ad remittendum, promptus ad subveniendum. Beatus qui lacrymis & compunctione inmodicas delectationes, effusos risus, & dissoluta gaudia compescit. *Felices lacrymæ*, inquit Bernardus, *quas benigna manus Conditoris aspergunt; & beati oculi qui in talibus liquefieri elegerunt, quàm elevari in superbiam, quàm omne sublime videre, quàm avaritiæ & petulantia famulari.* Beatus qui esurit & sitit iustitiam, & in Deum æternum iustitiæ fontem suspirat; nec quærit frustra, quia quærit veraciter, quærit frequenter, quærit perseveranter; ut nec quærat pro illo aliud, nec cum illo aliud, nec ab illo ad aliud convertatur. *Facilius est autem*, inquit Bernardus, *cælum & terram transire, quàm ut sic quærens non inveniat, sic petens non accipiat, & sic pulsanti non aperiatur.* Beatus misericors; nam ut Patres omnes à sacris Scripturis eruditi conclamant: Misericordia est salutis præsidium, fidei ornamentum, propitiatio peccatorum: misericordia virtus tanta est, ut sine illa ceteræ etsi sint, prodesse non possint, quia virtutibus ornatus insignibus, si misericors non est, misericordiam non meretur; & in illo magno, summoque iudicio tanti æstimabitur vel largitatis benignitas, vel tenacitatis impietas, ut pro plenitudine omnium virtutum, & pro summa omnium commissorum, & per unum malum illi in ignem mittantur æternum, & per unum bonum

consequitur, quando & ad ea quæ sunt intra se, & ad ea quæ sunt juxta se & ad ea quæ sunt infra se rectissimè ordinatur: Rectè autem disponitur homo intra se, cum in divinis charitate fruitur, & in Domino gaudium plenum, quod nemo tollet à se, experitur; & pacem quæ exsuperat omnem sensum, à Christo datam, à Christo relictam, nec quomodo mundus dat, datam persentit; & per patientiam possidet animam suam, & per longanimitatem nulla persecutionis instantia, nulla promissorum bonorum dilatione fatigatur. Erga illa verò, quæ sunt juxta se homo benè disponitur, dum in proximum bonitate diffunditur, benignitate se illi attemperat, mansuetudine eum demulcet, fide, seu fidelitate ingenuè & candidè, absque dolo & fraude cum illis conversatur. Denique in his quæ sunt infra se, passionès nimirum & exteriores operationes, benè se habet mens humana, si in dictis & factis modum modestiæ observat, si illicitas concupiscentias per castitatem domat, si à licitis etiam per continentiam abstinet.

Hæc cum ita sint, permitte te, Lector, Spiritui sancto, ut in te donorum suorum charismata profundat, qui communicationis est avidus, & ut ait August. in Psal. 99. *Salutis nostræ avarus.* Permite te totum, ut tibi donorum omnium beatissimam copiam, beatitudinum singularum felicitatem inchoatam, cunctorumque fructuum optandam suavitatem conferat, cui parum donum unum sine alio prodesset, dicente Gregorio 1. Moral. cap. 15. *Sicut unaquæque virtus sine alia valde destituitur, ita unumquodque donum sine alio imperfectum erit. Minor est sapientia,*
qua

quæ intellectu caret : sapientia enim , quæ est sine intellectu , est hebes. Inutilis est intellectus , si ex sapientia non subsistat , quia cum altiora sine sapientia pondere penetrat , sua illum levitas gravius ruiturum levat. Vile est consilium sine fortitudine , quia quod tractando invenit , sine viribus ad actum non producit. Fortitudo etiam , quæ plus potest , sine moderamine rationis in præcep: ruit. Nulla est scientia sine pietate , quia quibona cognita non exequitur , gravius judicatur. Pictas sine scientia discretionem quomodo misereatur ignorat. Timor sine his nihil valet , quia ad omnia trepidans à bonis torpet. Permite te illi ubique , quia ut ait Ambrosius lib. 6. de fide resurrect. cap.3. Potes ubique orare , & in cubiculo tuo semper orare : habes ubique cubiculum tuum. Etsi inter Gentes , inter Iudæos positus sis , habes tamen tuum ubique secretum. Cubiculum tuum mens tua est. In populo licet positus , tamen in interiore homine arcanum tuum , secretumque conservat. Intra in recessum pectoris tui , totus ingredi. Permite te generosè , quia ut in oëtonario 17. ait idem Pater : Cum oras , magna ora ; idest , ea ora , quæ aterna sunt , non quæ caduca ; ora quæ divina sunt atque cœlestia , ut sis sicut Angeli in cœlo. Non audit Dominus nisi quod dignum suis ducit esse beneficiis.

Duo monita.

Duo hîc in fine hujus speculationis observanda operæpretium duxi. Primum est , non sine causa Lucam enumerasse solùm quatuor beatitudines, Matthæum verò octo, quia ut ait D. Tho-
mas

mas, Lucas eas duntaxat beatitudines recenset, quas Christus turbis exposuit, quibus eas solum proposuit, ut falsa earum existimatio felicitatem in bonis terrenis collocans, removeretur: unde paupertatem, esuriem, fletum, persecutionem amoris divitiarum, deliciarum, vanitatum, & favorum humanorum opposuit: Matthæus verò eas beatitudines commemorat, quas discipulis Veritas proposuit, quibus utpote ad majora vocatis, ampliora etiam exposuit, quibus ad veram felicitatem facilius tendimus & securius.

Addit S. Ambrosius lib. 5. in Luc. cap. 6. *Quatuor tantum beatitudines S. Lucas Dominicas posuit, octo verò S. Matthæus: sed in istis octo illæ quatuor sunt, & in quatuor istis illæ octo.* Porro hujus octonarii numeri rationem anagogicam subjungit adeo difficilem & obscuram, ut insignes viri, iique doctissimi à me consulti verba Ambrosii nedum comprehendere, sed ne quidem explicare unquam potuerint. Hæc autem verba omnibus obvia, & in communi plurimum Martyrum frequenter in Breviario perlecta, sunt hæc: *Hic, idest Lucas, quatuor velut virtutes amplexus est cardinales: ille, idest Matthæus, in illis octo mysticum numerum reſeravit.* Verba illa adhuc satis plana sunt, sed cur mysticum numerum in illis octo Matthæus reſerarit, audi rationem obscurissimam, & quam, ni fallor, prima vice non intelliges: verba illa sæpe sæpius animo agitavi, & hæc tandem genuina, ut opinor, explicatio occurrit: *Pro octava enim, inquit, multi scribuntur Psalmi: & mandatum accipis octo illis partem dare fortasse benedictionibus.*

Sicut


Sicut enim spei nostra octava perfectio est, ita octava summa virtutum est. Ibi S. Ambrosius ad duo Scripturæ loca alludit, primus est titulus quorundam Psalmorum, qui inscribuntur *pro octava*, quia ut exponunt Abulensis, Lyranus, & Bellarminus, canebantur super citharam octo chordarum; vel in sensu anagogico, quia in honorem futuræ resurrectionis, quæ erit octava ætas mundi, quæ succedet miseris præsentium sæculorum, quæ septem diebus perpetuò circumaguntur. Ita Gregorius Magnus, Gregorius Nyllenus, & Beda. Secundus locus habetur *Ecclesiasticis cap. 10.* ubi dicitur: *Da partes*, vel ut alii legunt apud Robertum Stephanum, *partem septem, necnon & octo, quia ignorat, &c.*

Sensus ergo Ambrosii est huiusmodi: Ne mireris, si Matthæus octo beatitudines Dominicas posuerit, mysticum namque numerum voluit referare: mysticum porro esse illum numerum, & in Scripturis commendatum, ex eo patet, quòd multi Psalmi titulum illum præferunt, *pro octava*: tum etiam quia Ecclesiastes nobis mandat partem dare septem & octo, per quæ octo fortassis intellexit octo istas benedictiones, seu beatitudines. Denique quia sicut octava & Dominica dies, in qua Christus resurrexit, significat resurrectionem nostram futuram, quæ tota est spei nostræ perfectio & consummatio: ita per octavam beatitudinem virtutes omnes comprehenduntur, quibus beatitudinem illam assequemur in futuro, eamque in præsentì participamus. Gratum me acturum Lectori arbitratus sum, si locum quotidie occurrentem, satisque salebrosum complanarem.

Alterum

Alterum quod te moneri velim, est periculofum esse valde de motibus extraordinariis Spiritus sancti, ad quos per dona disponimur, iudicium ferri. Unde nonnulli mulieres potissimum, fœdis prolapsionibus corruunt, & opinantes se operari aliquid grandius more mortali, nihil aliud agunt, quam ut vanissimi & stultissimi videantur. Quare non nisi ad viros spirituales & eximiâ prudentiâ præditos, quibus datum est de omnibus judicare, motus illos discernere, & an malignus spiritus sese in Angelum lucis transfiguret, pervidere attinet. Unde dona illa spiritus vocantur, juxta illud Isaïæ 11. *Requiescet super eum Spiritus Domini, spiritus sapientia, & intellectus, spiritus consilii & fortitudinis, spiritus scientia & pietatis: & replebit eum spiritus timoris Domini:* vocantur, inquam, spiritus, non solum quia spiritu cordis divini, seu Spiritu sancto imprimuntur, ut eis agantur filii Dei; sed etiam quia singulari spiritus discretione in his insolitis d'judicandis opus est, ne opinio verisimilis fallat, ne quod bonum est, malum; ne quod malum est, bonum esse credatur. Hinc etiam D. Thomas præclarissimam & solidissimam regulam præscribit *lib. 3. contra Gent. cap. 135.* ut modum in externis humilitatis officiis teneamus, quod à novitiis observari pervelim. *Ea qua abjectionis sunt, inquit, sponte assumere, ad humilitatem pertinet, non quidem simpliciter, sed secundum quod est necessarium. Cum enim humilitas sit virtus, nihil indiscretè operatur. Non est igitur humilitatis, sed stultitia, si quis quodcumque abjectum assumpserit: sed si id quod necessarium est fieri propter virtutem, aliquis propter abjectionem*

nem non recusat ; putà si charitas exigat quod proximis aliquod officium abjectum impendatur , hoc propter humilitatem aliquis non recuset. Quanvis enim , ut ibidem observat S. Doctor , abjectis quandoque utamur per virtutem , ut medicinà quadam : putà , inquit , si alicujus animus ad immoderatam excellentiam sit pronus , utiliter debitâ moderatione servatâ abjectis utitur vel sponte , vel ab aliis impositis , ad elationem animi comprimendam , dum per hac , qua gerit , sibi ipsi quodammodo parificat etiam infirmos homines , qui circa vilia officia occupantur. Attamen in his eximiâ prudentiâ opus est , & patris spiritualis oculatâ providentiâ.



DISSERTATIO II.

De virtutibus Theologicis : & primùm de Fide.



ACTENVS in humanis morata parum ad divina conscendit Theologia nostra , ut circa Deum immediatè versetur , quæ à Deo nomen accepit. Illam sanè puderet , & in nomen quod profiteretur , se peccare , suoque officio deesse agnosceret , quin spuriam se & degenerem prædicaret , si humanis contenta virtutibus , humi reperet , & ingenitæ dignitatis oblita , divina & sancta non versaret animo , & cum Apostolo mente non excederet Deo , sublimia non specularetur,

laretur , & purissimis Christianismi maximis Ethicam non locupletaret , quibus secuta ad æternam felicitatem via sternitur & munitur. Quavis enim omnes scientias & partes adhibeat, easque velut ancillas ad arcem vocet , eas tamen citò fastidit, tandiuque tædet, quândiu à divinorum , quibus immediatè speculandis inhiat , consideratione retardatur. Omnes perumpi creaturarum obices avet , ut una uni vacet, Deo scilicet adhæreat , & unus cum eo spiritus evadat.

Neque enim scientiarum regina eo nonnullorum errore imbuitur, qui Theologiæ fin unicum, certè præcipuum negotium & munus censent , legitimique Theologi partes se implevisse arbitrantur, si senticosis scholæ tricus immorati, implexis Metaphysicæ nodis, importunisque cavillorum remoris immoriantur. Vera Theologia subtilitates non negligit, sed solida præfert; argutias moderatas non aspernatur, ne sit adversus hæreticos inerimis & ignava ; sed in illis operæpretium non ponit , & juxta regulam Augustini vtendis utitur, fruendis fruitur, Deo scilicet, cui adhærere bonum est.

Ne mireris ergo, Lector , si decursis unica dissertatione longissimis de virtute generatim disputationibus, ad theologicas, Fidem, Spem, Charitatem Theologia nostra tota festina, & juxta festiva procedat , ac fermè abrepta feratur, quia Christianismus hac triplici virtute , veluti tessera, ab aliis omnibus sectis distinctus , sola materia est digna quæ à Theologo Christiano tradatur, quæve à te, Lector optime, legatur. Te enim ita comparatum arbitror , vel volo , ut ea
parum

parum cures, quæ nec ignorantibus nocebunt, nec scientibus opem ferent; quia si satagis rerum tuarum, si consulis & provides utilitatibus animæ tuæ, illis accuratissimam operam navabis, quæ Christianum decent, Christianismum docent, officii tui te monent, ad illudque implendum juvant, instituunt, hortantur.

Nosce teipsum, inquebant Philosophi: quanto potius Christiano sui noticia ingeri debet & inculcari, ut sciat se non minus Philosophis præstare, sed infinitis partibus superiorem esse, quàm homines præstare brutis Philosophi crediderunt. Agnosce Christiane dignitatem tuam, agnosce qualis sit Dominus tuus, qui te servum suum fecit fratrem suum: parum erat, fratrem suum fecit membrum suum, fecit fide discipulum suum, spe commilitonem suum, charitate filium suum. *Itane*, inquit Augustinus, *tanta dignitas viluit, quia tam benignè præstita est? Si non præstaretur, desideraretur: quia præstita est, contemnitur.* Si scires donum Dei, si Christiani statum, dignitatem, & officia expenderes, si Ethicæ Christianæ altitudinē, atque Evangelicæ legis œconomiam pervideres, & quàm magnam tibi personam imponat Christi institutio, ordo gratiæ, fidei lumen, spei securitas, amicitia charitatis, quâ adoptaris in filium Dei, expenderes, obstupefactus, ac extra te raptus utique gauderes, tibi prætermisissis aliis immensam segetem metiendarum suppeditari, indigitari immensas regiones decurrendas, opulentas aurifodinas aperiri, & amplissima proponi motiva, quibus & pii affectus cieantur, & vita tua ad immaculatas Evangelii, & Christianismi leges exigatur. Et quanvis,
cordate

cordate Lector, ingenii & pietatis meæ inopiâ ab illa, quâ Theologum instrui decet, beatissimâ copiâ longissimè me abesse apertè confitear, & præ me feram; tanta tamen est Christianismi, virtutumque theologicarum opulentia, ut me quâmlibet exilem, & tractando pro dignitate Christianismo imparem, copia inopem faciat, ut patebit in decursu.

C A P V T I.

De fidei natura, & dignitate.

DE virtutibus theologicis agit in communi S. Thomas hic q. 66. fusiùs verò & in particulari in principio secundæ secundæ, in qua parte de virtutibus singulatim acturus, divitias scientiæ suæ profudit, virtutum medullas, fimbrias, & veluti anatomen mira arte, majori pietate, & sibi semper constanti eruditionis profunditate exposuit, discussit, enucleavit. Nos autem brevitati unicè studentes, ea quæ S. Præceptor de virtutibus duobus illis in locis disputavit, hîc simul explicanda suscipimus, & immensam infinitæ materiæ amplitudinem intra hujus tomi angustias derivandam aggredimur.

Faxit Deus nos, uti angelicæ ejus doctrinæ tenaces & ferè exscriptores, ita & illius finis pietatis æmulatores, in quam velut potissimum hujus tractationis scopum collineavit, ut declarant præclara verba in prologo 2. 2. præfixa: *Post communem considerationem de virtutibus & vitiis, & aliis ad materiam moralem pertinenti-*

bus, necesse est considerare singula in speciali: sermones enim morales universales minus sunt utiles, eo quod actiones in particularibus sunt. Verum quia in hac sacra virtutum triade fides cæteras ordine saltem generationis præcedit, sicut lumen rationis omnium virtutum naturalium partui præit, ideo de ea prius differendum merito arbitramur, quàm de aliis sermonem instituamus. Cæterum ne vel æquivocatione laboret nostra disputatio, vel incertis subnixa videatur, duo sequentibus speculationibus veluti fundamenta præstruenda sunt, quorum altero quid nomine fidei intelligendum sit præmittamus, altero ejus existentiam in antecessum demonstremus.

Præmittitur significatio fidei, ejusque necessitas præsupponitur.

Præmoneo igitur primò, fidem varia significare, variisque proinde sub acceptionibus in Scripturis, probatisque Authoritatibus frequentari. In primis non rarò pro doctrina & dogmatibus veræ religionis sumi assolet, ut cum post Athanasium recensitis religionis orthodoxæ articulis cantat Ecclesia: *Hac est fides catholica, quam nisi quisque fideliter, firmiterque crediderit, salvus esse non poterit.* In quo etiam sensu intelligendus venit locus ille Apocalypseos 2: cap. *Non negasti fidem meam*, id est doctrinam, quæ est veræ fidei objectum, non es inficiatus.

Accipitur secundò fides à Jurisperitis & Oratoribus pro fidelitate promissis firmiter stante,

& dictis semper consentiente : sic etiam in Scriptura vocatur dispensator & servus fidelis , qui promissis non deest , officia persolvit , & quæcunque sive Deo , sive hominibus pollicitus est , exitu præstat. Sic etiam Deus dicitur fidelis in omnibus verbis suis , quia promissa ejus eventus nedum confirmat , sed superat : hinc dicitur de Christo *Isai. 11.* quod erit fides cinctorium renum ejus , quia est veluti totus fidelitate circumamictus , ut quæ pro æterna vita laborantibus spondit , impendat , & ultra merita & vota superimpendat.

Usurpatur tertio fides pro fiducia & confidentia , quâ quis de aliquo optinè sperans , ejus se voluntati permittit : sic cum fide nos orare vult Jacobus cap. 1. *Postulet*, inquit, *in fide*, *nihil hesitans*; idest qui Deo sincerè servit , qui omnes cogitationes suas , omnia studia , & omnem spem in uno Deo figit ac locat , qui unum Dei obsequium , præterea nihil curat , securus postulet , nec vacillans ab eo petat qui dat abundanter , & non improperat.

Quarto interdum veritatem , vel veracitatem significat. Sic Christus Apocalyp. 1. appellatur *testis fidelis* , idest veridicus & syncerus , à fraude purus , nulla simulatione tectus , nulla arte coloratus , sed apertam & nudam veritatem peræquè amans , peræquè prodens. Denique & strictè nomine fidei intelligunt Christiani & Theologi virtutem illam divinitus infusam , quâ mysteriis à Deo revelatis , quâlibet obscuris , intellectus humanus & humiliter obsequitur , & firmiter assentitur. De hac impræsentiarum pluribus agemus.

Præmoneo 2. satis, superque nos de existentia fidei convictos iri, si ejus necessitatem suadeamus, cum æquè Author gratiæ ac naturæ nunquam deficiat in necessariis. Fidei autem necessitatem sublimi discursu probat D. Thomas *q. 2. art. 3.* quia nimirum in omnibus naturis ordinatis duo ad inferioris naturæ perfectionem concurrunt, unum quidem secundum motum superioris agentis, sicut aqua secundum proprium motum impellitur in centrum, & secundum motum lunæ movetur circa centrum secundum fluxum & refluxum. Similiter orbes planetarum propriis motibus ab oriente in occidentem moventur; motu autem primi orbis ab oriente in occidentem cientur, quod & in aliis principalioribus mundi partibus verum esse probatur: nam terræ secundum propriam naturam convenit quies in centro, ex actione verò corporis superioris, scilicet cœli, convenit germinatio vegetabilium. Ipsi etiam primo cœlo, scilicet Empyreo, convenit naturaliter lux & proprius motus; ex actione verò Angelorum perpetuitas motus. Quin & ipsis Angelis actiones quædam sunt naturales, cum lata verò perfectio ex illuminatione superiorum derivatur. Ergo similiter creatura rationalis non solum debet perfici eo quod sibi secundum propriam naturam competit, sed etiam supernaturali perfectione, quæ per fidem obtinetur, consummari; aliàs natura totius universitatis perfectissima deterioris foret conditionis; natura, inquam illa, quæ cum agnoscat universalem rationem boni, immediatum habet ad Deum ordinem; cum solus Deus sit universale bonum infinitæ cordis humani capacitatis

satis

fatiativum : atqui summi boni participationem habere nequit, nisi prius supremam veritatem agnoscat, cujus proinde debet esse discipulus per fidem, ut discat à Deo doctore, juxta illud Joan. 6. *Omnis qui audit à Patre, & didicit, venit.* Addiscentem porò oportet credere : ergo necessaria est fides, quâ homo aliquid supra rationem naturalem credat.

Accedit, fidem non modò ad ea quæ rationem excedunt cognoscenda esse necessariam, sed etiam ad ea quæ per rationem naturalem cognosci possunt. Primò ut citiùs & faciliùs ad cognitionem veritatis homo perveniat, ad quam non nisi post longum tempus, & supposito scientiarum philosophicarum apparatu humana ratio pervenire solet. Secundò, ut divinarum veritatum notitia communior sit, & in hebetes, variisque implicatos occupationibus diffundatur, quæ ante fidem non nisi paucis eruditis patere poterat. Tertiò, ut earundem veritatum cognitio certior sit, & ab omni falsitate immunis, quæ antea non nisi multis permixta erroribus Philosophis affulgebat. Quam rationem in præmialibus Theologiæ latius persequuti sumus. Egregiè etiam, & juxtà acutè observat S. Thomas *art. 2. ad 3.* vix ac ne vix quidem posse Deum sine fide verè cognosci, imò infideles verè Deum esse non credere; quia cum eas, quas de Deo nòrunt veritates, multis admisceant erroribus, idolum sibi fingunt, non Deum, qui cum sit simplicissimus, non potest partim verè, partim falsè cognosci. Dum ergo aliquid ei verum tribuunt, & simul aliquid repugnans asserunt, sibi ipsi contradicunt.

Dices : Quomodo fides potest esse eorum quæ per rationem naturalem possunt investigari, cum fides sit necessariò non apparentium; scientia verò evidentium? Imò sequeretur actum credendi non esse meritorium, ea saltem credendo, de quibus est ratio naturalis; vel saltem meritum fidei minui: si enim habeatur ratio sufficiens ad credendum Deum esse, id non erit liberum credere, vel non credere, subindeque non erit meritorium, cum totam fidei difficultatem evacuet.

Respondeo, fidem non esse quidem necessariam, ut veritatibus illis assentiamur, quas possumus ratione naturali demonstrare, sed quia ratio humana offusis præsertim peccatorum & concupiscentiæ tenebris obscurata sæpe cespitat, sæpe cæcutit; ideo fides est necessaria, ut rationem vel errantem reducat, vel infirmam confirmet, vel dubitantem dirigat. Porro naturales veritates, si ratione homo demonstrat, de illis non habet fidem; si non capit, eis fide credit.

Quod si rationes illæ non sint demonstrativæ, nec pariant scientiam, sed fidem duntaxat confirmant, tunc fidei merito nequaquam obfunt: possunt enim dupliciter considerari, primò ut præcedentes; cum nimirum aliquis est ita comparatus, ut nolit credere, nisi ratione humana inducatur, & tunc verum est dictum Gregorii: *Fides non habet meritum, ubi humana ratio præbet experimentum.* Sicut etiam homo actum virtutis propter antecedentis passionis impetum exercens, omni merito privatur. Secundò possunt se habere consequenter, ut cum homo promptam habens credendi voluntatem, diligit verita-

veritatem creditam, ad eamque exornandam pro virili excogitat rationes, & si quas invenire potest, ex abundantia cordis amplectitur, ut testimonia Dei credibilia faciat nimis; & tunc rationum studium & inventio, sicut melioris voluntatis, ita majoris meriti signum est: sicut etiam in moralibus passionis impetus ferventem voluntatis amorem consequutus promptioris est voluntatis argumentum. Imò in ipsa scientia licet assensus non sit per se meritorius, quia non est liber, sed efficaciam demonstrationis necessario expressus; tamen quia consideratio actualis libero subjacet arbitrio, meritoria esse potest, si ad finem charitatis, honorem scilicet Dei, & proximi utilitatem referatur. Quod à fortiori de actu credendi verum est, quia à pio voluntatis à Deo motæ affectu pendet, subindeque libertatis & meriti capax omninò dicendus est. His præsuppositis, de natura & essentia fidei agendum est, quæ quia ex objecto venanda est, de illo primùm differere operæpretium est.

SPECVLATIO I.

Fides solum Deum, solique De credit, ac divina duntaxat innititur authoritati.

PRO intelligentiâ supponenda, vel potius recolenda sunt ea, quæ in principio libri primi de objecto Theologiæ præmisimus, quibus adde objectum impræsentiarum dupliciter usurpari

posse: primò enim res credita vocatur *objectum quod*; *authoritas* verò propter quam credimus, vocatur *objectum cui*. Quod utrumque subdividitur in *materiale* & *formale*: *objectum quod materiale* est illud, quod propter aliud credimus; *formale* verò est illud, quod per se & primariò credimus; *objectum materiale cui* est illud cui credimus ratione alterius, sicut *formale* est illud cui credimus propter se. Dum ergo asserimus Deum solum, solique Deo credere fidem, idem est ac si diceremus Deum esse *objectum formale quod* fides credit; & ejus veritatem in dicendo & attestando, seu veracitatem, esse *objectum cui* credit. Dixi *objectum formale*, quia de materiali nulla potest esse difficultas, apud omnes enim in confesso est & per se notum, *objectum materiale quod* fides credit, esse illud omne quod revelatum est; *objectum verò materiale*, seu personas quibus credimus, esse Prophetas, Christum Dominum, Apostolos, Evangelistas & Eccles. Hoc præmissò.

Probatur prima pars: illud fides credit, seu illud est *objectum quod formale fidei*, cujus notitiam fides per se primò quærit, aliorum verò cognitionem negligit, nisi ad pleniorē illius *objecti* agnitionem deserviant; nihil enim aliud per *objectum formale* & *primarium* alicujus facultatis, scientiæ, & habitus intellexere hactenus Philosophi, vel certè intelligere potuerunt; ideo namque color est *objectum adæquatum formale* potentiæ visivæ, quia nihil sub potentiam visivam cadit, nisi sub ratione colorati; & illa multiplicium *objectorum*, ad quæ se extendit oculus, multiformis varietas quantaquanta est, nullatenus ad potentiam visivam referretur, nisi foret

foret aliquo colore induta. Atqui fides solius Dei notitiam quærit, ad alia verò nequaquam divertit, & veluti digreditur, nisi quatenus ad Deum manuducunt, Deumque respiciunt, vel ut principium à quo procedunt, vel ut finem ad quem redeunt & contendunt: aliàs fides non esset virtus theologica, nec esset lucerna lucens in caliginoso loco, ad invisibilia Dei manuducens, nec substantia sperandarum rerum, idest, divinarum, quæ sunt una & tota ratio spei nostræ: ergo solum Deum tanquam objectum formale adæquatum fides credit. Si consideremus materialiter ea, quibus fides assentit (inquit D. Thomas 2. 2. quæst. 1. art. 1.) non solum est ipse Deus, sed etiam multa alia secundum quod habent aliquem ordinem ad Deum, prout scilicet per aliquos Divinitatis effectus homo adjuvatur attendendum in divinam fruitionem; & ideo ex hac parte etiam objectum fidei est quodammodo veritas prima, in quantum nihil cadit sub fide, nisi in ordine ad Deum, sicut & objectum medicinae est sanitas, quia nihil medicinae considerat, nisi in ordine ad sanitatem.

Dices: Nonne alia multa præter Deum sunt immediatè revelata, putà humanitas Christi? Nonne ista propositio, *Christus non est homo*, est immediatè contra fidem? Ergo solus Deus non est objectum immediatum fidei, nec subinde formale, quod est immediatè revelatum?

Respondeo, non sufficere ut aliquid sit objectum formale fidei, quod sit immediatè revelatum immediatione excludente discursum inferentem conclusionem ex articulo revelato, sed etiam excludente ordinem & attributionem ad

aliud. Ista autem propositio, *Christus est homo*, licet sit immediatè revelata, & non ex alia per discursum derivata, non tamen absque ordine & attributione ad Deum, quem unum fides quærit, ejusque notitiâ contenta est & felix: quod si præter Deum alia novit, non propter ista beator, sed propter Deum solum est beata, & in hoc pacto fides expressio est scientiæ Dei & Beatorum.

Instabis: Fides, utpote virtus theologicæ, respicit quidem Deum: sed in hoc convenit cum aliis virtutibus theologicis Deo uni & unice vacantibus: ergo prout ab aliis virtutibus distinguitur, respicit Deum sub ratione propria & characteristica, quæ non potest esse alia, quàm ratio entis revelabilis, quæ cum possit prædicari in recto de omnibus quæ à fide respiciuntur, solam rationem objecti formalis sibi vindicat: ergo non Deus, sed ens revelabile, Deo & creaturis analogicè commune, est objectum formale fidei.

Respondeo Deum sub ratione primæ veritatis essentialis esse objectum formale fidei nostræ, fides enim est virtus ad intellectum pertinens, ac proinde Deum sub illa ratione respicit, circa quam intellectus occupatur: Deus autem respicitur ab intellectu sub ratione primæ veritatis. Et certè: idèò fidei nomen virtutis theologicæ asseritur, quia Deum sub ratione alicujus divinitati eximii, non verò communis Deo & creaturis, qualis est ratio entis revelabilis, considerat: unde Dionys. cap. 7. de divin. nom. *Fides*, inquit, *est circa simplicem & semper existentem veritatem*. Nec obest quod Deus, ejusque veritas non prædicentur in recto de omnibus quæ fides cre-

dit.

dit; non obest, inquam, quia sufficit ut quæcunque respicit fides, ad Deum ut ad primam veritatem referantur, in eisque vel Deus ipse, vel radius splendeat Deitatis; & ideo *Marci II. cap.* hæc virtus appellatur fides Dei, quia circa Deum; ejusque veritatem immediatè occupatur.

Urgebis: Deus sub ratione Deitatis est objectum Theologiæ, quatenus Deitas est ratio quam unicè Theologia quærit, propter quam cætera considerat, ex qua omnes divinas perfectiones, imò & omnes materias deducit, quæ ex illo principio, *Deus est qui est*, liquidò, & spontè fluunt, ut ex dictis primo libro perspicuum manet: ergo similiter Deus sub ratione Deitatis est objectum fidei, cum idem sit objectum principiorum & conclusionum.

Respondeo quod dum asserimus primam veritatem esse objectum formale fidei, non excludimus Deitatem à ratione objecti formalis illius, sed potius eam includimus, tametsi non explicemus; Deitatem quippe contemplatur fides, sicut diligit charitas: illi utraque inhiat, illi utraque incumbit immediatè, sed veritas fidem allicit, bonitas charitatem inescat; cum quo fiat utramque virtutem, utpote theologicam, Deum immediatè respicere, sed diverso veluti radio divinitatis illiçi, ut ipsam quam unicè quærit Deitatem, faciliùs & connaturaliùs inveniat, penetret, potiatur. Itaque in rei veritate, & absque vitiligatione idem est objectum fidei & Theologiæ, sed tamen est aliqua differentia per modum includentis & inclusi: nam cum de Theologiæ objecto loquimur, de sola Deitate est sermo, quia Deitas est ratio omnium probandorum de Deo,

cum verò de fide est sermo, veritatem explicamus; tum quia cum Deitas possit esse objectum opinionis & fidei acquisitæ per solam Deitatem, non fuisset explicata propria ratio fidei, quæ exigat actum indefectibilem à vero, veritatis amantem & tenacem. Tum quia debuit explicari distinctio fidei à spe & charitate, quæ licet versentur circa Deum, non tamen sub ratione primæ veritatis, sed supremæ bonitatis. Quare sicut promiscuè dicimus ens & verum esse objectum intellectus, quia ens non considerat nisi ratione veritatis, nec veritatem speculatur nisi ut cognoscat ens; ita & Deitatem, & primam veritatem objectum fidei asserimus, quia Deitatem ratione veritatis virtus intellectualis considerat.

Secunda pars probatu facillima est hoc discursu: illi fides credit, cui tota innitur, quove ad credendum maximè impellitur: atqui tota ratio quare fides credit, est divina veracitas, id est non alio ad tota & tanta, tamque ardua mysteria credenda ciatur ut motivo, nisi quia Deus, qui est veritas, quive falli, aut fallere nec vult, nec potest, veritates illas quàmlibet occultas & juxta difficiles revelavit: ergo sicut Deum solum, ita Deo soli fides nostra assentitur, juxta illud Hilarii: *Soli Deo de se credendum est, quin nisi solus se noverit.* Et illud Cassiani lib. 4. de Incarnatione, cap. 6. *Deus hoc dixit: verbum illius summa ratio est: removeo argumenta, removeo disputationes, sola mihi ad credulitatem sufficit persona decentis.* Unde ait D. Thomas quæst. 14. de verit. art. 8. ad 16. *Testimonium veritatis prima se habet in fide ut principium in scientiis demonstrativis.*

Præterea. Patet autem principium in scientiis esse medium & motivum assensus scientifici: ergo similiter divina veritas est motivum unicum, propter quod fides credit, cui inhaeret, in quo ultimo sistit. Deo etenim credimus, quia est veritas: nec possumus nisi insulse interrogari, quare credimus veritati. Nec interest, quod illa ratio formalis sit extrinseca, cum veritatibus revelatis non nisi propter extrinsecum testimonium, non verò propter internam rei notitiam & scibilitatem assentiamur.

Sed dices: Nondum sistit fidei resolutio, donec Deitatem ipsam pro ratione proferat; cum enim verum sit passio entis, veritas divina deitatem consequitur: unde si quærat, quare Deo credimus, respondemus: Quia est veritas, fallere nec volens, nec valens. Si rursus quare est veritas postuletur? Quia Deus est, dicimus: ergo in deitatem tota refunditur fidei resolutio, subindeque deitas est ratio formalis fidei.

Respondeo, quod postquam reddita est causa quod creditur Deo, quia est ipsa veritas, ista quaestio, quare Deus est veritas, non est ad rem, sed planè impertinens, neque per se spectat ad causam assensus, sed causam rei: undecunque enim proveniat Deum esse veritatem, perinde est, quia infallibili veritati undecumque provenienti securi credimus, cum falsum non possit ab incommutabili veritate promanare. Unde si per impossibile posset dari summa veritas, summaque veracitas, quæ non esset Deus, illi planè credendum foret: quod ergo veritas divina in Deitatem resolvatur, materialiter se habet ad fidei assensum; subindeque Deitas est magis ratio fundamentalis fidei, quàm formalis.

libilitas inveniatur, illa tamen infallibilitas Ecclesiæ, utpotè columnæ & firmamento veritatis eximia, non est prima radix firmitatis assensus, sed est resolubilis in divinam, cui subordinatur, & à qua totam suæ certitudinis firmitatem haurit, & mutuatur. Neque enim Ecclesiæ credimus, nisi quia est vox Dei, cujus proinde revelationi tanquam basi tota innititur fidei nostræ certitudo. Ergo soli Deo ultimò credit fides nostra, quæ propterea merè & adæquatè divina est.

Urgebis : Hoc quod est Ecclesiam regi à Spiritu sancto ideo credimus, quia sacris literis proditum est ; unde ad hoc confirmandum conglobatas Scripturæ autoritates, & promissiones proferimus, quibus iadefectibilitas Ecclesiæ vindicatur, asseriturque portas inferi nunquam adversus illam prævalituras. Ergo non in Ecclesiam ut proponentem, nec in Deum ut revelantem, sed in Scripturas ultima fidei resolutio refunditur.

Respondeo evidens esse solam Scripturam non esse ultimam fidei nostræ determinationem; & veluti pondus assensus ; tum quia sacræ literæ corrumpi possunt vel corruptela hæreticorum, vel ignorance Typographorum. Tum quia assignari debet aliqua regula infallibilis, vel lydius lapis probans legitimos & canonicos libros, eosque discernens à spuris ; quam utique litteram Scriptura non dirimit. Tum quia Scripturæ sensus non est omnibus pervius, sed sæpè reconditus, & abstrusus ; nec pro cujuscunque arbitrato verus debet elici sensus, sed à regula iudicabili exponendus : sicut in politicis leges non ab omnibus exponuntur, sed à iudicibus, penes

nes quos res est. Tum quia licet omnia ad fidem pertinentia virtualiter in Scripturis contineantur, non tamen formaliter explicantur, sed multa ex illis afflante Spiritu sancto deducuntur, sicut è principiis variæ conclusiones derivantur. Tum quia fides nostra, & Apostolorum, cum sit ejusdem rationis, in idem resolvitur: illi autem viri docti à Domino fidem suam in Scripturas non resolvebant, nec in Ecclesiam tanquam in rationem formalem, cum ipsi essent fundatores nascentis Ecclesiæ, & canonicorum librorum scriptores. Ergo ultima resolutio fidei in divina sistit autoritate proposita ab Ecclesia, & in Scripturis sub interpretamento Ecclesiæ contenta. Tum denique propter multiplicem illum rationum instructum, quibus hanc veritatem dissertatione præambula tomi superioris munivimus, & deploranda Calvinistarum ultimam controversiarum decisionem ad privatum proprii spiritus instinctum ineptissimè refundentium deliramenta confutavimus.

Ad argumentum ergo dicendum, quod cum asserimus resolutionem fidei nostræ, fieri in auctoritatem Ecclesiæ, per Ecclesiam intelligimus etiam omnem ejus doctrinam, quæ est verbum Dei & ipsa Scriptura, ita ut ex utroque fiat regula totalis & adæquata: & hinc est quod una per aliam vicissim juvatur, & propter connexionem una per aliam comprobatur, sicut Christus testimonium perhibebat de Joanne, & Joannes de Christo. Unde nec in Scripturam præcisè, nec in Ecclesiam duntaxat, sed in utramque simul reducitur fidei nostræ resolutio. Non quod auctoritas Ecclesiæ sit ratio formalis credendi, sed quia:

Dices: Quomodo fides potest esse eorum quæ per rationem naturalem possunt investigari, cum fides sit necessario non apparentium; scientia verò evidentium? Imò sequeretur actum credendi non esse meritorium, ea saltem credendo, de quibus est ratio naturalis; vel saltem meritum fidei minui: si enim habeatur ratio sufficiens ad credendum Deum esse, id non erit liberum credere, vel non credere, subindeque non erit meritorium, cum totam fidei difficultatem evacuet.

Respondeo, fidem non esse quidem necessariam, ut veritatibus illis assentiamur, quas possumus ratione naturali demonstrare, sed quia ratio humana offusis præsertim peccatorum & concupiscentiæ tenebris obscurata sæpe cespitat, sæpe cæcutit; ideo fides est necessaria, ut rationem vel errantem reducat, vel infirmam confirmet, vel dubitantem dirigat. Porro naturales veritates, si ratione homo demonstrat, de illis non habet fidem; si non capit, eis fide credit.

Quod si rationes illæ non sint demonstrativæ, nec pariant scientiam, sed fidem duntaxat confirmant, tunc fidei merito nequaquam obfunt: possunt enim dupliciter considerari, primò ut præcedentes; cum nimirum aliquis est ita comparatus, ut nolit credere, nisi ratione humana inducatur, & tunc verum est dictum Gregorii: *Fides non habet meritum, ubi humana ratio præbet experimentum.* Sicut etiam homo actum virtutis propter antecedentis passionis impetum exercens, omni merito privatur. Secundò possunt se habere consequenter, ut cum homo promptam habens credendi voluntatem, diligit

veritatem

veritatem creditam, ad eamque exornandam pro virili excogitat rationes, & si quas invenire potest, ex abundantia cordis amplectitur, ut testimonia Dei credibilia faciat nimis; & tunc rationum studium & inventio, sicut melioris voluntatis, ita majoris meriti signum est: sicut etiam in moralibus passionis impetus ferventem voluntatis anorem consequutus promptioris est voluntatis argumentum. Imò in ipsa scientia licet assensus non sit per se meritorius, quia non est liber, sed efficaciam demonstrationis necessario expressus; tamen quia consideratio actualis libero subjacet arbitrio, meritoria esse potest, si ad finem charitatis, honorem scilicet Dei, & proximi utilitatem referatur. Quod à fortiori de actu credendi verum est, quia à pio voluntatis à Deo motæ affectu pendet, subindeque libertatis & meriti capax omnino dicendus est. His præsuppositis, de natura & essentia fidei agendum est, quæ quia ex objecto venanda est, de illo primum differere operæpretium est.

SPECVLATIO I.

Fides solum Deum, solique De credit, ac divina duntaxat innititur authoritati.

PRO intelligentiâ supponenda, vel potius recolenda sunt ea, quæ in principio libri primi de objecto Theologiæ præmisimus, quibus adde objectum impræsentiarum dupliciter usurpari

posse: primò enim res credita vocatur objectum *quod*; authoritas verò propter quam credimus, vocatur objectum *cui*. Quod utrumque subdividitur in materiale & formale: objectum *quod* materiale est illud, quod propter aliud credimus; formale verò est illud, quod per se & primariò credimus; objectum materiale *cui* est illud cui credimus ratione alterius, sicut formale est illud cui credimus propter se. Dum ergo asserimus Deum solum, solique Deo credere fidem, idem est ac si diceremus Deum esse objectum formale *quod* fides credit; & ejus veritatem in dicendo & attestando, seu veracitatem, esse objectum *cui* credit. Dixi objectum formale, quia de materiali nulla potest esse difficultas, apud omnes enim in confesso est & per se notum, objectum materiale quod fides credit, esse illud omne quod revelatum est; objectū verò materiale, seu personas quibus credimus, esse Prophetas, Christum Dominū, Apostolos, Evangelistas & Eccles. Hoc præmissio.

Probatur prima pars: illud fides credit, seu illud est objectum *quod* formale fidei, cujus notitiam fides per se primò quærit, aliorum verò cognitionem negligit, nisi ad pleniorē illius objecti agnitionem deserviant; nihil enim aliud per objectum formale & primarium alicujus facultatis, scientiæ, & habitus intellexere hactenus Philosophi; vel certè intelligere potuerunt; ideo namque color est objectum adæquatum formale potentiæ visivæ, quia nihil sub potentiam visivam cadit, nisi sub ratione colorati; & illa multiplicium objectorum, ad quæ se extendit oculus, multiformis varietas quantaquanta est, nullatenus ad potentiam visivam referretur, nisi foret

foret aliquo colore induta. Atqui fides solius Dei notitiam quærit, ad alia verò nequaquam divertit, & veluti digreditur, nisi quatenus ad Deum manuducunt, Deumque respiciunt, vel ut principium à quo procedunt, vel ut finem ad quem redeunt & contendunt: aliàs fides non esset virtus theologica, nec esset lucerna lucens. in caliginoso loco, ad invisibilia Dei manuducens, nec substantia sperandarum rerum, idest, divinarum, quæ sunt una & tota ratio spei nostræ: ergo solum Deum tanquam objectum formale adequatum fides credit. Si consideremus materialiter ea, quibus fides assentit (inquit D. Thomas 2. 2. quæst. 1. art. 1.) non solum est ipse Deus, sed etiam multa alia secundum quod habent aliquem ordinem ad Deum, prout scilicet per aliquos Divinitatis effectus homo adjuvatur attendendum in divinam fruitionem; & ideo ex hac parte etiam objectum fidei est quodammodo veritas prima, in quantum nihil cadit sub fide, nisi in ordine ad Deum, sicut & objectum medicina est sanitas, quia nihil medicina considerat, nisi in ordine ad sanitatem.

Dices: Nonne alia multa præter Deum sunt immediatè revelata, putà humanitas Christi? Nonne ista propositio, *Christus non est homo*, est immediatè contra fidem? Ergo solus Deus non est objectum immediatum fidei, nec subinde formale, quod est immediatè revelatum:

Respondeo, non sufficere ut aliquid sit objectum formale fidei, quod sit immediatè revelatum immediatione excludente. discursum inferentem conclusionem ex articulo revelato, sed etiam excludente ordinem & attributionem ad

aliud. Ista autem propositio, *Christus est homo*, licet sit immediatè revelata, & non ex alia per discursum derivata, non tamen absque ordine & attributione ad Deum, quem unum fides querit, ejusque notitià contenta est & felix: quod si præter Deum alia novit, non propter ista beator, sed propter Deum solum est beata, & in hoc pacto fides expressio est scientiæ Dei & Beatorum.

Instabis: Fides, utpote virtus theologia, respicit quidem Deum: sed in hoc convenit cum aliis virtutibus theologicis Deo uni & unicè vacantibus: ergo prout ab aliis virtutibus distinguitur, respicit Deum sub ratione propria & characteristicâ, quæ non potest esse alia, quàm ratio entis revelabilis, quæ cum possit prædicari in recto de omnibus quæ à fide respiciuntur, solam rationem objecti formalis sibi vindicat: ergo non Deus, sed ens revelabile, Deo & creaturis analogicè commune, est objectum formale fidei.

Respondeo Deum sub ratione primæ veritatis essentialis esse objectum formale fidei nostræ, fides enim est virtus ad intellectum pertinens, ac proinde Deum sub illa ratione respicit, circa quam intellectus occupatur: Deus autem respicitur ab intellectu sub ratione primæ veritatis. Et certè ideò fidei nomen virtutis theologicæ asseritur, quia Deum sub ratione alicujus divinitati eximii, non verò communis Deo & creaturis, qualis est ratio entis revelabilis, considerat: unde Dionys. cap.7. de divin. nom. *Fides*, inquit, *est circa simplicem & semper existentem veritatem*. Nec obest quod Deus, ejusque veritas non prædicentur in recto de omnibus quæ fides credit.

dit; non obest, inquam, quia sufficit ut quæcunque respicit fides, ad Deum ut ad primam veritatem referantur, in eisque vel Deus ipse, vel radius splendeat Deitatis; & ideo *Marci II. cap.* hæc virtus appellatur fides Dei, quia circa Deum ejusque veritatem immediatè occupatur.

Urgebis: Deus sub ratione Deitatis est objectum Theologiæ, quatenus Deitas est ratio quam unice Theologia quærit, propter quam cætera considerat, ex qua omnes divinas perfectiones, imò & omnes materias deducit, quæ ex illò principio, *Deus est qui est*, liquidò, & spontè fluunt, ut ex dictis primo libro perspicuum manet: ergo similiter Deus sub ratione Deitatis, est objectum fidei, cum idem sit objectum principiorum & conclusionum.

Respondeo quod dum asserimus primam veritatem esse objectum formale fidei, non excludimus Deitatem à ratione objecti formalis illius, sed potius eam includimus, tametsi non explicemus; Deitatem quippe contemplatur fides, sicut diligit charitas: illi utraque inhiat, illi utraque incumbit immediatè, sed veritas fidem allicit, bonitas charitatem inescat; cum quo stat utramque virtutem, utpote theologicam, Deum immediatè respicere, sed diverso veluti radio divinitatis illici, ut ipsam quam unice quærit Deitatem, faciliùs & connaturaliùs inveniat, penetret, potiatur. Itaque in rei veritate, & absque vitiligatione idem est objectum fidei & Theologiæ, sed tamen est aliqua differentia per modum includentis & inclusi: nam cum de Theologiæ objecto loquimur, de sola Deitate est sermo, quia Deitas est ratio omnium probandorum de Deo,

cum verò de fide est sermo, veritatem explicamus; tum quia cum Deitas possit esse objectum opinionis & fidei acquisitæ per solam Deitatem, non fuisset explicata propria ratio fidei, quæ exigit actum indefectibilem à vero, veritatis amantem & tenacem. Tum quia debuit explicari distinctio fidei à spe & charitate, quæ licet versentur circa Deum, non tamen sub ratione primæ veritatis, sed supremæ bonitatis. Quare sicut promiscuè dicimus ens & verum esse objectum intellectus, quia ens non considerat nisi ratione veritatis, nec veritatem speculatur nisi ut cognoscat ens; ita & Deitatem, & primam veritatem objectum fidei asserimus, quia Deitatem ratione veritatis virtus intellectualis considerat.

Secunda pars probatu facillima est hoc discursu: illi fides credit, cui tota innititur, quove ad credendum maximè impellitur: atqui tota ratio quare fides credit, est divina veracitas, id est non alio ad tota & tanta, tamque ardua mysteria credenda cietur ut motivo, nisi quia Deus, qui est veritas, quive falli, aut fallere nec vult, nec potest, veritates illas quàmlibet occultas & juxta difficiles revelavit: ergo sicut Deum solum, ita Deo soli fides nostra assentitur, juxta illud Hilarii: *Soli Deo de se credendum est, quin nisi solus se noverit.* Et illud Cassiani lib. 4. de Incarnatione, cap. 6. *Deus hoc dixit: verbum illius summa ratio est: removeo argumenta, removeo disputationes, sola mihi ad credulitatem sufficit persona dicentis.* Unde ait D. Thomas quæst. 14. de verit. art. 8. ad 16. *Testimonium veritatis prima se habet in fide ut principium in scientiis demonstrativis.*

strativis. Patet autem principium in scientiis esse medium & motivum assensus scientifici: ergo similiter divina veritas est motivum unicum, propter quod fides credit, cui inhæret, in quo ultimo sistit. Deo etenim credimus, quia est veritas: nec possumus nisi insulse interrogari, quare credimus veritati. Nec interest, quod illa ratio formalis sit extrinseca, cum veritatibus revelatis non nisi propter extrinsecum testimonium, non verò propter internam rei notitiam & scibilitatem assentiamur.

Sed dices: Nondum sistit fidei resolutio, donec Deitatem ipsam pro ratione proferat; cum enim verum sit passio entis, veritas divina deitatem consequitur: unde si quæratur, quare Deo credimus, respondemus: Quia est veritas, fallere nec volens, nec valens. Si rursus quare est veritas postuletur? Quia Deus est, dicimus: ergo in deitatem tota refunditur fidei resolutio, subindeque deitas est ratio formalis fidei.

Respondeo, quod postquam reddita est causa quod creditur Deo, quia est ipsa veritas, ista quaestio, quare Deus est veritas, non est ad rem, sed planè impertinens, neque per se spectat ad causam assensus, sed causam rei: undecumque enim proveniat Deum esse veritatem, perinde est, quia infallibili veritati undecumque provenienti securi credimus, cum falsum non possit ab incommutabili veritate promanare. Unde si per impossibile posset dari summa veritas, summaque veracitas, quæ non esset Deus, illi planè credendum foret: quod ergo veritas divina in Deitatem resolvatur, materialiter se habet ad fidei assensum; subindeque Deitas est magis ratio fundamentalis fidei, quàm formalis.

Instabis : Assentiri Deo revelanti, quia veritas est, convenit Prophetis, reperitur etiam in Beatis assentientibus Deo annuntianti aliquid futurum, vel alieni cordis arcana detegenti : ergo assentiri Deo vitidico non est proprius & singularis fidei actus, sed aliis communis.

Respondeo assentiri Deo revelanti aliter convenire Beato, aliter fideli, aliter Prophetæ ; fidelis enim Deo obscure revelanti assentitur, Beatus verò futura, vel cordis cogitata per impressam evidentis luminis claritatem novit : Prophetam autem futura vel secreta à Deo sive clare, sive obscure audire, perinde est, ejusque studium & officium neutram in partem propensum est. Nisi mavis dicere duo in Prophetâ inveniri, assensum nimirum Deo revelanti, & vaticinationem futura vel secreta pangeantem, seu procul fantem ; porro prius munus ad fidem, posterius ad prophetiam pertinere.

Insistes : Ultima fidei resolutio fit in auctoritatem Ecclesiæ, juxta celebre illud Augustini pronuntiatum, quo omnes hactenus hæreses sæpe truncatæ, semper truncandæ sunt, ex libr. contra epist. fundam. cap. 5. *Ego Evangelio non crederem, nisi me Catholica Ecclesia commoneret auctoritas.* Quod quidem intelligitur de Ecclesia non præcisè prout est congregatio fidelium : (qua ratione non nisi humana auctoritate pollet,) sed prout est organum Spiritus sancti divinitus permotum, & jugiter in propositione, atque expositione credendorum gubernatum : ergo non soli Deo fides credit.

Respondeo quod licet auctoritas Ecclesiæ sit regulâ & mensura infallibilis, ad quam veluti
amissum

amissim credenda exigere debemus quoad propositionem & explicationem; ultima tamen & decretoria fidei resolutio, quoad formalem assentiendi rationem in divinam duntaxat auctoritatem & infallibile Spiritus sancti testimonium reducitur, & quiescit. Abominamur quidem, & totis odiis execramur nefandam Modernorum Novatorum hæresim Ecclesiæ auctoritatem omnem pessundantium, & ad nihilum redigentium. Sed hunc errorem latè confutavimus superioribus tomis, & matri Ecclesiæ infallibilem in proponendis, explicandisque fidei articulis eximiam auctoritatem operosè pro virili asseruimus. Verumtamen cum his stat ultimam & totalem assentiendi rationem Deo esse subnixam: ita ut revelatio divina sit ratio formalis, auctoritas verò Ecclesiæ sit ministra objecti fidei, eo ferè modo, quo assensus scientificus reducitur in medium veluti motivum assentiendi, in syllogismum verò tanquam in instrumentum artificiosè disponens, apteque proponens illud medium, ut alliciat, rapiatque intellectus assensum. Quocirca divina auctoritas est ratio formalis credendi, ecclesiastica verò est conditio sine qua minimè crederemus; sicut bonitas proposita motivum est voluntatem ad se pelliciens ac prolectans; propositio verò bonitatis ab intellectu exhibente conditio est sine qua bonitas ostensa voluntatem minimè irretiret. Quorum omnium fundamentum inconcussum est, quia fontalis & primitiva ratio determinans intellectum fidelem, in eo sita est, in quo invenitur, & originatur dicendi infallibilitas. Atqui licet in Ecclesia, prout est organum Spiritus sancti, infal-

libilitas.

libilitas inveniatur, illa tamen infallibilitas Ecclesiæ, utpotè columnæ & firmamento veritatis eximia, non est prima radix firmitatis assensus, sed est resolubilis in divinam, cui subordinatur, & à qua totam suæ certitudinis firmitatem haurit, & mutuatur. Neque enim Ecclesiæ credimus, nisi quia est vox Dei, cujus proinde revelationi tanquam basi tota innititur fidei nostræ certitudo. Ergo soli Deo ultimò credit fides nostra, quæ propterea merè & adæquatè divina est.

Urgebis : Hoc quod est Ecclesiam regi à Spiritu sancto ideo credimus, quia sacris literis proditum est ; unde ad hoc confirmandum conglobatas Scripturæ authoritates, & promissiones proferimus, quibus in defectibilitas Ecclesiæ vindicatur, asseriturque portas inferi nunquam adversus illam prævalituras. Ergo non in Ecclesiam ut proponentem, nec in Deum ut revelantem, sed in Scripturas ultima fidei resolutio refunditur.

Respondeo evidens esse solam Scripturam non esse ultimam fidei nostræ determinationem ; & veluti pondus assensus ; tum quia sacræ literæ corrumpi possunt vel corruptela hæreticorum, vel ignorance Typographorum. Tum quia assignari debet aliqua regula infallibilis, vel lydius lapis probans legitimos & canonicos libros, eosque discernens à spuriiis ; quam utique litem Scriptura non dirimit. Tum quia Scripturæ sensus non est omnibus pervius, sed sæpè reconditus, & abstrusus ; nec pro cujuslibet arbitrato verus debet elici sensus, sed à regula in defectibili exponendus : sicut in politicis lèges non ab omnibus exponuntur, sed à iudicibus, penes

nes quos res est. Tum quia licet omnia ad fidem pertinentia virtualiter in Scripturis contineantur, non tamen formaliter explicantur, sed multa ex illis afflante Spiritu sancto deducuntur, sicut è principiis variæ conclusiones derivantur. Tum quia fides nostra, & Apostolorum, cum sit ejusdem rationis, in idem resolvitur: illi autem viri docti à Domino fidem suam in Scripturas non resolvebant, nec in Ecclesiam tanquam in rationem formalem, cum ipsi essent fundatores nascentis Ecclesiæ, & canonicorum librorum scriptores. Ergo ultima resolutio fidei in divina sistit autoritate proposita ab Ecclesia, & in Scripturis sub interpretamento Ecclesiæ contenta. Tum denique propter multiplicem illum rationum instructum, quibus hanc veritatem dissertatione præambula tomi superioris munivimus, & deploranda Calvinistarum ultimam controversiarum decisionem ad privatum proprii spiritus instinctum ineptissimè refundentium deliramenta confutavimus.

Ad argumentum ergo dicendum, quod cum asserimus resolutionem fidei nostræ fieri in auctoritatem Ecclesiæ, per Ecclesiam intelligimus etiam omnem ejus doctrinam, quæ est verbum Dei & ipsa Scriptura, itaut ex utroque fiat regula totalis & adæquata: & hinc est quod una per aliam vicissim juvatur, & propter connexionem una per aliam comprobatur, sicut Christus testimonium perhibebat de Joanne, & Joannes de Christo. Unde nec in Scripturam præcisè, nec in Ecclesiam duntaxat, sed in utramque simul reducitur fidei nostræ resolutio. Non quòd auctoritas Ecclesiæ sit ratio formalis credendi, sed quia:

quia est organum, oraculum & instrumentum à Deo institutum, quo suam patefaceret voluntatem, & cœlestia divini cordis arcana referaret.

Insistes : Ergo committetur circulus vitiosus in processu resolutionis fidei nostræ; cum ideo credamus Ecclesiæ, quia ita monet Scriptura; Scripturæ verò fidem adhibeamus, quia Ecclesiæ suadet autoritas.

Respondeo, quod quando assumitur autoritas Ecclesiæ probata per Scripturam ad ejusdem Scripturæ autoritatem confirmandam, non accipitur autoritas Ecclesiæ ut probata solum per Scripturas, sed ut aliunde manifestata, præclaro nimirum credibilitatis argumentorum concentu persuasa, ob quæ Ecclesia tot præfidiis ornata grandem sibi conciliat autoritatem, dignaque est, quæ credatur. Maxime quia hujusmodi probatio apud fideles duntaxat & domesticos fidei valet; contra Infideles verò Scripturas inficiantes, vel contra Hæreticos Scripturas quasdam confitentes & pro arbitrio decurtantes, quo pacto sit disputandum, dissertatione præambula secundi tomi satis operose monstratum est.

Replicabis : Si quærat cur Ecclesiæ credendum sit, responderetur : Quia Deus dixit; & si requiratur cur credatur ita Deum dixisse, responderetur, Quia hoc Ecclesia profitetur : sed tunc testimonium Dei sola Ecclesiæ autoritate probatum assumitur ad ipsam Ecclesiæ autoritatem confirmandam. Ergo velimus nolimus, in evidentem incurrimus circulationem.

Respondeo, quod dum responder' aliquis se credere Ecclesiæ, quia ei credendum fore Deus jubet

jubet, tunc reddit rationem formalem assensus sui: quando verò iterum rogatus respondet se credere Deum de Ecclesia testimonium perhibere, quia ita credit Ecclesia, tunc non reddit rationem formalem assensus, sed causam materialem vel instrumentalem, qua veluti interprete Deus nobis suam aperit voluntatem. Nec propterea circulo circumagimur, tum propter diversum genus causæ: tum quia non credimus Ecclesiæ leviter & utcunque, sed habenti verbum Dei, & Scripturas, ab inimicis nostris Judæis traditas, & ad nos delatas, subindeque minime suspectas, miraculis etiam, atque omnigenis credibilitatis argumentis veluti totidem sigillis obsignatas: sicut Proregi obsequimur, quia ipsum provinciæ præfecit Rex: præfecisse autem credimus, quia sibi provinciæ regimen demandatum Prorex solenni Regis diplomate, grandiorisque sigilli tabulis munitus asseverat.

REFLEXIO.

Si fides solum Deum credit, nec alia quævis dignatur aspicere, nisi sint radiis divinitatis perfusa, profectò non fidelis est, nec subinde Christianus, qui unum sibi scopum Deum in omnibus operibus non præfigit. Hunc fidei candorem, à quo bona debent omnia opera proficisci, obscurat animus, quidquid agit in proprium referens commodum vel honorem, fitque quadantenus voluntas hæretica in mente catholica; quia juxta Ambrosium lib. 1. Officior. cap. 30. *Affectus tuus nomen imponit operi tuo: quomodo à te proficiscitur, sic aestimatur.* Ergo si affectus
tuus

tuus fidelis non sit , nec divinæ consentiens voluntati , catholicè credens , hæreticè operaris.

Itaque, Lector, esto nedum animo & corde, sed etiam opere fidelis, ut glorifices, & portes Deum in corpore tuo, ut glorificetur nomen Domini nostri Jesu Christi in te, ut luceat lux tua coram hominibus, & glorificent Patrem tuum qui in cælis est; ut tanquam de genere electo, gente sancta, populo acquisitionis virtutes annunties ejus, qui de tenebris te vocavit in admirabile lumen suum; utque in omnibus honorificetur Deus per Jesum Christum. Alioquin tamen si fide christianus, opere tamen infidelis jure merito nominabere. Etenim nonne operibus suis infidelis est, cujus vita Christo dedecori est, in cujus moribus Christus opprobrium patitur & maledictum? Nam, ut aliàs ex Chrysostomo ponderavimus, nihil adeo infideles arguit ut Christianorum virtus; nihil adeo perturbat, ut malitia. *En nos sumus causa*, inquit Chrysostomus; *nos, inquam, ut illi in errore permaneant. Iam pridem doctrinam suam damnassent, & nostram approbassent, nisi vitâ nostrâ retraherentur. Verbum philosophari perfacile, sed inquirunt operum probationem.* Itaque horum nos pœnas dabimus, non solum eorum, quæ ipsi commisimus, sed quorum authores fuimus, ut Dei nomen blasphemetur. Certè si verum est, quod aliàs ex Augustino notavimus, est difficile ut malè vivat, qui bene credit, vix benè Deo credit, qui malè vivit: ergo mala vita & prava intentio, fidei censetur titubatio, & penè jactura, ac fermè infidelitatis suspicio.

SPECVLATIO II.

Varia objecti fidei conditiones, & dotes exponuntur.

Quia natura fidei ex ejus objecto pensanda est, necesse est ut ea explicemus, quæ ad objectum fidei requiruntur; objectum, inquam, sive formale, sive materiale: idest, quærimus quid opus sit, ut aliquid fide divina credatur.

Prima conditio objecti fidei, propositio Ecclesiæ Catholicæ.

Primò ad hoc ut aliquid fide credatur, exigitur ut sit Catholicæ & universali Ecclesiæ revelatum: quia ut ait S. Thomas 1. p. quæst. 1. art. 8. ad 2. *Innititur fides nostra, revelationi Apostolis & Prophetis facta, qui canonicos libros scripserunt; non autem revelationi, si qua fuit aliis Doctoribus facta.* Quia nimirum ut aliquid credatur fide catholica, opus est ut illud per Ecclesiam & viros Apostolicos proponatur; domestici namque Dei superædificati sunt super fundamentum Apostolorum & Prophetarum: opus est quoque ut ad illud credendum omnes fideles teneantur: opus est iterum, ut illud fuerit semper, ubique, & ab omnibus Catholicis creditum, ut prosequitur in suo aureo commonitorio Lirinensis: ergo ut aliquid objectum fidei ingrediatur, necesse est ut
propo

proponatur ab Ecclesia, quæ est regula infallibilis. Neque enim privatis revelationibus fidentum est, tum quia sæpè sæpiùs incertæ, dubiæ, fluxæ, imò & falsæ sunt: tum quia probandi sunt spiritus, utrum à Deo sint, seseque Angelus sathanæ transfiguret in Angelum lucis: tum quia de eodem interdum variæ & adversæ proferuntur revelationes, cum tamen verum non sit vero contrarium, & assertionum contradictoriarum non possit utraque esse simul vera; unde christianæ cautionis, & prudentiæ est illis ægrè credere. Quod à rectoribus animarum, muliercularum præsertim confessariis observandum pervelim, ne nimiâ indulgentiâ somnia cum divinis revelationibus confundentes, inania fœminarum beatas ementientium cerebella impleant fumo, quo deceptæ choris interesse se putent Angelorum, quæ in vitiorum cœno volutantes multiplici peccatorum agmine stipantur. Quantumvis ergo de divinis garriant, vel mera oracula proloqui videantur; durè tamen illis fidem habe, acerbo pudore illas suffunde, narrationulas floccifac, & omnia suspecta habeto, vel fucosa ludibria, ac fallaces rei bonæ imagines existimato, nisi diuturnis probatæ fidei, & solidæ humilitatis experimentis coactus aliquid de severitate remittas. Si secus te geras, grandia in discrimina incidēs, quibus vix, ac ne vix quidem unquam defungēris.

Quod si contingeret Deum aliquid privatim alicui revelare cum iis certitudinis convincentis argumentis, quibus perspicuum erat Apostolis & Prophetis Deum in ipsis & per ipsos loqui; tunc ille à Deo audiens, utique credere posset &

tene

teneretur; Deus namque quidquid cuicumque, & quocunque modo revelet, dignissimus est qui credatur, nec opus est externa propositione Ecclesiæ, quando Deus intus lucet, intus movet, intus coruscat; si tamen ita luceat, ita moveat, ita coruscet, ut Deum adesse loquentem perspicuum sit.

Secunda conditio objecti fidei, formalis, vel virtualis revelatio ab Ecclesia declarata.

Secunda conditio: Objectum fidei debet esse non tantum virtualiter, sed formaliter revelatum, vel saltem ab Ecclesia expresse declaratum. Ratio est, quia quod est virtualiter revelatum, per discursum deducitur, & est conclusio theologica, de qua sæpè inter doctos, imò & inter ipsos Patres est controversia: ergo non pertinet ad objectum fidei, donec adveniente Ecclesiæ determinatione declaretur, necessariam esse connexionem inter propositionem formaliter, & propositionem virtualiter revelatam. Certè cum Theologia & fides distinguantur non minus quam scientia & habitus primorum principiorum, necesse est, ut distinctum habeant objectum, cum distinctionem habituum à differentia objectorum desumi in confesso sit apud omnes. Atqui propositiones virtualiter revelatæ, seu ex articulis fidei formaliter revelatis illatione deductæ, sunt objectum Theologiæ, cujus ratio formalis sub qua est revelatio virtualis, ut primo libro satis ostensum est, & vix ab ullo penetrante terminos negari potest: Ergo ea, quæ virtualiter duntaxat revelata sunt, non ingrediuntur objectum

ctum fidei, sed ea solum, quæ sunt formaliter, sive explicitè, sive implicitè revelata. Sicut cum revelatur Christum esse hominem, de fide est Christum esse animal, quia animal in homine implicitè includitur; sed non est de fide Christum habere formam corporeitatis, quia de ejus existentia dissentiant Doctores.

Dices: Cum Deus revelat aliquid, putà humanitatem Christi, illam proponit prout est in se, ac proinde prout est radix risibilitatis, quæ consequenter ex revelatione humanitatis necessariò inferri potest, & ab Ecclesia definiri: Ergo risibilitas fuit à Deo revelata, cum Ecclesia novas non habeat revelationes, sed infallibilem duntaxat Spiritus sancti assistentiam ad ea explicanda, declarandaque, quæ fuerunt à Deo primitus revelata: aliàs Ecclesia novos posset ad arbitrium condere articulos, quod nemo dicit.

Respondeo, hoc argumento probatum iri omnes propositiones syncategorematicè infinitas, quæ ex uno principio fidei deduci longo syllogismorum circuitu possent, ad objectum fidei pertinere: quod per se satis absurdum est. Dicendum ergo, quod cum Deus revelat formaliter aliquid, promptum erga illud exigit fidei nostræ obsequium captivans intellectum; quoad alia verò, quæ ex articulo revelato arrisicioso syllogismorum tractu deduci possunt, assistentiā infallibilem promissit Ecclesiæ, ut pro fidelium necessitate, proque hæreticorum hominum audacia coercenda, qualis; & quanta sit cum fide connexio determinaret. Non habet ergo Ecclesia novas revelationes, sed perennem sponsi sui secum usque ad consummationem sæculi permanentis

permanentis sentit præsentiam, quâ controversas dirimit, causas judicat, quæstiones resolvit; & tunc propositio incipit ad objectum fidei nostræ pertinere, non ideo præcisè, quia est virtualiter revelata, sed quia cùm sit virtualiter revelata, formaliter est ab Ecclesia declarata, & ab articulo in quo latebat, educta.

Tertia objecti fidei dos, certitudo.

Tertia conditio: Objectum fidei est adeo certum, ut illi falsum subesse vel ex parte Dei revelantis aliquid falsum, vel ex parte nostri utendo habitu fidei ad assensum falsum, planè impossibile sit. Et primò quidem objectum fidei non posse esse falsum ex parte Dei, est nimis evidens, & primo libro, dum de veritate Dei, manifestissimè persuasum; unde breviter confunditur Priscillianistarum vesania Deo mendacium asserere non erubescendum, tum expressis testimoniis scripturarum. Hebr. 6. *Volens Deus ostendere immobilitatem sui consilii interposuit iurandum, ut per duas res immobiles, quibus impossibile est mentiri Deum, firmissimum solatium habeamus.* Rursum 2. Tim. 3. *Ille fidelis permanet, negare seipsum non potest.* Tum quia vel Deus enuntiaret falsum ex errore & ignorantia, & hoc repugnat omniscientiæ, & infinitæ sapientiæ ejus; vel consultò, & ex industria, & hoc ejus simplicitati, puritati, & sanctitati adversatur, cùm mendacium sit actus intrinsecè malus, societatis everfivus, sinceritatis exterminium, nedum Deo, sed creatura intellectuali & honesta indignissimum. Unde meritò Patres veritatem & mentiendi in-

possibilitatem adeo cum Divinitate indivulsam existimarunt, ut Dionys. *cap. 8. de divin. nom.* dixerit: *In Deo à veritate cadere, est à Deo cadere.* Et August. lib. 10. *de Symb. ad catech.* non dubitat asserere Deo æquè impossibile esse fallere ac mori. Vide plura dum de veritate Dei, ubi ostendimus perfectionem illam, quæ est simpliciter simplex, esse ita cumulatam, ut ea nihil majus esse, vel cogitari possit, subindeque à Deo removere omnem mentiendi, vel falsum ullum enuntiandi, sive de via ordinaria, sive de extraordinaria, sive per se, sive per alium possibilitatem.

Quod autem ex defectu nostro, seu pravo intellectu usu fides non possit ferri in aliquid falsum, perspicuè tradit Angelicus Doctor artic. 3. dicens: *Possibile est ex conjectura humana hominem fidelem falsum aliquid asstimare; sed quod ex fide falsum asstimet, hoc est impossibile.* Idque rationibus persuadet. Tum quia nulla virtus perficiens intellectum potest inclinare ad falsum, virtus namque intellectualis est essentialiter dispositio subjecti ad optimum: optimum autem intellectivæ virtutis est verum, ejus verò malum non est aliud quàm falsum. Tum ex discrimine quod fidem inter & alias virtutes, tam Theologicas quàm morales intercedit; istis enim falsum subesse potest, quia ut ait D. Thomas ad 1. *Verum est bonum intellectus, non autem est bonum appetitiva virtutis: ideo omnes virtutes qua perficiunt intellectum, excludunt formaliter falsum, quia de ratione virtutis est quod se habeat solum ad bonum: virtutes autem perficientes appetitivam partem, non excludunt totaliter falsum.* Hinc aliquis

quis potest secundum justitiam, misericordiam, aut temperantiam agere circa objectum deceptus. Sic viri sancti sæpe sæpius in mandatis cupientes nimis, medium virtutis transiliunt: alii toti effusi bona sua pauperibus impendunt & superimpendunt modo qui est ultra omnem modum: alii tam anxio castigandi corporis desiderio æstuant, ut quanvis secus suadeat corpusculi debilitas aut infirmitas, in illud tamen piam non desinunt exercere carnificinam; sed tamen virtutes sic piè errantes non transgrediuntur sphaeram objecti specificativi, quod est bonum morale. At verò si virtus intellectualis inclinaret ad objectum falsum, vel eliceret assensum erroneum, ferretur extra objectum suum specificativum, sicut si lumen invitaret ad tenebras. Tum ratione fundamentali jam insinuata ad hanc formam reducenda. Nihil subest alicui potentiae, vel habitui, aut actui, nisi mediante ratione formali objecti; sicut color videri non potest nisi per lucem, & conclusio sciri nequit nisi per medium demonstrationis: Atqui ratio formalis objecti fidei est veritas prima: ergo nihil potest cadere sub fide nisi in quantum stat sub veritate prima, & eâ veluti induitur: Atqui sub veritate prima nullum falsum stare potest, sicut nullum non ens sub ente, vel nullum malum sub bonitate contineri: ergo fidei nullum falsum subesse potest, etiam ex parte nostri.

Proponuntur & solvuntur objecta.

Objicies primò contra priorem partem hujus conditionis: Deus aliquando per se ipsum, ali-

quando per ministros falsa revelavit : v. g. 4. *Reg. 2.* mortem Ezechiae Isaias prænunciavit, qui tamen annis quindecim supervixit. Et Jonas c. 3. subversionem Ninivæ prædixit minimè consequutam. Unde Job 12. dicitur : *Deus decipit nos, & eos errare facit sicut ebrios.* Multi etiam Dei ministri non sine illius instinctu mendacium variis in necessitatibus protulerunt. Sic Abraham *Genes. 22.* dixit sociis, se cum filio reversurum, quem tamen jussu Dei immolandum, mortique tradendum ducebat. Sic Jacob *Genes. 27.* dixit Patri, se esse primogenitum Esaii : qui, ut notat Cajetanus, excusatus fuisset à mendacio, si dixisset tantum se esse primogenitum, sed mentitum esse convincitur, dum dixit se esse Esaii.

Respondeo, verba sive à Deo solo, sive ab aliis Deo afflante prolata, omnimodâ veritate constare; nam de verbis Domini dicitur, quod cælum & terra transibunt, verba autem ejus non transibunt, idest desituram potius & cælorum incorruptibilitatem & terræ stabilitatem, quàm verborum Domini concutiendam firmitatem. De verbis etiam à ministris vice Dei prolatis idem patet, quia mendacium in Deum ipsum per illos loquentem refunderetur, præsertim cum dicat veritas Matth. 10. *Non vos estis qui loquimini, sed Spiritus Patris vestri, qui loquitur in vobis.* Et in omni genere peccatorum eadem poenâ digni sunt, eadem culpâ rei, qui faciunt, & qui consentiunt facientibus: nec minus mendacii damnatur qui falsum testimonium sive per se, sive per alium, sive verbo, sive scripto profert.

Ad singula ergo quæ obijciuntur, dicendum
locis

Locus illis, quibus Deum prædixisse aliquid quod non contigit, Scriptura commemorat, nullam contigisse falsitatem, sed miram sapientiam, & veritatem. Ad cuius evidentiam considerandum est cum D. Thoma multis locis, & seorsim 2. 2. *quest. 17. art. 6. ad 2.* divinam præscientiam respicere futura secundum duo, scilicet secundum quod sunt in seipsis, in quantum scilicet ipsa præsentia liter intuetur; & secundum quod sunt in suis causis, in quantum scilicet videt ordinem causarum ad effectus. Et quanvis futura contingencia prout sunt in seipsis in præsentia æternitatis omnia suo ambitu concludentis, sint terminata ad unum; tamen prout sunt in suis causis non ita sunt determinata, quin possint aliter evenire. Et quanvis ista duplex cognitio semper intellectui divino coniungatur, imò sit una & simplex cognitio, quæ est ipse Deus: non tamen coniungitur semper in revelatione prophetica, quia impressio agentis non semper adæquat totam virtutem illius. Unde quandoque revelatio prophetica est impressa quædam similitudo divinæ præscientiæ, prout respicit ipsa futura contingencia in seipsis, & talia sic eveniunt sicut prophetantur, quale est illud Isai. 7. *Ecce virgo concipiet.* Quandoque verò prophetica revelatio est impressa similitudo divinæ præscientiæ, prout scilicet cognoscet ordinem causarum secundarum ad effectus, & tunc quandoque aliter evenit quàm prophetetur. Nec tamen prophetiæ subest falsum; nam prophetiæ sensus est, quod inferiorum causarum, sive naturalium, sive humanorum actuum dispositio hoc habet, ut talis effectus eveniat. Et secundum hoc intelligitur

verbum Isaïæ dicentis: *Morieris, & non vires;* idest dispositio corporis tui ad mortem ordinatur. Similiter quod dicitur Jonæ 3. *Adhuc quadraginta dies, & Ninive subvertetur;* idest, hoc ejus merita exigunt, ut subvertatur, & reapse subvertetur, nisi magnæ humilitatis pœnitentiam agatis. Hæc ferè S. Doct̃or, cujus doctrinâ patet quomodo Deus non fallat, tametsi non semper impleantur divinæ prædictiones, quæ interdum non divinæ voluntatis constitutionem, sed causarum inferiorum dispositionem denuntiant. Porro illud Job 12. *Deus decipit nos, & errare facit,* intelligitur in sensu permissivo, non inspirando, sed permittendo intellectus humani in tenebris concepti falsitatem, illumque reprobo sensui tradendo; sicut dicitur Deus obdurare voluntatem, non impertiendo malitiam, sed non impertiendo misericordiam.

Ad exempla ministrorum Dei respondet etiam egregiè idem præceptor sanctus his propemodum verbis 2. 2. *quest. 110. art. 3. ad 3.* Dicendum, quod in sacra Scriptura, ut Augustinus dicit, inducuntur aliquorum gesta, quasi exempla perfectæ virtutis, de quibus non est æstimandum, eos fuisse mentitos. Si quæ tamen in eorum dictis apparent, quæ falsitatem redoleant, vel mendacium præ se ferant, intelligendum est ea in sensu figurato & prophetico esse prolata. Unde Abraham nullum protulit falsiloquium, quia secundum Augustinum serm. de immolat. Isaac, in spem contra spem sperans, & filium mactaturus ducebat, & à Domino suscitandum confidebat, ut ad Hebræos 11. satis indigitat Doctor Gentium, *Abraham obtulit filium suum, arbitrans*
quod

quod potens est Deus à mortuis suscitare. Jacob verò , ut observat sanctus Thomas paulò antè laudatus, in sensu mystico dixit, se esse primogenitum Isaac , quia illi primogenitura jure debebatur. Porro hujusmodi figurato modo loquendi Deo inspirante , & lumine prophetico perfusus uti potuit ad designandum mysterium subrogationis minoris populi , scilicet Gentilis , in locum primogeniti, nimirum Judaici ; nec tenebatur juxta intentionem Patris respondere, quia loquebatur ut Propheta mysteria pangsens, futura sub verborum involucris prædicens.

Instabis : Deus sæpe verba amphibologica, æquivoca, & dubia usurpavit : Christus enim *Joan. 7.* consanguineis dixit , se non ascensurum in montem , quem postea conscendit. *Marci 12.* diem judicii , quem probè noverat , se ignorare contestatus est : ergo fidei potest subesse falsum , dubium , & incertum.

Respondeo Christum Dominum verba subobscura adhibuisse , in quibus poterat vir prudens verborum sensum facili interpretamento aperire : uti autem hoc pacto verbis figuratis, & metaphoricis ob graves rationes, putà occultandam veritatem , nec indignis expandendam, mendacium perperam appellaretur, sed utiliter & honestè fit , ut demonstrat S. Doctor *1. p. q. 1. art. 9.* Nec obest, quod Christus utens hujusmodi metaphoris volebat ut audientes non perciperent, seu ipsomet aiente , ut videntes non viderent , & audientes non audirent ; subindeque adesse mediocre deceptionis periculum : Non obest, inquam , quia non deceptionem inducere , sed veritatem occultare quærebat Christus.

Maximè quia reliquit nobis Salvator regulam infallibilem & visibilem, scilicet Ecclesiam, ad indagandum legitimum Scripturæ sensum divinitus inspiratum. Nulla ergo datur nobis occasio erroris, sed accipitur, si obscuras venerandarum Scripturarum voces falsis interpretationibus corrumparamus; si enim tritam Ecclesiæ Catholicæ viam teneremus, si pressa à Patribus vestigia sequeremur, si eos semper authores haberemus, quos posuit nobis Deus Doctores, si non sineremus nos cæcis erraticæ rationis ludibriis pertrahi, si demùm nos fallaci hominum ducatu non permetteremus, citò sub divinarum metaphorarum cortice latitantem veritatem gustaremus, videremus, potiremur.

Ad locum ergo ex Joannis capite septimo respondendo, Christum voluisse consanguineis significare, se nolle honorifico, ab eisque optato apparatu montem conscendere, Rex enim humilitatis noluit eorum votis satisfacere, qui externæ gloriæ, vel fortassis honoris Christi cupidi dixerant: *Transi hinc, & vade in Iudæam, ut discipuli tui videant opera tua.* Unde signanter, & advertenter Evangelista addit: *Ut autem ascenderunt fratres ejus, & ipse ascendit ad diem festum non manifestè, sed quasi in occulto.* Hinc patet, quàm vehementer humilitatis amore flagrarit Salvator noster. Nemo sanè, nemo est in ambiendis honoribus diligentior, nemo in prehensandis dignitatibus studiosior, quàm Christus fuerit humilitatis & absconditæ vitæ amans, & externæ gloriæ hostis. Nonne humilitatis amore flagrabat? nonne illam ante omnes res spectabat? nonne illi rerum omnium antiquissi-

mi erat, cujus cauſa ipſa Veritas ferè mendacium dixit? Quidni ejus gratiâ Veritas mentiri videretur, pro quâ & virtus infirmari, & æternitas mutari, & immenſitas arctari, & ſapientia inſanire, & verbum Patris balbutire, & vita mors viſa ſunt? Sed illud tamen inter illa attributa diſcrimen intercedit, quod licèt ratione humanæ naturæ poſſit dici homo Deus, & etiam Deus per communicationem idiomatum paſſus & mortuus, non tamen peccator, vel ignorans; quia attributa illa, quæ non communicantur Deo niſi ratione naturæ aſſumptæ, non debeat diſſolvere unionem cum Deo: dolor autem, paſſio, & mors humanitati convenientes non diſſolvunt unionem cum Deo, ſed ſunt mala pœnæ, quæ à Deo ſunt & in Deum referri poſſunt: at verò peccatum, & ignorantia, quæ ad peccatum manuducit, deſtrunt unionem, cùm non poſſint in Deum referri, ſicut nec ſunt à Deo authore.

Locum verò ex Marci 3. capite petiſum expoſuimus aliàs, dum de Trinitate. Addo Chriſtum nesciville horam judicii, vel præciſè ut hominem; ſcientia enim futuri, & maxime tam reconditi futuri character eſt Divinitatis: ſicut enim verè dicebat Chriſtus, *Pater major me eſt*, ratione humanitatis; ita & ratione illius extremi judicii tempus ignorabat. Vel iterum, Chriſtus nesciebat diem judicii effectivè, id eſt non faciebat ſcire, & interrogatus ab Apoſtoliſ nimirum hac in parte curioſis, noluit tantum arcanum revelare, ut hujus temporis ignari, ſemper pavidi, ſemper incerti, nunquam eſſemus imparati. Sicut è contra *Genef. 22.* dixit Deus Abrahamo:

Nunc cognovi quod timeas Dominum, idest cognoscere feci.

COROLLARIUM. De restrictionibus mentalibus.

Atque ex his apparet quàm damnanda sit eorum semidoctorum temeritas, qui mendacia & æquivocationes verbis & exemplis Christi præcolorant. Quorum doctrinâ, quæ ars fallendi est, nihil pestilentius esse potest. Tum quia quod tibi non vis fieri, alteri ne feceris: sed æquivocationum, ac restrictionum mentalium patroni æquo animo non paterentur se ab illis illudi: ergo illud œcumenicum naturæ principium nulli ignotum, omnibus quàmlibet barbaris implantatum violant. Tum quia urget argumentum Augustini *lib. de mend. cap. 4.* Quomodo credendum est ei qui putat aliquando esse mentiendum; nam fortè & tunc mentitur, cùm præcipit ut sibi credamus? Quomodo pariter istis restrictionum assertoribus credemus, qui fortè tunc mentem restringunt, cùm doceant licitas esse restrictiones? Certè sicut illi Probabilistæ, qui calumniam ex catalogo criminum eximunt, quibusve persuasum est, posse se tutâ conscientiam inimicis crimina affingere, & conficta meditatio spargere, meritò suspicionem ingerunt, hanc doctrinam sibi probatam ubi usus poposcerit ad praxim redigere, à qua frequentanda nullo conscientiae obice cohibentur: Ita planè ab æquivocationum defensoribus nihil nisi effrænis ludificandi sub umbrone restrictionum licentia sperari potest & debet, imò nec ipsis verâ dicentibus

creden

credendum esset. Nam ut ait Hieron. cap. 37.
Antiquus sermo est : Mendaces faciunt, ut nec vera dicentibus credatur.

Accedit, nihil tam adversum, tam funestum, nihil humanæ societati, atque adeo naturæ, quæ socialis est, insensius pestifero illo restrictionum usu esse ; si enim teste August. *in Enchir. cap. 22.* verba utique propterea sunt instituta, non per quæ invicem se homines fallant, sed per quæ in alterius quisque notitiam cogitationes suas perferat ; si teste Bernardo *in sentent.* chaos magnum inter nos firmatum est, nisi interveniente quasi instrumento verborum fiat adinvicem transitus quidam cordium in communicatione cogitationum ; profectò naturali institutioni repugnant, qui verba ad fallaciam specie restrictionis mentalis pervertunt, nec ulla societas esse potest cum hominibus aliud ore proferentibus, aliud mente restringentibus. Sanè sicut ægrè cum illis convivimus, quorum linguam non intelligimus : & authore August. lib. 19. decivit. *Libentiùs vivit homo cum cane suo, quàm cum homine alieno ; ægriùs certè cum illis conversamur, qui fraudes artificio tectas adhibent, audientes circumveniunt dólis, insidiis eos perunt, tempus observant, verbaque idonea occupantur, quibus veritas veluti quodam involucri obtegatur : sicut è contra nihil eorum convictu suaviùs, qui ab omni simulandi studio longè absentes, sincero animo, candido ingenio, aperta voluntate præditi sunt, oderunt artem, mudam veritatem tam amant, quàm loquuntur : quorum denique manus linguæ, lingua cor, cor rationi, ratio Deo congruit, & tota vita.*

unius faciei est, unius & coloris: nec aliud os præ se fert, aliud animus, celat, & verborum duplicium velo obtendit. Certè tolerabilior. erat Babylonica confusio, in qua invicem loquentes se minimè intelligebant, eorum convictu, qui non se intelligunt, nisi ut sese mutuo decipiant.

Nec obest, quod nomine æquivocationum vel restrictionum mentalium mendacia fucient. Nam ut ait Hilarius lib. 2. de Trinit. *Sensus, non sermo, fit crimen.* O ubi est simplicitas Christiana, quæ regulâ illâ legislatoris sui Christi. contenta est: *Sit sermo veller, est est, non non.* O ubi est mulier illa virilis totam Probabilitatûm æquivocationibus veniam dantium nationem confusura, quæ referente Hier. epist. 49. nec ad gravissimos torturarum & diræ mortis cruciatus vitandos. æquivocationum usum septies icta advocavit. *Cum equuleus corpus extenderet, & sordidas fœtore carceris manus post vincula cohiberent, oculis, quos tantum tortor alligare non poterat, suspexit in cælum, & resolutis per ora lacrymis: Tu, inquit, testis es Domine, cui occultum nihil est, qui es scrutator renis & cordis, non ideo me negare velle ne peream, sed ideo mentiri nolle ne peccem?* Ubiam gentium sumus, quove in sæculo degimus, in quo exultante simplicitate dolus, fraus, mendacium inundaverunt; in quo viget carnalis illa mundi sapientia, quæ ut describit Gregor. lib. 10. *Moral. cap. 6.* cor machinationibus tegit, sensum verbis velat; quæ falsa sunt, vera ostendit; quæ vera sunt, fallacia demonstrat: in quo Christiana simplicitas, & nuda Christianismi professio floccisit, & ut ait Job, *irridetur*; quia

ut ait idem Gregorius : *Sapientia justorum est, nihil per ostensionem fingere, sensum verbis aperire, vera ut sunt diligere, falsa devitare, bona gratis exhibere, mala licentiùs tolerare quàm facere, nullam injuria ultionem querere, pro veritate contumeliam lucrum putare : si hac justorum simplicitas derideretur, quia ab hujus mundi sapientibus puritatis virtus fatuitas creditur. Quantum distant ab illa justorum sapientia, qui æquivocationum praxi etiam in juramentis adhibitæ veniam dant. O ubi estis fontes lacrymarum (exclamat August. lib. cont. mendac. c. 18.) Et quid facimus ? Quò ibimus ? Ubi nos occultabimus ab ira veritatis, si non solùm negligimus cavere mendacia, sed audemus insuper docere perjuriam ?*

Porrò quàm insulsa sit, quàmve frivola excusatio, ab exemplo Christi mysticè & parabolicè interdum loquentis tam patet, quàm ejus argumenti fatuitas claret, quo probaretur in communi, convictu adhibenda esse promiscuè verba mystica, allegorica, anagogica, parabolica, & figurativa, quia has loquendi formulas Prophetæ & Prophetarum maximus Christus usurpavit; sicut deploranda erat cujusdam boni Joannis ineptia, qui rhithmicè loqui studiosè aucupabatur, quia eam scribendi formulam illustribus Authoribus placuisse sciebat. Sed de his plenius & opportuniùs aliquando fortassis agemus.

Prosequutio objectionum.

Obijcies secundò contra alteram partem :
Potest quis existimare aliquid esse de fide, quod
tamen

tamen fidei adversatur; potest ex fide adorare Christum sub Sacramento latentem, & hostiā non consecratā: sed tunc tenetur illud falsum credere ex fide, ita ut non credendo peccaret: ergo per accidens ex prava subjecti dispositione & usu perverso fidei potest subesse falsum. Quod potest confirmari exemplo fidei Judæorum credentium Christum nasciturum, quæ fides in multis usque ad fidei prædicationem duravit: sed Christo jam nato falsum erat Christum esse nasciturum: ergo fidei potest subesse falsum ex mala intellectus applicatione.

Respondeo hominem falso errore imbutum & confundentem veritatem cum falsitate, ad has quidem redigi angustias, ut ex conscientia erronea teneat illud falsum esse de fide, sed tamen illud nunquam ex fide credere posse. Sicut qui ignorantia præcepti naturalis, quæ semper est vincibilis, ut aliàs ostendimus) vel ferè semper, secundum omnes alicujus notæ Theologos) existimaret se ad mendacium proferendum teneri, non proferendo peccaret, tametsi proferendo non benè, nec ex virtute ageret; quia non minus repugnat à virtute actum intrinsecè malum, vel à fide assensum falsum, quàm tenebras à luce, frigus ab igne profluere. Unde fidei nihil falsum subest, [quanvis aliquid quod reapse falsum est, fidei subesse apprehendi falsò possit: sicut ab æterna lege nullum præcipi malum potest, tametsi malum ab ea imperari conscientia erronea apprehendat.

Ad id autem quod de hostia non consecrata dicitur, respondeo cum D.Thoma, fidem credentis non referri ad has species panis, vel illas; sed

adi

ad hoc, quod verum Christi corpus sub panis sensibilis ritè consecrati speciebus inveniatur; unde etsi desit consecratio, nulla propterea suberit fidei falsitas. Nec tamen periculo exponimur dum absolutè adoramus, quia ad adorationem humano modo exhibendam sufficit moralis de hostiæ consecratione certitudo. Ad exemplum verò fidei Judæorum invincibiliter & sine culpa credentium Christum nasciturum post Christum natum, quia fortassis ejus prædicationem nondum audierant, variis solutionibus prætermisissis responderetur veriùs & faciliùs cum D. Thom. dicente ad 3. *Hoc ad fidem credentis pertinebat post Christi nativitatem, quod crederet eum quandoque nasci: sed illa determinatio temporis, in qua decipiebantur, non erat ex fide, sed ex conjectura humana; possibile est enim ex conjectura humana hominem fidelem falsum aliquid aestimare, sed quod ex fide falsum aestimet, hoc est impossibile.* Id est in illo Christi nativitatis dogmate duo sunt distinguenda, & Christi nativitas, & circumstantia temporis illius: primum ad fidem, secundum ad conjecturam spectat: priori verum semper, posteriori falsum interdum subesse potest. Nihil enim vetat intellectum fallibilem propositiones certas, & fide creditas falsis conjecturis inumbrare, & etiam ad falsa inde inferenda perversè à applicatione detorquere.

Quarta fidei conditio, obscuritas intermiscans, idest evidenter credibilis.

Quartò: Objectum fidei debet esse non visum, sed tamen evidenter credibile. Prior pars est

est constans; ideo enim fides ab Apostolo vocatur *argumentum non apparentium*, quia objectum suum non videt, sed audit & credit, ambulans in ænigmate: quod ita verum esse existimant nostri Thomistæ, alique nobiles Philosophi, ut existiment implicare contradictionem, de eodem objecto dari simul evidentiam & fidem etiam per diversa media, sicut non potest idem corpus ferri simul sursum & deorsum etiam per diversas causas impellentes. A qua controversia, quam multi impræsentiarum ventilant, examinanda supersedeo, quia de ea disputare Dialecticis solenne est.

Quavis autem hoc ita sit, non placet tamen rigor Bannesi existimantis non visum adeo in ratione objecti fidei involvi, ut ad rationem ejus formalem pertinere arbitratus sit, cujus sententiam Gonet in præsentem sequitur. Sed cum utriusque venia non placet hæc sententia, quia ratio quare objecto alicui divina fide credimus, non est quia non videmus, sed quia veritas prima objectum illud quàmlibet arduum & obscurum revelavit, credendumque mandavit: obscuritas ergo non potest esse de se motivum assensus, sed conditio objecti quod credimus. Sicut requiritur quidem ut credam Romam existere, quod eam non viderim: sed tamen non ideo credo eam existere, quia eam non vidi, sed quia qui attestatur existentiam ejus dignus est qui credatur. Nec urget ratio Gonetii petita ex discrimine fidem inter & visionem intercedente, & in hoc posita, quod ratio formalis sub qua fidei & visionis non possunt inter se opponi nisi penes obscuritatem & claritatem, ac proinde obscuritas pertinet ad rationem,

tionem formalem objecti fidei. Non, inquam, urget: quia sufficienter salvamus discrimen fidei & visionis, etsi obscuritas non sit motivum objecti fidei, per hoc, quod ideo fides credit, quia Deus loquitur: ideo verò visio intuetur, quia essentia divina intellectui lumine glorioso perfuso sine specie unitur: fides ergo assentitur, quia Deus loquitur; visio verò assentitur veritati propter se, & in se notæ, non in testimonio. Objectum ergo fidei est Dei veracitas, seu veritas quia à Deo attestata: objectum visionis veritas in se exhibita; unde fit obscuritatem primæ, claritatem secundæ objectum comitari.

Posterior verò pars asserens objectum fidei debere esse evidenter credibile, expressè traditur ab Angelico Doctore artic. 4. ad 2. *Dicendum*, inquit, *quod ea quæ subsunt fidei, dupliciter considerari possunt, uno modo in speciali, & sic non possunt esse simul visa & credita: alio modo in generali, scilicet sub communi ratione credibilis, & sic sunt visa ab eo qui credit. Non enim crederet, nisi videret ea esse credenda vel propter evidentiam signorum, vel propter aliquid huiusmodi.* Et ratio est: ut aliquis prudenter iis quæ fides proponit credat, non sufficit motio & pia affectio voluntatis objectum fidei gustans, & assensum intellectui præcipiens; sed requiritur insuper aliqua ex parte intellectus persuasio ex argumentorum credibilitatis efficacia orta, nam malè credit, qui leviter credit; leviter autem credit, qui sine rationum momentis præbet assensum: qui autem benè credit, iis debet esse rationum copiis instructus, ut de fidei credibilitate, non obstantibus infidelium objectis, dubitare prudenter

denter non possit, aliàs indiscretè casui & fortunæ fidem committeret suam, nec rationabile, sed ex impetu foret ejus obsequium.

Et quanvis præclara illa multiplicium rationum harmonia, quâ fides Christiana & Catholica credibilis sit, à rudioribus non plenè percipiatur: attamen tanta est earum ubertas, tam ultrò se ingerit earum splendor, ut omnibus quàmlibet stupidis & incultis clareat, nisi voluntariis tenebris obcæcati rebelles sint lumini, & affulgentem refugiant claritatem. Leges præclararum argumentorum credibilitatis concentrum, quo fidem nostram super omnem aliam sectam operosè dissertatione præambula secundivoluminis extulimus. Hoc tamen non impedit, quin multi resistent fidei prædictæ, vel ab ea semel suscepta deficiant, quia intelligentiam sæpè parvus corrumpit affectus; quidam enim, teste Apostolo, post abjectam conscientiam bonam naufragaverunt in fide. Quorum ratio est, quia ut non semel observavimus, scientia moralis conscientiam sequitur, & corrupto appetitu obscurata, & quasi excæcata mens, ad veritatis intelligentiam obtorpescere solet. Proclive enim est, ut taliter de rebus judicemus, qualiter circa illas affecti sumus.

Dices: Si objectum fidei esset evidenter credibile, foret etiam evidenter possibile: nam ut ait D. Thomas art. 5. ad 2. *Rationes fidei adductæ à Sanctis sunt persuasiones manifestantes, non esse impossibile quod in fide proponitur: ergo objectum fidei potest ratione demonstrari, subindeque non erit indispensabiliter non visum, ut antea demonstravimus.*

Respondeo,

Respondeo, argumenta credibilitatis non demonstrare rei possibilitatem; evidentia enim possibilitatis & veritatis sumitur ex medio intrinseco, & prædicatis essentialibus; evidentia verò credibilitatis ab extrinseco derivatur. Quando autem S. Doctor ait rationes fidei persuadere, objectum ejus non esse impossibile, sic intelligendus venit, non quod velit posse directè & positivè articulorum fidei possibilitatem demonstrari, sed quia potest objectionum pondus elevari, & insuper suaderi fidem nostram non esse impossibilem creditu, sed dignissimam quæ credatur; quia nihil in ea apparet impossibile, & multæ in ea refulgent convenientiæ.

Instabis: Si objectum fidei esset evidenter credibile, cognitio credibilitatis vel eliceretur à fide, vel solâ vi intellectus haberetur: neutrum dici potest; non quidem à fide struitur præclarus rationum apparatus, quo religio nostra credibilis fit; fides namque non est discursiva: nequit etiam intellectus vi naturali circa mysteria supernaturalia negotiari, nec ea evidenter credibilia suadere, quæ viribus propriis non potest suspicari: ergo objectum fidei non est evidenter credibile.

Respondeo cognitionem credibilitatis non posse esse actum fidei. Fides etenim non potest ferri extra suum objectum specificativum: objectum autem fidei est prima veritas revelans obscurè: quomodo ergo extenderetur ad objecti credibilitatem, quæ nec obscura est, sed evidens; nec revelatur à Deo, sed ex signis clarè cognoscitur vi sola intellectus penetrantis rationum concentum, quo per discursum allicitur intellectus.

telleetus ad assensum illi objecto præbendum, quod videt tam rationabilibus credibilitatis argumentis vestitum. Maximè quia cognitio credibilitatis, quàmlibet illustris, longè minoris est firmitatis, quàm sit fides; illa siquidem ex motivis humano modo conglobatis resilit; fides autem immobili divini verbi securitati innixa, divina & supernaturali certitudine prædita est.

Nec obest, quod D. Thomas art. 4. ad 3. docet, lumen fidei *facere videre ea quæ creduntur; sicut per alios habitus virtutum homo videt illud quod est sibi conveniens secundum habitum illum; ita per habitum fidei inclinatur mens hominis ad assentiendum his quæ conveniunt rectæ fidei, & non a iis.* Non obest, inquam; nihil enim aliud his verbis significatur, quàm fidem infusam ad cognitam mysteriorum credibilitatem gustandam sponte sua inclinare, ad eamque melius discernendam non parùm opitulari: sicut enim præditus habitu castitatis melius est dispositus ad incorruptum de obscænis iudicium ferendum, etsi iudicium illud à virtutibus non feratur; & generaliter recta appetitus per virtutes dispositio ad sanè de rebus iudicandum confert, unde de viro spiritali dicitur, quod iudicat omnia: ita homo fide illustratus, & piâ voluntatis affectione sapiens divina, magis ad ea, quæ fidei sunt, confirmanda, & adversus infideles defendenda roboratur, & interiori divini numinis instinctu, & unctione invitatur. Sicut enim lux solis non solum colores illustrat, sed etiam se ipsam aspectabilem præbet & conspicuam: ita fidei lumen non solum quas proponit veritates expandit, sed suos etiam radios explicat, & sui credibilitatem quadantenus inspirat.

Urgebis: Quicumque credit, tamen si non audiat prædicationem forinsecus sonantem, habet tamen sufficientia credibilitatis argumenta, aliàs leviter, temerèque mysteriis assensum præberet: sed tunc evidentia credibilitatis nequit à testimoniis extrinsecis provenire, cum nullus affulgeat prædicationis, cæterarumque externarum virtutum splendor: ergo à solo lumine fidei procedit evidentia credibilitatis, ut opinari videtur Cajetanus.

Respondeo, in hoc singulari casu evidentiam credibilitatis nec vi intellectus pati, nec ab habitu fidei effici, sed ab interiori Dei invitantis instinctu, & speciali Spiritus sancti intus loquentis, intus coruscantis, & dono gratiæ cœlestia illustrantis lumine procedere. Et certè cum cognitio credibilitatis fidei debeat ad actum fidei præsupponi, prius namque objectum debet proponi credibilè quàm credatur, non potest cognitio illa à fide procedere, quæ ad fidem præambula, & introductio ejus est, non effectus. Non improbo tamen quod nonnulli arbitrati sunt, fidem per actum reflexum, & indirectum evidentem mysteriorum credibilitatem semel per discursum habitam cognoscere, & eâ mirificè delectari, unde verissimum est illud: *Nisi credideritis non intelligetis*; quia fidei articuli ab illis meliùs intelliguntur, qui firmitùs eis fide adherent. Sic Augustinus, qui ante fidem aciem figere non valebat, nec quid sacramenti haberet Dominica Incarnatio, poterat suspicari, Dominico eloquio eruditus, & fide suavis non satiabatur initio conversionis dulcedine mirabili, considerans altitudinem consilii divini super salutem generis humani,

humani, evanuitque importuna multiplicium quæstionum confusio, in quibus nonnisi caligò & pugna sibi antea videbatur: & simul ei apparuit una facies eloquiorum castorum, quia præ dulcedine Dei, dum se influebant auribus ejus verba divina, veritas in cor ejus eliquabatur. Sic B. Theresia tantâ claritate inter sacros contemplationis amplexus Trinitatem, aliâque Religionis reconditiora arcana intuebatur, ut non tam credere, quàm ea conspicua esse sibi viderentur. Nec est inconveniens fidem simul evidentiam & inevidentiam sub diversa ratione compati, evidentiam nimirum credibilitatis, & inevidentiam in se spectatæ veritatis. Nam etiam habitus opinionis fertur in objectum inevidens in ratione veri, evidens in ratione probabilis.

Quæres, utrum sicut objectum fidei compatitur accidentem credibilitatem: ita compatiatur etiam evidentiam in attestante?

Respondeo affirmanter contra Durandum, quem sequitur Bannes. Unde potest contingere quod aliquis viator possit evidenter cognoscere Deum aliquid revelasse; & nihilominus illud quod revelatur, fide divina credere. Moveor primò autoritate S. Thomæ quæst. 5. art. 1. *illa sola manifestatio, inquit, excludit fidei rationem, per quam redditur apparens vel visum id, de quo principaliter est fides*: evidentia autem testimonii divini non reddit apparens vel visum id, de quo principaliter est fides: res enim revelata in se manet intrinsecè obscura. Item eadem quæst. art. 2.

art. 2. luculentius adhuc sic loquitur: *Si aliquis Prophetam prænuntiaret in sermone Dei aliquid futurum, & adhiberet signum mortuum suscitando, ex hoc signo convinceretur ille intellectus videntis, ut cognosceret manifestè hoc dici à Deo, qui non mentitur, licet illud futurum, quod prædicitur, in se evidens non esset; unde per hoc ratio fidei non tolleretur. Quibus verbis nihil clarius. Hinc infert ad 1. quod fides dæmonum est quodammodo coacta ex signorum evidentia. Et ad 2. quod dæmones coguntur ad credendum ex perspicuitate intellectus. Et ad 3. Hoc ipsum Daemonibus displicet, quod signa fidei sunt tam evidentia, ut per ea credere compellantur. Atqui cognoscere manifestè aliquid dici à Deo, & cogi ex evidentia signorum, & ex perspicuitate intellectus ad credendum compelli, est habere evidentiam in attestante. Ergo ex mente D. Thomæ objectum fidei evidentiam in attestante compatitur, id est aliquid possumus credere, & simul revelatione illius certiores fieri.*

Ratio ex illis eruitur S. Thomæ testimoniis: Illud fide credimus, cui in se ipso ignoto assentimur propter solam Dei attestantis auctoritatem: per hoc enim duntaxat distinguitur fides à scientia, intellectu principiorum, & visione beata, quod scientia medio demonstrationis innixa certò simul, & evidenter veritate potitur, simplex verò intelligentia principiis per se, & ex penetratione terminorum notis assentitur propter se, seu propter ultrò se, & sine discursu ingentem veritatis splendorem; visio verò rem in se intuitivè, & quidditivè veluti ob oculos positam contemplatur; at verò fides solâ dicentis auctoritate

ritate freta, nulli nisi Deo, innititur firmamento: atqui evidentia in attestante rem in seipsa ignotam relinquit, connexionem prædicati cum subiecto nequaquam demonstrat, sed eatenus articulo quâmlibet in se obscuro fidei obsequium homo præbet, quatenus videt Deum ad illud credendum auctoritate sua compellere, seu quia *autem* ipse dixit, & dignus est qui credatur: Ergo evidentia in attestante fidem non absumit, sed servat, perficit, & illustrat, quia rationem *sub qua* fidei non destruit, sed eam efficit securam, id est non tollit quin homo credat propter unam Dei dicentis auctoritatem; sed facit quod homini Deum ita locutum esse constet. Quam securitatem fidei non refugit, sed per se quærit, ut sit divina, & non humana.

Confirmatur à posteriori: De facto Angeli habuerunt fidem cum evidentia in attestante; etenim dum erant in via, divina mysteria edocti sunt, & simul agnoverunt revelationem à creaturis minimè derivari, cum sint totius entis naturalis comprehensivi: ergo lumen illud divinitus imprimi evidenter intulerunt. Item fides in dæmonibus modo infra explicando invenitur, in quibus tamen evidentia in attestante inest, ut expressè locis superius laudatis inculcat S. Thomas, & ex eo patet, quod cum dæmon cognoscat, & certissimè convincatur vera in fidei nostræ confirmationem edi miracula, evidenter colligit fidei nostræ veritatem firmare Deum, qui mendacii nec author est, nec adjutor, nec protector. Quin etiam sacri Doctores argumenta credibilitatis fidei nostræ apprimè penetrantes, illi præsertim qui in nomine Christi
 Domini

Domini miracula vel patrarunt ipsimet, vel certè ab aliis patrari aspectabiliter viderunt, quibus apertè convincebantur, fidem nostram à Deo processisse: illudque Richardi Victorini *lib. 1. de Trinit. cap. 2.* proprio experimento percipiebant: *Ea qua revelata sunt nobis cœlitus, tam miris prodigiis confirmata sunt, ut genus videatur esse dementia in his vel aliquantulum dubitare.* Unde concludit: *Domine si error est, à te decepti sumus. Nam tantis signis à te confirmata sunt (mysteria) quod non nisi à te fieri possunt.*

Nec potest dici, quod licet dæmones sciant miracula à Sanctis in confirmationem fidei edita vera esse, non adulterina; non tamen convincuntur ea in fidei Christianæ confirmationem patrari: quia gratiâ gratis datâ (qualis est potestas miraculorum edendorum) potest quis in perversum finem abuti, putà ad fallendum. Non, inquam, id potest sine injuria religionis dici. Etenim si semel dicere liceat, posse aliquem gratiâ miraculorum ad fallendum abuti, dicent Judæi Christum eâ gratiâ præditum, eâ fuisse abusum: dicent ethnici ea instructos fuisse Apostolos, virosque Apostolicos, sed eam perverso usu sordidasse. Ergo hac admisâ responsione periclitatur fidei nostræ probatio, & enervatur totius Ecclesiæ miraculis stabilita firmitudo. Et ratio est, quia ut in superioribus monstratum est, Deus nullatenus potest mentiri, sive per se, sive per ministrum: si autem volenti fallere conferret Deus gratiam miraculorum, utique mendacii fautor, mendacii protector foret, & confirmator. Certè ad divinam providentiam pertinet verorum miraculorum facultatem errorem præ-

dicantibus impertire : nam causa ejus ageretur , imò & periclitaretur ejus veritatis decor , si fineret nomine suo & virtute sua firmari falsum de quo patratione miraculorum testimonium perhiberet , impelleretque homines in errorem proculdubio excusabilem , utpotè sigillo & caractere divinitatis signatum. Adstipulatur clarissimè S. Thomas , qui infra q. 178. art. 2. ad 3. disertè ait : *Semper miracula sunt vera testimonia ejus , ad quod inducuntur : unde à malis , qui falsam doctrinam enuntiant , nunquam sunt vera miracula in confirmationem doctrine sue , quandoque quandoque fieri possint ad commendationem nominis Christi quod invocant , & virtute Sacramentorum qua exhibent.* Idem disertissimè tradit quodlib. 2. art. 6. ad 4. his verbis : *Miracula visibilia fiunt virtute divina ad confirmationem virtutis fidei : unde dicitur Marci ultimo de Apostolis , quod predicaverunt ubique Domino cooperante , & sermonem confirmante sequentibus signis.* Non autem sunt miracula semper ad demonstrandum gratiam ejus , per quem miracula fiunt ; & ideo potest contingere quod aliquis gratiam gratum facientem non habens miracula faciat ; sed hoc contingere non potest , quod aliquis falsam doctrinam annuntians vera miracula faciat , qua nisi virtute divina fieri non possunt : sic enim Deus esset falsitatis testis , quod est impossibile. Cum ergo Christus se filium Dei diceret & aequalem Deo , hanc ejus doctrinam comprobant miracula que faciebat , & ideo ostendebatur Christus per miracula que faciebat , esse Deus. Petrus autem licèt eandem vel majora miracula faceret , non probabatur esse Deus , sed per ea etiam probabatur quod

Christus

Christus esset Deus, quia Petrus non predicabat seipsum, sed Iesum Christum esse Deum. Quibus verbis nihil luculentius, nihil ad confutandam adductam responfionem validius dici potest.

Sed dices: Fides, utpotè obscura, excludit omnem evidentiam: sed evidentia in testificante efficit cognitionem evidentem: ergo evidentia in attestante est impossibilis cum fide.

Respondéo, fidem non posse compati evidentiam rei in seipsa, non excludere tamen, sed potius connaturaliter exigere Dei revelantis testimonium, de quo sibi constet, tametsi res revelata sit sibi ignota. Cum enim fides sit ex auditu, & aliunde soli Deo credat, Deum fides audire avet, & ejus voci obscura licèt revelanti obedire. Itaque non inconvenit aliquid esse evidens secundum rationem extrinsecam revelati, & esse obscurum secundum rationes extrinsecas, & prædicata essentialia. Et quanvis illud omne quod à Deo revelatur, sit verum in se, non tamen propterea quì evidenter cognoscit aliquid esse revelatum, continuo videt illud esse verum in se; quia licèt id quod à Deo revelatur sit verum in se, non tamen cognoscitur in se, nec penetratur ejus veritas objectiva, sed solâ externi testimonii luce innotescit: unde infero objectum quidem quod respicit fides, debere esse essentialiter obscurum; objectum tamen cui credit, posse esse evidens: Angelus enim in via de Deo revelante non habebat fidem, sed scientiam: de revelatis tamen saltem primariis, putà Trinitate, beatitudine supernaturali, aliisque arcanis fidem habebat, non scientiam. Nec est necesse quod eodem habitu cognoscatur res & motivum assentiendi,

ut inde inferatur, debere esse fidem, non evidentiam de revelatione, sicut de re revelata. Id enim falsò assumitur, cum per scientiam attingatur conclusio, & per habitum principiorum nolcantur præmissæ, quæ tamen motivum sunt propter quod assentimur conclusioni. Ex quibus patet quàm meritò supra contra Bannem & Gonetum dixerimus, obscuritatem non pertinere ad rationem formalem motivi fidei; cum enim objectum fidei, ut nobiscum fatetur Gonet, compatiatur evidentiam in attestante, manifestum est revelationem, quæ est fidei motivum, posse esse evidentem; cum evidentia in attestante sit certa & evidens cognitio revelationis divinæ manifestantis vocem suam.

Instabis: Scientia à posteriori excludit fidem ejusdem objecti: v. g. Philosophus Christianus nequit habere fidem simul & demonstrationem à posteriori illius propositionis, *Deus est*: ergo etiam fides excludit evidentiam in attestante. Probatur consequ. Demonstratio à posteriori non magis generat scientiam rei in seipsa secundum prædicati connexionem cum subjecto & quoad prædicati intrinsecam, quàm evidentia rei in attestante: Philosophus namque demonstrans Deum ex creaturis, non videt Deum in se per rationes intrinsecas, sed ipsum duntaxat in effectibus cernit, vel potius ex creaturis colligit Creatorem. Certè effectus Dei magis sunt extrinseci respectu essentiae divinæ, quàm sit testimonium ipsius Dei respectu eorum quæ de Deo credenda sunt. Ergo si effectus creati pariant evidentiam divinam esse, ita ut extinguant fidem, multò magis infallibile Dei testimonium evidentiam conferet veritati

ritati quam reveleat. Enimverò si evidens est, omnibusque apertum & exploratum, Deum existere, quia ita testatur communis vox creaturarum clamantium: Ipse fecit nos, & non ipsi nos; quidni evidens erit atque compertum, perfectam esse Verbi æterni incarnationem, de qua nos Deus clarissimâ vocis suæ significatione certiores reddit, qui nec falli potest, nec fallere unquam valet? Si ab effectu. ad causam valet demonstratio, quidni à causa ad affectum? Si convincit animum creaturarum concentus, quidni evincet authoritas Dei loquentis, penitiora cordis sui arcana aperientis, nosque de illis minimè dubitare imperantis? Quæ, quæso, disparitas?

Respondeo grandem esse disparitatem, cujus momentum in hoc totum positum est, quia causa in effectu sui participationem. necessario imprimit, subindeque per effectum evidenter cognoscitur existentia causæ; cujus existentia imitationem cernimus in effectu. Unde viso effectu non credimus causam existere, sed scimus: nec in auditu solo, sed in visu innititur cognitio nostra. At verò in revelante quâ tali non cernitur res revelata, sed ab eo auditur; fides autem ex auditu. Infallibilis est quidem Dei vox, immobile & inconcussum Dei testimonium; sed propterea non videmus rem existere, sed credimus, sed obtemperamus, sed captivamus intellectum nostrum in obsequium fidei. Non enim est formalis ista consequutio: Trinitas est, quia Deus revelat. Revelatio quippe non infundit, sed supponit rei revelatæ existentiam, quam detegit. Sed ista est legitima illatio: Credendum firmiter

est, & sine dubitatione tenendum, Trinitatem esse, quia Deus revelat. Immobilitas ergo divini testimonii, & firmitas vocis illius tollit quidem dubium, sed non parit scientiam; quia tamen si Deus difficillima quæque, & intellectum superantia proponens, dignissimus sit qui credatur; res tamen revelata non est per se connexa cum testimonio. Unde ex pondere auctoritatis quâmlibet infinitæ non directè inferitur Trinitatis existentiam videri, cum nec in se videatur, nec in aliquo suo vestigio: sed solum inferitur, credendum esse Trinitatem existere. Major ergo & intimior est connexio effectus cum causa, quàm sit revelantis cum re revelata: effectus enim est expressio causæ à qua essentialiter pendet: at verò mysterium revelatum à revelatione non pender, nec revelationem per se infundit; quia sive reveletur, sive non, idem est in seipso: quando ergo revelatur non scientiam parit, sed aures petit & fidem.

Hæc est etiam notabilis vocem Dei inter & creaturarum Dei gloriam enarrantium sonum differentia, quod creaturarum vox non est libera sed naturalis, nec tam aures ferit, quàm oculis cæterisque omnibus sensibus se ingerit; unde existentiam causæ à qua essentialiter pendent, necessario in se legendam & cognoscendam exhibent. At verò revelatio, seu Dei loquentis vox libera est, nec naturaliter à veritate revelata procedit, sed eam dumtaxat testatur, unde digna quidem est quæ credatur; sed rem in se obscuram relinquit, subindeque objectum fidei credibile reddit, sed non scitum.

Urgebis: Ideo salvatur, Beatos non habere fidem.

fidem vel perpetuitatis beatitudinis, vel futurorum contingentium, aliorumque secretorum quæ à Deo revelantur, quia de illis habent evidentiam in attestante, & vocem Dei perspicuè loquentis clarissimè audiunt & sentiunt: neque enim illa vi & efficacîa luminis gloriæ penetrant, gloriosum enim lumen solam divinam essentiam, & ea quæ cum illa connexa sunt, per se detegit; futura verò contingentia, perpetuitatem visionis, & alia id genus extra Verbum expandit Deus: ergo evidentia in attestante fidem objecti revelati absomit planè, & funditus destruit.

Respondeo, Beatos in essentia divina intueri suæ beatitudinis perpetuitatem, cum sit felicitatis corollarium ex ea necessariò consequutum, & ad perfectam, & consummatam ejus rationem essentialiter requisitum; cum lata enim beatitas quietem exigit, & immobilem boni possessi securitatem. Nec obest, quod eam Paulus non viderit, quia non cernitur hæc perpetuitas ex vi visionis præcisè, sed ex vi visionis prout est beatitudo permanenter communicata, qualis non fuit in Apostolo, qui Deum transeunter vidit, non ut bearetur, sed ut veritates in fonte potatas Ecclesiæ propinaret; non ut coronaretur qui nondum pugnaverit, sed ut acrius pugnaturus descenderet in arenam, sequæ, aliosve commilitones prægustatam animaret ad coronam.

Quoad futura verò contingentia, cæteraque arcana, quæ Deus Beatis interdum pandit, dicendum est, vel ea Sanctos in essentia videre, vel extra Verbum per clarum lumen in seipsis intueri, ut alibi ex professo explicamus. Sed utut sit, præ-

cisique intempestivis controversiis, quæ sunt à
 presenti instituto alienæ, objectioni occurrimus.
 absque negotio, dicendo quod licet Deus ali-
 qua obscura Sanctis suis revelaret, non tamen in-
 illis manere posset fides, quia splendente visio-
 ne beata, cernitur objectum primarium fidei, &
 quidem intuitivè: ergo faceflat, extingaturque
 fides necesse est; desinente enim objecto prima-
 rio, & exercitio circa illud facto impossibili,
 evanescit omninò fidei habitus, abit, excedit,
 erumpit. Quomodo enim in conspectu infiniti-
 solis immensos radios affundentis consisterent
 fidei tenebræ? Fugiant ergo umbræ, dissipatur
 nox, dum nobis propalam, & aspectabiliter
 ostenditur ubi sponsus cubet in meridie: eva-
 cuantur ænigmata, frangitur speculum, destrui-
 tur fides, quando facie ad faciem ille cernitur,
 cuius visio est tota merces, totum desiderium
 nostrum. Nec enim dubito, mi Theologe, te il-
 lius objecti desiderio incredibili teneri, & ferme
 æstuarè, quod sicut totum, ita solum desiderabi-
 le est. Illius ergo æterni, quod credimus, boni
 sacra fames, & cura sit antiquissima, sit prima, sit
 unica, ut objecti, quod speculati sumus, tene-
 bris claritatis splendor heu citò respondeat.

REFLEXIO.

Objectum fidei speculatione nimia contem-
 plari disputando fatigamur; orando, adorando,
 & amando reficimur: ergo sit Deus perpetuum
 mentis, cordisque objectum, qui ubique adest,
 tenebris ipsis interest, interest cogitationibus:
 nec tantum sub illo agimus, sed cum illo; nec
 in

in oculis solum illius, sed & in sinu vivimus. Igitur more Noë viri justī, atque perfecti in generationibus suis, cum Deo ambulemus, idest Deum ubique præsentem cordis oculis objiciamus, & in terra positi, sed à terra extranei, conversemur in cœlis. Sic exponente Basilio in Psalmum 44. induomur Dominum Jesum Christum, quia Christo Deo velut amictu animus induetur. *Induimini*, inquit, *non secundum exteriorem hominem, sed mens nostra Dei memoriâ circumamiciatur.*

Omniū germana scaturgio vitiorum est divinæ præsentiæ oblivio: *Non est Deus in conspectu ejus.* Quid inde inferis, Vates sancte Psal. 9. *Inquinata sunt via illius in omni tempore.* Unde veridicè S. Ephrem lib. de virtute, ait: *Nihil pejus, graviusque est, quàm ipsius Dei oblivionem capere.* Continuâ enim Dei recordatione turpes animæ passionēs recedunt; unde & mundum Spiritus sancti habitaculum efficitur. Et longè elegantissimè Augustinus lib. 14. de Trinit. c. 12. *Magna hominis miseria est, cum illo non esse, sine quo non potest esse. In quo enim est, procul dubio sine illo non est: & tamen si eum non meminit, eumque non intelligit, nec diligit, cum illo non est.* Itaque in plenitudine fidei nobiscum sit Deus, & in plenitudine gloriæ erimus nos cum Deo. Obversetur menti nostræ Deus in fidei tenebris, ut simus cum illo, quandò rapiemur in nubibus obviam Christo in aëra, & sic semper cum Domino erimus. Curemus interim eum fide habere nobiscum, ut sit comes viæ, qui Patriæ redditor est futurus.

SPECVLATIO III.

Conueniens est articulorum fidei distinctio, & numerus, cui decursu temporis nullum incrementum, sed explicatio accessit.

Quia per articulos fidei ordinatur objectum illius, rectè hoc capite, quo objectum fidei exponimus, de articulis fidei agimus, eorumque convenientiam, distinctionem, numerum, & augmentum, quale sit, explicamus.

Sed prius observandum est, nomen articuli ex Græco ἄρθρον, quendam distinctarum partium coaptationem significare; quâ ratione particulae corporis invicem coaptatae dicuntur membrorum articuli. Sic etiam apud Grammaticos partes orationis rectè colligatae, & aptis commissuris periodum adornantes, articuli dicuntur. Articuli ergo fidei christianae sunt quaedam objecti fidei partes inter sese coaptatae. Hoc posito + Probatur prima pars de convenienti distinctione articulorum. Cum enim objectum fidei sit aliquid non visum, tunc condendus est specialis fidei articulus, quando occurrit aliquid speciali ratione non visum; quando verò multa sunt, quæ ad eandem rationem vel pertinent, vel reducuntur, tunc articuli non sunt distinguendi: v.g. quod Christus sit passus, & quod resurrexerit, duplicem patitur difficultatem specialem: unde alius est articulus passionis, alius resurrectionis.

tionis: quod verò Christus sit passus, mortuus, & sepultus, diversas non invehit difficultates, & uno suscepto faciliè alteri creditur: unde sub uno articulo tria hæc comprehenduntur. Cæterùm non omnia credibilia per certos sunt articulos distinguenda. Nam omnibus, quæ in sacris literis continentur, fides adhibenda est; quæ tamen propter sui multitudinem ad certum reduci numerum nec debent, nec commodè possunt. Seligenda ergo fuerunt quædam fidei capita, quæ omnibus proponerentur, & ab omnibus crederentur. Quorum ulteriorem rationem tradit Angelicus Doctor *art. 6.* quia quædam sunt credibilia, de quibus est fides secundùm se, & propter se: alia verò sunt, de quibus non nisi in ordine ad alia fides habenda est; sicut in aliis scientiis quædam sunt cardinales veritates per se quæsitæ, per se intentæ, & propter se inventæ; quædam verò ad aliarum duntaxat manifestationem institutæ, & desideratæ. Ergo de illis debent condi articuli, de quibus principaliter est fides. Porro de illis principaliter est fides, quæ videnda speramus in patria; juxta illud Hebr. 11. *Fides est substantia sperandarum rerum.* Ad illa autem videnda præcipue suspiramus, quæ nos in patria beabunt, & ad beatitudinem obtinendam manuducunt. Talia sunt Deus unus, trinus, omnipotens, & mysterium Incarnationis. De alijs verò in Scriptura contentis non est principaliter fides, quia non nisi ad aliorum principaliorum manifestationem, & ornatum, non ex necessitate, sed ex ubertate doctrinæ instituuntur; subindeque non sunt de illis speciales constituendi, distinguendique articuli.

Sed dices : Nonnulla sunt fidei capita grandis specialique difficultate involuta, de quibus tamen nullus est specialis fidei articulus institutus, putà mysterium Eucharistiæ, creatio mundi in tempore. Ergo ratio allata inefficax est.

Respondeo ex D. Thoma *art. 8. ad 6.* in Sacramento Eucharistiæ duo posse considerari: unum scilicet, quod sacramentum est, & hac ratione reducitur ad illum articulum, sub quo continentur effectus gratiæ sanctificantis, qui pertinent ad articulum Spiritus sancti vivificantis, vel remissionem peccatorum: alterum quod in Eucharistia consideratur, est miraculosa corporis Christi sub panis speciebus præsentia: & sic sub omnipotentia miraculorum omnium patratrice continetur. Quantum verò ad creationem mundi in tempore, dicendum inchoationem mundi satis apertè contineri sub illis vocibus, *ante omnia sæcula*: si enim Verbum æternum sit natum ante omnia sæcula, liquidò consequitur, sæcula omnia incepisse, mundumque proinde exordium habuisse.

Probatur secunda pars de convenienti numero articulorum Symboli. Et quanvis aliqui quatuordecim articulos, alii duntaxat duodecim distinguant, dissensio tamen levis est, inò utraque sententia convenienter sustineri potest. Nam cum illa per se pertineant ad fidem, quorum visione beabimur; ideo omnia credibilia in duo capita generali diffinitione dividuntur; quædam enim pertinent ad maiestatem divinitatis, quædam ad mysterium humanitatis, per quod in gloriam filiorum Dei accessum habemus. Qui ergo articulos quatuordecim astruunt, sic numerant. In primis

primis circa maiestatem Divinitatis tria nobis credenda proponunt: Divinitatem (ecce primum articulum,) Trinitatem, de qua sunt tres articuli, quia tres personæ; unde habemus quatuor articulos. Deinde proponuntur opera divinitatis propria, quorum primum pertinet ad esse naturæ (ecce quintum articulum, qui est de creatione:) secundum pertinet ad esse gratiæ (ecce sextum articulum, sub quo omnia ad sanctificationem pertinentia continentur:) tertium pertinet ad esse gloriæ (ecce septimum articulum de resurrectione, & vita æterna.) Similiter circa humanitatem Christi septem distinguunt articulos. Primus est de incarnatione; secundus de nativitate; tertius de passione, morte, & sepultura; quartus de descensu ad inferos; quintus de resurrectione; sextus de ascensione; septimus de adventu ad iudicium.

Porrò illi, qui duodecim dumtaxat articulos admittunt, sex ad Divinitatem, & totidem ad humanitatem pertinere dicunt; & ut numerum continuè statuunt, tres articulos trium personarum sub uno collocant; articulum verò de opere glorificationis distinguunt in duos, resurrectionem scilicet, & gloriam; & sic ex his tribus, cum aliis tribus, nimirum divinitatis, creationis, & gratiæ, sex articulos ad divinitatis maiestatem pertinentes constat hæc sententia. Quoad humanitatem verò eundem ordinem servat, quem præcedens opinio, hoc solo discrimine, quod articulum conceptionis & nativitatis in unum confundit. Quod verò utraque opinio sit conveniens, patebit referendo integram responsionem ad 3. art. 8. Dicendum, inquit, quod Patris, & Filii,

& Spiritus sancti est una cognitio quantum ad veritatem essentie, qua pertinet ad primum articulum; quantum vero ad distinctionem personarum, qua est per relationes originis, quodammodo in cognitione Patris includitur cognitio Filii, non enim esset pater si filium non haberet, quorum nexu est Spiritus sanctus; & quantum ad hoc bene moti sunt, qui posuerunt unum articulum trium personarum. Sed quia circa singulas personas sunt aliqua attendenda, circa qua contingit esse errorem, quantum ad hoc de tribus personis possunt poni tres articuli. Arius enim credidit Patrem omnipotentem, & aeternum, sed non credidit Filium coequalem, & consubstantialem Patri; & ideo necessarium fuit apponere articulum de persona Filii ad hoc determinandum. Et eadem ratione contra Macedonium necessarium fuit ponere articulum tertium de persona Spiritus sancti. Et similiter etiam conceptio Christi, & nativitas, & etiam resurrectio, & vita aeterna secundum unam rationem possunt comprehendi sub uno articulo, in quantum ad unum ordinantur; & secundum aliam rationem possunt distingui, in quantum seorsum speciales habent difficultates. Hæc D. Thomas.

Dices: Deum esse unum demonstratur ratione naturali: Ergo unitas Dei perperam inter articulos fidei primarios & veluti capitales annumeratur.

Respondet S. Doctor ad 4. quod multa per fidem tenemus de Deo, qua naturali ratione investigare Philosophi non potuerunt, puta circa providentiam ejus, & omnipotentiam, & quod ipse solus sit colendus: qua omnia continentur sub articulo unitatis Dei.

Hæc

Hæc sanè responsio difficultate non caret, licet eam in rigore intelligat Cajetanus. Nam teste Apostolo *Rom. 1.* Philosophi fuerunt inexcusabiles, quòd Deum non glorificaverint : ergo eum glorificandum , colendumque noverunt. Deinde D. Thomas variis in locis multas profert demonstrationes naturali ratione procedentes, quibus probat Deum esse, & unum esse , & provisorum , & omnipotentem, & Dominum, subindeque colendum : Ergo id cognoscere Philosophi potuerunt. Responderetur tamen , has veritates posse dupliciter considerari : primò quatenus sunt de Deo ut authore naturæ , putà quod sit unus conditor orbis, provisor universitatis : secundò quatenus sunt de Deo ut authore supernaturali, largitore gratiæ, & gloriæ, cui speciali religionis cultu Deo inspirante instituto servendum est ; & hoc modo præfatas veritates à Philosophis ignorari ait S. Thomas. Quibus etiam adde, Deum, & auctorem naturæ, ejusque perfectiones, maximè verò providentiam , & suavem illius cum libertate concordiam , aliaque id genus , etiam naturaliter cognoscibilia , & à paucis, & post longum tempus, & cum admixtione multorum errorum cognita fuisse. Ut ergo veritas, quæ est cæterarum caput, & ab omnibus, & brevi tempore, & sine mixtura errorum, citò, & purè addisceretur , necesse fuit fundamentalem illum articulum in fronte Symboli explicare.

Quæres quid sit Symbolum, & quare varia in Ecclesia circumferantur.

Respondeo ad 1. Symbolum ex Augustino.
serm.

serm. 115. esse comprehensionem fidei nostræ, atque propter hoc symbolum est simplex, breve; & plenum, ut simplicitas consulat audientium rusticitati, brevis memoriam succurrat, plenitudo satisfaciatur doctrinæ. Quod repetit *serm.* 119. asserens Symbolum esse breviter complexam regulam fidei, quæ mentem instruat, nec memoriam oneret; paucis verbis dicatur, unde multum acquiratur. D. autem Thomas *art.* 9. post D. Clementem *epist.* 1. *ad Iacob.* ait, quod Symbolum est collectio sententiarum nostræ fidei; quia juxta etymologiam nominis Græci Συμβόλιον, Symbolum significat indicium & collationem, quia scilicet Apostoli, vel Patres in unum collecti ediderunt summam veritatum nostræ Religionis, quæ est indicium discernens Christianum ab infideli; sicut signum, & vexillum datum in bello militibus ad discernendum hostes ab amicis, dicitur Symbolum.

Respondeo ad secundum, tria esse celeberrima Symbole; primum est Apostolorum, quod ab ipsis editum esse constans traditio, & Patrum conspirantium consensus attestantur. An verò singuli Apostoli singulos articulos ediderint, dissidium est levis momenti: videatur D. Thomas *in 3. dist.* 25. *quest.* 1. *artic.* 1. Secundum Symbolum est Nicænum, quod postea fuit in Concilio Constantinopolitano auctum contra Macedonium, & explicatum in Ephesino contra Nestorium. Tertium est Athanasii (qui tamen an sit ejus author, aliqua est dubitandi ratio ab Historicis Ecclesiasticis ventilari solita; communior tamen opinio illud Athanasio asserit:) quod unanimis totius Ecclesiæ ipsum publicè decantantis

ritu consecratum est, quia cum integram fidei veritatem, ut notat D. Thomas, breviter, & aperte contineat, autoritate summi Ecclesiæ Pastoris est receptum, ut quasi regula fidei habeatur. Nec enim audienda est petulans post hominum memoriam impudentissimi Lutheri vox infrunita, effutiens contra torrentem Patrum, & perennem Ecclesiæ usum ab Apostolis inductum, Conciliis firmatum, & Ecclesiæ consuetudine probatum, gravem esse captivitatem Symbolum ordinare. Sed hoc spurciloquium evidenter ratione contunditur. Nam ut egregie discurret S. Thomas *art. 9. ad 1.* veritates fidei in sacra Scriptura diffusè continentur, & interdum justis de causis variis metaphoris & mysteriis paucis perviis involutæ: unde ad genuinum fidei intellectum ex sacris Literis eruendum, & orthodoxum sensum securè eliciendum, longum requiritur studium, arduumque exercitium, sin impossibile, certè summè difficile iis omnibus, quibus necessaria est notitia Christianæ veritatis. Plerique enim, vel ingenio obtusi, vel educatione destituti, vel humanæ societatis negotiis occupati distentique, seriis vacare studiis nec possunt, nec tenentur: ergo summè necessarium fuit, & nihilominus conveniens, ut ex sacris Scripturarum verbis rectè, & canonicè intellectis aliquid manifestum summaricè colligeretur, quod omnibus ad credendum & citò proponi, & facile percipi, adhibitâ modicâ diligentia posset. Quod quidem non est additamentum Scripturarum; sed compendium ex sacris paginis derivatum, & ut ita dicam, veluti succus, & cremor aliquatus. Quod verò garrit libertinorum coryphæus

phæus Lutherus, hanc Symbolorum dispositionem christianæ libertati officere, tam insulsum est, quàm quod maximè. Quomodo enim filiorum Dei libertati adversari potest, quod brevitati, & perspicuitati, & facilitati, & securitati consulit. Certè in artibus, disciplinis, variisque humanæ vitæ professionibus illa dicitur præstantior simul, & gratior, quæ præcisissimè prolixarum methodorum spinis, multa paucis docet, nec præceptis onerat, sed compendio studet.

Sed dices: Ad quid ergo multiplex Symbolum proponitur, ut credatur, si tantoperè brevitati providetur?

Respondeo, quod in omnibus Symbolis eadem fidei veritas proponitur, & docetur; sed tunc oportuit populum diligentius, & enucleatius de fidei veritate instrui, quando errores varii insurrexerunt, ne fidelium simplicitas per hæreticos corrumpetur. Et hæc fuit causa varia edendi Symbola pro diversitate, & pertinacia hæreticorum, ut in posteriori plenius & apertius explicaretur, quod in priori implicite latebat, & aperte exponi nondum infidelium instantia postulaverat.

*An procedente tempore fidei articuli
crementum acceperint?*

Probatur tertia pars, in qua asserimus, nullum articulis fidei essentiale accessisse crementum, sed majorem duntaxat explicationem, & veluti elucidationem. Nam quidquid posteriores successu temporis crediderunt, in fide præcedentium Patrum,

Patrum, veluti in semine, & radice continebatur: ita enim se habent in materia religionis fidei articuli, sicut principia per se nota in scientia naturali: in principiis autem scientiarum naturalium ordo quidam invenitur, ut quædam in aliis implicite contenta, ex eis argumentorum circuitu, & artificio syllogismorum ductu deriventur; sicut omnia principia ad illud unum, & generalissimum reducuntur: *Impossibile est aliquid simul affirmari, & negari de eodem*; ut patet per Philosophum 4. *Metaph. textu 92.* Ergo similiter omnes fidei veritates in quibusdam generalibus maximis continentur, quales sunt existentia Dei, & singularis erga hominum salutem providentia, juxta illud Apostolicum Hebr. 11. *Accedentem ad Deum oportet credere, quia est, & quod inquirentibus se remunerator est.* In immenso quippe divinitatis pelago ea omnia includi certum est, quæ Deo ab æterno conveniunt, in quorumque notitia beatitudo nostra consistit. In fide autem divinæ providentiæ ea omnia continentur quæ temporaliter à Deo propter hominum salutem dispensantur, quæve habent rationem viæ perducentis ad vitam æternam; & per hunc etiam modum aliorum subsequentium articulorum quidam in aliis virtualiter includuntur, ex eisque veluti consecutaria paulatim deducuntur: sicut in fide redemptionis humanæ incarnatio, passio, aliæque hujusmodi implicite continentur. Cum his tamen stat, multa temporum decursu detecta, apertaque fuisse, quæ antea vel latebant planè, vel certè non nisi confusè, & obscurè dignoscebantur. Ita enim colligitur ex illo Exodi 6. *Ego sum Deus Abraham, Deus Isaac,*
Deus

Deus Iacob, & nomen meum Adonai non indicavi eis. Et ex illo Psalmi 118. Super senes intellexi, super omnes docentes me intellexi. Necnon ex illo Ephes. 3. In aliis generationibus non est agnitus Mysterium Christi, sicut nunc revelatum est sanctis Apostolis, & Prophetis. Tradit etiam aperte Gregorius homil. 6. in Ezech. Secundum incrementa temporum crevisse scientiam Sanctorum. Et evidenter patet; mysterium quippe SS. Trinitatis ab omnibus ferè ante incarnatum Verbum ignorabatur; illud enim nobis Unigenitus, qui est in sinu Patris, dilucidè, sicut & alia multa secreta cœlestia enarravit. Successu etiam temporum enatis de fide controversiis novam lucem Pontifices, Concilia, & sacri Doctores affuderunt, & etiamnum affundunt.

Illud ergo certum est, illud ratum, illud ab omnibus alicujus notæ Theologis probatum, omnes fidei articulos fuisse initio per sacros Authores Ecclesiæ Catholicæ, saltem implicite revelatos, omnesque fuisse ab illis, vel scriptis traditos, vel verbis posteris commendatos. Quare nec Conciliorum plenariorum, seu œcumenicorum definitiones, nec Romanæ Sedis Antistitis suprema auctoritas, nec Patrum consensus & conspiratio una novas fidelibus revelationes edunt; sed quas à Christo & Apostolis accepit Ecclesia, aut posteris integras tradunt, aut illibatas ornant, aut obscuras interpretantur, aut ex eis consequentia, & sponte fluentia colligunt, aut adversa, & repugnantia, ut conterant, manifestant. Divinorum verborum semina rigant, & excolunt; & quæ plantæ, traduces, propagines ex eis oriuntur, proferunt & ostendunt. Articuli fidei funda-

menta.

menta sunt Theologicæ, Ecclesiasticæque doctrinæ, quæ Christus per Apostolos posuit: cæteri, sive Concilii Patres, sive summi Pontifices, sive Ecclesiæ Doctores, & sancti Scripturarum Interpretes superædificant super fundamentum Apostolorum, & Prophetarum, ipso summo angulari lapide Christo Jesu.

*Illustratur hæc doctrina ex Vincentio
Lirinenfi.*

Et sanè sapientis Pædagogi morem, & modum gerit Divinus Magister, qui non totam ab initio discipulis suis proponit doctrinam, ne obruat quos satagit erudire; sed eorum sese tenuitati, capacitatique attemperans, paulatim doctrinæ effundit lumen; à facilioribus exorditur, ut difficilia deinde & recondita scientiæ suæ arcana post varios institutionum, præludiorum, prologorum, cæterarumque dispositionum apparatus patefaciat. Sicut enim non omnia possumus omnes, ita nec omnia sunt incipientibus peræquæ ac provectis accommodata. Unde Apostolus *Gal. 3.* statum veteris Testamenti *pueritia* comparat; quia sicut alius pueris cibus, alius viris ministratur, illis lac propinatur, istis fortior esca tribuitur; diversa etiã est hominum pro diversitate temporum & ingeniorum doctrinæ cœlestis institutio.

Idipsum mirè, & penè divinè illustrat olim citatus, sed hic minimè prætermittendus Vincentius Lirinenfis, aureo contra novitates opusculo, ubi fidei non incrementum, sed explicationem, & veluti expansionem, & refusionem ad
mira

miraculum exponit his ferè verbis, quibus nonnulla adjiciam, nonnulla quoque claritatis, & brevitatis gratiâ detraham.

Sed forsitan dicit aliquis: Nullusne in Ecclesia Christi profectus habebitur religionis? Habetur planè, & maximus; sed ita tamen, ut verus ille profectus fidei sit, non permutatio. Siquidem ad profectum pertinet, ut in semetipsa unaquæque res amplificetur; ad permutationem verò, ut aliquid ex alio in aliud transvertatur. Crescat igitur oportet, & multùm vehementerque proficiat, tam singulorum, quàm omnium; tam unius hominis, quàm totius Ecclesiæ, ætatum, ac sæculorum gradibus intelligentia, scientia, sapientia: sed in suo duntaxat genere, in eodem scilicet dogmate, eodem sensu, eademque sententia. Imitetur animarum religio rationem corporum, quæ licèt annorum processu numeros suos evolvant, & explicent, eadem tamen quæ erant, permanent. Multùm interest inter pueritiæ florem, & senectutis maturitatem: sed iidem tamen ipsi fiunt senes, qui fuerant adolescentes; ut quavis unius, ejusdemque hominis status, habitusque mutetur, una tamen nihilominus, eademque natura, una eademque persona sit. Parva lactentium membra, magna juvenum, eadem ipsa sunt tamen. Quot parvulorum artus, tot virorum, ut nihil novum postea proferatur in senibus, quod non in pueris jam antè latitaverit. Unde non dubium est, hanc esse legitimam, & rectam proficiendi regulam, hunc ratum, atque pulcherrimum crescendi ordinem, si eas semper in grandioribus partes, ac formas numerus detexat ætatis, quas in parvulis Creatoris sapientia præ

præformaverat. Quod si humana species in aliquam deinceps non sui generis vertatur effigiem, aut certè addatur quippiam membrorum numero, vel detrahatur, necesse est ut totum corpus vel intercidat, vel prodigiosum fiat, vel certè debilitetur. Ita etiam Christianæ religionis dogma sequatur has decet profectuum leges, ut annis scilicet consolidetur, dilaretur tempore, sublimetur ætate; incorruptum tamen, illibatumque permaneat, & universis partium suarum menturis, cunctisque quasi membris, ac sensibus propriis plenum atque perfectum sit; quod nihil præterea permutationis admittat, nulla proprietatis dispendia, nullam sustineat definitionis varietatem.

Eandem veritatem cum eodem authore adornare possumus comparatione granitriticei in uberes quidem fructus sese fundentis; sed priùs herbam germinans, paulatim adolescit ut fœnum, & culmus deinde pubescens erigitur, assurgit, explicatur in spicam, ut frugem possit multiplicem sustinere: sed eadem semper seminis species perseverat, nihilque de germinis proprietate mutatur. Addatur licèt forma, species, distinctio, eadem tamen cujusque generis natura permanet. Similiter ergo severunt Majores nostri antiquitus in hac Ecclesiastica segete triticeæ fidei semina: unde iniquum valde, & incongruum est, ut nos eorum posteri, pro germana veritate frumenti, subdititium zizanix eligamus errorem. Quin potiùs hoc rectum & consequens est, ut primis, atque extremis sibi met non discrepantibus, de incrementis triticeæ institutionis triticei quoque dogmatis frugem demetamus. Ut
cùm

cùm aliquid ex illis seminum primordiis accessu temporis evolvatur, & excolatur, grani tamen proprietas non mutatur. *Absit enim, ut rosea illa catholici sensus plantaria in carduos, spinasque vertantur. Absit, inquam, ut in isto spiritali paradiso de cinnamomi, & balsami surculis lolium repente, atque aconita proveniant. Quodcumque igitur in hac Ecclesia Dei agriculturâ, fide Patrum satum est, hoc idem filiorum industriâ decet excolatur, & observetur; hoc idem floreat, & maturescat; hoc idem proficiat, & perficiatur. Fas est etenim, ut prisca illa cœlestis Philosophia dogmata processu temporis excurentur, limentur, poliantur: sed nefas est, ut commutentur; nefas est, ut detruncentur, ut mutilentur. Accipiant licet evidentiam, lucem, distinctionem: sed retineant necesse est plenitudinem, integritatem, proprietatem.*

Itaque Ecclesia Catholica in Conciliis œcumenicis congregata, vel ore summorum Pontificum oracula fundens, novos non condit articulos, nova dogmata non tudit, nihil permutat, nihil minuit, nihil addit: non amputat necessaria, non apponit superflua, non amittit sua, non usurpat aliena; sed depositorum apud se dogmatum custos sedula, & cauta, omni industriâ huic uni studet, ut vetera fideliter, sapienterque tractando, si qua sunt, illa antiquitus informata, & inchoata accuret, & poliat; si qua confirmata sunt, & definita, custodiat: ut nimirum illud idem, & invariatur, quod antea simpliciter credebatur, hoc idem postea diligentius cognitum, firmitus & credatur; quod antea lentius prædicabatur, hoc idem postea instanter prædicetur;

cetur; quod antea securius colebatur, hoc idem postea sollicitius excolatur; quod prius à maioribus sola traditione tenebatur, hoc idem posteris per scripturæ chirographum majori luce consignetur.

Quocirca Ecclesia in suis definitionibus quasi spiritualis tabernaculi Beseleel pretiolas divini dogmatis gemmas exsculpit, fideliter coaptat, adornat sapienter, adjicit splendorem, gratiam, venustatem. Intelligitur eâ exponente illustrius quod antea obscurius credebatur. Per illius determinationes posteritas intellectum gratulatur, quod antè vetustas non intellectum venerabatur. Eadem quæ didiscit, quæ à Patribus audivit, ita docet, ut cum dicat novè, non dicat nova. Quod si ad Novatorum comprimendam audaciam nova adhibet verba, novæ appellationis proprietate utitur, id propter intelligentiæ lucem præstat, non propter novum fidei sensum. Nec incidit in prophanas vocum novitates, quas Apostolus devitandas mandavit; quia tunc solum prophana novitas est, quando cum novæ appellationis sensu novæ res, novæ sententiæ, nova dogmata invehuntur, quæ sint vetustati, universitati, & Ecclesiæ consensioni contraria. Has prophanas novitates soli hæretici amant, apud quos omnes solenne est, ac legitimum, ut semper novellis dogmatis gaudeant, antiquitatis scita fastidiant, & per oppositiones falsi nominis scientiæ à fide naufragent.

Sed dices: Difficile intellectu est, quomodo in universalissimis fidei principiis alia mysteria includantur, ex eisque sponte fluant? Quomodo v.g. in duabus præfatis maximis à S. Thoma

post Apostolum memoratis, *Deus est, & inquituribus se remunerator est*, continentur alia tam abstrusa, nec minùs disparata de Trinitate, Incarnatione, Eucharistia, visioneque beata mysteria? Quomodo valere quit hæc consequentia, Deus est; ergo est Trinus: Deus habet providentiam; ergo Filius est incarnatus. Ergo mysteria nedum quoad explicationem, sed etiam quoad substantiam nova successu temporis crementa susceperunt.

Respondeo multiplicem articulorum fidei nostræ copiam & distinctionem non ita ex duobus præfatis Religionis maximis derivari, ut per evidentem, & ultrò manantem consequentiam inferantur; sed quia in re ipsa intuitivè, & prout est in se cognita sunt, vel ex natura rei, vel ex divinæ beneplacito voluntatis cum illis connexa. In essentia quippe divina, ex natura rei Trinitas continetur; cum, ut aliàs monstravimus, relationes sint de conceptu essentiæ, & impossibile sit istam videri illis latentibus. Similiter in divina providentia hominum salutem per Incarnationem procurare volente, executio talis mysterii ex divinæ beneplacito voluntatis continetur. Unde duo prædicta fidei axiomata meritiò possunt grano synapi juxta parabolam Evangelicam comparari, ut tibi consideranti, Lector optime, patebit: bona enim mens tua non indiget multis litteris.

Dices iterum: Ipsemet S. Thomas *respons. ad 4.* fatetur illos, qui fuerunt Christo propinquiore, sicut Joannes Baptista, & Apostoli, plenius divina mysteria cognovisse, quia & circa statum hominis hoc videmus, quod in juventute perfectior est,

est, eoque magis, vel minus perfectus reliquus vitæ status apparet, quo est juventuti propinquior: patet verò, quod sicut tempus veteris Testamenti pueritiæ, ita nostrum senectuti assimilatur: tempus verò Dominicæ incarnationis, & Evangelicæ prædicationis juventuti comparatur: ergo falsum est, successu & decursu sæculorum fidei articulos esse explicatiores, & uberiorem fidei doctrinam nos habere; unde si nullum sit in substantia, nullum etiam erit in explicatione crementum.

Respondeo certissimum, & evidentissimum esse splendorem fidei in substantia eundem quotidie semper amplius effundi, & crescere usque ad perfectum gloriæ diem. Unde doctrina Ecclesiæ nascentis solet auroræ; proficientis lunæ; perfectæ verò & consummatæ, soli comparari. Et certè ipsi Apostoli Concilium Hierosolymis coëgerunt, ut controversiam de circumcissione Gentilium converforum, & de observatione legalium definirent, ut videre est *Act. 15*. Multa etiam deinde in Conciliis, sive plenariis & œcumenicis, sive provincialibus, post Apostolos celebratis exposita fuerunt, quæ antea vel latebant proorsus, vel certè non ita clarebant. Denique quis crederet in hoc sæculo tam exculpto, & rerum omnium divinarum, humanarumque scientiam assequuto, post tot Concilia, post tot Patrum micantissimas lucubrationes, post tam accuratas, & elaboratas Theologorum operas minorem esse cœlestium veritatum notitiam? Fateor quidem Apostolos, Baptistam, aliosque eis coætaneos viros Apostolicos singulari doctrinæ fidei privilegio ditatos, & abundantiori lumine

perfusos fuisse : Ipsi enim habuerunt primitias spiritus ; ipsi sal terræ condiendis populis institutum, & lux mundi, testante Veritate fuerunt ; ipsi non servi, sed amici vocati sunt, quibus Filius quæcumque accepit à Patre, patefecit ; ipsi fuerunt Ecclesiæ cœli gloriam Dei enarraturi, à quorum influxibus cætera quæque pendent ; ipsi fuerunt Doctorum Magistri, & Patres, in quibus proinde subsequenti doctrinæ radii uniti eminentissimè reperiiebantur ; ipsi in die Pentecostes cœlestium veritatum plenitudinem, & superplenitudinem soli visioni beatæ inferiorem, omni aliâ creatâ superiorem ita receperunt, ut nihil nec quoad substantiam, nec quoad ecclesiasticos ritus, & Reipublicæ Christianæ leges ; nihil, inquam, prorsus ignorarint, juxta illud ipsis à Veritate promissum : *Cum venerit Paracletus docebit vos omnem veritatem.*

Patribus etiam primorum Christianismi sæculorum singularia doctrinæ, & cœlestis luminis privilegia concessa fuisse non inficiamur. Ipsi enim sexaginta illis fortibus designantur, qui lectulum Salomonis, sacrum videlicet ecclesiasticæ doctrinæ depositum, custodire dicuntur. Ipsi, ut prosequitur S. Prosper *lib. 2. de vita contempl.* fuerunt per Dei gratiam divinæ voluntatis indices & interpretes, Ecclesiarum Christi post Apostolos fundatores, & fundatarum propagatores, fidelis populi duces, veritatis assertores, praviæ doctrinæ hostes, Patres in fide Catholica regeneratorum, Prædicatores cœlestium, primi phalanges invisibilium præliorum, exempla bonorum operum, documenta virtutum, & forma fidelium.

Cum

Cum his tamen stat, ipsos singulas quasque difficultates in singularibus casibus occurrentes infuso sibi lumine minimè prævidisse, & explicite novisse; sed Apostolos cognovisse sibi divinitus promissam Spiritus sancti assistentiam, quâ emergentes circa fidem difficultates solverent, dubia compescerent, contròversias definirent. Cæterùm malè inde colligitur, Ecclesiam senescentem, & ab ætate plenitudinis legis Christianæ recedentem, densioribus obrui tenebris; cùm omnia ferè in Conciliis explicata, & determinata habeat, doctrinaque Theologica floreat supra modum. Solum inde inferri debet, difficultates fidei, variasque resolutiones, tum speculativas, cùm morales, ad primitivorum Patrum doctrinam veluti amissum esse exigendas; quia sicut aquæ in fontibus puriores sunt, ita incorruptus, sive de dogmatibus, sive de moribus sensus in primitivæ Ecclesiæ Doctoribus sanctis limpidius apparet; cùm nullis sit novitatum nebulis, nullis modernæ laxitatis tenebris obscuratus; & hoc est duntaxat, quod voluit loco laudato S. Thomas avitæ doctrinæ tenax, antiquitatis Patrum amator, & æmulator.

Occasione Symboli, & articulorum fidei tractant non pauci de infallibilibus fidei regulis, Scriptura, Traditionibus, Conciliis, summorum Pontificum definitionibus, & Ecclesiæ Catholicæ moribus, & consuetudinibus: disputant etiam de veræ Ecclesiæ proprietatibus & tesseriis, unitate, universalitate, sanctitate, Apostolicarum traditionum observantia, & infallibilitate. Sed de his omnibus etsi pro rei dignitate strictè, pro

operis tamen nostri brevitatem satis amplè totâ dissertatione præambula secundi, & tertii voluminis sermonem habuimus.

Corollaria momentosa de natura, divisione & dignitate fidei.

Ex principiis toto hoc capite constitutis ea sine negotio consectaria derivantur, quibus fidei natura, & dignitas elucescent.

COROLLARIUM I. *Apostolica fidei definitio.*

Sequitur ergo primò fidem benè ab Apostolo *Hebr. II.* sic definiri: *Fides est substantia sperandarum rerum, argumentum non apparentium.* Dicitur substantia, idest basis, inchoatio, & fundamentum rerum, quas speramus; in quolibet enim genere, quidquid aliis supponitur, & substernitur, substantiæ nomen, quod à substando dictum est, sortitur. Vel quia sicut substantia per se, non in alio subsistit, illique innixa est tota compositi structura: ita fides firmamentum est totius vitæ, militiæ, & œconomix spiritalis. Ipsa per se stat, ut pugnet, ut vincat, ut triumphet; Sancti enim per fidem vicerunt regna, operati sunt iustitiam, adepti sunt repromissiones. Ipsa per se stat, & subsistit, quia cæteris desinentibus permanet; destructâ enim per peccatum mortale charitate, & eversâ totâ virtutum infusarum supellectile, fidem non perimit ruina; sicut in corruptione substantiali, in qua fit totalis accidentium resolutio,

solutio, sola permanet, & subsistit materia prima, quia est subiectum primum generationis carnis naturalis. Additur, *sperandarum rerum*; quia fides est inclinatio & fundamentum futuræ visionis, quam speramus; & res speratas, futuras licet, nondumque existentes, menti nostræ præsentibus exhibet, dando illis quadantenus hypostasim & subsistentiam in mente fidelium, eas tam certas habentium, quam si ipsis reverà præsentibus objicerentur. Signanter autem dicitur rerum sperandarum, non verò diligendarum; quia dilectio potest esse visorum & non visorum, præsentium & absentium, atque adeò res diligenda non ita propriè objectum fidei declarat, sicut res speranda, quæ semper est absens, & non visa, juxta illud Rom. 8. *Quod non videmus, speramus.* Illud etiam Hilarii lib. 8. de Trinit. *Maximum fidei stipendium est sperare quæ nescias.* Dicitur præterea *argumentum*, & sumitur pro effectu argumenti; unde alia litera habet, *convictio*; sicut enim per argumentum intellectus suavi & veluti connaturali artificio ad adhærendum veritati inducitur, & necessitate etiam exercitii impellitur; ita divinæ authoritatis pondere intellectus fidelis ad adhærendum rebus fidei tam fortiter, & nihilo minùs suaviter inclinatur, quam si evidenti demonstratione convinceretur. Denique additur *non apparentium*, quia ut ex hæcenus dictis satis superque liquet, ratio non visi vel est de essentia, ut quidam volunt, vel certè conditio est ad objectum fidei indispensabiliter requisita.

Atque ex his apostolicæ hujus definitionis

profunditas, & bonitas patent, quidquid garriat Erasmus. Cùm enim juxta solidæ Philosophiæ principia, habitus per actus, actus verò per objecta dignoscantur, fides, utpote habitus intellectualis, definiri debet per proprium actum in ordine ad proprium objectum: in illa autem Apostoli definitione proprius fidei actus, & proprium ejusdem objectum designantur: proprius namque fidei actus est credere, quem actum exprimit *ly argumentum*; sumitur enim pro effectu argumenti, ut dictum est, idest convictione animi veritatibus revelatis ob divinam auctoritatem indivulsè adhærescentis. Assignatur etiam proprium fidei objectum; nam cùm credere sit actus intellectus à pia voluntatis motione dependens; objectum illius & ad voluntatem, & ad intellectum sub diversa ratione pertinere debet; per hoc autem quod dicitur *substantia sperandarum rerum*, significatur habitudo fidei ad suam, qui est objectum voluntatis; per hoc verò quod dicitur *argumentum non apparentium*, designatur habitudo ad verum, quod est objectum intellectus. Ergo formalis est, & accurata Apostoli definitio.

Et ut magis appareat, quàm sit characteristica hæc definitio, certum est, per illam habitum fidei ab aliis omnibus intellectualibus discerni. Nam per *ly argumentum*, distinguitur ab opinione, suspitione, dubitatione, quibus non firmatur, vel convincitur, sed formidat, vel vacillat intellectus. Per *ly non apparentium*, distinguitur à scientia, & intellectu, quibus res fit apprens, & conspicua. Per *ly substantia sperandarum rerum*, distinguitur à fide communiter sumpta,

& ab humana, & à coacta, quæ nullatenus ad beatitudinem speratam ordinantur.

COROLLARIUM II. *Alia fidei definitiones.*

Sequitur secundò bonitas multarum fidei definitionum, quæ à gravibus Theologis circunferuntur. Et quidem S. Thomas *quest. 4. art. 1.* fidei naturam radicitus hac definitione indagat. *Fides, inquit, est habitus tenentis, quo inchoatur vita æterna in nobis, faciens intellectum assentire non apparentibus.* Quæ verba sunt veluti Apostolicæ definitionis commentarius. Ab illa non est multum dissentanea, quam tradit Dionys. cap. 7. de divin. nom. *Fides est manens credentium fundamentum, collocans eos in veritate, & in ipsis veritatem ostendens.* Adstipulatur August. *tract. 4. in Ioan.* sic fidei naturam paucis complectens: *Fides est virtus, quâ creduntur quæ non videntur.* Paulò difficilior est quam proponit Damascenus lib. 4. cap. 12. *Fides est non inquisitivus assensus* (sic enim legendum optimè monet. omniſcius P. Nicolai, non ut perperam priùs, *non inquisitus assensus*;) idest fides assentitur credendis absque inquisitione rationis veritates fidei demonstrantis.

Sed ex dictis facilis & expedita colligitur fidei definitio hoc modo. Fides est virtus Theologica, quâ creatus intellectus omnibus à Deo tanquam prima veritate revelatis firmiter assentitur. Hac enim definitione propria ratio formalis objecti fidei perspicuè declaratur. Optima

etiam est descriptio quæ communiter usurpatur:
*Fides est donum Dei, ac lumen, quo illustratus
 homo firmiter assentitur omnibus, quæ Deus reve-
 lavit, & nobis per Ecclesiam Catholicam credenda
 proposuit, sive illa in sacris literis scripta sint,
 sive traditione Apostolica habeantur.*

COROLLARIUM III. *Fidei divisio in for-
 matam & informem.*

Sequitur tertio, fidem rectè dividi in for-
 matam, & informem. Formata est fides gra-
 tiâ habituali, & charitate informata. Informis
 verò est fides gratiâ habituali & charitate de-
 stituta. Ratio colligitur ex dictis. Cum enim
 fides sit substantia, & inchoatio rerum speran-
 darum, fundamentum christiani ædificiî di-
 cens ordinem non solum ad verum, quod est
 objectum intellectus, sed etiam ad bonum,
 quod est objectum voluntatis; ideoque à pia
 voluntatis motione pendeat, ut postea dice-
 tur; consequens est, ut tandiu fides informis,
 & veluti nuda, inanis, & vacua censeatur,
 quandiu gratiâ est, & charitate destituta; tunc
 verò formata, & ornata dicatur, cum gratiâ
 habituali, & charitate, veluti vestitu deaurato
 induitur, virtutum etiam infusarum varietate
 circumamicta.

Sed paulò accuratiùs exponendum est, quo-
 modo per gratiam, quomodo præsertim per
 charitatem fides formetur. Crebra enim, & fre-
 quens est D. Thomæ, Patrumque sententiâ, cha-
 ritatem esse non solum fidei, sed etiam virtutum
 omnium formam, Ad quorum claritatem sup-
 ponendum

ponendum est, nec gratiam, nec charitatem posse esse cæterarum virtutum formam intrinsecam, & physicam; quælibet enim virtus, imò, & omnis habitus, in schola S. Thomæ est forma, & qualitas simplex, & indivisibilis, quæ proinde nec subiectum alterius est, nec physicam cum alia virtute unionem inire quit. Gratia ergo, & charitas non possunt esse nisi extrinseca & moralis forma virtutum; quatenus fides, cæterasque virtutum beata cohors in ratione christianæ, veræ, perfectæque virtutis, à gratia, charitateque ita formantur, ut talis beneficio informationis actus earum vitæ æternæ meritorii evadant. Sed quomodo fiat huiusmodi moralis informatio, quid inde in virtutes refundatur, quid in earum actus derivetur, explicare operæpretium est. Et quidem de gratia sanctificante facile percipitur; cum enim gratia sit virtutum infusarum origo, & subiectum, à quo connaturaliter dimanant, absque negotio intelligimus, gratiam esse formam, non physicam virtutum, cum potius rationem subiecti earum habeat, & virtutes ad instar formarum physicarum gratiæ inhæreant; sed formam moralem, quatenus ex unionem gratiæ cum virtutibus refluit condignitas in virtutes, quibus moraliter dignitate speciali veluti vestiuntur, dum ex illa condignitatem meriti ad vitam æternam à gratia hauriunt, & veluti sugunt; unde non parum illustrantur.

Quo pacto etiã fides, & virtutes à charitate formentur, explicare sicut summe utile est, ita non est admodum operosum. Cum enim charitas peculiari singularum virtutum ad specialia

suum bonum inclinationi superaddat relationem, & ordinationem ad summum bonum, & ultimum finem, quod est specificum charitatis objectum, quâ ordinatione cuilibet virtuti statum perfectæ virtutis confert, jure meritò nomen formæ virtutum charitati asseritur, & vindicatur.

Ad cujus profundiorē intelligentiam recolendum est quod aliàs, dum de actibus humanis imperatis, diximus, illud in genere moris habere rationem formæ, à quo actus speciem moralem fortitur; unde ibidem diximus, formam moralem actus imperati, quâ talis, esse finem: ergo illud erit forma fidei, cæterarumque virtutum, à quo fides desumet speciem moralem bonitatis, & honestatis: atqui fides accipit speciem moralem honestatis à charitate ipsam in finem ultimum ordinante: ergo charitas est fidei, cæterarumque virtutum omnium forma, quatenus & fidei, & omnibus virtutibus ordinem ad finem, à quo specificantur actus morales, impertitur. Utrum autem per hujuscemodi informationem charitatis aliquid reale habitui, actibusque fidei, & aliarum virtutum imprimatur, quæstio est magis Philosophica, quàm Theologica. Indigitat tamen S. Doctor *quest. 23. art. 8. & quest. 88. art. 6. hujus 2. 2.* per talem charitatis ordinationem aliquid reale actibus immitti, quatenus affirmat charitatem *imprimere quendam modum actibus*, & actum fidei *meliozem esse, si à charitate imperetur*: quæ major bonitas utique intrinseca est. Et favet ratio: nam vel charitas ordinat actus virtutum naturalium, vel virtutum infusarum: utrisque autem aliquid debere intrinsecum in-

fundi

fundī necesse videtur; naturalibus quidem, cūm per talem ordinationem supernaturales evadant, subindeque intrinseco supernaturalitatis modo affici debeant. Necessaria est etiam realis impressio actibus virtutum infusarum, quia tametsi supernaturales sint, tamen quia reduplicativè ut imperati, transeunt in speciem virtutis imperantis, participatio passiva imperii, & ordinationis charitatis debet in actibus virtutum infusarum relucere, quā & distinctam speciem ingrediantur, & in esse virtutis simpliciter constituentur. Nusquam tamen meminit S. Præceptor aliquid imprimi habitibus, sed expressè loco citato ait, pro tanto charitatem dici formam virtutum, quia dat formam actibus omnium virtutum. Maximè quia non habitus virtutum, sed soli actus in finem charitatis referuntur, & novam speciem induunt. Quin & S. Magister *quæst. 4. art. 4. ad 4.* formaliter docet, fidem formatam, dum sit informis, non mutari: constat autem illam mutatum iri, si quidpiam intrinsecum à charitate recepiſſet.

Dices: Charitas non est nisi forma extrinseca fidei & virtutum, quas dumtaxat dirigit, earumque actus imperat: Atqui forma extrinseca nihil imprimi, sed ejus imperium virtutes infusæ per sympathiam sentiunt, & exequuntur; imò sufficit conjunctio, & in eodem subjecto colligatio, ut actus imperati in finem imperantis referantur: ergo actibus fidei, & virtutum nihil per charitatis informationem infunditur.

Respondeo, quod licet charitas sit forma extrinseca virtutum, effectivè tamen earum actibus induit, quia nedum eos dignificat, sed & movere

movet in finem supernaturalem : sicut licet causa efficiens, sit extrinseca, aliquid tamen reale immittit in passum. Falsum est etiam, per imperium nihil reale imprimi, præsertim cum ex passiva participatione illius actus in aliam speciem migrat. Nec sufficit sola conjunctio, & colligatio, ut actus unius virtutis referatur in finem alterius; sed exigitur positivus influxus, quo actus imperatus in finem imperantis rectè, & realiter dirigatur.

COROLLARIUM IV. *Fides formata, & informis idem sunt habitus.*

Sequitur quartò, fidem formatam & informem non esse distinctos habitus, sed eandem fidem de formata in informem sine intrinseca mutatione transire. Probatur contra Lutheranos, & Calvinistas existimantes fidem non posse à charitate separari, subindeque fidem informem specie distingui à formata, quam solum nomen retinere, & vix mereri volunt. Sed hunc errorem damnat expressè Tridentinum sess. 6. can. 28. sic pronuntians : *Si quis dixerit, amissis per peccatum gratiâ, simul & fidem semper amitti; aut fidem, qua remanet, non esse veram fidem, licet non sit viva; aut eum qui fidem sine charitate habet, non esse Christianum, anathema sit.* Et ratio est, quia fides formata, & informis eatepus duntaxat distinguuntur, quatenus fides formata ad finem charitatis dirigatur, secus fides informis; unde tota, quæ intercedit distinctio, ex eo quod pertinet ad voluntatem,

luntatem derivatur : sed ex illo capite oriri nequit distinctio specifica fidei informis à formata, cum habitus per illud solum possint specie distingui, quod per se ad habitum pertinet: quod autem pertinet ad voluntatem, non per se pertinet ad fidem, sed id tantum, quod ad intellectum spectat, cum fides sit intellectualis perfectio: ergo nulla specifica inter fidem formatam, & informem distinctio interest, sed eadem manet. Maxime quia peccatum mortale, quod non est infidelitas, non destruit rationem formalem obiecti fidei; unde peccator potest elicere actus fidei supernaturalis, sicut ante; potest sperare, & pœnitere; potest & Deum exorare, quæ tamen omnia fidem supponunt. Ergo in peccatoribus remanet eadem fides, tamen non eodem modo, quo eam in justificatione acceperant.

Et certè hanc veritatem tota Scriptura, tota Traditio firmat. Quid enim in sacris Paginis, Sanctorumque monumentis frequentius, quàm sæpè nimis fide manente charitatem deperire? Certè cum Apostolus attestetur, fidem talem, tantamque, quæ ipsos naturâ immobiles ciebat, transferatque montes, sine charitate nihil prodèssè; cùmque Jacobus etiam inculcet fidem sine bonis operibus mortuam esse, profectò supponunt viri illi divini, fidem pereunte etiam charitate permanere. Et certè quis, quæso, esset author novæ illius fidei informis, quæ pereunte charitate adventaret? An homo? Minimè sanè. Cùm enim fides in peccatore perdurans supernaturalis sit, utpote objecto supernaturali, ex motivo pariter supernaturali assentlens, non potest;

test à peccatoris viribus naturalibus, iisque peccato sin corruptis, & extinctis, certè infirmatis, & sauciatis gigni. An à Deo? Multò minùs? Quid enim improbabilius, imò & absurdus dici, aut cogitari potest, quàm Deum homini in peccatum lapsò habitum supernaturalem infundere? Quis sibi facilè persuadeat? peccatum mortale tali dignum esse mercede, cui sola pœna debetur? Verum quidem est aliquando rerum contingere tantam esse peccatoris corruptionem, ut destructâ charitate naufragium patiatur & fides, quia facile est illi non credere, quem non amamus; & proclive est illum infidelitatis inficiari, quem judicem metuimus, & ultorem. Et talis fuit Lutheri perversitas; adeo enim in omniū vitiorum colluvie immersus jacebat, ut fœculentissimi scelerum omnium vapores post extinctam charitatem fidem etiam obscurarint, & tandem penitus oblitterarint. Nihil ergo mirum, si fidem in naufragio charitatis perire crediderit, quia de aliis per semetipsum judicabat; nec putabat fidem posse in quopiam post funus charitatis superesse, qui in se virtutum omnium exterminium expertus fuerat, & ruinam. Sed absit, ut desertori fidei de fide loquenti credamus: absit ut ei fidem adhibeamus, qui Deo fidem detrectavit, & Ecclesiæ.

Sed dices: Quod est mortuum, distinguitur specie ab eo, quod est vivum; sicut distinguitur corpus cadaveris à corpore hominis viventis: sed fides informis mortua est, utpote orbata gratiâ, & charitate, in quibus consistit vita spiritalis: ergo fides formata, & informis specie distinguuntur.

Respon

Respondeo , quod licet in naturalibus, quod mortuum est nequeat fieri vivum, ab eoque specie distinguatur ; secus tamen est in moralibus. Et ratio discriminis est , quia principium vitæ naturalis est forma viventis, quâ desinente, advenit nova forma physica , subindeque nova species ; unde alia necessario est species corporis vivi , & corporis mortui ; cum sit distincta utriusque forma. At verò in moralibus , principium vitæ , & dignitatis moralis est forma extrinsecè informans habitum, qui semper manet essentialiter idem ; ac proinde idem specie habitus modò vivit, modò moritur moraliter , prout ejus actus ad finem charitatis sibi extrinsecum refertur, vel non refertur. Quorum omnium radix est , quia ordo moralis non mutat, sed supponit physicum, & eidem physice actui distincta potest moralitas obvenire : & ratione unius, scilicet bonitatis, actus dicitur vivere ; ratione alterius , scilicet peccati, cui conjungitur, dicitur mori.

Instabis : Gratia sanctificans infusa fideli peccatori , & pœnitenti , non est minoris efficacix quàm dum infunditur infideli è gentilitate converso : sed gratia infusa infideli converso secum defert habitum fidei formatæ : ergo & fideli peccatori habenti solam fidem informem gratia justificationis habitum fidei formatæ largitur : subindeque alia semper est fides informis , alia fides formata.

Respondeo , gratiam sanctificantem infideli converso infundere fidem , fideli verò non infundere , sed aliàs infusam firmare & formare ; non secus ac eadem gratia peccatorem pœnitentem justificat , justo verò collatam justiciam

con

confirmat, & auget. Quauvis enim gratia habitualis sit divinis opima, & fœcunda muneribus, accommodatur tamen, & veluti attemperatur ejus profusio subjecti dispositioni: unde quauvis de se sit & remissiva peccati, & fidei parens; non tamen semper remittit peccatum, vel fidem parit: quia peccatum remissum sæpè invenit, sæpe fidem in Baptismate supponit generatam.

U. gebis: Actus fidei informis nunquam potest fieri actus fidei formatus, ut expresse docet S. Thomas in 4. dist. 17. q. 2. art. 7. *quæst. 3.* his verbis: *Quauvis habitus fidei informis fiat formatus, nunquam tamen actus fidei informis fit actus fidei formatus; quia actus ille transit, & non manet veniente charitate.* Atqui eadem videtur ratio de actu, & de habitu, cum actus sit expressio habitus, & habitus expressio actus; nec facile aliunde appareat ratio disparitatis: ergo habitus fidei informis nunquam potest evadere formatus.

Respondeo nonnullum Thomistam opinari etiam actum fidei informis posse fieri formatum, & S. Doctorem sic interpretari, ut velit doctrinam ejus esse regulariter, & non absolute veram; quia, inquit, non repugnat actum fidei incipere sine charitate, & deinceps usque ad charitatis adventum, quo formabitur, continuari. Sed cum S. Præceptor tam disertè, tamque luculenter affirmet, *nunquam actum fidei informem fieri actum fidei formatum*, evidens est, præfatum interpretamentum esse prorsus à S. Doctoris mente alienum. Nec valet adducta de continuatione instantia; quia quantumlibet continuetur actus.

actus fidei informis, nunquam formatus evadet, nisi à charitate imperetur; si autem à charitate imperatur, jam erit novus actus imperium subsequens charitatis; sicut enim post charitatem fidelis est diversimodè comparatus, ita distincto, & novo modo; distincto, novoque conatu operatur. Ad argumentum ergo dicendum, non parvum interesse discrimen inter actum, & habitum: cum enim actus sit transiens, nec idem permaneat, sed novus eliciatur, dum charitas incipit principari, non mirum si actus informis nunquam formatus sit. At verò habitus est permanens, & naturâ suâ immobilis, qui adveniente charitate non tollitur, sed ornatur; non desinit, sed nova dignitate afficitur, novæ reginæ subjicitur, cujus jussu, & directione formatos, & perfectos edit actus, qui antea non nisi informes, & imperfectos eliciebat.

COROLLARIUM V. Variæ fidei prærogativæ & dotes.

Prima prærogativa: perfectio virtutis fidei.

Sequitur quintò, varias esse dotes fidei eximias, quarum prima est, quod fides formata est virtus simpliciter perfecta. Ille enim habitus virtutis simpliciter nomen, & veritatem obtinet, cujus actus est simpliciter bonus: talis autem est actus fidei formatæ; cum enim actus fidei ab intel

intellectu ex imperio voluntatis procedat, duo necessario requiruntur, ut actus fidei sit simpliciter bonus: primò, ut intellectus infallibiliter tendat, & assequatur suum bonum, quod est verum: secundò, ut in ultimum finem, qui prima est totius bonitatis mensura, rectè dirigatur: sed actus fidei formatæ utrumque habet; nam ex propria quidem ratione assensus semper ita fertur in verum, ut illi nunquam subesse falsum ullum possit; ex hoc verò, quod est à charitate formatus, seu imperatus, in ultimum finem summum scilicet bonum summè dilectum movetur: ergo fides formata est virtus simpliciter.

Dixi, *Fides formata*; fateor enim, fidem informem non esse virtutem, nisi secundum quid, cum non habeat omnem quam exigit, tam ex parte intellectus, quam voluntatis perfectionem, cum orbata charitatis directione non referatur in ultimum finem. Quia ratione temperantiæ in concupiscibili existens, absente à parte rationali prudentiâ, à perfectæ virtutis ratione deficit. Sicut enim perfectio actus temperantiæ ideo pendet à prudentia, quia est actus partis concupiscibilis, ut subest rationi; ita cumulata actus fidei perfectio à charitate pendeat necessum est, cum sit actus intellectus ut moti à voluntate. Actus enim per se à duobus dependens, consummatam, quam connaturaliter exigit, perfectionem non consequitur, nisi utriusque lineæ perfectionem fortiatur: assentiri autem veritatibus supernaturalibus, actus est ab intellectu simul, & à voluntate pendens, ut postea demonstrabitur. Accedit, quod tunc solum actus virtutis est simpliciter bonus, subindeque habitus illum eliciens
simplici

simpliciter virtus, cum debito modo fit; Deus enim non tam quærit verba, quam adverbia, ut ait Granatenſis; nec tam quantum, quam ex quanto, ut ait Gregorius Magnus. Sed actus fidei informis non bene, nec debito modo fit: actus enim fidei eſt aſſentiri rebus revelatis ex pia motione voluntatis; voluntas autem ſine charitate verè pia dici nequit, nec rectè movere alias potentias ſuo imperio poteſt, quia ut ait Auguſt. lib. 14. de civit. cap. 5. *Omnis rectus voluntatis motus ex recto amore procedit.* Ergo fides charitate deſtituta non eſt verè, & ſimpliciter virtus.

Dices cum Durando: Virtus perfectæ eſt habitus conferens potentiæ ultimum perfectionis gradum actui connaturaliter debitum; definitur enim ultimum potentiæ: ſed fides formata minimè confert intellectui cumulatam illum perfectionis gradum, quem habere natus eſt; non enim præſtat evidentem cognitionem, quam tamen intellectus naturaliter concupiſcit: ergo fides etiam formata, non eſt virtus ſimpliciter, ſed ſecundùm quid; quatenus elicit actum ab imperio charitatis moralem, & chriſtianam bonitatem haurientem.

Reſpondeo, hoc argumento probari quidem, fidem non eſſe virtutem intellectualem, ut ſæpiſſimè docet D. Thomas, ſubtiliter & accuratè diſtinguens inter virtutem intellectualem, & virtutem intellectus. Neque enim ſufficit ad rationem virtutis intellectualis, ut ſubjectivè recipiatur in intellectu, per eamque cognoscatur verum; ſed oportet actum, quo verum conſideratur, eſſe ex modo agendi perfectum, ut ſcilicet
veritas

veritas benè, & conspicuè percipiatur; in hoc enim situm est intellectus bonum: intellectum autem benè, & clarè objectum suum intelligere, non inde provenit, quod ejus operatio ex bonæ voluntatis, & dirigentis charitatis imperio procedat; sed ex plenitudine, & efficacia luminis objectum in se clarè, & intuitivè conspicientis, vel in principium manifestum resolventis. Ergo ut fides dicatur virtus intellectualis, non solum per eam debet cognosci verum, sed opus esset ut actus fidei, quo verum consideratur, foret ex modo intelligendi perfectus: Atqui licet fides per actum suum ponat intellectum in ultimo potentia, quantum ad objectum, in quantum facit assentiri primæ veritati; non tamen quantum ad modum proprium ipsius intellectus, qui per fidem id non consequitur, ut id quod credit, inspicere per se possit, vel ad ea quæ inspicit, reducere: ergo fides non est virtus intellectualis, neque moralis, sed theologica, in intellectu tamen residens. Non tamen desinit esse virtus simpliciter, & in vero sensu ultimum potentia, cum constituat intellectum in ultima perfectione supernaturali, quam in via habere natus est, determinando ipsum ad verum supernaturale infallibiliter attingendum.

Insistit Durandus: Fides non est magis virtus simpliciter conjuncta charitati, quàm ab ea distincta; nec assentiri vero supernaturali intrinsecè perfectius est cum charitate, quàm sine charitate, ex charitate enim actus fidei nullam recipit intrinsecam perfectionem ad genus cognitionis pertinentem, sed solum moralem in finem ultimum habitudinem: perfectio autem actus
non

non ex quocumque pensanda est, sed ex rationibus intrinsecis, aliàs actus opinionis à charitate imperatus, ex eaque rationem meritorii derivans, efficeret opinionem esse virtutem simpliciter: ergo vel fides informis est virtus simpliciter, vel formata non est virtus simpliciter.

Respondeo, hoc argumento ad summum convinci, fidem à charitate quoad substantiam actus non pendere, cum absque ea perfectionem intellectualem obtineat; sed minimè effici, fidem in ratione virtutis simpliciter, & quoad esse, statumque perfectum à charitate nequaquam pendere, cum ut aliàs ex D. Thoma vidimus, solus ille bonus simpliciter dicendus est, qui bonam habet voluntatem. Sed adhuc melius, & profundius dici potest, quod quia actus fidei est actus intellectus ut moti à voluntate ad suam essentialis perfectionis complementum, & ut ita dicam, coronamentum, non solà intellectualis ordinis sibi ingentia perfectione contentus est, sed ulteriorem exigit cumulum perfectionis, quàm in ratione mobilis à voluntate perficiatur; quæ sanè perfectio per se illi debita est, cum actus fidei ex intimis naturæ suæ visceribus, & rationibus caracteristicis à pio moventis voluntatis impulsu dependeat. Unde patet, quàm toto cælo fides ab opinione discrepet; assensus enim probabilis ex verisimilibus argumentis naturaliter fluit, nec speciali voluntatis motione, sicut actus fidei, eget. Maximè quia opinioni quocumque modo consideratæ, & quamlibet à charitate imperatæ, ratio virtutis competere nullatenus potest, quia firmitatis ad virtutem essentialiter requisitæ incapax est.

Secunda

Secunda fidei dos, primatus virtutum.

Secunda prærogativa fidei est, quod sit prima inter omnes virtutes; per accidens tamen nonnullæ virtutes possunt esse fide priores. Ratio est, quia ex una parte virtutes theologicæ sunt per se cæteris omnibus priores, non quidem tempore, sed naturâ; cum enim finis in moralibus sit primam agibilium principium, necesse est virtutes theologicas circa ultimum finem immediatè occupatas esse cæteris omnibus anteriores: atqui fides est inter theologicas virtutes prima; finis quippe ultimus prius debet intellectui, quàm voluntati allucere, cum nihil sit volitum, quin præcognitum: finis autem ultimus per fidem objicitur intellectui, eique præsens est; sicut per spem & charitatem voluntati adest: ergo fides virtutes theologicas, & consequenter alias omnes infusas prioritate originis antecedit. Per accidens tamen cæteris quibusdam virtutibus nonnulla primatus ratio convenit, quatenus remonent impedimenta credendi; quod teste Philosopho 8.*Physic.* ad causam per accidens pertinet. Sic fortitudo removet timorem fidei arduitatem, & difficultatem formidantem. Sic humilitas superbiam intellectum in obsequium fidei captivare recusantem domat; quanvis, ut verum fatear, nec illæ, nec aliæ ullæ virtutes veræ virtutis nomen mereantur, nec essentiam perfectè obtineant, nisi suppositâ fide, ut fusè probat August. *libro 4. cont. Iul. cap. 3.*

Dices: Hæc doctrina superiori confectario
adver

adversatur; si enim actus credendi dependeat à voluntate charitate informatâ, ut sit actus virtutis simpliciter, necesse est charitatem esse fide priorem; & ideo charitas radix omnium virtutum appellatur, juxta illud Ephes. 3. *In charitate radicati, & fundati.*

Respondeo ex D. Thoma 1. 2. *quest. 62. art. 4.* duplicem esse ordinem, generationis scilicet & perfectionis: ordine generationis imperfectum præcedit perfectum, putà materia formam; ordine verò perfectionis perfectum præcedit imperfectum, ut istud perficiat. Primo modo fides est prior charitate; impossibile enim est, voluntatem motu charitatis ferri in Deum authorem supernaturalem, nisi præcognitum per fidem. Cæterum ordine perfectionis charitas præcedit fidem, quia fides per charitatem formatur, ab eaque statum, modum, & perfectionem virtutis simpliciter mutuatur.

Instabis: Ad actum fidei pia exigitur motio voluntatis, ut postea patebit: sed amor charitatis est principium omnis pii motus, & affectus: ergo prius debet esse amor charitatis in voluntate, quàm assensus fidei in intellectu.

Respondeo, charitatem esse principium omnis pii motus pietate meritoria, & perducente ad vitam æternam: cæterum multi alii possunt in voluntate suboriri affectus beneficio auxilii Dei moventis, & gratiæ actualis; quod ad primum fidei actum eliciendum Deus in nobis sine nobis operatur. Certè cum videamus fidem pereunte charitate subsistere, & in varios actus prorumpere, ad quos omnes pia illa voluntatis motio desideratur, manifestè relinquitur, motionem

illam non semper à charitate procedere, sed ab auxilio transeunte inspirari.

Urgebis: Esto illa motio possit in voluntate sine charitate nasci, non tamen sine obedientia captivante, & subjiciente intellectum in obsequium fidei: ergo non effugimus, quin detur virtus obedientiæ fide prior, etiam ordine generationis.

Respondet, obedientiam dupliciter accipi posse: Primò pro inclinatione generali voluntatis ad superiorum implenda mandata, & sic non est specialis virtus, sed conditio generalis omnium virtutum, quæ cum cadant sub lege, ut dicitur 1. 2. *Thom.* 100. *Art.* 2. inclinatur etiam ad legem, cui subduntur, implendam. Secundò accipitur obedientia pro speciali inclinatione implendi mandata ratione debiti. & hoc quidem modo obedientia est specialis virtus, pariter iustitiæ reddens debitum legitimo superiori. & carnalis in iustificatione immanatur: sed hoc ratione sequitur fidem manifestantem Deum esse superiorem, cui ultro parendum, cui fideliter obtemperandum, cuique servire regnare est.

Tertia fidei prerogativa, certitudo.

Tertia excellentiæ fidei cunctis est certitudo & firmitas adhesionis, quam circa objecta revelata intellectui patet, qui divinarum rationum pondere ita convincitur, ut possit evidenter dicere, se non posse produci talem veritatem in dubium revocare. Quæ hæc fidei certitudo tanta est, ut omnibus virtutibus intellectualibus præstet certissimis, & nobilissimis, certitudo & firmitate simpliciter antecellat, quidquid

contrarium sentiat Durandus in 3. *distinct.* 23. *quest.* 4.

Ratio est, quia omnes virtutes intellectuales sunt prudentia, ars, sapientia, scientia, & intellectus principiorum; quæ tres posteriores possunt esse dona Spiritus sancti. Atqui illis omnibus virtutibus fides est simpliciter certior. Et quidem de prudentia, & arte nemo ambigere potest, cum istæ versentur circa contingentia, quæ se aliter quotidie habent; fides verò circa æterna, quæ aliter se habere non possunt, occupetur. De aliis autem tribus, sapientia scilicet, scientia, & intellectu, prout sunt dona Spiritus sancti, nullum etiam dubium esse potest. Sic enim consideratæ hujusmodi virtutes comparantur ad fidem sicut ad principium, quod præsupponunt; unde tota hujusmodi donorum certitudo ex certitudine fidei derivatur, non secus ac certitudo cognitionis conclusionum à certitudine cognitionis principiorum promanat. Restat ergo solum, ut probemus, fidem sapientiâ, scientiâ, & intellectu principiorum, ut sunt virtutes naturales, certitudine præstare.

Et sic efficaciter monstratur. Cum certitudo formalis sit firmitas adhæisionis circa objectum verum, & assensus immobilis ex necessaria connexionione cognitionis cum veritate objecti non valentis aliter se habere; illa cognitio erit certior, illeque assensus immobilior, qui habent majorem causam, majusque motivum suæ firmitatis, & adhæisionis. Atqui fides majorem habet causam, & motivum efficacius suæ firmitatis, & adhæisionis; fides namque innititur liviæ veritati revelanti, tres autem prædictæ virtutes naturales uni rationi humanæ, ran-

quam soli firmitatis suæ fundamento innixæ sunt. Patet autem ; veritatem divinam revelantem , motivum esse omni humana ratione firmitus , & securius. Ergo fidei certitudo omnium naturalium virtutum certitudini simpliciter , & per se antecellit. Dico *simpliciter* , & *per se* , quia secundum quid talis certitudo minor quadantenus dici potest , quatenus minus fortassis est sensibilis , & intellectus solet ea plenius , suavius , & facilius consequi , quæ vires ejus non excedunt , & evidentiae radiis vestita sibi per se lucent : Unde etiam non obstante fidei inconcussa firmitate , quosdam dubitationis motus patitur fidelis , quatenus veritates tam sublimes , & captum suum adeo excedentes non plenè consequitur. Cæterum attentâ re in se , & fide secundum principia , & motiva considerata (ex quo capite pensanda est natura , & certitudo habituum ,) simpliciter , & absolute dicendum est , habitum fidei cæteris omnibus naturalibus certitudine , & firmitudine præcellere. Unde Petrus capite 1. suæ secundæ epistolæ comparans propheticum sermonem (qui est sermo fidei , cum eum appellet lucernam lucentem in caliginoso loco , donec dies elucescat ;) comparans , inquam , illum cum visione oculorum , & auditu aurium , quibus utique convenit evidentia , ait tamen : *Habemus firmiorem propheticum sermonem*. Et D. August. *lib. 7. confess. cap. 10.* veritate & certitudine fidei persuasus asserit : *Facilius dubitarem vivere me* (quæ veritas inter naturales omnium evidentissimè percipitur , imò est omnium aliarum fundamentum manifestâ experienciâ comperitum ,) *quàm esse vera qua audiivi*. D. etiam Chry

Chrysostom. hom. 12. in epist. ad Hebr. *Fides*, inquit, *dici non potest, nisi cum circa ea, qua non videntur, amplius quam circa ea qua videntur, certitudinem quis habeat.* Ergo supponunt sacri Doctores, fidem intellectui majorem imperitari firmitatem, & immobilitatem eâ, quæ à scientia, sapientia, intellectu, & ipsa sensuum clarissima experientia proficiscitur, ideoque appellant fidem auroram gloriæ, & illam crepusculum futuræ visionis dixit Guillelmus Parisiensis, quia soli beatæ visioni cedit.

Confirmatur amplius: Intellectus fidelis, quamvis veritatem objectivam non videat, videt tamen motivum credendi esse firmitus, quam sit omnis evidentia, & experientia naturalis: videt etiam assensum suum quâmlibet obscurum inniti veritati, quæ nec falli, nec fallere potest: experitur etiam in se piam voluntatis motionem ingeneratam à Spiritu sancto, firmiore utique causa, quam sit intelligentia naturalis: videt etiam, quod licet de objectis virtutum naturalium præfatarum non possit prudenter dubitare, tamen convincitur minùs debere se de objecto fidei dubitare; unde paratus est illa potius, quam ista in dubium revocare; paratum est omni experientiæ contradicere, omnem rationem inficiari, omnem demonstrationem floccifacere, quàm tantillum de fidei veritate dubitare, vel suspicari, ut patet in mysterio Eucharistiæ, in quo quidquid reclamant sensus, quidquid repugnet ratio, constanter tamen, & intrepidè negat remanere substantiam panis, & Christum sub qualibet particula integrum venerabundus adorat. Quorum omnium radix est, quia divinum testimonium,

intellectu ex imperio voluntatis procedat, duo necessario requiruntur, ut actus fidei sit simpliciter bonus: primò, ut intellectus infallibiliter tendat, & assequatur suum bonum, quod est verum: secundò, ut in ultimum finem, qui prima est totius bonitatis mensura, rectà dirigatur: sed actus fidei formatæ utrumque habet; nam ex propria quidem ratione assensus semper ita fertur in verum, ut illi nunquam subesse falsum ullum possit; ex hoc verò, quod est à charitate formatus, seu imperatus, in ultimum finem summum scilicet bonum summè dilectum movetur: ergo fides formata est virtus simpliciter.

Dixi, *Fides formata*; fateor enim, fidem informem non esse virtutem, nisi secundum quid, cum non habeat omnem quam exigit, tam ex parte intellectus, quam voluntatis perfectionem, cum orbata charitatis directione non referatur in ultimum finem. Quia ratione temperantia in concupiscibili existens, absente à parte rationali prudentiâ, à perfectæ virtutis ratione deficit. Sicut enim perfectio actus temperantiæ ideo pendet à prudentia, quia est actus partis concupiscibilis, ut subest rationi; ita cumulata actus fidei perfectio à charitate pendeat necessum est, cum sit actus intellectus ut moti à voluntate. Actus enim per se à duobus dependens, consummatam, quam connaturaliter exigit, perfectionem non consequitur, nisi utriusque lineæ perfectionem fortiatur: assentiri autem veritatibus supernaturalibus, actus est ab intellectu simul, & à voluntate pendens, ut postea demonstrabitur. Accedit, quod tunc solum actus virtutis est simpliciter bonus, subindeque habitus illum eliciens
simplici

simpliciter virtus, cum debito modo fit; Deus enim non tam quærit verba, quam adverbia, ut ait Granatenſis; nec tam quantum, quam ex quanto, ut ait Gregorius Magnus. Sed actus fidei informis non bene, nec debito modo fit: actus enim fidei est assentiri rebus revelatis ex pia motione voluntatis; voluntas autem sine charitate verè pia dici nequit, nec rectè movere alias potentias suo imperio potest, quia ut ait Auguſt. lib. 14. de civit. cap. 5. *Omnis rectus voluntatis motus ex recto amore procedit.* Ergo fides charitate destituta non est verè, & simpliciter virtus.

Dices cum Durando: Virtus perfecta est habitus conferens potentiæ ultimum perfectionis gradum actui connaturaliter debitum; definitur enim ultimum potentiæ: sed fides formata minime confert intellectui cumulatam illum perfectionis gradum, quem habere natus est; non enim præstat evidentem cognitionem, quam tamen intellectus naturaliter concupiscit: ergo fides etiam formata, non est virtus simpliciter, sed secundum quid; quatenus elicit actum ab imperio charitatis moralem, & christianam bonitatem haurientem.

Respondeo, hoc argumento probari quidem, fidem non esse virtutem intellectualem, ut sæpiſſimè docet D. Thomas, subtiliter & accuratè distinguens inter virtutem intellectualem, & virtutem intellectus. Neque enim sufficit ad rationem virtutis intellectualis, ut subjectivè recipiatur in intellectu, per eamque cognoscatur verum; sed oportet actum, quo verum consideratur, esse ex modo agendi perfectum, ut scilicet
veritas

veritas benè, & conspicuè percipiatur; in hoc enim situm est intellectus bonum: intellectum autem benè, & clarè objectum suum intelligere, non inde provenit, quod ejus operatio ex bonæ voluntatis, & dirigentis charitatis imperio procedat; sed ex plenitudine, & efficacia luminis objectum in se clarè, & intuitivè conspicientis, vel in principium manifestum resolventis. Ergo ut fides dicatur virtus intellectualis, non solum per eam debet cognosci verum, sed opus esset ut actus fidei, quo verum consideratur, foret ex modo intelligendi perfectus: Atqui licet fides per actum suum ponat intellectum in ultimo potentia, quantum ad objectum, in quantum facit assentiri primæ veritati; non tamen quantum ad modum proprium ipsius intellectus, qui per fidem id non consequitur, ut id quod credit, inspicere per se possit, vel ad ea quæ inspicit, reducere: ergo fides non est virtus intellectualis, neque moralis, sed theologica, in intellectu tamen residens. Non tamen desinit esse virtus simpliciter, & in vero sensu ultimum potentia, cum constituat intellectum in ultima perfectione supernaturali, quam in via habere natus est, determinando ipsum ad verum supernaturale infallibiliter attingendum.

Insistit Durandus: Fides non est magis virtus simpliciter conjuncta charitati, quam ab ea distincta; nec assentiri vero supernaturali intrinsecè perfectius est cum charitate, quam sine charitate, ex charitate enim actus fidei nullam recipit intrinsecam perfectionem ad genus cognitionis pertinentem, sed solum moralem in finem ultimum habitudinem: perfectio autem actus
non

non ex quocumque penſanda eſt, ſed ex rationibus intraneis, aliàs actus opinionis à charitate imperatus, ex eaque rationem meritorii derivans, efficeret opinionem eſſe virtutem ſimpliciter: ergo vel fides informis eſt virtus ſimpliciter, vel formata non eſt virtus ſimpliciter.

Reſpondeo, hoc argumento ad ſummum convinci, fidem à charitate quoad ſubſtantiam actus non pendere, cùm abſque ea perfectionem intellectualem obtineat; ſed minimè effici, fidem in ratione virtutis ſimpliciter, & quoad eſſe, ſtatumque perfectum à charitate nequaquam pendere, cùm ut aliàs ex D. Thoma vidimus, ſolus ille bonus ſimpliciter dicendus eſt, qui bonam habet voluntatem. Sed adhuc melius, & profundius dici poteſt, quod quia actus fidei eſt actus intellectus ut moti à voluntate ad ſuam eſſentialis perfectionis complementum, & ut ita dicam, coronamentum, non ſolà intellectualis ordinis ſibi ingeniſſimè perfectione contentus eſt, ſed ulteriorem exigit cumulum perfectionis, quâ in ratione mobilis à voluntate perficiatur; quæ ſanè perfectio per ſe illi debita eſt, cùm actus fidei ex intimis naturæ ſuæ viſceribus, & rationibus characteriſticis à pio moventis voluntatis impulſu dependeat. Unde patet, quàm toto cœlo fides ab opinione diſcrepet; aſſenſus enim probabilis ex veriſimilibus argumentis naturaliter fluit, nec ſpeciali voluntatis motione, ſicut actus fidei, eget. Maximè quia opinioni quocumque modo conſideratæ, & quamlibet à charitate imperatæ, ratio virtutis competere nullatenus poteſt, quia firmitatis ad virtutem eſſentialiter requiſitæ incapax eſt.

Secunda

Secunda fidei dos, primatus virtutum.

Secunda prærogativa fidei est, quod sit prima inter omnes virtutes; per accidens tamen nonnullæ virtutes possunt esse fide priores. Ratio est, quia ex una parte virtutes theologicæ sunt per se cæteris omnibus priores, non quidem tempore, sed naturâ; cùm enim finis in moralibus sit primum agibile principium, necesse est virtutes theologicas circa ultimum finem immediatè occupatas esse cæteris omnibus anteriores: atqui fides est inter theologicas virtutes prima; finis quippe ultimus prius debet intellectui, quàm voluntati allucere, cùm nihil sit volitum, quin præcognitum: finis autem ultimus per fidem objicitur intellectui, eique præsens est; sicut per spem & charitatem voluntati adest: ergo fides virtutes theologicas, & consequenter alias omnes infusas prioritate originis antecedit. Per accidens tamen cæteris quibusdam virtutibus nonnulla primatus ratio convenit, quatenus remonent impedimenta credendi; quod teste Philosopho 8. *Physic.* ad causam per accidens pertinet. Sic fortitudo remouet timorem fidei arduitatem, & difficultatem formidantem. Sic humilitas superbiam intellectum in obsequium fidei captivare recusantem domat; quanvis, ut verum fatear, nec illæ, nec aliæ ullæ virtutes veræ virtutis nomen mereantur, nec essentiam perfectè obtineant, nisi suppositâ fide, ut fusè probat August. *libro 4. cont. Iul. cap. 3.*

Dices: Hæc doctrina superiori confectario
adver

adversatur; si enim actus credendi dependeat à voluntate charitate informatâ, ut sit actus virtutis simpliciter, necesse est charitatem esse fide priorem; & ideo charitas radix omnium virtutum appellatur, juxta illud Ephes. 3. *In charitate radicati, & fundati.*

Respondeo ex D. Thoma 1. 2. *quest. 62. art. 4.* duplicem esse ordinem, generationis scilicet & perfectionis: ordine generationis imperfectum præcedit perfectum, putà materia formam; ordine verò perfectionis perfectum præcedit imperfectum, ut istud perficiat. Primo modo fides est prior charitate; impossibile enim est, voluntatem motu charitatis ferri in Deum authorem supernaturalem, nisi præcognitum per fidem. Cæterum ordine perfectionis charitas præcedit fidem, quia fides per charitatem formatur, ab eaque statum, modum, & perfectionem virtutis simpliciter mutuatur.

Instabis: Ad actum fidei pia exigitur motio voluntatis, ut postea patebit: sed amor charitatis est principium omnis pii motus, & affectus: ergo prius debet esse amor charitatis in voluntate, quàm assensus fidei in intellectu.

Respondeo, charitatem esse principium omnis pii motus pietate meritoria, & perducente ad vitam æternam: cæterum multi alii possunt in voluntate suboriri affectus beneficio auxilii Dei moventis, & gratiæ actualis; quod ad primum fidei actum eliciendum Deus in nobis sine nobis operatur. Certè cum videamus fidem pereunte charitate subsistere, & in varios actus prorumpere, ad quos omnes pia illa voluntatis motio desideratur, manifestè relinquitur, motionem

illam non semper à charitate procedere, sed ab auxilio transeunte inspirari.

Urgebis: Esto illa motio possit in voluntate sine charitate innasci, non tamen sine obedientia captivante, & subjiciente intellectum in obsequium fidei: ergo non effugimus, quin detur virtus obedientiæ fide prior, etiam ordine generationis.

Respondeo, obedientiam dupliciter accipi posse: Primò pro inclinatione generali voluntatis ad superiorum implenda mandata, & sic non est specialis virtus, sed conditio generalis omnium virtutum, quæ cum cadant sub lege, ut dicitur 1.2. *quest.100. art.2.* inclinantur etiam ad legem, cui subduntur, implendam. Secundò accipitur obedientia pro speciali inclinatione implendi mandata ratione debiti, & hoc quidem modo obedientia est specialis virtus, parsque justitiæ reddens debitum legitimo superiori, & cum aliis in justificatione infunditur: sed hac ratione sequitur fidem manifestantem Deum esse superiorem, cui ultrò parendum, cui fideliter obtemperandum, cuique servire regnare est.

Tertia fidei prerogativa, certitudo.

Tertia excellentia fidei eximia est certitudo, & firmitas adhesionis, quam circa objecta revelata intellectui parit, qui divinæ authoritatis pondere ita convincitur, ut possit evidenter judicare, se non posse prudenter talem veritatem in dubium revocare. Quæ sanè fidei certitudo tanta est, ut omnibus virtutibus intellectualibus, quàmlibet certissimis, & notissimis, certitudine, & firmitate simpliciter antecellat, quidquid in
con

contrarium sentiat Durandus in 3. distinct. 23. quæst. 4.

Ratio est, quia omnes virtutes intellectuales sunt prudentia, ars, sapientia, scientia, & intellectus principiorum; quæ tres posteriores possunt esse dona Spiritus sancti. Atqui illis omnibus virtutibus fides est simpliciter certior. Et quidem de prudentia, & arte nemo ambigere potest, cum istæ versentur circa contingentia, quæ se aliter quotidie habent; fides verò circa æterna, quæ aliter se habere non possunt, occupetur. De aliis autem tribus, sapientia scilicet, scientia, & intellectu, prout sunt dona Spiritus sancti, nullum etiam dubium esse potest. Sic enim consideratæ hujusmodi virtutes comparantur ad fidem sicut ad principium, quod præsupponunt; unde tota hujusmodi donorum certitudo ex certitudine fidei derivatur, non secus ac certitudo cognitionis conclusionum à certitudine cognitionis principiorum promanat. Restat ergo solum, ut probemus, fidem sapientiâ, scientiâ, & intellectu principiorum, ut sunt virtutes naturales, certitudine præstare.

Et sic efficaciter monstratur. Cum certitudo formalis sit firmitas adhæSIONIS circa objectum verum, & assensus immobilis ex necessaria connexionione cognitionis cum veritate objecti non valentis aliter se habere; illa cognitio erit certior, illeque assensus immobilior, qui habent majorem causam, majusque motivum suæ firmitatis, & adhæSIONIS. Atqui fides majorem habet causam, & motivum efficacius suæ firmitatis, & adhæSIONIS; fides namque innititur divinæ veritati revelanti, tres autem prædictæ virtutes naturales uni rationi humanæ, tan-

quam soli firmitatis suæ fundamento innixæ sunt. Patet autem ; veritatem divinam revelantem , motivum esse omni humana ratione firmitus , & securius. Ergo fidei certitudo omnium naturalium virtutum certitudini simpliciter , & per se antecellit. Dico *simpliciter* , & *per se* , quia secundum quid talis certitudo minor quadantenus dici potest , quatenus minùs fortassis est sensibilis , & intellectus solet ea plenius , suavius , & facilius consequi , quæ vires ejus non excedunt , & evidentia radiis vestita sibi per se lucent : Unde etiam non obstante fidei inconcussa firmitate , quosdam dubitationis motus patitur fidelis , quatenus veritates tam sublimes , & captum suum adeo excedentes non plenè consequitur. Cæterum attentâ re in se , & fide secundum principia , & motiva considerata (ex quo capite pensanda est natura , & certitudo habituum ,) simpliciter , & absolute dicendum est , habitum fidei cæteris omnibus naturalibus certitudine , & firmitudine præcellere. Unde Petrus capite 1. suæ secundæ epistolæ comparans propheticum sermonem (qui est sermo fidei , cum eum appellet lucernam lucentem in caliginoso loco , donec dies elucescat ;) comparans , inquam , illum cum visione oculorum , & auditu aurium , quibus utique convenit evidentia , ait tamen : *Haben. ut firmiorem propheticum sermonem.* Et D. August. lib. 7. *confess. cap. 10.* veritate & certitudine fidei persuasus asserit : *Facilius dubitare me vivere me* (quæ veritas inter naturales omnium evidentissimè percipitur , imò est omnium aliarum fundamentum manifestâ experienciâ comper- tum ,) *quàm esse vera qua audiivi.* D. etiam Chry

Chrysostom. hom. 12. in epist. ad Hebr. *Fides*, inquit, *dici non potest, nisi cum circa ea, qua non videntur, amplius quam circa ea qua videntur, certitudinem quis habeat.* Ergo supponunt sacri Doctores, fidem intellectui majorem imperitari firmitatem, & immobilitatem eâ, quæ à scientia, sapientia, intellectu, & ipsa sensuum clarissima experientia proficiscitur, ideoque appellant fidem auroram gloriæ, & illam crepusculum futuræ visionis dixit Guillelmus Parisiensis, quia soli beatæ visioni cedit.

Confirmatur amplius: Intellectus fidelis, quamvis veritatem objectivam non videat, videt tamen motivum credendi esse firmitus, quam sit omnis evidentiâ, & experientia naturalis: videt etiam assensum suum quâmlibet obscurum inniti veritati, quæ nec falli, nec fallere potest: experitur etiam in se piam voluntatis motionem ingeneratam à Spiritu sancto, firmiore utique causa, quam sit intelligentia naturalis: videt etiam, quod licet de objectis virtutum naturalium præfatarum non possit prudenter dubitare, tamen convincitur minùs debere se de objecto fidei dubitare; unde paratus est illa potius, quam ista in dubium revocare; paratum est omni experientiæ contradicere, omnem rationem inficiari, omnem demonstrationem floccifacere, quam tantillum de fidei veritate dubitare, vel suspicari, ut patet in mysterio Eucharistiæ, in quo quidquid reclamant sensus, quidquid repugnet ratio, constanter tamen, & intrepidè negat remanere substantiam panis, & Christum sub qualibet particula integrum venerabundus adorat. Quorum omnium radix est, quia divinum testimonium,

quod est infallibile , sufficienter applicatum , & apprehensum majorem confert menti securitatem , majoremque proinde causat firmitatem , quàm quæcumque ratio naturalis : per fidem autem sufficienter applicatur divinum testimonium ; unde , ut dixi , Philosophus Christianus putans se habere demonstrationem metaphysicam , vel mathematicam de aliqua veritate , promptus est , & paratus de sua demonstratione dubitare , si fides imperaret. Ergo per se assensus fidei est in nobis efficacior ad tollendas dubitationes , subindeque nos reddit magis certos. Inanis enim foret fidei certitudo , si nunquam illam intellectui conferret. Maxime quia habitus est dispositio habentis in ordine ad objectum : ergo in tantum habitus est certior , in quantum objectum fit certius habenti talem habitum ; & certitudo formalis non attenditur , nisi penes modum & firmitatem , quam ponit habitus in habente.

Sed dices : D. ipse Thomas ait , fidem non esse certiozem quoad nos , & ex parte subjecti : ergo ruit tota illa structura rationum , quam ad stabiliendam fidei certitudinem munivimus.

Respondeo , omissis variis solutionibus , vel falsis , vel ab Angelici Præceptoris mente peregrinis , sensum S. Doctoris esse , fidem esse certiozem secundum se , idest secundum causam , & motivum , quod ex propria ratione majorem certitudinem conferre natum est , & communiter magis confert , quàm motivum scientiarum naturalium. Quod si interdum talem securitatem , & sensibilem firmitatem non præstet , non id ex defectu motivi provenit , sed defectu subjecti,

subiecti, cui non debite motivum fidei applicatur. Unde advertenter oculatissimus Doctor non dixit, fidem esse minus certam quoad nos, quia minus certos nos reddit; frustra enim esset ei asserendi tanta certitudo, si eam non conferret: frustra daretur forma, nisi daretur simul ejus effectus formalis; & falso etiam scriberet Augustinus, se magis esse certum de fidei veritatibus, quam de propriæ vitæ sensu; sed ideo dixit S. Thomas, fidem esse minus certam quoad nos; *quia, inquit, intellectus non tam bene consequitur res fidei*, ob mysteriorum celsitudinem, & reconditarum veritatum supernaturalitatem, sicut consequitur veritates naturales. Quod sane idem est, ac si diceret, fidem non esse minus certam quoad assensum, sed duntaxat quoad evidentiam, quâ objectum consequimur, & veluti suaviter ejus veritate fruimur. Et bene observat noster Labat, Divum Thomam non dixisse, assensum fidei esse minus certum quoad nos, sed ea quæ sunt fidei, esse minus certa quoad nos, idest minus clara, minusque sensibilia. Hanc suam esse mentem, disertè, & luculenter demonstrat sui interpres D. Thomas in 3. d. st. 23. quæst. 2. art. 2. quæst. 3. ad 2. dicens: *Veritas prima, sive Deus, cui creditur, habet majorem firmitatem, quam lumen intellectus humani, in quo conspiciuntur principia, vel ratio humana, secundum quam conclusiones in principium resolvuntur: & ideo fides habet majorem certitudinem quantum ad firmitatem adhesionis, quam sit certitudo scientiæ, vel intellectus, quanvis in scientiâ, vel intellectu sit major evidentia eorum, quibus assentit.* Quibus verbis nihil ad evacuandam difficultatem est clarius.

Nec opus est recurrere ad distinctionem Gonetii distinguentis certitudinem fidei in nobis, & certitudinem quoad nos; hæc enim distinctio videtur merus cavillus: si enim fides sit certior in nobis, quomodo non quoad nos? Loca verò D. Thomæ, quæ congerit, ab ipso met S. Doctore explicantur, qui declarat res scitas esse certiores quoad nos creditis certitudine evidentie sensibilis, non assensus immobilis, & adhesionis firmissimæ.

Instabis cum Durando: Fides non habet majorem adhesionem scientiæ, sapientiæ, & intellectu principiorum: ergo non habet, nec confert majorem certitudinem formalem. Probatur antecedens. Illi firmitus adhæremus, à quo difficilius recedimus; & ille assensus est firmior, qui est dubitationi impermixtior: Atqui facilius recedunt à fide fideles, quàm à veritate scientificè nota Philosophi, ut nimis frequenti experientiâ compertum habemus; scientia etiam nullam compatitur dubitationem, cujus motus saltem indeliberatos fideles experiuntur, aut patiuntur: ergo fides non est ullatenus tribus præfatis virtutibus intellectualibus firmior, & certior.

Respondeo, hoc argumento probari solum quod diximus, scilicet fidem ex parte subjecti, & per accidens minùs sensibilem, & suavem habere, & conferre certitudinem; quia cum non conferat evidentiam, nec conspicuam exhibeat veritatem, non omnes semper in aliquibus infirmis excludit dubitationis involuntarios motus. Nec obest funesta experientia eorum, qui interdum à fide recedunt; nam nihil mirum, si amittant certitudinem fidei, qui fidem

fidem perdunt. Et illis etiam opponimus infinitos utriusque sexus animos interritos, quos à recta in Deum fide nec argumenta, nec tormenta tantisper dimovere unquam potuerunt. De certitudine autem fidei judicandum est non ex apostatarum infidelitate non rarò è corruptione vitiorum orta, sed ex generosa intrepidorum Christianorum constantia, quam non dicam labefactare, sed ne quidem concutere vires ullæ, nec diabolicæ, nec humanæ potuerunt. Fides ergo in corde verè Christiano, & divinæ gratiæ adjutorio roborato, *vehementior est in adhesionem*, inquit S. Thomas in 3. citatus, quàm scientia, vel experientia, cum propter fidei firmitudinem sæpe rationi, sæpe experientiæ refragemur.

Insistit Durandus: Scientia Beatorum est certior fide, non quidem ex parte objecti, vel medii, quod utrobique est divina veritas; sed ratione diversi modi, quo intellectus tendit in Deum, in patria per visionem; in via per fidem. Ergo cum scientia conferat intellectui meliorem modum tendendi in verum, scilicet evidentiam, erit etiam certior fide.

Respondeo, non esse mirum, si certitudo Beati certitudinem fidelis viatoris excedat, cum non solum divinam veritatem audiat, sed etiam præsentem videat; certitudo autem adhesionis non parum firmatur ex visione intuitiva objecti visi. Quia ergo scientia beata & totam fidei securitatem habet, & aliquid amplius, jure merito fide certior dicitur. At verò scientia humana non idem habet assentiendi motivum, quod habet fides; unde licet aliunde habeat evidentiam, certitudine tamen

inferior est, quia motiva humana divinâ auctoritate longè inferiora sunt. Quam doctrinam, sicut & totum istud consecrarium, peregre explicat S. Doctor art. 8. ad 2. *Ceteris paribus*, inquit, *visio est certior auditu* (& propter hoc scientia beata est certior fide, quia illa primam veritatem videt, ista audit; fides enim ex auditu:). *Sed si ille, à quo auditur, multum excedit visum videntis, sic certior est auditus quam visus.* Atqui divina veritas, à qua audit fides, longè certior est visione hominis videntis, quæ est scientia humana. Nam multò magis, subdit ibidem S. Doctor, *homo certior est de eo, quod audit à Deo, qui falli non potest, quam de eo, quod videt propriâ ratione, qua falli potest: sicut aliquis parva scientia magis certificatur de eo, quod audit ab aliquo scientifico, quam de eo quod sibi secundum suam rationem videtur.* Ergo sentit, & rectè probat S. Doctor, assensum fidei esse per se, & communiter in nobis certiores, & firmiores assensu scientifico, cum dicat intellectum hominis esse certiores, magisque certificari de eo quod audit à Deo, qui falli non potest, quam de eo quod videt propriâ ratione. Unde etiam videmus, ipsa notissima scientiarum humanarum principia, quandoque à fide vel corrigi, vel limitari, ut illud physicum: Ex nihilo nihil fit, in materia de creatione; & illud: Quæ sunt eadem uni tertio sunt eadem inter se, in materia de Trinitate limitatur, & si dicere fas est, reformatur.

REFLEXIO.

Hæc ex innumeris paucas fidei dotes selegimus.

mus : verum hæc , quantaquanta sit virtus , quâlibet divina , & theologica appelletur , mortua tamen est , ut vidimus , & informis , nisi charitate vivat , & ex ea Christianus vivat , qui per eam credit . Magna sanè est fides nostra à Deo tradita , ædificata super fundamentum Apostolorum , & Prophetarum ; cruore Martyrum melius clamantium , quàm Abel , subscripta ; infinitis miraculis veluti divinæ potestatis characteribus & sigillis obsignata , ab ipsis demonibus veritate coactis & contremiscentibus adorata : sed tota illa fidei gloria pravis operibus veluti nebulis infuscata tenebrescit . Quid enim prodest tantus splendor rebellibus luminibus ? quid facis præcuntis ducatum sequi detrectantibus ? quid scientia projicientibus conscientiam ? quid , inquam , fides charitate destituta ? *Quid prodest* , inquit Petrus Damiani , *si quis catholicè credat , & gentiliter vivat ?* Nihil omninò , quia ut ait S. Eucherius : *Ubi salutis damnum est , illic utique jam lucrum nullum est .* Nec minùs verè Bernardus : *Sine ea si sum Christianus , si Christum non sequer .* Quid , inquam , nihil prodest ? obest prorsus , & melius esset profectò non esse , quàm malum Christianum esse , & propria fidei confessione accusari , judicari , & condemnari . Nonne de illis Christianis antichristianè viventibus veridicè dixit Augustinus : *Sunt Christiani mali , qui vocantur fideles , & non sunt , in quibus sacramenta Christi patiuntur injuriam ;* & ut addit Salviatus : Christus ipse patitur opprobrium , & lex Christiana patitur maledictum . Ergo fides erit vitæ meæ norma ; ad eam veluti anuſſam cuncta opera mea exigam : quod ipsa damnas ,

ringente licet naturâ, ipse damnabo : quod ipsa dicit, ipse faciam; fides enim à faciendo quod dicit, nomen habet : ejus maximas mundi corruptelis opponam, & argumento Bernardi utar: Vel fides, & Christus fidei author errat: vel mundus errat. Sed falli fidem, vel decipi Deum impossibile est. Meritò proinde & carnis prudentia inimica Deo, & sæculi prudentia Evangelio adversa, stultitia nominatur. Quid enim? Fides utique, quæ non fallitur, præcipit quod carni molestius est. Id ergo melius, id utilius, id potiùs eligendum; & quisquis aliud doceat, vel suadeat, ab eo tanquam à seductore cavendum. *Fides quidem* (monitum est Bernardi serm. 5. in vigil. Nat.) *ante omnia quarendum est, sed illa, de qua legitur: Fide mundans corda eorum. Crede ergo Deo, committe te ei, jacta in Deum cogitatum tuum, & ipse te enutriet, ut fiducialiter & fideliter dicas: Dominus sollicitus est mihi. Neque enim hoc sapiunt homines amantes seipsos, homines scoli, & solliciti pro seipsis, curam carnis perficientes desiderium; surdi ad vocem dicentis: Omnem sollicitudinem vestram projicientes in eum; ipsi enim est cura de vobis. Is verè fidelis est, qui nec sibi credit, nec in se sperat, factus sibi tanquam vas perditum; sed sic perdens animam suam, ut in vitam aeternam custodiat eam.*

CAPVT II.

De actu, subjecto, causa, & effectibus fidei, aliisque ad eam spectantibus.

UT omnia quæ de fide tractanda supersunt, hoc capite concludamus, ea omnia, nec sine ratione coniungimus; postquam enim fidei naturam, & proprietates contemplati sumus, convenienter ad ejus argumenti complementum agimus, & de actibus in quos prorumpit, & de subjectis quibus inhæret, & de causa à qua procedit, & de effectibus quibus abundat, & de aliis nonnullis ei annexis postea exponendis. Hæc enim ad cumulata[m] illius notitiam desiderantur.

Sed prius notandum est, multiplicem esse fidei actum. Nam alius est internus, alius exterior. Internus est assensus firmus uni Dei auctoritati obscure revelanti innixus. Exterior, qui & confessio fidei dicitur, est signum exterius exhibitum, interioris fidei protestativum. Rursum internus dividitur in actum credendi Deo, credendi Deum, & credendi in Deum, non tanquam in diversos actus, sed tanquam in diversas habitudines ejusdem actus ad Deum. Cum enim Deus sit objectum formale quod fides credit, & cui credit, & insuper sit finis ultimus, in quem & ipsa fides, & fidelis, & quidquid habet, referenda sunt, cum dicimur credere Deo, significatur habitudo ad objectum formale.

formale, cui fides nostra assentitur; cùm dicimur credere Deum, significatur objectum circa quod fides theologica occupatur; cùm verò dicimur credere in Deum, significatur ordo in Deum ut ultimum finem, in quem fides formata tendit, & ad quem sub imperio charitatis suspirat.

Notandum rursus, quod cùm duplex sit subjectum habitus, nimirum subjectum *quod* recipit, & subjectum *quo* habitus recipitur, nulla est difficultas de subjecto *quo* fides nobis infunditur; supponunt enim omnes, intellectum immediatè recipere fidem, cùm ab ea in ordine ad cognoscendum, & assentiendum veritatibus supernaturalibus perficiatur: ergo manifestum est fidem, quæ est principium cognitionis supernaturalis objecti, in intellectu subjectari; in intellectu, inquam, speculativo, ut ex fidei objecto, quod est veritas prima, manifestè patet. Sed quia veritas prima est omnium desideriorum nostrorum finis, votorum meta, actionumque humanarum regula, ut videre est apud Augustin. *lib. 1. de Trinit. cap. 8.* inde est, inquit D. Thomas *quest. 4. art. 2. ad 3.* quod fides dilectionem inspirat & operatur, sicut intellectus speculativus extensione fit practicus. Et ratio hujus est, quia fides est impressio divini luminis, & divinæ imitatio cognitionis, quæ est eminenter speculativo-practica. Quare dubium esse duntaxat potest de subjecto *quod* natum est recipere fidem; & difficultas est de Angelis, viatoribus, de dæmonibus, & hominibus damnatis; nam de Beatis nulla potest esse controversia, suppositâ Thomistarum sententiâ de repugnantia fidei & scientiæ circa idem ob-

etum. De prædictis ergo duntaxat dubia possunt excitari, pro quorum, & aliorum multorum resolutione sit

SPECVLATIO I.

Nec actus interior fidei sine pia voluntatis motione, nec actus exterior confessionis sine influxu fidei interioris elicitur.

Priorem partem à Scoto negatam satis indicant verba illa Apostoli Rom. 10. *Cordes creditur ad iustitiam, idest voluntate*, inquit ibi S. Thomas; quia credere non potest nisi volens: intellectus enim credentis non determinatur ad assentiendum veritati ex necessitate rationis, sicut intellectus scientis; sed ex voluntate. Quibus verbis rationem hujus veritatis fundamentalem assignavit. Tunc intellectus indiget ad eliciendum assensum pia inclinantis voluntatis motione, cum non necessitatur, & veluti rapitur ab evidentia objecti necessario ad assensum determinantis; tunc enim desideratur pius propensæ voluntatis impulsus, quo indifferentia intellectus auferatur: Atqui intellectus fidelis minimò necessitatur ab objecto, quod credit; tum quia verum nunquam necessario determinat intellectum, nisi cum vel immediate conspicitur, vel per necessariam connexionem ex principio viso infertur: tum quia actus fidei liberè elicitur non solum libertate:

exercitii, sed etiam specificationis; ut enim ait Tridentinum sess. 6. cap. 6. *Liberè moventur in Deum credentes vera esse, quæ divinitus revelata, & promissa sunt; & patet, nam homo etiam visis miraculis potest propositis fidei veritatibus assensum detrectare: maxime quia sicut actus credendi est meritorius, cadens sub præcepto, juxta illud Rom. 4. Credidit Abraham Deo, & reputatum est ei ad justitiam: ita non credere, demeritorium, & peccatum est, juxta illud: Cum venerit Paracletus, arguet mundum de peccato, de justitia, de judicio: de peccato quidem, quia non crediderunt in me.* Ergo ad assensum fidei eliciendum pia requiritur affectio voluntatis.

Dices: Non est in potestate voluntatis determinare intellectum ad assensum fidei; ut enim verè, & frequenter inculcat S. Thomas, proprium est voluntatis cæteras movere potentias quantum ad exercitium actus; intellectum verò quoad specificationem ab objecto moveri: unde si objectum non sit ad movendum intellectum sufficiens, non poterit ejus insufficiencia voluntate suppleri, quia voluntas, quantumlibet sit affecta, non potest res credibiles, vel veras efficere, si reapse tales non sint; aliàs quæcumque de voluntatis arbitratu credere, vel opinari liberum foret; quod & veritati repugnat, & Philosopho 3. de anima, textu 157. docenti, quod *imaginamur cum volumus; opinari autem non est in nostra potestate*, quia nimirum debet esse fundamentum opinionis, & fidei. Ergo cum intellectus quoad specificationem actus nequeat nisi à veritate objecti moveri, parum, vel nihil juvat pia illa voluntatis affectio.

Respon

Respondeo verum quidem esse, neminem posse, aut certè debere gratis, & sine fundamento credere, vel opinari; quod voluit Aristoteles citatus: & quidem cum rationabile debeat esse fidei obsequium, nulla nobis fides credenda proponit, nisi credibilitatis argumentis munita dignissimis, quibus credatur: alias citò crederemus, & in illam cordis levitatem, quam Scriptura reprehendit, laberemur. Itaque præclaro illo, & olim adducto credibilitatis argumentorum concentu quoad specificationem movetur intellectus, ut illis veritatibus credat, quibus detrectare fidem prudenter non potest: sed quia illa argumenta veritates revelatas nec in se ostendunt conspicuas, nec mysteriorum immensas difficultates, tametsi molliant, & laxigent, penitus evellunt; hinc est, intellectum manere semper ad assensum præbendum indifferentem; & tunc voluntas efficaciam objecti defectum supplet disponendo, & inclinando intellectum ad assensum. Maximè quia intellectus ad assentiendum revelatis de se indifferens, à veritatibus adeò sublimibus, & aliunde carni, humanæque consuetudini, & moribus adeò adversis admittendis, & intelligendis ingentia primi peccati corruptione, peccatis actualibus, & amore libertatis omnibus invulsè inviscerata immensum aucta plurimum retardatur: quocirca videmus plures Christianos in fide suscepta enutritos veritates cœlestes carni duras corruptelâ voluntatis initio quidem fastidire, postea in dubium vocare, deinde penitus inficiari & repudiare, & tandem impugnare. Ut ergo vincantur voluntatis infirmæ, & corrupti appetitus obicēs, intellectum alias indiffe

differentem, nec planè persuasum, vel sistentes, vel avertentes, vel saltem tentantes, necessaria est voluntatis divina amantis, & gustantis impulsio, rumpens moras, difficultates complanans, & tenebras, ac vapores carnalis concupiscentiæ dissipans, quæ fidei veritatis radios obscuratum irent.

Instabis: Si adeo exigitur inclinata, & inclinantis voluntatis affectio, indigebit voluntas habitu, qui sit principium hujus piæ motionis, quæ est actus difficilis, & supernaturalis; quod fateri cogitur ipse D. Thomas *quæst. 4. art. 2.* dicens: Oportet, quod tam in voluntate sit aliquis habitus, quàm in intellectu, si debeat actus fidei esse perfectus. Consequens autem est apertè falsum, aliàs priùs esset habitus supernaturalis in voluntate, quàm in intellectu; nec fides foret virtutum omnium prima, quod superiùs determinatis repugnat. Ergo falsum est, etiam existi piam ullam voluntatis ad credendum affectionem.

Respondeo, Suarem hoc argumento convictum agnoscere specialem in voluntate habitum piæ illius motionis elicativum. Verùm id minime necessarium judicamus. Ad cujus intelligentiam, & probationem præ oculis habenda est profunda, & erudita D. Thomæ doctrina, quam tradit *1. 2. quæst. 56. art. 2.* ubi ait, quod licet quælibet virtus sit simplex qualitas, quæ proinde principaliter, & ex æquo in distinctis potentiis subjectari nequit; tamen potest esse principaliter, & entitativè in una, & minùs præcipuè per quendam participationem, & suæ perfectionis diffusionem, & veluti redundantiâ in aliis. Sicut licet orare, & justè judicare sint

sint actus intellectus, ille tamen religioni, iste
justitiæ, quæ existunt in voluntate, tribuitur.
Quorum omnium radix ex discrimine poten-
tias inter, & habitus intercedente desumitur.
Cum enim potentia sit principium actus quoad
substantiam, virtus verò licet in totum actum
influat, per se tamen accidentalem, & adventi-
tiam, subindeque variabilem rationem hone-
statis producat; sit inde, substantiam actus, ut-
pote essentialem, & unicam, non posse nisi ab
una potentia proficere; honestas verò ab habitu
existente in una potentia in actum alterius po-
tentia proficere, & veluti redundare facile po-
test. Quamobrem licet fides sit habitus solo in
intellectu residens, ratione suæ diffusionis po-
test ad piam voluntatis motionem concurrere
absque ullius novi habitus additamento. Hoc
enim ipso, quod fides inclinatur ad credendum,
voluntatem etiam ciet, ut intellectui talem as-
sensum imperet.

Nec obest autoritas S. Thomæ in contra-
rium relata, quia S. Doctor per illum habitum
intelligit charitatem, per quam perfici actum
fidei, & ipsam formari fidem attestatur. Quod
dilucidè apparet ex articulo 5. ubi ait, quod
fides formata est vera virtus ratione charitatis;
fides autem informis non est virtus simpliciter;
quia etsi habeat perfectionem debitam ex par-
te intellectus, non tamen ex parte voluntatis.
Patet autem, actui fidei informis non deesse
piam motionem, sed solum charitatem: ergo
per illum habitum, quem in voluntate requirit
S. Doctor, solum intelligit charitatem ad for-
mandam fidem necessariam. Non obest etiam,
quod illa pia voluntatis motio sit actus bonus,

& supernaturalis ; hoc enim non probat , motionem illam per redundantiam non posse ab habitu fidei in intellectu residente , sed in voluntatem sese diffundente procedere ; sicut pia oratio , & rectum iudicium , licet fiat actus boni , possunt à religione , & iustitia in voluntate existentibus , sed in intellectum diffluentibus promanare.

Urgebis : Fides non potest ferri extra objectum specificativum : sed pia illa voluntatis motio est extra sphæram objecti specificativi fidei ; objectum enim adæquatum fidei est verum supernaturale creditum ; pia autem illa voluntatis motio , cum sit actus voluntatis , fertur in bonum , non in verum ; in quod tamen ferretur , si esset actus ab habitu fidei procedens , cum sit idem objectum habitus , & actus. Ergo illa motio voluntatis , nec quidem per redundantiam potest ab habitu fidei , sed ab alio speciali produci.

Respondeo , quod licet fides primò , & per se feratur in verum , tamen 'per extensionem , & diffusionem , quâ voluntatem inundat , potest minùs principaliter protendi in bonum , cum etiam illud in primam veritatem per se ordinetur. Licet ergo objectum fidei , & objectum piæ illius motionis sint entitativè , & materialiter diversum ; moraliter tamen , & in ratione objecti formalis unum sunt , quia unum ad aliud per se ordinatur ; & teste Philosopho , ubi sunt plura propter unum , ibi est unum tantum. Quod præfatis orationis , & recti iudicii exemplis posset servatis servandis , & cæteris paribus confirmari.

Posterior pars de actu fidei exteriori , quæ est
contra

contra Valentiam & Suarem, docetur à D. Thoma *art.* 3. qui ut clarè explicaret mentem suam, addidit *ad* 3. hæc verba : *Fides interior mediante dilectione causat omnes exteriores actus virtutum mediantibus aliis virtutibus, imperando, non eliciendo; sed confessionem producit tanquam proprium actum, nulla alia virtute mediante.* Ergo censet confessionem fidei exteriorem esse actum fidei interioris, ab eaque produci. Et ratio est, quia actus exteriores ab illa virtute eliciuntur, ad cuius finem secundum suam speciem referuntur : sic jejunium est actus abstinentiæ, quia ad carnis macerationem, quæ est finis abstinentiæ, refertur : sic extrema adoratio, & sacrificium oblatum sunt actus à virtute religionis elicti, quia in finem religionis diriguntur, & sua sponte tendunt. Atqui externa confessio, seu attestatio veræ fidei, quâ quis Christianam religionem profiteretur, secundum suam speciem ad finem fidei ordinatur; exterior namque loquutio per se, & ex natura sua ad illud significandum ordinatur, quod in corde concipitur : ergo externa confessio est actus ab interna fide procedens. Et hoc significat Apostolus 2. Cor. 4. *Habentes eundem spiritum fidei credimus* (ecce actum interiorem fidei;) *propter quod & loquimur* : (ecce exteriorem fidei confessionem ab interiori derivatam.)

Sed inquires : Quomodo fides, quæ soli intellectui inest, poterit actum exteriorem immediatè elicere, cum actus exterior sit actus potentiæ materialis, & nulla forma accidentalis operetur extra subjectum, in quo residet, nec nisi mediante potentia, quam informet? Certè id intellectu non est facile.

Respon

Respondeo, id te faciliè ex paulò antea dictis percepturum. Licet enim virtus, utpote simplex qualitas, non possit principaliter, & ex æquo duabus in potentiis subiectari; potest tamen unam principaliter informare, & alias aliqua sui participatione, & derivatione perfundere, earumque actus adventitiis honestatibus decorare. Et certè quid magis consentaneum, quàm ut iisdem virtutibus asseratur externa exequutio, quibus attribuitur interna operis boni affectio? Quid connaturalius, quàm ut iustitia non solum velit reddere cuique suum, sed exteriori etiam actu reddat quod suum est. Absit ut Christianæ virtutes ita sint steriles, ut externos fructus non pariant: cum tamen totum nostrum negotium in exequutione consistat, & sola illa virtus dicenda meritò sit, quæ dignis fructibus abundat.

Instabis: Accidit actui exteriori confessionis ordinari ad finem fidei, vel religionis; eadem enim Symboli in Ecclesia decantatio potest vel ad cultum divinum, vel ad assentiendum Deo revelanti ordinari: Ergo confessio illa non magis, vel potius debet dici actus fidei, quàm religionis.

Respondeo Magistrum Serram, & alios non improbabiler opinari, eundem confessionis fidei actum secundum distinctas rationes consideratum, ad diversas spectare virtutes, sicque tantum præfatum in cultum divinum relatum, actum esse à religione elicatum; quatenus verò ad assentiendum rebus revelatis, easque profitendum ordinatur, à fide procedere. Probabilius tamen est, & S. Thomæ conformius, confessionem fidei à sola fide produci; si enim ab illis omnibus

omnibus virtutibus actus pii elicerentur, ad quarum fines diriguntur, actus bonus ad fines extrinsecos omnium virtutum relatus ab omnibus procederet; sicque nulla esset distinctio inter virtutes imperantes, & elicientes, & omnium virtutum materiæ facilè confunderentur. Talis ergo regula, eaque certissima Theologis servanda est, ab illa sola, & non alia virtute elici actus externos honestos, ad cuius finem per se, & ex natura sua ordinantur; de rebus enim, ex iis, quæ per se, & ex fine connaturali, non per accidens, & ex fine adventitio eis conveniunt, judicandum est. Cum ergo confessio fidei per se ad finem fidei tendat, ut ex D. Thoma clarum est, relinquitur eam à sola fide produci, tametsi possit à religione imperari.

Urgebis: In multis est confessio fidei, in quibus habitus fidei nequaquam invenitur. Nam Christus, teste Apostolo 1. Timot. 4. *testimonium reddidit bonam confessionem*. Angeli etiam Christum natum *Luc. 2.* & eundem resurgentem, *Marc. ultimo*, confessi sunt. Caçodamon pariter Christum his verbis, *Marc. 1.* confessus est: *Scio quia sis Sanctus Dei*. Hæretici quoque sæpe Deum, & Christum exterius confitentur & profitentur. Ergo non per se à fide confessio elicitur, tametsi ab ea accidentaliter imperetur.

Respondeo, quod sicut elargiri bona est per se actus liberalitatis, licèt interdum contingat absque tali virtute ab avaro bona profundi; ita similiter confessio per se à fide elici nata est, licèt interdum per accidens sine fide eliciatur; sed tunc confessio fidei non nisi improprie nominatur. Ad exempla adducta dicendum, confessionem

fessionem Christi à principio fide altiori, & eminentiori, scientiâ nimirum vel infusa, vel beata elicitam fuisse; in dæmonibus verò à fide coacta, in hæreticis à fide humana procedere. Nec tamen actus eorum confessiones fidei dici debent, quia non sunt protestationes interiores fidei divinæ veritati obscurè propositè credentis. De præcepto confessionis fidei postea agemus.

R E F L E X I O.

Nec sine affectione voluntatis interna fides, nec sine interna fide exterior confessio quidquam valent; quia tota vita Christiani interior est, & ex cordis fervore rectitudo fidei, & ex fidei plenitudine exterior professio omninò pendet: Ergo qui in Ecclesia, sive genua figunt, sive manus extendunt, sive solo prosternuntur, non propterea petitiones eorum innotescunt apud Deum, ut loquitur Paul. *Philip. 4.* idest, ut exponit D. Thomas, non approbabitur à Deo, nec ei dignæ, vel sanctæ apparebunt, nisi ex interiori fide externus cultus, ex corde puro fides proficiantur. Unde Bernardus sermone 16. in Psalmum, Qui habitat: *Spiritus est Deus, & in spiritu clamet necesse est, quisquis clamorem suum ad eum desiderat pervenire. Nam & orantes de membris sui corporis* (inquit August. lib. de cura pro mort. agend. cap. 5.) *faciunt quod supplicantiis congruit, cum genua figunt cum extendunt manus, vel etiam prosternuntur solo, & si quid aliud visibilibus faciunt, quanvis invisibilis eorum voluntas, & cordis intentio Deo nota sit; nec ille indigeat his indiciis, ut humanus ei pandatur animus: sed his magis seipsum*
excitat

*excitat homo ad orandum, gemendumque humi-
lius, atque ferventiùs.*

Hæc cum ita sint, ad vitam interiorem, quam
scæpe in hujus operis decursu commendavimus,
te non hortari non possum, ut fias homo carna-
lis per gratiam spiritalis, postquam purus spiri-
tus Verbum Dei caro factum est. *O homines,*
inquit August. epist. 120. *Nolite desperare vos
fieri posse filios Dei, quia & ipse Filius Dei, hoc
est Verbum Dei, caro factum est, & habitavit in
nobis. Reddite vicem, efficimini spiritus, & ha-
bitate in illo, qui caro factus est, & habitavit in
nobis.* Ad hanc cordis scholam, in qua Deus
auditur & docet, te provocho, pie Lector, in
qua non quæritur, sed infertur appetitus oran-
di; & in qua, ut prosequitur August. lib. 7. *ad
Simplicianum, quest. 41.* non est differenda ora-
tio, ut quæramus quò sedeamus, aut ubi ste-
mus, aut ubi prosternamur; gignit enim sibi
mentis intentio solitudinem, internumque Deo
fabricatur & templum, ut illud impleat, quod
scriptum est: *Regnum Dei intra vos est.* Abest
ibi multa loquutio, etsi non desit multa preca-
tio, quia fervens perseverat intentio. Ibi tacen-
te linguâ, clamat animus; siquidem in Dei au-
ribus, ut Bernardus post Gregorium docet, de-
siderium vehemens, clamor magnus, penetrans
nubes, pertingens cœlos; & è regione remissa
intentio, vox submissa. *Valentiores voces,* in-
quit Magnus Gregorius lib. 22. moral. cap. 13.
*apud secretissimas aures Dei non faciunt verba
nostra, sed desideria. Æternam vitam, si ore pe-
timus, nec tamen corde desideramus, clamantes
tacemus. Si verò desideramus ex corde, etiam cum
ore conticescimus, tacentes clamamus.* Hac inte-

riori conversatione verè Deum invocamus, ut notat Augustinus in Psalm. 30. *Invocas Deum, quando in te vocas Deum. Hoc est illum invocare, illum in te vocare, quodammodo eum in domum cordis tui invitare.*

SPECVLATIO II.

Fide supernaturali perfusus est intellectus Angelicus in via: non remanet in cacodæmonibus, nec in hominibus damnatis, & multò minùs in hæreticis invenitur.

PRobatur prima pars contra Durandum: Angeli creati sunt cum dono gratiæ non consummatæ, sed inchoatæ, cùm fuerint conditi in statu viæ, & meriti, in quo habetur quidam inchoatio speratæ beatitudinis, sed nondum plenum & summum bonum possidetur: sed hæc inchoatio fit in intellectu per fidem infusam, sicut in voluntate per spem, & charitatem: Ergo in Angelis infusa fuit fides in prima sui conditione, aliàs non potuissent accedere ad Deum; accedentem enim ad Deum oportet credere, quia est, & quod inquirentibus se remunerator est: Non enim pedibus, sed fidei, spei, charitatisque motibus ad Deum accedimus, & quamdiu peregrinamur à Domino, opus habemus ex fide vivere, ut ait August. *tract. 68. in Ioan.* Nec valet fundamentum Durandi, ideo fidem Angelis viatoribus denegantis, quia fuit
in

in illis evidentia in attestante, quam cum fide infociabilem arbitratur. Sed hoc fundamentum ruinosum esse suprà demonstravimus.

Scio, aliquem recentiorum eruditum, & in Augustini doctrina non mediocriter versatum, ex alio capite fidem Angelis, & Adamo initio conditionis eorum in manuscriptis denegare; quia nimirum Angelos, & Protoparentem Dei visione intuitiva, sine qua creaturam intellectualem creari non posse arbitratur, positos esse existimat. Fundaturque hic Theologus primò, quia creatura intellectualis misera conditiō non potest, nec miseriæ pœnis subijci absque peccato: creatura autem intellectualis necessariò misera foret, si Deo, quem sola visione possideamus, non frueretur; grandis enim miseria est eo carere bono, quod summo appetitu concupiscit, quodve propter se, & propter quod cætera omnia desiderat. Hinc Augustinus sæpe inculcat, creaturam rationalem eo ipso miseram esse, nisi beata sit, idest Deo tranquillè, ac securè perfruatur; & hominem à Deo factum esse ad Deum, inquietumve semper manere cor humanum, nec in eo quiescat, à quo processit. *Non esse in patria* (inquit egregiè serm. 14. de verb. Apost.) *si amatur patria, magna pœna; si autem non amatur patria, peior est cordis pœna. Parvum malum est in hominis corde, qui societatem non quarit Sanctorum, qui non considerat regnum cælorum? Si non desiderat, pœna est de perversitate; si autem desiderat, pœna est de fraudata charitate.* Et lib. 10. de civit. cap. 16. Plotinum Platonium laudat, quòd hominem sine visione Dei felicem esse non posse christianè pronuntiaret. *Illà, inquit, visio Dei*

tanta pulchritudinis visio est, & tanto amore dignissima, ut sine hac quibuscumque aliis bonis prae-dictum, atque abundantem non dubitet Plotinus infelicissimum dicere. Ergo quia Deus non solet infligere poenam sine culpa, non potuit, vel certe non debuit illi poenae creaturam in conditione subijcere, quae omnium maxima est. Sola siquidem peccata creaturam intellectualem à Deo dividunt, nosque ejus privare visione possunt. A salute, inquit lib.I. de peccat. merit. & remiss. cap.24. & vita aeterna hominem, nisi peccata non separant. Ergo cum creatura intellectualis absque peccato fuerit condita à Deo, ab ejusque fruitione, & visione, in qua salus posita est, separari nequaquam potuit.

Confirmatur: Angeli, teste eodem August. lib.4. de Genes. ad litt. cap.24. à primo creationis instanti in Dei Verbo, quod est essentia divina, omnes creaturas à Deo factas intuiti sunt. Proculdubio, ait, universam creaturam, in qua ipsi sunt principaliter conditi, in ipso Verbo Dei prius noverunt, in quo sunt omnium etiam quae temporaliter facta sunt, aeterna rationes, tanquam in eo per quod facta sunt origines. Ac deinde in ipsa creatura, quam sic noverunt, tanquam infra despicientes, eamque referentes ad ipsius laudem, in ejus incommutabili veritate rationes, secundum quas facta est, principaliter vident. Quam quidem cognitionem creaturarum in Verbo, seu essentia divina adeo Angelis necessariam existimavit Augustinus, ut sine illa intellectum Angelicum informem, & tenebrosum futurum fuisse affirmet. Creatura intellectualis tenebrosa finiret, inquit lib.3. confess. cap.2. similis abyssu, cui dissimilis, nisi per
idem

idem Verbum converteretur ad idem, à quo facta est; atque ab eo illuminata lux fieret, quanvis non aqualiter, tamen conformis forma aquali tibi. Et cap. 8. Nisi dixisses ab initio: Fiat lux, & facta esset lux, & inhareret tibi omnis obediens intelligentia cœlestis civitatis tua, & requiesceret in spiritu tuo, qui superfertur incommutabiliter super omne mutabile, alioquin & ipsum cœlum cœli tenebrosa esset abyssus in se. Quæ quidem informitatis tenebræ creaturis offusæ, Deo utique placere non possunt, subindeque in eis condi creaturæ innocentes nequaquam possunt. Neque creatura intellectualis informitas placeret tibi, ait libro mox laudato, cap. 3. si non lux fieret, non existendo, sed intuendo illuminantem lucem, eique colarendo: ut & quod utcumque vivit, & quod beatè vivit, non deberet nisi gratia tua, conversa per commutationem meliorem ad id, quod neque in melius, neque in deterius commutari potest.

Confirmatur rursus variis aliis Augustini autoritatibus, quibus ejus mens satis clarè innotescit: Sic enim habet lib. II. de civit. cap. II. Quacùm ita sint, nullo quidem modo secundùm aliquod temporis spatium priùs erant illi spiritus tenebra, quos Angelas dicimus; sed simul ut facti sunt, lux facti sunt: non tamen ita tantum creati, ut quoquo modo essent, & quoquo modo viverent, sed etiam illuminati, ut sapienter, beatèque viverent. Ergo beatitudinis luce, quæ in visione Dei sita est, Angeli mox conditi fructi sunt. Idem docet de Adamo conc. 2. in 2. part. Psalm. 70. Quid illi deerat? Dicatur mihi, quid illi deerat in paradiso constituto, in media opulentia, mediisque deliciis? Cui magna delicia

erant ipsa visio Dei, cujus faciem quasi inimici
timuit post peccatum? Quid clarius? Quin *lib. II.
de civitat. cap. 9.* non dubitat Augustinus An-
gelos Sanctos nunquam esse à Domino pere-
grinatos, idest extra patriam & claram Dei vi-
sionem constitutos. *De sanctis*, inquit, *civitatis*
exortu dicere institui; & prius quod ad Angelos
attinget, dicendum putavi, quod hujus civitatis,
& magna pars est, & eo beatior, quo nunquam
peregrinatus. Et *lib. 2. de Genes. ad lit. cap. 8.* sic
luculentius fatur: Neque enim sicut nos, ad per-
cipiendam sapientiam proficiebant Angeli, ut in-
visibilia Dei per ea qua facta sunt, intellecta con-
spicerent, qui ex quo facti sunt, ipsa Verbi ater-
nitate sancta & pia contemplatione perfuuntur:
atque inde ista dispicientes, secundum id quod
intus vident, vel rectè facta approbant, vel pec-
cata improbant. Denique id ipsum patet ex fre-
quenti Augustini sententia asserente, omnium
creationem in instanti contigisse: ex quo sic
contra seipsum difficile format argumentum
D. Thomas 1. p. quæst. 62. art. 1. argum. 3. *Pra-*
terea, inquit, *secundum August. super Genes.*
ad lit. ea qua leguntur facta in operibus sex die-
rum, simul facta fuerunt, & sic oportet quod sta-
tim ab initio creationis rerum fuerint omnes illi
sex dies. Sed in illis sex diebus secundum ejus ex-
positionem manè fuit cognitio angelica, secundum
quam cognoverunt Verbum, & res in Verbo. Ergo
statim à principio creationis cognoverunt Ver-
bum, & res in Verbo: Sed Angeli beati sunt per
hoc, quod Verbum vident: ergo statim à principio
sua creationis Angeli fuerunt beati. Neque sa-
tisfacit solutio Angelici Doctoris ibidem ad 3.
adientis, cognitionem illam Angelorum matu-
rinam.

tinam non esse cognitionem ipsius Verbi per essentiam ; illud enim repugnat iis , quæ de cognitione Angelorum matutina *quæst.* 58. *art.* 6. & 7. docuerat idem S. Præceptor.

Confirmatur 3. testimoniis aliorum Patrum Augustino adstipulantium. Quid enim , sicut elegantiùs , expressius his Magni Gregorii verbis in Psalm. 5. *pœnitent. Panis ejus* (idest Protoparentis , & idem est de Angelis ,) *fuit visionis divina delectatio , Verbi Dei satiety , interna quietis gaudium , lucis inaccessibilis spendor , sapientia refectio , presentia Creatoris. Felices antiqui dies , nihil tenebrarum , nihil caliginis præferentes , quos divinitatis illustrabat presentia , securitatis purgabat serenitas , lætitiæ immensitas decorabat ! Dies gaudiorum & luminis , dies virtutum & panis , dies deliciarum & suavitatis , quos non perturbabat mœror , non infestabat angustia , non obumbrabat infirmitas. Hos dies in paradiso habuit anima , antequam à statu rectitudinis per culpam caderet pravariationis. Mitto plura alia testimonia , quibus idipsum non obscure significat Doctor Sanctissimus , ut cùm ait , illuc nobis redeundum esse , per gratiam , unde per Adami culpam lapsi sumus. Cùm tradit hominem innocentem nullâ pœnâ posse justè affligi ; & aliunde inculcat , pœnarum maximam esse Dei visi privationem ; & grandem primi peccati vindictam esse , quod jam Deum videre non possimus. Cùm denique affirmat , præmium perseverantiæ Sanctis Angelis concessum in eo duntaxat positum fuisse , quod à beatitudine , in qua creati fuerant , ampliùs excidere non possent. *Virtutes Angelica* , inquit lib. 27. *Moral. cap. 24. qua in divino amore fixæ**

perstiterunt, lapsis superbientibus Angelis hoc in munere retributionis acceperunt, ut nulla jam rubigine surripientis culpa mordeantur, & ut in contemplatione conditoris sine felicitatis fine permaneant, & in hoc, quod sunt condita, æterna stabilitate subsistant. Quod & apertius hom. 7. in Ezech. repetit his verbis: Cadentibus aliis sancti Angeli in sua beatitudine perstiterunt, atque hoc acceperunt in munere, ut jam cadere omnino non possent. Quod & perspicue docet S. Fulgentius lib. de fide ad Petr. cap. 3. Angeli, inquit, atque homines, pro eo quia rationales sunt facti, æternitatis ac beatitudinis donum in se à natura spiritalis Creatore divinitus acceperunt; ita scilicet, ut si dilectioni Creatoris sui jugiter inhaesissent, simul æterni, beatique mansissent; si verò proprio voluntaris arbitrio contra summum Creatoris imperium suam niterentur facere voluntatem, protinus à contumacibus beatitudo discederet.

Verum hæc sententia facile quidem probaretur, nisi solidissimis veræ Theologiæ principiis, sancto Thomæ, & veritati esset adversa. Quid enim firmitus eâ maximâ in materia de Angelis stabilitâ, Angelos in statu viæ & meriti conditos fuisse, & bonos visionem beatam, quæ teste Augustino est tota merces, promeritos fuisse; meritum verò, & præmium in eodem simul instanti contingere nequaquam posse. Nam idcirco secundum omnes alicujus notæ Theologos Christus gloriam essentialem, seu visionem non est promeritus, sed tantum gloriam accidentalem, corporis nimirum resurrectionem, nominis exaltationem, & hominum salutem, quia essentiâ divinâ clarè visâ à primo

con

conceptionis instanti fruebatur; & aliunde repugnat, aliquem promereri id, quod prius habere intelligitur, quàm mereatur. Et certè si Angeli habuerunt in sui creatione visionis coronam, quid promereri potuerint, assignari ægrè poterit, cum ut dictum ex Augustino est, vilio sit tota operis meritorii merces.

Quid etiam eo principio fundatius in tota Theologia habetur, quod superiori tomo inuictis munivimus argumentis, impeccabilitatem esse necessarium beatæ visionis consecrarium, subindeque impossibile esse, creaturam intellectualem divinam essentiam clarè, & intuitivè conspicientem, eaque per visionem beatam fruentem, in peccatum labi posse; & tamen Angelos, & Protoparentes in peccatum cecidisse, de fide certum esse? Quid pariter eâ doctrinâ certius, quàm essentiam divinam clarè & intuitivè visam, utpote summum bonum, & ipsam bonitatis essentiam, voluntatem ad amorem etiam necessitate exercitii compellere? Quia in puro & summo bono in se conspecto, vel in illius amoris exercitio, nulla ratio apparere potest, quæ fastidium pariat, vel tædium; nullus ab intellectu potest voluntati proponi defectus, quo velit, aut possit à tanti boni amore, & fruitione desistere.

Nec valet si respondeas, Angelos, tamen si beatos, ideo lapsos esse, quia nondum data illis erat magna abundantia charitatis, quâ felici quadam necessitate ulterius peccare non possunt. Quam responsionem confirmare videtur August. lib. de corr. & grat. cap. 10. his verbis: *Diabolus igitur, & angeli ejus beati erant antequam caderent, & se in miseriam casuros esse.*

nesciebant; erat tamen adhuc quod eorum adderetur beatitudini, si per liberum arbitrium in veritate steterissent, donec istam summam beatitudinis plenitudinem, tanquam premium ipsius per mansionis acciperent; id est, ut magnam per spiritum sanctum datam abundantiam charitatis Dei, cadere ulterius omnino non possent, & hoc de se certissimè nossent. Hanc plenitudinem beatitudinis non habebant, sed quia noscebant suam futuram miseriam, minore quidem, sed tamen beatitudine, sine ullo vitio fruebantur. Quibus in verbis non obscurè indicat Augustinus, ad impeccabilitatem intellectualis creaturæ non sufficere beatitudinem, seu essentiam divinæ claræ visionem; nec qualemcunque ipsius amorem, & fruitionem, nisi adsit summa, & victrix delectatio omnem peccati delectationem excludens, & illa beata ubertas, quâ impletam animam nunquam peccare delectat.

Non, inquam, valet hæc responsio variis fortissimarum rationum moliminibus superiori tomo refutata, ubi ostendimus, ex visione Dei voluntatem tantoperè summi boni amabilitate rapi, ut non solum illud odisse nequeat, sed etiam illud non amare actualiter non possit. Quia licet conspectû bonitatis essentiâ non ligetur indifferentia voluntatis, impletur tamen infinito bono totam cordis humani quâlibet vasti captivitatem inundante: ergo repugnat Angelis beatam communicari visionem potuisse, quin simul data fuerit magna illa abundantia charitatis, quâ felici necessitate ulterius peccare non potuerint. Imò nunquam talem felicem necessitatem conferret charitas, nisi ex visione sequeretur; ex se enim, & ex propriis

non necessitatem confert, sed libertatem. Beatorum ergo non peccandi necessitas non à sola charitate, sed à charitate visione Dei summam bonitatem jugiter exhibente illustratâ promanat.

Nec oppositum insinuat Augustinus, qui loquitur solùm de beatitudine naturali, & supernaturali viæ, quæ clementi capax est, sicut & ruinæ. Beati ergo conditi sunt Angeli, & Protoparentes, non beatitudine termini, quæ visione habetur; sed beatitudine viæ, à qua facile cadit creata libertas, nisi invincibili gratiæ, & charitatis adiumento, & victrici delectatione subleveretur. Et ideo signanter vocat Augustinus beatitudinem illam minorem, quia & beatitudine cœli longè inferior est, & ruinæ obnoxia est: beatitudinis tamen nomenclaturam promeretur, quia ut tomo 2. ostendimus, tales, & tantæ erant naturæ integræ & innocentis prærogativæ, tantâ à miseriis, quas patimur, immunitas; tam sublimis, & suavis divinorum contemplatio, non merè naturalis, sed fide facta, spe gaudens, charitate exultans, ut Angeli, primique parentes in tanta cœlestium charismatum abundantia creati jure meritò felices, beati que dicerentur, ut amplius inter solvenda objecta exponemus.

Nec iterum valet, si rursus respondeas, ex visione quidem beata amorem Dei naturalem, ad quem à natura, vel potius ab Authore naturæ determinamur, sponte, & necessario profluere; non tamen amorem moralem, & electivum, ad quem sola visio non sufficit, nisi alia superaddatur voluntati gratia, per quam essentia divina visa delectet. Quia si ex efficacia visionis vo-

luntas non posset essentiam divinam non diligere, sed ad eam amandam necessitaretur, amor Beatorum esset merè naturalis, non electivus, subindeque nec amor charitatis, quæ tamen non evacuetur, sed perficitur in patria.

Non, inquam, valet hæc secunda responsio. Quavis enim non negemus distinctionem amoris naturalis & electivi, cum sæpe doceat S. Thomas, quod in voluntate non solum est libertas, sed etiam natura, & isti correspondere connaturales motus, instinctus, & veluti impetus; illi verò electiones: quanvis, inquam, id ultro fateamur, perperam tamen, & omnino falsò inde infertur, amorem Beatorum, quo in Deum clarè visum feruntur, esse electivum, & formaliter liberum, sicut est in viâ, alioquin Beati possent quotidie peccare, & ab amore Dei pro arbitratu cessare. Nam amor moralis, electivus, liber, & ad quem naturaliter non determinamur ulla necessitate specificationis, aut exercitii (qualem amorem electivum in Beatis comminiscuntur isti recentiores Adversarii,) & desinere potest, & sæpe desinit; imò si non potuit in Angelis visione beata retineri, nihil excogitari, imò nec fingi fortius unquam poterit, quo amor ille indeclinabiliter per totam æternitatem teneatur. Ad pleniorẽ etiam huius responsionis confutationem illud observandum est, amorem Beatorum distingui planè ab amore naturali ex instinctu naturæ partò, qualis in brutis respectu prolis, & in subitis & primò primis voluntatis nostræ motibus invenitur. Non enim dicitur naturalis amor Beatorum, quia ex impetu solius naturæ procedit, sed quia necessariò à voluntate procedit, & po-

test dici eminenter electivus, & liber, non solum quia est radix liberi amoris creaturarum, sed etiam quia circa Deum non ex alligatione potestatis, sed ex plenitudine suæ capacitatis occupatur. Ad cuius evidentiam considerandum est, libertatem, quæ est vis electiva mediorum, servato ordine finis, in ampla voluntatis universalitate fundari; cum enim voluntas sit capax boni infiniti, à creatis omnibus & finitis bonis est independens; unde cum nulli alligetur, nullo plenè satiatur, potest omnia decurrere, unum alteri præferre, & aliud præ alio eligere. Cum autem summum, & universale bonum in se clarè, & apertè intuitiva visione proponitur, tunc voluntatis indifferentia non ligatur quidem, vel arctatur, sicut in brutis; sed perficitur, & consummatur, quia tota ejus capacitas, tota universalitas, & amplitudo, quæ indifferentiæ radix est, infinità bonitate clarè visâ impletur. Quid ergo mirum, si voluntas infinito bono plena illi necessariò, & sine indifferentia hæreat, cum facultas ultra, vel extra adæquatum suum objectum ferri non possit; & bonum sit objectum voluntatis, & omne bonum in Deo clarè viso? Ergo necessitas Beati Deum videntis non est coarctata, ligata, & imperfecta, sicut in motibus naturalibus; sed plena, sed eminens, sed divina, utpote similis illi, quâ Deus diligit seipsum, quâ Pater diligit Filium, & producit Spiritum sanctum: Sed de his non semel in decursu Theologiæ sermonem habuimus, & satius est æternum illum, beatèque necessarium amorem scire, quàm de eo operose nimis, & importunè disputare.

Ad fundamenta oppositæ sententiæ responsum.

sum non est difficile. Et quidem primum argumentum ex miseria desumptum, in Adversarios evidenter retorquetur. Si enim miseria est non videre Deum, quem innato appetitu desideramus, quantò major miseria est tantum bonum videndo possidere, nec esse de illius possessione securum? Melius profectò esset Deum non videre, quàm illum cadendi metu posse perdere. Itaque Angeli initio conditionis suæ, vel Deum se posse perdere sciebant, vel nesciebant; si sciebant, miseri erant, quia erant de felicitate incerti; si nesciebant, ignari erant & errantes: quis autem dubitat ignorantiam & errorem grandem esse miseriam? Hinc præclare August. lib. 11. de Civit. cap. 11. *Verè, perfectèque beata vita non nisi aterna est, siue id sciamus, siue nescientes aliud putemus: quia scientes timor, nescientes error beatos esse non sinit.* Dicendum ergo, Angelos conditos fuisse beatos, & ab omni miseria immunes, sed beatitudine longè visione beatâ inferiori. Cum enim spiritus cœlestes omnibus gratiarum donis perfusi fuerint, & aliunde in sua habuerint potestate ad visionem illam facilè, citòque pervenire, nulla erat in illis miseria, nec carentia visionis habebat rationem privationis, sicut modò in dæmonibus post peccatum; sed stimuli ad præmium, & coronam invitantis, & ad pugnam strenuè, animosque cum Lucifero & Angelis ejus ineundam.

Cum autem locis adductis ait Augustinus, privationem visionis esse pœnarum maximam, verum est in iis, qui ea in pœnam peccati privati sunt; & in iis maximè, qui eam obtinendâ sp̃e destituti sunt. In iis autem, qui sunt in via
ad

ad illam, quibus certò promittitur, si fideliter pugnent, respectu quorum non habet rationem privationis, sed bravii, & mercedis; in iis, inquam, carentia visionis non habet rationem pœnæ, sed incentivi amoris, qui ex dilatione dilecti boni vehementer accenditur. Considerantes ergo Angeli sancti & Protoparentes in statu innocentiae visionem claram Dei esse bonum vires naturæ excedens, & aliunde certa fide cognoscentes, se posse cum gratia sibi data ad illam pervenire, ex una parte spe gaudebant, ex alia de carentia boni indebiti non discruciabantur. Hanc esse Augustini mentem, patet ex libro de correptione & gratia, cap. II. ubi sic habet: *Sic & hominem fecit cum libero arbitrio; & quamvis sui futuri casus ignarum, tamen ideo beatum, quia & non mori, & non miserum fieri in sua potestate esse sentiebat.* Ergo ex Augustino Protoparentes, & idem de Angelis Idicendum est, eatenus beati dici poterant, non quòd Deum viderent, sed quatenus in sua habebant potestate, & carere miseria, & ad beatam visionem facili amoris & humilitatis actu pervenire, nam carentia visionis existentis in nostra potestate, pœna dici non potest, sed coronæ præparatio.

Ad primam confirmationem respondeo optimam esse S. Thomæ solutionem, nimirum Angelum duplicem habuisse cognitionem in Verbo, scilicet naturalem, & aliam gloriæ: priorè cognovit Verbum in sua natura relucens; posteriorè cognovit Verbum in sua essentia: priorè habuit à principio creationis, posteriorè verò initio beatitudinis; & hæc propriè dicitur cognitio matutina. Hanc verò habuisse Angelum

lum in primo instanti creationis, nusquam dixit Augustinus. Et licet in ejus sententia omnia condita sint in instanti; omnia,inquam,quæ pertinent ad hanc vitam; non tamen omnia, quæ pertinent ad futuram: cujus signum est,quod in illis diebus spiritalibus à vespere dies incipit: Factum est enim vespere, & mane dies unus; & in mane consummatur, idest secundum Augustinum, prius fuit in Angelis cognitio vespertina, quam matutina perfecta, etsi matutinam imperfectam in sui cognitione habuerint; & etiam à matutina perfecta ad vespertinam Beati descendant quando volunt.

Ad alia omnia testimonia,tum Augustini, tum cæterorum Patrum dicendum, Sanctos illos voluisse solum Angelos non consummatam, sed inchoatam beatitudinem habuisse & excellenti fuisse Dei contemplatione potitos; nunquamve bonos Angelos à Deo fuisse peregrinatos, quia cum cogitatione, affectu, & sacra charitatis familiaritate præsentem habuerunt. His omnibus adde, quod quia via Angelorum brevissima fuit, & uno, aut altero instanti completa, aliquo vero sensu eos in visione Dei conditos fuisse dicitur, quia brevissimâ morulâ, continenter, & sine interruptione ad visionem Dei pervenerunt; parum autem pro nihilo reputatur, maxime quia cum semper boni Angeli fuerint in loco patriæ cœlestis, nempe in cœlo, nunquam peregrinati dicuntur, idest à patria alieni. Denique ut constet has Augustini, cæterorumque Patrum interpretationes non esse extortas, idest Angelos fuisse beatos beatitudine imperfecta, & Deum vidisse visione fidei, & exiniæ contemplationis, sufficit ea proferre verba, quæ Augustinus *lib.11.*

de civit. cap. 12. habet : Et hodie , ait , non imprudenter beatos vocamus , quos videmus iuste , ac pie cum spe futura immortalitatis hanc vitam ducere sine crimine . Si viri sancti tot miseriis circumdati non imprudenter beati vocari possunt , quanto iustius sanctos Angelos , & Proparentes in statu innocentiae beatos creatos esse dici potest ? Ex quibus facile expones loca Gregorii , Fulgentii , & aliorum Patrum , qui intendunt solum Angelos fuisse conditos absque miseria , & cum beatitudine , naturali quidem perfecta , supernaturali vero inchoata : & quia illam primi peccati granditate perdidimus , merito dicit Gregorius , illuc redeundum esse per gratiam , unde cecidimus per culpam . Cetera explicatu facilia sunt .

Fides non perseverat in damnatis.

Secunda pars , quæ asserit fidem non remanere in demonibus , nec in damnatis , qui fideles fuerunt , expressè docetur à D. Thoma art. 2. ad 2. *Fides* , inquit , *quæ est donum gratia , inclinatur hominem ad credendum secundum aliquem affectum boni , etiamsi sit informis : unde fides , quia est in demonibus , non est donum gratia* . Ubi rationem fundamentalem insinuavit , quæ æqualiter probat de damnatis hoc modo . Fides infusa , quæ est donum gratiæ , inclinatur hominem ad credendum secundum aliquem affectum boni , nam si virtutes morales aliquem boni affectum inspirant , quanto magis infusæ ? Unde & ipsa fides per se pendet à motione voluntatis , per se ab actu charitatis perfici optat & formari , per se est fundamentum spei , & basis totius ædificii
spiri

spiritualis. Sed statui dæmonum, & damnatorum repugnat virtus inclinans ad credendum secundum aliquem affectum boni, quia in illis nulla pia affectio, nulla pia motio invenitur. Ergo nec in dæmonibus, nec in animabus damnatis remanet fides infusa, quam aliàs habuerunt. Et licet in damnatis invenitur affectus boni naturalis, quia etiam in dæmonibus secundum Dionys. naturalia manserunt integra, non tamen in illis virtutes acquisitæ, & multò minùs infusæ perseverant; quia plenitudini malitiæ, & obfirmatæ eorum perversitati repugnat boni præsertim gratuiti affectio.

Quare in dæmonibus non est nisi fides humana & acquisita, quâ miracula à Christo, & Sanctis ejus in Christianæ Religionis confirmationem edita omnes naturæ vires excedere conspicientes, & aliunde plures infideles ob peccatum infidelitatis à se tanquam divinæ justitiæ tortoribus in inferno cruciari, propriis experimentis convicti, veram esse inferunt Religionem Catholicam, ejusque mysteria dignissima, quæ credantur. Inde est, quod sæpe cogitationes contra fidem Catholicis immittit Angelus malus, eorumque animos seducere conatur, qui fuit malus ab initio; quia certò scit grande incurrere in peccatum, qui de fide dubitant; grandius qui ab ea recedunt. Ergo in dæmonibus est fides ex visis miraculis, aliisque convinctibus indiciis acquisita; quæ tamen in illis nullâ honestate prædita, nullâ laude digna, quia ut optimè ait S. Thomas art. 2. ad 2. & 3. *Fides dæmonum est quodammodo coacta ex signorum evidentiâ, & ideo non pertinet ad laudem voluntatis eorum, quod credant. Præsertim quia*
hæc

hoc ipsum demonibus displicet, quod signa fidei sunt tam evidētia, ut per ea credere compellantur; & ideo in nullo malitia eorum minuitur, quod credunt. Et certē cū actus fidei eatenus sit bonitatis capax, quatenus à pio moventis voluntatis affectu pendet, cū nullus sit in malignis spiritibus pietatis motus, nulla est etiam honestatis particula, vel scintilla in dæmonum fide, sed mera necessitas vi, & evidētia signorum extorta. Unde fides in illis est coacta, non fortē physicē, quia cū evidētia in attestante non tollat intrinsecam rei propositæ obscuritatem, possunt absolutē inficiari, quod ipsos latet; unde fortassis in aliquod peccatum infidelitatis ex malitia labi possunt; sed tamen moraliter coacta est fides eorum, non enim possunt credere religionem illam esse falsam, quam vident tot signis naturam excedentibus confirmatam, cuius hostes, & desertores experiuntur tot tormentis divinitus castigatos. Unde non incongruē comparatur à Banneſto dæmonum fides voluntati mercatoris ad projiciendas merces ingruente tempeſtate, & imminentis mortis periculo coacti, qui ad eas in mare deturbandas nullā physicā necessitate compellitur, sed morali. Posset quidem absolutē pretiosam mercimoniam servare, & servando interire; sed efficaciter non volet, tametsi ineffaciter vellet; & in illa voluntarii, & involuntarii mixtura, & pugna, merces, ne ipse pereat, projicit. Sic caco-dæmon posset quidem absolutē veritatibus sibi latentibus detrectare fidem, & grandi, quo æstuat divinorum odio, vellet; sed impositam cernens locupletum testium nubem, illis invitus credit quæ summo sibi horrore sunt, & execrationi.

Dices:

noscebant; erat tamen adhuc quod eorum adderetur beatitudini, si per liberum arbitrium in veritate steterissent, donec istam summam beatitudinis plenitudinem, tanquam primum ipsius permutationis acciperent; id est, ut magnam per Spiritum sanctum datam abundantiam charitatis Dei, cadere ulterius omnino non possent, & hoc de se certissime nosset. Hanc plenitudinem beatitudinis non habebant, sed quia noscebant suam futuram miseriam, minore quidem, sed tamen beatitudine, sine ullo vicio fruebantur. Quibus in verbis non obscure indicat Augustinus, ad impeccabilitatem intellectualis creaturæ non sufficere beatitudinem, seu essentiam divinæ claræ visionem; nec qualemcunque ipsius amorem, & fruitionem, nisi adsit summa, & victrix delectatio omnem peccati delectationem excludens, & illa beata ubertas, quâ impletam animam nunquam peccare delectat.

Non, inquam, valet hæc responsio variis fortissimarum rationum moliminibus superiori tomo refutata, ubi ostendimus, ex visione Dei voluntatem tantoperè summi boni amabilitate rapi, ut non solum illud odisse nequeat, sed etiam illud non amare actualiter non possit. Quia licet conspectâ bonitatis essentiam non ligetur indifferentia voluntatis, impletur tamen infinito bono totam cordis humani quâlibet vasti captivitatem inundante: ergo repugnat Angelis beatam communicari visionem potuisse, quin simul data fuerit magna illa abundantia charitatis, quâ felici necessitate ulterius peccare non potuerint. Imò nunquam talem felicem necessitatem conferret charitas, nisi ex visione sequeretur; ex se enim, & ex propriis

non necessitatem confert, sed libertatem. Beatorum ergo non peccandi necessitas non à sola charitate, sed à charitate visione Dei summam bonitatem jugiter exhibente illustratâ promanât.

Nec oppositum insinuat Augustinus, qui loquitur solum de beatitudine naturali, & supernaturali viæ, quæ clementi capax est, sicut & ruinæ. Beati ergo conditi sunt Angeli, & Protoparentes, non beatitudine termini, quæ visione habetur; sed beatitudine viæ, à qua facile cadit creata libertas, nisi invincibili gratiæ, & charitatis adjumento, & victrici delectatione subleventur. Et ideo signanter vocat Augustinus beatitudinem illam minorem, quia & beatitudine cæli longè inferior est, & ruinæ obnoxia est: beatitudinis tamen nomenclaturam promeretur, quia ut tomo 2. ostendimus, tales, & tantæ erant naturæ integræ & innocentis prærogativæ, tantâ à miseriis, quas patimur, immunitas; tam sublimis, & suavis divinorum contemplatio, non merè naturalis, sed fide freta, spe gaudens, charitate exultans, ut Angeli, primique parentes in tanta cœlestium charismatum abundantia creati jure meritò felices, beati que dicerentur, ut amplius inter solvenda objecta exponemus.

Nec iterum valet, si rursùm respondeas, ex visione quidem beata amorem Dei naturalem, ad quem à natura, vel potius ab Authore naturæ determinamur, sponte, & necessario profluere: non tamen amorem moralem, & electivum, ad quem sola visio non sufficit, nisi alia superaddatur voluntati gratia, per quam essentia divîna visa delectet. Quia si ex efficacia visionis. vo-

luntas non posset essentiam divinam non diligere, sed ad eam amandam necessitaretur, amor Beatorum esset merè naturalis, non electivus, subindeque nec amor charitatis, quæ tamen non evacuetur, sed perficitur in patria.

Non, inquam, valet hæc secunda responsio. Quavis enim non negemus distinctionem amoris naturalis & electivi, cum sæpe doceat S. Thomas, quod in voluntate non solum est libertas, sed etiam natura, & isti correspondere connaturales motus, instinctus, & veluti impetus; illi verò electiones: quanvis, inquam, id ultrò fateamur, perperam tamen, & omnino falsò inde inferatur, amorem Beatorum, quo in Deum clarè visum feruntur, esse electivum, & formaliter liberum, sicut est in viâ, alioquin Beati possent quotidie peccare, & ab amore Dei pro arbitratu cessare. Nam amor moralis, electivus, liber, & ad quem naturaliter non determinamur ulla necessitate specificationis, aut exercitii (qualem amorem electivum in Beatis comminiscuntur isti recentiores Adversarii,) & desinere potest, & sæpe desinit; imò si non potuit in Angelis visione beata retineri, nihil excogitari, imò nec fingi fortius unquam poterit, quo amor ille indeclinabiliter per totam æternitatem teneatur. Ad pleniorē etiam huius responsionis confutationem illud observandum est, amorem Beatorum distingui planè ab amore naturali ex instinctu naturæ partæ, qualis in brutis respectu prolis, & in subitis & primò primis voluntatis nostræ motibus invenitur. Non enim dicitur naturalis amor Beatorum, quia ex impetu solius naturæ procedit, sed quia necessario à voluntate procedit, & po-

test

test dici eminenter electivus, & liber, non solum quia est radix liberi amoris creaturarum, sed etiam quia circa Deum non ex alligatione potestatis, sed ex plenitudine suæ capacitatis occupatur. Ad cuius evidentiam considerandum est, libertatem, quæ est vis electiva mediorum, servato ordine finis, in ampla voluntatis universalitate fundari; cum enim voluntas sit capax boni infiniti, à creatis omnibus & finitis bonis est independens; unde cum nulli alligetur, nullo plenè satiatur, potest omnia decurrere, unum alteri præferre, & aliud præ alio eligere. Cum autem summum, & universale bonum in se clarè, & apertè intuitiva visione proponitur, tunc voluntatis indifferentia non ligatur quidem, vel arétatur, sicut in brutis; sed perficitur, & consummatur, quia tota ejus capacitas, tota universalitas, & amplitudo, quæ indifferentiæ radix est, infinità bonitate clarè visâ impletur. Quid ergo mirum, si voluntas infinito bono plena illi necessariò, & sine indifferentia hæreat, cum facultas ultra, vel extra adæquatum suum objectum ferri non possit; & bonum sit objectum voluntatis, & omne bonum in Deo clarè viso? Ergo necessitas Beati Deum videntis non est coarétata, ligata, & imperfecta, sicut in motibus naturalibus; sed plena, sed eminens, sed divina, utpote similis illi, quâ Deus diligit seipsum, quâ Pater diligit Filium, & producit Spiritum sanctum: Sed de his non semel in decursu Theologiæ sermonem habuimus, & satius est æternum illum, beatèque necessarium amorem sitire, quàm de eo operose nimis, & importunè disputare.

Ad fundamenta oppositæ sententiæ responsum

sum non est difficile. Et quidem primum argumentum ex miseria desumptum, in Adversarios evidenter retorquetur. Si enim miseria est non videre Deum, quem innato appetitu desideramus, quanto major miseria est tantum bonum videndo possidere, nec esse de illius possessione securum? Melius profectò esset Deum non videre, quàm illum cadendi metu posse perdere. Itaque Angeli initio conditionis suæ, vel Deum se posse perdere sciebant, vel nesciebant; si sciebant, miseri erant, quia erant de felicitate incerti; si nesciebant, ignari erant & errantes: quis autem dubitat ignorantiam & errorem grandem esse miseriam? Hinc præclare August. lib. II. de Civit. cap. II. *Verè, perfectèque beata vita non nisi aterna est, siue id sciamus, siue nescientes aliud putemus: quia scientes timor, nescientes error beatos esse non sinit.* Dicendum ergo, Angelos conditos fuisse beatos, & ab omni miseria immunes, sed beatitudine longè visione beatâ inferiori. Cum enim spiritus cœlestes omnibus gratiarum donis perfusi fuerint, & aliunde in sua habuerint potestate ad visionem illam facilè, citòque pervenire, nulla erat in illis miseria, nec carentia visionis habebat rationem privationis, sicut modò in dæmonibus post peccatum; sed stimuli ad præmium, & coronam invitantis, & ad pugnam strenuè, animoseque cum Lucifero & Angelis ejus ineundam.

Cum autem locis adductis ait Augustinus, privationem visionis esse pœnarum maximam, verum est in iis, qui ea in pœnam peccati privati sunt; & in iis maximè, qui eam obtinendi spe destituti sunt. In iis autem, qui sunt in via
adi

ad illam, quibus certò promittitur, si fideliter pugnent, respectu quorum non habet rationem privationis, sed bravii, & mercedis; in iis, inquam, carentia visionis non habet rationem pœnæ, sed incentivi amoris, qui ex dilatione dilecti boni vehementer accenditur. Considerantes ergo Angeli sancti & Protoparentes in statu innocentiae visionem claram Dei esse bonum vires naturæ excedens, & aliunde certa fide cognoscentes, se posse cum gratia sibi data ad illam pervenire, ex una parte ipse gaudebant, ex alia de carentia boni indebiti non discruciabantur. Hanc esse Augustini mentem, patet ex libro de correptione & gratia, cap. 11. ubi sic habet: *Sic & hominem fecit cum libero arbitrio; & quavis sui futuri casus ignarum, tamen ideo beatum, quia & non mori, & non miserum fieri in sua potestate esse sentiebat.* Ergo ex Augustino Protoparentes, & idem de Angelis Idicendum est, eatenus beati dici poterant, non quòd Deum viderent, sed quatenus in sua habebant potestate, & carere miseria, & ad beatam visionem facili amoris & humilitatis actu pervenire, nam carentia visionis existentis in nostra potestate, pœna dici non potest, sed coronæ præparatio.

Ad primam confirmationem respondeo optimam esse S. Thomæ solutionem, nimirum Angelum duplicem habuisse cognitionem in Verbo, scilicet naturalem, & aliam gloriæ: priorè cognovit Verbum in sua natura relucens; posteriore cognovit Verbum in sua essentia: priorem habuit à principio creationis, posteriorem verò initio beatitudinis; & hæc propriè dicitur cognitio matutina. Hanc verò habuisse Ange-

lum.

de civit. cap. 12. habet : Et hodie , ait , non imprudenter beatos vocamus , quos videmus iuste , ac pie cum spe futura immortalitatis hanc vitam ducere sine crimine . Si viri sancti tot miseriis circumdati non imprudenter beati vocari possunt , quantò iustius sanctos Angelos , & Proparentes in statu innocentiae beatos creatos esse dici potest ? Ex quibus facile expones loca Gregorii , Fulgentii , & aliorum Patrum , qui intendunt solùm Angelos fuisse conditos absque miseria , & cum beatitudine , naturali quidem perfecta , supernaturali verò inchoata : & quia illam primi peccati granditate perdidimus , merito dicit Gregorius , illuc redeundum esse per gratiam , unde cecidimus per culpam . Cætera explicatu facilia sunt .

Fides non perseverat in damnatis.

Secunda pars, quæ asserit fidem non remanere in dæmonibus, nec in damnatis, qui fideles fuerunt, expressè docetur à D. Thoma art. 2. ad 2. *Fides, inquit , quæ est donum gratiæ , inclinât hominem ad credendum secundùm aliquem affectum boni , etiamsi sit informis : unde fides , quia est in dæmonibus , non est donum gratiæ .* Ubi rationem fundamentalem insinuavit , quæ æqualiter probat de damnatis hoc modo. Fides infusa, quæ est donum gratiæ , inclinât hominem ad credendum secundùm aliquem affectum boni, nam si virtutes morales aliquem boni affectum inspirant , quantò magis infusæ ? Unde & ipsa fides per se pendet à motione voluntatis, per se ab actu charitatis perfici optat & formari, per se est fundamentum. spei , & basis totius ædificiî
Spiri

spiritualis. Sed statui dæmonum, & damnatorum repugnat virtus inclinans ad credendum secundum aliquem affectum boni, quia in illis nulla pia affectio, nulla pia emotio invenitur. Ergo nec in dæmonibus, nec in animabus damnatis remanet fides infusa, quam aliàs habuerunt. Et licet in damnatis invenitur affectus boni naturalis, quia etiam in dæmonibus secundum Dionys. naturalia manserunt integra, non tamen in illis virtutes acquisitæ, & multò minùs infusæ perseverant; quia plenitudini malitiæ, & obfirmatæ eorum perversitati repugnat boni præsertim gratuiti affectio.

Quare in dæmonibus non est nisi fides humani & acquisita, quâ miracula à Christo, & Sanctis ejus in Christianæ Religionis confirmationem edita omnes naturæ vires excedere conspicientes, & aliunde plures infideles ob peccatum infidelitatis à se tanquam divinæ justitiæ tortoribus in inferno cruciari, propriis experimentis convicti, veram esse inferunt Religionem Catholicam, ejusque mysteria dignissima, quæ credantur. Inde est, quod sæpe cogitationes contra fidem Catholicis immittit Angelus malus, eorumque animos seducere conatur, qui fuit malus ab initio; quia certò scit grande incurrere in peccatum, qui de fide dubitant; grandius qui ab ea recedunt. Ergo in dæmonibus est fides ex visis miraculis, aliisque convincentibus indiciis acquisita; quæ tamen in illis nullâ honestate prædita, nullâ laude digna, quia ut optimè ait S. Thomas art. 2. ad 2. & 3. *Fides dæmonum est quodammodo coacta ex signorum evidentiâ, & ideo non pertinet ad laudem voluntatis eorum, quod credant. Præsertim quia*
hoo

hoc ipsum demonibus displicet, quod signa fidei sunt tam evidentia, ut per ea credere compellantur; & ideo in nullo malitia eorum minuitur, quod credunt. Et certè cum actus fidei eatenus sit bonitatis capax, quatenus à pio moventis voluntatis affectu pendet, cum nullus sit in malignis spiritibus pietatis motus, nulla est etiam honestatis particula, vel scintilla in demonum fide, sed mera necessitas vi, & evidentia signorum extorta. Unde fides in illis est coacta, non fortè physicè, quia cum evidentia in attestante non tollat intrinsecam rei propositæ obscuritatem, possunt absolutè inficiari, quod ipsos latet; unde fortassis in aliquod peccatum infidelitatis ex malitia labi possunt; sed tamen moraliter coacta est fides eorum, non enim possunt credere religionem illam esse falsam, quam vident tot signis maturam excedentibus confirmatam, cuius hostes, & desertores experiuntur tot tormentis divinitus castigatos. Unde non incongruè comparatur à Banneſto demonum fides voluntati mercatoris ad projiciendas merces ingruente tempeſtate, & imminentis mortis periculo coacti, qui ad eas in mare deturbandas nullâ physicâ necessitate compellitur, sed morali. Posset quidem absolutè pretiosam mercimoniam servare, & servando interire; sed efficaciter non volet, tametsi ineffaciter vellet; & in illa voluntarii, & involuntarii mixtura, & pugna, merces, ne ipse pereat, projicit. Sic caco-dæmon posset quidem absolutè veritatibus sibi latentibus detrectare fidem, & grandi, quo æstuat divinorum odio, vellet; sed impositam cernens locupletum testium nubem, illis invitus credit quæ summo sibi horrori sunt, & execrationi.

Dices:

Dices : Fides corrumpi siue aliquo corruptivo non potest, cum sit accidens spiritale naturâ suâ incorruptibile. Nullum est autem fidei corruptivum, quàm infidelitas; fides enim destructis per peccata aliis omnibus virtutibus, adhuc in peccatore manet, nisi contra fidem infidelitate peccet : Atqui dæmones, & plures damnati, non inciderunt in peccatum infidelitatis : ergo in illis habitus fidei infusæ eo ferè modo, quo character, perseverat. Et ita innuit S. Jacobus cap. 2. suæ canonicæ epistolæ : *Dæmones, inquit, credunt, & contremiscunt.* Quod Apostoli dictum de fide infusa intelligi debere, ex eo constat, quòd eorum intendit removere excusationem, qui spretis bonis operibus, de fide sola gloriabantur. Si autem de fide infusa sermonem Apostolus non haberet, vix, ac ne vix quidem Apostolico argumento urgerentur; facile enim responderent se fide infusi præditos, à dæmonibus hæc duntaxat coacta credentibus perspicuè discerni, & toto cœlo differre. D. etiam Thomas infra *quest. 18. artic. 2. ad 2.* videtur fateri, in damnatis manere fidem, non tamen spem.

Respondeo, fidem in damnatis, qui nunquam à veræ religionis professione recesserunt, non infidelitate, sed divini concursus subtractione desinere; conveniens enim est, ut illis Deus subtrahat fidem infusam, qui in illo se statu liberè posuerunt, in quo nequit amplius fides in actum erumpere : fides namque, quæ spiritualis ædificiî basis est, & fundamentum, ad bonas operationes sicut per se inclinât, ita adveniente terribili illo statu miserandæ mortis, in qua nemo potest operari, mavult desinere, quàm æternum
otiarî.

otari. Accedit, fidem naturâ suâ non esse nisi viatricem, & peregrinam: quamdiu ergo peregrinamur à Domino, nobiscum semper manet, quibuslibet circundetur peccatis, nisi infidelitate abjiciatur. At verò finitâ viâ, ipsa finitur, quæ fuerat tantùm data comes itineris, solatium peregrinationis, dux viæ, scutum pro pugna: unde illi repugnat, & omninò conditioni ejus opponitur status termini simpliciter, sive patriæ, ubi non est opus lucerna præsentē sole, nec oportet credere, quando videtur in lumine lumen, & cernitur facie ad faciem veritas, quæ ad aurem fuerat antè loquuta. Repugnat etiam status inferni, quia cùm fides sit substantia sperandarum rerum, quomodo ibi maneret, ubi nulla spes, nulla redemptio invenitur? Ergo fidei, quæ habet rationem inchoationis, dispositionis, & viæ ad patriam, repugnat omnis status termini simpliciter. Nec est simile de charactere, qui permanet, ut Christiani à cæteris distinguantur, majori utique confusione perfundendi, qui oblatam salutis occasionem nancisci præ malitia noluerunt. Non est, inquam, simile; quia nec character per se ordinatur ad sanctas, & honestas operationes, sicut fides; nec habet terminum simpliciter, sed naturâ suâ indelebilis est, ut aliquando rerum Deo donante explicaturi sumus.

Ad auctoritatem Jacobi dicendum, sufficere ad efficaciam argumenti illius, quod sicut fides dæmonum, quia sterilis est, nihil confert ad salutem, nec eos justificat, quia nullos in illis justitiæ fructus edit: ita nihil proderit peccatoribus fides, in quibus nihil per dilectionem operatur. Quod verò fides sit in dæmonibus ex signorum

signorum evidentia acquisita, in peccatoribus verò infusa non discernit eos à dæmonibus, sed potiùs magis eos in hac parte accusat, qui infuso divinitus dono ita abutuntur, ut nolint ex fide vivere, sed contra fidei dictamen pravis actibus operari. Si nihil laudis promerentur dæmones credentes, & contremiscentes, quomodo placebunt Deo, qui acceptâ fide infusâ Deo quidem credunt, sed nec Deum timent, nec homines reverentur? Absit ut eos fides iustificet, quos magis accusat, quorum injustitiam prodit, quorum vindictam apud justum iudicem ipsa fides petit, ipsa obtinet, ipsa exequitur. Quia quoddam infidelitatis genus est ipsâ Gentilium ignorantia deterius, contra fidem monentem operari: Et longè pejus, longè fidei injuriosius est susceptæ fidei non obtemperare, quàm propositam non suscipere.

Ad D. Thomam verò respondeo S. Doctorem loco citato, *quest. 18.* non asserere fidem esse in damnatis, secus verò spem, sed magis posse esse fidem, quàm spem. Quod utique verissimum est, quia desperato damnationis statui, in quo nulla est, vel affulgebit unquam redemptionis cogitatio, magis repugnat spes liberationis, quàm cognitio divinorum. Præsertim quia in damnatis nec spes infusa, nec acquisita subesse potest, in quibus tamen est fides acquisita, quâ veritates antea sibi notas, tamen ad maiorem confusionem suam, norunt. Nam ex actibus fidei in via elicitis, & frequentatis relinquitur in intellectu quædam dispositio, quâ veritates fidei cognoscunt, nec earum obliviscuntur.

Procul ab hæreticis fides.

Tertia pars, quæ fidem excludit ab hæreticis, etiam respectu articulorum, quos non inficiantur, quosve se credere profitentur, probatur contra Durandum ratione D. Thomæ: Tunc fides in aliquo perit, quando in eo perit objectum formale fidei; nam species essentialis cuiuslibet habitus ex formali ratione objecti necessario pendet. Atqui in Hæretico etiam unicum articulum inficiente perit objectum formale fidei, quod est veritas prima, secundum quod manifestatur in Scripturis sacris, & proponitur ab Ecclesia Catholica: Hæreticus autem non inhæret sicut regulæ infallibili Ecclesiæ doctrinæ; sed ea, quæ vult, retinet; quæ non vult, pro suo rejicit arbitratu; magisque propriæ voluntati, vel potius privatæ opinioni ex propria voluntate stabilitæ adhæret. Ergo in hæretico unicum articulum negante, & alios omnes se credere profitente, neque formata, neque informis fides perseverat.

Confirmatur: Quanvis ultima fidei nostræ, & Christianæ resolutio non fiat in Ecclesiam, in eaque non sistat, ut supra ostendimus; tamen propositio Ecclesiæ est conditio sine qua non assentiremur Deo revelanti; nec Evangelio, teste Augustino, crederemus, nisi proponentis Ecclesiæ juberet authoritas; nec minùs præ-exigitur Ecclesiæ propositio antequam credamus, quàm requiratur objecti ab intellectu propositi exhibitio, antequam illud voluntate amemus. Ergo qui non adhæret veræ Ecclesiæ, non potest primæ veritati, quæ per illam innotescit,

tescit, per illam veluti organum loquitur, per illamque veluti interpretem explicatur, adhærere? Quomodo enim posset quis obscuræ, & reconditæ alicui veritati, quia Deus revelavit, assentiri, si regulæ illi firmiter non adhæreret, quâ unâ constat Deum illud revelasse? Quare sicut ille, qui ante susceptam fidem esset ita comparatus, ut singularem quendam vellet respuere articulum, nunquam fidem susciperet, nunquam fidelis evaderet, quantumlibet cæteris omnibus suum se præbiturum assensum sponderet: ita non potest unius articuli fidem perdere, quin omnium jacturam patiatur, & peccans in uno fiat omnium reus. Et hanc veritatem aperte supponit Tridentinum *sess. 6. cap. 15.* ubi docet, per peccatum infidelitatis fidem amitti. Favet etiam Scriptura dum ait, Hæreticum non esse de Ecclesia, subindeque non habere fidem Ecclesiæ, 1. Joan. 2. *Ex nobis prodierunt, sed non erant ex nobis: nam si ex nobis essent, permansissent utique nobiscum*, idest in Ecclesia. Et 1. *Timoth. 1.* ait Apostolus, quosdam amittentes bonam conscientiam, circa fidem naufragasse, quia ut ait Chrysostomus, navem, quæ est Ecclesia, perdiderunt. Vide August. *in Enchirid. cap. 1. & lib. de unit. Eccl. cap. 4. & lib. de fide & symb. cap. 10.*

Solvuntur aliqua instantia.

Objicies: Habitus non corrumpitur per unum actum vitii contrarii; nec enim corrumpitur habitus scientiæ per errorem circa unam conclusionem; nec uno injustitiæ actu eradicatur virtus justitiæ: ergo per unum infidelitatis actum,

actus, vel per unius articuli repulsam funditus evertitur fides. Quia nimirum licet virtus omni actui contrario vel resistat planè, vel certè ad resistendum inclinet, non tamen ita tenera est, aut infirma, ut quolibet adversario impetu convellatur.

Respondeo, quocumque actu contrario everti habitum, si extinguatur ratio formalis objecti; & quia quælibet minima infidelitas rationem formalem fidei enecat, peccato etiam quovis infidelitatis fides amittitur. Nec est simile de errore circa unam conclusionem, quæ non evertitur scientia circa alias; quia ut rectè ait S. Thomas *ad 2.* in diversis conclusionibus unius scientiæ sunt diversa media, per quæ probantur, quorum unum potest cognosci sine alio; & ideo homo potest scire quasdam conclusiones unius scientiæ, ignoratis aliis, vel errando circa illas. Cæterùm omnibus, & singulis articulis inhæret fides propter unum medium, scilicet propter veritatem primam propositam nobis in Scripturis secundùm doctrinam Ecclesiæ illas rectè intelligentis; & ideo qui ab hoc medio decedit, ut de facto decedit dum uni articulo ab Ecclesia proposito credere renuit, totaliter fide caret. Est ergo magnum discrimen inter fidem, & scientiam, quam unius conclusionis error non destruit; quia contrarietatem formalem respectu medii scientiæ non inducit, sed duntaxat respectu medii proprii illius conclusionis, circa quam errat. Quod verò dicitur de iustitia, aliisque virtutibus moralibus, verum non est; certum est enim, omnes virtutes morales per actus formaliter sibi contrarios penitus corrumpi, quia ut ait S. Doct. r, species cu-

iuslibet habitus à ratione formali objecti dependet, quâ sublatâ species habitus remanere non potest. Est etiam notabilis differentia inter fidem, & virtutes infusas ex una parte, & virtutes acquisitas ex alia: istæ enim, quia multis frequentatis actibus acquiruntur, & in mente veluti radicantur, sicut nec uno actu firmantur, ita nec uno pariter extirpantur. Virtutes verò infusæ, quia non labore acquiruntur, sed divinitus diffunduntur, ideo adveniente quocumque formaliter contrario, eadem facilitate à nobis abeunt, quâ in nos venerant sine nobis.

Instabis: Potest hæreticus alicui articulo propter solam Dei revelantis auctoritatem credere: ergo salvatur, & subsistit in illo ratio formalis fidei, tametsi de Ecclesia mentionem non faciat, sicut de Ecclesia non cogitabat Adamus, vel Angelus in via, nec cogitaret ille, cui Deus aliquid privatum cum præcepto credendi imperaret; in quibus tamen omnibus essentialis ratio formalis fidei conservatur.

Respondeo, hæreticum nequaquam propter Dei revelantis auctoritatem credere, quia si ei verè crederet, totum crederet quod revelat, & regulam Ecclesiæ divinam revelationem proponentem non rejiceret, sed sincerè admitteret, & humiliter sequeretur. Videtur quidem sibi aliis articulis, quos non respuit, propter Dei auctoritatem adhibere fidem, sed mentitur iniquitas sibi, quia non divinâ auctoritate, sed propriâ voluntate cietur, qui quod credat eligit, nec omnibus exoculatam præbet fidem. Nec est simile de Adamo, Angelo, vel illo cui Deus aliquid privatim revelaret, quia in illis per internam loquutionem copiosè Deus supplet, quod

quod facit in nobis necessaria matris Ecclesiæ propositio, cui divinitus concessum est veras à spuriis revelationibus discernere, canonicas ab apocryphis scripturis distinguere, & pretiosum à vili separare. Cui etiam auctoritatem conferunt Scripturæ talem, ut eam firmamentum, & columnam veritatis appellent; & qui eam non audierint, non secus ac Ethnicos, ac Publicanos reprobandos præcipiant. Quare dum hæretici illis Scripturæ testimoniis non credunt, quibus Ecclesiæ confirmatur autoritas; nec aliis etiam, quibus se credere dicunt, credunt; quia si eis propter se crederent, eis ubique crederent, nec fidem earum dimidiarent. Divinus namque spiritus Scripturarum author ubique verus est, ubique peræquè dignus qui credatur.

Urgebis: Hæretici eadem facilitate illis articulis credunt, quibus ante hæresim fidem adhibebant: ergo signum est, in illis eundem fidei habitum permanere; ubi enim idem cernitur effectus, eandem ibi inesse causam argumento est. Præsertim cum intellectus hæretici non sit intellectu Catholici ad assentiendum difficilioris mysteriis potentior: subindeque cum intellectus Catholici fidei habitus adjumento ad credendum egeat, idem etiam de hæretico dicendum est.

Respondeo, in hæreticis catholicæ veritatis desertoribus ex iteratæ fidei actibus remanere quoddam fidei acquisitæ simulachrum, non verum fidei aurum, sed aurichalcum; non eandem facilitatem ingerens, sed similem: unde non mirum si eandem pronitatem experiantur hæretici etiam post fidei suæ infusæ jacturam. Sed adhuc facilius, & fortè verius dici potest.

eandem solùm facilitatem extrinsecam, quæ provenit ex remotione impedimentorum, in hæreticis amissâ fide permanere; non subsistere tamen facilitatem intrinsecam ab habitu ingeneratam. Solent enim virtutes actuum iteratorum frequentia difficultates complanare, impedimenta removere, potentias aptare, & veluti expedire; unde pereuntibus contrario actu virtutibus, remanet quædam externa facilitas, quâ in similes actus aptata, & assueta facultas prorumpit. Et quanvis intellectus hæretici non sit catholico potentior, propriæ tamen voluntatis obstinatione, & pertinacia firmatur.

Insistes: Peccatum infidelitatis non destruit fidem, neque moraliter in genere causæ meritoria; neque physicè in genere causæ formalis, vel efficientis. Non quidem in genere causæ formalis, nam multa sunt alia peccata, quæ multò magis fidei destructionem mererentur, putà odium Dei; propter quod tamen Deus fidem infusam non subtrahit. Non etiam in genere causæ physicae efficienter aliam formam fidei contrariam inducentis, cum per remissum infidelitatis actum, quo secundum nos fides extinguatur, nequeat contrarius habitus produci, qui non nisi actibus intensis solet generari. Non denique in genere causæ formalis, quia in actu indeliberato infidelitatis & erroris est tota entitas physica, & informatio intellectus, quæ est in actu deliberato; & tamen per illum non tollitur fides sicut per istum: quod tamen peræquè conringeret, si esset formalis repugnantia, qualis inter calorem, & frigus intercedit.

Respondeo, peccatum infidelitatis expellere fidem,

fidem, non solum in genere causæ moralis dispositivæ, sed etiam formalis physicæ, quatenus authoritas divina est unicum, & indivisibile medium, quo omnibus fidei articulis assentimur; & sic cum hæreticus medium illud excludat, fidem etiam ab imis fundamentis subruit. Ad huius impugnationem dico, indeliberatum hæresis, & infidelitatis actum actui fidei formaliter non repugnare, quia sicut actus fidei à pia voluntatis motione dependet, ita actus hæresis à malitia illius.

Perstites : Fides potest esse major in uno, quàm in alio : ergo in uno potest credere unum articulum, quem in alio non credit.

Respondeo, non ideò fidem dici maiorem, vel minorem, quasi ei liceat aliquem articulum repudiare; fides enim (quod absurdum est) foret infidelis. Non dicitur etiam major, vel minor ex parte objecti formalis, quod est unum, & simplex, scilicet veritas prima. Quare ex parte solius objecti materialis potest dici major, quatenus unus habere præ alio potest maiorem fidei explicationem, & plurium veritatum notitiam. Vel etiam secundum maiorem subiecti participationem, & hoc dupliciter : primò ex parte intellectus, propter maiorem firmitatem, & mentis adhæSIONem : secundò ex parte voluntatis, propter maiorem promptitudinem, devotionem, & pietatem; fides enim ab utraque illa potentia pendet. Et licet fides exigat ut veritas prima omnibus aliis præferatur, tamen eorum, qui eam omnibus præferunt, quidam firmitus, & devotius se ei subijciunt : sicut etiam secundum meliorem intellectus dispositionem unus magis, minusve percipit virtu-

tem principiorum in seipsis , vel ut sunt variarum causæ conclusionum , & veritatum divinarum.

Quæres , quanam sit causa fidei?

Respondeo , fidem christianam esse simpliciter infusam, & donum Dei ; quia ea, quæ credimus, utpote totius naturæ intellectualis vires, & cognitionem excedentia, divino debent nobis lumine, vel à Deo immediatè, vel ab ejus ministris revelari, quibus ut credamus, non sufficit cognitio naturalis : cum enim homo veritatibus tam sublimibus , & naturali scientiæ ignotis assentiendo supra naturam suam attollatur, ut illum assensum facile eliciat , infuso supernaturalis luminis adjumento indiget , quo hujusmodi assensum valeat expeditè elicere : ergo interiori principio permanentes vires ministrante ad actus fidei frequenter exercendos opus est. Quod principium effusum in mentibus nostris per Spiritum sanctum est habitus fidei, juxta illud Ephes. 2. *Gratiæ estis salvati per fidem, & non ex vobis, ne quis gloriatur: donum enim Dei est.* Ellet hic disputandi locus adversus Semipelagianos existimantes, liberum arbitrium esse causam, quare aliquorum idem miraculum videntium, eandemque prædicationem audientium quidam credant, alii verò non credant : & ideo initium fidei esse ex nobis asseriebant , solam verò consummationem Deo auctori asseriebant. Sed hic error , alique affines fusiùs , & opportuniùs in tractatu de gratia confutabuntur.

Dices : Dona Dei non sunt imperfecta , vel
dimi

dimidiata : ergo si fides sit donum Dei , cum illa simul largietur gratiam , & charitatem : atqui potest quis habere fidem sine charitate , divinifque veritatibus credere , eas tamen non amare , ut patet in illis , qui habent fidem informem ; & in illis , qui baptizarentur cum conscientia peccati mortalis , cujus non pœniterent : ergo fides non est semper donum Dei , præsertim verò in sui initio , sed solum quando est per charitatem consummata.

Respondeo doctrinâ D. Thomæ *art. 2. & 3.* ubi ait , quod qui accipit à Deo fidem absque charitate , non simpliciter sanatur ab infidelitate , quia non removetur culpa præcedentis infidelitatis , sed sanatur secundum quid , scilicet ut cesseret à tali peccato. Hoc autem frequenter contingit , quod aliquis desistat ab uno actu peccati , etiam Deo hoc faciente ; qui tamen ab actu alterius peccati non desistit propriâ iniquitate suggerente : & per hunc etiam modum datur aliquando homini à Deo , quod credat ; non tamen datur ei charitatis donum , sicut etiam aliquibus absque charitate datur donum prophetiæ , vel aliquid simile. Nec propterea Deus est causa fidei informis ratione informitatis , quia informitas non pertinet ad rationem fidei essentialem ; fides namque non dicitur informis , nisi per defectum & carentiam exterioris formæ : Unde quod est causa fidei simpliciter dictæ , est causa fidei informis quoad entitatem , non quoad informitatem. Sicut potest aliquid dici , & esse causa diaphani , quamvis non sit causa obscuritatis in eo existentis , quia non est de ratione speciei diaphani.

Dices rursus cum Scoto , & Durando , ratio-

nem D. Thomæ à nobis in probationem responsionis adductam de more carpentibus : Si ex eo probatur necessitas fidei infusæ , quia assensus, seu actus credendi excedit vires naturæ , sequeretur nos posse habere certitudinem experimentalem de fidei existentia in nobis. At nemo scire potest , se virtutibus infusis instrui : ergo inefficax est ratio S. Thomæ.

Respondeo fatendo ex ratione D. Thomæ illud inferri , nos posse rationabiliter credere inesse nobis habitum fidei infusæ , si in actus fidei frequenter erumpamus ; nam teste Veritate , à fructibus eorum cognoscetis eos ; & arbor mala non potest bonos fructus facere. Certè cùm divinis veritatibus , iisque difficillimis propter unius Dei loquentis , & Ecclesiæ proponentis vocem assentiri , sit actus ex nulla naturali cognitione , nec ex ullo naturali appetitu sed ex intima ad Deum supernaturaliter revelantem adhæsione , & pio divinorum affectu consequutus , rationabiliter in se arbitratur esse habitum , & radicem , ejus fructus experitur. Unde potest quis scire , num habeat fidem , tametsi nesciat utrum habeat charitatem , quia seipsum convincere potest , & certiores reddere , an assentiatur revelatis , an eis assensum detrectet ? Et cùm aliunde sciat fidem sibi in Baptismo fuisse infusam , certus esse potest de fidei suæ existentia. An verò Deum amet , & ex toto corde amet , dignoscere , hoc opus , hic labor , ac secretum soli Deo notum : amoris enim proprii conatus , & actus ita sunt actibus charitatis vicini , ita eos interdum ementiuntur , ut plerumque ab illis in hac vita internosci propter circumstantes concu

concupiscentiæ insidias nec possint, nec expediat. Nobis enim latere voluit Deus, utrum verus in nobis ipsius amor inhabitet, ut in timore, & tremore salutem nostram operantes, & bene indefinenter ageremus, & bona simul opera nostra vereremur, quæ licet iusta nobis videantur, nescimus tamen, num illa sincera Dei charitas, num occultus, & subdolus nostri amor efferat.

Quæres secundo, quinam sint fidei effectus.

Respondeo triplicem potissimum fidei effectum à S. Thoma assignari. Primus est timor; cum enim per fidem apprehendantur pœnæ à Deo malis illatæ, vel præparatæ, ex ea nasci potest timor servilis, sicut oritur filialis, cum apprehendimus Deum esse immensum bonum, à quo separari pessimum est, & malorum omnium summum.

Secundus fidei effectus est spes, & fiducia; cum enim fides promissa à Deo præmia mente recolat, & voluntati exhibeat, concipitur huiusmodi bonorum obtinendorum fiducia. Nec obest, spem timori esse contrariam; nam idem secundum contraria potest esse contrariorum causa. Et sic fides, ut minatur pœna, terrorem incuti; dum præmonstrat coronas, spem allicit, animos auget, & fiduciam.

Tertius fidei effectus est puritas, vel purificatio cordis. Cum enim impuritas uniuscuiusque rei in hoc sita sit, quod vilioribus immisceatur, sicut argentum non permixtione auri, sed plumbi confusione impurum evadit; hinc est,

creaturam intellectualem per hoc impuram existere, quod se rebus temporalibus amore subjiciat, quibus naturæ dignitate, & christianismi gloriâ immensum antecellit. Tunc verò pura efficitur, quando per contrarium motum Deo, qui solus sibi superior est, adhæret. Hujus autem motus fides principium est, quia & bonos affectus inspirat, & per dilectionem operari sponte sua inclinat. Unde dicitur Actor. 15. *Fide purificans corda eorum.* Purificat etiam fides intellectum ab impuritate erroris, qui ex eo contingit, quod intellectus humanus, humanâ sapiens, & creatis assuetus, secundum rationes sensibilium divina metiri præsumit. Unde, ut aliàs vidimus, tot & tanta orta sunt in morali præsertim disciplina nefanda doctrinæ flagitia, & horrenda novitatis monstra. Cùm enim ex rerum sensibilium, quas præ manibus continuo habemus, densæ intellectui nostro creentur tenebræ circa illas res, quas voluntas nimis, & malè diligit; hinc fit, ut concupiscentiæ nebulis infuscata ratio satagat rigidas Evangelii maximas mollire, cupiditatibus lenocinari studeat, dubia dubiis superstruat, æternæ legi adversa ascitis probabilitatis coloribus oblinat, & paulatim ita progrediatur, ut nihil sit tam noxium, vel flagitiosum, quod non honestatis specie præcoloret, & ea tandem attentet dogmata, de quibus nulla unquam in Ecclesia, nulla in Patribus dubitatio coorta fuerat. At verus Theologus, fide grandis eos omnes purgat errores, divinum lumen semper invocat, ubique consulit, ut omnia in veritate judicet, & divinæ legis stateris appendat. Augeri in se fidem rogat, ut dissipatis volaticæ rationis argutiis, & erroribus,

bus, intellectum in obsequium fidei captiver, mentem divinæ legi subdat, ejusque inconstantiam unius divinæ autoritatis scripturis; vel traditione conspicuæ felicissimis vinculis compescat. Et quia certò sibi persuadet, nihil tam esse rationi consentaneum, quàm ipsam rationem fidei famulari, idèò tam contemnere opiniosæ probabilitatis conjecturas solet, quàm divinum fidei lumen corde, & opere reverteri. Quocirca Scripturæ, divinæque legis explicationem, non ex suo ingenio, vel ex metaphysicarum distinctionum promptuario petit, sacros canones adhibitis artibus non eludit, Sanctorum Patrum nitentissimis pronuntiatis exceptiones pro arbitrio non apponit, sed præfatum cœleste lumen, quod nihil aliud est, quàm verbum divinum, seu scripto consignatum, seu ab Apostolis, Apostolicisque viris ad nos traditione transmissum, invocatur, & meditatur, ut possit cum Propheta dicere, *Lucerna pedibus meis verbum tuum, & lumen semitis meis.*

Quæres tertio, quanam dona virtuti fidei respondeant?

Respondeo compendio doctrinæ D. Thomæ: *quæst. 8. & 9.* respondere donum intellectus & scientiæ. Quia sicut datur intellectus naturalis, quo veritates naturales, & essentiam rerum penetramus, nec circa exteriores solum qualitates, ut à potentiis sensitivis fieri assolet, occupamur: ita ad res supernaturales penitus indagandas, & veluti intus legendas opus est dono intellectus, quo recondita fidei arcana introspecti-

ciamus, & quancunque contrarietatem sese
 veritati fidei opponentem dissolvamus. Neces-
 sarium est etiam donum scientiæ, quò rectè ju-
 dicentur, & discernantur credènda à non cre-
 dendis. Quod quidem donum maximè versa-
 tur circa res creatas, ut distinguatur à iudicio
 sapientiæ, quod procedit per altissimas causas,
 ideoque perfectissimum est. Sicut autem quan-
 do in aliquo genere datur aliquod perfectissi-
 mum, & alia, quæ à tali perfectione deficiunt;
 tunc quod perfectissimum est, speciali nomine
 insignitur, & nomen genericum in speciebus
 minùs perfectis retinetur: sicut præcipua ani-
 mantium species homo vocatur, bruta verò ge-
 nericum animalis nomen retinent: sic etiam
 quia nomen scientiæ importat quandam iudici-
 certitudinem, virtus illa, quæ per altissimam
 causam certitudinem efficit, speciale sortietur
 nomen, & hæc est sapientia, quæ de rebus om-
 nibus per altissimam causam, scilicet Deum, ju-
 dicium fert: cognitio verò rerum per causas se-
 cundas, utpote imperfectior, retinet sibi no-
 men genericum scientiæ. Cujus proinde pro-
 prius actus est per res creatas & visibiles invisi-
 bilia Dei intellecta conspicerè. Nam quilibet
 habitus respicit formaliter medium, per quod
 aliquid cognoscit, & materialiter id, quod per
 illud medium cognoscitur: Unde cum scientia
 cognoscat Deum per creaturas, eas formaliter
 respicit; sicut è contra sapientia formaliter res-
 picit Deum, & materialiter creaturas, quia ju-
 dicat de rebus creatis per divinas. Scientia igitur
 ponitur speciale donum, secundum quod
 restringitur iudicium ad creaturas. Nec obest,
 quod scientia perficit fidem immediatè circa
 divina,

divina, & non nisi secundariò circa creata versantem; unde fidem debere imitari scientiam consequens est. Non obest, inquam, quia scientia fidem non nisi in ordine ad actum secundarium perficit. Et hoc est, quod sibi vult D. Thomas *quest. 9. artic. 2. ad 1.* dum ait, quod licet ea, de quibus est fides, sint res divinæ & æternæ; tamen ipsa fides est quoddam temporale in animo existens, idest debet perficere scientiam temporalem, quam habemus de Deo per creaturas; sicut gratia perficit naturam, & ad hoc indiget dono scientiæ.

Dices: Cognitio necessariorum ad salutem sufficienter per fidem habetur: Ergo frustra multiplicantur dona intellectus, & scientiæ. Quod etiam à posteriori liquet; videmus enim multos eximii sanctitatis viros, rudes & hebetes, & mulierculas imperitas, in quibus relucet gratia divina: profundus tamen divinorum intellectus, & infusa creaturarum scientia longè est ab illis.

Respondeo, suppositâ etiam fide, non superflue donum intellectus in habentibus gratiam, ut penetrantior habeatur veritatum fide reuelatarum cognitio: fides namque ex proprio, & speciali officio habet solùm veritates supernaturales detegere, & detectis ultrò assentiri: at verò donum intellectus motiva fidei penetrat, veritatibus divinis altè, & seriò meditatæ animum pascit, eoque instructus homo plenè intelligit, quomodo fides & piis opituletur, & adversus impios defendatur. In summa, Fidelis Scripturis ab Ecclesia, & in sensu Ecclesiæ credit: sed intelligens scit, quomodo omnis Scriptura divinitus inspirata utilis sit ad docendum,
ad

ad arguendum, ad corripiendum, ad erudiendum in iustitia, ut dicitur 2. *Timoth.* 3. Et idem proportionaliter dicendum est de scientia, quæ creaturarum cognitionem fidei subjicit, & in ordine ad Deum omnem scientiam refert. Quod sanè satis rarum est; nam ut aliàs ex Bernardo didiscimus, in studio creaturarum alii considerant quæ facta sunt, uni voluptati immergi; alii considerant quomodo facta sunt, uni curiositati addicti; pauci propter quid facta sunt, attendunt; & hoc ultimum præstat donum scientiæ, quæ Deum in creaturis considerat, & creaturas propter Deum.

Ad id, quod dicitur de viris, & mulieribus pietate insignibus, sed rudibus & hebetibus: respondeo, animas illas simplices, subtiles quidem Theologorum speculationes non callere, nec divinorum rationes explicitè scire; dono tamen intellectus, & scientiæ ita in actu exercito veritatibus divinis convinci, & in fide firmari, ut nullis hæreticorum sophismatis, nullis tyrannorum terculamentis, nullis maligni spiritus insidiis tantisper concutiantur. Hinc videmus, sanctos rusticos, & humiles mulierculas interdum in divinorum contemplatione pernoctare, & suavissima internæ orationis, & quietis colloquia vix posse interrompere: videmus eos, quia rectum appetitum habent, sana, & integra in dubiis ferre judicia: videmus eos æterna sapere, terrena fastidire. Ergo divina rectè intelligunt, quorum animus divinorum consideratione saginatur. Porro nonne scientes, & sapientes dici debent, quibus omnia sapiunt prout sunt, humana negligunt, divina æstimant, & de rebus illud judicium ferunt, quale Deus ipse fert?

fert? Unde hoc? unde hoc? Certè ex cœlestium donorum infusione; nam ut Christus confite-
tur, divinæ veritates sapientibus, & prudenti-
bus absconditæ, parvulis revelantur; & ut docet:
Spiritus sanctus, cum simplicibus est sermocina-
tio Dei. Effectus autem hujusmodi donorum
non est sterilis, & ut dicam philosophica veri-
tatum speculatio, sed recta de ultimo fine æsti-
matio. Unde illa dona in solis justis inveniun-
tur; rectam enim de ultimo fine æstimationem
habere nequit peccator; unde de malis dicitur:
Urinam scirent, & intelligerent. Nam si ali-
quando mali, & simul docti rectè de divinis
mysteriis disputant, enarrantes justitias Dei, &
assumentes testamentum ejus per os suum; non
tamen dono intellectus præditi sunt, quia illa
divinorum notitia practicâ æstimatione caret,
unde ut Augustinus in *Psal. 118.* ait: *In illis præ-
volat intellectus, & tardè sequitur humanus at-
que infirmus affectus.*

Observanda est etiam doctrina, quam tradit:
D. Thomas *art. 6.* ubi ex 1. 2. *quest. 68. art. 4.*
supponit, dona pertinentia ad intellectum di-
stingui; sed ulteriùs rationem distinctionis in-
dagans retractat, quod loco citato dixerat. Ibi
enim docuerat, donum intellectus distingui à
dono scientiæ & consilii, quia ista duo pertinent
ad practicam cognitionem; à dono verò sapien-
tiæ, quòd istud pertineat ad speculativam cog-
nitionem, quia ad sapientiam pertinet judicium,
ad intellectum verò capacitas intelligentiæ re-
rum propositarum, seu intima penetratio ea-
rum. Verùm hoc diligentius, vel ut ait Caje-
tanus, diviniùs intuens, & profundius confi-
derans, docet quod quia illa dona ordinantur.
ad

ad supernaturalem cognitionem fidei, eorum distinctio donorum convenientius ex distinctione eorum, quæ respicit fides, sumendam esse. Fides autem primò & principaliter se habet ad veritatem primam; secundò ad creaturas, prout ordinantur in objectum fidei, descendit; tertio ad directionem humanorum operum, & præscribenda vitæ Christianæ officia fides extenditur: unde duo ex parte intellectus circa credenda requiruntur: primum, ut intellectu penetrentur illa omnia, sive speculativa sint, sive practica: deinde rectum de illis ferre iudicium opus est, ut quibus inhærendum sit, à quibusque recedendum, appareat, & constet. Quod quidem iudicium per rationes divinas latum, ad sapientiam; per creatas & proprias causas formatum pertinet ad scientiam. Denique Christianorum officiorum singularis directio, & sacrarum maximarum ad individua quæque opera applicatio ad consilium spectat. Uno verbo, intellectus est veritatum divinarum penetrativus; sapientia est omnium per causas altissimas iudex; scientia est rerum per causas inferiores & proprias arbitra; consilium denique tanquam Christianæ vitæ dux, & pædagogus singularibus casibus resolvendis præsto est.

Quam doctrinam præclarissimè illustrat Doctor Angelicus *solut. ad 1.* quia per hoc declaratur propria alicujus doni ratio, & specialis ejus character innotescit, per quod à malo, & vitio sibi opposito distinguitur; contraria enim contrariis opposita magis elucescunt, & clariùs dignoscuntur. Atqui ex Gregorio 2. *Mor. c. 36.* sapientiæ opponitur stultitia, hebetudini intellectus,

lectus, ignorantia scientia, præcipationi consilium. Ergo sicut hebes dicitur, qui caret acumine; acuminis verò est intima penetrare, & veluti interfecare; ita ad donum intellectus hebetudini oppositum pertinet omnia cum practica, tum speculativa, non judicando quidem, sed apprehendendo penetrare. Ergo rursus sicut stultus dicitur qui perversum de communi vitæ sine iudicium fert; ita proprium sapientia munus erit rectè circa finem communem, & univversalem se habere, & per illum de cæteris judicare. Ergo iterum sicut ignorantia in humanarum causarum cognitione cæcutit, & defectum mentis circa quæcumque particularia importat; ita scientia dono rectum de rebus per causas inferiores, & creatas feret iudicium. Ergo denique sicut præcipationis sine deliberatione procedit, ita consilium efficit, ut homo non nisi cum matura rationis deliberatione procedat. Nec dici potest, frustra tot dona uni virtuti respondere, quia licet donum sit perfectius virtute morali, non tamen Theologicâ; unde nihil mirum, si plura dona uni virtuti Theologicæ adornandæ, & perficiendæ deserviant.

Si autem petas, quamnam beatitudo, quinam fructus dono intellectus, & scientia respondeant? Respondebo ex doctrina *art. 7. a. 8. & art. 4. q. 9.* dono intellectus respondere sextam beatitudinem, scilicet munditiam cordis, cui Dei visio promissa est. Quia duplex est munditia, alia præambula & dispositiva ad visionem, quæ est cordis ab inordinatis affectibus depuratio, quæ per virtutes, & dona appetitus obtinetur. Alia est munditia cordis quasi comple-

tiva

tiva, quæ est animi ab hæresibus, erroribus, phantasmatibus. & falsis æstimationibus depuratio, & hanc donum intellectus confert. Similiter duplex est visio: prior est quidditativa & perfecta, postèrior abstractiva & imperfecta, quâ non videmus de Deo quid est, sed quid non est; eoque perfectior est, quo magis intelligimus, Deum quidquid intellectu comprehenditur excedere. Et utraque dono intellectus habetur; prior quidem in consummatione patriæ, postèrior in inchoatione viæ.

Cæterum dono scientiæ correspondet beatitudo flendi, quia ut ait August. lib. 1. de serm. Domini in monte, cap. 6: *Scientia convenit lugentibus, qui didicerunt quibus malis victi sunt, qui quasi bona petierunt.* Ratio est, quia dono scientiæ rectum de creaturis iudicium fertur, & quia creaturæ sæpe nimis occasionem peccandi ministrant, & ut dicitur Sap. 13. sunt muscipula pedibus insipientium: ideo dono scientiæ præditus, dum hæc apprimè cognoscit inter tot impediencia à creaturis pericula, & in tam ampla doloris materia luget, & implet illud Ecclesiast. 1. *Qui addit scientiam, addit & dolorem.* Unde scientiæ convenienter respondet fletus, respondet etiam lacrymarum præmium, scilicet consolatio, non solum quia est quædam flere voluptas, sed etiam quia dum creaturarum insidias, & incentiva peccati in bonum virtutis convertit, inde gaudii, & solatii materiam accipit, unde occasio, & fons lacrymarum oriebatur.

Porro fructus huiusmodi donorum est fides, non sumpta pro habitu, de quo tota hac dissertatione disputamus; sic enim est prior, & radix
doni

doni intellectus ; sed ut explicat D. Thomas *artic. 8.* sumpta pro fidei certitudine , & tranquilla adhesiono, ad quam homo dono intellectus pervenit , unde ineffabile gaudium in voluntatem derivatur. Licet enim fructus propriè pertineat ad voluntatem , quia est ultima finis ultimi perceptio , & fructio summa suavitate condita , sicut fructus est ultimum , quod ab arbore reportatur suavissimum emolumentum, si tamen fructus per ampliationem pro ultimo, quod cuique proprium est , accipitur ; sic fides, seu suavis mentis quies ex veritatibus revelatis firmiter creditis percepta fructus nomen, & rationem jure merito obtinebit. Notat verò S. Doctor *ad 3. consilio* non respondere fructum proprium, quia pertinet ad cognitionem practicam , quæ in proprio fundo fructum non parit, cum non propter se quærat, sed ad aliud ordinetur. Observat etiam sapientiæ , & scientiæ eundem , qui intellectui respondet , fructum convenire, & plures in appetitu, quàm in intellectu reperiri ; quia , ut dictum est, ratio fructus magis ad voluntatem pertinet.

R E F L E X I O.

Vides quantis sit fecunda effectibus, quibus opima, & ornata muneribus christiana fides ; si tamen charitati conjuncta sit. Si autem scire aves , Lector optime , qualis, & quanta sit fides tua , an cœlestibus sit instructa donis, an intellectu profunda , num scientiâ pollens, sapientiâ sublimis, consilio discreta , illam considera Angelici Doctoris assertionem , quâ *quest. 8. art. 3.* & *quest. 9. art.* similiter 3. asserit dona illa esse specu

speculativo - practica, quia non solas æternas veritates meditantur, sed etiam operationes bonas dirigunt, ut fides nedum revelatis credat, sed etiam per dilectionem operetur: ergo ille solùm præfatis donis instructus censendus est, qui in agendis non nisi rationibus æternis regitur, quibus consulendis inhæret superior ratio, ut Augustinus *lib. 12. de Trinit. cap. 7.* tradit. Ergo à donis illis desertus est, & illis penitus destitutus, qui non considerat æterna, ut sunt regulæ humanorum actuum, qui ut ait D. Thomas citatus ad 2. *Regulari à lege æterna indigent;* qui quod dicunt, non faciunt: unde nec illis intellectus bonus adest, qui omnibus facientibus bonum inest; nec beata illa scientia Sanctorum, sine qua vana est omnis eruditio Doctorum.

Et quanvis hæc fidei donis circumamictæ privilegia magis doceat unctio quàm lectio, easque divini susurri venas, & auræ intus spirantis lenitatem solus cognoscere queat, qui experitur & gustat, quoniam suavis est Dominus; quia nomen illud novum, quod nemo scit, nisi qui accipit, non contentioso disputationum certamine, sed connaturalitate, & divinorum experienciâ patescit: Attamen iusti ex fide viventis, & hominis spiritalis statum, & conditiones eruditè, & juxtâ piè Cardinalis Cajetanus ex illis verbis derivavit, quæ Veritas *Ioan. 3.* protulit dicens: *Spiritus ubi vult spirat, & vocem ejus audis, & nescis unde veniat, aut quò vadat: sic est omnis, qui natus est ex spiritu.* Spiritus ubi vult spirat, quia ubi spiritus Domini, ibi libertas; & homo similiter spiritalis funibus peccatorum, quibus constringebatur, dis-

dissolutis, depositis animæ veluti compedibus creaturarum, contractis duri cordis vestibus ferreis, assuinit pennas ut aquila, volat, & non deficit. Tunc verò vocem ejus audis, quia qui natus est ex spiritu, eructat ex corde verba bona; ex abundantia enim cordis os loquitur, non humana, sed divina; non terrena, sed cœlestia. Veruntamen quia virum illum spiritualem in timore & tremore salutem operari vult Spiritus sanctus, qui utique nisi super humilem, & tementem sermones suos non requiescit; ideo nescit unde veniat, aut quò vadat; originem, processum, & finem internæ inspirationis ignorat. Conjicit quidem vir ille divinus habitare Christum per fidem in corde suo; veritates fidei non intelligit modò, sed & sapit; experitur quidem abundantiam pietatis, ubertatem devotionis, imbres compunctionis, plenitudinem consolationis, pinguedinem spiritus; sentit ignitum eloquium, atque ex eo conscientiam uri in recordatione peccati; nec solum compungitur in sermonibus sanctis, sed & se totum convertere videtur ad Dominum; juratque, & statuit custodire judicia justitiæ ejus: attamen anceps, & pendulus timet, ne proprius, vel malus spiritus Spiritum sanctum eementiatur; quia ut dicitur Job 2. *Spiritus ejus ornat cœlos, & obstetricante manu ejus, eductus est coluber tortuosus.* Id est, spiritu Domini animæ cœlum, intellectum & voluntatem ornare volente splendore fidei, ardore charitatis, coluber tortuosus sinuosas vias quærit, ut specie pietatis, velamine sanctitatis, prætextu visionum prudentes in oculis suis decipiat. Hujus autem insidias facilè deteges, facilè superabis, si ex fide per dilectionem operante

raute vivas. Quia ut docet August. 8. de Trinit. cap. 9. *Quantò flagrantius Deum diligimus, tantò certius, sereniusque videmus.* Deum quidem time, insidiantis diaboli latentes formidamachinas, sed fide ductus, spe fretus, charitate fervidus, totum te Deo permitte, quia tibi adhærere Deo bonum est, & ponere in Domino Deo tuo spem tuam. Quia unica regula, quâ Dona fidei annexa in nobis præsentia esse con-
 jicere licet, amor est, dicente Bernardo serm. 57. in Cant. *Adesse spiritum jam noveris, si te inardescere sentias amore ejus. Ignis, qui Deus est, consumit quidem, sed non affligit; ardet suaviter, desolat feliciter; est lenim verè carbo desolatorius, sed qui sic in vitia exerceat vim ignis, ut anima vicem exhibeat unctionis.* Ergo in virtute, quâ immutaris; & in amore, quo inflammaris, Dominum præsentem intellige.

SPECVLATIO III.

Præcepta fidei cùm interioris, tum exterioris expenduntur.

Quia tota hujus assertionis materia moralis est, & practica magis, quàm speculativa; ideò perspicuitatis, & majoris utilitatis gratiâ fusas, quæ circa illam excitari possunt, & solent, controversias sequentibus documentis breviter expediemus, ut tam necessariis præceptis promptius obsequamur.

Fides supernaturalis necessaria.

Sciendum itaque primò ; fidem supernaturalem esse necessariam ad salutem. Expressè enim definivit Doctor gentium , Hebr. 11. *Impossibile est sine fide placere Deo.* Loqui autem Apostolum de fide supernaturali , ex eo claret , quòd fidem illam , quam vult esse necessariam , vocat ibidem , *substantiam sperandarum rerum , argumentum non apparenium* : quam definitionem non nisi fidei supernaturali convenire posse , per se evidens est. Sed quid apertius illo Veritatis oraculo Marci ultimo : *Qui non crediderit , condemnabitur ?* Et certè cum nullus possit in vitam ingredi sine iustitia , manifestum est , ad salutem necessariam esse fidem , quæ totius est justificationis initium. Rom. 10. *Corde creditur ad iustitiam.* Gal... *Ex fide justificat Gentes Deus ;* non quòd sola fides justificet , sed quia sine fide impossibile sit quemquam justificari.

Dices : In lege naturæ nullum fuit fidei , nec ullius alterius actus supernaturalis præceptum : Ergo fides non est per se , simpliciter , & absolute necessaria necessitate mediæ ad salutem. Quod etiam indicare videtur Apostolus Rom. 2. dicens : *Gentes quæ legem non habent , naturaliter ea , quæ legis sunt , faciunt* : idest per legem naturalem ostendentem quid sit agendum , ea quæ legis sunt , implent : sed observatio mandatorum ducit ad vitam æternam , juxta illud : *Si vis ad vitam ingredi , serva mandata.* Ergo absque fide supernaturali potest vita æterna comparari.

Respondeo , statum legis naturalis non ideo
vocat

vocari talem , quia omni erat cognitione , subindeque præcepto supernaturali destitutus ; sed quia illius status notitia , & lex nullis erat scripturis consignata , sed à Deo Adamo inspirata , & à Protoparente ad posteros ore transmissa , & propagata. Cæterùm in illo statu saltem ante universalem generis humani corruptionem , & idololatriæ pestem toto quàm latè patet orbe grassantem , multa supernaturalia divinitus inspirata cognoscebantur ; multa quoque præcepta urgebant , inter quæ nullum est præcepto fidei antiquius , quia est cæterorum omnium basis , & fundamentum. Unde Apostolus *Hebr. 11.* de quocumque , & in quocumque statu generatim affirmat : *Accedentem ad Deum oportet credere quia est , & inquirentibus se remunerator est.* Accedit , malè inferri , nullam dari de fide in hoc statu legem , quia in statu legis naturalis nulla extabat. Quia licèt istud concederetur (quod tamen inficiamur ;) malè tamen inde argumentum desumeretur , cùm possint diversæ pro distinctis statibus leges condi.

Ad locum verò Apostoli , *Rom. 2.* dicendum , ly *naturaliter* , ita exponendum esse , ut sit sensus , Gentes per naturam gratiâ reformatam legem implevisse , ut ibi S. Thomas exponit. Quod interpretamentum ex Augustino deprompserat. *Propterea naturaliter* , inquit lib. 4. cont. Jul. cap. 3. *quia ut crederent , ipsa in eis est per Dei gratiam correctâ natura.* Et lib. de spiritu & lit. cap. 29. *Fiunt quæ legis sunt naturaliter , non quòd per naturam negata sit gratia , sed potius per gratiam reparata natura.* Doctè etiam ex S. Thoma observat Estius , ly *-naturaliter* , non contraponi gratiæ , sed legi , ut
sit

fit sensus : Gentes , quæ legem scriptam non acceperunt , naturaliter , idest monstrante naturali lumine , absque magisterio legis scriptæ , quanvis non sine gratia reparante naturam , quæ legis sunt , faciunt. Unde subdit Apostolus : *Ejusmodi legem non habentes , ipsi sibi sunt lex ;* idest sine legis adminiculo propria inclinatione gratiâ adjuta operantur bonum. Addunt alii , *ly naturaliter* , non opponi gratiæ , sed servituti , ut sit sensus : Gentes , gratiâ tamen adjuncta , sponte , libenter , & ex animo , non verò serviliter , & coactè , sicut Judæi , legem observant naturalem.

Sciendum secundò , omni tempore aliqualem Incarnationis notitiam fuisse necessariam , quia Christus est via veniendi ad beatitudinem , & non est aliud nomen hominibus datum , in quo oporteat nos salvos fieri , ut dicitur *Act. 4.* Diversimodè tamen secundum diversitatem temporum , & personarum Sol justitiæ notitiæ suæ radios diffundebat. Nam ante statum peccati explicitam Christi fidem habebat Adamus , non prout erat futurus redemptor , & à peccato liberator , sed gloriæ consummator. Post peccatum verò majores , & doctrinam fidei callentiores futuram per passionem à peccato liberationem sperabant , & credebant , eamque in sacrificiis divinitus institutis figuratam prævidebant. Minores verò illam non nisi impicitè sub illorum sacrificiorum velamine involutam credebant. Unde in lege naturæ & scripta poterant multi salvari , & reapse salvabantur absque explicita Trinitatis , & Incarnationis notitia , ex meritis tamen Christi , qui propterea dicitur Agnus occisus ab origine mundi ; quia in omnia sæcula

merita Salvatoris divinæ æternitati præsentia efficaciam suam profundeabant. Ita perspicuè docet D. Thomas *art. 7. in corpore*, dicens quod minores sub velamine illorum sacrificiorum credentes ea divinitus esse disposita de Christo venturo, *quodammodo habebant velatam cognitionem*, quæ utique explicita non est. Et ad 3. *Si qui salvati fuerunt, quibus revelatio non fuit facta, non fuerunt salvati absque fide Mediatoris; quia etsi non habuerunt fidem explicitam, habuerunt tamen implicitam.* Et in 3. dist. 25. quæst. 2. art. 2. quæst. 2. ad 3. *Illi quibus spiritalis revelatio facta non fuerat, salvari poterant, etiamsi nihil de lege Moyse audivissent, neque aliquid de ea scirent; quia lex illa non erat omnibus data, sed tantum Iudæis: unde alii non peccabant, si legis observantias non servarent; salvabantur tamen fide implicita Redemptoris implicando fidem suam in cognitionem Dei.*

Et ratio est, quia fides Christi explicita tempore naturæ, & legis non erat necessaria, vel necessitate mediæ ex natura sua essentialiter requisiti, vel necessitate præcepti divini. Non quidem necessitate mediæ ex natura sua requisiti, cum ad salutem per se sufficiat dilectio Dei super omnia, & perseverantia in illa: licet autem fides Christi dilectionem præcipuè inflammet, absolutè tamen accedens ad Deum, credens quia est, & remunerator, charitatis flammam Deo juvante concipere, in eaque Dei auxilio perseverare potest. Non erat etiam fides explicita Christi necessaria necessitate præcepti, quia nullibi Scripturarum præceptum illud extat, nec ullo traditionis vestigio, nullâ Patrum, aut Conciliorum authoritate firmatur. Imò quia

quia communiter luctuosum peccati originalis funus ignorabatur ; ideo pauci etiam Judæi Messiam futurum esse Salvatorem animarum sperabant, sed cum ut Regem duntaxat temporalem, mundanâ gloriâ splendentem præstolabantur, nec bona spiritalia expectabant.

Dices : D. Augustinus *epist.* 109. & 157. & *lib.* 18. *de Civit. cap.* 47. ait, nemini ante adventum Christi concessum fuisse esse justum, nisi cui divinitus revelaretur unus mediator Dei, & hominum Christus Jesus : Ergo necessaria semper fuit explicita Christi explicatio.

Respondeo, nemini concessum fuisse esse justum, nisi revelaretur Christus eo modo, quo tunc revelari debebat, sub velamine nimirum sacrificiorum obumbratus, ut ait D. Thomas. Unde Augustinus proportionaliter ad uniuscujusque statum sine dubio loquutus est. Nisi dicas cum Hugone à S. Victore, S. Doctorem loqui de explicita revelatione Christi facta corpori Ecclesiæ in lege naturæ, vel scripta ; non verò de revelatione singulis personis facta. Nemo ergo justus fiebat sine revelatione Mediatoris, non cuilibet justo nota, sed corpori Ecclesiæ, cui credebatur, facta : unde sufficiebat pro illo statu, ut majores explicitam Christi fidem haberent, minores verò implicitam in fide majorum consequerentur : quod etiam S. Thomas agnoscit. Vel tandem de ultima, & consummata justitia, & salute, quæ habetur in gloria, intelligi potest Augustinus.

*In lege noua simpliciter est necessaria fides
Saluatoris.*

Sciendum tertio, in statu novæ legis fidem explicitam Christi esse adeo necessariam, ut absque ea nullus vel justificari, vel salutem adipisci ullatenus possit. Hanc quidem positionem inficiantur Suares, & Cardinalis Delugo: nostræ tamen doctrinæ universitas Patrum, & Scripturarum consensus favent. Scripturæ quidem novi Testamenti; nam præterquàm quod tota ad Romanos Pauli epistola in unum illum scopum collinat, ut monstret, neque legem, neque cæremonias ad justificationem sine fide Mediatoris sufficere; præter hoc, inquam, quid illis ejusdem Apostoli verbis expressius, quæ ex Hebr. ix. superiùs ponderavimus: *Sine fide impossibile est placere Deo.* Nam eò loci sermonem habet Paulus de actu fidei; subdit namque statim: *Credere enim oportet.* Loqui autem ipsum de fide Trinitatis & Christi, patet; quia de ea fide utique id pronuntiat, quam versu i. dixerat esse substantiam sperandarum rerum: per res autem sperandas intelligit Doctor Gentium objectum, quod per se pertinet ad fidem; definit etenim fidem per ordinem ad proprium objectum. Illa autem, inquit D. Thomas *quæst. i. art. 8.* per se pertinent ad fidem, quorum visione in vita æterna perfruemur, & per quæ ducimur in vitam æternam: duo autem nobis in patria videnda potissimùm proponentur, scilicet occultum divinitatis, cujus visione beabimur; & mysterium humanitatis, per quam in gloriam filiorum Dei accessum habemus, ut dicitur *Rom. 5.*
unde

unde dicitur Joan. 17. *Hæc est vita æterna, ne cognoscant te Deum verum, & quem misisti Iesum Christum.* Ergo sine fide actuali, & explicita Trinitatis, & Incarnationis impossibile est placere Deo, subindeque justificari. Sed quid illo Veritatis oraculo apertius, quod Marci ultimo habetur: *Prædicate Evangelium omni creatura. Qui crediderit, & baptizatus fuerit, salvus erit; qui verò non crediderit, condemnabitur.* Quid porro est credere Evangelio, nisi fidem habere explicitam Salvatoris? Ergo post prædicatum Evangelium fides explicita Christi est medium ad salutem prorsus necessarium.

Adstipulatur Patrum consensus. In primis Augustinus ita est pro nobis totus, ut vix clarissima ejus testimonia explicari possint, quin evincant, etiam ante Christi adventum in lege naturæ, & Moyse fidem venturi Mediatoris explicitam, fuisse medium ad justificationem omnino necessarium, ut cum lib. 2. contra Pelagium & Celestium, seu de pec. orig. cap. 24. ait: *Sine fide incarnationis, & mortis, & resurrectionis Christi, neque antiquos justos, ut justî essent, à peccatis potuisse mundari, & Dei gratiâ justificari, veritas Christiana non dubitat.* Quæ quidem verba, aliaque non minùs energica, & significantia multiplici interpretamento explanare utcumque conati sumus; sed ea, quæ subjungimus in favorem nostræ sententiæ verba, quibus docet tempore legis gratiæ ad unum omnes ad fidem Christi explicitam adstringi, clariora sunt, quàm ut ullo possint subterfugio declinari. Si enim Veritas loquitur, inquit lib. de correp. & grat. cap. 7. *non liberabitur à damnatione, qua facta est per Adam, nisi per fidem Iesu*

Christi; & tamen ab hac damnatione non se liberabunt, qui potuerunt dicere, non se audivisse Evangelium Christi. Et postea: Ac per hoc, & qui Evangelium non audierunt, & qui eo audito in melius commutati perseverantiam non acceperunt, & qui audito Evangelio venire ad Christum, hoc est in eum credere noluerunt, & qui per aetatem parvulam nec credere potuerunt, sed ab originali noxa sclo possent lavacro regenerationis absolvi, quo tamen non accepto mortui perierunt, non sunt ab illa massa perditionis discreti. Quæ sanè verba nullâ ponderatione, sed timore egent. Item lib. de pradeſt. SS. cap.7. de Cornelio ait: Quod si potuisset sine fide Christi salvus esse, non ad edificandum mitteretur architectus Petrus. At si qui forent, qui salutem primam, vel ultimam sine fide Christi consequi possent ex iis, qui Evangelium non audierunt, maximè in eorum numero reponendus esset Cornelius multiplici virtutum ornamento decoratus: Ergo si ille, Augustino doctore; ille, inquam tantoperè in scripturis ob pietatem commendatus, sine explicita Christi fide salvari nequivit, nullus prorsus salutem sine ejusdem Servatoris fide consequi potest. Hinc Hieron. in cap.1. ad Ephes. Non antè filii esse possumus, inquit, quàm filii ejus Iesu Christi fidem & intelligentiam recipiamus. Quam fidem cap. 3. principium & originem fiduciæ, atque accessus ad Deum appellat. Hinc Bernardus epist.77. ponderans præfati Marci verba, & considerans Christum, postquam dixit: Qui crediderit, & baptizatus fuerit, salvus erit, subjunxisse: Qui non crediderit, condemnabitur; nec repetiisse: Qui non baptizatus fuerit, ait: Cautè igitur, &

vigi

*vigilanter non repetivit : Qui verò baptizatus non fuerit ; sed tantum : Qui verò non crediderit , condemnabitur : innuens solam interdum sufficere fidem ad salutem , & sine ipsa sufficere nihil. Hinc Trident. sess. 6. cap. 6. docet ad justificationem requiri , ut credamus in primis à Deo justificari impium per gratiam ejus , per redemptionem , quæ est in Christo Iesu. Quam fidem Redemptoris esse initium , radicem , & fundamentum justificationis sancta Synodus declarat : sine initio autem , nec progredi possumus , nec sine radice vegetari , nec sine fundamento consistere in via salutis possumus : unde sine fide illa quantaquanta sit pietas , vel honestas , sine fundamento corruet , sine radice arefcet , sine initio non perficietur. Penè omiseram D. Thomam , quia ita apertus est , ut nulla possit tergiversatione eludi. Nam *art. 7. hujus quæst.* per hoc distinguit statum naturæ & legis à statu gratiæ , quod *post tempus* , inquit , *gratia revelata , tam majores , quàm minores tenentur habere fidem explicitam de mysteriis Christi.* Et *art. 8.* disertè confirmat , post tempus gratiæ divulgatæ teneri omnes ad explicitè credendum mysterium Trinitatis.*

Probatur ratione S. Thomæ *art. 5.* Illa sunt necessaria necessitate medii ad salutem , sine quorum explicita fide non potest haberi recta intentio in finem ; obtineri quippe nequit finis noster , nisi rectè intendatur. Atqui sine explicita Trinitatis & incarnati Verbi fide nemo in statu gratiæ potest finem suum rectè intendere , seu ad suum finem per verum medium tendere : finis namque creaturæ rationalis ille est , per quem beata efficitur ; nimirum Trinitas

personarum, quarum visione beatur: medium verò ad finem illum asciscendum necessarium est Christus Dominus, qui factus est nobis via ad salutem; per quod qui non intrat, sed ascendit aliunde, ille fur-est, & latro. Ergo sine fide Salvatoris nulla potest inpræsentiarum salus obtineri.

Hanc rationem ex August. *tract. 43. in Ioan.* deprompserat Aquinas. Verba Augustini sunt hæc: *Dicant ergo pagani, Benè vivimus. Si per estium non intrant, quid eis prodest? unde gloriantur? Ad hoc enim debet unicuique prodesse benè vivere, ut detur illi semper vivere: nam cui non datur semper vivere, quid prodest benè vivere? Quia nec benè vivere dicendi sunt, qui finem benè vivendi vel per cecitatem nesciunt, vel per inflationem contemnunt. Non est autem cuiquam spes vera & certa semper vivendi, nisi agnoscat vitam, qua est Christus, & per januam intret in ovile.* Quibus verbis ostendit, necessitatem fidei explicitæ Christi ex veri finis, verique medii noticia indispensabiliter requisita, sicuti D. Thomas stabilivit. Nec potest dici, utrumque sanctum Dôctorem loqui de ultima salute, quæ habetur in Patria, ad quam nemo pervenit sine prævia noticia Salvatoris. Non, inquam, id dici potest, cum non solum Augustinus dicat, sine fide Christi neminem posse semper vivere, sed etiam *nullum sine illa posse benè vivere* asseveret. D. etiam Thomas perætuus Augustini discipulus, & echo fidelis idipsum expressissimè significat *1. 2. quest. 113. art. 4.* ubi quærit, an ad justificationem requiratur motus fidei? Et cum sibi objecisset tertio loco, diversos esse articulos fidei, subindeque si actus fidei

fidei requiratur, oportere hominem initio justificationis de multis cogitare, responderet: *Ad tertium dicendum, quod sicut Apost. Ius dicit Rom. 4. credenti in eum, qui justificat impium, reputabitur fides ejus ad justitiam secundum propositum gratia Dei. Ex quo patet, quod in justificatione impii requiritur actus fidei quantum ad hoc quod homo credat Deum esse justificatorem hominum per mysterium Christi.* Ubi vides, S. Doctorem nedum ad ultimam salutem, sed ad primam impii justificationem fidem Christi explicitam desiderare.

Quod si præsentis difficultatis momentum profundius penetraturus interrogas, unde tanta explicitæ fidei obligatio, tanta necessitas in statu gratiæ proveniat, quæ statum naturæ, & legis minimè astringebat? Respondebo, hanc veritatem ex perspicuis novi Testamenti testimoniis, & perenni traditione, & fermè communis Christianismi notionibus peti. Et quavis sciam; tam luculentas Scripturarum voces variis tergiversationibus, ac apposis pro arbitrio exceptionibus eludi, non continuè propter illas deferenda veritas est, cum Scripturarum sensus, tam in fide, quàm in moribus, non ex humani ingenii argutiis, sed ex traditione petendus sit. Cum enim nihil tam apertum, tam præcisum, & definitum nihil sit, quod Dialecticæ coloribus vel sophismatis ludificari non possit, ut huic malo Deus occurreret, sicut sacras Literas, sic earum intellectum bonum ad nos traditione propagatum derivavit. Cum ergo fidei explicitæ Christi Salvatoris necessitas dogma sit perspicuè in Scripturis determinatum, & à primoribus Patribus frequenter inculca-

tum, atque generatim intellectum, generatim quoque à nobis intelligendum est, periculosè-que ex nostro demùm ingenio explicationes fingimus, & glossas comminiscimur. Etenim si generalibus præceptis exceptiones è sola ratione petitas apponere humanæ liceat libertati, nullum erit tam clarum, apertumque testimonium, cui exceptionem non inveniatur ratio, ut ejus vim ac emphasin effugiat; nullum erit præceptum, quod funditus deletum ad nihilum non redigatur. Quare sicut boni, malique notitiam ex præceptis divinis eruimus, sic ipsorum præceptorum intelligentiam ex traditionis auctoritate repetere tenemur: nec ullam ejus exceptionem probare debemus, nisi quam Patribus probatam esse patuerit. Atque adeo generale fidei explicitæ necessitatis mandatum significantissimis verbis expressum, cui nullam aliundè Scriptura, vel Traditio exceptionem apposit, simpliciter intelligere debemus, & quas novi Casuistæ comminiscuntur omnes exceptiones Patribus ignoratas, sine dubitatione rejicere, & explodere tenemur; sine grandi piaculo admittere non possumus, cùm constans apud Catholicos sententia sit, non minùs Evangelicam vivendi normam, quàm ipsam fidem esse ex Traditione petendam.

Cùm ergo dicunt moderni Casuistæ, has Traditionis voces per se loquendo veras esse; per accidens tamen in casu insolito ignorantia invincibilis posse quempiam primam, vel secundam salutem sine explicita fide Salvatoris obtinere; cùm aiunt id saltem verum probari in illis Christianis adeo bardis, hebetibus, & obtusis, qui mysteria Trinitatis, & Incarnationis nec

vero conceptu apprehendere, nec memoriâ retinere, nec subinde explicitè credere possunt; cum, inquam, has & alias exceptiones adhibent, statim ex doctrina tradita confutantur. Nam cum nullum Scripturæ, vel Patrum proferant locum, quo exceptiones illas astruant, cum eas ex sola ratione repetitas fateantur, hoc ipso absque operosiori argumentorum apparatu, absque majori inquisitione repellendi sunt; cum & satis per se idoneam damnandæ suæ responsionis causam ministrent, quod eam Patribus incognitam, & sola nixam ratione fiantur. Satis ergo, superque est ad astruendam nostram sententiam clarissima illa verba producere, & clariora quàm si radiis solis scripta forent: *Impossibile est sine fide placere Deo. Et: Qui non crediderit, condemnabitur.* Satis est verba Augustini suprâ recensita objicere: & qui contenderit ab hac lege nonnullos immunes esse, huic asserendæ hujus exceptionis, vel potius divinationis onus incumbit. Ostendat ex Scriptura, ostendat ex Patribus, ostendat ex Conciliis aliquos ab hac lege immunes; & illi sicut ultrò credemus ostendenti, ita non ostendenti, & à Patrum autoritate deserto non credemus.

Nec nos ratio conveniens deficit. Tum quia convenientissimum est, ut post tot beneficia à Christo Domino universo generi humano collata, debitæ ei referantur gratiarum actiones, adeoque immenso amor-amorem nostrum rependamus: quod utique absque ipsius fide præstari nequit. Tum quia justum est, ut ab hominibus ad altiorem statum provectis perfectiorum mysteriorum salutis notitia, subindeque fides

explicatio requiratur : statum autem gratiæ statui naturæ , & legis longè antecellere , nemo eat inficias. Ergo planè necessaria est explicita Christi fides , quâ membrum ejus fieri , & ipsi incorporari possimus , juxta illud Ephes.3. *Habitare Christum per fidem in cordibus nostris.*

Porro quod diximus de Christo , de mysterio etiam Trinitatis intelligendum volumus , quia ut D. Thomas *art.8.* optimè discurret : *Mysterium Incarnationis Christi explicitè credi non potest sine fide Trinitatis ; quia in mysterio Incarnationis hoc continetur , quod Filius Dei carnem assumpserit ; quod per gratiam Spiritus sancti mundum renovaverit ; & iterum quod de Spiritu sancto conceptus fuerit : & ideo eodem modo , quo mysterium Incarnationis Christi ante Christum fuit explicitè creditum à majoribus , implicitè autem , & quasi adumbratè à minoribus ; ita etiam & mysterium Trinitatis. Et ideo etiam post tempus gratia divulgata tenentur omnes ad explicitè credendum mysterium Trinitatis ; & omnes qui renascuntur in Christo , hoc adipiscuntur per invocationem Trinitatis , secundum illud Matth. ultimo: *Euntes docete omnes gentes, baptizantes eos in nomine Patris , & Filii , & Spiritus sancti.**

Objecta solvuntur.

Dices : D. Thomas 3. p. *quest.69. art.4. ad 2.* expressè docet , quod Cornelius , & alii similes consequuntur gratiam , & virtutes per fidem Christi , & desiderium baptismi implicitè , vel explicitè. Ergo censet , fidem Christi explicitam non esse simpliciter , necessitate saltem mediæ necessarian.

Respon

Respondeo Cornelium fuisse iustificatum sine fide explicita Christi, sed longè ante promulgatum Evangelium, eo ferè modo, quo Job. per fidem unius veri Dei, & provisoris iusticiam conſequebatur. Et ita expreſſè aſſerit S. Doctor iuſſrà *quæſt. 10. art. 4. ad 3.* inquiens: *De Cornelio tamen ſciendum eſt, quod infidelis non erat, alioquin ejus operatio non fuiſſet accepta Deo, cui ſine fide nullus poteſt placere; habebat autem fidem implicitam nondum manifeſtatâ Evangelii veritate.* Nec obest ſi dicas, Evangelium fuiſſe in Provincia Cornelii promulgatum, & ut ait D. Thomas in *3. diſt. 25.* exponens textum Magiſtri: *Evangelium jam incipiebat neceſſarium eſſe ad ſalutem.* Non, inquam, obest; ſed prodeſt magis. Quia tunc incipiebat fidei Chriſti explicitæ neceſſitas, & ſuppoſita ſufficienti promulgatione, tamenſi ad aures Cornelii non perveniente, urgebat obligatio: ex alia verò parte Cornelius vir religioſus faciebat ex auxilio gratiæ, quod in ſe eſt; ideo Deus ad illum Petrum miſit, qui illum de Chriſto eruditum baptizaret; utique quia tunc illud eſſe neceſſarium incipiebat. Hacque de cauſa ad eum miſſus eſt Architectus Petrus, ut ſuprà laudatus dicebat Auguſtinus. Ideo D. Thomas *quæſt. 14. de veritate, art. 11. ad 1.* ad probandum, certiffimè tenendum eſſe, quod viventibus ſecundùm rectam rationem, & ex auxilio gratiæ quod in ſe eſt facienti, Deus mitteret Prædicatorem; id confirmat exemplo Cornelii, & uſque adeò verum exiſtimat, fidem Chriſti explicitam eſſe neceſſariam, ut poſt promulgatum Evangelium velit, quod ſi ad aures alicujus prædicatio foriſecus ſonans non perveniat, & ille nullū divini

veritati voluntarium obicem ponat ; tunc supra communem , & solitum morem miraculosè erudietur.

Instabis : Durum est, & divinæ clementiæ, de qua sentire in bonitate præcipimur, parùm consentaneum, ut homo in alicujus inaccessibleis regionis aspero montis recessu natus, vel ingenio stupidus, qui præ hebetudine totus est plumbeus, merusque stipes, aut truncus humanâ formâ vestitus, ad illa mysteria credenda teneatur, quæ nec intelligere potest. Durum etiam, & incredibile, ad eorundem mysteriorum fidem mutos & surdos à nativitate teneri, quibus vix, ac ne vix quidem nutibus & signis adeo à sensibus remota mysteria explicari queunt, quibus tamen nec sacramenta, nec absolutio denegantur : ergo per accidens in aliquo casu insolito, putà ignorantia invincibilis, potest quispiam primam, vel secundum salutem sine explicita fide Mediatoris obtinere.

Respondeo, hujus argumenti, vel potius sophismatis fallaciam ex eo patère, quòd in adversarios peræquè urgeri, & retorqueri evidenter possit. Cùm enim ipsi nobiscum contra Pelagianos doceant, necessariam esse necessitate mediæ fidem supernaturalem, quæ sit talis tum ex parte principii, idest auxilii, vel habitus divinitus infusi ; tum ex parte objecti, Dei nimirum authoris & remuneratoris supernaturalis, quia ut veridicè dicit Augustinus serm. 38. de tempore : *Fides est humana salutis initium ; sine hac nemo ad filiorum Dei consortium potest pervenire, quia sine ipsa nec in hoc saculo quisquam justificationis consequitur gratiam, neque in futura vitam possidebit æternam.* Et certè cùm
finis

finis noster, nimirum visio beata, sit omnino supernaturalis; ideo media, quibus eum assequimur, supernaturalia esse necesse est, alias media non forent fini coaptata, quod repugnat, cum inter fidem, & media connexio, relatio, & proportio connaturalis invenitur, finisque in mediis, veluti in causis & seminibus virtualiter contineatur. Atqui media, per quæ visionem beatam meremur, & assequimur, sunt cognitio, & amor: ergo cognitio illa, & amor ille ad ordinem debent supernaturalem pervenire. Prima autem cognitio supernaturalis est fides, quæ propterea à Tridentino *humana salutis initium, fundamentum, & radix omnis justificationis* appellatur: ergo ad salutem necessaria est necessitate mediis fides supernaturalis. Cum, inquam, hæc nobiscum doceant adversarii, nec oppositum possit sine fuligine hæresis Pelagianæ dici, rogo ipsos, ut explicent quomodo fides Authoris supernaturalis in rudibus, sylvestribusque hominibus, surdis maximè, & mutis à natiuitate invenitur? Quomodo, si non invenitur, durum non erit ad fidem supernaturalem eos homines obligari, in quibus vix humana natura reperitur? Certè idem cœlestis illuminationis intrinsicum adiutorium, quod ad supernaturalem Dei authoris supernaturalis cognitionem adversarii desiderant, eadem facilitate poterit Mediatoris Christi notitiâ detegere, & ingenerare, si ex numero prædestinatorum sint, sique sese affundentibus divini luminis radiis obicem nequaquam ponant. Ergo vel nullam cognitionem supernaturalem necessariam iis rudibus dicant (quod dicere Catholici reformidant;) vel non minorem pati se difficultatem

ficulatem fateantur, quàm in nos intorquent.

Dicendum ergo, falsum supponere adversarios; à veritate enim prorsus alienum est, tempore legis gratiæ posse dari ignorantiam invincibilem de Christo; si enim homines, & rudes, & in sylvis nutriti, & muti faciant cum Dei gratia quod in se est; sequanturque ductum rationis in prosecutione honesti & fuga mali, ad divinam providentiam pertinebit internam infundere de Christo illustrationem, eo planè modo quò ipsi volunt adversarii, nullam posse contingere Dei authoris supernaturalis invincibilem ignorantiam. Quia nimirum in hoc statu omnis de Christo ignoratio divino auxilio vitari potest, quo non nisi culpâ nostrâ caremus; inò verò sensu nunquam caremus, quia divinum lumen omnibus adest, omnibus præsto est, omnibus circumfusus est, qui illud tenebrarum amore non repellunt: ergo si splendida Evangelii, & Christi lux semper præsens, sæpe pullans aliquem desertum patitur, si alicui non se impertit; si radios quandoque suos non immittit; si super montes Gelboë nec ros, nec pluvia descendat; si aliqua natio sit velut terra deserta, invia, & inaquosa, signum est Solis justitiæ Christi lucem semper præsentem, semper paratam oculos cordis voluntariâ cæcitate clausos invenire. Ita expressè docet D. Thomas *quest. 14. de verit. supra citata*, quod & repetit in 3. dist. 25. *quest. 2. art. I. quest. I.* his verbis: *Post adventum Christi, quia jam mysterium redemptionis impletum est, & corporaliter, & visibiliter predicatum, tenentur omnes ad credendum explicite; & si aliquis instructorem non haberet, Deus ei revelaret, nisi ex culpa sua remaneret.*

maneret. Vide quàm tenax sit hujus sententiæ D. Thomas, cùm ad illum modum miraculosæ instructionis semper recurrat, ut salvet indispenabilem esse post adventum Christi notitiam explicitam Salvatoris. Et sanè ita se gessisse Deum, patet tum ex superius adducto Cornelii exemplo, ad quem missus est Petrus, *Act. 10.* tum ex historia eunuchi Reginæ Candacis, ad quem missus est Philippus, *Act. 8.* Sicut etiam Paulus hac fortassis de causa ad Macedones missus est, *Act. 16.* & teste Dionysio *cap. 9. Cœlest. Hierarch.* multi veritates divinas annuntiantium Angelorum ministerio salutem consequuti sunt. Refert etiam S. Thomas *artic. 7. ad 3.* tempore Constantini Augusti, & Helenæ matris inventum fuisse hominis cadaver, cui dum viveret, facta fuerat Christi venturi revelatio, unde & aurea lamina in pectore cum hac inscriptione reperta est: *Christus nascetur ex Virgine, & ego credo in eum. O sol, sub Helena & Constantini temporibus iterum me videbis.*

Nec obest, quod dictum est, esse aliquos ita stupidos & obtusos, ut cardinalia fidei Christianæ mysteria apprehendere, subindeque explicitè credere non valeant. Non obest, inquam; nullus enim est adeo plumbeus, si rationis compos sit, qui paucorum fidei articulorum notitiam modico studio, adhibitâ rationabili diligentia, consultis Doctoribus. vel Parochis, non possit citò addiscere, & sufficienter intelligere; cùm videamus illos eosdem in rebus salutis tam hebetes, in negotiis humanis nequaquam esse obtusos. Ad retinendas longas, & sæpe obscuras cantilenas memoriâ valent; ad vindictas de hostibus sumendas, ad prosequendas lites, ad
per

perdiscendas artes mechanicas non parum difficiles ingenio pollent ; & ad fidei , & doctrinæ Christianæ perdiscenda elementa , & memoriâ carent , & ingenio sunt destituti. Certè hic libenter scripserim , quod de peccatoribus dicebat Salvianus : *Omnia amamus , omnia aestimamus ; solas Deus in comparatione aliorum nobis vilis est.* De ignorantibus nostris pariter dicere , & usurpare licet : *Omnia discunt , omnia intelligunt : sola Christi , & salutis noticia illis difficilis est.*

Urgebis : Ergo in statu gratiæ arctior est , & impeditior ad salutem via ; siquidem in veteri lege sufficebat implicita fides Salvatoris , & in præsentiarum explicita desideratur.

Respondeo , deplorando hoc argumento , si valeret , omnia novæ legis mandata deletum iri , omnem redemptionis œconomiam ad nihilum redactam iri , ipsum etiam Evangelium iri prorsus conculcatum. Nova Sacramenta instituit Christus , onus occultorum scelerum in confessione detegendorum , antiquæ legi ignotum imposuit Redemptor ; inimicis etiam capitalibus benefacere præcepit ; inaudita , & insperata paupertatis , humilitatis , castitatis consilia , quæ Judæis in lege Moïsi innutritis paradoxa visa sunt , & crucem prædicavit : contemptum divitiarum , quin & uxoris , & parentum annuntiavit. Ergone illa Salvatoris oracula eliminanda , de medio tollenda , vel è sacris literis sacrilegâ liturâ expungenda , quia arctam nimis , & angustam efficiunt salutis viam ? O carnalem Philosophiam ? ô antichristianam argumentandi rationem ? Et tamen manifestum est , nefaria illa , quæ commemoravimus consecraria , necessario fluere ex uno illo , quod tamen

sæpe moderni obijciunt, axiomate, quo asserunt latiore esse in statu gratiæ salutis viam, nec eos pudet in ea lege mollia lenimenta quærere, quæ crucifixum spinis coronatum adorant: si tamen lenimenta sunt immunitas à fide, quâ absolvunt ignaros, sicut à charitate eximunt eruditos. Porro quomodo in lege Christi durum sit præceptum sciendi Christum, in ipsumque credendi, non intelligo, ut propterea lex gratiæ durior esse dicatur. An nesciunt legem Christi dici jugum suave, & onus leve, non carni, sed spiritui; non naturæ, sed gratiæ abundantius concedi solitæ. An durum est militi Imperatoris nomen addiscere? An durum est, & onerosum viatori scire viam quâ pergit, & ducem qui manu ducat? Atqui Christus via est, quâ imus, & extra quam aberramus. Pulchrè Augustinus lib. II. de Civit. cap. 1. *Ut mens in fide fidentiùs ambularet ad veritatem, ipsa veritas Deus, Dei filius, homine assumpto, non Deo censumpto eandem constituit, ac fundavit fidem, ut ad Deum iter esset homini per hominem Deum. Hic est enim mediator Dei, & hominum homo Christus Iesus. Christus per id, quod est mediator, est homo, & via perveniendi ad Deum: quia si inter eum qui tendit, & illud quod tendit, via media est, spes est perveniendi; si autem desit, aut ignoretur, quâ eundum sit, quid prodest nosse quod eundum sit? Sola est autem adversus omnes errores via municiissima, ut idem ipse sit Deus & homo. Quò itur? Deus. Quâ itur? Homo. Ergo quâcumque, & quòcumque aliorum itur, aberratur.*

Insistes: Ad hoc ut Christianus lapsus in peccatum mortale iustificetur, non est opus, ut actualiter de Christo cogitet, & explicitum fidei
 ipsius

ipſius actum eliciat ; ſed ſat eſt, ut propter Deum crimina ſua deteſtetur , ut patet experientiâ multorum , qui non raro ad ſacramentum pœnitentiæ accedunt , quos nulla ſubito de Chriſto cogitatio. Ergo à fortiori poterit nutritus in ſylvis per fidem & amorem Dei remuneratoris juſtificari, ſubindeque in caſu mortis ſalvari cum fide implicita Salvatoris, quâ ita comparatus eſt, ut in illum, & alia occultiora crederet, ſi ſibi eſſent ſufficienter manifeſtata.

Reſpondeo non eſſe dubium , quin Chriſtianus ad eliciendos interdum fidei actus non teneatur ; ut enim docet D. Thomas 2. 2. *quæſt.* 32. *art.* 4. *ad* 1. præcepta hominibus non niſi de actibus imponuntur : *Præcepta*, inquit, *non dantur de habitibus virtutum, ſed de actibus ; & ideo diverſitas præceptorum non ſignificat diverſos habitus , ſed diverſos actus.* Et quanvis fortassis in inſtanti juſtificationis non cogitet pœnitens actu de Chriſto ; quia tamen non amiſit fidem per peccatum mortale , quod ſuppono non eſſe infidelitatis ; ideo fidei actus sæpè elicit , & de Chriſto sæpè audit , & sæpe cogitavit. Unde malè idem de nutrito in ſylvis colligitur , poſſe nimirum ſine fide Mediatoris juſtificari ; ſiquidem iſte viam ſalutis ignorat, nec unicum à Deo ad ſalutem filiis Adæ præſcriptum medium adhibet , quo ſalvetur.

Præceptum confeſſionis fidei.

Sciendum eſt , dari præceptum affirmativum de fidei confeſſione , non quidem ſemper obligans , ſed pro loco & tempore , aliisque debitis circumſtantiis. Colligitur hæc veritas ex illo
Rom.

Rom. 10. *Corde creditur ad justitiam, ore autem confessio fit ad salutem.* Et licet aliqui verba illa de confessione laudis exponant, verba tamen immediatè præcedentia satis ostendunt, ea de professione fidei esse intelligenda; ait enim Apostolus: *Quia si confitearis in ore tuo Dominum Iesum, & corde credideris, quod Deus eum suscitavit à mortuis, salvus eris.* Ubi manifestè loquitur de confessione fidei ab interna cordis fide prodeunte, aitque eam esse ad salutem necessariam: quod argumento est, eam sub præcepto cadere. Colligitur etiam ex illo Matth. 10. *Omnis, qui confitebitur me coram hominibus, confitebor & ego eum coram Patre meo, qui in cælis est: qui autem negaverit me coram hominibus, negabo & ego eum coram Patre meo, qui in cælis est.* Ex quo apertè deducitur, in aliquo casu nos ad Christum sine verecundia profitemdum teneri, ut etiam non minùs perspicuè indicant hæc verba Luc. 9. *Qui me erubuerit, & meos sermones, hunc Filius hominis erubescet, cum venerit in majestate sua, & Patris, & Sanctorum Angelorum.*

Verùm, quia præceptum affirmativum, tamen si semper obliget, non tamen pro semper, sed pro loco & tempore, aliàsque juxta prudentiæ leges circumstantias, ad quas actum humani efficientiam exigere necesse est, ut virtutis nomen & naturam sortiatur: ideo aliud est occultare fidem & religionem Christianam, aliud profiteri alienam. Quanvis autem nullo prorsus in casu licitum sit sectam alienam profiteri, & execranda sit eorum impietas, qui Christianis Indis & Sinanis idololatriam calido artificio docuerunt, modò nimirum idoli cultum.

cultum ad latentem veste Christi imaginem referrent: quanvis, inquam, hoc ita sit, suam tamen justis de causis occultare fidem non est ex suo genere malum, unde potest & benè, & malè fieri; malè quidem, quando urget confessionis præceptum; benè autem, cum eam propalare non tenemur. Non enim nos persecutori ultrò exponere præcipimur. Tum quia temeritas periculosa est sibi eas vires, eam animi magnitudinem asserere, quæ ad persecutionem christianè tolerandam desiderantur. Tum quia peccatum est persecutori præbere ansam Dei offendendi, & Ecclesiam Christi persequendi, vel persecutionem augendi. Unde Clemens Alexandr. *lib. 4. Strom.* ait: *Qui se capiendum præbet per audaciam, is quantum in se est, adjuvat improbitatem ejus, qui persequitur.* Hac de causa Christus loquens de persecutoribus, *Matth. 10.* ait: *Tradent vos in conciliis.* Non dicit: Vosmetipsos tradetis. Et iterum: *Ad Reges, & Principes ducemini propter nomen meum;* non verò ait: Vosmetipsos ducetis. Monet etiam Veritas: *Quando vos in una civitate persequuti fuerint, fugite in aliam.* Et certè Christus ipse in ætate infanti declinans persecutionem, fugit in Ægyptum, & in ætate adulta fugiens persecutionem Judæorum cogitantium occidere eum, abiit in regionem juxta desertum, ut patet *Joan. 11.* Quamobrem, ut rectè infert Chrysostol. *serm. 151. Fugiente Domino, fugere indignum non putet servus.*

Favet etiam Ecclesiæ Catholicæ consuetudo in omnibus æmulanda, quæ viris Apostolicis, Clericis & Regularibus sæculares induere vestes, & diebus vetitis carnibus liberè vesci, ut sese

seſe faciliùs introducentes veritatem Evangelicam cautiùs annuntient, indulget, niſi fortaffis adſit ſcandalum, vel periculum contemnendæ religionis. Sic Eleazarus juſſus in contemptum ſuæ religionis comedere carnes porcinas, vel ſaltem ſe comedille ſimulare, glorioſiſſimam mortem magis quàm odibilem vitam complectens, ut ait Scriptura *Matth. 6.* voluntariè præibat ad ſupplicium; & cogitare incipiens ætatis ſuæ eminentiam dignam, & ingenitæ nobilitatis canitiem, atque à puero optimæ converſationis actus: *Non ætatis noſtra dignum eſt*, inquit, *ſingere* (verba ſunt ſacri textus,) *ut multi adoleſcentium arbitrantes Eleazarum nonaginta annorum tranſſiſſe ad vitam alienigenarum, & ipſi propter meam ſimulationem, & propter modicum corruptibilis vitæ tempus decipiantur.*

Quare ſapientiſſimè S. Thomas *art. 2.* ſic ait: *Confiteri fidem non ſemper, neque in quolibet loco eſt de neceſſitate ſalutis, ſed in aliquo loco & tempore, quando ſcilicet per diſmiſſionem hujus confeſſionis ſubtraheretur honor debitus Deo, & etiam utilitas proximis impendenda; putà ſi aliquis interrogatus de fide taceret, & ex hoc crederetur, quod non habet fidem, vel quod fides non eſſet vera, vel alii per ejus taciturnitatem averterentur à fide: in hujusmodi enim caſibus confeſſio eſt de neceſſitate ſalutis.* Ratio hujus Angelicæ doctrinæ eſt clara. Cùm enim ex una parte detur præceptum affirmativum confeſſionis fidei, profeſſò interdum certis in circumſtantiis obligat, cùm præcepta non de habitibus, ſed de actibus inſtituantur. Ex alia verò parte nullæ ſunt excogitabiles circumſtantiæ, in quibus urgeat magis præceptum confeſſionis, quàm

quàm illæ , quas S. Præceptor assignavit. Et
 quanvis si turbatio infidelium ex hujusmodi
 confessione absque aliqua utilitate oriatur, lau-
 dabile sit fidei confessionem minimè necessa-
 riam reticere , juxta illud Matth. 7. *Nolite san-
 ctum dare canibus, neque mittatis margaritas
 vestras ante porcos, ne forte conculcent eas pedi-
 bus suis; & canes conversi dirumpant vos.* Atta-
 men si aliqua fidei utilitas speretur, aut neces-
 sitas adsit, contemptâ infidelium perturbatione
 debet homo fidem Christi publicè , & intrepidè
 confiteri. Unde Matth. 13. habetur, quod cùm
 Discipuli dixissent Domino, Phariseos verbo
 ejus audito fuisse scandalizatos, Christus re-
 spondit: *Sinite illos, scilicet turbari; cæci sunt,
 & duces cæcorum.* Et vulgare est Gregorii axio-
 ma hom. 7. in Ezechielem: *Cùm de veritate
 oritur scandalum, magis est sustinendum scan-
 dalum, quàm veritas relinquatur.* Quod autem
 ait S. Thomas, obligari hominem ad confessio-
 nem , quando per dimissionem confessionis
subtraheretur honor Dei; non est intelligendum
 merè negativè, quia sic honor Deo subtrahitur,
 idest non exhibetur, quoties etiam præcepto
 minimè urgente non redditur; sed privativè
 duntaxat, & contrariè accipiendum est, si ni-
 mirum ex illo silentio timetur, ne vel Deus in-
 honoretur, vel proximus detrimentum patiatur.
 Committetur etiam peccatum omissionis ab eo,
 qui socordiâ, & negligentia confessionem, &
 fidei prædicationem, quam utiliter posset ani-
 mabus impendere, prætermitteret. Num & ille
 servus damnatus est, qui acceptum talentum
 fodit in terram: & terribilis est illa Gregorii
 Magni doctrina, quam habet in Pastoralis, part...
 cap. 5.

cap. 5. Sunt nonnulli, qui magnis, ut diximus, muneribus ditati, dum solius contemplationis studiis inardescunt, parere utilitati proximorum in predicatione refugiunt, secretum quietis diligunt, secessum speculationis petunt. De quo si districtè judicentur, ex tantis proculdubio rei sunt, quantis venientes ad publicum prodesse potuerunt. Quam enim mente is qui proximis profuturus enitesceret, utilitati caterorum secretum praponit suum, quando ipsa summi Patris Unigenitus, ut multis prodesset, de sinu Patris egressus est ad publicum nostrum?

Corollaria practica.

Ex hæcenus constitutis quædam derivantur consuetudina præceptum fidei interioris & exterioris concernentia.

Sequitur ergo primò, omnes adultos teneri nedum implicite, seu generaliter, & confuse credere quidquid Deus revelavit, & Ecclesia Catholica credendum proponit; sed etiam explicitè, seu distinctè, & articulatiua credere Deum esse Unum, & Trinum, bonorumque operum remuneratorem, & Filium Dei in tempore incarnatum fuisse, ita ut nullus rationis compos, quantumvis rudis, & occupatus, possit absque explicita eorum notitia, & fide salvari. Imò eruditi Theologi, quibus non parum favet D. Thomas, gravi nixi fundamento contestantur, articulos nativitatis, passionis, mortis, resurrectionis, ascensionis Christi, & iudicii universalis, imò & Sacramentorum baptismatis, pœnitentiæ, & Eucharistiæ, esse à Catholicis omnibus perdiscendos, & explicitè credendos. Quia nimirum recta ratio, & lumen naturale dicat, ut ea quisque sciat, quæ ad implenda status sui of-

ficia omninò necessaria sunt. Nullus autem Christianus christianè vivere quit iis ignoratis articulis, quibus tota religio veluti cardini subnixa est. Et hoc certè satis, superque significat accurata illa Ecclesiæ Catholicæ in solennizandis illis mysteriis his articulis comprehensis diligentia, necnon studiosa illa sollicitudo, quam Pastoribus injungit sacra Tridentina Synodus *sess. 5. cap. 2.* his verbis: *Archipresbyteri quoque, Plebani, & quicumque Parochiales, vel alias curam animarum habentes Ecclesias quomodocumque obtinent, per se, vel alios idoneos, si legitimè impediti fuerint, diebus saltem Dominicis, & festis solennibus plebes sibi commissas pro sua, & earum capacitate pascant salutaribus verbis, docendo quæ scire omnibus necessarium est ad salutem.* Quod sub gravissimis pœnis ibidem inculcat.

Sequitur secundò, quod licèt majores, Prælati nimirum, Pastores, & Magistri, quæ ad fidem pertinent, uberius scire ex officio teneantur, ut rationem reddere, & contradicentes arguere possint; & insuper quilibet minister ea novissè teneatur, quæ ad ministerium suum ritè exequendum requiruntur: nihilominus minores, & plebei prædicta duntaxat mysteria simpliciter intelligere, & explicare debent: Theologicas verò difficultatès, & subtilitates scire nec teneantur, nec forè expedit. Unde D. Thomas *art. 6. ad 2. & 3.* ait, quod simplices non sunt examinandi in subtilitatibus fidei, nisi sint depravati: si tamen inveniuntur deficere, non pertinaciter tamen, non eis imputatur, nisi contra Ecclesiam Catholicam, idest congregationem illam, quæ sese Pontifici Romano Christi in terris Vicario subjecit, sint pertinaces. Soli ergo illi,

illi, qui ratione officii debent alios erudire, & poscentibus fidei suæ rationem reddere, pleniori debent mysteriorum notitiâ imbui: sicut Angeli superiores inferiores illuminantes abundantiori cœlestium veritatum lumine perfunduntur.

Sequitur tertio, præceptum fidei exigere, ut interdum in actus illius virtutis erumpamus, & intellectum in ejus obsequium actualiter captivemus. Unde in Ecclesia tam crebrò Symbolum Apostolorum recitatur, ut illud interius fideles concipiant mente, quod exterius personat; & externam professionem interna fidei, & religionis devotio comitetur. Crediderim etiam tunc potissimum præceptum illud urgere, cum quia in veritatibus revelatis credendis difficultates, & motus dubitationis patitur insurgentes. Sed circa hoc placet nonnulla ex Patribus spiritualibus in piarum, & scrupulis divexatarum animarum solamen annotare.

Verum quidem est, cum qui cum pertinacia dubitat, neque certitudini eorum, quæ fides docet, & Ecclesia proponit, assentitur, peccare contra fidem, & in peccatum infidelitatis incidere: verumtamen qui passivè patitur dubia, & tentationibus fatigatur, non quia judicat certam non esse fidem, sed propter naturalem, quam circa credita animus veluti refractarius experitur difficultatem, dum ratio tam arduis, tam reconditis veritatibus veluti obruitur & obstupescit, talis non agit contra fidem, sed similis est illi in Evangelio *Marc. 9.* dicenti: *Credo Domine, adjuva incredulitatem meam.* Unde tentationes illas non tam debet refellere, vel actibus contrariis repellere, quàm flocCIFacere, ne imaginatio importuno conflictu fatigata lædatur, &

tentatio è fronte, ac è diametro impugnata magis menti figatur, quæ contemptu, & neglectu citius evanescit.

Quod si tentatio animum pulsans fidemetiam concutiat, & dubitationes veluti semivoluntarias, vel saltem ob infirmi animi debilitatem quadantenus irreperentes experiaris, Lector, post exoratum divinum auxilium, quo sicut adjuvante vincimus, ita eo iterum non adjuvante vincamur necesse est, duo nobis suppeditant Patres spiritales opportuna hujusmodi tentationibus remedia. Etenim vel de Religione, quam profiteamur, generalia dubia obrepunt, vel circa aliquod peculiare duntaxat mysterium difficultatem animus experitur. Si de religione Catholica in communi dubitationis motus exoriantur, avocanda est, mentisque oculis subjicienda præclara illa argumentorum credibilitatis harmonia, quibus intellectus & prudenter credit, & non nisi imprudenter dissentitur. Certè si absque aliqua fide in hoc mortali sæculo humana nequit via consistere; si ex solo hominum testimonio & parentes ipsos agnoscimus, & remotas regiones existere fateamur; si pereunte fide, & historiarum omnium monumenta, & Rerumpublicarum traditiones, ac consuetudines, & humani generis adeò utilia commercia ad nihilum redigerentur; profectò æquum est, ut Deo de se multa, tametsi ardua eloquenti, & Ecclesiæ proponenti fidem adhibeamus. Maxime quia nulla est in orbe sub cælo toto secta, in qua plura non proponantur credenda, quæ articulis Religionis nostræ comparata, & aliunde ab omnibus credibilitatis argumentis deserta, meritò ridicula, & fabulosa censentur.

cententur. Sed ne actum iterum agamus, recole totam secundo volumini præfixam nostram præambulam dissertationem. Porro si alicujus singularis articuli, putà Trinitatis, Incarnationis, Eucharistiæ difficultas animum pulset, præter varias à Patribus, sacrisque Doctoribus adductas congruentias, à nobisque in decursu Theologiæ pro data occasione recensitas & recensendas; hoc etiam discursu omnes singularem difficultatum nebulas citò dissipabis sicut stipulam ante faciem ventī. Sic ergo ratiocinabere: Si Ecclesiæ Catholicæ, utpote innumera-bilium credibilitatis argumentorum decore indutæ, omnigenis miraculis illustratæ, tot Martyrum sanguine irrigatæ, tot præstantissimorum Doctorum lumine irradiatæ credo, & prudenter credo: ergo illum in speciali articulum in dubium revocare sine flagitio non possum, non debeo; quia si singulares veritates tentem irrumperere, perperam religioni illas proponenti assensum dedo; unde meritò, ut Bernardus loquitur, reputabor effractor, & scrutator Majestatis opprimendus à gloria.

Sequitur quartò, semper esse peccatum mortale exterius negare fidem, nec ullam posse justam negandæ fidei exeusationem unquam ob-tendi. Probatum contra Helcesaitas, & Priscil-lianistas hæreticos; tum ex testimonis illis Veritatis suprà adductis, quibus se coram Patre negaturum eos attestatur, qui se coram hominibus negaverint: tum ex dictis, quia licet præceptum externæ confessionis & professionis sit affirmativum; quia tamen omne præceptum affirmativum includit aliquod negativum, putà præceptum affirmativum diligendi Deum præ-

ceptum negativum de Deo nunquam odio habendo continet. Similiter ergo præceptum confessionis fidei ejusdem denegationem continuo prohibet. Atqui præceptum negativum obligat semper, & pro semper, præsertim quando versatur circa jus naturale, vel divinum, prohibetque rem intrinsecè malam, qualis est sine dubio & veræ fidei negatio mendax, & alienæ sectæ professio simulata. Ergo, nunquam, vel nusquam licet, vel veram religionem inficiari, vel falsam profiteri. Hinc secundum omnes Marcellinus Papa sacrilego sese flagitio fœdavit, dum thura idolis metu mortis adolevit. Hinc venerabilis Eleazarus mori maluit, quàm carnes porcinas in odium suæ religionis sibi appositae comedisse fingeret. Hinc intrepidi Martyres manus igni suppositas ardere maluerunt, ne vicinum idolum adorare vel gestu crederentur. Quia nimirum viri sancti semper arbitrati sunt fidem non minùs à nobis officium linguæ, & manus, quàm cordis exigere; nec minùs à veritate, & simplicitate christiana alienum esse verum Deum signis, vel nutibus, quàm verbis negare.

Dices: Aliqui viri sancti, & alii sacris in literis commendati veram religionem non dissimulaverunt modò, sed & alienam falsam simulaverunt, ut David, Jehu, & Naam. David quidem, qui ut habetur 1. Reg. 21. *Immutavit faciem suam coram Achis Rege Geth.* Jehu verò, ut habetur 4. Reg. 10. finxit se idola colere velle: & eodem modo se gessit Naam Syrus.

Respondeo has omnes difficultates S. Doctorem 2. 2. q. 111. ar. 1. occupasse. In primis quantum ad David, commutationem faciei Regii Prophetæ

phetæ fuisse fictionem figuralem, sicut glossa exponit in titulo Psalmi, *Benedicam Dominum in omni tempore*. Non autem omne, quod fingimus, mendacium est; sed quando id fingimus, quod nihil significat, tunc est mendacium. Cum autem fictio ad aliquam significationem refertur, non est mendacium, sed figura veritatis.

Porro simulationem Jehu non excusat à peccato mendacii S. Doctor, sed accusat: *Quia*, inquit, *malus fuit, utpote ab Idololatria Ieroboam non recedens*. Nec obest quod dicitur 4. Reg. 10. ipsum studiosè egisse quod rectum erat. Non, inquam, obest; quia ut optimè idem Angelicus Magister interpretatur, commendatus fuit, & temporaliter etiam remuneratus, non pro simulatione, sed pro zelo, quo destruxit cultum Baal. Substantiam ergo operis per se boni laudavit Deus, circumstantias simulationis, vel etiam vitiatæ, si quæ contigit, intentionis reprobavit. Deus enim purus & summus, bonus in opere, bonitatem à malitia discernens & examinans sicut examinatur argentum, nihil boni invenit, quod non muneret; nihil mali, quod non castiget. Sunt enim pleraque opera nostra mixta, & malitiæ ac bonitatis confusione concreta, ut aliàs demonstravimus.

Denique quantum ad Naam Syrum eorum opinioni ut probabiliori subscribo, qui cum peccati damnant, quòd in templo Remnon adorarit, vel adorare simularit, 4. Reg. 5. Nec obstat illud ab Elizeo videri fuisse permissum, dum dixit: *Vade in pace*. Non enim facultatem concessit Propheta, sed malum quod prohibere, & impedire non poterat, per patientiam tole-

ravit. Scio Cajetanum, & Burgensem, aliosque opus illud Naam excusare; quia, inquiunt, genuflexio facta cum Rege non erat adoratio etiam simulata Idoli, sed merè per accidens subsequerebatur, vel concomitabatur genuflexionem Regis, ut procumbentem & cernuum urbanitatis gratiâ sustineret. Sed hæc subtilitas non videtur solida: etenim ex illa genuflexione rationabiliter conjicere & credere poterant Rex, aliique circumstantes, Naamum relicto Judaïsimo ad Gentilismum transfugisse, subindeque Judaïsimum falsam esse religionem. Ait autem D. Thomas suprâ laudatus: *Confiteri fidem est de necessitate salutis in aliquo loco & tempore, quando scilicet per omissionem hujus confessionis subtraheretur honor debitus Deo, putà si ex hoc crederetur, vel quod quis non haberet fidem, vel quod fides non esset vera.* Unde & ipse Naam conscientia æctus rogavit Elizæum, quod deprecaretur Dominum, ut sibi ignosceret. Cui Elizæus respondit: *Vade in pace*, non ad declarandum opus illud non esse peccatum, ut interpretatur M. Serra; sed ad declarandam peccati remissionem: sicut & Veritas Magdalenaë poenitenti similiter dixit: *Dimittuntur tibi peccata tua, vade in pace.*

Non obstat etiam si dicas cum P. Gonet, hujusmodi inclinationem non minùs potuisse Naamo permitti, quàm permittitur famulis, & famulabus heros & dominas in infidelitate degentes ad templa & synagogas suas, secluso subversionis periculo comitari, ibique eis famulari. Non obstat, inquam, ob latam, quæ intercedit, disparitatem. Hic namque comitatus, hæc solitorum officiorum exhibitio de se nul-

lam falsæ religionis professionem, sed merum servilis conditionis ministerium significant. At verò inclinatio, & genuflexio est cæremonia ex omnium gentium instituto ad ei exhibendum cultum destinata, cui deferitur, & coram quo exercetur. Unde non minus peccatum est corpore coram idolo prosterni, quàm idolum verum esse Deum voce fateri; cum juxta veridicam Angelici Magistri sententiam, nulla alia mendacium inter, & simulationem distinctio intercedat, nisi quod mentiens verbis significat quod non est; simulans verò idipsum factis, signis, gestibusque designat.

Instabis: Ex causa licet servare legalia Judæorum, ut patet exemplo Petri propterea à Paulo *Galat. 2.* reprehensi. Quinimò ipsemet Paulus in illudinet, quod reprehenderat, incidens, vel potius talem legalium professionem in necessitate licitam judicans, Timotheum circumcidit, *Act. 16.* & sacrificium more Judaico obtulit, *Act. 2.* Denique Æthiopes Christiani communi usu circumsionis ritum non tanquam Judaicam cæremoniam, sed ad Christi pueri circumcisi imitationem etiamnum retinent: nec eorum morem Romana damnat Ecclesia, sed eum excusat Cajetanus 3. p. *quest. 37. art. 1.*

Hoc argumento convicti, vel potius decepti quidam recentiores, fatentur Christianum posse falsam sectam simulare, non strictè, inquiunt, sed largè, & materialiter; id est, licitum est uti cæremoniis sectæ reprobæ, non tanquam illicitis, sed tanquam indifferentibus, modò ab ipsis possit ratio cultus separari, non adsit scandalum, & fides non obscuretur. Sed hæc doctrina non solum larga est, & materialis, sed etiam scanda-

losa, & piarum omnium aurium offensiva, atque à consuetudine Ecclesiæ, & à sanctorum omnium Martyrum praxi immensum abhorrens. Imò & ipsæ, quas addit, conditiones secum pugnant, & sententiam illam perimunt: impossibile enim est à cæremoniis falsæ religionis semel institutis, & probatis posse hîc & nunc rationem cultus, & publicæ professionis moraliter separari. V. g. quanvis cœna Calviniana de se sit indifferens (parum enim panis deglutire, parum vini ebibere per se innoxium est;) tamen prout ab hæreticis Calvinistis cum solennitate solita usurpatur, per se est Calvinianæ sectæ protestativa: & per mentem præscindere rationem cibi & rationem cæremoniæ, ut quibusdam laxonibus licuit insanire, est reverà nugari, & falsam religionis professionem indulgere. Quia nimirum religionis cujuscunque cæremoniæ per se sunt ad illam significandam institutæ; imò ipsæ sunt propria, & characteristica religionis signa.

Ad argumentum ergo dicendum cum D. Thoma 1.2. *quest. 103. art. 1. ad 7.* ante promulgationem Evangelii legalia quidem mortua fuisse, nequaquam verò mortifera; & ideò Apostolica aliquando usurpabant, non in protestationem Judaismi, sed ut synagoga cum honore sepeliretur. Ait tamen Sanctus Doctor *ad 2.* post Augustinum, Petrum venialiter peccasse. non quia ad tempus ea servabat, sed quia nimiam, & anxiam circa ea diligentiam observabat, timens ubi non erat timor, veritus scilicet, ne Judæi à Gentibus separarentur. Quantum verò ad Æthiopes, non ad simulandum Judaismum circumcisionem adhibentes, sed ad pueri Jesu octavo die

die circumcisi patientiam imitandam: Respon-
deo hunc usum esse abusum, ut ex professo
ostendimus agentes de mysteriis vitæ Christi
d. ssert. 8. cap. 2. specul. 3. vide ibi.

Urgebis: Licitum est secundum aliquos non
respondere iudici etiam publicâ auctoritate in
odium fidei de religione interroganti; quia cum
iudex injustè interroget, non inducit respon-
dendi obligationem: sed silentium illud est ta-
cita falsæ religionis professio; quî enim tacet,
consentire videtur: Ergo saltem ad vitandum
ingens aliquod damnum licet & veram religio-
nem dissimulare, & falsam simulare.

Respondeo falsissimum esse, interrogationem
à tyranno & iudice persequente factam, nullam
inducere respondendi, fidemque impavidè pro-
fitendi obligationem; expressè enim S. Doctor
enumerans casus, in quibus fidei professio ur-
get, loco superius memorato istum designat:
*Putà, inquit, si quis interrogatus de fide taceret,
& ex hoc crederetur, vel quod non haberet fi-
dem, vel quod fides non esset vera, vel alii per
ejus taciturnitatem averterentur à fide.* Patet au-
tem, hæc omnia continuò ex silentio coram ju-
dice publica auctoritate, iniquè licèt interro-
gante, esse sequutura.

Inistes: Licitum est uti vestibus externis ad
designandam aliquam falsam sectam ex homi-
num vulgari usu, & beneplacito institutis. Sic
Mercatores Christiani in Oriente negotiantes,
turbantem, seu cydarim gestant. Sic viri Apo-
stolici infidelium terras peragrantes, infidelium
quibus convivunt, vestitui & victui sese accom-
modant, omnibus omnia facti, ut omnes lucrifa-
ciant. Sic duces, militesque Christiani Turcarum

vexillis utuntur, ut eos illo stratagemate vincere possint, vel ne ab eis victi capiantur. Atqui hæc omnia fieri nequeunt absque falsæ sectæ simulatione, & veræ religionis dissimulatione. Ergo licitum est falsam religionem simulando profiteri, & veram dissimulando occultare.

Respondeo, Theologos hac in re esse divisos. In primis Cajetanus nimis, ut crediderim, severus, formaliter docet, quod sicut mortaliter peccaret, si quis diceret se esse Judæum: ita mortaliter peccaret, si uteretur veste, aut birreto, aut quocumque alio signo proprio Judæis in illa patria, aut proprio Mahumetanis. Alii, ut opinor, nimis largè existimant, non solum licere uti signis infidelium, non ad solam religionem, sed & ad nationem discernendam institutis; verum etiam signis ad distinctionem religionis præscriptis, qualis est pileus flavus, quem Judæi in Comitatu Avenionensi deferunt. Quin addit P. Gonet, sacerdotem Gentilem, aut Turcicum, Christianum factum posse sacerdotii Gentilis vel Turcici deferre vestes, utpote ad regendum humanum corpus primariò institutas. Ego verò mediâ, & tutâ viâ incedendum arbitror, dicendo licere quidem uti signis infidelium, quæ non sunt infidelitatis, sed nationis characteres. Exigit enim christiana prudentia, discretio, & charitas, ut semoto scandali periculo iis in vestitu, & vestitu conformemur, quibuscum degimus. Sic turbante, & veste talari Turcarum tutò utuntur nostri Mercatores Constantinopoli: sic Anglicanis vestibus rectè induunt se Sacerdotes absconditi, & sic de aliis; & tunc verum est illud tritum adagiûm: *Cum fueris Romæ, Romano vivito more: cum fueris alibi, vivito sicut*

sunt ibi. Nullatenus tamen licere censeo illa adhibere signa, quæ in ipsa natione ad designandam religionem sunt specialiter instituta, quales sine dubio sunt vestes sacerdotales; quia licet quæ vestes ad regendum corpus sint primario institutæ (ut sic solvatur cavillus adversæ sententiæ,) tamen quæ sacerdotales, seu in illa forma & figura, quam soli deferunt Sacerdotes & non alii, religionis falsæ ministerium, subindeque ejusdem professionem per se designant, ad illudque designandum per se sunt institutæ, aliàs non essent singulari illo modo fabricatæ; Quare positâ consuetudine, & suppositâ institutione omnibus nota, non possunt inter indifferentia computari. Et quanvis absolutè ab illa possint significatione separari, hoc tamen nihil est, quia etiam verba possunt à solita in aliam significationem transferri; & tamen nemo licitè potest verbis usu receptis, & communiter frequentatis falsam profiteri religionem.

Unde in casu, quo esset lex, vel Regis dictum præcipiens Christianis certum gestare signum, quo se ab aliis sectis distinguerent, tunc distinguendum esset. Nam vel Princeps talem ferens legem daret locum Christianis, ut pacificè degerent in regno suo, & omnes Christiani signum illud deferrent, sicut Avenione ferre solent Judæi; & tunc Christianus signum illud ferre omit- tens, vel erubescens, manifestè religionem proderet, & mortaliter peccaret, utpote communem Christianismi tesseram ab aliis Christianis gestatam omittens, & more infidelium procedens. Vel Princeps nullum patentem Christianum pateretur in regno suo, statueret tamen communem Patriæ vestem esse professionem

Gent.

Gentilismi, vel alterius sectæ infidelis; & tunc liceret occultare fidem, & communem patriæ vestem induere; quia tunc nullum adest divini honoris læsi periculum, nec tunc aliquo certamine agitur Christi causa, nec Christianus vocatur in testem fidei, ut contingit in interrogazione facta à iudice; nec aliquod speciale falsæ religionis signum assumitur, sed commune gentis indumentum, cui conformari licet, usurpatur.

Occasione etiam præcepti fidei non est prætermittenda doctrina, quam habet Angelicus Magister infra *quæst.* 16. ubi docet *art.* 1. quod in veteri lege non dabantur specialia credendi præcepta, sed solum unius Dei fides supponebatur. Cum enim præcepta non imponantur nisi subditis, qui possunt recipere legem; prima autem subjectio hominis ad Deum sit per fidem, juxta illud: *Accedentem ad Deum oportet credere quia est*; & patet, quia fides est vitæ spiritualis principium: hinc manifestum est, fidem unius Dei lationi divinæ legis præsuppositam fuisse. Unde *Exod.* 40. & *Deuter.* 6. ante divinorum præceptorum promulgationem veluti confessionis fidei necessitatem Dominus præmisit dicens: *Ego sum Dominus Deus tuus*, &c. Alia autem specialiora præcepta Judæis non sunt imposita, quia recondita fidei arcana non erant genti carnali passim exponenda, sed ab unigenito Filio, qui est in sinu Patris, suo erant tempore resignanda. Lata tamen sunt in veteri lege præcepta negativa expressè infidelitatem, & maximè plurium Deorum cultum prohibentia, ut in omnibus ferè veteris Instrumenti paginis claret. Præcepta etiam confessionis, & profes-

fessionis

sionis fidei sæpe sapientius sunt instituta, ut patet in illa bene longa diversarum cæremoniæ serie, quibus religio Judæica distinctos ab aliis scētis ritus religiosissimè observans, fidem suam propalam profitebatur.

Dices: *Eccli. 2.* dicitur: *Qui timetis Dominum credite illi.* Ergo in veteri lege specialia erant credendi præcepta. Maximè quia Judæi tenebantur utique credere libris veteris Testamenti, qui sub lege continebantur; unde Dominus *Ioan. 15.* alludens ad librum Psalmorum, ait: *In lege scriptum est: Odio habuerunt me gratis.* Ubi libros veteris Testamenti ad legem veterem pertinere apertè indigitat.

Respondeo cum D. Thoma *ad 5.* quod in illa authoritate *Eccl.* præsupponitur fides, per quam credimus Deum esse, unde & præmittit: *Qui timetis Dominum.* Timor autem Domini manifestè fidem illius præsupponit. Quod autem addit: *Credite illi,* ad quædam credibilia specialia referendum docet, & præcipuè ad illa, quæ promittit Deus sibi obedientibus. Unde subdit: *Et non evacuabitur merces vestra.* Quod si instes, & dicas S. Præceptorem in illa responsione argumenti videri sibi ipsi & doctrine traditæ contradicere; in corpore namque ait, quod suppositâ fide unius Dei, nulla alia præcepta in veteri lege sunt data de fide; & solutione *ad 5.* non negat, quin respectu specialium quorundam credibilium sit datum præceptum. Respondebo facillè, quia Doctor Sanctus in corpore loquitur de secretioribus fidei mysteriis, putà Trinitate, Incarnatione, aliisque ab unigenito Filio detegendis. In responsione verò *ad 3.* argumentum loquitur de aliis specialibus credi

credibilibus, quæ in veteris Testamenti libris continentur, & à Prophetis prædicabantur. Et quanvis libris veteris Testamenti receptis omnes credere tenerentur, non tamen explicita omnium in eis contentorum fides à singulis considerabatur.

Observanda est etiam doctrina articuli secundi ejusdem quæstionis, ubi tradit Divinus Magister, quod circa scientiam & intellectum veritatum fidei data sunt præcepta secundum tria, quæ in illis considerari possunt; acquisitionem scilicet, usum, & conservationem. Acceptio, seu acquisitio, quæ contingit per doctrinam, & disciplinam, præcipitur in lege, dum dicitur Deuter. 6. *Erunt verba hæc, quæ ego præcipio tibi, in corde tuo:* (ecce disciplinam, pertinet enim ad discipulum cor iis, quæ sibi dicuntur, applicare:) *Et narrabis ea filiis tuis.* (ecce doctrinam, quæ filii, & discipuli imbuuntur.) Et Deut. 4. *Docebis ea filios tuos, & nepotes tuos.* Quibus patet, urgentiora & expressiora dari præcepta de doctrina, quàm de disciplina; quia doctrina pertinet ad majores, qui cum sint sui juris, majorique polleant judicii lumine, & libertatis amplitudine, immediatè quadantenus divinæ legi subjiuntur. Usus verò est seria, & profunda eorum meditatio, quæ scire, vel intelligere tenemur; & hoc sacrum, & perutile exercitium præcipit Scriptura post verba relata: *Et meditaberis ea sedens in domo tua. & ambulans in itinere, dormiens atque consurgens.* Quibus verbis quantum debeamus in divinæ legis, cœlestiumque veritatum studio esse assidui, mirum & energeticum in modum declaratur. Quod tamen non ita intellegen

intelligendum putes, ut homo dormiendo legem Domini meditari possit, aut debeat: sed sensus est, quod homo & dum dormitum vadit, & dum inter dormiendum expergefit, aliquod divinæ veritatis, & legis mysterium, vel mandatum mente versare, & veluti mandare debet mente, quæ dicitur os spiritale, juxta illud: *Os justî meditabitur sapientiam.* Quia & per hoc meliora adipiscetur phantasmata, & somnia frequenter honestiora experietur; imaginationem enim species in vigilia partæ occupant. Denique conservatio habetur per firmam, tenacemque memoriam; & ideo subdit sacer textus laudatus: *Et ligabis ea quasi signum in manu tua.* Eruntque, & movebuntur inter oculos tuos, scribesque ea in limine, & ostiis domus tuæ. Quod jugem divinæ legis memoriam nullâ unquam liturâ, vel oblivione delendam significat. Porro Clerici, & sacerdotes legant, quæso, solutionem D. Thomæ ad 3. ubi observat, in lege non mandari sacerdotibus addiscere scientiam, sicut Regibus *Deuter. 17.* imperatur; quia, inquit, scientia est adeo annexa eorum officio, ut simul cum injunctione officii intelligatur simul injectio doctrinæ legis.

REFLEXIO.


Exigit sanè religionis, fideique nostræ bonitas causæ, ut ore eam, factisque confiteamur, utque cum de ea agitur, omnis ignavus rubor, omnis verecundia procul amandetur. Nam teste Veritate Luc. 9. *Qui me erubuerit, & meos sermones, hunc Filius hominis erubescet, cum venerit in majestate sua.* Et sanè de veritate religionis subdubi

subdubitare videtur, qui eam summa libertate, & erecto animo non confitetur. Quia ut dixit Tertull. lib. 7. adversus Valent. cap. 1. *Nihil veritas erubescit, nisi solummodo abscondi.* Hinc magnus Ambrosius postquam lib. 10. in *Lucam*, trinam Petri negationem quadantenus excusare, & ad bonum sensum redigere conatus est, considerans tamen debuisse Petrum absque ullis ambagibus, & verborum involucris clarè, aperteque Christum Dominum confiteri, excusationes pro illo adhibitas sic retractat : *Sed nos excusamus, Dominus ipse non excusavit. Non enim satis est involuta responsio consistentis Iesum, sed aperta confessio. Quid prodest verba involvere, si videri vis denegasse?*

Heu ! quot Christianos quotidie cernimus non coram Tyrannis minantibus, vel cruciantibus, sed in facie, & in pace Ecclesiæ Christum, sermones ejus, & Evangelium erubescere, qui tamen signo crucis in fronte, dum confirmarentur, signati sunt, ut malum pudorem abstergant, crucisque Christi ignominiam honori ducant, & ornamento ? Et postquam Christus non confusus est nos vocare fratres suos, confunduntur ipsi, dum & veritates intrepido docere animo, & sacras Evangelii maximas ad praxim redigere opus est. Et quod magis dolendum, nec minus verum est, illos ipsos, qui malum attritâ fronte sine pudore perpetrant (quod tamen pudore natura perfudit,) solus boni pudet. Hinc videmus tam multos scelerato silentio mala amicorum dissimulare, quibus unâ poterant fortassis monitione mederi. Hinc nonnullis modestia, parcitas, humilitas dedecori sunt, nec ad aliam exigunt mores suos regulam, quàm ad opinionem,

Gallicè,

Gallicè, *que dira-t'on?* Hos non lex regit, sed consuetudo; non timor Dei, sed mundi; utque hominibus placeant, servi Dei esse desierunt, dicente Apostolo: *Si hominibus placerem, servus Christi non essem.* Opportunè Magnus Gregor. hom. 32. in Evang. *Si nomen Christi in tanta hodie gloria non esset, tot professores Christi sancta Ecclesia non haberet.* Non ergo ad probationem fidei vox sufficit professionis, quam defendit à verecundia professio generalitatis. Et tamen ubi se quisque interroget, ut in confessione Christi se veraciter probet, si non iam nomen ejus erubescit, si plenà virtute mentis humanum pudorem subdidit. Certè enim persecutionis tempore erubescere poterant fideles substantiis nudari, de dignitatibus dejici, verberibus affigi. Pacis autem tempore, quia hac à nostris persecutionibus desunt, est aliud ubi ostendamus nobis. Veremur sapè à proximis despicì, dedignamur injurias verbis tolerare: Si contingat jurgium fortasse cum proximo, erubescimus priores satisfacere. Cor quippe carnale dum hujus vita gloriam querit, humilitatem respuit. Pensemus facta veritatis, ut videamus quò jaceant nostra pravitatis actiones.



DISSERTATIO III.

De virtute spei, & dono timoris.

Frustra tam immensa bona fides veritati divinæ innixa detegeret, nisi ea aliquando rerum cum Dei gratia obtenturos nos speraliceret. Frustra fides attingeret inaccessa, deprehende

prehenderet ignota, comprehenderet immania, apprehenderet novissima, ipsam denique æternitatem suo illo vastissimo sinu, ut loquitur Bernardus, circundaret, nisi ad illam æternam lucem, & præmonstratum bonum spes, quæ non confundit, tota festiva tenderet, ut secura perveniret. Melius profectò esset cœlestia ignorasse bona, quàm ab eis semel notis acquirendis animum despondere suum. Aspera sunt, non inficior, ardua, & difficilia quæcumque in excelsis posita sunt: sed ille idem, qui illa credentibus revelavit verus Deus, eadem dare potest omnipotens Deus, eadem promisit benignus Deus: quidni promissa persolveret fidelis Deus? *Dicit fides* (inquit Bern. serm. 10. in Psal. Qui habitat,) *parata sunt magna, & inexcogitabilia bona à Deo fidelibus suis. Dicit spes: Mihi illa servantur.* Et præclare August. lib. 22. de Civit. cap. ultimo: *Premium virtutis erit ipse, qui virtutem dedit, qui seipsum, quo nihil majus esse potest, promisit.* Ergo macte animo, Lector, ne cuncteris abjicere spes miseras, vanas, inutiles, seductorias, ut uni christianæ spei tam solidæ, tam perfectæ, tam beatæ totâ animi devotione, toto spiritus fervore inhæreas. Sed ne in reflexionem orationis impetu, & hujus amabilissimæ virtutis flatu abripiamur, priùs speculativas considerationes de more præmittere operæpretium est, quàm ut in æterna bona suspiremus. Spei autem tractationem timori cum D. Thoma conjungimus, quia ut alicubi Moralium scriptum reliquit Magnus Gregorius: *De spe in casum præsumit, qui timere Deum in suis operibus renuit.*

CAPVT I.

Virtutis spei objectum, subjectum, & precepta traduntur.

SUPponit titulus, spem esse virtutem strictè sumptam, quidquid in contrarium scripserit Durandus in 3. dist. 20. Etenim, ut rectè discurret S. Doctor *quest. 17. art. 1.* virtus strictè sumpta illa est, quæ bonum facit habentem, & opus ejus bonum reddit. Ergo ubicumque invenitur bonus actus, debet ipsi sua correspondere virtus, à qua expeditè, facilè, & suaviter eliciatur. Sed actus spei bonus est, bonitas quippe actus in attingentia, seu consequutione suæ regulæ posita est; nam perfectio cujuslibet rei mensuratæ, ad regulam veluti ad amissum exigitur: actus autem spei attingit regulam sibi debitam. Nam cum ex una parte duplex sit regula humanorum actuum, una proxima & homogenea, scilicet ratio; alia heterogenea & excedens, scilicet Deus, ex quarum qualibet haurit humanus actus bonitatem: ex alia verò parte actus spei Deum, quem desiderat, immediate attingat, ut ex sequentibus apparebit, manifestè relinquitur, actum spei attingere primam, & indefectibilem regulam, & totius humanæ bonitatis archetypum.

Nec objectio Durandi urget, dum ait, virtutem perfectam esse habitum potentiam in ultimo

terminativo spei beatitudinem futuram , tam formalem , quàm objectivam : pro objecto vero motivo , seu *quo* , assignat ipsummet Deum ut auxiliatorem ; cui misericordiæ opitulatrici unicè confidit fides nostra. Quod totum in disputatis quæstione unica de spe inculcat , & confirmat idem Angelicus Doctor his verbis : *Spes adipiscendi vitam aternam habet duo objecta , scilicet ipsam vitam aternam , quam quis sperat ; & auxilium divinum , à quo sperat : sicut etiam fides habet duo objecta , scilicet rem quam credit , & veritatem primam , cui correspondet. Fides autem non habet rationem virtutis , nisi in quantum inhaeret testimonio veritatis primæ , ut ei credat quod ab ea manifestatur , secundum illud Genes. 15. Credidit Abraham Deo , & reputatam est ei ad justitiam. Unde & spes habet rationem virtutis ex hoc ipso , quod homo inhaeret auxilio divinæ potestatis ad consequendam vitam aternam.*

Ex quibus omnibus locis tota simul speculatio suadetur. Ad objectum virtutis spei duo essentialiter exiguntur , scilicet futura beatitudo , quæ in fruitione Dei visi consistit ; & auxilium divinum , quo innititur ; vel potius ipsa Dei omnipotentia misericorditer præparans , offerens , & conferens auxilia ad æternum illud bonum adipiscendum necessaria ; ita ut altero eorum deficiente , essentialis ratio spei destruat. Ergo utrumque illorum ingreditur rationem formalem objecti spei , cum habitus non destruat , nisi deficiente objecto formali , & maneat semper illo subsistente. Atqui illa duo non ex æquo , & tanquam disparata , sed ordine quodam se habendo ingrediuntur objectum spei,

spei, ut ex illis coalescat unum totale objectum specificans; quod utique fiet, si unum sit objectum formale, quod respicit; alterum objectum formale, cui spes tota innixa est, ut contingit in fide, cujus objectum formale *quod est Deus*, sub ratione primæ veritatis in essendo; objectum verò formale *chi est prima veritas* ut revelans: Ergo solum Deum possidendum respicit spes tanquam objectum *quod*, soli que Deo omnipotenti auxiliatori inniritur, ut ipsum assequatur. Ambæ consequentiæ, sicut & minor, assumptæ sunt per se notæ penetrantibus terminos: sola major probanda est.

Et quidem prior majoris pars asserens beatitudinem futuram, Deum scilicet visione & fruitione possidendum, esse objectum quod respicit spes, suaderetur sic. Illud est de ratione formali objecti spei, per quod spes ab omnibus aliis virtutibus distinguitur, & quo posito, datur spes; quòve sublato, tollitur. Talis autem est beatitudo sperata: tum quia ita expressè tradit D. Thomas quæst. 17. sequenti, art. 2. *Spes*, inquit, *recipit speciem à suo objecto principali: objectum principale ejus est beatitudo aterna secundum quod est possibilis haberi ex auxilio divino; & ideo probat, non manere spem in Beatis, quia illis beatitudo non est futura & possidenda, sed præsens & possessa. Et subtracto eo, inquit initio corporis, quod dat speciem rei, resolvitur species, & res non potest eadem remanere: sicut remota formâ corporis naturalis, non remanet idem secundum speciem.* Tum quia spes in communi, ut diffinitur à D. Thoma 1. 2. quæst. 40. art. 1. est motus, sive inclinatio actualis, sive habitualis in bonum futurum, arduum, & possibile; unde in

Gentilismi, vel alterius sectæ infidelis; & tunc liceret occultare fidem, & communem patriæ vestem induere; quia tunc nullum adest divini honoris læsi periculum, nec tunc aliquo certamine agitur, Christi causa, nec Christianus vocatur in testem fidei, ut contingit in interrogazione facta à iudice; nec aliquod speciale falsæ religionis signum assumitur, sed commune gentis indumentum, cui conformari licet, usurpatur.

Occasione etiam præcepti fidei non est prætermittenda doctrina, quam habet Angelicus Magister infrà *quæst.* 16. ubi docet *art.* 1. quod in veteri lege non dabantur specialia credendi præcepta, sed solum unius Dei fides supponebatur. Cum enim præcepta non imponantur nisi subditis, qui possunt recipere legem; prima autem subjectio hominis ad Deum sit per fidem, juxta illud: *Accedentem ad Deum oportet credere quia est*; & patet, quia fides est vitæ spiritualis principium: hinc manifestum est, fidem unius Dei lationi divinæ legis præsuppositam fuisse. Unde *Exod.* 20. & *Deuter.* 6. ante divinorum præceptorum promulgationem veluti confessionis fidei necessitatem Dominus præmisit dicens: *Ego sum Dominus Deus tuus*, &c. Alia autem specialiora præcepta Judæis non sunt imposita, quia recondita fidei arcana non erant genti carnali passim exponenda, sed ab unigenito Filio, qui est in sinu Patris, suo erant tempore resignanda. Lata tamen sunt in veteri lege præcepta negativa expressè infidelitatem, & maxime plurium Deorum cultum prohibentia, ut in omnibus ferè veteris Instrumenti paginis claret. Præcepta etiam confessionis, & profes-

fessionis

fionis fidei sæpe sæpius sunt instituta, ut patet in illa bene longa diversarum cæremoniarum serie, quibus religio Judaïca distinctos ab aliis scētis ritus religiosissimè observans, fidem suam propalam profitebatur.

Dices: *Eccli. 2.* dicitur: *Qui timetis Dominum credite illi.* Ergo in veteri lege specialia erant credendi præcepta. Maximè quia Judæi tenebantur utique credere libris veteris Testamenti, qui sub lege continebantur; unde Dominus *Ioan. 15.* alludens ad librum Psalmorum, ait: *In lege scriptum est: Odio habuerunt me gratis.* Ubi libros veteris Testamenti ad legem veterem pertinere apertè indigitat.

Respondeo cum D. Thoma *ad 5.* quod in illa authoritate Eccl. præsupponitur fides, per quam credimus Deum esse, unde & præmittit *Qui timetis Dominum.* Timor autem Domini manifestè fidem illius præsupponit. Quod autem addit: *Credite illi*, ad quædam credibilia specialia referendum docet, & præcipuè ad illa, quæ promittit Deus sibi obedientibus. Unde subdit: *Et non evacuabitur merces vestra.* Quod si instes, & dicas S. Præceptorem in illa responsione argumenti videri sibi ipsi & doctrinæ traditæ contradicere; in corpore namque ait, quod suppositâ fide unius Dei, nulla alia præcepta in veteri lege sunt data de fide; & solutione *ad 5.* non negat, quin respectu specialium quorundam credibilium sit datum præceptum. Respondebo faciliè, quia Doctor Sanctus in corpore loquitur de secretioribus fidei mysteriis, putâ Trinitate, Incarnatione, aliisque ab unigenito Filio detegendis. In responsione verò *ad 3.* argumentum loquitur de aliis specialibus credi

credibilibus, quæ in veteris Testamenti libris continentur, & à Prophetis prædicabantur. Et quanvis libris veteris Testamenti receptis omnes credere tenerentur, non tamen explicita omnium in eis contentorum fides à singulis desiderabatur.

Observanda est etiam doctrina articuli secundi ejusdem quæstionis, ubi tradit Divinus Magister, quod circa scientiam & intellectum veritatum fidei data sunt præcepta secundum tria, quæ in illis considerari possunt; acquisitionem scilicet, usum, & conservationem. Acceptio, seu acquisitio, quæ contingit per doctrinam, & disciplinam, præcipitur in lege, dum dicitur Deuter. 6. *Erunt verba hæc, quæ ego præcipio tibi, in corde tuo:* (ecce disciplinam, pertinet enim ad discipulum cor iis, quæ sibi dicuntur, applicare:) *Et narrabis ea filiis tuis.* (ecce doctrinam, quæ filii, & discipuli imbuuntur.) Et Deut. 4. *Docebis ea filios tuos, & nepotes tuos.* Quibus patet, urgentiora & expressiora dari præcepta de doctrina, quàm de disciplina; quia doctrina pertinet ad majores, qui cum sint sui juris, majorique polleant iudicii lumine, & libertatis amplitudine, immediatius quadantenus divinæ legi subjiciuntur. Usus verò est seria, & profunda eorum meditatio, quæ scire, vel intelligere tenemur; & hoc sacrum, & perutile exercitium præcipit Scriptura post verba relata: *Et meditaberis ea sedens in domo tua, & ambulans in itinere, dormiens atque consurgens.* Quibus verbis quantum debeamus in divinæ legis, cœlestiumque veritatum studio esse assidui, mirum & energeticum in modum declaratur. Quod tamen non ita in-

telligen

telligendum putes, ut homo dormiendo legem Domini meditari possit, aut debeat: sed sensus est, quod homo & dum dormitum vadit, & dum inter dormiendum expergefit, aliquod divinæ veritatis, & legis mysterium, vel mandatum mente versare, & veluti mandare debet mente, quæ dicitur os spiritale, juxta illud: *Os justî meditabitur sapientiam.* Quia & per hoc meliora adipiscetur phantasinata, & somnia frequenter honestiora experietur; imaginationem enim species in vigilia partæ occupant. Denique conservatio habetur per firmam, tenacemque memoriam; & ideo subdit sacer textus laudatus: *Et ligabis ea quasi signum in manu tua.* Eruntque, & movebuntur inter oculos tuos, scribesque ea in limine, & ostiis domus tuæ. Quod jugem divinæ legis memoriâ nullâ unquam liturâ, vel oblivione delendam significat. Porro Clerici, & sacerdotes legant, quæso, solutionem D. Thomæ ad 3. ubi observat, in lege non mandari sacerdotibus addiscere scientiam, sicut Regibus *Deuter. 17.* imperatur; quia, inquit, scientia est adeo annexa eorum officio, ut simul cum injunctioe officii intelligatur simul injunctio doctrinæ legis.

R E F L E X I O.

Exigit sanè religionis, fideique nostræ bonitas causæ, ut ore eam, factisque confiteamur, utque cum de ea agitur, omni's ignavus rubor, omni's verecundia procul amandetur. Nam teste Veritate Luc. 9. *Qui me erubuerit, & meos sermones, hunc Filius hominis erubescet, cum venerit in majestate sua.* Et sanè de veritate religionis
 subdubi

subdubitare videtur, qui eam summa libertate, & erecto animo non confitetur. Quia ut dixit Tertull. lib. 7. adversus Valent. cap. 1. *Nihil veritas erubescit, nisi solummodo abscondi.* Hinc magnus Ambrosius postquam lib. 10. in *Lucam*, trinam Petri negationem quadantenus excusare, & ad bonum sensum redigere conatus est, considerans tamen debuisse Petrum absque ullis ambagibus, & verborum involucris clarè, aperteque Christum Dominum confiteri, excusationes pro illo adhibitas sic retractat: *Sed nos excusamus, Dominus ipse non excusavit. Non enim satis est involuta responsio consentientis Iesum, sed aperta confessio. Quid prodest verba involvere, si videri vis denegasse?*

Heu! quot Christianos quotidie cernimus non coram Tyrannis minantibus, vel cruciantibus, sed in facie, & in pace Ecclesiæ Christum, sermones ejus, & Evangelium erubescere, qui tamen signo crucis in fronte, dum confirmarentur, signati sunt, ut malum pudorem abstergant, crucisque Christi ignominiam honori ducant, & ornamento? Et postquam Christus non confusus est nos vocare fratres suos, confunduntur ipsi, dum & veritates intrepido docere animo, & sacras Evangelii maximas ad praxim redigere opus est. Et quod magis dolendum, nec minus verum est, illos ipsos, qui malum attritâ fronte sine pudore perpetrant (quod tamen pudore natura perfudit,) solus boni pudet. Hinc videmus tam multos scelerato silentio mala amicorum dissimulare, quibus unâ poterant fortassis monitione mederi. Hinc nonnullis modestia, parcitas, humilitas dedecori sunt, nec ad aliam exigunt mores suos regulam, quàm ad opinionem,

Gallicè,

Gillicè, *que dira-t-on?* Hos non lex regit, sed consuetudo; non timor Dei, sed mundi; utque hominibus placeant, servi Dei esse desierunt, dicente Apostolo: *Si hominibus placerem, servus Christi non essem.* Opportunè Magnus Gregor. hom. 32. in Evang. *Si nomen Christi in tanta hodie gloria non esset, tot professores Christi sancta Ecclesia non haberet.* Non ergo ad probationem fidei vox sufficit professionis, quam defendit à verecundia professio generalitatis. Et tamen ubi se quisque interroget, ut in confessione Christi se veraciter probet, si non iam nomen eius erubescit, si plenâ virtute mentis humanum pudorem subdidit. Certè enim persecutionis tempore erubescere poterant fideles substantiis nudari, de dignitatibus dejici, verberibus affigi. Pacis autem tempore, quia hac à nostris persecutionibus desunt, est aliud ubi ostendamus nobis. Veremur sapè à proximis despicì, dedignamur injurias verbis tolerare: Si contingat jurgium fortasse cum proximo, erubescimus priores satisfacere. Cor quippe carnale dum hujus vite gloriam querit, humilitatem respuit. Pensemus facta veritatis, ut videamus quò jaceant nostra pravitatis actiones.



DISSERTATIO III.

De virtute spei, & dono timoris.

Frustra tam immensa bona fides veritati divinæ innixa detegeret, nisi ea aliquando rerum cum Dei gratia obtenturos nos sperare liceret. Frustra fides attingeret inaccessa, de-
prehende

prehenderet ignota, comprehenderet immania, apprehenderet novissima, ipsam denique æternitatem suo illo vastissimo sinu, ut loquitur Bernardus, circumdaret, nisi ad illam æternam lucem, & præmonstratum bonum spes, quæ non confundit, tota festiva tenderet, ut secura perveniret. Melius profectò esset cœlestia ignorasse bona, quàm ab eis semel notis acquirendis animum despondere suum. Aspera sunt, non inficior, ardua, & difficilia quæcumque in excelsis posita sunt: sed ille idem, qui illa credentibus revelavit verus Deus, eadem dare potest omnipotens Deus, eadem promisit benignus Deus: quidni promissa persolveret fidelis Deus? *Dicit fides* (inquit Bern. serm. 10. in Psal. Qui habitat,) *parata sunt magna, & inexcogitabilia bona à Deo fidelibus suis. Dicit spes: Mihi illa servantur.* Et præclare August. lib. 22. de Civit. cap. ultimo: *Premium virtutis erit ipse, qui virtutem dedit, qui seipsum, quo nihil majus esse potest, promisit.* Ergo macte animo, Lector, ne cunctis abjicere spes miseras, vanas, inutiles, seductorias, ut uni christianæ spei tam solidæ, tam perfectæ, tam beatæ totâ animi devotione, toto spiritus fervore inhæreas. Sed ne in reflexionem orationis impetu, & hujus amabilissimæ virtutis flatu abripiamur, prius speculativas considerationes de more præmittere operæpretium est, quàm ut in æterna bona suspiremus. Spei autem tractationem timori cum D. Thoma jungimus, quia ut alicubi Moralium scriptum reliquit Magnus Gregorius: *De spe in casum presumit, qui timere Deum in suis operibus renuit.*

CAPVT I.

Virtutis spei objectum, subiectum, & precepta traduntur.

SUPponit titulus, spem esse virtutem strictè sumptam, quidquid in contrarium scripserit Durandus in 3. dist. 20. Etenim, ut rectè discurret S. Doctor *quæst. 17. art. 1.* virtus strictè sumpta illa est, quæ bonum facit habentem, & opus ejus bonum reddit. Ergo ubicumque invenitur bonus actus, debet ipsi sua correspondere virtus, à qua expeditè, facilè, & suaviter eliciatur. Sed actus spei bonus est, bonitas quippe actus in attingentia, seu consequutione suæ regulæ posita est; nam perfectio cujuslibet rei mensurata, ad regulam veluti ad amussim exigitur: actus autem spei attingit regulam sibi debitam. Nam cum ex una parte duplex sit regula humanorum actuum, una proxima & homogenea, scilicet ratio; alia heterogenea & excedens, scilicet Deus, ex quarum qualibet haurit humanus actus bonitatem: ex alia verò parte actus spei Deum, quem desiderat, immediatè attingat, ut ex sequentibus apparebit, manifestè relinquitur, actum spei attingere primam, & indefectibilem regulam, & totius humanæ bonitatis archetypum.

Nec objectio Durandi urget, dum ait, virtutem perfectam esse habitum potentiam in ultimo

timo perfectionis actui debitæ constituentem, cum sit ultimum potentia, & dispositio perfecti ad optimum: spes autem est dispositio imperfecti, cum sperans re speratâ careat. Non urget, inquam, quia ut optimè respondet S. Thomas ad 3. ille qui sperat, est quidem imperfectus, si consideretur id, quod sperat obtinere; quod nondum habet; sed est perfectus quantum ad hoc, quod jam attingit primam regulam, scilicet Deum, cujus auxilio innititur. Unde & spes in ultimo potentiam ponit, quia in statu viæ ulteriorem perfectionem non exigit: habere namque rem speratam, eaque frui, non est de perfectione actus pro hoc statu, sed est beatitudinis futuræ consummatio; non est conditio viæ, sed est felicitas patriæ, quam tamen spes prægustat, & homines præoperè beatos facit; unde & vocatur gaudium ante gaudium, & possessionis futuræ inchoatio, dicente Chrysostomo: *Spes gloriam inchoat, & sustinendo consummat.*

Cætera, quæ de ratione virtutis circa spem tractari possent, ex dictis dum de fide, elucidata manent, & proportionem servatâ fidei applicari debent. Quare ex solùm difficultates supersunt ventilandæ, quæ objectum, subjectum, & præceptum illius concernunt.

SPECVLATIO I.

*Ad solum Deum summum bonum,
visione futurâ possidendum tendit
spes : Soli Deo innititur , ut ip-
sum assequatur.*

HÆc plena solatii speculatio objectum ter-
minativum , & motivum , seu ut aiunt,
objectum quod , & objectum quo , spei nostræ de-
clarat , estque tota ferè totidem verbis ex D.
Thoma deprompta. Etenim S. Doctor *art. 1.* pro-
baturus spem esse virtutem specialem , id osten-
dit ex objecto specificativo , hoc modo : *In
quantum speramus aliquid ut possibile nobis per
divinum auxilium , spes nostra attingit ad ipsum
Deum , cuius auxilio innititur.* Et ideo patet,
quod spes est virtus. Et *art. 2.* tractans de obje-
cto proprio spei , sic divinè discurret : *Spes , à
qua loquimur , attingit Deum , innitens ejus au-
xilium ad consequendum bonum speratum.* Opôr-
tet autem effectum esse causa proportionatum ; &
ideo bonum quod propriè & principaliter à Deo
sperare debemus , est bonum infinitum , quod pro-
portionatur virtuti Dei adjuvantis. Nam in-
finita virtutis est proprium ad infinitum bonum
perducere. Hoc autem bonum est vita aterna,
quæ in fruitione ipsius Dei consistit : Non enim
aliquid minus ab eo sperandum est , quàm sit
ipse , cum non sit minor ejus bonitas , per quam
bona creatura communicat , quàm ejus essentia.
Ubi S. Doctor assignat pro objecto quod , seu
termi

terminativo spei beatitudinem futuram , tam formalem , quàm objectivam : pro objecto verò motivo , seu quo , assignat ipsummet Deum ut auxiliatorem ; cui misericordiæ opitulatrici unicè confidit fides nostra. Quod totum in disputatis quæstione unica de spe inculcat , & confirmat idem Angelicus Doctor his verbis : *Spes adipiscendi vitam æternam habet duo objecta , scilicet ipsam vitam æternam , quam quis sperat , & auxilium divinum , à quo sperat : sicut etiam fides habet duo objecta , scilicet rem quam credit , & veritatem primam , cui correspondet. Fides autem non habet rationem virtutis , nisi in quantum inhæret testimonio veritatis primæ , ut ei credat quod ab ea manifestatur , secundum illud Genes. 15. Credidit Abraham Deo , & reputatum est ei ad justitiam. Unde & spes habet rationem virtutis ex hoc ipso , quod homo inhæret auxilio divinæ potestatis ad consequendam vitam æternam.*

Ex quibus omnibus locis tota simul speculatio suadetur. Ad objectum virtutis spei duo essentialiter exiguntur , scilicet futura beatitudo , quæ in fruitione Dei visi consistit ; & auxilium divinum , quo inniritur ; vel potius ipsa Dei omnipotentia misericorditer præparans , offerens , & conferens auxilia ad æternum illud bonum adipiscendum necessaria ; ita ut altero eorum deficiente , essentialis ratio spei destruat. Ergo utrumque illorum ingreditur rationem formalem objecti spei , cum habitus non destruat , nisi deficiente objecto formali , & maneat semper illo subsistente. Atqui illa duo non ex æquo , & tanquam disparata , sed ordine quodam se habendo ingrediuntur objectum spei,

spei, ut ex illis coalescat unum totale objectum specificans; quod utique fiet, si unum sit objectum formale, quod respicit; alterum objectum formale, cui spes tota innixa est, ut contingit in fide, cujus objectum formale *quod* est Deus, sub ratione primæ veritatis in essendo; objectum verò formale *cui* est prima veritas ut revelans: Ergo solum Deum possidendum respicit spes tanquam objectum *quod*, solique Deo omnipotenti auxiliatori innititur, ut ipsum assequatur. Ambæ consequentiæ, sicut & minor, assumptæ sunt per se notæ penetrantibus terminos: sola major probanda est.

Et quidem prior majoris pars asserens beatitudinem futuram, Deum scilicet visione & fruitione possidendum, esse objectum quod respicit spes, suadetur sic. Illud est de ratione formali objecti spei, per quod spes ab omnibus aliis virtutibus distinguitur, & quo posito, datur spes; quòve sublato, tollitur. Talis autem est beatitudo sperata: tum quia ita expressè tradit D. Thomas quæst. 17. sequenti, art. 2. *Spes*, inquit, *recipit speciem à suo objecto principali: objectum principale ejus est beatitudo aterna secundum quod est possibilis haberi ex auxilio divino; & ideo probat, non manere spem in Beatis, quia illis beatitudo non est futura & possidenda, sed præsens & possessa. Et subtracto eo, inquit initio corporis, quod dat speciem rei, resolvitur species, & res non potest eadem remanere: sicut remota à formâ corporis naturalis, non remanet idem secundum speciem.* Tum quia spes in communi, ut diffinitur à D. Thoma 1. 2. quæst. 40. art. 1. est motus, sive inclinatio actualis, sive habitualis in bonum futurum, arduum, & possibile; unde in

objecto spei quatuor considerant cum D. Thoma Doctores : primò rationem boni , per quod differt à timore, qui refugit malum : secundo rationem boni futuri, seu non præsentis, per quod distinguitur à gaudio , & delectatione , quorum objectum præsens est ; & ab amore , qui à præsentia , & absentia abstrahit : tertio rationem ardui , per quod differt à desiderio , supra quod addit spes aliquem conatum ad evincendas difficultates enitentem ; unde desiderium ad concupiscibilem , spes ad irascibilem appetitum spectat : quartò rationem boni possibilis, per quod differt à desperatione. Atqui hæc quatuor conditiones conveniunt bono sperato, scilicet Deo visione futura possidendo ; est enim Deus clarè videndus bonus , & ipsa bonitatis essentia , ac totius felicitatis centrum ; est etiam futurus, cum non in hac vita, sed post mortem duntaxat, faciem suam Deus ostendat ; est arduus , cum omnes naturæ vires excedat supernaturalis visio Dei, & aliunde non nisi per arctas semitas æquitatis, & per angustam portam ad illam pervenitur ; est denique possibilis , cum & Deus bonum illud promiserit, & etiam illius desiderium cordi nostro implantaverit : desiderium autem à Deo rebus ingenitum, nec frustrari debet, nec ad impossibilia ferri potest. Ergo per bonum speratum, Deum scilicet fruitione futura possidendum , spes ab aliis omnibus virtutibus distinguitur, subindeque bonum illius est objectum quod respicit.

Posterior ejusdem majoris pars , quod nimirum spes uni Deo omnipotenti auxiliatori, tanquam rationi formati innitatur , sic monstratur: Non solum spes est divina , & virtus theologica,

gica, quia sperat bonum divinum; sed etiam quia sperat à Deo, illique innititur; nam si ab Angelo, vel homine vitam æternam speraret, spes esset humana, & Angelica, subiindeque maledicta, cùm scriptum sit: *Maledictus qui spem ponit in homine.* Et in hoc essentialiter distinguitur spes humana à divina, quòd illa fragilibus creaturarum viribus freta, ista omnipotentissimâ divini Numinis potestate innixa est: eo planè modo, quo de fide superius dictum est, divinam una Dei revelatione, humanam solo hominum testimonio moveri. Et certè sicut spes non minus à Deo sperat, quàm sit ipse; ita non minorem postulat adiutorem, quàm sit ipse Deus; quia ut præclare suprâ discurrebat S. Thomas: *Infinite virtutis est proprium ad infinitum bonum perducere.* Ergo si cuicumque alteri virtuti finitæ spes consideret, non esset virtus theologica, sed fallax, fragilisque fiducia, & inanis prorsus contentio, quæ in medio spatio fracta corrueret, & antè in ipso vitæ portu obrueretur, quàm portum conspiciere posset.

Solvuntur objectiones.

Dices: D. Thomas *quest. unica de spe*, suprâ citata, sic formaliter habet: *Objectum formale spei est auxilium divina pietatis, & potestatis, propter quod tendit motus spei in bona sperata, qua sunt materiale objectum spei.* Ergo beatitudo sperata non ad objectum formale, sed materiale spei spectat.

Respondeo ibi S. Doctorem loqui de bonis, quos in ordine ad beatitudinem æternam spe-

ramus. Nam ut ait idem Angelicus Præceptor hîc, art.2. ad 2. *Spes principaliter quidem respicit beatitudinem æternam; alia verò, qua petuntur à Deo, respicit secundariò in ordine ad beatitudinem æternam: sicut & fides principaliter quidem respicit Deum, & secundariò respicit ea qua ad Deum ordinantur.* Quod si contendas, S. Doctorem eò loci loqui de beatitudine æterna, dico quod sicut medium demonstrationis appellatur objectum formale scientiæ, conclusio verò objectum materiale, quia conclusio, tametsi ad objectum formale scientiæ pertineat, habet quadantenus rationem objecti materialis respectu medi; quod est ratio assentiendi, quæ ut barbarè, sed expressivè dici assolet, formalizat conclusionem scitam: ita illud quod speramus, licèt sit formale respectu spei, est tamen aliquo modo materiale respectu rationis formalis, propter quam speramus.

Instabis: Cùm dicimus, beatitudinem æternam esse objectum formale spei, vel intelligimus de beatitudine formali, vel de beatitudine objectiva. Neutrum dici potest. Et primò non potest dici cum Durando, objectum formale spei esse visionem, & possessionem Dei; quia spes est virtus theologica, ut fatentur omnes Theologi, & sciunt omnes Christiani, & demonstrat D.Thomas *art.5.* Quia cùm spes habeat rationem virtutis ex hoc, quod attingit supremam regulam humanorum actuum, cui conformatur; & primam causam efficientem, in quantum ejus auxilio innititur; & ultimam causam finalem, in quantum in ejus fruitione beatitudinem spectat, nulla erit virtus, quæ
theo

theologica dici possit, & spes inter virtutes theologicas non computetur. Si autem spes non ipsum Deum immediatè, sed solam visionem respiceret, spes non esset virtus theologica: nam ad rationem virtutis theologicae non sufficit habere Deum pro objecto mediato, aliàs religio, & timor Domini essent virtutes theologicae, quod nullus admittit, hac solùm ratione, quia prima aliquid creatum respicit, scilicet cultum Dei pro objecto; secunda verò, quia licet habeat Deum pro objecto, à quo imminet malum; tamen non Deum primariò, sed malum ab ipso intentatum respicit: ergo spes habet pro objecto non solam visionem, sed etiam ipsum Deum videndum. Non potest etiam dici cum quibusdam Thomistis, quos sequitur P. Gonet, visionem, seu beatitudinem formalem non ingredi objectum spei, sed solam beatitudinem objectivam: nam Deus non est præcisè objectum spei nostrae, quia est bonus, & summum bonum, cum ut sic sit etiam objectum charitatis; sed quatenus est bonum nostrum, nos beans, nobis conveniens, nobis sese ostendens, & se effundens larga sui communicatione possidendum. Atqui Deus ut nos beans, ut se communicans, ut se possidendum præbens, importat visionem, & fruitionem, quâ ipso præfenti potiti beamur: ergo objectum spei non sola beatitudo objectiva, sed ipsum etiam ingreditur beatitudo formalis.

Respondeo, ad objectum formale spei, & beatitudinem objectivam, & formalem pertinere; quanvis fatear, objectivam primariò & principalius, formalem secundariò, utramque tamen formaliter includi. Nam præter ratio-

nes inter obijciendum allatas, quas omnes probō, quia utramque beatitudinem ad objectum quod spei, inadaquatè tamen, pertinere arbitror; præter illas, inquam, est adhuc hoc argumentum, quo vehementer permoveor: Quia secundum D. Thomam & veritatem, possessio rei, & res ipsa possessa non sunt duo fines, sed unus desideratus. Avarus quippe nec pecuniam sine possessione, nec possessionem sine pecunia, sed unum cum alio indivisim concupiscit: ergo objectum formale spei est Deus ut visione possidendus. Bonum, quod propriè à Deo sperare debemus, inquit D. Thomas supra laudatus, est bonum infinitum; hoc autem bonum est vita æterna, qua in fruitione Dei consistit. Ubi & beatitudinem objectivam, & formalem in ratione objecti spei involvit.

Sed urgebis: Ergo spes non habebit pro objecto immediato Deum, sed aliquid creatum, nempe visionem, subindeque non erit virtus theologia.

Respondeo, quod licet fateamur visionem, seu potius Deum ut videndum esse objectum formale fidei, non tamen inde sequi, Deum non esse immediatum objectum spei. Ad cujus profundum, & clarum intellectum considerandum est, quod quemadmodum in causis effectivis inveniuntur tria, ratio agendi, actio & passio, & effectus: ita in bono, quod exercet causam finalem, est ratio movendi, seu ut barbarè dicitur, ratio finalizandi; ipsum movere seu finalizare, est effectus finis. Patet autem, quod licet in principio activo multa concurrant, nimirum ipsum agens, virtus agendi, actio agentis, passio mobilis; hoc tamen non impedit immédia-

tionem

tionem agentis, si aliud agens non mediet. Ergo similiter negandum non est, finem immediatè sperari, vel possideri, licèt interveniat motio, seu finalizatio finis, nimirum amor, & fruitio ipsius, & consequenter visio, & possessio ejus, quæ præsupponitur ad fruitionem. Ergo spes non desinet respicere Deum tanquam objectum immediatum, quanvis respiciat Deum visione, & fruitione possidendum. Sicut etiam secundum adversarios, & omnes, spes in ratione sua *sub qua* immediatè respicit Deum, quantumvis ipsum non respiciat, nisi ut agat, subveniat, & ducat in ultimum finem. Quia nimirum sicut agens, & actio non ponunt in numero in ratione efficiendi effectum, qui rectè dicitur immediatè procedere ab agente; ita finis, & possessio non ponunt in numero in ratione movendi voluntatem, quæ rectè dicetur immediatè à fine allici, tametsi ab eo ut possidendo moveatur.

Insistes ex Gonet: Idem est objectum, in quod tendit motus desiderii, & in quo quiescit; sicut idem est locus, in quem tendit motus corporis gravis, & in quo, finito motu, quiescit. Atqui immediatum objectum fruitionis patriæ non est visio, sed solus Deus, qui solus satiat appetitum; unde August. lib. 10. confess. cap. 23. *Beata vita*, inquit, *est gaudium de veritate; hoc est de te, qui veritas es, Deus meus.* Ergo beatitudo formalis non ingreditur objectum formale spei.

Respondeo hoc argumento potiùs confirmari nostram sententiam; cum enim hæc sit essentialis differentia inter desiderium, amorem, & fruitionem, seu gaudium, quòd desiderium rem absentem respicit, amor ab absentia & præsen-

timo perfectionis actui debitæ constituentem, cum sit ultimum potentia, & dispositio perfecti ad optimum: spes autem est dispositio imperfecti, cum sperans re speratâ careat. Non urget, inquam, quia ut optimè respondet S. Thomas ad 3. ille qui sperat, est quidem imperfectus, si consideretur id, quod sperat obtinere; quod nondum habet; sed est perfectus quantum ad hoc, quod jam attingit primam regulam, scilicet Deum, cujus auxilio innititur. Unde & spes in ultimo potentiam ponit, quia in statu viæ ulteriorem perfectionem non exigat: habere namque rem speratam, eaque frui, non est de perfectione actus pro hoc statu, sed est beatitudinis futuræ consummatio; non est conditio viæ, sed est felicitas patriæ, quam tamen spes prægustat, & homines præoperè beatos facit; unde & vocatur gaudium ante gaudium, & possessionis futuræ inchoatio, dicente Chrysostomo: *Spes gloriam inchoat, & sustinendo consummat.*

Cætera, quæ de ratione virtutis circa spem tractari possent, ex dictis dum de fide, elucidata manent, & proportionem servatâ fidei applicari debent. Quare ex solùm difficultates supersunt ventilandæ, quæ objectum, subjectum, & præceptum illius concernunt.

SPECVLATIO I.

*Ad solum Deum summum bonum,
visione futurâ possidendum tendit
spes : Soli Deo innititur , ut ip-
sum assequatur.*

HÆc plena solatii speculatio objectum ter-
minativum , & motivum , seu ut aiunt,
objectum quod , & objectum quo , spei nostræ de-
clarat , estque tota ferè totidem verbis ex D.
Thoma deprompta. Etenim S. Doctor art. 1. pro-
baturus spem esse virtutem specialem , id osten-
dit ex objecto specificativo , hoc modo : *In
quantum speramus aliquid ut possibile nobis per
divinum auxilium , spes nostra attingit ad ipsum
Deum , cuius auxilio innititur.* Et ideo patet,
quod spes est virtus. Et art. 2. tractans de obje-
cto proprio spei , sic divinè discurret : *Spes , de
qua loquimur , attingit Deum , innitens ejus au-
xilium ad consequendum bonum speratum.* Opôr-
tet autem effectum esse causa proportionatum ; &
ideo bonum quod propriè & principaliter à Deo
sperare debemus , est bonum infinitum , quod pro-
portionatur virtuti Dei adjuvantis. Nam in-
finita virtutis est proprium ad infinitum bonum
perducere. Hoc autem bonum est vita aterna,
quæ in fruitione ipsius Dei consistit : Non enim
aliquid minus ab eo sperandum est , quàm sit
ipse , cum non sit minor ejus bonitas , per quam
bona creatura communicat , quàm ejus essentia.
Ubi S. Doctor assignat pro objecto quod , seu
termi

terminativo spei beatitudinem futuram , tam formalem , quàm objectivam : pro objecto verò motivo , seu quo , assignat ipsummet Deum ut auxiliatorem ; cui misericordiæ opitulatrici unicè confidit fides nostra. Quod totum in disputatis quæstione unica de spe inculcat, & confirmat idem Angelicus Doctor his verbis : *Spes adipiscendi vitam æternam habet duo objecta, scilicet ipsam vitam æternam, quam quis sperat, & auxilium divinum, à quo sperat: sicut etiam fides habet duo objecta, scilicet rem quam credit, & veritatem primam, cui correspondet. Fides autem non habet rationem virtutis, nisi in quantum inhaeret testimonio veritatis primæ, ut ei credat quod ab ea manifestatur, secundum illud Genes. 15. Credidit Abraham Deo, & reputatum est ei ad justitiam. Unde & spes habet rationem virtutis ex hoc ipso, quod homo inhaeret auxilio divinæ potestatis ad consequendam vitam æternam.*

Ex quibus omnibus locis tota simul speculatio suadetur. Ad objectum virtutis spei duo essentialiter exiguntur , scilicet futura beatitudo , quæ in fruitione Dei visi consistit ; & auxilium divinum , quo innititur ; vel potius ipsa Dei omnipotentia misericorditer præparans, offerens , & conferens auxilia ad æternum illud bonum adipiscendum necessaria ; ita ut altero eorum deficiente , essentialis ratio spei destruat. Ergo utrumque illorum ingreditur rationem formalem objecti spei , cùm habitus non destruat , nisi deficiente objecto formali , & maneat semper illo subsistente. Atqui illa duo non ex æquo , & tanquam disparata , sed ordine quodam se habendo ingrediuntur objectum spei,

spei, ut ex illis coalescat unum totale objectum specificans; quod utique fiet, si unum sit objectum formale, quod respicit; alterum objectum formale, cui spes tota innixa est, ut contingit in fide, cujus objectum formale *quod est Deus*, sub ratione primæ veritatis in essendo; objectum verò formale *cui est prima veritas* ut revelans: Ergo solum Deum possidendum respicit spes tanquam objectum *quod*, solique Deo omnipotenti auxiliatori innititur, ut ipsum assequatur. Ambæ consequentiæ, sicut & minor, assumptæ sunt per se notæ penetrantibus terminos: sola major probanda est.

Et quidem prior majoris pars asserens beatitudinem futuram, Deum scilicet visione & fruitione possidendum, esse objectum quod respicit spes, suadetur sic. Illud est de ratione formali objecti spei, per quod spes ab omnibus aliis virtutibus distinguitur, & quo posito, datur spes; quòve sublato, tollitur. Talis autem est beatitudo sperata: tum quia ita expressè tradit D. Thomas quæst. 17. sequenti, art. 2. *Spes*, inquit, *recipit speciem à suo objecto principali: objectum principale ejus est beatitudo aterna secundum quod est possibilis haberi ex auxilio divino; & ideo probat, non manere spem in Beatis, quia illis beatitudo non est futura & possidenda, sed præsens & possessa. Et subtracto eo, inquit initio corporis, quod dat speciem rei, resolvitur species, & res non potest eadem remanere: sicut remota forma corporis naturalis, non remanet idem secundum speciem.* Tum quia spes in communi, ut diffinitur à D. Thoma 1. 2. quæst. 40. art. 1. est motus, sive inclinatio actualis, sive habitualis in bonum futurum, arduum, & possibile; unde in

objecto spei quatuor considerant cum D. Thoma Doctores : primò rationem boni , per quod differt à timore, qui refugit malum : secundò rationem boni futuri, seu non præsentis, per quod distinguitur à gaudio , & delectatione , quorum objectum præsens est ; & ab amore , qui à præsentia , & absentia abstrahit : tertio rationem ardui , per quod differt à desiderio , supra quod addit spes aliquem conatum ad evincendas difficultates enitentem ; unde desiderium ad concupiscibilem , spes ad irascibilem appetitum spectat : quartò rationem boni possibilis, per quod differt à desperatione. Atqui hæc quatuor conditiones conveniunt bono sperato, scilicet Deo visione futura possidendo ; est enim Deus clarè videndus bonus , & ipsa bonitatis essentia, ac totius felicitatis centrum ; est etiam futurus, cum non in hac vita, sed post mortem duntaxat, faciem suam Deus ostendat ; est arduus , cum omnes naturæ vires excedat supernaturalis visio Dei, & aliunde non nisi per arctas semitas æquitatis, & per angustam portam ad illam pervenitur ; est denique possibilis , cum & Deus bonum illud promiserit, & etiam illius desiderium cordi nostro implantaverit : desiderium autem à Deo rebus ingentum, nec frustrari debet, nec ad impossibilia ferri potest. Ergo per bonum speratum , Deum scilicet fruitione futura possidendum , spes ab aliis omnibus virtutibus distinguitur , subindeque bonum illius est objectum quod respicit.

Posterior ejusdem majoris pars , quod nimirum spes uni Deo omnipotenti auxiliatori, tanquam rationi formati innitatur , sic monstratur: Non solum spes est divina , & virtus theologica,

gica, quia sperat bonum divinum; sed etiam quia sperat à Deo, illique innititur; nam si ab Angelo, vel homine vitam æternam speraret, spes esset humana, & Angelica, subindeque maledicta, cum scriptum sit: *Maledictus qui spem ponit in homine.* Et in hoc essentialiter distinguitur spes humana à divina, quòd illa fragilibus creaturarum viribus freta, ista omnipotentissimâ divini Numinis potestate innixa est: eo planè modo, quo de fide superius dictum est, divinam una Dei revelatione, humanam solo hominum testimonio moveri. Et certè sicut spes non minus à Deo sperat, quàm sit ipse; ita non minorem postulat adiutorem, quàm sit ipse Deus; quia ut præclare suprà discurrebat S. Thomas: *Infinita virtutis est proprium ad infinitum bonum perducere.* Ergo si cuicumque alteri virtuti finitæ spes consideret, non esset virtus theologica, sed fallax, fragilisque fiducia, & inanis prorsus contentio, quæ in medio spatio fracta corrueret, & antè in ipso vitæ portu obrueretur, quàm portum conspiciere posset.

Solvuntur objectiones.

Dices: D. Thomas *quest. unica de spe*, suprà citata, sic formaliter habet: *Objectum formale spei est auxilium divina pietatis, & potestatis, propter quod tendit motus spei in bona sperata, qua sunt materiale objectum spei.* Ergo beatitudo sperata non ad objectum formale, sed materiale spei spectat.

Respondeo ibi S. Doctorem loqui de bonis, quos in ordine ad beatitudinem æternam spe-

theologica dici possit, si spes inter virtutes theologicas non computetur. Si autem spes non ipsum Deum immediatè, sed solam visionem respiceret, spes non esset virtus theologica: nam ad rationem virtutis theologicæ non sufficit habere Deum pro objecto mediato, aliàs religio, & timor Domini essent virtutes theologicæ, quod nullus admittit, hac solùm ratione, quia prima aliquid creatum respicit, scilicet cultum Dei pro objecto; secunda verò, quia licet habeat Deum pro objecto, à quo imminet malum; tamen non Deum primariò, sed malum ab ipso intentatum respicit: ergo spes habet pro objecto non solam visionem, sed etiam ipsum Deum videndum. Non potest etiam dici cum quibusdam Thomistis, quos sequitur P. Gonet, visionem, seu beatitudinem formalem non ingredi objectum spei, sed solam beatitudinem objectivam: nam Deus non est præcisè objectum spei nostræ, quia est bonus, & summum bonum, cum ut sic sit etiam objectum charitatis; sed quatenus est bonum nostrum, nos beans, nobis conveniens, nobis sese ostendens, & se effundens larga sui communicatione possidendum. Atqui Deus ut nos beans, ut se communicans, ut se possidendum præbens, importat visionem, & fruitionem, quâ ipso præsentis potiti beamur: ergo objectum spei non sola beatitudo objectiva, sed ipsum etiam ingreditur beatitudo formalis.

Respondeo, ad objectum formale spei, & beatitudinem objectivam, & formalem pertinere; quanvis fatear, objectivam primariò & principalius, formalem secundariò, utramque tamen formaliter includi. Nam præter ratio-

nes inter obijciendum allatas, quas omnes *probo*, quia utramque beatitudinem ad *objectum quod spei*, inadaquatè tamen, pertinere arbitror; præter illas, inquam, est adhuc hoc argumentum, quo vehementer permoveor: Quia secundum D. Thomam & veritatem, possessio rei, & res ipsa possessa non sunt duo fines, sed unus desideratus. Avarus quippe nec pecuniam sine possessione, nec possessionem sine pecunia, sed unum cum alio indivisum concupiscit: ergo *objectum formale spei est Deus* ut visione possidendus. *Bonum, quod propriè à Deo sperare debemus*, inquit D. Thomas suprà laudatus, *est bonum infinitum; hoc autem bonum est vita æterna, qua in fruitione Dei consistit*. Ubi & beatitudinem objectivam, & formalem in ratione objecti spei involvit.

Sed urgebis: Ergo spes non habebit pro *objecto immediato Deum*, sed aliquid creatum, nempe visionem, subindeque non erit virtus theologica.

Respondeo, quod licèt fateamur visionem, seu potius Deum ut videndum esse *objectum formale fidei*, non tamen inde sequi, Deum non esse immediatum *objectum spei*. Ad cujus profundum, & clarum intellectum considerandum est, quod quemadmodum in causis effectivis inveniuntur tria, ratio agendi, actio & passio, & effectus: ita in bono, quod exercet causam finalem, est ratio movendi, seu ut barbarè dicitur, ratio finalizandi; ipsum movere seu finalizare, est effectus finis. Patet autem, quod licèt in principio activo multa concurrant, nimirum ipsum agens, virtus agendi, actio agentis, passio mobilis; hoc tamen non impedit immedia-

tionem

tionem agentis, si aliud agens non mediet. Ergo similiter negandum non est, finem immediatè sperari, vel possideri, licèt interveniat motio, seu finalizatio finis, nimirum amor, & fructio ipsius, & consequenter visio, & possessio ejus, quæ præsupponitur ad fruitionem. Ergo spes non desinet respicere Deum tanquam objectum immediatum, quanvis respiciat Deum visione, & fruitione possidendum. Sicut etiam secundum adversarios, & omnes, spes in ratione sua *sub qua* immediatè respicit Deum, quantumvis ipsum non respiciat, nisi ut agat, subveniat, & ducat in ultimum finem. Quia nimirum sicut agens, & actio non ponunt in numero in ratione efficiendi effectum, qui rectè dicitur immediatè procedere ab agente; ita finis, & possessio non ponunt in numero in ratione movendi voluntatem, quæ rectè dicetur immediatè à fine allici, tametsi ab eo ut possidendo moveatur.

Insistes ex Gonet: Idem est objectum, in quod tendit motus desiderii, & in quo quiescit; sicut idem est locus, in quem tendit motus corporis gravis, & in quo, finito motu, quiescit. Atqui immediatum objectum fruitionis patriæ non est visio, sed solus Deus, qui solus satiat appetitum; unde August. lib. 10. confess. cap. 23. *Beata vita*, inquit, *est gaudium de veritate; hoc est de te, qui veritas es, Deus meus.* Ergo beatitudo formalis non ingreditur objectum formale spei.

Respondeo hoc argumento potius confirmari nostram sententiam; cum enim hæc sit essentialis differentia inter desiderium, amorem, & fruitionem, seu gaudium, quòd desiderium rem absentem respicit, amor ab absentia & præsen-

tia præscindit, gaudium verò & delectatio rei præsentiam ita essentialiter exigat, ut sine illa gaudium nec esse, nec concipi possit: manifestè relinquitur, objectum fruitionis patriæ non esse Deum præcisè, sed Deum in præsentem & visione possessum. Quod usqueadeò verum est, ut per illam præsentia rationem à gaudio inspectam, distinguant Theologi attributum amoris, & delectationis in Deo. Unde manifestum est, beatitudinem formalem non esse solam conditionem objecti spei, sed ipsum objectum formale ingredi; cum in objecto delectationis necessario, & essentialiter importetur.

Urget ex alio capite Durandus: Objectum spei est objectum amoris concupiscentiæ, cum per spem ad bonum nostrum suspiremus: sed Deus secundum se non est immediatum objectum amoris concupiscentiæ, sed solum possessio ejus; nam secundum se Deus est amabilis propter se, non propter nos, aliàs Deus ad nos referretur, quod esset utri fruendis, quæ est perversitas perversitatum, teste Augustino. Ergo immediatum objectum spei est sola visio, & possessio Dei.

Respondeo, quod cum Deus secundum se sit bonum nostrum, & bonum nostrum sit objectum concupiscentiæ, planum est Deum secundum se esse justæ concupiscentiæ nostræ objectum, non quod ad nos ordinetur, sed ad quod nos ordinamur; & in hoc habet rationem objecti concupiscentiæ. Nam, ut egregiè, & juxta acutè discurret Cajetanus, quot modis contingit aliquid esse bonum amantis, tot modis potest ab illo concupisci: contingit autem, Deum esse bonum nostrum, non quod ipse sit propter nos, sed

sed quia propter ipsum sumus : Ergo potest contingere aliquid ab amante concupisci, quod non ordinabitur ad amantem, sed ad quod potius se amans referet ; quia in hoc consistit bonum amantis, si se totum ad Deum ordinet. Et confirmatur : Eadem est ratio de dato, ac de concupito ; quia quod datur alicui, illi utique concupiscitur, sed aliquid potest alicui dari, quod in ipsum non ordinatur, sicut in mysterio Incarnationis Filius datus est nobis, ad quem tamen omnes nos ordinamur : Ergo similiter potest aliquid esse objectum amoris concupiscentiæ, licet in amantem non referatur, sed amans in ipsum ordinetur ; requiritur tamen ut bonum illud concupiscenti desideretur. Itaque licet Deus non possit nisi perversè amari propter nos, potest tamen amari nobis : & licet in se sit amabilis amore amicitiae, est etiam amabilis amore concupiscentiæ ; quia etiam in se est bonum nostrum.

Perstistit Durandus : Idem est objectum delectationis, & spei, servato duntaxat diverso modo præsentis & futuri ; spes namque, & fructio solum tanquam via, & terminus, motus & quies distinguuntur. Atqui objectum immediatum delectationis non est Deus in se immediatè, seu beatitudo objectiva, sed sola formalis, seu visio : tum primò, quia objectum immediatum amoris concupiscentiæ non est res distincta à subjecto, cui concupiscitur. V. g. qui concupiscit vinum, non ipsum, sed usum vini concupiscit ; quia nimirum per amorem concupiscentiæ optamus bonum nostrum ; res autem distincta fit nostra mediante usu. Constat verò, delectationem de Deo ad amorem concupis-

centiæ pertinere; & quia non est amor benevolentiae charitati, non spei correspondens; & quia habet pro objecto formali bonum utile, & delectabile. Tum secundo, quia idem est objectum delectationis, & desiderii: objectum autem immediatum desiderii non est Deus secundum se, quia objectum desiderii est futurum, & Deus secundum se praesens est; sola vero visio futura est. Tum tertio, quia idem est objectum immediatum delectationis Beatorum, & tristitiae damnatorum: objectum autem tristitiae damnatorum non est Deus secundum se, sed privatio visionis ejus, quia cum Deum non diligant, de Deo secundum se, & propter se spectato dolere non possunt. Tum denique, quia objectum delectationis est operatio, quia delectatio secundum Philosophum operationem sequitur, perficit, & comitatur, sicut decus juventutem; & ad operationem, cujus est condimentum, ordinatur. Ergo non Deus immediate, sed visio est objectum delectationis Beatorum.

Respondeo, delectationem non solum ad amorem concupiscentiae, sed etiam ad amorem amicitiae pertinere. Non enim verus est amicus, qui de bonis amici non delectatur; & praecipuum Beatorum gaudium circa bonum divinum propter Deum, quem summè diligunt, occupatur, quanvis secundariò circa felicitatem suam formalem versetur. Cum ergo saltem amor amicitiae feratur in Deum propter seipsum, falsum absolutè est, Deum secundum se non posse esse objectum delectationis Beatorum. Ad primam probationem in contrarium dicendum in primis, falsum esse, objectum amoris concu-

piscen

piscentiæ non esse rem à subjecto distinctam; nam finis potest amari amore concupiscentiæ, etiamsi sit distinctus ab amante; nec qui vinum concupiscit, vinum ab usu distinguit, sed ut utrumque conjungit; quia, ut sæpe dictum est, possessio rei, & res ipsa possessa non sunt duo fines, sed unus. Ad secundam probationem dicunt aliqui, idem quidem esse objectum desiderii, & delectationis, sed non eodem modo; licet enim bonitas divina secundum se sit summè desiderabilis, sicut & delectabilis; desiderium tamen quia supponit rem absentem, aliquam supponit imperfectionem ex parte desiderantis, quâ caret delectatio. Melius tamen, & clariùs dici potest, desiderium ferri in Deum secundum se, non præcisè, sed ut visione obtinendum, vel obtentu possibilem; unde & in Deum secundum se, & in visionem possibilem, tanquam in objectum adæquatum fertur; sicut delectatio in Deum ut visione præsentem & possessum versatur. Unde nec sola visio, nec solus Deus, sed Deus ut videndus est objectum spei & desiderii; Deus ut visus objectum delectationis sempiternæ. Ad tertiam probationem dico, grandem esse disparitatem inter objectum delectationis Beatorum, & tristitiam damnatorum: damnati enim, quia habent voluntatem perversam, & in malo obfirmatam, de solo malo pœnæ, non de malo culpæ dolent: at verò Beati, quorum voluntatis rectitudo est consummata, magis de bono divino in seipso gaudent, quàm de eodem in seipso effuso, & per visionem communicato. Ad ultimam dicendum, malè colligi, solam operationem esse objectum immediatum delectationis ex eo, quod consequatur operationem; inde enim so-

lūm inferri rectè potest, operationem esse causam delectationis, quanvis aliunde non negemus operationem ipsam ingredi objectum delectationis, quatenus non est delectatio nisi de objecto per operationem præsente.

Confessaria momentosa.

Ex hæcenus dictis multarum difficultatum resolutio sponte fluens paucis absolvetur.

Sequitur primò contra Vasquem, Turrianum, aliosque recentiores, omnia bona, etiam creata, quæ à Deo sperare possumus, non pertinere ad objectum spei. Cū enim spes sit virtus theologica, non potest habere objectum formale distinctum à Deo; unde bona creata ad beatitudinem æternam conducentia, non nisi ut objecta secundaria, & materialia respicit. Nec obest, quod homo multa alia bona, tum spiritalia, tum temporalia à Deo petere, subindèque sperare possit. Non obest, inquam, quia ut ait S. Thomas. *quæst. 27. art. 2. ad 2. Quicumque alia bona non debemus à Deo petere, nisi in ordine ad beatitudinem æternam.* Non obest etiam, quod respectu hominis multa alia distincta à beatitudine sint ardua, quæ proinde spem excitare possunt. Non obest, inquam, quia ut præclare docet idem S. Thomas ibidem ad 3. *Homini qui anhelat ad aliquid magnum, parvum videtur omne aliud, quod est eo minus. Et ideo homini speranti beatitudinem æternam, habito respectu ad istam spem, nihil aliud est arduum: sed habito respectu ad facultatem sperantis, possunt etiam quadam alia esse ardua, & secundum hoc eorum potest esse spes in ordine ad principale objectum.*

Sequitur

Sequitur secundò, graves illas cruditorum Theologorum sententias, quas apud Authores videre est, afferentes rationem ardui pertinere ad objectum spei, vel bonitatem Dei, non secundum se, sed ut relatam ad bonum nostrum amabile amore concupiscentiæ, pertinere ad objectum spei; has, inquam, sententias juxta D. Thomæ mentem intellectas, non esse à veritate alienas. Ad cujus evidentiam considerandum est primò, quod licet arduitas, & difficultas objecti non possit allicere voluntatem nudè sumptam, quæ potiùs difficultate retrahitur, & deterretur; tamen voluntas spe munita, & divinæ omnipotentiae confortanti, in qua omnia potest, innixa, arduitate, & difficultate non retardatur, vincitur, aut terretur, sed acuitur, & animatur. Unde præclare Arabrosius: *De divina miseratione tunc sperandum amplius est, cum præsidia humana defecerint.* Hinc etiam D. Thomas sæpe sæpius rationem ardui ponit in definitione spei, quam dicit esse inclinationem actualem, vel habituales in bonum possibile, arduum, & futurum. Sed hæc ita intelligenda sunt, ut ratio ardui non explicitè importetur in objecto spei, sed implicitè includatur, & supponatur: ideo enim spes in sola spe gratiæ cælestis innititur, quia beatitudo æterna, quam concupiscit, ardua est.

Considera secundò, quod licet ex charitate, quâ homo diligit seipsum, possit sibi desiderare bona supernaturalia, & bonorum omnium summum, scilicet Deum; si enim illa potest ex charitate proximo concupiscere, quidni sibi? cum amor nostri ex charitate procedens sit regula amoris proximi, juxta illud: *Diliges proximum*

324 *Lib. VII. Dissertatio*
lūm inferri rectē potest,
sā delectationis, quā
operationem ipsam ing
tionis, quatenus non
jecto per operationem

Consectari

Ex hactenus dictis
resolutio sponte flu

Sequitur primò c
aliosque recentiore
quæ à Deo sperare
objectum spei. Co
logica, non potest
stinctum à Deo;
dinem æternam
sta secundaria, &
quod homo mult
temporalia à Deo
possit. Non ob
guast. 27. art. 2
debemus à Deo
dinem æternam
tu hominis
sint ardua, q
Non obest, in
S. Thomas. i
aliquid mag
quod est co
titudinem a
nihil aliud
facultatem
esse ardua
in ordine

proveniat; sicut homo amat rem, quam
 Primus autem amor pertinet ad chari-
 inhaeret Deo secundum seipsum; sed
 pertinet ad secundum amorem, quia ille qui
 aliquid sibi obtinere intendit. Videtur ergo
 per tua mente D. Thomæ, desiderium ethi-
 caritatis, & amorem concupiscentiæ Dei
 spei, & per illum actum spem à charitate
 augui; quatenus nimirum charitas respicit
 bonum divinum, amabile amore amicitiae, spes
 vero respicit bonum divinum ut nostrum est
 amabile amore concupiscentiæ, qui actus etsi sit
 supernaturalis, non elicitur à charitate, cum in
 peccatore inveniat, sed à virtute spei.

Verum hæc cum hactenus dictis facile est
 conciliare. Duplex enim distinguendus est amor
 concupiscentiæ: primus, qui fertur in bonum
 nostrum præcisè ut nostrum est, non referendo
 illud in aliquid ulterius; alter verò, qui tendit
 quidem in bonum nostrum, sed non sub ratione
 boni nostri tantum, sed tanquam ulteriori fini
 subordinatum. Secundo modo pertinet ad cha-
 ritatem, quæ benè ordinata nobis ipsis propter
 Deum summum bonum exoptat, sicut & illud
 proximo concupiscit: sed priori modo perti-
 net ad spem, non quidem tanquam rationem
 formalem, sed tanquam aliquid præsupposi-
 tum, & inseparabile à ratione formali; ut enim
 summum bonum speremus, & ad eum obtinen-
 dum divinæ omnipotentiae confidamus, præ-
 supponitur bonum illud & esse arduum, & esse
 bonum nostrum. Ita præclare D. Thomas in-
 frà quæst. 28. art. 1. ad 3. De Deo, inquit, *potest*
esse spirituale gaudium, dupliciter. Uno modo se-
condum quod gaudemus de bono divino in se
conside

nes inter obijciendum allatas, quas omnes probō, quia utramque beatitudinem ad objectum quod spei, in adæquatè tamen, pertinere arbitror; præter illas, inquam, est adhuc hoc argumentum, quo vehementer permoveor: Quia secundum D. Thomam & veritatem, possessio rei, & res ipsa possessa non sunt duo fines, sed unus desideratus. Avarus quippe nec pecuniam sine possessione, nec possessionem sine pecunia, sed unum cum alio indivisum concupiscit: ergo objectum formale spei est Deus ut visione possidendus. *Bonum, quod propriè à Deo sperare debemus*, inquit D. Thomas suprà laudatus, *est bonum infinitum; hoc autem bonum est vita æterna, qua in fruitione Dei consistit.* Ubi & beatitudinem objectivam, & formalem in ratione objecti spei involvit.

Sed urgebis: Ergo spes non habebit pro objecto immediato Deum, sed aliquid creatum, nempe visionem, subindeque non erit virtus theologica.

Respondeo, quod licèt fateamur visionem, seu potius Deum ut videndum esse objectum formale fidei, non tamen inde sequi, Deum non esse immediatum objectum spei. Ad cujus profundum, & clatum intellectum considerandum est, quod quemadmodum in causis effectivis inveniuntur tria, ratio agendi, actio & passio, & effectus: ita in bono, quod exercet causam finalem, est ratio movendi, seu ut barbarè dicitur, ratio finalizandi; ipsum movere seu finalizare, est effectus finis. Patet autem, quod licèt in principio activo multa concurrant, nimirum ipsum agens, virtus agendi, actio agentis, passio mobilis; hoc tamen non impedit immedia-

tionem

tionem agentis, si aliud agens non mediet. Ergo similiter negandum non est, finem immediatè sperari, vel possideri, licèt interveniat motio, seu finalizatio finis, nimirum amor, & fructio ipsius, & consequenter visio, & possessio ejus, quæ præsupponitur ad fruitionem. Ergo spes non desinet respicere Deum tanquam objectum immediatum, quanvis respiciat Deum visione, & fructione possidendum. Sicut etiam secundùm adversarios, & omnes, spes in ratione sua *sub qua* immediatè respicit Deum, quantumvis ipsum non respiciat, nisi ut agat, subveniat, & ducat in ultimum finem. Quia nimirum sicut agens, & actio non ponunt in numero in ratione efficiendi effectum, qui rectè dicitur immediatè procedere ab agente; ita finis, & possessio non ponunt in numero in ratione movendi voluntatem, quæ rectè dicetur immediatè à fine allici, tametsi ab eo ut possidendo moveatur.

Insistes ex Gonet: Idem est objectum, in quod tendit motus desiderii, & in quo quiescit; sicut idem est locus, in quem tendit motus corporis gravis, & in quo, finito motu, quiescit. Atqui immediatum objectum fruitionis patriæ non est visio, sed solus Deus, qui solus satiat appetitum; unde August. lib. 10. confess. cap. 23. *Beata vita, inquit, est gaudium de veritate; hoc est de te, qui veritas es, Deus meus.* Ergo beatitudo formalis non ingreditur objectum formale spei.

Respondeo hoc argumento potius confirmari nostram sententiam; cum enim hæc sit essentialis differentia inter desiderium, amorem, & fruitionem, seu gaudium, quòd desiderium rem absentem respicit, amor ab absentia & præsen-

tia præscindit, gaudium verò & delectatio rei præsentiam ita essentialiter exigit, ut sine illa gaudium nec esse, nec concipi possit: manifestè relinquitur, objectum fruitionis patriæ non esse Deum præcisè, sed Deum ut præsentem & visione possessum. Quod usqueadeò verum est, ut per illam præsentia rationem à gaudio inspectam, distinguant Theologi attributum amoris, & delectationis in Deo. Unde manifestum est, beatitudinem formalem non esse solam conditionem objecti spei, sed ipsum objectum formale ingredi; cum in objecto delectationis necessariò, & essentialiter importetur.

Urget ex alio capite Durandus: Objectum spei est objectum amoris concupiscentiæ, cum per spem ad bonum nostrum suspiremus: sed Deus secundum se non est immediatum objectum amoris concupiscentiæ, sed solum possessio ejus; nam secundum se Deus est amabilis propter se, non propter nos, aliàs Deus ad nos referretur, quod esset uti fruendis, quæ est perversitas perversitatum, teste Augustino. Ergo immediatum objectum spei est sola visio, & possessio Dei.

Respondeo, quod cum Deus secundum se sit bonum nostrum, & bonum nostrum sit objectum concupiscentiæ, planum est Deum secundum se esse justæ concupiscentiæ nostræ objectum, non quod ad nos ordinetur, sed ad quod nos ordinamur; & in hoc habet rationem objecti concupiscentiæ. Nam, ut egregiè, & juxta acutè discurret Cajetanus, quot modis contingit aliquid esse bonum amantis, tot modis potest ab illo concupisci: contingit autem, Deum esse bonum nostrum, non quod ipse sit propter nos, sed

sed quia propter ipsum sumus : Ergo potest contingere aliquid ab amante concupisci, quod non ordinabitur ad amantem, sed ad quod potius se amans referet ; quia in hoc consistit bonum amantis, si se totum ad Deum ordinet. Et confirmatur : Eadem est ratio de dato, ac de concupito ; quia quod datur alicui, illi utique concupiscitur, sed aliquid potest alicui dari, quod in ipsum non ordinatur, sicut in mysterio Incarnationis Filius datus est nobis, ad quem tamen omnes nos ordinamur : Ergo similiter potest aliquid esse objectum amoris concupiscentiæ, licet in amantem non referatur, sed amans in ipsum ordinetur ; requiritur tamen ut bonum illud concupiscenti desideretur. Itaque licet Deus non possit nisi perversè amari propter nos, potest tamen amari nobis : & licet in se sit amabilis amore amicitiae, est etiam amabilis amore concupiscentiæ ; quia etiam in se est bonum nostrum.

Perseverat Durandus : Idem est objectum delectationis, & spei, servato duntaxat diverso modo præsentis & futuri ; spes namque, & fructio solum tanquam via, & terminus, motus & quies distinguuntur. Atqui objectum immediatum delectationis non est Deus in se immediatè, seu beatitudo objectiva, sed sola formalis, seu visio : tum primò, quia objectum immediatum amoris concupiscentiæ non est res distincta à subjecto, cui concupiscitur. V. g. qui concupiscit vinum, non ipsum, sed usum vini concupiscit ; quia nimirum per amorem concupiscentiæ optamus bonum nostrum ; res autem distincta fit nostra mediante usu. Constat verò, delectationem de Deo ad amorem concupis-

centiæ pertinere; & quia non est amor benevolentiae charitati, non spei correspondens; & quia habet pro objecto formali bonum utile, & delectabile. Tum secundò, quia idem est objectum delectationis, & desiderii: objectum autem immediatum desiderii non est Deus secundum se, quia objectum desiderii est futurum, & Deus secundum se præsens est; sola verò visio futura est. Tum tertio, quia idem est objectum immediatum delectationis Beatorum, & tristitiæ damnatorum: objectum autem tristitiæ damnatorum non est Deus secundum se, sed privatio visionis ejus, quia cum Deum non diligant, de Deo secundum se, & propter se spectato dolere non possunt. Tum denique, quia objectum delectationis est operatio, quia delectatio secundum Philosophum operationem sequitur, perficit, & comitatur, sicut decor juventutem; & ad operationem, cujus est condimentum, ordinatur. Ergo non Deus immediate, sed visio est objectum delectationis Beatorum.

Respondeo, delectationem non solum ad amorem concupiscentiæ, sed etiam ad amorem amicitiae pertinere. Non enim verus est amicus, qui de bonis amici non delectatur; & præcipuum Beatorum gaudium circa bonum divinum propter Deum, quem summè diligunt, occupatur, quanvis secundariò circa felicitatem suam formalem versetur. Cum ergo saltem amor amicitiae feratur in Deum propter seipsum, falsum absolutè est, Deum secundum se non posse esse objectum delectationis Beatorum. Ad primam probationem in contrarium dicendum in primis, falsum esse, objectum amoris concupiscentiae

piscentiæ non esse rem à subjecto distinctam; nam finis potest amari amore concupiscentiæ, etiamsi sit distinctus ab amante; nec qui vinum concupiscit, vinum ab usu distinguit, sed ut utrumque conjungit; quia, ut sæpe dictum est, possessio rei, & res ipsa possessa non sunt duo fines, sed unicus. Ad secundam probationem dicunt aliqui, idem quidem esse objectum desiderii, & delectationis, sed non eodem modo; licet enim bonitas divina secundum se sit summè desiderabilis, sicut & delectabilis; desiderium tamen quia supponit rem absentem, aliquam supponit imperfectionem ex parte desiderantis, quâ caret delectatio. Melius tamen, & clariùs dici potest, desiderium ferri in Deum secundum se, non præcisè, sed ut visione obrinendum, vel obtentu possibilem; unde & in Deum secundum se, & in visionem possibilem, tanquam in objectum adæquatum fertur; sicut delectatio in Deum ut visione præsentem & possessum versatur. Unde nec sola visio, nec solus Deus, sed Deus ut videndus est objectum spei & desiderii; Deus ut visus objectum delectationis sempiternæ. Ad tertiam probationem dico, grandem esse disparitatem inter objectum delectationis Beatorum, & tristitiam damnatorum: damnati enim, quia habent voluntatem perversam, & in malo obfirmatam, de solo malo pœnæ, non de malo culpæ dolent: at verò Beati, quorum voluntatis rectitudo est consummata, magis de bono divino in seipso gaudent, quàm de eodem in seipso effuso, & per visionem communicato. Ad ultimam dicendum, malè colligi, solam operationem esse objectum immediatum delectationis ex eo, quod consequatur operationem: inde enim so-

lūm inferri rectè potest, operationem esse causam delectationis, quanvis aliunde non negemus, operationem ipsam ingredi objectum delectationis, quatenus non est delectatio nisi de objecto per operationem presente.

Confectaria momentosa.

Ex hætenus dictis multarum difficultatum resolutio sponte fluens paucis absolvetur.

Sequitur primò contra Vasquem, Turrianum, aliosque recentiores, omnia bona, etiam creata, quæ à Deo sperare possumus, non pertinere ad objectum spei. Cum enim spes sit virtus theologica, non potest habere objectum formale distinctum à Deo; unde bona creata ad beatitudinem æternam conducentia, non nisi ut objecta secundaria, & materialia respicit. Nec obest, quod homo multa alia bona, tum spiritalia, tum temporalia à Deo petere, subindèque sperare possit. Non obest, inquam, quia ut ait S. Thomas *quæst. 27. art. 2. ad 2. Quicumque alia bona non debemus à Deo petere, nisi in ordine ad beatitudinem æternam.* Non obest etiam, quod respectu hominis multa alia distincta à beatitudine sint ardua, quæ proinde spem excitare possunt. Non obest, inquam, quia ut præclare docet idem S. Thomas ibidem ad 3. *Homini qui anhelat ad aliquid magnum, parvum videtur omne aliud, quod est eo minus. Et ideo homini speranti beatitudinem æternam, habito respectu ad istam spem, nihil aliud est arduum: sed habito respectu ad facultatem sperantis, possunt etiam quadam alia esse ardua, & secundum hoc eorum potest esse spes in ordine ad principale objectum.*

Sequitur

Sequitur secundò, graves illas eruditorum Theologorum sententias, quas apud Authores videre est, afferentes rationem ardui pertinere ad objectum spei, vel bonitatem Dei, non secundum se, sed ut relatam ad bonum nostrum amabile amore concupiscentiæ, pertinere ad objectum spei; has, inquam, sententias juxta D. Thomæ mentem intellectas, non esse à veritate alienas. Ad cujus evidentiam considerandum est primò, quod licet arduitas, & difficultas objecti non possit allicere voluntatem nudè sumptam, quæ potius difficultate retrahitur, & deterretur; tamen voluntas spe munita; & divinæ omnipotentiae confortanti, in qua omnia potest, innixa, arduitate, & difficultate non retardatur, vincitur, aut terretur, sed acuitur, & animatur. Unde præclare Arabrosius: *De divina miseratione tunc sperandum amplius est, cum præsidia humana defecerint.* Hinc etiam D. Thomas sæpe sæpius rationem ardui ponit in definitione spei, quam dicit esse inclinationem actualem, vel habitualement in bonum possibile, arduum, & futurum. Sed hæc ita intelligenda sunt, ut ratio ardui non explicite importetur in objecto spei, sed implicite includatur, & supponatur: ideo enim spes in sola spe gratiæ cælestis innititur, quia beatitudo æterna, quam concupiscit, ardua est.

Considera secundò, quod licet ex charitate, quâ homo diligit seipsum, possit sibi desiderare bona supernaturalia, & bonorum omnium summum, scilicet Deum; si enim illa potest ex charitate proximo concupiscere, quidni sibi? cum amor nostri ex charitate procedens sit regula amoris proximi, juxta illud: *Diliges proximum*

tuum sicut teipsum : unde non rarò ex August. S. Thomas docet, quod charitas est virtus, quâ Deum videre, eoque perfrui desideramus; & quod amicitia concupiscentiam, seu desiderium rei amatæ includit. Licet, inquam, hæc ita sint, attamen quia charitas non quærit quæ sua sunt, ideo S. Thomas tradens specificum charactere, quo spes à charitate distinguitur, sic discurret art.6. quæst.17. Potest aliquis inherere alicui rei dupliciter: uno modo propter seipsum, alio modo in quantum ex eo in aliud devenitur. Charitas ergo facit hominem Deo inherere propter seipsum, mentem hominis uniens Deo per affectum amoris: spes autem & fides faciunt hominem inherere Deo, sicut cuidam principio, ex quo aliqua nobis proveniunt. De Deo autem provenit nobis & cognitio veritatis, & adeptio perfecta bonitatis. Fides ergo facit hominem perfecte adharere, in quantum principium est nobis perfecte cognoscendi veritatem. Credimus enim ea vera esse, quæ nobis à Deo dicuntur. Spes autem facit Deo adharere, prout est in nobis principium perfecta bonitatis; in quantum scilicet per spem divino auxilio innitimur ad beatitudinem obtinendam. Ubi satis aperte, insinuat, charitatem in hoc differre à spe, quòd charitas fertur in ultimum finem propter seipsum, spes verò in finem ultimum ut nostrum. Idem inculcat Doctor sanctissimus art.3. ubi docet, quod spes, & omnis appetitivus motus ex amore derivatur: amor autem quidam est perfectus, quidam imperfectus: perfectus quidem est cum aliquis secundum se amatur, ut puta cum aliquis secundum se vult alicui bonum, sicut homo amat amicum: imperfectus amor est, quo quis amat aliquid non secundum ipsum, sed ut illud bonum

num sibi proveniat; sicut homo amat rem, quam concupiscit. Primus autem amor pertinet ad charitatem, quæ inhaeret Deo secundum seipsum; sed spes pertinet ad secundum amorem, quia ille qui sperat, aliquid sibi obtinere intendit. Videtur ergo ex perpetua mente D. Thomæ, desiderium ethica beatitudinis, & amorem concupiscentiæ Dei elici à spe, & per illum actum spem à charitate distingui; quatenus nimirum charitas respicit bonum divinum amabile amore amicitiae, spes verò respicit bonum divinum ut nostrum est amabile amore concupiscentiæ, qui actus etsi sit supernaturalis, non elicitur à charitate, cum in peccatore inveniatur, sed à virtute spei.

Verùm hæc cum hætenus dictis facile est conciliare. Duplex enim distinguendus est amor concupiscentiæ: primus, qui fertur in bonum nostrum præcisè ut nostrum est, non referendo illud in aliquid ulterius; alter verò, qui tendit quidem in bonum nostrum, sed non sub ratione boni nostri tantum, sed tanquam ulteriori fini subordinatum. Secundo modo pertinet ad charitatem, quæ benè ordinata nobis ipsis propter Deum summum bonum exoptat, sicut & illud proximo concupiscit: sed priori modo pertinet ad spem, non quidem tanquam rationem formalem, sed tanquam aliquid præsuppositum, & inseparabile à ratione formali; ut enim summum bonum speremus, & ad eum obtinendum divinæ omnipotentiae confidamus, præsupponitur bonum illud & esse arduum, & esse bonum nostrum. Ita præclare D. Thomas infra quæst. 28. art. 1. ad 3. De Deo, inquit, potest esse spirituale gaudium, dupliciter. Uno modo secundum quod gaudemus de bono divino in se
conside

*considerato: alio modo secundum quod gaude-
mus de bono divino, prout à nobis participatur.
Primum autem gaudium melius est, & hoc pro-
cedit principaliter ex charitate; sed secundum
procedit ex spe, per quam expectamus divini boni
fruitionem. Patet ergo, duplici modo nos posse
bonum divinum optare, & de eo gaudere. Porro
in tantum amor concupiscentiæ dicitur ad spem
pertinere, non quòd sit actus ejus, oppositum
enim docet D. Thomas 1. 2. *quest.* 27. *art.* 4. &
quest. 40. *art.* 7. & *quest.* 62. *art.* 4. sed quia spes
amorem illum præsupponit, qui actus etiam in
peccatore invenitur, non per auxilium sup-
plens vicem charitatis, ut quidam dicunt, cum
amor ille non sit actus charitatis, quæ tunc so-
lùm fertur in bonum nostrum, quando illud
ulteriùs in Deum refert; charitas namque &
Deum propter ipsum, & amicos in Deo, & ini-
micos diligit propter Deum, ut Sancti dicunt.
Amor ergo ille elicitur à voluntate auxilio divi-
no adjuta, quæ ad amandum proprium bonum,
sive naturale, sive supernaturale cognitum, non
indiget habitu, cum ad illud sit suapte natura
satis inclinata; quia tamen bonum illud est su-
pernaturale, exigit concursum supernaturalis
ordinis cognitioni fidei correspondentem. Et
advertendum est, Deum ut bonum nostrum posse
à diversis respici; à spe, quatenus est bonum ar-
duum auxilio Dei obtinendum; à desiderio, ut
est bonum absens; à charitate, ut est congruum
nobis ex charitate dilectis, quia charitas non so-
lùm diligit amicum, sed eo frui desiderat; unde
præcisè bonum nostrum non est objectum spe-
cificativum spei, sed ad illud præsupponitur.
Dabit veniam pius Lector, sit tot speculationibus
eum*

eum nimis detentum occupavimus; nam præter plura loca S. Thomæ satis difficilia exposita, ut lectionis suæ fructus aliquis sibi constet, iis documentis eruditus poterit etiam ad illam puram charitatem suspirare, quæ ut ait S. Thomas quæst. 17. art. 5. ad 3. *facit propriè tendere in Deum uniendo affectum hominis Deo, ut scilicet homo non sibi vivat, sed Deo.* Quem amorem unice sponsa quærit, hoc sponsus contentus est. *Purus amor*, ait Bernard. serm. 83. in Cant. *mercenarius non est: purus amor de spe vires non sumit, nec tamen diffidentia damna sentit.*

Sequitur tertio, non solum bonum nostrum esse objectum spei, sed etiam bonum alienum; & subinde sperare beatitudinem proximo, esse actum spei, non quidem directum, sed indirectum. Colligitur ex D. Thoma art. 3. & probatur contra Turrianum, & alios modernos. Objectum formale, & specificativum, est beatitudo æterna possibilis, & futura cum auxilio Dei: quod autem bonum illud aliis, vel nobis optemus, & speremus, omnino per accidens est ad rationem essentialem spei: Ergo beatitudo proximi peræquè ac nostra habet omnes conditiones requisitas ad rationem objecti spei. Et certè, ut rectè argumentatur S. Doctor, sicut eadem est virtus charitatis, quâ quis diligit Deum, seipsum & proximum: ita eadem est virtus spei, quâ quis sibi, & proximo vitam sperat sempiternam.

Dices: Hoc magis pertinere videtur ad charitatem, quâ proximo volumus bonum ex benevolentia; quid enim est velle bonum, nisi amare? Ergo alicui velle bonum, & tale bonum
quale

quale est beatitudo, est opus amoris & charitatis, non spei.

Respondeo, quod si valeret hæc argumentatio, concluderet nullam dari virtutem spei, etiam respectu nostri; nam velle nobis beatitudinem, pertinere videtur ad charitatem, quâ nobis volumus summum bonum: quid autem est velle bonum, nisi amare? Quare sicut beatitudo respectu nostri potest considerari absolute ut bonum nostrum, & sic terminat actum amoris concupiscentiæ, qui est actus secundarius charitatis, quâ & nos, & proximos ordinate diligimus, ut superiori confectario diximus; vel ut est bonum arduum, & obtentu difficile, ad quod proinde divini adjutorii ope indigemus, & ei unice innitimur; & hac ratione terminat actum spei: Similiter ergo beatitudinem proximi, ut est bonum illius; per actum secundarium charitatis concupiscimus, prout verò est bonum excelsum, & difficile, per spem illud volumus, eique pro virili cooperamur. Sic Paulus Philipp. 1. *Confidens, inquit, hoc ipsum, quia qui cœpit in vobis opus bonum, perficiet usque in diem Christi Jesu.* Et certè ea, quæ à Deo petimus, ab ipso obtinere speramus: à Deo autem petimus, ut alios ad beatitudinem æternam perducatur, juxta illud Jacobi ultimo: *Ora'e pro invicem ut salvemini.*

Instabis: D. Thom. ait *art.3.* actum sperandi beatitudinem proximo præsupponere unionem amoris cum illo: Ergo non ex spe, sed ex charitate proximo beatitudinem concupiscimus.

Respondeo aliquos D. Thomam interpretari de unionem possibili, quatenus proximus potest nobis per charitatem esse unitus, subindeque
ejus

eius beatitudo potest ut nostrum bonum possibile aestimari, ac consequenter non minus, quàm nostra sperari. Sed hæc expositio violenta est, & falsa: nam si beatitudo proximi consideretur ut bonum nostrum possibile, & non ut bonum proximi, certè non illi, sed nobis bonum illud speramus. Alii S. Thomam intelligunt de unione amoris naturalis, quâ quilibet similem diligit, quâve præsupposita, possumus illi bonum sperare, quod est veluti bonum nostrum; quia in illum per amorem transformamur, & sic bonum illius fit nostrum amore amicitiae. Sic videtur indicare S. Doctor, dum ait, quod præsuppositâ unione ad alterum, jam alteri potest quis vitam æternam desiderare, in quantum est ei per amorem unitus.

Dices rursum: Si sperare alteri beatitudinem esset actus spei, sequeretur quod quis per desperationem salutis proximi amitteret habitum spei; omnis quippe actus malus virtuti infusæ oppositus eam penitus destruit. Consequens autem est falsum, potest enim quis propriam salutem sperando de aliena desperare, putà de salute Antichristi.

Respondeo, certissimum esse, quod per actum desperationis positivum, quo quis de auxilio & misericordia Dei diffusus, de salute proximi desperaret, proculdubio spes amitteretur, cum ratio formalis spei penitus destrueretur. Si tamen de salute alicujus desperemus, non ex divinæ misericordiæ diffidentia, sed ex certa malitiæ, & obstinationis reprobæ alicujus notitia, tunc nullum spei amittendæ periculum subimus, sicut cum de Antichristo desperamus. Porro circa alios homines monet sapienter Augustinus

stinus *serm. 11. de verb. Domini*, de nullo desperandum, quandiu patientia Dei ad pœnitentiam adducit, nec de hac vita rapit impium.

Sequitur quartò, in Deo quidem primò & principaliter totam spem nostram esse locandam, secundariò tamen ad Sanctos habere fiduciam honestum est, & juxtà utile. Nam ut profundè de more discurret Doctor Angelicus *art. 4.* cùm spes duo respiciat, & bonum quod intendit, & auxilium quo perveniat & intentum obtineat, eodem proportionaliter modo, quo potest finem & bonum intendere, potest etiam auxilia ad illum obtinendum inquirere: Ergo sicut principaliter, & per se Deum quærît, alia verò secundariò in ordine ad Deum; ita primò, & principaliter auxilio divino, quod est principale movens ad vitam æternam, inniti debet; secundariò tamen intercessionibus Sanctorum tanquam instrumentis salutis uti conveniens est: sicut enim ultimus finis fines intermedios sibi subordinatos non destruit, ita etiam causa principalis instrumenta non excludit; spes autem beatitudinem æternam tanquam ultimum finem, & adjutorium divinum tanquam principale agens respicit: ergo nec media ad illum finem, nec instrumenta illius agentis, quæ sunt orationes Sanctorum, removet, sed admittit. *Vituperantur* (inquit D. Thomas infrà *q. 29. art. 1. ad 3.* explicans illud *Jerem. 17. Maledictus homo qui confidit in homine,*) qui sperant in homine sicut in principali authore salutis: non autem qui sperant in homine, sicut adjuvante ministerialiter sub Deo. Ideo sacri Doctores invocationem Sanctorum tantoperè commendant. *Confirmate amicitias cum Sanctis*, ait Magnus

Leo

Leo serm. 5. Epiph. *Intrate in civitatem Dei, cujus nobis spondetur habitatio: Patriarchis, Prophetis, Apostolis, Martyribusque sociamini horum divitias concupiscite, & per bonam amulationem ambite eorum suffragia.* Quia ut rectè argumentatur Hieronymus *lib. cont. Vigil. cap. 3.* si Apostoli, & Martyres adhuc in corpore constituti orabant pro cæteris, quando adhuc erant pro se solliciti; quantò magis post victorias, & triumphos militantibus in terra opitulari avent.

Sequitur denique, spem non esse virtutem moralem, sed theologicam; quia ut hætenus demonstravimus, spes nec aliud primò respicit ut objectum, quàm Deum; nec alio innitur, quàm Deo. Difficultas tamen est in duobus: Primò, quia spes non videtur differre à magnanimitate, cujus proprium est tendere in ardua. Secundò, quia spes consistit in medio præsumptionis & desperationis, virtus autem theologica in medio duorum vitiorum consistere non afolet. Verùm utrique breviter fiet satis. Ad primum ergo dicendum cum S. Thoma *art. 5. ad ultimum*, per hoc spem à magnanimitate distinguui, quòd magnanimitas fertur in arduum, sperans aliquid, quod est suæ potestatis; spes verò respicit arduum alterius auxilio assequendum. Quod ita intelligendum est, ut spes christiana, & theologica respiciat ardua solius Dei auxilio & operibus christianis obtinenda, utpote supernaturalia, & omnem naturæ vim supergressa: magnanimitas verò licèt respiciat arduum sub auxilio divino, sine quo nullum, sive parvum, sive magnum bonum fieri potest; ad illud tamen facultas naturalis conari potest, cum

cùm in bonum ordinis duntaxat naturalis feratur. Addi potest ad plenius discrimen spem inter, & magnanimitatem statuendum, arduum in quod tendit spes, esse solum Deum clarè videntium, quo ulterius ire non potest; arduum verò quod respicit magnanimitas, esse bonum creatum, honores scilicet moderatos, ut infrà 7.129. docet S. Thomas. Ergo latum intercedit inter hanc utramque virtutem discrimen ex diverso objecto petitum.

Ad secundam difficultatem respondet idem Angelicus Præceptor *solut. ad 2.* hanc esse differentiam inter virtutes morales & theologicas constituendam, quod quia morales circa ea tanquam propria objecta versantur, quæ dirigit ratio, ideo per se & ex objecti exigentia petunt medium, seu mediocritatem, ne regula cui conformari debent, excedatur per superfluum, nec ab ea recedamus per aliquid mancum & diminutum. At verò virtutes theologicæ, quæ circa primam regulam tanquam proprium objectum occupantur, sicut nullâ creatâ mensurâ præfiniuntur, sic per se medium non quærunt, sed solum per accidens ratione objecti secundarii, quod ad principale ordinatur. Sic fides non habet quidem medium in hoc, quod assentitur primæ veritati, cui nimis assentiri, nimis credere non potest; sed fortassis ex parte rerum creditarum, scilicet peculiarium fidei veritatum, quæ inter duas extremas falsitates mediæ sunt, sicut Christus inter duos latrones medius pendebat. Sic mysterium Trinitatis inter extremos Sabellii & Arrii errores confitemur. Sic necessitas divinæ gratiæ inter Pelagii superbiam, & Manichæorum fatalitatem media consistit:

sistit. Sic catholica Eucharistiæ transsubstantiatio inter impii Lutheri impanationem, & chimericam Calvinii figuram medium occupat locum. Hoc etiam pacto spes non habet medium ex parte principalis objecti, quia divino auxilio & infinitæ omnipotentiae Dei virtuti nemo nimis, imò nemo satis unquam confidit. Veruntamen quantum ad aliqua in particulari, quæ confidit aliquis se obtenturum, potest esse medium & extremum, præsumendo improporcionata, & de proportionatis desperando. Quia eiusdem periculi est tentare aliquid insolitum ac vires ordinarias gratiæ excedens, & difficultates etiam in via Dei occurrentes pertimescere. V.g. ingenti se discrimini committit, qui onus pastorale ipsis Angelicis humeris formidandum sponte sua lubens suscipit; & è contra non satis se Deo credit, non satis se ejus providentiæ permittit, qui illud etiam vocatus renuit, foditque in terram talentum, quod in Ecclesiæ emolumentum, & gloriam multiplici poterat spiritali fœnore dispensare, ut proximâ reflexione ponderabo.

REFLEXIO.

Innumera sunt pietatis corollaria ex stabilis veritatibus nata derivari, quæve paululum consideranti veluti sponte occurrent. Unum solum deduco, quod Theologo lectori, sacrorum præsertim ministeriorum candidato, utilius fortassis erit, quàm jucundum. Ardua appetit spes, sed ad ea acquirenda uni omnipotentis Dei virtuti innititur: ergo contra spem peræquè peccat, qui & ardua non vocatus quærit, & qui vocatus

catus refugit; quia prior non Deo fidit, sed sibi posterior sicut sibi, ita & Deo diffidit. Ille praesumptione invereconda à peccatis vix, ac ne vix quidem emerfus, ad regiminis culmen aspirat, & ut phrasi Gregorii utar part. 1. Past. cap. 4. *Qui in plantis stans titubat, in praecipitio pedem ponit.* De illo, aliisque intrusis, & sacerdotia usurpatione adeptis dicitur Ozeæ 8. *Ipsi regnaverunt, & non per me; Principes extiterunt, & ego ignoravi.* Quæ verba sic expendit Gregorius libro præfato, cap. 1. *Ex se, & non ex arbitrio summi Reëtoris regnant, qui nullis fultis virtutibus, nequaquam diuinitus vocati, sed sua cupidine a versi culmen regiminis rapiunt potius, quàm assequuntur. Quos tamen internus iudex & provebit, & non cognoscit, quia quos permitiendo tolerat, profectò per iudicium reprobationis ignorat.* Porro non in Domino confidit, qui etiam vocatus, salutis animarum proprii detrimenti formidine perterritus vacare non vult, vel officium pastorale detrectat. Quem Magnus Gregor. 1. part. Pastor. cap. 7. reprehendit exemplo Moyfis, qui præesse multitudini & noluit, & obedivit; superbus enim fortasse effet, si ducatum plebis innumera sine trepidatione susciperet: & rursum superbus existeret, si Authoris imperio obedire recusaret. Utrobique ergo humilis, utrobique subiectus, & præesse populis semetipsum metiendo noluit; & tamen de imperantis viribus presumendo consensit.

Comprimenda sanè ejus audacia, qui percussus sanare properat, grandiori vulnere ipse percussus. Si homo, inquit laudatus Gregorius cap. 11. *apud hominem, de quo minimè presumis, fieri intercessor erubescit; qua mente apud Deum*
inter

intercessionis locum pro populo arripit, qui familiarem se ejus gratia esse per vita merita nescit? ... Est adhuc sollicitius formidandum, ne qui placare iram posse creditur, hanc ipse ex proprio reatu mereatur; cuncti enim liquidò novimus, quia cum is qui displicet, ad intercedendum mittitur, irati animus ad deteriora provocatur. Verùm cogenda est eorum timiditas, qui scientiâ, & virtutibus per Dei gratiam ornati, & in charitate, humilitateque radicati, & fundati, aliis prodesse fugiunt, quia in quasdam veniales culpas in externis ministeriis prolabantur, sicut aqua dum sordes diluentium suscipit, suæ munditiæ serenitatem quadantenus perdit. Sed hac nequaquam Pastori timenda sunt, ait Gregorius præfatus part. 2. cap. 5. Quia Deo subtiliter cuncta dispensante, tantò facilius à sua eripitur, quanto miseri cordius ex aliena tentatione fatigatur.

SPECVLATIO II.

In solis Catholicis, tametsi peccatoribus, spes Christiana invenitur.

HAc speculatione explicamus subjectum spei. Non est autem difficultas de subjecto quo, ut vocant; est enim in confessio apud omnes, spem in voluntate recipi. Cum enim habitus per actus cognoscantur, & aliunde actus spei sit motus appetitivæ virtutis, cum tendat in bonum non sensibile, sed spirituale & divinum, relinquitur spem in appetitu rationali, set

voluntate residere. Quare dubium solum superesse potest de subiecto *quod*, seu quænam personæ sint virtutis spei capaces? Qua in re certum etiam est, spem in Christianis Catholicis inveniri, tametsi aliquo peccato mortali, quod non sit desperationis, infecti sint. Quia Catholicus peccator potest apprehendere beatitudinem futuram ut auxilio Dei sibi possibilem: ergo nisi peccet peccato desperationis, in ipso remanebit spes, cum maneat objectum spei, sicut de fide superius dictum est, & in Tridentino definitum. Fateor tamen cum Augustino in *Psalm. 31*. malam conscientiam retrahere à spe, quia dum pungit, & peccati infandam malitiam menti exhibet, terrorem peccatori incutit; & licet spem non adimat, suavem tamen filiorum Dei fiduciam minuit, nec tam liberum ad Deum accessum experitur. Quare de Beatis, de damnatis, de hæreticis dubium superest, num spei virtute præditi sint? & illis omnibus eam denegat speculatio, quæ

Probatur: Spes neque in Beatis, neque in damnatis, neque in hæreticis invenitur, vel inveniri potest: ergo in solis Catholicis eam reperire est. Consequentia liquet, quia nullum est aliud subiectum assignabile, de quo possit esse controversia. Antecedens probatur per singulas partes. Et in primis, spem in Beatis non inveniri, monstratur contra Suarem ratione S. Thomæ: Sublato eo, quod dat speciem rei, resolvi & destrui rem necesse est, cum destructa specie nequeat res eadem permanere, sicut remota formâ corporis naturalis, nequit idem specie corpus consistere; & destructo, ac impossibili reddito objecto alicujus habitus specificativo,

tivo, destrui, funditusque convelli habitum, omninò indubitatum est. Sed in patria subtrahitur objectum spei, quod est bonum futurum, arduum, & possibile; in patria enim summum bonum præsens est, suave est, inamissibile est. Ergo in patria non spes, sed fruitio; non desiderium, sed possessio invenitur.

Confirmatur: De ratione essentiali spei est, quod aliquid expectet, quod nondum habet; & de ratione spei theologicæ est, quod expectet fruitionem divinam futuram; id enim omnes per spem intelligunt, & oppositum dicere, est communissimas spei notiones extinguere: sed Beatus à principio beatitudinis suæ fruitionem Dei non expectat, sed eo fruitur, & potitur: ergo tota ejus spes, quam habebat in via, evanescit, evacuatur, & ad nihilum redigitur. Et certè, quod essentialiter importat imperfectionem subjecti, non potest simul stare in subjecto oppositâ & repugnanti perfectione adornato, sicut quia motus importat imperfectionem subjecti, non potest stare in subjecto quando in eo est quies, & planè implicat esse actum entis in potentia in subjecto, quando potentia est ad ultimum actum redacta: Atqui spes essentialiter importat motum in id, quod nondum habetur: ergo quando habetur id quod sperabatur, cessat spes. Unde ait Apost. Rom. 8. *Quod videt quis, quid sperat?* Et idem Apost. 1. Cor. 13. solam charitatem ex tribus theologicis perseverare in patria, nunquamve excidere asseverat. Et usqueadeò hanc assertionem veram existimat S. Thomas, ut 1. 2. *quest. 67. art. 5.* doceat majorem esse repugnantiam spei cum fruitione boni possessi, quàm fidei cum visione: quia

fides cum visione patriæ convenit in genere, quod est cognitio: spes autem non convenit cum beatitudine in genere; comparatur enim spes ad beatitudinis fruitionem, sicut motus ad quietem in termino.

Respondebis, rationem futuri, cum sit accidentalis, non esse rationem formalem spei; quia differentia temporis per accidens se habent ad partem intellectivam, spes autem ad appetitum intellectivum pertinet. Maximè quia Deus, qui est objectum spei, non est secundum se futurus, nisi denominatione extrinseca, quatenus possessio ejus nobis futura est, sicut columna dicitur dextra, quia dextra mea juxta illam est: denominatio autem extrinseca non ingreditur rationem formalem objecti virtutis; unde spes potest manere in patriæ, non ad eliciendum actum imperfectum circa Deum ut objectum arduum, & non habitum, seu futurum; sed ut est principium Deo ut bono nostro fruendi.

Sed contrà: Licet ratio futuri non sit essentia objecti spei, pertinet tamen ad objectum illius tanquam modus intrinsecus imbibitus in ratione formali illius, eo modo, quo non visum includitur in ratione formali objecti fidei: Ergo sicut non potest simul stare visio cum fide, quanvis non visum non sit objectum formale fidei: ita similiter, quanvis non habitum & futurum non sit objectum formale spei, sed modus imbibitus illius, non poterit tamen spes cum actuali possessione objecti in eodem subjecto sociari. Et quanvis esse futurum respectu Dei sit denominatio extrinseca, tamen illa denominatio habet fundamentum reale in nobis, unde veluti extrinsecè redundat in Deum: repugnat
autem

autem, quod in eodem subiecto sint fundamenta realia, ex quibus redundant oppositæ, & repugnantes denominationes: v. g. in objecto spei, non haberi est conditio denominativa tantum; sed causa ejus, putà talis dispositio subiecti, est realis, cui dispositioni reali repugnat alia realis dispositio opposita, putà esse perfusum lumine gloriæ, ex quo resultat opposita in objecto denominatio, scilicet esse visum & possessum. Porro, quod additur, spem esse principium fruitionis Dei, superius confutatum est, dum ostendimus; amorem quo Deum ut bonum nostrum diligimus, & suavem, quam de ejus præsentia delectationem percipimus, esse actus secundarios charitatis, ad eosque proinde eliciendos frustra habitum spei in patria remansurum, in qua non solum actu tollitur objectum spei, quod est non habitum; sed etiam objectum illud impossibile tunc efficitur, propter beatitudinis stabilitatem.

Dices: Etsi fides non possit remanere in patria ad eliciendos actus, utpote statui illi repugnantes, quidni tamen poterit manere ad ornatum, ut de aliis virtutibus moralibus in actum nunquam prorupturis traditur?

Respondeo, rationem formalem objecti virtutum moralium non involvere repugnantiam cum objecto visionis beatificæ, sicut includit objectum spei, quod cum sit necessario non habitum, statui fruitionis & possessionis planè repugnat. Quod autem repugnat statui & objecto beatitudinis, nequit esse decor & ornamentum illius.

Instabis: In patria remanent multi actus spei, nempe actus sperandi gloriam corporis,

& gaudia accidentalia, necnon actus sperandi beatitudinem proximo; qui utique actus sunt ejusdem speciei cum illis, quos eliciunt viatores: Ergo in patria remanet habitus spei, à quo ejusmodi actus producantur. Nam ut ait D. Thomas art. 1. *Habitus per actus dignoscuntur.*

Respondeo, convenire inter Thomistas, actus illos non procedere à spe theologica; sed difficultas superest, quodnam sit hujusmodi actuum principium. Contendunt aliqui, illos actus esse vere spei motus, sed ab auxilio actuali vicem habitus spei supplente produci. Alii volunt, actus illos esse quidem veræ spei motus, non theologicæ, sed communiter sumptæ. Verùm neutra solutio videtur satis doctrinæ D. Thomæ consentanea. Expressè enim docet Angelicus Doctor art. 2. ad 3. *Quod beati sperant quidem aliis beatitudinem, sed non virtute spei, sed magis ex amore charitatis.* Et ad 4. docet & probat, actum quo Beati sperant gloriam corporis, non esse actum spei, his verbis: *Cùm spes sit virtus theologica, habens Deum pro objecto, principale objectum spei est gloria anima, qua in fruitione divinâ consistit; non tamen gloria corporis. Gloria enim corporis, etsi habeat rationem ardui per comparationem ad naturam humanam, non habet tamen rationem ardui habenti gloriam animæ; tum quia gloria corporis est minimum quiddam in comparatione ad gloriam animæ; tum etiam quia habens gloriam animæ habet jam sufficienter causam gloria corporis.* Ubi manifestè S. Doctor affirmat, actum quo Sancti in gloria expectant gloriam corporis, non esse actum spei, quia gloria corporis respectu illorum non habet rationem ardui. Quod & luculentius tradit

1.2. quest. 67. art. 4. ad 3. dicens: Respectu gloria corporis in animabus Sanctorum potest quidem esse desiderium, non tamen spes proprie loquendo, neque secundum quod spes est virtus theologica (sic enim ejus objectum est Deus, non autem aliquod bonum creatum) neque secundum quod communiter sumitur. Quia objectum spei est arduum; bonum autem, cujus jam inevitabilem causam habemus, non comparatur ad nos in ratione ardui: unde non proprie dicitur aliquis, qui habet argentum, sperare se habiturum aliquid, quod statim in potestate ejus est, ut emat: Et similiter illi qui habent gloriam anime, non proprie dicuntur sperare gloriam corporis, sed magis desiderare. Vides geminam allatam solutionem apertè S. Thomæ repugnare. Ratione etiam impugnatur à D. Thoma traditâ: Objectum spei debet esse aliquid arduum & difficile, ut per hoc distinguatur à desiderio; gloria autem corporis nequit habere rationem ardui respectu Beati fruientis gloriâ essentiali, cui accidentaliter comparata parum, & ferè nihil reputatur. Aliam etiam hujus veritatis rationem radicalem assignat idem Doctor sanctus quest. precedenti; art. 5. ad 1. Quia ille duntaxat actus potest dici secundarius respectu spei, qui fertur in objectum primario spei objecto subordinatum: in patria autem, cum non maneat objectum primarium spei, nullum etiam elicere actum potest Beatus, quem ad illud objectum referre possit.

Quare nobis in solutione S. Thomæ art. 2. ad 3. standum est, ubi docet, Beatos aliis beatitudinem non motu spei, sed ex amore charitatis desiderare. Et similiter dicendum est, Beatos gloriam corporis ex amore charitatis, quem

habent ad se, exoptare. Quorum ratio optima tradi potest, quia illa omnia possunt considerari sub ratione boni, & sub ratione ardui: prior ratio pertinet ad charitatem, quâ aliis & nobis etiam bonum ordinatè concupiscimus; posterior ad spem spectat, cujus est in difficilia contendere, conari, & aggredi: At in patria tota tollitur, tota complanatur objecti ardui difficultas, & sola remanet ratio bonitatis: ergo à sola charitate eliciuntur hujusmodi actus, qui licèt convenient cum similibus actibus viæ, ut feruntur in bonum proprium, vel alienum; non tamen cum illis ut tendunt in arduum. Unde sunt magis actus secundarii charitatis objecta illa in Deum amore amicitiae summè dilectum ordinantis.

Insistes: Beati, cùm non videant à principio beatitudinis omnia Dei decreta libera, nec subinde decretum prædestinationis æternæ circa eos, quorum salutem desiderant, nec certò cognoscant effectus futuros circa ipsos, non sunt certi de gratia & salute eorum: ergo salus illorum est sufficiens materia spei in Beatis; objectū namque illud arduum est, & difficile ob ingentem arbitrii creati hominum viatorum flexibilitatem, & doni perseverantiæ incertitudinem.

Respondeo arduitatem objecti spei non consistere in incertitudine, sed in difficultatē ab sperante vincenda. Unde si Deus alicui electo revelaret suam prædicationem, quanvis per eam de salute certus foret, illam tamen verè speraret, ob adeptionis, & arctæ viæ difficultatem. Nam animæ purgatorii, teste D. Thoma *quæst. 18. art. 3.* spem salutis habent, quia licèt sciant se esse in gratia confirmatas, & de sua salute

salute securæ sint ; tamen certitudo spem non adimit , sed potius roborat , quia non tollit rationem ardui , quanvis difficultas per auxilia divina , & promissa certissima evincatur. Nec unquam evacuatur spes quandiu objectum consideratur ut futurum possibile , sed solum quando habetur quod sperabatur. Igitur quia nostra salus , tametsi nobis difficilis , nullam tamen Beatissimis ingerit difficultatem , illam nequaquam sperare possunt , sed optare , quantumvis de illa incerti sint.

Perstites : Ille actus expectationis gloriæ corporis, qui est in Beatissimis , debet procedere ab aliquo habitu , aliàs esset imperfectus, utpote natus elici ab habitu, & ab eo non elicitus. Unde, quod absurdum est , sequeretur actum illum à nobis suavius & connaturalius , quàm à Beatissimis elici ; cum in nobis ab habitu , in illis sine habitu procederet : sed nullus est habitus , à quo prodire melius possit , quàm ab habitu spei, quæ sola ferri potest in objectum futurum ; charitas verò à præsentia , & futuro abstrahit : ergo perseverat in Beatissimis habitus spei.

Respondeo , actus illos sufficienter ab habitu charitatis secundo elici posse. Quanvis enim objectum charitatis à præsentia & absentia abstrahat, non repugnat tamen illi præsentia, sicut nec absentia ; quia objectum præsens diligit , & absens diligere non desinit. Accedit , ad eliciendos illos actus Beatissimorum habitus non indiget : nec propterea illi actus sunt imperfecti ; & hac de causa rationem amoris in divina voluntate circa propriam bonitatem , tametsi præsentem, versantis tomo primo salvavimus. Quia licet in nobis actus spei natus sit elici ab habitu , quia

ob objecti arduitate voluntatis superat vires; in Beatis tamen actus ille à voluntate Deo fruente sponte fluit, quia cum gloria corporis ab anima per redundantiam derivetur, & ad modum proprietatis connaturalis resultet, voluntas Deo plena, & amore beatifico gaudens, satis superque est ad gloriam corporis expectandam, desiderandamque inclinata. Unde maxima illa, *Actus natus elici ab habitu, & non elicitus, est imperfectus*; concedi potest quando principium elicitivum actus melius est per habitum illum dispositus. Manifestum est autem, voluntatem Beati melius esse dispositam dum Deo fruatur, quam dum Deum fruendum sperat.

Reliquum est, ut breviter demonstramus alias partes antecedentis præcipuæ probationis hujus speculationis, nimirum spem neque in damnatis, neque in hæreticis reperiri. Et primò quidem de damnatis manifestum est. Cum enim de fide certum sit, in inferno nullam unquam futuram redemptionem, non possunt apprehendere damnati beatitudinem ut sibi possibilem, quod ad rationem spei esse omninò necessarium, ex dictis est manifestum. Unde S. Thomas *art. 3.* docet, ad conditionem miseriæ damnatorum pertinere, ut ipsi sciant quod nullo modo possunt damnationem suam evadere, & ad beatitudinem pervenire, ut sic perpetuitas habeat rationem pænæ in illis, sicut perpetuitas felicitatis habet rationem perfectæ quietis in Sanctis: *Sicut autem est de ratione beatitudinis, ut in ea quietetur voluntas*, inquit S. Doctor: *ita de ratione pænæ est, ut id quod pro pœna infligitur, voluntati repugnet. Non autem potest voluntatem quietare, vel ei repugnare quod ignoratur.*

ratur. Requiritur enim ad perfectam, & veram beatitudinem, ut aliquis certus sit de sua beatitudinis perpetuitate, alioquin voluntas non quietaretur. Similiter etiam cum perpetuitas damnationis pertineat ad pœnam damnatorum, non verè haberet rationem pœna, nisi voluntati repugnaret: quod esse non posset, si perpetuitatem suam damnationis ignorarent. Unde patet, quod non possunt apprehendere beatitudinem ut bonum possibile.

Denique quod in hæreticis non inveniatur spes, ex iis quæ superiori dissertatione de fide statuta sunt, facile deducitur. Cum enim fides sit substantia sperandarum rerum, id est basis & fundamentum spei, planum est, quod destructo per infidelitatem spei fundamento, spem superædificatam corruere necesse est. Ergo in hæreticis nulla spes, nisi vana, invenitur. Nec ad illam spei destructionem necesse est, ut homo dum fit hæreticus, desperet; quia non solum spes actu contrario desperationis evertitur, sed etiam destructione fundamenti eradicatur: sicut virtus moralis extinctione prudentiæ exinanitur, & accidentia pereunte subiecto evanescunt.

REFLEXIO.

Ostende fidem, ô Catholice, ex operibus tuis; ostende & spem. Et cui, nisi Deo, fidere potest vir Catholicus, fide cœlestis, religione divinus, æternitatis candidatus? Absit planè, ut in humanis nœniis spes suas fundet; absit ut in incerto divitiarum speret, cui Deus proponitur merces, magna nimis, cuius portio Dominus, cuius Dominus pars hæreditatis suæ, quive illud Davidi-

cum & ore profert, & corde sentit: *Quoniam tu es Domine spes mea.* Id est, uti Bernardus exponit, quidquid agendum est, quidquid declinandum, quidquid tolerandum, quidquid optandum, tu es Domine spes mea. Tu una mihi omnium laborum meta: Tu actionum finis, Tu principium; Tu una & tota ratio expectationis meæ.

At quis credat, hujus sæculi Catholicos ponere in Domino Deo spem suam, quod Ethnici faciunt, ut exprobrat Veritas, facientes, res humanas toto ardore quærentes, de caducis tanquam de æternum duraturis judicantes, quietem illic suam & felicitatem statuantes, & ipsis Gentibus similes, in simulachris argenti & auri fiduciam habentes? Ergo si Christiani sumus, si ex fide vivimus, confugiamus ad tuendam propositam spem, quam sicut anchoram habemus tutam, ac firmam, & incedentem usque ad interiora velaminis. Insidiosa mundi bona stoccifaciamus, abjiciamus spes miseras, vanas, inutiles, seductorias; & huic tam solidæ, tam perfectæ, tam beatæ spei totâ devotione animi, toto fervore spiritus inhæreamus. Si quid illi impossibile, si quid illi difficile, quære aliud in quo speres: sed non est impossibile apud eum omne verbum. Quod si facultatem non, deesse non dubites, sed voluntatem, audi Bernardum loco citato hæc mellea fundentem: *An verò de facilitate jam non dubitas, sed ipsi est tibi suspecta voluntas? Planè & voluntatis testimonia credibilia facta sunt nimis. Quando in se speranti desit illa Majestas, qua tam studiosè monet in se sperari? Planè non derelinquit sperantes in se. Adjuvabit, ait, & eruet eos à peccatoribus, & salvabit eos. Quare? Quibus*

Quibus meritis? Audi quod sequitur, quia speraverunt in eo. Dulcis causa, attamen efficax, attamen irrefragabilis.

SPECVLATIO III.

Usque adeò in divina misericordia sperare, & ut ait Scriptura, supersperare precipimur, ut factâ etiam damnationis revelatione, adhuc beatitudinem sperare possemus, & teneremur.

Supponit primò hæc speculatio, dari præceptum spei, quod clarè colligitur ex Scriptura, Psalm. 4. *Sacrificate sacrificium iustitiæ, & sperate in Domino.* Psalm. 61. *Sperate in illo omnis congregatio populi.* Ad Hebr. 11. *Accedentem ad Deum oportet credere, quia est, & quod inquirentibus se remunerator est.* Ubi ly *oportet*, præceptum indicat, & ly *remunerator*, præceptum illud de spe esse convincit. Colligitur etiam ex Tridentino sess. 6. cap. 6. ubi inter dispositiones ad justificationem necessarias actum spei enumerat. Idque antè docuerat August. tract. 83. in Ioan. ubi ait, multa tam de fide, quàm de spe esse mandata. Et ratio est, quia nihil tam ad vitam æternam necessariũ, quàm spes, quâ & ad divinorum præceptorum observantiam inducimur, & ab eorundem transgressione avertimur. De necessariũ autem ad salutem præceptum imponi necesse est.

Si autem quæras, in quonam Decalogi præcepto mandatum spei contineatur? Respondebo cum D. Thoma *quest. 22. artic. 1.* præceptorum esse duo genera; alia enim sunt de substantia legis, alia de præambulis ad legem, idest de iis, quæ necessariò prærequiruntur, ut lex validè possit ferri. Porro præcepta ad legem præambula non debent in ipsa lege exprimi, sed ejus debent latiori præsupponi; quia præcepta de substantia legis homini jam subjecto, & ad obediendum parato proponantur. Præceptum autem spei, sicut & fidei, ad præambula pertinet, cum per fidem homo legislatorem agnoscat, & per spem ad legis observantiam propendeat: nisi enim homo jam crederet, nisi speraret, frustra ei supremi numinis lex, frustra observantiæ ejus præmium proponeretur. Observat tamen Doctor Angelicus, in variis Scripturarum locis præcepta spei inculcari, ut fundamentum observantiæ præceptorum firmitus & solidius stabiliatur.

Si rursus quæras, quando currat eliciendorum spei actuum tempus, quandonam urgeat obligatio? Respondebo, bonum Christianum sæpe sæpius in actus spei prorumpere debere, quia ut ex D. Thoma superiori dissertatione vidimus, præcepta non dantur de habitibus virtutum, sed de actibus. Itaque identidem in motus spei effundi debet cor nostrum, totum se, suæque omnia divinæ curæ, & misericordiæ committendo. Deinde fatentur omnes Thomistæ, hominem in primo instanti rationis teneri sibi ultimum finem præstituerè, illi se devovere, omnem illi fidem, spem, & amorem suum consecrare. Præterea rationabile est, ut
quando

quando homo ab infando desperationis peccato resipiscit, actum spei eliciat, ut horrendum crimen retractet. Salutaris etiam pœnitentia veniæ spem supponit, & comitatur. Denique ad comprimendos graves desperationis motus, actus spei exercere necesse esse, nemo inficias eat, ne si voluntas voluerit manere suspensa, & negativè se gerere, in barathrum desperationis propellente tentationis impetu præceps ruat. Credunt aliqui, eum qui aliquoties per annum in fervidos prorumpit spei actus, præceptum spei adimpleviffe. Ego verò crediderim, quod licet illi, qui in negotio salutis incuriosi sunt & negligentes, vix de divinis cogitant, orationi non vacant, vitæ interiori nullam operam navant, istud spei præceptum non adimplere merito censendi sint: attamen illi, qui non segnem rebus salutis diligentiam adhibent, piis exercitiis incumbunt, ad Deum crebro, & filiali affectu recurrunt, præceptum istud adimplent, quia non illam salutis curam adhiberent, nisi vero spei motu cierentur. Sepe enim sincerus, ac verus spei actus à cogitatione, quâ nos in Deum sperare contestamur, divellitur; at à voluntatis actu totâ suam in Deo fiduciam locante divelli nunquam potest.

Supponit secundò speculatio, non repugnare revelationem, quâ Deus alicui reprobo manifestationem. Quavis enim de potentia ordinariâ hæc revelatio non sit possibilis, & repugnet solito, ac communi suavis Dei gubernationis modo; unde si alicui fieret hæc revelatio, vel reprobanda esset tanquam falsa & exitiosa tentatio angeli tenebrarum, vel non absolute, sed

comminatoriè intelligenda esset : quanvis , inquam , hoc ita sit , attamen de potentia absoluta contingere posse hujusmodi revelationem ob reconditos divinorum judiciorum inscrutabilium fines , nemo ambigere potest. Cùm enim Deus cognoscat reproborum damnationem , quidni poterit eam reprobo manifestare ? Nec propterea ille homo esset perplexus , quia teneretur sperare , & non posset , ut arguit D. Bonaventura. Nam si ille homo non posset sperare , ut supponunt , utique ad sperandum minime teneretur. Fateor autem , hanc quæstionem , & casum metaphysicum esse satis inutilem : verumtamen quia ad profundiorē divinæ misericordiæ notitiam habendam conducit , in eaque spem contra spem esse ponendam affirmat nostra sententia , non supervacaneum duxi hanc difficultatem aliàs satis inanem definire , & asserere , quod si Deus alicui reprobo damnationem ejus ex proprio peccato sequuturam revelaret , ille & sperare suam beatitudinem ex præcepto teneretur , de illaque desperando peccaret ; quod cum Magistro Victoria , aliisque recentioribus Thomistis contra alios non paucos etiam Thomistas probabilius reor. Nec ita intelligenda est nostra sententia (quod diligenter ad dissipandam quorundam hallucinationem notatum velim) ut credamus talem fieri revelationem , quâ Deus declararet reprobo se illum exclusisse à regno , seque illi nolle auxilia sufficientia ad salutem necessaria conferre ; tunc enim fatentur omnes , reprobum sperare nec posse , nec debere , quia illi subtrahitur objectum spei , quod est bonum possibile. Intelligitur ergo nostra sententia de eo , cui Deus manifestaret se , velle
illum

illum excludere à gloria , non absolutè , sed propter liberam in peccato lethali perseverantiam. In hoc casu contendimus , reprobum & sperare posse , & teneri , & desperando peccare.

Probatur : Ille sperare tenetur , qui sperare potest , nec eximitur à præcepto. Atqui reprobis , cui facta esset revelatio suæ damnationis ob libera peccata obventuræ , sperare posset , nec eximeretur à præcepto sperandi ante revelationem ipsi imposito : ergo in illa hypothesi reprobis sperare teneretur , subindeque desperando peccaret. Major est perspicua ; præcepta enim implere tenentur , qui possunt , & jubentur. Minor verò , in qua est difficultas , probari debet : & primò , quod reprobis non eximatur à præcepto , supposito quod possit illud implere , per se claret ; revelatio enim non est exemptio , vel immunitas à præcepto , si per eam possibilitas non auferatur. Totum ergo momentum in hoc situm est , utrum facta hujusmodi revelatione reprobis sperare possit ? Et posse probatur : Ante revelationem poterat beatitudinem sperare : ergo & post revelationem. Probatur consequentia : ideo ante revelationem poterat reprobis sperare , quia beatitudo erat illi possibilis , & habebat libertatem ad bene operandum , merendumque vitam æternam , ac præsto illi erant auxilia sufficientia ad salutem obtinendam necessaria : Atqui revelatio damnationis ob peccata infligendæ nihil eorum tollit ; tum quia gloria , & salus manet æquè possibilis intrinsecè , atque antea ; auxilia manent etiam per æquè sufficientia : ergo post illam revelationem objectum spei idem intrinsecè

secè perseverat, licèt extrinsecè ex libera voluntate videatur impeditum. Sicut enim præscientia Dei nullam rebus necessitatem imponit, nec ordinem causarum liberarum immutat; ita nec præscientiæ ejusdem manifestatio, quæ objectum non immutat, sed futuram duntaxat liberæ voluntatis malitiam, & poenam illi justè infligendam declarat. Quod etiam exemplo præcepti Christo impositi illustrari potest, sicut enim Christus posito præcepto est liber ad moriendum, quia præceptum extrinsecus sonans internam voluntatis potestatem non afficit, quantumvis impositum præceptum Christus violare non possit, nec mortem imperatam refugere, quia mors secundùm se est objectum liberè eligibile: ita extrinseca damnationis ob peccata inferendæ revelatio potestatem consequendi beatitudinem non adimit, nec proinde sperandi facultatem; illud enim sperare possumus, quod si velimus, consequi possumus, quodve non nisi ex libera culpa non consequimur.

Confirmatur penetrantiùs: Ratio quare reprobis ante revelationem sperare potest & tenetur, non est ignorantia suæ reprobationis; ignorantia quippe non est motivum sperantis, nec possibilitatem rei tribuit, vel aufert, sed solam scientiam & notitiam eventus tollit: motivum ergo spei reprobis ante revelationem est possibilitas beatitudinis per auxilia sufficientia collata, vel oblata, & libertas voluntatis ad implenda præcepta expedita: Atqui extrinseca revelatio nec sufficientiam auxiliorum evacuat, nec liberam voluntatis ad implenda præcepta potestatem tollit; sed solum manifestat, quod reprobis malitiâ suâ efficiet, salutem illam non esse futuram.

ram. Ergo sicut in fide evidentia attestantis non tollit intrinsecum motivum fidei, licet credentem certiores reddat, quia veritas revelata manet in se obscura; ita revelatio amissionis beatitudinis non tollit rem esse in se possibilem, nec obiectum spei immutat, sed solum expandit malitiam peccatoris æternâ poenâ ob suam voluntariam culpam plectendi.

Confirmatur rursus, & simul præoccupatur ac convellitur præcipuum fundamentum adversariorum, qui arbitrantur beatitudinem post revelationem non esse amplius obiectum spei, quia definit esse futura: at ex hoc potius sic instauratur rationem. Fateor equidem obiectum spei esse bonum arduum possibile, non quomodocumque, sed quod futurum expectatur, & iudicatur; est enim spes certa expectatio futuræ beatitudinis; & quod speratur, non est rei possibilitas, sed futuritio prudenter expectata, & alliciens voluntatem: Atqui salus æterna non est minus futura reprobis post revelationem, atque ante illam: salus enim potest esse futura certitudine absoluta, cui non possit subesse falsum, vel certitudine conditionata, id est ex bonis operibus à gratia oblata elicitis; reprobis autem ante revelationem non habet certitudinem absolutam, cui sua spes innititur, cum de facto non sit salutem consequuturus. & à gloria sit propter peccata exclusus: in tantum ergo spes eius habet certitudinem, in tantum illi beatitudo futura est, in quantum divina misericordia parata est illi ea conferre auxilia, quibus, nisi per ipsum steterit, salutem consequetur; nec deficiet à consequutione beatitudinis ex defectu divinæ misericordiæ, vel omnipotentix, cui spes subnixa est,

sed

sed ex instabilitate, & malitia liberi arbitrii ad-
jutorio divino obicem ponentis, & gratiam Dei
in vacuum recipientis. Atqui post revelationem
beatitudo est eodem modo futura, non quidem
certitudine absolutâ, quæ nunquam fuit respec-
tu reprobi; sed conditionatâ, fundatâ in divi-
na misericordia effundente auxilia, & in liber-
tate humana auxiliis illis benè uti valente; re-
velatio enim nec auxilia sufficientia semovet,
nec potestatem illis bene utendi voluntati adi-
mit: Ergo eodem planè modo beatitudo rema-
net reprobo post revelationem futura, quo erat
ante revelationem.

Ratio verò à posteriori nostræ sententiæ non
deest: Si posita revelatione homo non posset,
nec teneretur sperare beatitudinem, non tene-
retur etiam ad observationem legis post prædi-
ctam revelationem, subindeque posset sese omni
vicio citra culpam dedere, quod horrendum, &
falsum est; & tamen apertè sequitur: qui enim
non tenetur ad prosequendum finem, nec ad
media prosequenda teneri potest, quibus ad ta-
lem finem pervenitur: bona autem opera, & fu-
ga peccati, media sunt ad beatitudinem, & sum-
mum bonum Deum obtinendum: Ergo qui ad
Deum obtinendum non tenetur tendere, nec
ad bona agendum potest obligari. Sequeretur
rursum, quod si revelatio damnationis ob pec-
catum infligendæ præceptum spei evacuet,
revelatio etiam futuri peccati, illius evaden-
di spem auferret, subindéque evitandi illius
obligationem adimeret, cum nullus ab eo pec-
cato fugiendo teneatur, cujus vitandi spem non
habet, sed desperationem. Consequens est fal-
sum: Ergo & antecedens. Sequela majoris est
evidens;

evidens; sicut enim peccatum est liberè, etiam positâ revelatione committendum; ita beatitudo ob libera peccata amittenda. Minor verò, seu falsitas consequentis est etiam perspicua; quia si liceret desperare de evitando peccato revelato, si illud consequenter liceret non cavere, si non liceret conari ad illud evitandum, nullo modo peccasset Petrus blasphemiam proferendo, nec ad Christum confitendum debuisset conari; quia futura ejus negatio fuerat revelata. Non peccasset etiam Judas Iscariotes infando proditoris flagitio, quia ejus execrabile facinus Veritas prædixerat, dicens Matth. 26. *Qui intingit mecum manum in paropside, hic me tradet. Respondens autem Judas, qui tradidit eum: Nunquid ego sum Rabbi? Ait illi: Tu dixisti.*

Sentiunt vim hujus argumenti adversarii, & ideo vel illud omittunt, ut videre est in P. Gonet, in congerendis alioquin pro utraque parte argumentis satis sollicitus; vel in ipso solvendo inter se pugnant. Aliqui enim, quos sequitur M. Serra, volunt quod post revelationem homo non teneretur sperare evasionem peccati; addunt tamen, inde non sequi, ipsum non teneri cavere peccatum; quia, inquiunt, spes evadendi peccatum non est ita necessaria, ut absque ea caveri non possit, nec vitari consensus in peccatum; aliàs quando peccatum cavemus, actum spei elicere teneremur, quod patet esse falsum: sufficit ergo ad obligationem cavendi peccati, non esse ligatam voluntatem, & hominem posse illud evitare; quæ potestas per revelationem non aufertur.

Verùm hæc responsio non solvit, sed auger
difficul

difficultatem. Impossibile enim intellectu est, quod homo possit, & debeat illud cavere peccatum, cuius evitatio est desperata; qua enim prudentia conabimur illud cavere, & conari ne contingat, cuius impeditio sperari non potest? Nullus certè, nisi stultus, aliquid aggreditur, nisi se illud effecturum prudenter speret. Ergo dicere tunc hominem post revelationem non posse sperare evasionem peccati, & tamen teneri ad illud cavendum, est pugnantia loqui. Accedit, quia sæpe contingit, peccatum non esse facile vitatu, sed propter ingruentem tentationis impetum non nisi magno labore superatur: ergo cum tunc currat objectum spei, scilicet futurum arduum, impossibile omninò est, quod voluntas illud vitet, vel quod ad illud vitandum teneatur absque spe saltem virtuali objicientem sese difficultatem evincendi.

Quare alii respondent, quod si Deus alicui revelaret peccatum futurum, teneretur homo peccati evasionem in sensu diviso sperare, sed non in sensu composito revelationis. Quà etiam distinctione utentes dicunt, illum cui facta est revelatio suæ damnationis, teneri in sensu diviso revelationis sperare beatitudinem, sed non in sensu composito illius: ex quo, inquiunt, non sequitur, quod homo non teneatur cavere peccatum, quia in sensu diviso tenetur illius evasionem sperare.

Sed hæc solutio præcedenti nihilo melior est, sed potius longè & ferè immensum deterior. Ex ea enim sequitur primò, quod sicut homo post revelationem damnationis suæ, quanvis teneatur in sensu diviso suam salutem sperare, eam tamen in sensu composito revela-
tionis

tionis prosequi, ad eamque obtinendam conari minimè obligatur: ita ille, cui facta est revelatio peccati futuri, nec occasionem peccati fugere, nec illud in tentatione vitare tenebitur, quia solum in sensu diviso revelationis illius fugam sperare tenetur. Deinde: teneri in sensu diviso ad sperandum, est posito quod non detur talis revelatio, non teneri hominem ad eliciendum actum spei; nam sensus ille divisus non cadit supra potentiam, sed supra revelationem: Atqui eodem modo, & non alio tenetur fugere peccatum, quo tenetur fugam illam sperare. Ergo cum in sensu composito revelationis non possit fugam peccati sperare, nequit etiam peccatum illud in sensu composito revelationis effugere. Et sic argumentum manet in sua vi. Quod si dicas, quod stante revelatione potest in sensu diviso vitare peccatum, idest, retinet potentiam expeditam ad evitandum peccatum secundum se spectatum (quæ est vera sensus divisi intelligentia,) benè est; nam similiter dicam, quod ideo tenetur stante revelatione sperare beatitudinem, quia ad illam secundum se expectatam contendere potest, nec eam potentiam tollit revelatio.

Objicies: Objectum spei est bonum arduum quod hîc & nunc prudenter judicatur futurum: atqui respectu illius cui facta esset revelatio damnationis, beatitudo nequit habere rationem boni ardui, quod prudenter futurum judicetur: ergo posita tali revelatione objectum spei enervatur, subindeque beatitudo nequit sperari. Major à nobis supra concessa est. Minor verò probatur. Respectu hujus, qui habet judicium certum de non fruitione beatitudinis, non potest

test beatitudo habere rationem objecti, quod prudenter judicetur esse futurum; quod enim certò judicatur non futurum, non potest prudenter judicari futurum: sed homo, cui facta esset præfata revelatio, haberet iudicium certum de non futuritione beatitudinis, teneretur quippe homo ille adhibere fidem Deo revelanti, qui nec falli, nec fallere potest; revelanti, inquam, beatitudinem non esse futuram: ergo homo ille haberet iudicium certum, beatitudinem illam non esse futuram, sicut haberet iudicium certum Deum sibi vera revelasse: ergo impossibile esset, quod tunc voluntas prosequeretur beatitudinem, nisi possibile sit, voluntatem ferri in objectum aliter, quàm ab intellectu proponatur.

Respondeo objectionem illam ex dictis esse occupatam. Et quidem mihi semper displicuit eorum Authorum nostræ sententiæ responsio, qui dicunt, ideo hominem post illam revelationem eatenus posse respicere beatitudinem ut futuram, quatenus potest illi revelationi assensum detrectare: displicuit, inquam, semper hæc responsio, & etiamnum displicet; tum quia homo ille ut non peccaret contra spem, peccaret contra fidem, quia ut posset sperare, auctoritatem Dei revelantis sibi conspicuam, ut suppono, contemneret dum ei debitum non præberet assensum; tum quia punctum difficultatis præsentis in hoc situm est, utrum homo per veram revelationem de sua damnatione ex malitia sua & obstinatione proveniente certus possit, & debeat salutem sperare: unde supponimus in hac quæstione illum revelationi illi assensum præbiturum.

Ad

Ad objectionem ergo ex dictis in secunda confirmatione responderetur, positâ revelatione beatitudinem posse apprehendi ut futuram reprobo eodem modo, quo ante revelationem; quia nunquam illa salus fuit futura & certa futuritione & certitudine absolutâ, sed conditionatâ, fundatâ in auxiliis divinis & bono usu liberi arbitrii: quando enim salutem speramus, non ita speramus, ut sumus de salute absolutè securi, aliàs in timore & tremore operari salutem Apostolus non juberet; sed ita speramus, quia ad illam, si volumus, possumus cum Dei gratia omnibus oblata pervenire: At post revelationem potest reprobis cum gratia sibi oblata ad salutem, si voluerit, pervenire: ergo potest reprobis post revelationem apprehendere beatitudinem ut futuram futuritione conditionata, quæ sola desideratur ad objectum spei. Quare corrigenda est imaginatio, & per intellectum res secundum se, & ex meritis objecti consideranda. Cum ergo beatitudo post revelationem sit possibilis, & futura conditionatè, ob collata auxilia, sufficientiam & illæsam voluntatis libertatem, etiam post revelationem habet beatitudo ratione futuri sufficientis, ut terminet motum spei. Nec est ulla repugnantia, vel pugna judiciorum, dum intellectus per revelationem judicat damnationem esse futuram absolutè, & per auxilia sibi collata & oblata, ac per integritatem voluntatis salutem suam esse conditionatè futuram; quia nihil repugnat aliquid esse futurum (conditionatè præsertim) sub una ratione, & sub alia consideratione non esse futurum.

Quod celebri exemplo, & in Schola S. Tho.

Tom. IV.

Q

mæ frequenti illustrari potest : Deus vult conditionatè per voluntatem antecedentem salutem reprobis, & vult absolutè per voluntatem consequentem ipsum non salvari; estne in divina voluntate discordia, vel pugna in iudicio divino tam diversè de eodem pronuntiantes? Absit, absurdum est, impium est, & blasphemum. Quomodo ergo hanc voluntatis divinæ apparentem pugnam conciliabimus? Quia nimirum voluntas antecedens fertur in salutem secundum se, & præbet auxilia sufficientia, ratione quorum salus illa inchoativè futura est, & per illa ad optatum salutis exitum perveniret reprobis, si vellet. Voluntas verò consequens respicit salutem hinc & nunc omnibus circumstantiis vestitam, & ob malitiam peccatoris non conferendam; & sic de eadem salute sunt duæ nostro modo concipiendi in Deo voluntates, vel potius duæ ejusdem voluntatis ad idem objectum diversimodè consideratum connotationes. Sic ergo reprobis post acceptam damnationis suæ ob peccata infligendæ revelationem, potest salutem & ut futuram, & ut non futuram sub diversa consideratione respicere; futuram ex auxilio divino, si velit; non futuram ex malitia sua in peccato obfirmanda: ergo cum aliquo vero sensu sit futura, potest eam sub ea ratione sperare, sicut eam divina voluntas voluntate antecedente velle: si autem sperare potest, utique debet, cum ad eam sperandam teneatur, nec per revelationem à præcepto eximatur. Ex quibus faciliè distingues in forma majorem: objectum spei est bonum, quod prudenter judicatur futurum futuritione conditionata fundata in auxilio divino, & bono usu liberi arbitrii,

concedo;

concedo ; futuritione absoluta , cui non possit subesse falsum , nego. Nam ante revelationem reprobis sperabat salutem , quæ tamen non erat absolutè futura. Et similiter distinguenda est minor : Post revelationem beatitudo nequit habere rationem boni futuri absoluti , concedo ; futuri conditionati , nego. Nam post revelationem , sicut & post præscientiam , si velit , potest salvari. Ad probationem similiter distingue : quod certò judicatur non futurum absolutè , non potest prudenter judicari futurum absolutè , concedo ; non potest prudenter judicari futurum conditionatè , & si voluntas divinâ gratiâ adjuta velit , nego. Qua distinctione latis , superque explicatâ , sponte cadunt omnia Adversariorum argumenta. Quia sicut evidentiâ in attestante non tollit fidem , quia non destruit intrinsicam rei obscuritatem ; ita evidens attestatio , & revelatio futuræ damnationis non tollit spem , quia non destruit intrinsicam boni possibilitatem , & futuritionem conditionatam. Maximè quia spes , ejusque certitudo , tanquam rationi formali innititur divinæ misericordiæ , quæ eadem manet ; damnatio autem revelatur futura , non ex defectu misericordiæ & omnipotentix Dei , sed ex libera voluntatis malitia : ergo post revelationem manet semper ratio formalis sperandi , sicut post evidentiâ in attestante ratio formalis credendi.

Instabis aliquot exemplis : Primò , si Deus revelaret alicui ipsum centum duntaxat gradus gloriæ , & non amplius consequuturum , ille non plures sperare posset , quantumvis alii innumeri sint beneficio auxiliorum oblatores possibiles. Secundò , si Deus alicui revelaret , se pœnas in

purgatorio luiturum, frustra ille ab iisdem cruciatibus immunitatem speraret. Tertiò, si Deus alicui damnationem alterius revelaret, v.g. Petro damnationem Judæ manifestaret, certè Petrus non posset illi beatitudinem sperare, nec pro illa orare, ut expressè docet August. lib.21. de Civit. cap. 24. *Si de aliquibus, inquit, ita Ecclesia certa esset, ut qui sunt illi, etiam nosset, qui licet adhuc in hac vita sint constituti, tamen predestinati sunt in aeternum ignem ire cum diabolo, tam pro eis non oraret, quàm nec pro ipso.* Sane nullus est, qui de salute Antichristi, qui filius erit perditionis, speret; nullus qui de ea desperando peccet.

Respondeo hæc omnia exempla claudicare. Primum quidem, quia licet sit præceptum sperare salutem, & Deum ut mercedem nostram magnam nimis intendere, & ad eum scopum rectè collinare; gradus tamen gloriæ non cadunt sub præcepto: unde cui facta esset revelatio & promissio centum graduum gloriæ, gratias agere deberet, & ad illos obtinendos pro virili conari, & ad plures contendere, ut posset ad illos pervenire; nam in via Dei ad summa aspirare debet, qui mediocria vult sibi asciscere; & jaculatores imitari, qui ut scopum, in quem collineant, attingant, aliquid sublimius intendunt, ut quod proponunt, efficiant. Secundum etiam exemplum frigidum est; ille enim qui per revelationem sciret, se pœnis in Purgatorio culpas suas expiaturum, non inani fiducia deberet ad illas evitandas conari, sed abstinere à peccatis, quæ materiam ultricibus illis flammis ministrant; gratias etiam Deo agere teneretur, quod culpas suas piaculari igne

per aliquod tempus purgare dignetur. Maxime quia non est præceptum sperandi salutem sine prævio purgatorio ; sed præceptum spei Theologicæ nunquam , vel nusquam dispensationem pati potest. Tertium denique exemplum , sicut & quartum de Antichristo , toto cælo discrepat. Magna enim est differentia inter salutem propriam , & alienam , quia aliena non est in nostra manu & potestate , sicut nostra : unde quando possumus velle salutem (& semper possumus cum gratia Dei semper oblata) tandiu sperare valemus. At verò voluntatis alienæ non sumus domini , unde certiores facti de eorum malitiæ obstinatione , sicut voluntatem eorum flectere non possumus , ita nec pro ea orare tenemur.

Hinc sequitur , positâ revelatione futuræ damnationis hominem non sine peccato desperare , quia desperatio est actus intrinsecè malus , divinæ misericordiæ , & omnipotentis injurius , oppositusque actui intrinsecè bono , scilicet actui virtutis spei : Ergo ille actus est semper , & pro semper prohibitus , nec potest ulla prorsus circumstantia honestari , vel à malitia purgari , cum includat odium , & detestationem beatitudinis , & Deo bono nostro visione possidendo , ejusque auxilio diffidat.

Plures alias minores objectiones missas facio ; unam , aut alteram delibabo , ut ex aliis judicium feratur. In inferno , inquiunt , damnati non possunt sperare , nec peccant desperando , ut docet D. Thom. *q. 20. art. 1. ad 3.* Ergo nec homo , cui fieret revelatio futuræ damnationis , non peccaret desperando ; ideo enim illi sperare non possunt , quia certò judicant se nunquam liberatum

iri; idem autem iudicium haberet reprobis post factam sibi revelationem. Idipsum aliis magis injuriis, quàm rationibus confirmant; quia, aiunt, infans foret ille homo, qui beatitudinem speraret, quam certò sciret se non obtenturum; sicut stultus esset infirmus, qui morbum desperatum sanari consideret. Verùm hæ rationes fallaciæ sponte suâ abeunt in fumum, quia Deus decrevit auxilia sufficientia subtrahere damnatis, nec est in potestate infirmi desperatam sanitatem restaurare. *Damnati*, inquit D. Thomas loc. citato, *non sunt in statu sperandi propter impossibilitatem reditus ad beatitudinem; & ideo quod non sperant, non imputatur eis ad culpam, sed est pars damnationis ipsorum. Sicut etiam in statu viæ, si quis desperaret de eo, quod non est natus adipisci, non esset peccatum; putà si medicus desperet de curatione infirmi.* At quandiu homo est in statu viæ, etiam post illam revelationem, nec illi impossibilis est beatitudo, sed est bonum, quod homo natus est adipisci, & quod est debitum adipiscendi; unde homo ille, & à damnato, & ab infirmo desperatæ sanitatis, juxta doctrinam D. Thomæ planè differret.

Majorem difficultatem invenio in verbis S. Thomæ, quorum tamen adversarii non meminerunt. Etenim S. Doctör *quæst. 23. de verit. art. 8. ad 2.* ait, quod *talis revelatio cogeret hominem desperare*; & ideo ait, *non posse fieri de potentia ordinata.* Ex quo satis clarè deduci videtur, hominem post talem revelationem desperando non peccare; ad peccatum enim cogi non potest, nec potest Deus præcipere actum spei, ad cujus oppositum ejus revelatio cogit,

cogit. Ergo non obligaret præceptum spei illum cui futura damnatio revelata esset.

Fateor eam auctoritatem non levem ingerere difficultatem, nisi ejus solutio ex verbis S. Thomæ erueretur. Cum enim S. Doctor eò loci affirmaret, Deum de potentia absoluta posse alicui damnationem revelare, non tamen de potentia ordinata, quia talis revelatio cogeret eum desperare; manifestè sequitur verba S. Thomæ aliquo egere interpretamento: si enim talis revelatio cogeret hominem ad desperationem coactione perfecta, non solum de potentia ordinata, ut ibi infert, sed nec de absoluta posset talis revelatio fieri, quia voluntatem liberam nec de potentia absoluta Deus cogere potest. Vult ergo S. Thomas, talem revelationem non esse de potentia ordinata possibilem, quia cogeret hominem ad desperandum, id est attentâ infirmitate humanâ pauci, vel ferè nulli invenirentur, qui in motum desperationis non prorumperent, eo modo loquendi, quo dicimus eum, qui est in actuali peccati occasione, ad peccatum iteratum cogi, quia vix, ac ne vix quidem præsentis occasionis illecebris resistere volet, licèt absolutè posset.

R E F L E X I O.

In verbis tuis supersperavi. Psalm. 118. Non solum speras, sed supersperas, Propheta sancte: supra quid, sodes, speras? Supra id omne, inquit, quod dici potest; supra id, quod ab homine cogitari; supra id, quod dixerunt Scripturæ; supra id, quod prædixerunt unquam Prophetæ; supra id, quod Sancti unquam annuntia-

runt nobis. Supersperavi in misericordiâ , quæ cum infinita sit , spem omnem longè excedit. Supersperavi in verbis tuis supra cælum & terram duraturis , amplius proculdubio duraturis , quàm promiserunt. Supersperavi in promissis tuis merita excedentibus & vota , quia licet magna sint quæ promisit , majus tamen est quod futurum est. *Extendat anima cupiditatem* , inquit Augustinus tract. 24. in Joan. & *sinu capaciore querat comprehendere quod nec oculus vidit , nec auris audiuit*. Desiderari potest , concupisci potest , suspirari potest : tamen illud dignè cogitari , & verbis explicari non potest ; quia proculdubio plus futurum est quàm dici potest.

Supersperavi planè , quia etiamsi me occideris , in te sperabo , etiamsi infligendam mihi propter peccata mea sempiternam pœnam sciam ; quia tamen si malus sum , non desinis esse bonus , nec me deseris nisi priùs à me deseraris. Ergone quia desum gratiæ tuæ , non confidam gratiæ tuæ ? Ergone non sperabo in te , quia perseveranter volo vivere contra te ? Ergo malitiâ meâ mihi notâ & revelatâ dimetiar clementiam tuam ? Absit , injustum est. Sed timeo , Lector , ne nulla , vel infirma sit spes tua , quem nec promissa alliciunt , nec minæ terrent. *Miserum me !* (lamentatio est Jeremiæ Christiani , Salviani scilicet lib. 2. ad Ecclesiam Cathol.) *Puto non creditur Deo. Quis promissis cœlestibus fidem commodat , & non agit ut esse possit particeps promissorum ?* Si promissis divinis fidis , si in ipsum speras , cur ad eum crebris orationibus non recurris ? Si futura expectas , cur adeo terrenis hæres ? cur in via torpes ? cur jaces in arena ? *Hinc tibi gehenna , inde corona paratur ; &*
inter

inter hanc & illam te medium nugari libet, & citare delectat, nec præmiis traheris, nec periculis terreris, nec cupidus, nec pavidus.

CAPUT II.

De sacro Domini timore.

Quanvis spes Christiana & theologica debeat dici simpliciter certa, infallibilis, & firma; tamen quia gratia potest in nobis deficere, merito spei fiduciam sacri timoris moderatâ formidine temperamus, juxta illud Apostolicum oraculum Rom. xi. *Tu autem fide stans, noli altum sapere, sed time.* Rectè quidem asserit D. Thomas *quest. 18. art. 8.* spei nostræ certitudinem eximiam; quia, inquit, licet certitudo potissimum in vi cognoscitiva inveniat, participativè tamen in omni eo, quod à vi cognoscitiva infallibiliter movetur, invenitur: spes autem movetur à fide, quæ omnibus habitibus intellectualibus certitudine antecellit; per hoc enim cœlestia, & supernaturalia speramus, quia Deus revelavit sperantes in ipsum non confundendos in æternum: unde verè Tridentinum *sess. 6. cap. 13.* monet, quod *in Dei auxilio firmissimam spem collocare, & reponere omnes debent.* Quia, ut tradit Apost. Rom. 5. *Spes non confundit.* Et ad Hebr. 6. *Firmissimum solatium habeamus, qui confugimus ad invendam prepositam spem, quæ sicut anchoram habemus tutam ac firmam.* Hæc, inquam, rectè asserit D. Thomas;

futura obtinere confidit, sacri timoris tractationem subnectit *quest. 19.* quo speratum bonum amittere vercamur. Quia, ut ait Magnus Gregor. lib.29. Moral. cap.9. *Debet profectio, debet non solum in spe esse securitas, sed etiam timor in conversatione, ut & illi certantes foveat, & iste torpentes pungat.*

Porro hæc consideratio non parum utilis erit; initium enim sapientiæ timor Domini. Quia, ut optimè explicat D. Thomas *art.7.* licet fides sit initium sapientiæ, quantum ad ejus essentiam, quia articuli fidei sunt sicut prima principia sapientiæ, prout est cognoscitiva: verum quia sapientiæ apud Christianos nedum ut cognoscitiva consideratur, sed prout est directiva actionum humanarum secundum rationes divinas; ideo timor est initium sapientiæ quantum ad effectum, quia ex illo sapientiæ incipit operari, sicut à fundamento ædificator incipit domus constructionem; per timorem enim non solum homo relinquit peccatum, sicque animum ad sapientiæ ingressum apparat; sed etiam per timorem castum majestatem divinam revereatur, seque illi subjicit: homo autem Deo reverenti timore subiectus, facile vitæ suæ seriem secundum rationes divinas regulat, quod est Christianæ sapientiæ officium. Hinc sacer ille timor comparatur ad totam vitam humanam per sapientiæ Dei regulatam, sicut radix ad arborem. Unde dicitur Eccles.1. *Radix sapientiæ est timere Dominum, rami enim illius longavi.* Ille ergo incipit christianè sapere, qui Deum incipit timere; quia Christiana sapientiæ sine amore Dei nulla invenitur; timor autem intro-ducit charitatem sicut seta linum, ut August.

tract. 9. in canon. Ioan. edisserit. Ejus ergo tam
necessarii timoris naturam, partes, præcepta,
aliaque ad ipsum spectantia speculemur.

SPECVLATIO I.

*Timor malum timet, & à Deo ti-
met. Dividitur in filialem, seu
castum, initialem, servilem, &
mundanum.*

PRima pars explicat objectum quod, ut vo-
cant, & objectum quo timoris: objectum
quod est malum, quod refugit; timor enim fu-
gam importat, fuga autem respicit malum, sicut
prosequutio bonum: objectum verò quo timo-
ris est Deus, à quo malum inferri potest. Et ratio
est, quia sicut spes habet duplex objectum, quo-
rum unum est bonum futurum arduum, cujus
assequutionem expectat, aliud est auxilium, quo
tale bonum se posse adipisci confidit: ita timor
duo respicit, nimirum malum quod refugit, &
illud à quo malum inferri potest. Priori modo
Deus, qui est purum & summum bonum, & ipsa
bonitatis essentia, objectum timoris esse non po-
test; posteriori tamen modo à timore respici
potest, in quantum ab ipso nobis impendere ali-
quod malum potest; malum quidem poenæ, quod
positive infligere potest; malum etiam culpæ,
quod permittere potest, non quidem imper-
tiendo malitiam, sed non impertiendo miseri-
cordiam. Certè sicut in Deo non solam miseri-
cordiam, sed etiam justiciam considerare pos-

sumus ; illam quâ succurrit miseris , istam quâ punit peccantes : ita Deus potest esse objectum quo spei ; & timoris , id est propter quem speramus , propter quem & timemus : sicut enim consideratio divinx misericordiæ spem ciet , ita meditatio justitiæ timorem incutit salutarem.

Dices : Hinc sequitur , timorem respicere Deum , non ut objectum , sed ut causam efficientem , vel infligentem malum , quod est unicam timoris objectum.

Respondeo , quod licet timor respiciat Deum , tanquam causam objecti sui , scilicet mali ; hoc tamen non vetat quin Deus sit objectum quo , seu propter quod timet : Nam etiam spes , teste D. Thoma *q. 17. art. 5.* respicit objectum à quo sperat ut causam efficientem ; Deus namque ut auxilians importat rationem causæ efficientis. Ad cujus pleniorum intellectum adverte , quod licet causa efficiens habitum spei , vel donum timoris non possit esse objectum spei , vel timoris , causa enim efficiens , quâ talis , non specificat habitum , sed illum producit & infundit ; specificatio autem petitur ab objecto ad genus causæ formalis extrinsecæ pertinet : attamen causa efficiens , seu parans auxilia ad beatitudinem obtinendam necessaria , vel intentans mala formidanda , habet rationem objecti & motivi propter quod merito speramus , merito timemus ; quia licet causa illa sit efficiens auxiliorum adjuvantium , vel malorum impendentium ; est tamen causa formalis extrinsecæ , sed motiva per ordinem ad sperantem , & timentem.

Instabis : Magnum intercedit discrimen spem inter & timorem ; nam de intrinseca ratione spei est respicere bonum ab aliquo concedendum.

tum; non est autem de ratione timoris ut habeat à quo timeat, sed duntaxat quod timeat, ut patet in timore culpæ ut culpa est, quam à Deo sibi infligi nemo timere potest, cum culpæ Deus non sit author, sed ultor.

Respondeo, quod licet, ut postea dicemus, non possit dari timor de culpa ut culpa est, scilicet est voluntaria; tamen nihil inde efficitur contra nos: tum quia culpam timet timor filialis, ut est separatio à Deo; unde tunc Deus habet objectum quo timoris, quatenus vel ab ipso, vel per comparisonem ad ipsum, grande malum, separatio nimirum à Deo, quæ est malorum maximum, imminere potest: tum quia licet culpa non sit à Deo causante, est tamen à Deo permitteunte unam culpam in pœnam præcedentis peccati, juxta illud, *Appone iniquitatem super iniquitatem eorum*. Tum demum, quod licet timor non habeat aliquando à quo timeat, tamen negandum non est, quod quando habet à quo timeat, illud non sit objectum propter quod timet: sicut licet spes naturalis aliquando confidat aliquid adipisci propriâ virtute, aliquando verò auxilio alterius; tamen in hoc secundo casu illud à quo sperat auxilium, habet rationem objecti quo, vel cui confidit, & propter quod bonum expectatum obtinere sibi pollicetur.

Secunda pars tradens divisionem timoris in filialem, seu castum, initialem, servilem, & mundanum, explicatur simul, & probatur: Cum enim objectum timoris sit malum, quod formidat; si propter malum, quod refugit, recedit à Deo, timor est mundanus; si autem propter malum, quod refugit, convertitur ad Deum formidine pœnæ, est timor servilis; si autem
horro

horrore culpæ, & majestatis divinæ reverentiâ ad Deum accedimus, est timor filialis; filiorum enim est timere offensam patris. Qui timor dicitur etiam castus, quia non quæ sua sunt, quærit, sed quæ Dei, cui ut patri, & ut sponso charitate copulatur, juxta illud: *Accepistis adoptionem filiorum, in quo clamamus: Abba Pater.* Et illud: *Despondi vos uni viro virginem castam exhibere Christo.* Quod si propter utrumque timet, pœnam scilicet imminentem, & amorem divinum, quem violare veretur, est timor initialis, sic dictus non ex eo, quod sit initium sapientiæ; id enim longè potiori jure timori filiali competit: sed quia incipientium proprius est; perfecti enim non partim timore, partim amore, sed una Dei dilectione moventur; perfecta quippe charitas foras mittit timorem, ut dicitur *1. Ioan. 4.* Unde non differt timor initialis essentialiter à filiali, sed sicut charitas perfecta, & imperfecta; incipiens, & consummata.

Scio quidem, hanc doctrinam displicere Durando in *1. dist. 34. quest. 9.* quia, inquit, timor initialis & castus habent diversa objecta; objectum enim initialis est utrumque malum, culpæ & gehennæ; objectum verò casti timoris est sola offensa Dei summè dilecti: ergo timores illi specie distinguuntur. Maximè quia sicut impossibile est duos actus cognoscendi esse simul in eadem potentia intellectiva, ita repugnat duos actus in eadem potentia appetitiva reperiri, quorum unus timeat pœnam, alter Dei offensam reformidet. Verùm hæc ratiuncularum offutia facili negotio discutiuntur. Prima quidem; nam falsum est, quod objectum timoris initialis

initialis sit pœna, hoc enim non dixit S. Doctor, sed quod timor initialis ratione adjuncti timoris servilis, quem initio conversionis compatitur, formidat pœnam, quanvis ratione sui culpam timeat, & Deum vereatur & revereatur. Secunda etiam objectio nihilo fortior est; quia sicut in intellectu plures dari possunt actus intelligendi subordinati, & per modum unius; ita in appetitu plures actus inter se ordinatos reperiri quid vetat? Ergo in proposito poterit formido culpæ, & timor pœnæ in eodem incipiente in ordine ad eandem conversionem inveniri.

Si autem quæras, quomodo differant timor servilis, & filialis? Respondebo cum D. Thoma *art. 5.* timores illos differre specie; nam sicut actus, & habitus distinguuntur per objecta, ita & timores: At timor servilis, & filialis habent diversum objectum; objectum namque timoris servilis est malum pœnæ, objectum verò timoris filialis est malum culpæ. Et quanvis uterque timor respiciat Deum tanquam objectum *que*, seu propter quod timet; longè tamen diversa ratione & habitudine in Deum fertur: timor enim servilis respicit Deum sicut principium inflictiuum pœnarum, timor verò filialis respicit Deum, non sicut principium culpæ, sed potius sicut amandum terminum, à quo refugit separari per culpam. *Ex hoc objecto, quod est Deus* (inquit D. Thomas *art. 5. ad 2.*) *non consequitur* (in utroque illo timore) *identitas speciei, quia etiam motus naturales secundum habitudinem diversam ad aliquem terminum specie diversificantur: non enim idem est motus specie, qui est ab albedine, & qui est ad albedinem.*

R E F L E X I O.

*Deum time, hoc est enim omnis homo. Si hoc est omnis homo: Ergo sine hoc nihil est omnis homo, infert D. Bernardus. Ergo si stas, noli altum sapere, sed time, sed cum metu, sed cum tremore salutem tuam operare, sed sollicitus subpotenti manu Dei humiliare; quia qualis sis apud Deum, nosse non potes, nisi ex parte; & qualis futurus sis, nosse tibi penitus impossibile est. Si peccator es, expavesce, & semper quasi tumentes super te fluctus time Deum, quia pondus justitiæ ejus ferre non poteris, nec brachiū fortitudinem sustinere. Si justus es, ne time minis, quia ut præclare Prosper epist. 84. *Vigilant tenebris insidia, ut ubi proficit devotio, subrepat elatio. Quando ergo in mandatis Dei quique proficiunt, tantò majores habent causas formidinis & tremoris: ne de ipsis probitatis argumentis mens sibi benè conscia, & laudis avida, in superbia rapiatur excessus, & fiat immunda vanitate, dum sibi videtur clara virtute.* An nescis quod ipsa justitia justis timenda est, ne ipsis operibus pietatis elati deserantur ope gratiæ, & remaneant in infirmitate naturæ? An nescis, quod Christus Sol justitiæ, qui justitias dilexit, contestatur non venisse se vocare justos, sed peccatores; non quod veros justos negligat, aut non vocet justus Dominus; sed quia arrogantes, & sibi justitiam tribuentes, quive se justos dicunt, justè reprobatur amator æquitatis, *Usurpatores justitiæ non vocantur ad gratiam, inquit Ambr. lib. 5. in Lucam.**

An non timebit qui nescit, an odio, vel amore dignus sit? An non meritò omnem metum sibi vendi

vindicabit negotium unicum, negotium negotiorum, opus salutis, æterni gaudii, vel mœroris? Ita planè non paveat, per me licet, sit intrepidus, sit securus, qui potest dicere: Ego de electis sum, ego de prædestinatis ad vitam, ego de numero filiorum. Ecquis tam temerarius hæc præsumat, cum in remotissimo ab humana cogitatione secreto de nullo ante mortem prænunciari liceat, aut possit, quod in electorum gloria sit futurus? Non paveat, non formidet, non configat timore carnes suas, qui ignorat Deum esse terribilem in consiliis super filios hominum; qui nescit propositum Dei super omnes manere immobile; qui non credit utrinque stare fixam sententiam æternitatis, & in iis, qui salvi fiunt, & in iis qui pereunt; quive illud Augustini lib. 10. de ovibus, non audivit: *Ovem te putas, hircum te fortè novit Deus.* Ergo nihil timore Dei justum magis, nihil magis necessarium. Si mari, ejusque fluctibus mortem evestigio minitantibus non credit nauta, licèt in modum stagni fuscum æquor arrideat, licèt vix fumina tacentis elementi vento terga crispentur, nec ejus tranquillitati confidit, quia momento mare vertitur, & eodem die ubi inserunt navigia, sorbentur; quantò magis in hujus vitæ lubrico per turbulentissimi maris procellas atque discrimina vecti jure omnia verentur, omnia timent. *Fratres,* ait August. in Psal. 80. *nimis timendum esse volo, melius est enim non vobis dare securitatem malam; non dabo quod non accipio; timens terreo; securos vos facerem, si securus ego fierem; ignem æternum timeo.* Nec minùs nervosè & vividè Bern. in sermone de verbis Job: *Vade nobis ista dissimulatio est, fratres mei?*

Vnde

Unde hac tam pernicioſa tepiditas? Unde hac ſecuritas maledicta? Quid ſeducimus miſeri noſmetipſos? Forſitan jam divites facti ſumus? Forſitan jam regnamus? Nonne oſtium domus noſtræ horribiles ſpiritus illi obſident? Nonne exitum noſtrum larvales illa facies præſtolantur? Quis ille pavor erit, ô anima mea, cum dimiſſis omnibus, quorum tibi eſt tam jucunda præſentia, tam gratus aſpectus, cohabitatio ipſa tam familiaris, ſola ingrediens incognitam penitus regionem occuſantia tibi catervatim teterrima illa monſtra videbis? Quis tibi in die tanta neceſſitatis occurreret? Quis tuebitur à rugientibus præparatis ad eſcam? Quis conſolabitur? Quis deducet? Filioli mei, memoremur hac noviffima noſtra, ut non peccemus.

SPECVLATIO II.

Timoris mundani, & ſervilis labes percenſentur.

Primò certum eſt, timorem mundanum eſſe ſimpliciter malum, & peccatum; cum per illum homo recedat à Deo propter malum, quod timet ab hominibus; quod malum utique non timeret, niſi mundum plus nimio amaret; & ideo timor mundanus appellatur, quia bona mundana, quæ amat, timet amittere; quia ut præclare dixit Auguſtinus: *Cum dolere non amittitur, niſi quod cum amore poſſidetur.* Et licet naturæ hominis conſentaneum ſit proprii corporis detrimentum, cæterorumque bonorum
mundæ

mundanorum refugere jacturam, attamen quod propter caducas transiterii boni commoditates, & nugas nugarum homo à summo bono Deo, & à bono rationis in virtute sito recedat, perveritas est ipsi Philosopho persuasa : nam 3. *Ethic. cap. 1.* ait quædam esse, scilicet turpia, ad quæ nullo timore aliquis debet cogi; quia pejus est illa committere, quàm pœnas quascumque pati. Ideo dicitur *Matth. 10.* Nolite timere eos, qui occidunt corpus: ubi timorem mundanum reprobatur, quo terrore mortis & tormentorum peccata patrantur: nam cæteroquin potestates à Deo hominibus prælatas timere licet, dum inferunt, & minantur pœnas, quibus à malo retrahunt peccatores; quia in re Dei ministri sunt, divinæ justitiæ Vicarii, legum vindices, boni communis conservatores, juxta illud *Rom. 13.* *Minister Dei est, vindex in iram Dei, qui malum agit.*

Porro advertendum est, timorem mundanum dupliciter posse, & solere ex amore nimio creaturarum derivari. Interdum enim ex affectu alterius peccati oritur, dum nimirum falsis perituræ voluptatis illecebris irretitus ea timet perdere, quæ amat: v. g. potest aliquis fidem veram coram tyranno confitendam negare ex immoderato divitiarum, quas possidet, vel illicitarum, quibus capitur, voluptatum amore: vel potest confessionem fidei detrectare solo mortis & tormentorum metu ex nimio vitæ & quietis amore exorto. In utroque casu timor ille semper nefarius, semper peccatum est: sed in priori vitium vitio accumulatur, & duplex peccatum patrat; & timor duplici deformitate sordet; quia & timere malum corporis
cum

cum detrimento animæ peccatum est; & timere malum illud ex alterius amore peccati, cumulus sceleris, & duplex iniquitas est. At verò qui solius amore vitæ, & mortis pavore per se licito negat fidem, solius infidelitatis malitiâ afficitur, quia tunc timor ille ob solius circumstantiam effectus, non ex causa & radice malus est, quin etiam, ut notat Cajetanus, licet semper ille timor peccatum sit, tamen ejus gravitas ex dolorum, & cruciatuum aternitate, & diræ mortis sævitia minuitur; quia tentatio est magis humana, & hominum infirmitati conformior.

Secundò licet timor servilis secundùm suam substantiam bonus sit, servilitas tamen ejus mala est. Ita docet D. Thomas *quæst. 20. art. 4.* Prima pars colligitur ex variis Scripturæ & Patrum testimoniis; nam *Matth. 20.* hunc timorem Veritas suadet, quem proinde bonum supponit: *Timete*, inquit, *eum qui potest corpus, & animam perdere in gehennam.* Ad illum etiam Baptista *Luc. 3.* populos hortabatur, dicens: *Genimina viperarum, quis ostendet vobis fugere à ventura ira? Facite ergo fructus dignos pœnitentie.* Idem etiam tradunt Patres; non solum quia in illius laudes sæpe effusi sunt, sed etiam quia expressè bonum esse pronuntiant, præsertim Aug. in *Ps. 127.* his luculentissimis verbis: *Ille timor nondum castus præsentiam Domini, & pœnas timet; timore facit quidquid boni facit, non timore amittendi bonum illud, sed timore pariendo illud malum; non timet ne perdat amplexus pulcherrimi sponsi; sed timet ne mittatur in gehennam. Bonus est & iste timor, utilis est.* Unde Tridentinum proscripturum impium Lutheri

theri dogma, quod dolorem ex timore pœnæ conceptum asserit hominem facere hypocritam & magis peccatorem, sic pronuntiat fest. 6. can. 8. *Si quis dixerit, gehennæ metum, per quem ad misericordiam Dei de peccatis dolendo confugimus, vel à peccatis abstinemus, peccatum esse, aut peccatores peiores facere, anathema sit.*

Rationem indicat S. Doctor hic, ad 3. Timor servilis secundum substantiam refugit malum pœnæ à Deo infligendæ: Atqui bonum est refugere pœnam à Deo intentatam, nimirum gehennam; sicut bonum est, & honestum amare bonum ei adversum, scilicet beatitudinem æternam; bonitas enim & malitia timoris ex radice amoris pensanda est: unde cum beatitudo digna sit, quæ ametur, ita miseria, & summa inferni miseria odio & fugâ digna est: Ergo laudabilis est, & bonus timor servilis secundum substantiam spectatus. Nec mirum est, timorem illum reprehendisse impium Lutherum, qui nec Deum timebat, nec homines reverebatur; & cum venisset in profundum, omnia divina, ecclesiastica, & humana contemnebat.

Secunda pars asserens, servilitatem timoris esse malum, ex eodem D. Thoma probatur. Servilitas in hoc consistit, ut pœna timeatur tanquam unum, & principale malum; & bonum, cui adversatur talis pœna, amatur tanquam ultimus finis Deo non subordinatus. Ille, inquit in corp. & ad 1. *facit aliquid timore servili, ut servilis est, qui bonum agit, non ut amet justitiam, sed solum ut pœnam timeat.* Et ad 2. ait, quod servilitas ex timore nascitur, in quantum scilicet homo affectum suum non vult subicere jugo justitiæ per amorem. Ex quibus patet, eum qui

qui timet timore servili, velle sistere in solo timore pœnæ, ita ut nullatenus operetur bonum, nec fugiat peccatum, nisi quia urget imminens pœna cum expresso proposito non operandi boni, nisi solius formidine pœnæ. Atqui servilitas illa mala est, & opposita libertati charitatis: tum quia liber est, qui sui causa est, ex Philosopho 1. *Met. cap.2.* servus verò econtrà est, qui non causa sui est, id est qui non ex propria inclinatione, sed quasi ab extrinseco motus operatur; qui autem ex amore aliquid facit, quasi ex seipso operatur, quia ex interna amantis voluntatis propensione agit; qui verò ex puro timore servili, quâ servili, absque ulla permixtione amoris honestatis, involuntariè saltem secundùm quid, & contra propriam inclinationem agit. Tum quia timor servilis, quâ talis, facit comparisonem, magisque pœnam, quàm culpam; imò non culpam, sed solam pœnam timet; implicitè enim, & virtualiter includit hunc affectum: Peccatum non fugerem, si nulla ei impenderet pœna. Ergo servilis timor, quâ servilis est, malus est, ut præclare docet August. conc. 25. in Psal. 118. *Timor iste, quo non amatur justitia, sed timetur pœna, servilis est, quia carnalis est, & ideo non crucifigit carnem. Vivit enim peccandi voluntas, que tunc apparet in opere, quando speratur impunitas. Cum verò pœna creditur sequutura, latenter vivit, vivit tamen. Mallet enim licere, & dolet non licere quod lex vetat, quia non spiritualiter delectatur ejus bono, sed carnaliter malum metuit quod minatur. Idipsum eleganter repetit epist. 44. Inaniter putat victorem se esse peccati, qui pœna timore non peccat. Quia etsi non impletur foris negotium mala cupidita*

piditatis, ipsa tamen mala cupiditas intus est hostis. Et quis coram Deo innocens invenitur, qui vult fieri quod vetatur, si subtrahas quod timetur? Ac per hoc in ipsa voluntate reus est, qui vult facere quod non licet fieri: sed ideo non facit, quia impune non potest.

Quare Lutherani timorem pœnæ omnem reprobantes, confundunt timorem cum servilitate, quæ licet mala sit, timor tamen ipse secundum se bonus est. Unde S. Thomas docet, quod si servilitas esset de ratione timoris pœnæ, timor ille foret simpliciter malus: verum servilitas non est de essentia timoris, sicut nec informitas de ratione fidei informis; quia species timoris ex objecto, quod est pœna, accipitur, cui accidit quod bonum oppositum ametur tanquam ultimus finis; & pœna ut malum unicum timeatur. Stat ergo, servilitatem esse simpliciter malam, quia per illam non tollitur, sed permanet amor culpæ. Nam ut ait August. lib. 2. ad Bonif. cap. 9. *Quando autem timore pœnæ, non amore justitia sit bonum, nondum bene sit bonum; nec sit in corde quod fieri videtur in opere, quando mallet homo non facere, si posset impune.* Ex lib. de nat. & grat. cap. 57. *Sub lege est, qui timore supplicii, quod lex minatur, non amore justitia se sentit abstinere ab opere peccati, nondum liber, nec alienus à voluntate peccandi. In ipsa enim voluntate reus est, quàm mallet, si fieri posset, non esse quod timet, ut occultè faciat, quod occultè desiderat.*

Tertiò timor servilis non est donum Spiritus sancti. Quia ut discurret S. Doctor art. 9. licet timor pœnarum sit impulsus Spiritus sancti, non quidem inhabitantis, sed moventis; tamen
ali

aliquando compatitur annexam peccandi voluntatem, quia ut ait Tridentinum, metus ille tunc solum ad gratiam in Sacramento recipiendam disponit, si voluntatem peccandi excludat: ubi particula *si*, supponit interdum timorem illum voluntatem peccandi non excludere. Dona autem Spiritus sancti non possunt esse cum voluntate peccati, quia nunquam à charitate disjuncta sunt. Cujus profundiorē radicem tradit Angelicus Doctor 1. 2. *quest. 65. art. 3. ad 3.* ubi docet, quod dona Spiritus sancti se habent ad homines in ordine ad Spiritum sanctum, sicut virtutes morales se habent ad vires appetitivæ facultatis in ordine ad regimen rationis, quæ perficitur per prudentiam: Ergo sicut virtutes morales invicem in prudentia connectuntur, ita dona Spiritus sancti connectuntur radicata in charitate, quæ diffunditur in cordibus nostris per Spiritum sanctum, cum per eam voluntas à Spiritu sancto bene mobilis, & veluti ductilis reddatur: sine charitate autem voluntas non solum non est bene mobilis, quin potius est ob ingentem debilitatem peccato originali immensum auctam divinis impressionibus repugnans; repugnantia autem mobilis ad movens impedit motum: Ergo cum charitate sunt omnia dona, sine charitate nullum.

Confirmatur à posteriori: In Christo fuerunt, & sunt omnia dona Spiritus sancti, ut habetur *Isaia 11.* Et tamen servilis honor longè fuit ab illo, qui non condidit legem, & spiritum servitutis iterum in timore, sed adoptionis filiorum in charitate. Dicere verò timorem servilem fuisse in Christo, non quidem in omni sua

sua latitudine, sed duntaxat sub ratione timoris reverentialis; hoc, inquam dicere, est veritatē contradicere, quia cū habitus sit simplex qualitas, ubicumque est, ibi secundū totam suam latitudinem invenitur, tametsi omnes actus suos non semper producat. Patet autem nedum actum, sed etiam habitum timoris dedecere illum, qui est filius naturalis. Quod si nonnunquam Patres timorem servilem donum esse Spiritus sancti asserere videantur, nomen doni non in stricta Theologorum significatione accipiunt, sed pro omni eo, quod à Spiritu Sancto cordibus hominum imprimitur.

Quartò timor servilis non est virtus, ut docet S. Doctor *art. 9. ad 2. & 3. & alibi*. Quia de ratione virtutis est respicere bonum honestum propter ipsum; unde ille propriè dicitur virtuosus, qui bona virtutis amore & honestate illectus operatur, ac turpe ob ingenitam foeditatem detestatur. Atqui timor servilis, licet ad operandum bonum stimulet, non tamen ad bonum gratiā boni prosequendum, nec ad turpe fugiendum horrore turpis invitat. Ergo timor servilis à perfectione virtutis deficit, & ad summum rationem habitus boni obtinet, eo modo, quo de continentia & perseverantia affirmat S. Thomas 1. 2. *quest. 58. art. 3. ad 2.* quæ licet sint habitus boni, non tamen virtutes, quia principium perfectæ actionis non sunt. Et confirmatur efficaciter; quia si iste timor servilis veræ virtutis rationem sortiretur, crescente charitate non minueretur, sed magis magisque augeretur; quod falsum esse, sic præclare declarat Doctor Angelicus *art. 10.* his verbis: *Timor servilis quantum ad servilitatem totaliter tolli-*
Tom. IV. R.

tur adveniente charitate, remanet tamen secundum substantiam timor pœna, & iste timor diminuitur charitate crescente, maxime quantum ad actum; quia quanto aliquis diligit Deum, tanto minus timet pœnam; primo quidem, quia minus attendit ad proprium bonum, cui contrariatur pœna; secundo, quia firmitus inharens, magis confidit de premio, & per consequens minus timet de pœna.

Dices: Timor est actus secundarius spei; nam ut ait D.Thomas art.6. hujus quæstionis, ejusdem rationis est, quod homo cupiat bonum suum, & timeat eo privari; eadem enim facilitate concupiscimus bonum nostrum, & timeamus malum oppositum: unde timor videtur esse corollarium ex desiderio boni consequutum. Atqui per spem homo concupiscit bonum suum: Ergo per eandem timet malum suum, sicut per charitatem homo diligit Deum, & odit peccatum; quia istius odium ex illius amore derivatur.

Respondeo certum esse, timorem non esse actum secundarium spei; quia ut docet D.Thomas art.10. ad 2. timor pœnæ diminuitur crescente spe, sicut econtrâ crescit timor filialis; quia quanto magis aliquis certius alicujus boni consequutionem per alterius auxilium expectat, tanto magis illum offendere, vel ab eo separari veretur: si autem timor servilis esset actus secundarius spei, non minueretur crescente spe, sicut non minuitur dilectio proximi crescente charitate erga Deum. Et certè experientia compertum est, spem moderari timores, quia dum excitat fiduciam, firmatque voluntatem, fluctuantes, & tremulos timoris dissipat pavores.

Ad

Ad argumentum ergo dicendum , amorem boni, & timorem mali oppositi ex eadem quidem radice profluere, sed non ex eodem principio proximo. Nec mirum, vel speciale illud est pro timore; nam omnes alias passionēs in amore sui radican- tur; ex eo enim quod proprium bonum diligimus, de amissione illius contristamur, & in obices illius irascimur, quanvis ira, tristitia, cæteræque passionēs ab amore distinctæ sint. Ita egregiè explicat D. Thom. art. 9. ad 3. dicens: *Ex hoc quod amor est principium timoris, non sequitur quod timor (filialis) non sit habitus distinctus à charitate, quæ est amor Dei, quia amor est principium omnium affectionum, & tamen in diversis habitibus perficimur circa diversas affectiones in Deo.* Quod autem dicit S. Doctor de timore filiali per ordinem ad charitatem & amorem Dei, dicendum est de servili per ordinem ad amorem sui; sicut enim primus amor primum causat timorem, ita secundus secundum. Et certè si hæc objectio valeret, probaret etiam timorem pænæ elici à charitate: nam homo per charitatem cupit bonum suum, ut asserit D. Thomas in eodem articulo, quem refert objectio, dicens quod amor sui uno modo contrariatur charitati, secundum quod aliquis in amore proprii boni finem constituit: alio modo in charitate includitur secundum quod homo se propter Deum, & in Deo diligit. Et initio corporis articuli: *Timor servilis ex amore sui causatur, quia est timor pænæ, quæ est detrimentum proprii boni.* Unde hoc modo timor pænæ potest stare cum charitate, sicut & amor sui; ejusdem enim rationis est, quod homo cupiat bonum suum, & quod

timeat eo privari : igitur ad amorem sui reducendus esset potius timor pœnæ, quàm ad spem reducendus, inquam, radicaliter, non formaliter, uti exposuimus.

Instabis : Timor, sive filialis, sive servilis, est habitus specialis, ut supponit Doctor Sanctus *art. 5.* sed non est habitus malus, nec indifferens : Ergo est habitus bonus, & virtutis.

Respondeo fatendo, timorem esse habitum, quia dantur in nobis plures actus supernaturales, & naturales timoris : supernaturales quidem, qui sequuntur fidem præviam, & sunt impulsus Spiritus Sancti nondum quidem inhabitantis, sed moventis : naturales verò orientes non quidem ex amore naturali Dei, nec etiam ex immoderato amore sui ; sed ex honesta dilectione boni proprii : unde sequitur horror pœnarum, & ærumnarum illarum fuga, quas fides detegit & minatur : Ergo necessariò admittendus est habitus timoris acquisitus, ex iteratis actibus genitus, & ad similes actus eliciendos proclivis : sicut & datur timoris habitus infusus, quo actus supernaturales sacri metus conaturaliter eliciuntur. Ex quibus non sequitur, habitum timoris esse strictè habitum virtutis, quia non est dispositio perfecti ad optimum, nec per se inclinatur ad honestum virtutis amore, sed formidine pœnæ ; quod est contra rationem virtutis, quam sola honestas allicit, sola placet, & propter se : turpe verò propter ingentem fœditatem detestatur ; illudque non minùs sollicitè fugeret, tametsi nullæ impenderent pœnæ flagitiis.

R E F L E X I O.

Timorem mundanum mundanis relinquamus, nec inviti, aut pœnarum timore acti Domino inserviamus. Eam nobis Christus promeruit, obtinuitque libertatem, non ut non impleamus quæ præcepta sunt, sed quatenus ad ea implenda non pœnarum metu, & legis imperio compulsi, sed tota spiritus plenitudine, tota cordis amantis libertate moveamur. Ideo namque justo non est posita lex, quia in lege Domini voluntas ejus; in lege, inquam, non sub lege; quia etsi secundum legem Dei sponte sua agit, non tamen secundum legem Dei invitatus agitur. Quia nimirum honestum honestatis gratiâ colit, Deum propter majestatem timet, propter bonitatem amat; neque ob mercedem, vel supplicium, vel hujus vitæ commodum, vel periculum officio fungitur suo. Ergo perfectâ charitas mundanum foras mittat timorem; sæcularis timoris dirumpamus *ferrea vincula* (sic ab Augustino in *Psal. 149.* appellantur;) adjiciamus aurea amoris, quibus non constringitur animus, sed levatur. Abigamus timorem illum, qui nulla mala non aufert; sed ipse malus est, & malum latenter amat, & ut timenda declinet, in pœnitenda incurrit. Audi August. in *Enchir. cap. 121.* *Omnia præcepta divina referuntur ad charitatem; omnis itaque præcepti finis est charitas, idest ad charitatem refertur omne præceptum: quod verè ita sit, ut vel timore pœna, vel aliqua intentione carnali non referatur ad illam charitatem, quam diffundit Spiritus sanctus in cordibus nostris, nondum sit quemadmodum fieri oportet, quanvis fieri videatur.*

Certè timor mundanus , & merè servilis , ipse timendus est ; quia non voluntatem peccati excludit , sed intus servat , & intus fovet. Nam ut ait August. serm.10. de verbis Dom. *Qui timore pœna non concupiscit , puto quia jam concupiscit. Terrore ingenti armorum , atque telorum , & circumdantis forsitan multitudinis etiam leo revocatur à prada ; & tamen leo venit , leo rediit : pradam non rapuit , sed malitiam non posuit.* Succinit Gregorius 3. part. Past. admonit.14. *Qui propterea bonum facit , quia tormentorum mala metuit , vult non esse quod metuat , ut audacter illicita committat.*

SPECVLATIO III.

Timoris filialis dotes , & sacra delicia.

PRIMUM timoris filialis privilegium , unde omnes scrupulosæ , & ferè supersticiosæ conscientia morbus evellit , est quod culpam ipsam secundum rationem culpæ voluntariæ non timet , sed solam à Deo summè dilecto separationem. Hanc profundam veritatem , & à paucis observatam tradit Doctor Sanctus hîc art. 2. dicens : *Utrum autem malum culpa possit timeri , supra dictum est , cùm de passione timoris ageretur , scilicet 1.2. quæst. 53. art.3. ubi hanc sententiam expressè docet & probat.* Unde non possum satis mirari quorundam neotericorum incuriam , & in lectitando D.Thoma oscitantiam (ne quid gravius dicam , & justè dicerem)
allic

asserentium D. Thomam 2. 2. correxisse, & retractasse, quod 1. 2. docuerat, cum in secunda secundæ quæstionem illam non determinet, sed ad primam secundæ, ubi eam resolverat, se remittat.

Ratio fundamentalis traditur loco laudato 1. 2. & est hujusmodi: Culpa ut culpa est, seu voluntaria, nihil quàm talis habet, quod timeatur: ergo de ea, quàm tali, non potest esse timor filialis. Probatur anteced. Illud quod subjacet voluntati & potestati nostræ, nihil habet quod timeatur; quia illud solum timemus, vel saltem timere debemus, quod habet rationem terribilem; sicut illud duntaxat speramus, quod habet rationem ardui. Porro illud solum terribile censendum est, quod à causa extrinseca à nobis minimè impedibili intentatur. Atqui culpa ut culpa est, nullam habet causam externam, à qua efficiatur, sed à sola proficiscitur eligentis voluntatis libertate: ergo culpa ut culpa est, nihil habet quod timeatur, sed solum inquantum est ab exteriori causa, magnâ vi nos ad peccatum impellente, qualis est vehemens maligni spiritus tentatio, inducens, & ferè trahens, ac rapiens perversorum societas; sed ut observat D. Thomas, tunc non tam culpam secundum rationem voluntarii, quàm seductionem timeamus.

Confirmatur radicitus ex processu voluntatis in nostro proposito sic se gerentis. Primò voluntas filii adoptionis ex charitate sincerè diligit Deum, & purè propter ipsum: deinde summo odio prosequitur vitium & peccatum, utpote unum divinæ bonitatis hostem; unde ad odium omninò pertinet ferri ad culpam sub

ratione culpæ voluntariæ, quia quâ talis summo bono summè dilecto adversatur. Hinc sequitur timor filialis ab amore Dei, & odio culpæ imperatus: ex hoc enim, quod iustus odit culpam ut culpa est, quia amat Deum, sequitur quod causas ad peccatum inducentes formidet, & præcipuè à Deo summè dilecto separari vereatur. Ex quo patet, timorem filialem non respicere culpam, in quantum culpa est; sed supponere culpam sub ea ratione ab odio respici, & fugi; ipsum verò timorem respicere formaliter culpam, ut à Deo dilecto separat, & prout ab externis tentatoribus induci potest.

Dices: D. Thomas *art. 20.* expressè asserit, quod si aliquis convertatur ad Deum, & ei inhæreat propter timorem pœnæ, erit timor servilis; si autem propter timorem culpæ, erit timor filialis: nam filiorum est timere offensam patris. Et clariùs *art. 5.* *Necesse est, quod secundum diversitates malorum timores specie differant; differunt autem specie malum pœna, quod refugit timor servilis; & malum culpa, quod refugit timor filialis.* Ergo ex D. Thoma timor filialis est de culpa ut culpa est, ac per hoc distinguitur à servili: ergo vel se correxit D. Thomas, vel sibi ipsi contradicit.

Respondeo magnum esse discrimen inter hoc, quod timor filialis sit de culpa, & quod sit de culpa ut culpa est, seu ut est voluntaria. Hoc secundum nusquam invenitur apud D. Thomam, nisi refutatum: ad primi autem veritatem sufficit, quod timor filialis formidet culpam, quatenus ex ea sequitur separatio à Deo. Nec hæc responsio est voluntaria, sed à Doctore Sancto *art. 6.* deprompta, ubi sic formaliter ait: *Sepa-*

rari à Deo est quadam pœna., quam charitas maximè refugit; unde hoc pertinet ad amorem castum.

Instabis contra rationem D. Thomæ: Malum culpæ est malum imminens, deterius malo pœnæ, arduum etiam, & difficile; licèt enim culpa à libero voluntatis consensu procedat; tamen voluntatem ex primigenii peccati labe in malum tam proclivem continere, internæ concupiscentiæ impetus contra rationem quotidianis conflictibus insurgentes moderari, & non peccare, difficultas est difficultatum; & ideo ad peccatum patrandum sufficit quidem libertas arbitrii, ad illud verò vitandum, & faciendum bonum, nequaquam sufficit nisi adjuvetur ab omnipotenti bono: ergo culpa ut culpa est, difficilis est, & solo Dei auxilio superabilis: ergo de ea ut tali potest esse timor, ruitque tota structura fundamenti D. Thomæ.

Respondeo hoc argumentum æquivocatione laborare; aliud est enim peccare, aliud vitare peccata: licèt autem vitare peccata sit difficile & arduum, non tamen ipsum peccare: vitare autem peccata non respicit timor, sed spes; non enim timemus vitare peccatum, sed illud Deo dante vitare speramus; ipsum autem peccare secundùm se non est arduum, sed horrendum, sed divinæ bonitati contrarium: unde non est objectum timoris, sed odii, nisi quatenus ex peccato consequitur separatio à Deo, quam unicè formidat timor castus.

Ugebis: Spes timori opponitur: Sed spes potest esse de bono virtutis, & actu honesto, qui licèt à libera voluntate prodeat, sufficienter tamen habet rationem ardui, & difficilis: Ergo

etiam timor potest esse de actu malo, seu de culpa ut culpa est, & voluntaria.

Respondeo cum D.Thoma 1. 2. citata, ad 3. spem inter & timorem intercedere discrimen, quia spes est de bono, quod quis potest adipisci; potest autem quis adipisci bonum, sive per se, sive per alium: & ideo spes potest esse de actu virtutis, etiam si sit in nostra potestate constitutus. At timor est de malo, quod nostræ non subjacet potestati, sed ab externa causa infligitur: unde licet bonum, quod speramus, possit esse & à causa intrinseca, & ab extrinseca; malum tamen, quod timemus, semper ab externa causa vel infligitur, vel impendet.

Ad cujus profundiorum intellectum considerandum est, in actione bona & mala contingere posse difficultatem; nam & arcta via est, ac angusta porta, quæ ducit ad vitam; & pariter restantur impii Sapient. 5. *ambulasse se vias difficiles, & lassatos esse in via iniquitatis.* Verum difficultas actioni malæ intermixta non est de ratione culpæ, quæ per se non difficultatis spinis, sed nimis facilitatis illecebris vestitur; culpa namque in suo conceptu solam rationem voluntariæ aversionis à bono incommutabili, & conversionis ad bonum commutabile includit; & cum sub hac ratione culpa nostræ penitus subiaceat libertati, planè sequitur culpam ut culpa est, difficultate carere, subindeque nullum incurrere timorem natam esse. At verò difficultas actus honesti per se ad bonum virtutis pertinet; virtute namque opus est ad vincendas difficultates, quas in operibus bonis concupiscentia invenit; imò non nisi propter eas superandas dantur habitus virtutis: unde non mi-

rum; si actus virtutis habeat rationem ardui, subindeque objectum spei existat.

Secundum privilegium : Timor filialis est comes individuus charitatis, itaut crescente charitate crescat & timor castus. Probatum contra Durandum in 3. dist. 24. quæst. ultima. Crescente causa effectus illius connaturalis per se crescat necesse est, saltem si talis effectus per se ex illa causa descendat : sed timor castus per se à charitate fluit ; quantò enim aliquis magis diligit amicum, tantò amplius eum offendere, ab eoque separari pertimescit : ergo crescente charitate timor filialis augetur ; & qui Deo intimius adhæret, & aliunde vitæ hujus pericula cernit, quibus tantum bonum amitti potest, inter tot hostium incursus, tot tentationum procellas, tot passionum insultus, & tantam flexibilis, infirmique arbitrii fragilitatem non potest, non debet non timere. Certè sicut dum pretiosum liquorem sumamè sibi utilem & charum quis per iter lubricum, & salèbrosam gessans, tantò magis timet, quantò liquorem amat : ita viri Sancti, & Dei amantes, thesaurum gratiæ in vasis fictilibus portantes, bonum illud timent amittere, cujus privatio mors animæ est. Undè dicebat Propheta Coronatus Psalm. 118. *Anima mea in manibus meis semper*, ut eam ab impendentibus undique periculis servem incolumem.

Sed dices cum Durandò : Quantò separatio à patre est magis difficilis, tantò minùs timetur, quia tunc minor est causa timendi ; sed gaudendi materia : Atqui quanto crescit charitas, tanto separatio à Patre coelesti est magis difficilis ; imò in charitate ferventes experiuntur, & di-

cunt cum Apostolo, certos se esse, quod neque mors, neque tribulatio, neque potestates, neque alia mundi terriculamenta poterant ipsos à charitate Christi separare. Ergo ex hoc, quod timor castus sit effectus charitatis, non rectè concludit Doctor Angelicus, quod crescente charitate crescat timor castus, sed potiùs timorent decrescere inferre debuit, cum charitas foras mittat timorem, & cum timor exigat, tanquam objectum malum separationis à Deo ut possibile: quod utique malum crescente charitate minùs possibile evadit.

Respondet multas in objecto timoris reperiri formalitates, nimirum rationem & mali, & possibilis, & futuri: unde quacumque rationum illarum auctà, vel diminutà, objectum magis vel minùs timendum est; majora enim mala, & proximius impendentia timemus. Cæterum rationum illarum aliæ magis principales, aliæ minùs præcipuæ jure merito censentur; quas inter primum locum sibi vendicat ratio mali, quod est simpliciter mensura timoris: quantò enim majus, & gravius imminet malum, tantò timor justior est, & fundatior: ratio verò possibilis, & futuri est minùs principalis, ut ex eo apparet, quod nobis solenne est, magnum malum, licet non tam facilè contingens, timere magis, quàm leve malum, tamen crebrò, & facilè obveniens. Hinc liquidò sequitur, crescente in objecto timoris præcipua, & magis formidanda ratione mali, & decresciente minùs præcipua, minùsque terribili, timorem clementia suscipere essentialia, & non nisi secundùm quid decrescere ex diminutione possibilitatis, facilitatis, vel difficultatis objecti; quia dimi-

nutip

natio secundum quid non tollit, vel impedit augmenta simpliciter. Sic autem contingit in proposito; nam quanto magis crescit Dei dilectio, tanto unio cum ipso magis penditur, tanto separatio ab ipso mala esse apprehenditur, tantoque magis formidatur: Ergo pro ratione charitatis crescit timor castus, quia crescit boni divini æstimatio, crescit separationis à Deo mali ponderatio & pavor, licet secundum quid ex diminutione possibilitatis illius tam grandis, & unici mali minuatur nonnihil formido; vel, ut clarius dicam, crescente charitate, non minuitur timor castus, sed pœna, turbatio, & sollicitudo innata timori; quia qui Deum magis amat, non minus maiestatem eius veretur, sed dulcius, ob effusam divinæ dilectionis suavitatem.

Tertium privilegium est timoris casti æternitas, ratione cujus permanet in sæculum sæculi, & in patria cum charitate, quæ nunquam excidit, perseverat. Cum enim timor filialis sit effectus, & fructus charitatis, tantum abest, quod à patria timor exulet, quod cum ibi charitas sit in ultimo consummatæ perfectionis gradu, ibidem etiam timor ille non destruitur, sed perficitur, & coronatur. Unde dicitur Job 26. quod *columnæ cœli tremunt, & pavent ad nutum eius*; quia ut ait Greg. 7. Moral. cap. 15. *Ipsæ virtutes cœlestes, quæ Deum sine cessatione conspiciunt, in ipsa contemplatione contremiscunt. Qui tamen tremor ne sit eis pœnalis, non timoris est, sed admirationis*; quia scilicet infinitam, sibi-que incomprehensibilem Maiestatem suspensi demirantur.

Huius sacri timoris actus quis, & qualis sit, divine

divinè explicat D. Thomas, tum hic *ad 1. & 3.* tum *quæst. unica de Spe, artic. 4. ad 2.* tum *3. p. quæst. 7. artic. 6.* his ferè verbis. Timor respicit duo objecta, quorum unum est malum terribile, aliud est illud, cujus potestate potest malum inferri; sicut aliquis timet Regem, in quantum habet occidendi potestatem; non autem timeatur ille, qui potest nocere, nisi quandam haberet eminentiam potestatis: cui de facili resisti non potest; ea enim, quæ in promptu habemus, repellere non timemus; & sic patet, quod aliquis non timetur, nisi propter suam eminentiam. Sic igitur dicendum, quod in Beatis permanet timor Dei, non secundum quod respicit malum separationis à Deo per culpam, nec secundum quod respicit malum punctionis pro culpa; sed secundum quod respicit ipsam divinam eminentiam, unde affectus & motus reverentiæ proficiuntur, dum immensam celsitudinem, & majestatem illius contemplamur, cujus potestate malum infligi potest.

Ad cujus penitiorum intellectum, & clariorem pariter expositionem, considerandum est, quod timor respicit malum; sub malo autem, comprehendendi potest omnis defectus: est autem triplex hominis defectus; unus quidem pœnæ, & hunc principaliter respicit timor servilis; alius autem est defectus culpæ, & hunc defectum respicit timor filialis, in quantum ex eo consequitur separatio à Deo: & sub hac duplici ratione non erit timor in patria, ubi nulla erit peccandi potestas, nulla pœnæ miseria, juxta illud Proverb. 1. *Abundantiâ perfruetur, malorum timore sublato.* Sed est tertius defectus naturalis, quatenus quælibet creatura in infinitum

tum distat à Deo , qui defectus nunquam tollitur ; & hunc defectum respicit timor reverentialis , qui est in patria , reverentiam exhibens. Creatori ex consideratione majestatis infinitæ : & propriæ vilitatis. Quare licet à patria exulet timor sollicitudinem habens , & de malo præcavens , non tamen timor securus , non sollicitudine infirmitatis , sed tranquillitate charitatis. Unde voluntas ex contemplatione supremæ eminentiæ veluti retracta , & in ingentem parvitatem reflexa , divinæ sese subijcit potestati , à qua malum infligi , vel permitti potest , licet ex divina misericordia non infligatur.

Dices : Si timor castus maneret in patria , prumperet in eodem actus , quos elicit in via : sed hoc est falsum , nam timor filialis in via formidat culpam , ut ex ea sequitur separatio à Deo , quod longè est à patriæ securitate : Ergo timor filialis non perseverat in patria.

Respondeo , timorem castum permanere in patria , tametsi non eundem , sed distinctum actum eliciat : quod sic præclare explicat D. Thomas citatus : *Non habet timor in patria eundem actum , quem habet modo . Ad cujus evidentiam sciendum est , quod proprium objectum timoris est malum possibile , sicut proprium objectum spei est bonum possibile . Et cum motus timoris sit quasi fuga , importat timor fugam mali ardui possibili ; parva enim mala timorem non inducunt . Sicut autem bonum uniuscujusque est (peregrinatio est observatio , & totius vitæ spiritualis meta ,) ut in suo ordine consistat ; ita malum uniuscujusque est , ut suum ordinem deferat . Ordo autem creatura rationalis est , ut sit sub Deo .* *Supra ceteras creaturas . Vnde sicut malum*

creatura rationalis est, ut subdat se creatura rationali per amorem; ita etiam malum ejus est, si non Deo se subjiciat, sed in ipsum presumptuose insiliat, vel contemnat. Hoc autem malum creatura rationali secundum naturam suam considerata possibile est, propter naturalem liberi arbitrii flexibilitatem; sed in Beatis¹ sit non possibile per gloria perfectionem. Fuga ergo hujus mali, quod est Deo non subjici, ut possibilis natura, impossibilis autem beatitudini, erit in patria. Quæ verba si benè penetrentur, omnem difficultatem evacuant, & explicant quomodo etiam timor patriæ respiciat, & fugiat malum, nimirum malum quod est non subjici Deo, ut possibile naturæ humanæ absolutè. Nec propterea timor filialis patriæ est diversæ rationis à timore viæ, quia licet actus distinctos pro diversitate status eliciat, idem tamen actus primarius circa objectum principale remanet, quia semper manet eminentia boni divini, cujus potestate malum infligi potest; quod est casti timoris castissimum & æternum objectum.

Instabis: Timor non respicit solummodò malum possibile quomodocumque, sed ita possibile, ut sit aliquo pacto futurum, vel imminens; nemo enim, ut ait Philosophus 9. Metaph. timet ne cælum ruat, vel aqua ascendat, quavis utrumque absolutè possibile sit. Et certè si ad timorem sufficeret fuga mali, impossibilis quidem statui, sed possibilis naturæ, posset in patria permanere timor servilis, qui licet repugnet beatitudini, est tamen possibilis naturæ secundum se considerata. Atqui Beatis nullum malum futurum imminet, sed est solum possibile naturæ secundum se considerata. Ergo nullus
timor

timor in Beatis perseverat. Et confirmatur: Omnis timor est alicujus mali, malum enim est objectum, à quo specificatur timor: sed in patria nullus est, vel esse potest malum, quia ibi est possessio omnis boni cum securitate perpetuitatis, & æternitatis; unde dicitur Proverb. 1. *Abundantia perfruetur, malum in timore sublato.* Ergo omnis timor longè est à Beatis.

Respondeo solutionem horum omnium compendiosis istis D. Thomæ verbis contineri: *Dicendum, inquit ad 1. quod excluditur à Beatis timor sollicitudinem habens, de malo præcavens, non autem timor securus.* Sollicitudo autem, & cautela est quidem imperfectio timoris viæ, sed non est de essentia timoris, nec subinde manere debet in patria. Quare sufficit, quod malum sit possibile naturæ, & ita possibile, ut nisi summo Deus beneficio illud impediret, futurum evaderet, & impendens. Unde exemplum illud lapsus cœli, vel ascensus aquæ non est ad propositum; licet enim utrumque sit metaphysicè possibile, neutrum tamen est naturæ consentaneum. At verò malum, & defectus est naturæ creatæ, hoc ipso, quod ex nihilo creata est, connaturale. Nec illud quod de timore servili additur, urget; est enim apertum discrimen, quia timor servilis, in quantum servilis, adversatur charitati, nec primariò respicit divinam eminentiam, sicut filialis: unde consummata patriæ charitas timorem servilem penitus excludit. Ex quibus etiam patet ad confirmationem; nam eminentia divina, ut potens infigere malum timeri potest, sub qua quidem consideratione rationem objecti formidandi induit, non in se, sed respectu nostri. Itaque timor in cœlo respicit
malum

malum ut possibile naturæ sibi relictæ, & rursum
altiori modo, quia divinam eminentiam respi-
cit, cujus potestate sibi malum infligi potest.

Præceptum timoris.

Circa donum timoris pauca alia docet D.
Thomas, non omittenda quidem, sed breviter
delibanda. In primis articulo ultimo hujus quæ-
stionis docet, paupertatem spiritus respondere
dono timoris; ex hoc enim, quod aliquis per-
fectè timet Deum, consequens est, quod non
quærat magnificari in seipso per superbiam,
neque etiam quærat magnificari in exteriori-
bus bonis, honoribus scilicet, & divitiis: quo-
rum utrumque pertinet ad paupertatem spiri-
tus secundum quod paupertas spiritus intelligi
potest, vel exinanitio inflati, & superbi spiritus,
ut August. *lib. 1. de serm. Domini in monte, cap. 2.*
& *cap. 9.* exponit; vel secundum quod est ab-
jectio temporalium rerum, quæ fit spiritu, idest
propria voluntate per instinctum Spiritus sancti,
ut Ambrosius *lib. 5. in Luc.* & Hieronym. *super*
Matth. exponunt.

Deinde quoad præceptum timoris docet idem
D. Thomas *quæst. 22. art. 2.* præceptum de timo-
re è variis Scripturæ locis colligi. Nam *Deut. 10.*
dicitur: *Et nunc Israël, quid nunc Deus tuus*
petit à te, nisi ut timeas Dominum Deum tuum?
Et in *Psalm. 33.* *Time Deum omnes sancti ejus.*
Et alibi sæpe. Quibus accedit Patrum sæpe sæ-
pius timoris Dei necessitatem inculcantium au-
thoritas. Et ratio pro timore servili est, quia
licet præceptum timoris non sit positum in lege,
sed sit quoddam præambulum ad legem, sicut
præ-

præceptum spei (sicut enim spe præmiorum ad observantiam præceptorum allicimur , ita timore pœnarum ab eorundem violatione deterremur :) nihilominus tamen sapientes , & Prophetæ intendentes homines in observantia legis stabilire , sicut de spe , ita de timore præcepta condiderunt. Verumtamen quia timere pœnam non est medium ad salutem simpliciter necessarium, sed ex suppositione duritiei cordis humani non valentis nisi intentatis flecti pœnis; fit inde , quod ille , qui per totum vitæ cursum uno Dei amore motus ex sola charitate operaretur, tantum abest quod peccaret, vel præceptum de timore non impleret , quin potius perfectiori modo divinam legem impleret , cum charitas sit finis legis , ex eaque universa lex pendeant & Prophetæ. Præceptum ergo timoris pœnæ non obligat , nisi ex suppositione necessitatis, quando nimirum peccator eo indiget terrore concuti, ut convertatur, & pœniteat. An verò præceptum timoris pœnarum sit distinctum à præceptis cæterarum virtutum , quibus tenetur homo bonum variis in circumstantiis operari , non est certum secundum fidem, nisi in casu præfato , quando nimirum homo , qui amore Dei non ducitur , terrore concuti debet, ut convertatur.

Ratio autem pro timore filiali est, quia timor illè ex charitate nascitur , & charitatem unde oritur , fovet ; profunda enim divinorum reverentia solidæ pietatis radix est & fomentum; unde timor filialis , qui reverentiam Deo exhibet , vocatur à D. Thoma *genus ad dilectionem Dei ; & principium quoddam omnium eorum, quæ in Dei observantur reverentiam.* Quia nimirum

tum dum timor hominum Deo subicit, ipse est veluti inchoata præceptorum omnium observatio: ergo sicut dantur de dilectione Dei præcepta, ita & de timore filiali, sine quibus legem Decalogi nunquam homo, sicut oportet, observabit. An verò præceptum timoris filialis sit à præcepto charitatis distinctum, non est secundum fidem determinatum; probabilius tamen judicamus, esse distinctum, vel saltem importare extensionem præcepti charitatis, ut satis clarè innuere videtur D.Thom. hîc, dicens: *Ex amore sequitur timor filialis, sicut etiam & alia bona opera, quæ ex charitate sunt; & ideo sicut post præceptum charitatis dantur præcepta de aliis actibus virtutum, ita etiam simul dantur præcepta de timore & amore charitatis: sicut etiam in scientiis demonstrativis non sufficit ponere principia prima, nisi etiam ponantur conclusiones, quæ ex his sequuntur, vel proximè, vel remotè. Quare identidem bonus Christianus non solum in motus dilectionis Dei prorumpit, sed etiam offensam Dei, & separationem ab illo super omnia mala timet. Nec verè Deum diligit, nisi oblata occasione peccati, quæ sæpe, & quotidie occurrit, hos sacri timoris & castæ reverentiæ affectus sentiat.*


R E F L E X I O.

Timete Dominum omnes sancti ejus. Venite filii, audite me, timorem Domini docebo vos. Psal.21. Timorem, inquam, castum, qui virtutum custos est, munitio animæ, murus invictus, nullâ hostium machinâ concutiendus; scutum in bello christiano, gladius anceps, omnem
pravam

pravam concupiscentiam excidens ; pietatis parens , arrha salutis. Hoc sacro timore castificantes animas nostras in obedientia charitatis, invenimus lapidem lydium , quo justum capitur experimentum , quantum veræ in nobis virtutis sit.

Hoc sacro timore , nedum nobis beatitudinem comparamus , sed & prægustamus ; nam beatus homo , qui semper est pavidus : unde pulchrè exclamat S. Zeno Veronensis serm. de timore : *O necessarius timor ! qui nihil aliud agit , nisi ut beatos efficiat ; qui timet arte , non casu ; voluntate , non necessitate ; religione , non culpâ : qui Deum metuit , non naturam , sine fine studet timere , ne quid præter Deum , quem diligit , timeat.* Hic timor fundamentum salutis est , & coronis : fundamentum quidem , quia timendo cavebimus ; cavendo salvi erimus : coronis verò , quia timor Domini sanctus permanet in sæculum sæculi ; quando quilibet Beatus , ut loquitur Fulgentius , non timebit formidine criminis , sed robore firmitatis , & firmitate virtutis ; Deique eminentiam reverebitur tranquillitate charitatis. Sicut etgo solum æternum bonum amandum est , ita illo privari timendum est. Et licet humanus timor debilitatem pariat , castus tamen Dei timor animos auget , & vires , quia dum sibi diffidit , totam suam in Dei omnipotentia fiduciam collocat. Unde præclare Gregorius lib. 5. Moral. cap. 12. *In via Dei à timore incipitur , ut ad fortitudinem veniatur. Nam sicut in via sæculi audacia fortitudinem , ita in via Dei audacia debilitatem parit ; & sicut in via sæculi timor debilitatem , ita & in via Dei timor fortitudinem gignit , Salomone attestan*

attestante : In timore Domini fiducia fortitudinis. Quia nimirum mens nostra tantò valentiùs terrores rerum temporalium despicit , quantò se auctori earundem veraciùs per formidinem subdit, qua in timore Domini constituta non invenit extra quod metuat : quia dum recto metu Conditori omnium conjungitur , potestate quadam supra omnia sublevatur.



DISSERTATIO IV.

De charitate.



CHARITAS à Græco *χάρις*, quod significat gratiam, idem est ac amor gratuitus & liberalis , quem Deus infundit in cordibus nostris per Spiritum sanctum. Etsi autem hujus virtutis amore præcipuè teneatur *Theologia mentis & cordis* , hæret tamen , fateor , in tanta, tamque uberi materia calamus, & de illa detrectat scribere , quæ gustu laudari magis debet, quàm exquisito verborum apparatu. Quia ut docent Sancti , amandi artem amandi nescius nec capit , nec docere potest , solus novit expertus. Attamen quia ut monet S. Laurentius Justinian. lib.de casto connub. cap.22. *ipse amor cogitandi materiam ministrat* ; non potest filere Theologia mea, sed in proprio veluti centro constituta eructet verba bona necesse est , ut ex abundantia cordis os loquatur, & rursus institutis

tutis de charitate sermonibus amor amplius accendatur; nam sicut amor cogitationes inspirat & verba, ita cogitatio, & sermo amorem accendunt: in meditatione quippe exardescit ignis; & cor discipulorum ardens erat, dum Veritas in via loquebatur.

CAPVT I.

*Existentia, essentia, & objectum
charitatis exponuntur.*

Charitatem dari, & esse necessariam, nemo inficiatur Christianus, cum in ea totus situs sit Christianismus; sed de charitate, an sit quid creatum, à Deo nobis illapso distinctum, aliqui dubitarunt, contra quos sit

SPECVLATIO I.

Existentia charitatis demonstratur.

Supponendum est primò, charitatem esse habitum productum in anima, quidquid in contrarium sentiat Magister Sententiarum in 1. dist. 17. ubi excellentiâ charitatis ferè raptus arbitratus est, motum dilectionis à nullo habitu creato elici, sed à Spiritu sancto immediatè nobiscum agente produci; & habitualement charitatem nihil aliud esse, quàm ipsammet personam Spiritus sancti intimè cordi præsentem & missione

sione Patris & Filii nobis datam. Verum nostra suppositio est omnino Scripturæ, Patribus, & Conciliis consentanea. Dicitur etiam Rom. 5. *Charitas Dei diffusa est in cordibus nostris per Spiritum sanctum.* Non ergo ipsa est Spiritus sanctus, sed quid creatum à Spiritu sancto diffusum. Et D. August. *lib. de Spirit. & lit. cap. 31.* ait, *quod charitas ex Deo dicitur esse, quia dilectores nos facit; sicut justitia Dei dicitur, quia ejus munere justi sumus: ita charitas nostra dicitur charitas Dei, quia dimanat à Deo, quâ scilicet nos ipsum diligimus, non quâ ipse diligit nos.* Et *lib. de moribus Ecclesia*, ac alibi sæpe ait, charitatem esse virtutem. Hinc Tridentinum *sess. 6. cap. 7.* definit nos justificari per justitiam inhærentem, & quod fides, spes, charitas infunduntur in justificatione. Et *can. 11.* quod charitas nobis inhæret.

Rationem hujus veritatis efficacem tradit D. Thomas, cujus robur sic expenditur: Voluntas non sic movetur à Spiritu sancto ad diligendum Deum, quin ipsa sit causa efficiens hujus dilectionis, cum nihil sit tam voluntarium, quam amor; voluntarium verò omne sit à principio intrinseco: sed ad hoc, ut voluntas efficienter eliciat actum dilectionis, prorsus indiget infusæ alicujus formæ, seu habitus adjumento; nullus siquidem actus potest permanenter, & facile ab aliqua potentia prodire, nisi actus ille fiat connaturalis beneficio alicujus formæ, quæ sit principium actionis, ut patet & in naturalibus, & in artificialibus, & in moralibus: ergo ut voluntas sit causa efficiens dilectionis, in eamque connaturaliter prorumpat, indiget habitus permanentis adjumento, quod sit principium connaturale

tutale supernaturalis dilectionis. Et confirmatur. Actus charitatis totius perfectionis apex, & vitæ spiritualis consummatio, non est imperfectior actibus naturalium facultatum, vel virtutum moralium, nec minùs suaviter in actus suos charitas inclinatur, quàm cæteræ virtutes, sed longè magis in ipsos inclinatur, & delectabiliùs operatur; amor enim per se convenit inclinationi per se, convenit suavitas & delectatio: ergo ut actus dilectionis aliis virtutum actibus perfectione non cedat, utque faciliè, & veluti sponte, & connaturaliter à voluntate procedat, debet voluntati adjici principium connaturale hujusmodi dilectionis, cum actus ille per naturam voluntatis non possit dici connaturalis, cum ejus facultatem naturalem excedat. Ergo sicut intellectui infundit Deus fidem, quâ credimus; ita voluntati charitatem, quâ diligamus. Et hac de causa dicitur Deus disponere omnia suaviter, quia dum res ad certos fines permoveret, illis simul indit formas, quibus ad fines præstitutos & suaviter tendant, & feliciter perveniant.

Supponendum secundò, charitatem esse virtutem specialem ab aliis distinctam. Ratio eruitur ex D. Thoma *quest. 23. art. 1.* Quia cum ratio virtutis consistat in attingentia regulæ humanorum actuum, quâ actiones hominum mesurantur, & aliunde charitas omnium maximè, & proximè attingat supremam regulam, nempe Deum, cui non conjungit, & voluntatem longè nobiliori modo, quàm virtutes morales rectam efficiat, manifestè sequitur, charitatem esse virtutem, & quidem specialem; quia ut discurret S. Thomas *art. 4.* sicut habitus ab objectis formalibus speciem sortiuntur, ita per diversitatem

objecti formalis distinguuntur: Charitas autem respicit speciale objectum, scilicet specialem rationem boni, nimirum bonum divinum in quantum est beatitudinis objectum, ut ait D. Thomas. Quorum verborum sensus non est, rationem boni, ut condistinctam ab aliis attributis, esse objectum charitatis, vel bonum divinum, quatenus Sanctos beat, seu prout est beatitudo objectiva; vel Deum sub ea ratione esse objectum charitatis, quâ est objectum beatitudinis: non est, inquam, sensus legitimus verborum S. Thomæ, ut opinatus est Scotus, inde hujus propositionis carpendæ occasionem nactus; sed germanus sensus est, quod bonum divinum, prout continet in se rationem omnem bonitatis cognoscibilis, non solum lumine naturali, sed etiam luminæ gloriæ, & visione beata, quâ cognoscimus Deum sicuti est, esse objectum charitatis. Itaque non merces, & beatitudo futura, quam respicit spes, est objectum charitatis, quâ ut ait D. Thomas art. 5. ad 2. *diligitur Deus propter seipsum*; sed est divina bonitas, non qualiscumque, sed qualis cognoscitur à Beatis per visionem beatam.

Scio, quidem; Sanctos Patres interdum subindicare, charitatem non esse virtutem specialem ab aliis distinctam, sed esse unicam virtutem, ut cum Hieronymus dicit, quod brevis definitio virtutum est charitas, quâ diligitur Deus, & proximus; ut etiam cum ab Augustino *lib. de morib. Eccles.* definitur virtus ordo amoris; & *lib. de perfect. just.* ait, *quod generalis jussio est: Diliges.* Attamen illud reverà non intendunt Patres, sed volunt duntaxat virtutes omnes ita à charitate pendere, ut sine illa nec rationem vir-
rutis

tutis simpliciter habeant, nec nomen mereantur. Sicut licet in definitione virtutum moralium ponatur prudentia, ut patet per Philosophum in 6. *Ethic.* quia nimirum bonitas moralis tota quanta est, sine prudentia corrumpitur; non tamen propterea prudentia unica virtus moralis asseritur, sed omnium regula, omnium lux & dux esse affirmatur. Ita similiter, quia charitas habet pro objecto ultimum finem humanæ vitæ, & omnibus actibus moralibus imperat, eosque ad finem, sine quo non rectè vivitur, dirigit, virtus unica dicitur, non quod omnes eliciat actus humanos, sed quia omnes ordinat, omnes perficit, omnes veluti vivificat, dum ad Deum, apud quem est fons vitæ, quique est vita animæ, refert. Et quia ad charitatem sicut ad finem reducuntur omnia præcepta, juxta illud 1. Timoth. 1. *finis præcepti charitatis*; idcirco *jussio generalis* ab Augustino nominatur. Denique quia charitas facit hominem simpliciter bonum, charitas alios cæterarum virtutum actus veluti effusa unctione suaves efficit, & faciles; charitas est fons omnis meriti essentialis, charitas est virtutum omnium forma, charitas est vinculum perfectionis connectens nos cum ultimo fine, & quadantenus unica virtus nominatur, de cujus perfectione, de virtutumque aliarum ab ea dependentia satis, superque superius disputavimus. An verò sit perfectior omni substantia creata & creabili, in materia de gratia examinabitur.

Supponendum est tertio S. Doctorem q. 24. disputare de subjecto charitatis. Verum sub hoc titulo agit etiam D. Thomas de causa efficiente, augmento, & diminutione illius; quia cum vol

luntas non sit subiectum gratiæ secundum potentiam naturalem, sed obedientialem, non debuit Doctor oculatissimus charitatis in potentia obedientiali receptionem explicare, prætermissa ejusdem infusione à causa efficiente supernaturali. Et quia in subiecto augetur, minuitur, & deperditur charitas; ideo de augmento, diminutione, & amissione charitatis optimè sub eodem titulo differendum esse judicavit. Nos facilioris explicationis gratiâ ea singula distinguemus.

Supponendum ergo quartò, solam voluntatem esse subiectum charitatis. Quia ut discurret D.Thomas *art.1.* charitas habet pro objecto bonum divinum, quod solo intellectu cognoscitur: ergo in illa facultate nata est residere charitas, cujus objectum est bonum apprehensibile per intellectum. Talis autem est voluntas, quæ in hoc distinguitur ab appetitu sensitivo, cujus objectum est bonum per sensum apprehensum. Addit S.Præceptor *solut. ad 3.* quod licet liberum arbitrium non sit alia potentia à voluntate, tamen charitas non est in voluntate secundum rationem liberi arbitrii, cujus actus est eligere: electio enim est eorum, quæ sunt ad finem; voluntas autem est ipsius finis, ut dicitur *in 3. Ethic. cap.2.* Unde charitas, cujus objectum est finis ultimus, magis debet dici inesse voluntati, quàm libero arbitrio. Quam doctrinam benè retineas pervelim, ut intelligas, & explices, quomodo charitas patriæ, & viæ non differant specie: quia nimirum ad rationem charitatis, cujus objectum est ultimus finis, per accidens est, quod actus illius à libero arbitrio, quod non est ejus subiectum, exerceatur; sed duntaxat, quod à

à voluntate, quæ libertatis, & necessitatis peræquè capax est, procedat.

Et licet interdum viri sancti charitate ferventes, divinaque patientes & gustantes, ex suavi charitatis inundantis imperu motus amoris, delectationis, & lætitiæ in appetitu sensitivo experiantur, dicantque identidem cum Propheta: *Cor meum, & caro mea* (id est appetitus sensitivus) *exultaverunt in Deum vivum.* Et iterum: *Sitivit in te anima, quàm multipliciter tibi & caro mea.* Licet, inquam, hæc ita sint, & utinam tibi, mihiq; experiri misericorditer detur; attamen nullus propterea refuit in appetitum habitus charitatis, quia suaves illæ, & sensibiles experientiæ sufficienter ex abundantia charitatis in voluntate existentis, & in appetitum redundantis dimanant; assolet enim ex intentione & intensiōe amoris erga aliquod objectum consequi passio, quæ majoris est, vehementiorisque voluntatis argumentum. Ex sympathia etiam, & facultatum omnium colligatione à superioribus viribus in inferiores, imò & in ipsum corpus refluere solet copia dilectionis, & ubertas desiderii.

Dices: In sensibus internis ponuntur habitus deservientes intellectualibus, ut facilius per conversionem ad phantasmata cognoscantur intelligibilia, ut ex D. Thoma r.p. *quest. 89. art. 5.* & alibi non rarò colligitur: quidni similiter in appetitu inferiori ponetur quædam expressio charitatis in voluntate existentis, illi deserviens, & passiones actus amoris impedire, vel retardare nitentes refrenans.

Respondeo, habitum in appetitu sensitivo admissum, nec posse dici charitatem, cùm obje-

Actum charitatis attingere nequeat; nec esse necessarium, sed prorsus inutilem, unde nullum in appetitu existere certum est. Ad cujus evidentiam & discrimen inter sensus internos, & appetitum percipiendum, observandum est cum D. Thoma, quæst. 26. de verit. art. 6. ad 2. *quod non similiter ordinantur appetitiva vires sicut apprehensiva: nam intellectus noster accipit à sensu; unde operatio intellectus esse non potest, nisi præexistente alia operatione sensus: voluntas autem non accipit ab appetitu inferiori, sed magis ipsum movet: & ideo non oportet, quod actum voluntatis precedat passio inferioris appetitus. Quare licet sit necessarius aliquis habitus in sensu interno, non tamen in appetitu, qui sufficienter domatur per habitus temperantiæ, & fortitudinis: atque adeo sicut non debet poni iustitia in appetitu sensitivo ad refræmandum motus contra iustitiam; ita nec habitus charitatis ad castigandos motus contra charitatem insurgentes. Quorum omnium radix est, quia sicut per habitus fortitudinis, & temperantiæ subjugatur appetitus, & voluntati subditur; ita etiam habitibus in voluntate existentibus subijcitur.*

Ex his apertissimè demonstrata manet existentia charitatis; si enim, ut in prima suppositione ostendimus, charitas est quid creatum, distinctum & diffusum à Spiritu sancto; si illud creatum sit quid speciale à cæteris virtutibus distinctum, ut in secunda suppositione demonstravimus; denique si illud speciale sit in voluntate, tanquam subjecto receptum, manifestum est existere specialem habitum, quem charitatem nominamus.

R E F L E X I O.

Cùm veniet filius hominis, putas fidem inveniet in terra? Sed si fidem non inveniet, quantò minus charitatem? Possè existere, & in sanctis existere charitatem, demonstravit superior speculatio: at in nobis existere non ostendit. Contra ejus existentiam nulla militant argumenta, nisi à Christianorum vita, moribusque petantur. Charitas, teste Augustino, secedit à se, excedit à sensibus, ut se non sentiat, quæ Deum sentit, imò quodammodo se sibi furatur, & à se labitur, ut se totam immergat in Deum. Ubinam porrò Christianorum cœleste illud gluten animum Deo jungens, vinculum illud perfectionis divinis nos connectens existit, cùm videamus quæ sua sunt omnes quærere, & creaturis indivulso amore adhærere? Charitas divina, & cœlestia semper animo agitat, quia quæ amamus, libenter animo versamus, juxta illud Laurentii Justin. tract. de char. cap. i. *Vis nosse quid amas, attende quid cogitas?* Quid autem & mente revolvunt, & sermonibus ventilant Christiani, quibus divinorum meditatio craci est, cœlestium colloquutio fastidio non ferendo? Ergo non eis inest divina charitas, sed terrena cupiditas; quia ut optimè ait Augustinus in Psalm. 121. *Habet omnis amor vim suam, nec potest vacare amor in anima amanti: necesse est ut ducat; sed vis nosse qualis amor sit, vide quò ducat.* Cùm igitur in terram cogitatione homines ferantur, duci eos cupiditate, non Dei charitate necesse est.

Eac ergo; Lector, ut in te regnet charitas vir-

tutum gemina, charismatum divinorum pretiosissimum, quam si habueris vel solam, dives es; quâ si solâ carueris, miser, & teste Apostolo, nihil es. Charitatem quære, charitati incumbetorum te dilectioni permitte, quâ nihil justius, nihil utilius, nihil suavius. Quid tam æquum, quàm ut per dilectionem rependas quod per dilectionem datum est, & tantum amatorem tuum, qui te prior dilexit, redames tantillus & talis? Vide quàm sit pura amatoris tui dilectio. *Homo*, inquit Laurentius Justin. lib. de casto conn. cap. 8. *ut fruatur dilecto, diligit; Deus verò, ut dilectus diligentem possideat.* Seu, ut ait Hilarius in Psalm. 2. *Amari se à nobis expetit Deus, ut digni beatitudinis sue, ac bonitatis sue munere per meritum amoris sui judicemur.* Ergo illi, si potes, denega amorem tuum, qui amorem tuum à te propter te petit. Vides ergo, quàm sit utilis dilectio charitatis. Sed, inquis, corpus meum castigandum, & in servitutem redigendum petit amor Dei, bona terrena & floccifacere præcipit, & pauperibus erogare: ergo non utilis, sed noxia est dilectio. Cerne quàm fallaris. Petit amor, ut Deo reddas, tibi cum fœnore, quæ dederis, restituturo. Præclare, & opportunè idem Laurent. tract. de charitate, cap. 9. *Dei amator mercator est optimus; dat quod non potest retinere, ut recipiat quod non potest amittere.* Nec timeas duram invenire in charitate servitutem, quia eâ diliges quod jubetur: nam si tecum Deus facit suavitatem, si propitius tibi inspirat boni delectationem, atque ut apertius explicem, si tibi donaverit charitatem, non solum pro Deo contemnes delectationes cæteras, sed etiam pro illo quilibet perferes passiones.

nes. Denique ut ad charitatem tibi cum Dei gratia asciscendam moveare, hanc veridicam Augustini lib. 22. contra Faust. cap. 3. menti tuæ, cordique fige sententiam: Si non amas, time ne pereas; si amas, time ne displiceas.

SPECVLATIO II.

Per charitatem veram, & strictam cum Deo amicitiam inimus.

Hanc assertionem, quâ status Christianismi, qui in charitate situs est, super omne quodvis creatum & creabile immensum attollitur, ita veram arbitror & constantem, ut sententiam Durandi in 4. dist. 49. quest. 4. opinantis hominis ad Deum non esse, nec esse posse propriè dictam amicitiam, plusquam temerariam, & hæresi proximam pronuntiare nemo jure merito inficias eat, cum expressis, & millies impressis, ac iteratis Scripturæ, & Patrum testimoniis contradicat. Sapient. 1. *Infinitus thesaurus est hominibus, quo qui nsi sunt, participes facti sunt amicitia Dei.* Psalm. 138. *Nimis honorati sunt amici tui Deus.* Joan. 13. *Iam non dicam vos servos, sed amicos.* Et totus Cantici Canticorum liber quid aliud est, quàm continuus sacrarum flammarum Deum inter, & animam-castam-rogus? Quare inter viros sanctos non pauci speciali & honorifica amici Dei prærogativâ, & nomenclaturâ insigniti sunt; ut Moses Exodi 33. Abraham Iudic. 3. & Isaiâ 41. & Iacobi 2. Joannes Baptista Ioan. 3. & Joannes Evangelista cre-

brò. Unde D. Hieronym. super caput 7. Michæ ait : *Si vis verâ amicitia delectari , esto amicus Dei , sicut Moyses , qui loquebatur Deo quasi amicus ad amicum : esto amicus ut Apostoli , ad quos Salvator ait : iam non dicam vos servos , sed amicos.* Quod si aliquando viri perversi hoc nomine appellantur, ut cùm *Marth. 22.* non habenti vestem nuptialem, dicitur : *Amice quomodo huc intrasti non habens vestem nuptialem ?* & cùm *cap. 26.* dicitur Judæ proditori : *Amice ad quid venisti ?* Tunc ad demonstrandum comitatis , & affabilitatis argumentum ac gratificandi studium , vel ad significandam sinceram Christi erga impios benevolentiam , vel ad perversitatem & duritiem contundendam, molliendâque, communi modo loquendi nomen illud prolatum est : sed alii viri sancti præfati, speciali ratione nomine amici Dei insigniti sunt, quia ut loquitur Scriptura, viri erant secundùm cor Dei ; unde respectu eorum nomen illud in rigore intelligendum est juxta tritam Augustini regulam , quam *lib. 3. de doctrina Christ. cap. 11. & 12.* tradit.

Probatum ratione D. Thomæ paululum illustrata : Amicitia nihil est aliud , quàm amor benevolentia mutuus super aliqua amicorum communicatione fundatus : unde tres ad amicitiam conditiones exiguntur. Prima , ut sit amor benevolentia bonum amici propter amicum exoptans, nec propriam utilitatem amore concupiscentia quærens. Secunda est, ut amor sit mutuus, & reciproca benevolentia, seu amatio , & redamatio. Tertia, ut sit bonorum communicatio, & si desunt bona, sit saltem cordium communio. Atqui charitati triplex hæc condi-

tio

tiō convenit ; in primis enim per charitatem Deum amamus propter ipsum amore benevolentiae , quo bonum divinum volumus , & ipsi Deo , quatenus de infinitis perfectionibus Deo gratulamur & congaudemus , & quatenus eternam Dei gloriam , honorem , obedientiam , nominis exaltationem optamus , procuramus , & pro virili propagamus , sicut econtrā de illatis Deo injuriis nostrūm , aliorumque offensis dolemus , tristamur , & contra inhonorantes , zelo tabescentes insurgimus. Secundō charitas est etiam amor mutuus , quia ut dicitur Proverb. 8. *Ego diligentes me diligo.* Et Joan. 14. *Qui diligit me , diligitur à Patre meo , & ego diligam eum.* Et ratio est , quia ex una parte justī Deum diligentes , cor , & omnia sua Deo præbent ; ex alia verō Deus etiam seipsum tradit justo , ad eum venit , mansionem in ipso facit , seipsum cognitione , & amore fruendum ineffabili experientiā , quam soli sciunt qui sentiunt , præbet. Et deinde innumera justo beneficia non tam largitur quā prodigit , & profundit. Nam gratiam tribuit , ut illum in consortium suæ naturæ vocet , & charitatem habitualement dat , quæ inter bona primatum tenet ; nam posse diligere Deum gratia gratiarum , favor favorum est , quia secum fert indicia præcipua divinæ erga justum dilectionis , quæ quos amat , sui facit amantes , ut aliās dum de amore Dei , fusè exposuimus. Quid plura ? Per charitatem Deus nos in seipsum mutat , & transformat , secundū illud : *Qui adheret Deo , unus spiritus est cum illo.* Deinde amatores suos castis deliciis , & immaculatis voluptatibus perfundit , quia dum apponit erga hominem cor suum , dum suas delicias ponit

esse cum filiis hominum, illam quam mundus dare non potest, pacem infundit; fructus enim charitatis sunt, teste Apostolo, gaudium & pax in Spiritu sancto. Ex quibus patet, quomodo tertia etiam conditio charitati competat, nimirum communicatio bonorum; & præter jamdicta, per charitatem meremur etiam futuram in patria Dei communicationem, quâ Deo sicuti est viso in æternum perfruemur, ut amicitia cum Deo inita sit firma, sit immobilis, sit sempiterna; quod ad rationem veræ amicitiae omninò exigitur, quia ut ait Hieronym. epist. 41. ad Rustic. *Amicitia, qua desinere potest, vera nunquam fuit.* Addunt aliqui quartam conditionem, cujus meminit Philosophus 8. *Eth. cap. 2.* ut scilicet amor mutuus non sit latens; sed hujus non meminit D. Thomas, quia ista non multum differt à secunda conditione; amor enim non censetur mutuus si lateat, sique foras non erumpat ardorem, & assimiletur igni, qui nunquam ita occluditur, quin vel luceat, vel urat, vel scintillet. Quomodo autem amor Dei benevolus non lateat justos, plus docet ipsos experientia, quàm scientia: & licet in hac vita certi de gratia esse non possint, plures tamen illius conjecturas, quæ ad amicitiam sufficiunt, habent, cujus præcipua, & palmaris est ipse amor ad Deum, quem sentiunt; cum Deus diligentes se diligat, & amor Dei ad homines, eosdem Dei reddat amantes.

Est satis objectis.

Dices: Ubi amicitia est, ibi inæqualitas non est; amicitia namque secundum Hieronym. pares;

pares aut facit, aut invenit; unde profluxit trium proloquium: Non bene conveniunt, neque in una sede morantur majestas & amor. Atque inter Deum & homines æqualitas nec est, nec esse potest: ergo nec vera inter ipsos amicitia iniri.

Respondeo inter amicos non requiri æqualitatem, sed proportionem, qualis inter filium & patrem, inter sponsam & maritum, tametsi statu & conditione superiorem, invenitur. Quia nimirum amicitia non tam personæ dignitatem, vel vilitatem attendit, quam ejus amorem; illum solum quærit, illum amat, illo contentus est. Et certè Deus veram & sinceram sui cum Justis amicitiam demonstraturus, omnibus gratiarum, & gloriæ ornamentis naturam nostram auxit, ut eam nedum faceret pulchram, sed etiam divitem; utque immensam, quæ Deum inter & nos est, inæqualitatem quadantenus compensaret, viles creaturas supra modum attollens, ad ordinem divinum eas non solum gratiâ sanctificante, sed etiam unione hypostaticâ evexit. Sicut enim 1. Mach. 10. Alexander amicitiam cum Jonatha inire avens, cum ad honorum omnium fastigia provexit, unde ei dictum est: *Aptus es, ut sis amicus noster, & nunc constituimus te hodie summum sacerdotem, ut amicus voceris Regis. Et misit ei purpuram & coronam auream.* Pari modo Deus naturam nostram summè diligens, & homines naturâ viles, & peccato viliores suâ amicitia dignari optans, & æqualitatem ad amicitiam necessariam constituere volens, majestatem suam inclinare ad nos, & vilitatem nostram attollere ad se decrevit, ut Deum quâmlibet infinitum, amare vilitas nostra

non

non erubesceret, postquam sic Deus dilexit mundum, ut Deus homo, & homo Deus factus. esse verè, catholicèque dicatur.

Et ut patesceret, quod sicut perfectio Dei omnes creaturarum, creabiliumque perfectionum gradus supercomprehendit, & ultra eminet; ita amicitia ipsius omnes sinceræ amicitiae gradus præcointinet, omnes omninò titulos, quibus in humanis amicitia significatur, sibi voluit Deus imponi, ut ad amicitiam secum ineundam, omnium quàmlibet invitatorum hominum corda invitaret. Unde in scripturis Deus paterfamilias, Justi cives & domestici Dei appellantur; Deus sponsus, animæ sponsæ nominantur; Christus etiam Sanctos voluntati divinæ consonos, & obsequentes patres suos, matres, fratres discretissimè dixit. Solidè tamen observavit Cajetanus, magis congruentem ad exprimendam amicitiam nomenclaturam, ex denominatione patris & filii desumi; quia per eam & consortium naturæ divinæ, & reverentia Deo debita, & obligatio aliorum diligendorum aptissimè significantur. Communicatio quidem divinæ naturæ traditur 1. Joan. 3. *Videte qualem charitatem dedit nobis Pater, ut filii Dei nominemur, & simus.* Reverentia verò Malach. 1. *Si ergo Pater ego sum, ubi honor meus?* Fundamentum verò & obligatio diligendi alios tanquam fratres, 1. Petr. 1. *Diligite attentius, renati non ex semine corruptibili, sed incorruptibili per verbum Dei vivi.* Unde in Oratione Dominica Deum non modò Patrem, sed Patrem nostrum pluralitatis vocabulo appellare Veritas jussit, ut nimirum doceamur (observatio est Catech. Romani part. 4. *sum. 14.*) ex dono, ac jure divinæ adoptionis consequi.

consequi necessariò, ut fratres sint fideles, sequere fraternè amare debeant; & notante Chrysostomo discamus, Deum libenter Christianum audire non solùm pro se, sed pro altero deprecantem: quòd pro se orare naturæ est, pro altero gratiæ; pro se necessitas cogit, pro altero fraternæ charitas hortatur. Jucundior, porrò est Deo oratio, quam fraterna charitas commendat, quàm ea quam necessitas rei pronuntiat.

Instabis: Benevolentia non potest esse ad illum, cui nihil acquiri potest; benevolentiam enim amico bona benè volumus dum non habet, & gaudemus cum acquirit. Sed Deo nec advenire bonum potest, quod non habebit, nec auferri quod habet: ergo ad Deum benevolentia, & subinde cum Deo amicitia esse non potest.

Respondeo, patere ex dictis, nos Deo bona velle, & interna per gratulationem, & externa per laudem & honorem, quem qui diligit, totis conatibus impendit.

Urgebis, Justi appellantur, & verè sunt servi Dei: sed inter servum & dominum iniri nequit perfecta amicitia ob conditionis inæqualitatem: ergo nec inter Deum & hominem.

Respondeo, non esse inconveniens homines alio titulo servos, alio Dei amicos esse & appellari; servi etenim sunt, quia creaturæ supremo Domino subditæ; sed amici itidem sunt, quia divinis charismatibus aucti ad consortium divinæ naturæ, & adoptionem filiorum Dei per gratiam evehuntur. Quam quidem filii Dei dignitatem licet creatione, & Dei gubernatione sortiamur, quatenus nos Deus ad imaginem suam, quam cæteris animantibus non imperti-

vit,

vit, creavit; & quatenus prospiciendo, & nostræ utilitati consulendo, præcipuo quodam jure, & providentiæ modo patriam nobis præstat charitatem: attamen singularem, & mirabilem in modum per Incarnationem naturâ servi, filii Dei adoptione evasimus. Nam, ut ait Joannes, dedit eis potestatem filios Dei fieri, & ex Deo nati sunt. Unde & Baptisinus, quod primum redemptionis pignus, primum Incarnati Verbi monumentum est, sacramentum regenerationis dicitur; quo, teste Principe Apostolorum; renati, non ex semine corruptibili, sed incorruptibili, per verbum Dei vivi Spiritum sanctum accepimus, non spiritum servitutis iterum in timore, sed spiritum adoptionis filiorum, in quo clamamus: Abba, Pater. Quæ cum ita sint, cogita, Lector, quem in locum te summa Dei benignitas extulerit (pia est Catechismi laudati ponderatio,) qui non ut servum ad dominum adire invitum, ac timidum; sed ut ad patrem filium voluntarium, securumque confugere jussit. Quâ in memoria & cogitatione, quo vicissim studio & pietate tibi agendum, tibi que orandum sit, considera. Danda certè tibi est opera, ut te talem præbeas, qualem esse decet Dei filium, idest ut oratio, & actiones tuæ indignæ non sint divino genere, quo te benignissimus Dominus dignatus est.

Insistes: In humanis non assolet esse vera, & stricta amicitia inter servum & Dominum ob adductam conditionis inæqualitatem, quæ major est inter Deum & homines: ergo nulla est inter Deum & homines amicitia.

Respondeo magnum interesse discrimen inter servos Dei & hominum, quia ut præclare observat

observat D. Thomas *in cap. 1. epist. ad Rom. lect. 1.* quo Deus magis sibi aliquem subjicit, eo majus illi bonum vult, majusque confert, quia & homo subjectione ad Deum perficitur; & fini, in quo ultima beatitudo sita est, unitur: Domini verò creati non quærunt bonum servorum, quos sibi subdunt, sed uni suæ utilitati per eorum ministerium consulunt: amicitia autem amici bonum quærit, nec proprio studet emolumento.

Replicabis: Atqui etiam Deus omnia propter semetipsum operatur, ut dicitur *Proverb. 16.* & gloriam suam, quam alteri non dabit, ubique quærit: ergo si propterea inter Dominum & servum creatum non datur vera amicitia, quia dominus non servi, sed sui bonum inquit; nulla etiam Deum inter, & hominem amicitia invenietur, quæ teste Philosopho 8. *Eth. cap. 3.* amici solius solum bonum quærit.

Respondeo hoc argumentum tomo 1. dum de voluntate Dei, operosè à nobis fuisse tractatum, ibidemque demonstratum, quod licet Deus omnia propter semetipsum ut finem ultimum, ut par est, operetur, quia id divina postulat sanctitas; non tamen propterea in Deo est amor concupiscentiæ, sed amicitia; quia etsi bonum, quod nobis vult, ad se referat, non tamen illud ad se refert ut melior efficiatur, aut perfectior, ditiorque evadat; sed ut nos meliores reddat, & suæ bonitatis participes: nam ut dicitur *Job 22.* *Quid prodest Deo, si justus fueris, aut quid ei confert, si immaculata fuerit vita tua?* Ordo ergo bonorum, quæ Deus confert, quæ in ultimum finem referuntur, non tollit, sed sanctificat rationem amicitia. Vide plura loco citato, ubi instantias contra hanc doctrinam fieri solitas occupavimus.

Insurgens adhuc : Ad amicitiam requiritur non solum amor benevolentiae , sed etiam mutua amatio , & reclusio : atqui charitas non importat essentialiter mutuum illum , & reciprocum amorem : ergo non est essentialiter amicitia inter Deum , & justum. Probatur minor : Vera , & sincera charitas , non quaerens quae sua sunt , sed quae Dei , est ita comparata , ut si per impossibile Deus amantem se non diligeret , nec amoris sui divini ardorem explicaret , nec bona ulla amanti communicaret ; non tamen Deum diligere desineret , & diceret : Etiam si Deus me odio haberet , ego eum diligerem , quia ille faceret quod justum est , cui me libenter accommodarem : quia nimirum charitas est quaedam participatio divinae voluntatis , subindeque in ea inclinatur , quae Deus vult , & eo modo , quo vult : unde vir justus charitate ornatus potest hunc elicere actum : Licet sim reprobis , & charitate velit me Deus aeternum privare , illum tamen amo , & toto corde diligo. Ergo charitas non importat essentialiter reciprocum mutui amoris affectum.

Respondeo , ad veritatem nostrae assertionis satis esse , quod charitas secundum statum conaturalē Dei amorem supponat , & mutuam benevolentiam exigat. Quod quidem verum esse manifestum est ; tum quia charitas ipsa secum defert signum amoris Dei , cum non nisi ex amore Dei , & dono Spiritus sancti diffundatur in cordibus nostris : tum quia charitas ex sua natura supponit gratiam , ex eaque veluti passio dimanat : & licet possit actus charitatis sine gratia habituali elici. non tamen sine actuali Dei auxilio ; unde necessario supponit amorem Dei

Dei gratiam habitualement, vel saltem actualem liberaliter infundentis ; subindeque licet aliis amoribus accidentaria esset redamatio , foret tamen charitati necessaria ; quia charitas ex amore infunditur , neque aliter haberi potest, quia nunquam Deum prius diligere possumus, sed amantem Deum redamando sequimur , qui nisi vim diligendi se amore suo daret , eum diligere non possemus. An verò ex suppositione , quod Deus justum , & charitate præditum non diligeret , charitas suis rationibus non studens Deum adhuc diligeret , est casus chimæricus, cujus solutio cum sit inanis , quæ omittatur à Theologo seriis occupato , dignissima est. Maximè quia ille casus implicat in adjecto , & seipsum destruit : si enim Deus charitatem sui non diligeret , non esset Deus , nec amaret bonum ; subindeque tunc charitas Deum non diligere deberet. Et quanvis charitas non diligat Deum , quia amatur à Deo , sed quia Deus in se amabilis est ; essentialiter tamen supponit se amari à Deo , seque placere Deo ; unde si Deus per impossibile non amaret diligentem se , signum esset , quod dilectio charitatis Deo non placeret , subindeque ab amando charitas cessaret. Sed de his subtilitatibus satis , & plusquam satis.

Perstites : Ratio amicitiae non solum non est de essentia charitatis , sed nec etiam connaturalis proprietas illius : ergo responsio nostra undequaque nulla est. Probatum subsumptum : Illud non est proprietas charitatis, quod sine charitate haberi potest ; proprietas enim convenit omni, & soli, & semper : sed sine charitate iniri potest amicitia cum Deo ; nam in statu naturæ puræ,

si daretur, Deus conferret innumera creaturis rationalibus beneficia, & homo acceptorum bonorum memorem se præbens, gratias referre Deo, illum colere & amare posset, & deberet; qui amor in communicatione bonorum naturalium, ac etiam virtutum moralium, quibus felicitatem naturalem consequeretur, fundatus rationem amicitiae obtineret, quibus Deo in ordine naturali amanti responderet. Præsertim quia Deus potuisset in illo statu multis eum sine injuria orbare naturalibus bonis, permittendo ut in cæcitatem, mortem, aliosque defectus laboreretur; unde in se specialia amoris signa persentens, posset amanti amorem rependere vero amicitiae fœdere.

Respondeo, præter charitatem nullam posse dari amicitiam naturalem; ita enim expressè docet D.Thomas *in 3. dist. 27. quæst. 2. art. 2. ad 4.* ubi loquens de amore naturali Dei, ait quod ad amicitiam non pertingit, quæ facit amicos convenire, & in omnibus communicare; sed oportet superaddi charitatem. Unde eruitur ratio hujus veritatis: Ad veram amicitiam requiritur, si non æqualitas, saltem proportio, & convenientia in natura, & communicatio bonorum amici, non qualiscumque, sed specialium donorum largitio, & secretiorum arcanorum patefactio; neque enim amicus censetur, qui non est alteri magno familiaritatis usu devinctus: videmus enim in humanis illos duntaxat amicos Regis appellari, non qui beneficia omnibus subditis communia recipiunt, sed qui specialibus muneribus, singularis honoris gradu, familiariori consuetudine, aliisque præcipuæ benevolentiae pignoribus honorantur. Sed in ordine
merè

merè naturali homo bonis duntaxat creaturis omnibus communibus per creationem, & gubernationem gauderet, quæ forent bonis, malisve promiscuè concessa; in illo etiam ordine non daretur formalis participatio divinæ naturæ, quæ habetur per gratiam; secreta etiam supernaturalia, & cœlestia Deus statui illi non expanderet. Ergo in illo statu non esset amicitia cum Deo, quæ importat amorem gratuitum, & specialem: ille verò status communi tantum, nulloque privato jure utens, nulla prærogativa, nullo singularis benevolentiae privilegio donaretur. Quare amicitia cum Deo est status gratiæ, seu Christianismi character; in illo enim familiarem habemus accessum ad Patrem per Jesum Christum Dominum nostrum. Quid enim mirum, si post incarnationem Verbi amor noster amoris Dei arctò amicitiae vinculo jungatur, postquam natura nostra divinæ admirabili consortio sociata est? Certè sicut teste Augustino *lib. 13. de Trinit. capit. 10.* nullum signum divini amoris manifestius esse potest, quam quod Deus carnis consortium iniret: ita nullus ad familiarem amicitiam cum Deo ineundam aditus aptior, quam per Christum Dominum, qui ex magno Domino, & laudabili nimis, parvus & amabilis nimis factus est. Et quavis pro donis naturalibus homo Deum colere, & amare teneretur; hic tamen amor amicitia non esset, quia specialis amoris signa non sunt dona etiam impiis communia, quæ per causas naturales juxta generalis providentiæ leges confert, vel aufert Deus.

Dices demùm: Charitas est virtus specialis, ut initio supposuimus: sed amicitia non est virtus

virtus specialis , ut patet per Philosophum 8. *Ethic. cap.1.* Ergo charitas non est amicitia.

Respondeo verbis D. Thomæ art.3. ad 1. *Dicendum* , quod Philosophus in 8. *Eth.* non negat amicitiam esse virtutum , sed dicit quod est virtus , vel cum virtute. Posset enim dici , quod est virtus moralis circa operationes , quæ sunt ad alium ; sub alia tamen ratione quàm iustitia. Nam iustitia est circa operationes , quæ sunt ad alium sub ratione debiti legalis ; amicitia autem sub ratione alicujus debiti amicabilis & moralis , vel magis sub ratione beneficii gratuiti , ut patet per Philosophum in 8. *Ethic.* Potest tamen dici , quod non est virtus ab aliis distincta : Non enim habet rationem laudabilis & honesti , nisi ex objecto , secundum scilicet quod fundatur super honestatem virtutum. Quod patet ex hoc , quod non qualibet amicitia habet rationem laudabilis & honesti , sicut patet in amicitia delectabilis & utilis. Unde amicitia virtuosu magis est aliquid consequens ad virtutem , quàm sit virtus. Nec est simile de charitate , quæ non fundatur principaliter super virtutem humanam , sed super virtutem divinam.

Hæc D. Thomas. Ex quibus patet primò , quod licet amicitia humana non sit virtus , bene tamen charitas , quia habet objectum divinum , scilicet Dei bonitatem propter se dilectam. Patet secundò S. Doctorem non decidere , an amicitia humana sit virtus specialis , sed utriusque sententiæ firmamenta protulisse. Hæc de causa Thomistæ inter se dissentiant , aliis cum Paludano affirmantibus , esse specialem virtutem , aliis cum Capreolo & Cajetano negantibus. Placeat utriusque sententiæ fundamenta producere , & breviter urgere.

In primis, amicitiam humanam esse virtutem specialem, tradit D. Thomas 8. Ethic. lect. 1. *Amicitia*, inquit, est quadam virtus, in quantum scilicet est habitus electivus: & reducitur ad genus iustitiæ, in quantum exhibet proportionatè. Ratio est: Tunc admittenda est virtus specialis, quando assignatur speciale objectum formale bonum, & specialis difficultas speranda: sed objectum amicitiae est speciale bonum distinctum ab objectis aliarum virtutum, scilicet bonum amici formaliter, seu debitum morale amicabile; est etiam specialis difficultas superanda, nam ad eam voluntas non est ex natura sua determinata, sed duntaxat ad proprii suppositi bonum; & reverà non levis difficultas est amare aliquem propter ipsum, nullo inde proprio emolumento expectato; unde specialis habitus ad eam evincendam adjuvamento opus est. Maximè quia potest esse, & sæpe nimis contingit in amore amicitiae excessus, vel defectus, dum vel ardentius quàm deceat, vel frigidius quàm par sit, amantem redamamus: Ergo opus est virtute amicitiae, quæ medium in amore constituat, & modum in dilectione teneat.

Opposita etiam sententia non caret suis fundamentis; nam præterquam quod D. Thomas sententiam negantem secundo loco refert velut ultimam suæ mentis resolutionem, illam etiam disertè tradit in 3. dist. 27. quæst. 2. art. 2. ad 1. dicens: *Amicitia*, de qua Philosophus tractat, causatur vel ex inclinatione naturæ, quantum ad amicitiam delectabilis, & utilis; vel ex inclinatione habitus virtuosæ, præsuppositâ inclinatione naturæ, quantum ad amicitiam honesti,

nesti, in quantum omne, quod facit similitudinem cum aliquo, inclinatur ad amorem illius; & ideo non ponitur aliqua virtus, sed quiddam consequens ad virtutes.

Ratio verò est: De ratione virtutis est, quod respiciat essentialiter objectum bonum; cum enim virtus sit essentialiter in ordine morali, non malo, nec indifferenti, non specificatur nisi ab objecto bono moraliter; unde dicitur dispositio perfecti ad optimum, & bona qualitas mentis, quâ rectè vivitur, quâve nullus malè uritur. Sed amicitia humana non respicit essentialiter objectum bonum, sed indiscriminatum respicit bonum, vel malum; nec quælibet amicitia habet rationem laudabilis, ut patet de illa, quæ fundatur in delectabili, & utili. Ergo amicitia humana non est specialis virtus. Neque enim est specialis difficultas in amando bono honesto alterius; quia præsuppositâ similitudine, quam inter aliquos faciunt virtutes, nullam patiuntur difficultatem viri boni in mutuo amore rependendo, sed potius ad illam impendendam naturali pondere inclinantur, quia quodlibet diligit sibi simile, & similitudo similes sicut in bonis, ita & in amore adunat. Ergo supposita inclinatione voluntatis ad amandum sibi simile, per ipsas virtutes sufficienter determinatur homo ad amandum alios virtute præditos, quibus virtutibus suis assimilatur. Ergo amicitia non virtus specialis est, sed virtutes sequitur, & comitatur. Quia nimirum supposita similitudine, quam faciunt aliæ virtutes, bonum amici fit quadantenus bonum proprium; unde sicut bonum non exigit specialem virtutem, ita nec bonum amici, cui volumus

lumus bona sicut & nobis. Unde etiam præditus aliarum virtutum ornatu facile in amicitia modum & medium inveniet absque specialis habitus additamento.

Aliam hujus negantis sententiæ rationem afferunt nonnulli ex eo petitam, quod nulla virtus deperditur, nisi ex vitio possidentis: amicitia autem deperditur sine culpa amantis per hoc solum, quod alter non redamat, quia ad amicitiam requiritur amor mutuus. Verum hæc ratio levis, vel nullius momenti est; nam sicut obedientia respicit alterum ut superiorem, cujus autoritate extinctâ desinit obedientia ad illum sine culpa obediens, & idem est de virtute observantiæ respectu eorum, qui dignitate cadunt; quæ tamen virtutes quoad rationem essentialem permanent, quia voluntas est ad obediendum, conservandumque comparata, quoties legitimus superior, vel alius in dignitate constitutus occurrerit: ita altero amorem parem pari non referente, remanet in præparatione animi virtus, sed non exercitium amicitia. Si autem quæras, quænam ex his sententiis probabilior judicanda sit? Respondebo, me non posse stare ubi sol trepidat, id est non audere me decidere quod S. Doctor indeterminatum reliquit, & modò in unam, modò in alteram sententiam ivit. Primæ tamen sententiæ fundamenta videbuntur firmitiora consideranti veritatem.

REFLEXIO.

Vide, Lector, Dei dignationem: amicitiam tuam ambit Deus, & ait: *Fili prabe mihi cor*
Tom. IV. T

tuum. Vide quis petit, vide à quo petit, vide quid petit. Petit cor tuum Deus, cui antequam peteret, debebatur; petit supremus Dominus rem suam quasi alienam; petit, & simul imperat; jubet enim qui rogat, si potest imperare. Petit, inquam, Dominus, qui sine injuria dura præcipere poterat. Petit summa ratio, cujus autoritas pro omni nobis ratione esse debet, quia ut dicebat Nazianzenus orat. 5. *Mihi est pro omni ratione, apud summam illam rationem nihil fieri sine ratione.* Petit benefactor amore præveniens, gratiis demerens. Esto autem quod excusationes obtendere, vel fingere possis, quod amorem non dederis, quomodo excusabere, si non reddideris? *Non dare cuiquam, vix licet; non reddere non licet,* inquit Ambrosius. Petit adjutor amorem, qui auxilium infundit ut ames; ignem enim venit mittere in terram, ut sacram accenderet flammam, quæ non consumit, sed perficit; non denigrat, vel infuscat, sed exornat; quæve in cælo nata, & in ipsius Dei pectore enutrita, ad cælum cor nostrum ciet, & sursum tendit, unde manavit. Petit amorem amor; Deus enim charitas est, qui non nisi amore natus, artem amandi & verbis docuit, & monstravit exemplis. Petit amorem pater, qui mundum sic dilexit, ut filium suum unigenitum daret, quive nos plus filio suo amavit. *Evidens quippe res est* (præclarus est Salviani lib. 4. de Provid. discursus) *quod super affectum filiorum nos Deus diligit, qui propter nos filio non pepercit. Et quid plus addo? Et hoc filio justo, & hoc filio unigenito, & hoc filio Deo. Et quid dici amplius potest? Et hoc pro nobis, id est pro malis, pro impiissimis, pro iniquis.*

Quis

Quis aestimare hunc erga nos Dei amorem queat, nisi quod justitia Dei tanta est, ut in eum aliquid injustum cadere non possit? Nam quantum ad rationem humanam pertinet, injustam rem nemo quilibet fecerat, si pro pessimis servis filium bonum occidisset. Ergo si potes, non ama amatorem illum, cujus tui nimius amor excusari ab injustitia non posset, nisi foret summa justitia. Utique (addit idem Pater) hac magis inestimabilis pietas, & hoc mirabilis magis Dei virtus est, quod ita intelligi ab homine magnitudo sua justitia non potest, ut quantum ad inbecillitatem humanam pertinet, penè injustitia speciem magnitudo justitia habere videatur. Petit amorem filius amore homo factus, ut fieret amabilior, quò similior; Filius qui artem amandi & verbis docuit, & factis, & morte consummavit. Nam in ultima mortis agonia constitutus, inter morientis angustias, inter continuos diræ mortis dolores, inter innumera dilaniatæ carnis vulnera, inter circumstantium cuneos, inter latronis blasphemias, & Judæorum subsannantium derisiones, opprobrii oblitus & pœnarum, solius meminit amoris, dum orare pro crucifixoribus veniam non cessavit. Occidite Judæi & tortores, laniate, sanguinem è venis, vitam de corpore abstrahite, evellite, extorquete, amorem de corde non exstirpabitis. O Deum immortalem, & præ amore mortuum! Qualis iste amans, qualis amor iste, qui in tanti medio odii non minuitur, sed veluti amabili antiperistasi augetur! Quàm dulcis amor, qui inter fellis amarorem verbum bonum & suave eructavit! Quàm supra mortem dilectio, quàm super infernum dura æmulatio, quæ nullo tam atrocium hostium

impetu concuti potuit ! Quàm denique liberalis , & dives , qui impiorum injuriis , maledictis , furori non nisi pietate , beneficentia , & amore respondit ! Denique amorem petit Spiritus sanctus , amor notionalis , flamma Trinitatis , ignis Dei , ignis Deus , ut te in Deum amore transformet , quem tot vitia deformem effecerunt.

A quibus petit, ab omnibus petit, à te, Lector, à me amorem petit. Liceat , quæso , te à Deo parum interrogari. Tu qui quidquid es , quidquid habes, quidquid futurus es, totum à me obtines, & mihi detrectas amorem ? Tu qui infinitis donis naturæ & gratiæ , corporalibus & spiritalibus , modernis & antiquis à me obrueris, tam magna data, & majora danda amore exsolvere dedignaris ? Tu tot mihi peccatis debitor, tot in me , in proximum , in te, tam crebrò, tam perversè patrata scelera amore redime, amore dele. Tu legis novæ professor, Evangelii auditor , Christi discipulus hanc unicam Christianismi tesseram , qui amor est , induc & demonstra. Tu immortalitatis candidatus totum Paradisi regnum amore eme ; & *qui magna quaris , parva non expendes* ? ut Cyrillus Alexandrinus loquitur. Tu tantillus à tali & tanto amatus redamare hæres ? Itane possunt pignora sic amata non amare ? Quid tantum mali commerui , ut mihi nec tanquam Patri amor , nec tanquam Domino reddatur obsequium ? Quid plura ? Si me Deum fortassis times , me homo dilige factum hominem ; & si animum tuum tota Divinitatis majestas inflectere non potest, dum me hominem vides, inflexo cordis tui sensu, fractoque mentis callo dabis fortassis inclinatus

natus humanitati, quod Divinitati hæcenus denegaras. Me in te amoris pignus respice, non incognitum, sed domesticum; non alienum, sed proprium, non mihi & tibi extraneum, sed mihi simul, tibi que commune, quod non ad invisibilis, & terribilis cogit dilectionem, sed ad tuæ speciei revocat charitatem; nec id monet, ut alienum ames, sed fratrem; illumque diligas, quem si te amas, odisse non potes.

Denique petit amorem. Nihil durum, nihil insolens, nihil difficile deprecatur. *Amoris enim soror dulcedo. Nihil durum, nil amarum, nil grave, nil lethale computat amor verus*, inquit Augustinus, & Chrysologus. *Vbi amor est, labor non est, sed sapor*, subjungit Bernardus. Si dura Deus præciperet, illa molliret amor, qui omnia gravia & difficilia facit facilia, & quasi nulla, ait doctus Idiota. Amor sapida reddit jejunia, catenas consecrat, torturas inungit, amare, condire novit. Quàm suavis igitur Christi lex, quàm dulce jugum, quàm amandum quod petit onus, lex amoris, jugum charitatis, onus dilectionis, quod non solum durum non est, sed sine quo dura sunt omnia.

SPECVLATIO III.

Eadem specie charitas diligit & Deum propter ipsum, & amicos in Deo, & inimicos propter Deum.

HAc speculatione explicatur objectum charitatis, quod est solus Deus propter se dilectus.

tis, non quòd eliciatur, sed quia subordinatur habitui imperanti. Et ratio est, quia bonitas Dei extrinseca non facit proximum intrinsecè bonum, & amabilem; unde non potest esse ratio intrinseca, sed duntaxat extrinseca proximi diligendi. Quod magis inde confirmatur, quòd actus dilectionis Dei est actus intentionis, quo Deus diligitur ut finis; actus verò dilectionis proximi est electio: porrò actus intentionis differt specie ab actu electionis, licèt iste ab illo imperetur: ergo dicendum, quod sicut licèt ratio cognoscendi conclusiones sint principia, easque non nisi propter principia cognoscamus; tamen alio habitu conclusiones, scilicet scientiâ; alio habitu, scilicet simplici intelligentiâ, principia attingimus: ita licèt proximum diligamus propter Deum, tamen alio habitu proximum, alio diligimus Deum.

Respondeo, illud interesse discrimen amicitiam naturalem inter, & supernaturalem charitatis, quâ diligimus proximum, quòd licèt amicitia naturali possimus ipsum amare amore à charitate imperato, tamen dum eum amore supernaturali diligimus, tunc à charitate amor ille elicitur. Ratio est, quia cùm proximus diligitur amore supernaturali, ut amicus divinus, seu in Deo, & ut est aliquid Dei, ratio amandi Deus est: ergo sicut illud ingreditur objectum fidei, quod credimus, & quia Deus est ratio credendi, & quia est aliquid pertinens, & relatium ad Deum; ita quod diligitur, & quia Deus est ratio amandi, & quia est aliquid Dei, ab eodem habitu diligitur, quo diligitur ipse Deus. Unde D. Thomas infrà, quæst. 103. art. 3. ad 2.

Dicendum, inquit, quòd ratio diligendi proxi-

mun, Deus est. Non enim per charitatem in proximo diligimus nisi Deum; & ideo eadem charitas est, quâ diligitur Deus & proximus (ecce quomodo in amore supernaturali proximi dilectio ab habitu charitatis procedit:) sunt tamen alia amicitia differentes à charitate secundum alias rationes, quibus homines amantur. Ex istis amicitiiis amorem à charitate non elici, sed duntaxat imperari certum est.

Ad primam probationem in contrarium dicendum, tunc solum actum dilectionis proximi esse imperatum à charitate, & non elicitum ab illa, quando Deus non est una, & totalis ratio diligendi, ut contingit in amore naturali ordinato in Deum: quando autem proximus amatur amore supernaturali, tunc propter solum Deum diligitur, nec potest dilectio illa nisi à charitate licitè procedere. Nec obest, quod bonitas Dei extrinseca non reddat proximum intrinsecæ bonitatis & amabilitatis participem; non obest, inquam, quia sufficit, quod in proximo sit ordo ad Deum, & capacitas illius, ut possit diligi propter Deum; sicut licet media pura in probabilissima sententia nullâ gaudeant intrinsecâ bonitate, tamen propter extrinsecam bonitatem finis, cui deservire nata sunt, appeti possunt, & amari, vel potius potest in illis diligi finis; & ita Deus in proximo ex charitate amatur.

Ad secundam probationem respondeo, quod licet amor Dei & proximi differant veluti specie materiali secundum rationem intentionis, quæ diversitas speciei materialis provenit ex eo, quod unus est actus primarius, alter secundarius; nihilominus conveniunt actus illi in specie

specie formali petita ab attingentia divinæ bonitatis considerata secundum quod est in se, & prout est participabilis à creaturis; sed eadem bonitas utrobique inspicitur, utrobique amatur. Ex quibus patet, quid sit dicendum ad id, quod de scientia subjungitur; est enim satis apertum discrimen, quia charitas diligit proximum propter bonitatem divinam in se, & per se inspectam, quâ ratione est objectum formale charitatis: scientia verò non cognoscit conclusiones propter principia nudè spectata, quâ ratione sunt objectum intelligentiæ; sed propter principia conclusionibus facta, & prout in eas per discursum derivantur: Charitas solum Deum in proximo quærit; scientia non solam veritatem principii, sed etiam conclusionis studiosè sectatur.

Instabis virtus patriæ, quâ exhibetur Deo honor, distinguitur à virtute duliæ, quâ Sanctos honoramus, ut docet D. Thomas *infra quest. 103. art. 3. & 3. p. quest. 25. art. 3.* Et tamen Sancti non honorantur nisi propter Deum; ergo licet proximus diligatur propter Deum, alia erit charitas, quâ Deum; alia, quâ proximum diligimus.

Respondet huic argumento D. Thomas *q. 25. art. 1. ad 2. quod amor respicit bonum in communi; sed honor respicit proprium bonum honorati, deferretur enim alicui in testimonium propriæ virtutis. Et ideo amor non diversificatur specie propter diversam quantitatem bonitatis diversorum, dummodo referantur ad aliquod bonum commune. Sed honor diversificatur secundum propria bona singulorum; unde eodem amore charitatis diligimus omnes proximos, in quantum*

referuntur ad unum bonum commune, quod est Deus: sed diversos honores diversis deferimus, secundum propriam virtutem singulorum. Et similiter Deo singularem honorem latria exhibemus, propter ejus singularem virtutem. Quæ doctrina ratione eximiæ profunditatis subobscura videtur & difficilis; ideo necesse est eam aliquo interpretamento explicare.

Sciendum ergo, horum S. Thomæ verborum sensum non esse, amorem ferri ad bonum in communi, seu universale; amor enim potest ferri in bonum particulare amici, & in speciales rationes bonitatis: unde nulla etiam esset differentia inter amorem & honorem, subindeque argumentum maneret in sua vi; sicut enim amor in communi respicit bonum in communi, & amor specialis respicit speciale bonum; ita honor in communi respicit excellentiam in communi, & specialis specialem: unde servatâ proportionem perfecta, foret amorem inter & amorem similitudo. Germanus ergo, & verus D. Thomæ sensus est, amorem ferri in bonum commune, idest abstrahens ab intrinseco & extrinseco, proprio vel alieno; honor verò respicit bonum particulare, excellentiam scilicet solius personæ honoratæ. Et verè sic est. Potest enim aliquid amari ratione propriæ, & intrinsecæ bonitatis, sicut finis; potest etiam amari ratione extrinsecæ bonitatis ut purum medium; unde eodem omninò amore amatur sanitas & medicina. At verò honor tantam non habet in suo objecto latitudinem: & licet unus possit propter alium honorari, putà Sanctus propter Deum; tamen ille alius propter quem honoratur, putà Deus, ejusque excellentia, non est

motivum

motivum specificans cultum dulciæ, quia Deus secundum se non nisi cultu latriæ honorabilis est, subindeque diuina excellentia erit solum finis ultimus extrinsecus dulciæ, non proximus & specificativus, qui erit duntaxat propria ipsius Sancti excellentia. Caterum amor charitatis, quidquid diligit, in Deum tanquam finem immediatum & proximum refert, solamque respicit divinam bonitatem, tanquam unam & formalem rationem diligendi.

Urgebis: Non est major ratio, cur bonum particulare, quod volumus proximo ex charitate dilecto, feratur in bonum divinum, & quod cultus specialis Sancto exhibitus non referatur similiter in cultum Dei, qui suorum Sanctorum honoribus honoratur, ut Patres passim affirmant. Ergo disparitas adducta corrumpit.

Respondeo, discrimen allatum subsistere, quia licet cultus Sanctorum in Deum ut ultimum finem redundet, tamen propria cuiusvis Sancti excellentia motivum formale est dulciæ cultus ipsi exhibiti.

Insistes: Multis sæpe sæpius exhibetur cultus, quicquid prorsus indigni sunt, ut Prælati malis & dyscolis, quibus non propter virtutes, aut egregias animi dotes, à quibus deserti sunt, cultus exhibetur; sed quia Dei ministri sunt, ut asserit D. Thomas *infra, quæst. 63. art. 3.* unde tunc honor non defertur eis in testimonium virtutis, sed propter Deum, cuius vices gerunt, & indignè implent. Tamen constat honorem indigno Prælato latum esse à diuino distinctum; ergo similiter charitas proximi à charitate Dei distinguitur, licet proximus propter Deum diligatur.

Respondeo Prælatos, quàmlibet indignos & immeritos, authoritate vel à Deo, vel à Republica concessâ pollere, quæ quædam excellentia moralis est, ob quam honorandi sunt; unde debita superioribus reverentia ad præceptum colendi parentes reducitur. Nam ideo Princeps vocatur Pater patriæ; Summus Pontifex, Papa dicitur, & primus Patriarcha, & ab Augustino epist. 112. *Pater Christiana plebis* nominatur. Magistri etiam vocantur Patres, sicut discipuli filii eruditionis nominantur. Episcopi quoque in Concilio congregati, ubi tanquam iudices sedent, Patres dicuntur: ut apud omnes constet, quod sicut parentibus ob patriam potestatem cultum exhibere filii tenentur & honorem; ita & superioribus reverentia debetur, quantumvis præ vitiorum sordibus indigni, & monstra sint. Neque enim monstrum appellare dubito Prælatum indignum, cum teste Bernardo lib.2. de consid. cap.7. sit *monstruosa res, gradus summus, & animus infimus; sedes prima, & vita ima; lingua magniloqua, & manus otiosa; sermo mulius, & fructus nullus; vultus gravis, & actus levis; ingens authoritas, & nutans stabilitas.*

Perfistes adhuc: Poteft diligere proximus propter bonitatem creatam supernaturalem ipsi intrinsicam, seu propter donorum supernaturalium participationem, quæ utique dilectio est supernaturalis, cum aliquid supernaturale respiciat: sed tunc non sola diligitur bonitas increata, licet in illam tanquam finem ultimum amor ille referatur: ergo tunc amor proximi non elicitur ab habitu charitatis, quo diligitur Deus.

Respon

Respondeo, proximum donis supernaturalibus ornatum dupliciter posse considerari, sicut & dona supernaturalia quibus præditus est. Charitas namque, & gratia considerari possunt ut sunt participationes divinæ formaliter, & hoc modo proximum diligere, est ipsum amare, quia est veluti Deus participativè, vel ut sic dicam, quatenus natura divina in ipsum transfusa est. Secundò possunt considerari hæc dona, ut sunt perfectiones, & ornamenta proximi tot bonis ad aucti; & hoc modo diligere proximum est ipsum amare, quia perfectus est, & supernaturalibus ornamentis decoratus. Primo modo dilectio proximi elicitur à charitate, non per actum primum, sed secundarium; nam eodem habitu, quo attingitur objectum, attinguntur etiam omnes proprietates, & participationes ipsius: proximus autem donis supernaturalibus instructus habet veluti proprietates, similitudines formales, expressiones, & participationem divinæ essentiæ, & attributorum, quibus homo supra seipsum attollitur, deificatur, & quadantenus fit Deus per participationem, juxta illud: *Ego dixi, Dii estis*. Ergo eodem habitu, quo diligitur ipsa bonitas essentialis, & Deus per eam summè bonus, diligitur quoque proximus gratis cœlestibus perfusus. Neque enim contra rationem virtutis theologicæ est secundariò aliquid creatum respicere; sicut enim fide multa præter Deum revelata propter primam veritatem credimus, spe gloriam corporis expectamus; ita charitate, & charitatis extensione proximum diligimus. Si autem proximus secundo modo consideretur, verum est, ipsum, ut talem, non charitate, sed ab amore natu-

rali diligere. Nec obstat illud objectum supernaturalis; non obstat, inquam, quia supernaturalitas se habet solum materialiter: constat verò, posse dari actum naturalem circa objectum quod est supernaturale, modò ratio attingendi sit naturalis: sicut homines mali suppositâ cognitione Paradisi, & supernaturalium, quibus abundat, deliciarum, ipsas sine dubio, sed naturaliter amant; ipsis frui, ad easque pervenire vellent, licet ad eas obtinendas pro virili, ut par esset, non contentur. Et similiter Sanctos, quos audimus perfectionibus tum naturalibus, cum supernaturalibus ornatos, amore naturali diligimus, etsi Deum in ipsis non amemus; naturale enim, & proclive est perfectionem semel cognitam amare, sicut mala semel detecta formidare. Unde tam sæpe contingit amores nostros, pœnitentias nostras, attritiones, & contritiones naturales esse motus, & non à gratia & Spiritu sancto, sed ab amore proprio proficisci. Unde tanta inest omnibus causa timendi, tanta actus nostros, etiam si specie innocui videantur & puri, dubios habendi, atque suspectos; quia licet nihil nobis conscii sumus, in hoc tamen iustificati non sumus, & nescimus an odio, vel amore digni sumus.

Replicabis demùm, sed fortius: Ideo ex D. Thoma suprâ citato, alia est virtus exhibens cultum Deo, alia exhibens Sanctis; quia amor respicit bonum in communi, idest abstrahens à proprio, & alieno; & ideo idem amor fertur ad diversa, dummodo referantur ad idem commune bonum: at verò honor respicit proprium bonum personæ honoratæ, quam specialiter colere vult, & exaltare. Licet autem hæc solutio

uo

tio possit satisfacere pro amore, quo diligitur proximus propter Deum, ejusque bonitatem proximo extrinsecam, non tamen pro amore, quo diligitur proximus propter bonitatem intrinsecam sibi à Deo communicatam; tunc enim bonitas participata est motivum proximum talis amoris, sicut singularis virtus alicujus Sancti est objectum proximum dulciæ: Ergo sicut ille honor debitus Sancto, licet referatur ad divinum cultum tanquam finem ultimum, tamen specificat specialem habitum distinctum ab eo, quo colitur Deus: ita similiter amor exhibitus proximo propter perfectionem ipsi intrinsecam, tamen si relatus in bonitatem divinam, bonitati proximi primariò respicit, bonitatem verò divinam non nisi ut finem ultimum, & remotum.

Respondeo dona supernaturalia proximi, ut amantur amore supernaturali charitatis, non tam diligi ut sunt perfectiones proximi, quàm ut sunt participationes divinæ bonitatis, quæ proinde magis amatur in illis; eo ferè modo, quo prototypus in imagine amatur. At verò dulia reverentiam exhibet Sancto propter propriam ipsius excellentiam præcisè quæ propria est, & ab aliena distincta; cujus signum est, quod diversus cultus pro diversitate Sanctorum defertur; nam dulia Sanctis, hyperdulia Deiparæ, latria Deo optimo maximo exhibetur: unde non mirum, si distinctus honor à distincta virtute procedat.

Tria corollaria derivantur.

Ex his sequitur primò, objectum charitatis
esse

esse solam bonitatem divinam, prout Deo ipsi summè dilecto convenientem. Charitas quippe, quæ non quærit quæ sua sunt, sed est vera cum Deo amicitia, non respicit bonitatem Dei, quatenus utilem amanti, sed prout convenientem amico. Et licet summam inveniatur in Deo diligendo delectationem, tamen non delectationem illam quærit, sed Deum summè delectabilem purè in se, & propter se quærit. *Amicus*, inquit D. Thomas in 3. dist. 34. quæst. 2. art. 3. quæst. 1. ad 2. *quantvis delectationem habeat ex præsentia amici, non tamen propter hoc quærit amici præsentiam, ut in ipso delectetur, sed propter amicum ipsum, cui vult conjungi quantum potest.*

Sequitur secundò, objectum charitatis non esse bonitatem divinam & communem analogicè bonitati divinæ per essentiam, & divinæ per participationem. Probatur contra Suaremitum quia virtus theologica solum habet Deum pro objecto; unde sicut fides soli Dei veritati credit, spes soli Dei omnipotentia innititur; ita charitas sola Dei bonitate promovetur. Tum quia, ut ostendimus, charitas dum se extendit ad proximum, solam in eo bonitatem Dei amat, vel ut moventem, vel ut expressam & participatam. Tum quia si daretur unus habitus respiciens per se primò bonum in tota sua latitudine ambiens increatum simul & creatum, talis habitus omnem voluntatis capacitatem adæquaret; quod est contra rationem habitus, cujus objectum est determinatio, & divisio objecti potentia. Tum denique, quia objectum charitatis est ultimus finis, ad quem aspirat creatura rationalis; bonitas autem abstrahens.

à creata, & increata, non est ultimus finis creaturæ rationalis, sed sola divina, cui inhiat, quam quærit, & cui uniri avet.

Sequitur tertio, bonitatem divinam, prout est in se, seu prout involvit essentiam, attributa, & personas, esse objectum charitatis. Quia ut ex D. Thoma *specul.* 1. *supp.* 2. diximus, charitas respicit bonum divinum, in quantum est beatitudinis objectum; idest, ut ibi exposuimus, bonum divinum, prout continet in se omnem rationem bonitatis cognoscibilis lumine gloriæ, & visione beata, est objectum charitatis: unde sicut lumine gloriæ videbimus eum sicuti est, ita charitate diligimus eum sicuti est. Deus autem, sicuti est, involvit attributa, & personas. Tum quia omnia, quæ sunt in Deo, sunt per se & propter se amabilia, ad quæ se creatura rationalis referre, in illisque tanquam ultimo fine quiescere potest. Tum quia amor charitatis vult bonum Dei summè dilecti, idest bonis Dei internis gratulatur. Atqui ad perfectionem, & bonitatem Dei internam pertinent attributa, & perfectiones, tam absolutæ, quàm relativæ: ergo in illa omnia fertur amor charitatis. Et certè cum in attributis, & personis sit bonitas, & perfectio, illa utique amabilis est, non utique amabilitate mediæ, quod essentialem, & impræscindibilem importat imperfectionem; sed amabilitate ultimi finis. Et ita docet Cajetanus in præfenti, articulo 4..

Nec refert, si cum Goneto nostro oppositum sentiente, & opinante solam naturæ bonitatem, ut distinctam ab attributis, esse objectum charitatis, respondeas, bonitatem attributorum & personarum habere rationem finis intermediæ
in

in divinam bonitatem virtualiter ordinati, quod nullam importat imperfectionem; sicut nulla est imperfectio, quod attributa divina à natura virtualiter dimanent. Non, inquam, refert. Quia manifestam involvit & supponit imperfectionem, quod aliquid ametur propter aliud, nec possit se solo terminare appetitum; hoc enim redolet innatum creaturis omnibus defectum, quia earum bonitas appetitum quidem allicere, sed terminare, vel satiare non potest; nec debet propter se, sed propter ultimum finem amari. Unde grandis est disparitas inter medium virtuale, & emanationem virtualement; in tantum enim unum attributum dicitur virtualiter emanare ab alio, quia unum est ratio probandi aliud, quatenus unum est fundamentum alterius; quod nullam redolet imperfectionem, sed puram sapit perfectionem, quia hoc convincit, attributa divina esse connexa. At verò medium, vel intermedium virtuale tale est, ut non habeat amabilitatem propter se moventem, quod & imperfectionem inseparabilem involvit, & reverà falsum est; nam sicut natura divina, ita & sapientia divina, & fecunditas divinarum personarum per se ambiles sunt, sicut per se divinæ, per se increatæ: bonitas quippe divina omnes perfectiones transcendit.

Varias in contrariam rationes opponit Gonetius, quæ ferè solutæ manent. Primò sic arguit: Bonitas solius naturæ divinæ, ut distinctæ ab attributis, & revelationibus, Deum constituit in ratione ultimi finis, cum ratione illius omnia ad Deum ordinentur formali, aut virtuali ordinatione; ipsa verò bonitas naturæ ad nihil ordinari possit. Atqui objectum charitatis non est aliud

aliud præter id, quod constituit Deum in ratione ultimi finis: ergo. Verùm hæc obiectio supponit falsum, nempe bonitatem transcendente[m] omnia attributa esse bonitatem mediæ, quod perfectioni actus puri, & perfectionis divinæ aperitissimè repugnat, ut paulò ante demonstravimus.

Objicit secundò. Illud est obiectum charitatis sub ratione boni, quod est obiectum formale beatitudinis sub ratione veri. Atqui obiectum beatitudinis est sola veritas naturæ divinæ, cùm attributa & rationes pertineant ad obiectum secundarium visionis beatificæ. Ergo sola bonitas divina ut ab attributis distincta, est obiectum charitatis.

Respondeo hoc argumento firmari magis nostram sententiam: nam illud est obiectum charitatis, quod est obiectum beatæ visionis. Atqui obiectum beatæ visionis est Deus, ut in se est Unus & Trinus, aliàs illa visio non esset intuitiva, quidditativa, & beatificans: Ergo bonitas divina prout transcendit essentiam, attributa & personas, est obiectum charitatis. Unde patet, minorem argumenti esse à veritate alienam, ut in materia de visione demonstravimus.

Objicit tertio. Bonitas divina specificans charitatem est una nedum formaliter, sed etiam virtualiter, cùm ex ea probetur unitas charitatis: sed bonitas divina transcendens omnia attributa, non est virtualiter una, sed multiplex, cùm attributa divina virtualiter distinguantur: ergo obiectum charitatis non est bonitas transcendens omnia divina, sed sola bonitas naturæ.

Respondeo, bonitatem specificantem charitatem

tatem esse virtualiter multiplicem in ratione rei, esse tamen unicam in ratione objecti voluntatis, scilicet boni & amabilis; in hoc enim conveniunt, omnia divina ideo esse amabilia amore charitatis, quia in Deo sunt, & ad Dei internam gloriam conferunt; hoc enim est, quod amor amicitiae quærit, ut bonum optet amico, vel si optari non potest habenti omnia, congaudeat illi & gratuletur. Quia ergo & natura, & attributa, & personæ ad Dei perfectionem faciunt, ea omnia amat charitas, quæ bonum amici amat ubicumque sit, sive in natura, sive in perfectionibus ejus.

Objicit quartò. Natura divina ut distincta ab attributis, est potens movere ad actum charitatis: ergo non requiritur bonitas coalescens ex omni perfectione divina ad objectum charitatis, cum ante bonitatem attributorum sit motivum illius. Consequentia patet intelligenti terminos. Probatur, antecedit, tum quia bonitas divina in propria linea est bonum infinitum, subindeque sufficiens dilectionis motivum. Tum quia si justus est à Deo amabilis propter gratiam participantem naturam divinam, etiam Deus erit à nobis amabilis ob bonitatem suæ naturæ. Tum quia dilectio Dei ratione naturæ divinæ est maximè propter Deum, cum Deus per naturam constituatur, charitas autem Deum propter Deum diligere studet. Tum quia Deus per impossibile carens attributis, retinensque naturam, esset sufficiens dilectionis motivum.

Respondeo ex eo hujus argumenti fallaciam perspicuè constare, quod non minùs validè retorqueri possit in adversarium. Nam pulchritudo, sapientia, infinitas, fœcunditas Dei ut
virtus

virtualiter distinctæ à natura , possunt movere ad actum dilectionis, cum sint bonum in sua linea infinitum , propter se amabile ; & hominem charitate præditum Deus diligeret, tametsi gratiam per impossibile non haberet ; & tamen charitas non expressio est naturæ divinæ , sed voluntatis. In forma ergo dico , verum esse , naturam esse amabilem amore charitatis, sed non solam, nec ratione naturæ quâ talis, sed ratione amabilitatis omnibus perfectionibus divinis imbutæ. Certè sicut ille hallucinaretur , qui probaret Solis solius lucem esse objectum visus, quia est sufficiens ad movendam potentiam visivam, & quia si nullum aliud esset possibile corpus luminosum, adhuc corpus solare potens esset movere ad actum visionis ; ita nihilo minus infirma est ratiocinatio , quâ probatur naturam Dei quâ talem, esse unicum charitatis objectum , quia amari potest , & quia desinentibus attributis amaretur. Nunquid amari non potest divina sapientia , & nonne esset amabilis, si per impossibile à natura Dei separaretur ? Ergo amabilitas divina est aliquid commune essentiali , attributis , & personis, nimirum bonitas & appetibilitas omnia divina transcendens. Ex quibus facilè respondebis ad singulares probationes antecedentis.

REFLEXIO.

Eadem charitas & Deum , & proximum diligit : duplex præceptum implet una virtus , & dum implet , universam legem complet & Prophetas ; finis enim legis dilectio. *Duo isti amores,* inquit Magnus Gregor. lib.7. Moral.cap.10.

dno

duo annuli sunt, sed catena una; dua actiones, sed una virtus, duo opera, sed una charitas; duo apud Deum merita, sed unum sine alio inveniri impossibile est. Intima quidem debet esse Christianos inter & inviolabilis consuetudo, nec verè Deum amat qui proximum non diligit, quia ut alicubi ait Laurentius Justin. Amor Dei amorem proximi generat, & amor proximi calefacit amorem Dei. Et propterea voluit Deus unicum hominem primò formare, ex quo omnes procederent, ut tanquam fratres omnes se amarent. Verumtamen non charitate diligit proximum, qui illum non diligit propter Deum: ergo qui nimio proximi amore aliquid molitur contra Deum, utique non charitate, sed cupiditate diligit illum; imò nec eum diligit, cui vera & æterna bona non concupiscit: ergo iterum inter solos Justos & Sanctos vera & solida amicitia initur, qui & sibi verum bonum optant, & intimo amoris sensu, & forti, & suavi, & constanti; quia tamdiu se amant, quamdiu Deum diligunt, idest quamdiu justii sunt. Quàm veridicè Augustinus epist. 52. Nemo potest veraciter esse amicus hominis, nisi fuerit ipsius primitus veritatis. Et præclarè lib. I. ad Bonifacium, cap. I. Amicitia nusquam nisi in Christo fidelis est, in quo solo esse etiam sempiterna, ac felix potest.

Hæc cum ita sint, amande Lector, si Deum amas, fratres tuos ama eodem patre natos, eodem Deo conditos, ejusdem legis discipulos, eodem Christi sanguine redemptos, ejusdem convivii Eucharistici commensales, ejusdem gloriæ cohæredes, ejusdemque corporis membra. Ergo imitare artum, membrorumque
natu

naturalem charitatem. Unum membrum non nocet alteri ; cùm ab alio læditur , non se vindicat ; patienti alteri compatitur , indigenti accurrit , laboranti succurrit , fatigato opitulatur , fordescens mundat , infirmo medetur , benè habenti congaudet , sibi reputat fieri quod fit alteri , nihil tam timet , quàm ab eo sejungi.

Amorem proximi tanquam unam Christianismi tesseram prædicavit Legislator noster : *In hoc cognoscent* , inquit , *quod discipuli mei estis , si dilectionem habueritis ad invicem*. Hoc præceptum novum Testamentum singulis versibus inculcat : illud discipulis suis dilectus discipulus ad fastidium usque ingeminabat : *Filioli* , inquiens , *diligite alterutrum* , *quia præceptum Domini est ; & si solum fiat , sufficit*. Cur ergo sumus fratribus tam molesti , tam morosi , tam duri pauperibus. Si pedem pungit spina , impetrat caput , respiciunt oculi , curvantur humeri , accurrit manus , totum corpus contrahitur , omnia , & quæque membra , quod possunt , faciunt , ut de infimo & exiguo loco spina quæ inhæserat , educatur. Oculus videt in corpore : nunquid soli sibi ? Absit : & manui videt , & pedi videt , & omnibus quantum potest videt : pro membris cæteris manus operatur : pro tacentibus lingua loquitur : ergo si sumus ejusdem corporis membra , si Christum caput agnoscimus , omnes amemus , pro singulis laboremus. Felix concordia fraternæ charitatis , quæ aliis dat quod habet , ab aliis accipit quod non habet ! Quàm utilis charitas , quæ aliena facit sua , & congaudens aliis , in illis habet , quo in se caret. Unde Magnus Gregorius : *Quod tuum est per laborem , meum est per amorem*.

CAPVT II.

*De augmento, & gradibus
Charitatis.*

DOgma fidei est omnium Orthodoxorum calculo probatum, charitatem posse augeri. Quid enim expressius, vel luculentius esse potest illis Apostolicis verbis? Ephes. 4. *In charitate crescimus.* Et illis: *Hoc ero, ut charitas vestra magis ac magis abundet.* Et hoc justitiæ incrementum, ait Tridentinum *sess. 6. cap. 10.* petit sancta Ecclesia, dum orat: *Danobis fidei, spei, & charitatis augmentum.* Idcirco etiam charitas appellatur ab Apostolo *Via.* *Adhuc,* inquit Cor. 12. *excellentiorem viam vobis demonstrabo.* In via autem continuus debet esse processus. Hac etiam de causa viatores vocamur, quia in Deum finem nostrum, tanquam in itineris metam tendimus, non passibus corporis, sed mentis affectibus. Et licet charitas sit in summo ex parte objecti, quod est summum bonum, per ordinem ad quod excellentissimæ virtutis nomen & rationem sortitur; non tamen in summo est quantum ad intensiorem & virtuales quantitatem, quam impræsentiarum considerare operæpretium est.

Si autem antequam ad ulteriora, magisve theologica procedamus, roges quomodo fiat illud augmentum, consule D. Thomam *art. 4. q. 23. ad 3.* ubi ait, charitatem augeri secundum essentiam

essentiam; quod nihil est aliud, quàm ipsam magis inesse subjecto, seu magis radicari in illo: quod fusiùs explicat *art. 5.* ubi asserit, & probat, illud augmentum non posse fieri per additamentum alicujus distincti, sive secundum speciem, sive secundum numerum. Non quidem secundum speciem, quæ petitur ab objecto; quia minima charitas ad ea omnia objecta se extendere potest, quæ sunt ex charitate diligenda. Non etiam secundum numericam distinctionem, quæ à subjecto petitur, cum accidentia individuentur à subjecto: unde augmentum non potest fieri nisi per hoc, quod subjectum magis ac magis participat charitatem; idest secundum quod magis reducitur in actum illius, ac magis subjicitur illi. Et hoc est, inquit D. Thomas, charitatem augeri secundum essentiam, quia ut dixerat *art. 3. ad 3.* cum esse accidentis sit inesse, nihil aliud est ipsi secundum essentiam augeri, quàm dicere ipsam magis inesse subjecto; & dicere charitatem augeri secundum majorem radicationem, & non secundum essentiam, est propriam vocem ignorare.

Sed non est in animo in illis Metaphysicæ subtilitatibus, quæ fusè in Philosophia ventilantur, examinandis immorari. Quia tamen nostri propositi est Angelicam S. Thomæ doctrinam à multis impugnata, à paucis intellectam, cum se dederit occasio, explanare, & pro virili ab æmulorum calumniis vindicare, ad præfatæ doctrinæ elucidationem observandum breviter est, dictum illud D. Thomæ: *Charitas augetur essentialiter, vel secundum essentiam*; minimè adversari communi Philosopho-

rum axiomati, quo essentias consistere in indivisibili dicitur, easque numeris assimilari, quibus nihil addi, nihil detrahi absque destructione potest. Illud enim principium Sapientibus omnibus probatum verum est, cum alicujus differentiae essentialis fit additio, vel detractio; cum quo stat, eandem qualitatis essentiam sub ejusdem indivisibilis generis & differentiae latitudine augeri, quo additamento non perficietur, vel mutabitur essentialiter forma, tametsi illius perficiatur, intendaturque essentia. Unde aucta charitas non dicitur magis charitas, sed major & intensior.

Observato rursum ex solutione *ad 1. art. 5.* quod dum S. Doctor ibi ait, quod forma accidentaliter habet proprium augmentum per modum intensificationis ejus in subiecto, sicut patet in his quae rarefiunt, non intendit Angelicus Magister quantitatem continuam intendi in his, quae rarefiunt; aer quippe rarior non est magis quantus, sed major quantus. Vult ergo duntaxat S. Thomas, quod sicut in rarefactione aer fit major extensive absque ulla quantitatis ad quantitatem additione; ita in intensificatione non fit additio qualitatis ad qualitatem, sed praexistens magis perficitur, magisque in subiecto radicatur.

Nota tertio, quod cum S. Doctor *art. 4. ad 2.* ait, quod additio luminis ad lumen potest intelligi, quod intendatur in aere propter diversitatem luminarium causantium lumen, & quod talis distinctio non habet locum in proposito, quia non est nisi unum luminare influens lumen charitatis: cum, inquam, hoc ait S. Thomas, cave ne ex illis verbis inferas, quod licet intensio

intensio charitatis non fiat per additionem ob unitatem principii charitatem infundentis, intensio tamen luminis in aëre additione lucis efficitur ob distinctum luminarium influxum; sic enim rueret tota de intensione D. Thomæ doctrina. Verus ergo verborum illorum sensus est, hoc lumen inter & charitatem interesse discrimen, quod lumen in aëre receptum à duobus potest agentibus per additionem extensivè, & in diversis partibus augeri; quod tamen charitati minimè convenit, quippe quæ neque extensivè, neque intensivè per additionem charitatis augeatur. Sed de his consule Philosophos Thomistas in libris de ortu, & interitu.

Adverte quartò, dupliciter posse intelligi, charitatem nostris actibus augeri: primò efficienter physicè in genere causæ vel principalis, vel instrumentalis, vel dispositivæ: secundò meritoriè, sive actus boni statim consequantur augmentum, sive non. In priori sensu non procedit difficultas; est enim in confesso apud omnes, nullo quamlibet fervido charitatis actu augeri habitum efficienter principaliter, quia sola charitatis causa est Spiritus sanctus, per quem diffunditur in cordibus nostris, ut satis, superque suprà demonstravimus. Fatentur etiam omnes, actus charitatis non concurrere efficienter in genere causæ instrumentalis ad physicum habitualis charitatis augmentum; si enim virtus infusa, teste Augustino, est bona qualitas mentis, quam Deus in nobis sine nobis operatur; id à fortiori de charitate dicendum esse nemo inficias eat. Et ratio etiam est, quia habitus charitatis cadit sub meritum; quod autem meremur, non effcimus; sed ut ab alio, apud

quem meremur, efficiatur, obtinemus. Et quavis Deus posset assumere actus nostros ut instrumenta physica productionis gratiæ & charitatis, sicut de facto assumit actus pœnitentis ad gratiæ justificantis productionem, quia sunt partes Sacramenti, pœnitentiæ; quia tamen ex his quæ pendent ex voluntate divina nihil nobis innotescit, nisi per Scripturarum revelationem, vel Ecclesiæ Catholicæ, sive Romanæ apostolicam traditionem, quâ neutrâ regulâ claret, augmentum physicum charitatis esse per modum instrumenti actibus charitatis asserendum, sed potius dicitur, charitatis productionem, quâ cor mundum & sanctum efficitur, creationi assimilari, secundum illud: *Cor mundum crea in me Deus*; ideo grâtiis, & sine fundamento dicendum non est, augmentum charitatis habitualis ab iteratis actibus in genere causæ instrumentalis physici proficisci. Denique fatentur etiam omnes, non quolibet actu charitatis habitum augeri per modum dispositionis physici, quasi quilibet actus sit ultima physica dispositio ad augmentum, quâ posita Deus physicè charitatem augeat; sicut propositâ ultimâ dispositione in generatione hominis animam rationalem infundit. Et ratio est, quia ut docent Philosophi, à proportionem minoris inæqualitatis non fit actio, v.g. calefactio ut duo non potest esse ultima dispositio ad calorem ut sex; & similiter actus amoris ut duo nequit esse physica dispositio, quâ charitas habitualis habens v.g. quatuor gradus, sit intensa ut sex; quod requireretur, si amor ille esset physica dispositio ad augmentum necessariò consequutum. Unde D. Thomas in corpore articuli sic ait: *Non quolibet actu charitatis*

charitatis charitas augetur, sed quilibet actus charitatis disponit ad charitatis augmentum, in quantum ex uno actu charitatis homo redditur promptior iterum ad agendum secundum charitatem. Quod solutione ad 2. explicat exemplo guttarum cavantium lapidem. Quocirca tota difficultatis summa (& difficultas sanè summa est) in hoc consistit, an, & quomodo quilibet actus charitatis mereatur habitus augmentum, & quandonam augmentum illud conferatur. Porro quia innumeræ sunt Authorum etiam Thomistarum hac in parte divisæ sententiæ, resolutionem nostram non solum è pura S. Thomæ doctrina depromemus, sed ejusdem ferè verbis libenter, & securè utemur; nec molliores Thomistas imitabimur, qui de severitate Angelicæ doctrinæ nonnihil remittere voluerunt.

SPECVLATIO II.

Quilibet actus charitatis augmentum habitus meretur: illud tamen non consequitur actus remissus.

Prima pars affirmans, quemlibet actum charitatis mereri augmentum habitus, ad illudque disponere, est contra Durandum, & probatur. Actus charitatis, quantumvis remissus, est meritorius alicujus gradus gloriæ sibi correspondentis, ut ipsemet Durandus fatetur,

& patet : tum quia sicut omnis actus malus meretur poenam , ita omnis actus supernaturalis bonus præmium , quod ex divinæ beneplacito voluntatis non est aliud , quàm gloria æterna : tum quia actui remisso charitatis conveniunt conditiones meritorii operis , ad quod requiritur , ut sit supernaturale , propter Dei obsequium , & ab homine Deo grato procedens. Atqui actus amoris Dei non potest esse meritorius alicujus gradus gloriæ sibi specialiter correspondentis , nisi mereatur augmentum gratiæ & charitatis , ratione ejus solius sit debitus specialis gradus gloriæ ; tota enim , & una mensura gloriæ , charitas est , & gratia. Ergo actus amoris à charitate elicitive procedens est augmenti gratiæ & charitatis meritorius. Unde D. Thomas artic. 6. ad 1. *Quilibet actus charitatis meretur vitam æternam , non quidem statim exhibendam , sed suo tempore. Similiter etiam quilibet actus charitatis meretur charitatis augmentum ; non tamen statim augetur , sed quando aliquis conatur ad hujusmodi augmentum. Et Concilium Tridentinum sess. 6. can. 32. Si quis dixerit , justificatum bonis operibus , quæ ab eo per Dei gratiam , & Jesu Christi meritum sunt , non verè mereri augmentum gratiæ , vitam æternam , & ipsius vitæ æternæ , si tamen in gratia decesserit , consequutionem , atque etiam gloriæ augmentum , anathema sit. Et licet mens sacri Concilii fuerit tantum definire contra Lutherum , posse nos operibus nostris à charitate prodeuntis gratiæ augmentum promereri , subindeque charitatis habitualis crementum , cum charitas à gratia sponte per modum naturalis proprietatis fluat ; an verò illud*

illud augmenti meritum etiam actibus remissis debeatur, non determinet Sancta Synodus, subindeque positio Durandi licet non sit hæretica, est tamen valde dubia, & ferè erronea, cum actus charitatis, quàmlibet remissus, sit opus bonum, cui respondere meritum gratiæ, gloriæ, & augmenti illius, œcumenica Synodus declaravit.

Dices cum Durando: Ille solus dignus est accipiendis, qui benè utitur jam acceptis; nec novis favoribus dignandus est, qui prioribus est abusus. Atqui præditus habitu charitatis intenso, & remissos nihilominus eliciens actus charitatis, infuso habitu non benè utitur; nam juxta virtutem illius non operatur, nec conatus respondet viribus: ergo per illos actus remissos, & veluti degeneres nullum charitatis augmentum tepidus promeretur, sed per illos duntaxat, quibus habitum suum superat, certè adæquat. Unde D. Thomas in 1. dist. 17. quest. 1. art. 3. ad 2. sic formaliter loquitur: *Quilibet actus charitatis in quantum est informatus tali habitu, ordinatur ad premium substantiale, non tamen ad augmentum premii, sed nec ad augmentum charitatis.* Quid clarius, vel expressius pro Durando?

Respondeo, illum tandiu habitu benè uti, quandiu ex illo bonos actus elicit, tametsi non intensos, nec virtutum habitus adæquatè exhaustientes. Certè quilibet actus veræ & sinceræ dilectionis Dei, cujuscumque gradus sit, bonus est, cum secundum ipsius Durandi confessionem sit æterna vita dignus, ac proinde voluntas ipsum eliciens habitu charitatis non malè utitur, tametsi juxta totum illius conatum non operetur.

Adde, argumentum illud probare solum, operanti remissè non conferri augmentum; sed minimè convincere, operantem non benè & meritoriè operari. Nec est necesse, quod si actui remisso convenit meritum, conferatur etiam præmium; quia ut statim ampliùs confirmabimus, præmium sæpe est merito posterius: unde non oportet merenti augmentum charitatis statim infundi clementum quod meretur, donec ad illud fuerit voluntas per actum æqualem, vel intensiorem præparata; quia ut in sequenti parte ostendemus, augmentum charitatis juxta legem potentiæ Dei ordinariæ metiendum est juxta modum intensiōis qualitatum naturalium, vel habituum moralium, quos certum est non nisi perfectionis actibus augeri.

Ad locum D. Thomæ respondeo, plures è discipulis S. Doctoris existimare Angelicum Præceptorum opinionem in libris Sententiarum à se traditam revocasse; sed ad has angustias minimè redactus fuerit, qui mentem D. Thomæ fuerit assequutus. Etenim nihil aliud vult S. Doctor, nisi quod nos in secunda parte statim monstrabimus, nimirum augmentum illud non statim conferri, & consequenter hominem non mereri augmentum charitatis statim conferendum. Nam post verba in objectionē relata sic habet. *Non meretur homo augmentum charitatis secundum quod charitas remanet principium merendi, sed solum secundum quod charitas pertrahit ad perfectionem præmii.* Quibus verbis clarè indigitat, augmentum charitatis non quidem statim conferri, quod est mereri charitatem secundum quod est principium meriti;

charitas.

charitas quippe physicè aucta, est principium meriti etiam secundùm gradum augmenti; sed nihilominus vult hominem per actum illum mereri augmentum, quod est mereri charitatem secundùm quod pertinet ad perfectionem præmii; præmium enim merito respondet: quod præmium homo consequetur cum se ad illud disposuerit. Hanc esse gerinanam S. Thomæ intelligentiam, patet ex his quæ habet in 2. libro *sentent. dist. 27. quest. 1. art. 5.* ubi loci adducti ex primo libro meminit, ad illumque se refert his verbis: *Quando actus meritorius se habet ad præmium solum in ratione meriti, tunc verum est, quod sicut quis per unum actum ejusdem rationis meretur præmium, ita & per alium: secus autem est quando actus meritorius se habet ad præmium non solum ut meritum, sed quodammodo ut causa. Et sic se habet actus meritorius ad augmentum gratiæ: unde non oportet, quod quilibet actus meritorius augmentum gratiæ mereatur, quia non in quolibet actu meritorio invenitur illa conditio, per quam ex actu consequatur augmentum habitus; sed solum in illo actu, quo quis utitur prædicta gratiæ secundùm proportionem suam virium, ut in nullo gratiæ Dei desit per negligentiam, ut in 1. lib. dist. 17. dictum est. Quibus verbis apertè docet D. Thomas, actum charitatis quemlibet habere rationem meritî, sed non habere rationem causæ, seu conditionis, quâ positâ statim conferatur augmentum; sed illum solum, in quo juxta proportionem virium voluntas operatur. Actui ergo duntaxat denegatur meritum augmenti actu collatî, non suo tem-*

pore, quando erit debita dispositio conferendi: quæ est vera sententia statim defendenda.

Actui remisso non statim confertur augmentum habitus.

Secunda pars speculationis est contra Gabrielem, Majorem, Nominales, quos sequuntur Suares, Vasques, Turrianus, alique arbitantes, quolibet actu charitatis, quantumlibet remisso, statim augeri gratiam & charitatem, subindeque ampliorem illi respondere gradum gloriæ, si homo in gratia decedat. Verum huic asserto universa S. Thomæ doctrina refragatur. Nam præter testimonia hæcenus recensita, non potuit luculentiùs mentem suam aperire Doctor Angelicus, quàm dum in corpore artic. 6. quæst. 24. sic formaliter scripsit: *Non quolibet actu charitatis charitas augetur, sed quilibet actus charitatis disponit ad charitatis augmentum, in quantum per unum actum charitatis homo redditur promptior iterum ad agendum secundum charitatem; & habilitate crescente homo prorumpit in actum ferventiorum dilectionis, quo conatur ad charitatis profectum; & tunc charitas augetur in actu.* Quod explicat exemplo à motu augmenti corporalis animalium & plantarum desumpto. Sicut enim ad augmentum corporum non exigitur ut clementum sit continuum, ita scilicet, quod si aliquid augetur in tanto tempore, necesse sit quod proportionaliter in qualibet parte temporis secundum aliquid augeatur, sicut contingit in motu locali, in quo per singulas temporis partes aliqua

qua spatii pars decurritur; sed sufficit quod per aliquod tempus natura dispositiones ad augmentum nihil actu augens operetur, ut postmodum præmissis dispositionum apparatu augmentum suo tempore subsequatur: Ita similiter in augmento spiritali charitatis non est necesse, quod quolibet actu etiam remisso charitas augeatur; sed sat est, quod per illum dispositio ad augmentum præparetur. Nec propterea actus illos remissos eliciens in via Dei stat, vel retrocedit dum non crescit, quia ut ad 3. ait, in via Dei procedit aliquis non solum dum actu charitas ejus augeatur, sed etiam dum disponitur ad ejus augmentum. Imò solutione ad 1. quanvis fateatur, quolibet actu charitatis hominem mereri ipsum charitatis augmentum, contendit tamen augmentum illud non statim effici, *sed quando aliquis conatur ad hujusmodi augmentum.* Quam doctrinam generalem esse vult pro omnibus virtutibus in solutione ad 2. Etiam, inquit, *in generatione virtutis acquire non quilibet actus complet generationem virtutis, sed quilibet operatur ad eam ut disponens: Et ultimus, qui est perfectior, agens in virtute omnium præcedentium, reducit eam in actum: sicut etiam est in multis guttis cavantiis lapidem.* Unde luce clarius est, recentiorum doctrinam evidentem S. Thomæ adversari.

Ratio fundamentalis ex S. Thomæ locis eruitur in hunc modum. Idem ordo, eademque proportio in augmento charitatis observatur, quam in infusione observare solet Deus; cum enim à solo Deo charitas & infundatur, & augeatur, nec nostris actibus ingeneretur; recta ratio postulat, ut eandem in accretione servet

proportionem, nec minorem exigit dispositio-
nem, quàm in infusione prima; quæ utique hoc
ipso, quod est prima, minorem videretur exi-
gere dispositionem; unde ad minus eadem re-
quiritur pro cumento dispositio. Atqui sic est,
quod gratia & charitas non infunduntur adul-
tis, saltem de lege ordinaria, nisi juxta, & pro-
portionaliter ad eorum dispositionem, dispo-
sitionisque quantitatem, quâ ad earum receptio-
nem per modum physicæ dispositionis aptan-
tur; unusquisque enim, ut habetur *Matth. 25.*
talentum secundum propriam virtutem accepit,
idest secundum propriam dispositionem sub
motione Spiritus sancti gratiam advocantem,
ad eamque conantem. Unde Tridentinum sess. 6.
cap. 7. *Verà, inquit, justi nominamur & sumus,
justitiam in nobis recipientes, unusquisque suam,
secundum mensuram, quam Spiritus sanctus par-
tetur singulis prout vult, & secundum propriam
cujusque dispositionem, & cooperationem.* Hinc
Hieronym. in caput 4. ad Ephesios: *Gratia,*
inquit, *juxta mensuram credentibus datur, juxta
mensuram vasculorum infundit liquorem, tan-
tùm muneris largiens, quantum potest ille, cui
donatur, accipere.* Quæ vasculorum mensura
nihil aliud est, quàm dispositio, & voluntatis sub
Dei auxilio promovente capacitas, cui Deus,
utpote causa & provisor universalis, se accom-
modat. Certè cum in adultorum justificatione,
quæ absque priorum actuum apparatu non
contingit, unus alio sanctior sit, uberiorque
gratiâ perfundatur, non potest ulla hujus distri-
butionis inæqualitatis ratio assignari, nisi quod
alter in ferventiorē, alter in minùs ferventē
actum proruperit. Ipsâ etiam experiētiâ com-
pertum

pertum est, tantum abesse, actibus remissis augeri in nobis charitatem, Deique amandi facilitatem, quod potius experimur actuum tepiditate, & animi torpore charitatem in dies languescere, donec tandem excidat. Ergo homo non consequitur augmentum charitatis, nisi sit ad illud sufficienter physice dispositus: quam quidem dispositionem physicam manifestum est ipsum non habere per actuum remissorum productionem.

Dices: Magnum interest discrimen primam inter infusionem gratiæ, & ejusdem augmentum; quia nimirum actus præcedentes justificationem non sunt meritorii, utpote à persona gratiâ gratum faciente destituta proficiscentes. At vero actus post justificationem elicit, sicut à subiecto grato procedunt, ita æternæ vitæ meritorii sunt: unde non mirum, si in prima justificatione requiritur physica actuum disponentium proportio, cum nulla sit moralis & meritoria, quæ tamen post justificationem adest, quia licet actus remissus non sit dispositio physice proportionata augmento, est tamen moraliter adæquata & opportuna, hoc ipso, quod est meritoria augmenti.

Respondeo ex eo, quod actus remissus sit meritorius augmenti, malè deduci, non debere physicam habere cum augmento proportionem. Quanvis enim Deus possit charitatem nostram absque propriis actibus intendere, nec teneatur dispositionis cum forma physicam proportionem servare; tamen hæc intentio non erit strictum, & verum augmentum, de quo impræsentiarum disputamus. Quemadmodum enim nullum reperitur in elementis augmentum, quando

Per

per juxtapositionem absque propria ulla operatione concreſcunt; ſed verum augmentum in ſolis viventibus invenitur, quippe quæ ad illud per actus facultatis augmentativæ concurrunt: ita non contingit ſpiritale charitatis augmentum, niſi adſit prævia actuum præparantium diſpoſitio. Et certè talis eſt charitatis, cæterarumque infuſarum virtutum, connaturaliſque modus, ut non recipiantur in adulto, niſi præviis actuum diſpoſitionibus inſtructo. Unde ſicut non infunditur niſi in ſubjecto diſpoſito, ita non magis iufunditur, niſi in ſubjecto magis diſpoſito; non magis autem diſponitur per actus remiſſos, quibus potiùs quadantenus, ſi dicere fas eſt, indiſponitur, præſertim ſi rarò exerceantur; actibus enim remiſſis rarò elicitis ad charitatis interitum via ſternitur & munitur.

Aliis argumentis à poſteriori petitis impugnant noſtri Thomiſtæ opinionem Nominalium. Primò, quia ex oppoſita ſententia ſequeretur, quod quando homo juſtificatus exercet deinde ſuum habitum, ſive per actus remiſſos, ſive per intenſos id præſtet, ſemper habitus erit intenſior actu. Nam ſi præditus habitu ut ſex eliciat actum ut unum, habitus erit intenſus ut ſeptem; ſi verò eliciat actum ut ſex, habitus erit intenſus ut duodecim. Unde ulterius ſequitur, lumen gloriæ nullam habituum cum intenſione actus & habitus charitatis proportionem, nec juxta eorum meſuram infuſum iri, cum actus & habitus charitatis nullas inter ſe proportionis leges obſervent. Verùm hoc inconveniẽs facile devorabunt adverſarii, & facile dicent, luminis glorioſi quantitatem vel habitui charitatis,

tis, vel actibus remissis sæpius repetitis commensurari. Immo in nostra sententia postea stabilienda habitus semper, aut ferè semper est actu intensior; actu quidem remisso, ut patet, quia iste virtutem non adæquat; actu etiam intenso, quia semper augetur habitus secundum totam actus intensioris latitudinem; idest tot adduntur intensioris gradus habitui, quot sunt in actu intensiori, quo augetur.

Secundò idipsum probant, quia sequeretur, quod nulla esset proportio inter augmentum habitus charitatis uno instanti exercitii comparatum, & augmentum ejusdem habitus charitatis in tempore determinato productum, ita ut secundum sit primum infinitis gradibus excessivum. Nam cum nulla sit proportio inter tempus & instans, & in tempore sint infinita instantia, si ex quolibet actu etiam remisso sequatur augmentum habitus, sicut in primo instanti actus est habitus, ita intra tempus, in quo sunt infinita instantia, habitus infinitum consequetur incrementum. Quod si dicatur, continuationi actus non respondere augmentum habitus, sed primæ ipsius productioni, falsum omninò id dicitur: tum quia, ut dicebat D. Thomas, actio augmentativa, & in viventibus, & in vita spiritali præcipuè fit in tempore, non in instanti, sicut generatio. *Per aliquod tempus*, inquit art. 6. *natura operatur disponens ad augmentum, & nihil augens actu; & postmodum producit in effectum id quod disposuerat.* Ita etiam non quolibet actu charitatis charitas actu augetur, &c. Tum quia ex hac responsione sequeretur, bonum esse & utile interrompere exercitium actualis Dei amoris; quod toti Patrum spiritualium doctrinæ

doctrinæ adversatur. Etenim si augmentum charitatis non continuationi actus, sed soli actui primo instanti producto respondet, consequens planè erit, quod si intra horam centum eliciantur actus aliquâ morulâ temporis interstincti, habitus centies augebitur, qui per continuum unius horæ exercitium adauctus non fuisset.

Mirum est, quot solutiones huic argumento adhibeant recentiores subtilitatum instantanearum, idest imperceptibilium, amantes. Sex, aut septem affert Turrianus; sed non vacat in iis apicibus tam tenuibus minutatim confutandis immorari. Suspiciantur tamén aliqui in hoc argumento calculatorio (sicut in aliis similibus solet) aliquam latère fallaciam, cum possit in ipsum Bannes (qui valde illud urget) facile retorqueri. Quia ipsemet cum cæteris omnibus docet, quovis actu remisso, & qualibet actus continuatione mereri hominem majus præmium accidentale; sicut quolibet malo, quamlibet remisso, ejusdemque continuatione meretur præmium accidentale: ergo si valet præfata computatio, nulla erit proportio inter meritum præmii accidentalis correspondentis actui continuato per horam; & meritum ejusdem præmii correspondentis actui per unum instans elicitio; sicuti nulla est tempus inter & instans proportio. Nulla etiam erit proportio inter præmium accidentale respondens multiplicationi actuum, & inter præmium accidentale respondens ejusdem actus continuationi, siue nihil continuationi respondeat, quia tunc melius erit sæpe interrumpere, quàm eundem actum continuare; subindeque cordis evagationes, quibus ab amore actuali distrahimur, quas pietati

tati exitiosas, tantoperè Patres averfantur, erunt attentione cordis utiliores, ut suprà nos argumentabamur, sive aliquid continuationi respondeat; si enim aliquod præmium accidentale debetur actui remisso multiplicato, & in instanti elicitò, debetur præmium absque proportionè majus actui per horam, in qua sunt infinita instantia, continuato.

Ab his tamen replicarum nodis expedire se conatur Bannes ingeniosè, & juxta solidè, afferendo rationem disparitatis. Quia nimirum actui charitatis, prout exercetur in instanti, non debetur præmium accidentale, sed solum substantiale; præmium verò accidentale non nisi actui jam existentì, & circumstantiis accidentalibus (inter quas continuatio numeratur) vestito debetur. Unde majus, minusve erit præmium accidentale pro majori, vel minori continuationis perseverantia. Quod tamen præmium continuationi respondens non excedet in infinitum præmium accidentale respondens instantaneæ multiplicationi; quia præmium continuationi debitum non confertur ei ratione instantium infinitorum, quæ hora includit partibus permixta; sed ratione perseverantiæ, & firmitatis, quæ specialem, sed non infinitam invehit difficultatem; unde speciale quidem, sed non infinities majus præmium ei accidentale debetur.

Atque ex his omnibus liquidò claret, non per quemlibet charitatis actum, etiam remissum, consequi hominem statim charitatis augmentum; sed tunc duntaxat quando per æqualem, vel intensiorem habitu actum disponitur; quia tunc voluntas ex tota charitatis virtute & conatu

conatu operatur. Dixi, per æqualem, vel intensiorem actum. Quia licet juxta probabiliorem sententiam habitus acquisitus non per actus æquales, sed duntaxat per intensiores augeatur, sufficit tamen ad habitus infusi augmentum actus habitui æqualis productio. Et ratio discriminis est, quia habitus acquisitus physicè, & efficienter ab actibus generatur; subindeque actus ut quatuor habitum ut quinque producere nequit, nec intensiorem producere gradum, quàm sit ille, quem habet, cum nemo det quod non habeat. At verò charitatis, virtutumque infusarum actus non effectivè, sed dispositivè ad augmentum sui habitus concurrunt. Unde quia Deus solus hujusmodi actuum productor, solus & auctor, nihil aliud à nobis exigit, ut dona sua conferat, collataque augeat, nisi ut benè utamur acceptis, & secundùm totam virtutis à Deo datæ mensuram operemur, quia tunc in vacuum gratiam Dei non recipimus, sine dubio contentus erit, dum nos viderit pro virili operantes, & totam nostram habitualement potestatem adæquantem.

Dices: Ex Tridentino suprà citato justus per bona opera (quales sunt sine dubio actus amoris Dei, tametsi remissi sint) meretur augmentum gratiæ, ac subinde charitatis, quæ sine à gratia non distinguitur, certè ab ea nunquam separatur: ejusque clementis conformatur. D. etiam Thomas docet, actus remissos disponere ad augmentum gratiæ, ac proinde statim illud consequitur, cum statim illud mereatur. Neque enim aliter ad augmentum illud disponitur homo, quàm actibus meritoriis, quibus veluti dispositionibus moralibus præparatur voluntas
ad

ad charitatis clementiam. Ergo licet in augmento habitum acquisite requiratur actus intensus, quia à proportionem minoris inæqualitatis non fit actio, tamen ad augmentum habitus infusi sufficit actus remissus, cum ad habitum illum, siue efficiendum, siue augendum, non concurrat voluntas efficienter, sed augmentum illud à Deo promereatur. Maxime quia quando voluntas prædita habitu quinque gradibus, vel pluribus intenso producit actum sex gradibus, vel pluribus intensum, tunc habitus non producit actum ob improprietatem; effectus enim non potest esse perfectior causâ, sed actus ille producit à voluntate ex Dei auxilio, quo constituitur principium potens producere intensiorem actus: ergo non necessario ad augmentum requiritur actus intensior elicitus ab habitu, qui illum non potest producere, sed sufficit meritum augmenti, quod conuenit etiam actui remisso.

Respondeo, certum esse, hominem per quemlibet actum mereri & gloriam, & aliquem novum gradum gratiæ: sed sicut statim non confertur gloria, ita nec augmentum gratiæ. Verè ergo Tridentinum cuiuslibet actui meritum assignavit, sed statim conferri præmiū minime definivit. Veridicè etiam affirmat D. Thomas, per quemlibet actum remissum disponi remote voluntatem ad charitatis incrementum; disponi verò proximè, ita ut statim augmentum sequatur, nunquam, vel nusquam dixit S. Doctor, sed solum cum habilitate crescente, voluntas in actum ferventiorē prorumpit, ut subdit eodem loci D. Thomas. Certè eadem ad minus requiritur dispositio ad augmentum, quæ ad gratiæ infusionem exigitur: in justificatione

autem adulti, quæ non fit unquam sine actu & motu liberi arbitrii, gradus gratiæ & charitatis habitualis responderet intensiori actui æquè ac si habitus per actum physicè produceretur: ergo eadem proportio debet cæteris paribus in augmento servari, ut nimirum toto conatu voluntas operetur. Quare actibus remissis meritoriiis, præsertim frequentatis, disponitur quidem voluntas ad augmentum, at non statim, sed sùduntaxat tempore conferendum. Ad id quod ultimò additur, dicendum falsum esse, habitum charitatis non concurrere ad actum intensiorem; quia licet iste habitus gradu excedat, habitus tamen per auxilium divinum (sine quo justus actus bonos elicere nequaquam potest) roboratur, fitque intrinsecè potens concurrere ad ipsam gradus perfectioris intensiorem, à qua rursus ipsemet habitus augetur, sed in diverso genere causalitatis; habitus enim effectivè influit in actum; actus verò ad habitus augmentum non nisi moraliter, & meritorie disponit.

Instabis: Ex nostra doctrina sequitur, actibus remissis nullum unquam respondere præmium, quod tamen de condigno promerentur: etenim si nunquam conferatur augmentum, nisi homini per actum æqualem, vel intensiorem disposito, semper præmio suo depulsi & frustrati manebunt actus remissi; quia etiam si non præcessissent, idem tamen augmentum actui intenso corresponderet. V. g. sit homo præditus habitu charitatis ut sex, qui eliciat actus charitatis ut duo, & postea prorumpat in actum intensum ut octo: tunc conferetur solum augmentum ut octo: ergo nihil respondebit actibus remissis

ut

ut duo, qui actum illum intensum præcesserant; quia nunquam invenietur illa proportio, quam tam exactè & rigorosè exigimus; ac proinde perit, & evanescit fructus totus actuum remissorum. Ex quo ulteriùs sequuntur inconvenientia gravissima: si enim actibus remissis nihil conferatur distinctum à præmio actus intensi, sequitur in casu duorum hominum, quorum unus habeat charitatem ut sex, alter verò ut tria, & uterque eliciat actum amoris ut quatuor; sequitur, inquam, habentem charitatem inæqualem per actum æqualem majus augmentum, majusque præmium obtenturum; cùm enim secundum nos habitus augeatur secundum totam latitudinem actus intensioris, sine dubio habitus charitatis ut tria per actum dilectionis ut quatuor augebitur usque ad septimum gradum; habitus verò charitatis ut sex remanebit intra sextum gradum, cùm actus ut quatuor sit remissus respectu illius, ac proinde per illum minimè augeatur. Ergo deterioris erit conditionis qui est in altiori gradu habitualis charitatis: ergo ab inæquali per actum æqualem superabitur; nec solum per actum æqualem, sed etiam per minorem vincetur; putà si præditus habitu ut sex eliciat actum ut quinque, non crescet habitus; & si habens charitatem ut tria, eliciat actum ut quatuor, crescet habitus ad septimum usque gradum. Quis hanc distributionem, quæ injustitiæ speciem præ se fert, libens admittat? Quis credat consequenter, præditum habitu ut tria, per actum ut quatuor assequuturum majorem gloriam cum minoti merito; cùm tamen una, & tota inæqualitatis præmii mensura sit diversitas meritorum?

Respon

Respondeo, actus remissos non privari debito præmio, quia augmentum actum intensum consequens, sicut & novus gradus gloriæ illi correspondens, duplici titulo confertur; & ratione nimirum actus intensi, & ratione repetitorum actuum remissorum, qui præcesserunt. Quanvis enim cuilibet actui meritorio præmium aliquod debeatur, non tamen distinctum confertur, sed idem novo modo, novoque titulo conceditur, quando nimirum distinctum præmium distinctam exigit in subjecto dispositionem. Quod explicant aliqui exemplo duorum, quibus in præmium virilis, strenuæque certaminis promisit Rex liberum ad suam mensam accessum: hæc pugna est moralis dispositio, quæ Regis convictum promeretur; sed quod unus plus, vel minus cibis & deliciis regiis fruatur, ex dispositione stomachi, vel gustus proficiscitur. Ita similiter gloria æterna actibus dilectionis & debetur, & confertur: verum ille plus manducabit panem super mensam Christi in regno Patris, non qui sæpius, sed qui amplius, & intensius Deum dilexerit. Quia ut ait D. Thomas 1. p. quæst. 12. art. 6. *Plus participans de lumine gloria plus Deum videbit: plus autem participabit de lumine gloria, qui plus habet de charitate; quia ubi est major charitas, ibi est majus desiderium: & desiderium facit quodammodo desiderantem aptum & paratum ad susceptionem desiderati.* Et compendiosè August. tract. 8. in Joan. *Desiderium dilectionis preparatio est mansionis.*

Et quia hanc doctrinam, tamen si ad excitandum animi leporem tantoperè necessariam quidam neotericæ etiam Thomistæ vel irrident, vel
etiam

etiam indignantur, ut eorum fastidio & stomacho consulamus, placet selecta quædam D. Thomæ testimonia longè præclarissima in medium proferre, ea illis oppositurus, qui nescio quâ fronte se discipulos D. Thomæ dictitant, qui tam apertam & expressam S. Doctoris sententiam tam apertè & expressè refellunt. *Wicendum*, inquit in 3. dist. 18. quæst. 7. art. 2. ad 4. *quod oportet, quod omnis qui meretur, proficiat quantum ad mercedem, ut scilicet eam sibi faciat debitam simpliciter, vel quantum ad aliquem modum, quo priùs non debebatur.* Et art. 5. dicit, meritum contingere tripliciter: *Primò quando aliquis premium de non debito facit sibi debitum. Secundo quando facit magis debitum quod erat minùs debitum; quod contingit in eo, in quo charitas augetur. Tertio quando facit sibi debitum uno modo, quod debebatur antea alio modo.* Quod explicat exemplo pueri, qui per primum charitatis actum facit sibi vitam æternam debitam titulo meriti, quæ sibi priùs titulo hæreditatis debebatur: & exemplo Christi, qui gloriam corporis titulo connaturalitatis debitam, merito etiam humilitatis ascivit. Quibus verbis nihil planius, nihil luculentius. Certè inde magis suadeor, sententiam, quam propugno, esse ipsissimam S. Thomæ mentem, quòd moderni eam impugnantes illi uni fundamento veluti cardini innixi sint, non posse idem premium duobus meritis respondere: & tamen illa ratio, quæ illis est loco hastæ & clypei, D. Thomæ doctrinæ, & verbis formalissimis manifestissimè adversatur.

Ex quibus absque negotio responderetur ad inconvenientia deducta. Neque enim mirum, & multò

multò minus inconueniens censendum est, quod qui intensiori habitu præditus est, si tepidè, & non iuxtaq̃ dona sibi concessa graviter operatur, deterioris sit conditionis eo, qui habitu remisso instructus nihilominus in actum intensum prorumpit. Sicut non fuit inconueniens, Patremfamilias novissimos in vinea laborantes pares eis fecisse, qui portaverant pondus diei & æstus, quia fervore & instantia laboris, quod de tempore deerat, suppleverant. Sicut etiam adversarii non reputant inconueniens, actui remisso non dari statim augmentum charitatis defectu dispositionis. Non etiam mirum, quod præditus habitu perfectiori, sed remissè operans, vel æqualem, vel etiam minorem gloriæ gradum assequatur, quia ut præclare & ferè divinè prosequitur S.Thomas in 4. dist.49. quæst.1.art.4.quæst.4.ad 2.& 3. *Retributio gloria non est secundum numerum operationum, sed secundum diversos gradus charitatis.* Et sanè non qui pluries meretur, plus meretur, nisi ratio merendi sit major. Et ratio hujus inconcussa sæpe traditur ab Angelico Doctore, quia nimirum, quantumlibet aliquis actus remissos multiplicet, licèt pluries diligat; attamen nunquam tantum diligit, quantum ille qui in actum intensiorem prorumpit: non debet autem majorem habere gloriam, majorisve gloriæ gradum, qui minorem elicit dilectionis motum; intensio quippe luminis gloriæ, non multiplicationi actuum, sed intensiori amoris respondet.

Urgebis cum M.Serra & Goneto: Hæc nostra doctrina non salvat propriam retributionem actibus remissis debitam, cum præmiū augmenti

augmenti correfpondeat adequatè actui inten-
fo : unde tamen non præcelliffent actus re-
miffi , idem tamen augmentum contingeret
charitati, idem etiam gloriæ gradus refponde-
ret : ergo planè evacuabitur meritum actuum
remifforum. Nec fufficit refponfio de duplici
titulo : tum quia quod præmium novo titulo
conferatur, non auget utique præmium , fed
idem effe fupponit : tum quia denarius debitus
ex iuftitia operanti pro labore unius diei , non
potefteffe merces alterius diei, quantumvis du-
plici titulo dari dicatur : tum quia non minùs
Deus remuneratur opera bona , quàm caftiget
opera peccati , cùm juxta tritum axioma dici
foleat , Deum ultra condignum præmia repen-
dere , citra condignum punire : in inferno au-
tem cuilibet peccato refpondet fua pœna , nec
eadem diverfis peccatis duplici titulo pœna in-
fligitur. Indignum autem videtur divina boni-
tate , ut pro actu malo, quàmlibet remiffio, fpe-
ciali pœna plectatur injuftus ; & pro actu bono
non recipiat juftus diftinctam mercedem , fed
eamdem diverfo titulo fibi donatam.

Refpondeo , actibus remiffis refpondere qui-
dem propriam retributionem , idefte condignam,
fed non diftinctam , quia diftinctum præmium
diftinctum amoris fervorem exigit , quia folus
eft amor, quèm Deus muneratur ; nec potefteffe
intenfior vifio , fi non fit intenfus videndi de-
fiderium ; non eft autem intenfus defiderium,
fi defit amor fervidior , & multò minus fi fit re-
miffior. Nec exemplum operarii ex denario
diurno huic veritati officit : tum quia in ope-
rariis illis remuneratur Paterfamilias opus ex-
ternum : Deus autem radicem charitatis inSpi-

cit, nec tam quantum attendit,quàm ex quanto: non ergo mirum, quod operi externo distincti diei distincta merces rependatur, quia præmium illud conditi denarii non novam requirit sequenti die dispositionem, sicut exigit præmium visionis beatæ, quæ non tam multiplicationem actuum, quàm cordis flammantis ardorem, ardorisque continuationem, quâ potissimum fervor incalescit, desiderat. Tum etiam, quia sua etiam manet actus remissos retributio; nam sicut operi plurium dierum plures denarii; ita multiplicatis actibus remissis ampliora præmia accidentalialia donabuntur. Et in hoc concedi potest exempli adducti similitudo.

Ad paritatem verò ex pœna damnatorum desumptam dici posset in primis, plura ad præmium obtinendum, quàm ad pœnam subeundam desiderari; sicut enim plures ad opus bonum circumstantiæ concurrunt, quarum, vel unius defectus opus inficit, & malum efficit; bonum quippe ex integra causa, & malum ex quocumque defectu: ita plura ad distinctum præmium, quàm distinctum supplicium in operibus exiguntur. Responderi potest secundò, duplicem esse damnatorum pœnam; essentialem unam, quæ in separatione à Deo primò & per se; & dolore inde proveniente consequenter sita est; alteram accidentalem, quæ ex ignis tortura, dæmonum convictu, aliisque sine fine & modo suppliciis oritur. Porrò propter plura peccata ejusdem, vel minoris malitiæ patietur damnatus plures accidentarias pœnas; sed majori malitiæ respondebit, non quidem major Dei privatio; quippe quæ cum totam formam auferat, non suscipit magis & minus; sed major à

à Deo recessus , major cum Deo repugnantia, quam explicare solent Theologi exemplo exilii : licet enim exilium decem leucarum patriæ fruitione priveret ; qui tamen in novum orbem relegaretur ; magis à patria recederet , ad eamque videndam majorem haberet repugnantiam, unde acerbior dolor , & tristitia amarior derivatur. Similiter quanvis in damnatis eadem sit ejusdem Dei visi privatio , tamen inæqualis est cordis mœror pro inæqualitate malitiæ ; tantumque datur tormentorum , quantum in deliciis fuit mala voluntas.

Insistes : Si propter solos actus æquales , vel intensiores augetur charitas , majusque præmium essentiale tribuitur , frustra multiplicabuntur actus remissi , frustra in ejusdem actus continua assiduitate permanebimus , cum actus continuus , & actus in unico instanti exercitus non differant ex parte objecti , neque ex parte intensiōis , sed ex externa duntaxat temporis circumstantia.

Respondeo , has sequelas perperam ex nostra sententia deduci ; nam præterquam quod actibus remissis multiplicatis , ejusdemque actus continenti assiduitati suum respondet præmium accidentale non contempnendum ; insuper actibus remissis disponitur cor, & veluti sensum molitur , ut in amorem deinde ferventiorē prorumpat. Continenti etiam amoris instantiā accendi solet flamma charitatis ; nam in meditatione exardescit ignis , & cor nostrum ardens fit, si diu cum Salvatore loqui non desistimus. Maxime quia actuum intensio nos latet ; nam licet sensibilis divinorum amor sit fervoris indicium, fallit tamen interdum , quia amor proprius di-

vinum sæpe mentitur : & sæpe robustior est Dei amor in internis animæ angustiiis , & arescentis animæ languoribus , quàm inter animi divinis consolationibus perfusi delicias. Unde actibus amoris , tametsi in speciem remissis , vacandum est , quia & fortè remissi non sunt ; & qui si sint , frequentati tamen ad fervidiores cum Dei gratia & disponunt , & perveniunt.

Atque ex his manifestè deducitur contra Scotum in 4. dist. 22. *quest. unica* , actibus remissis , sicut nec gratiæ augmentum , ita nullum distinctum gloriæ essentialis gradum respondere. Quantitas enim gloriæ non nisi amoris quantitati respondet , & illi soli dabitur major gloriæ gradus , qui fuerit in dilectione ferventior. Maximè quia gratia nihil est aliud , quàm acceptatio ad gloriam ; eo enim ipso , quod nos participes facit divinæ naturæ , filios Dei efficit , subindeque cœlestium bonorum hæredes : ergo repugnat aliquem ad majorem gloriæ gradum acceptari , nisi majori etiam gratiæ munere decoretur , cùm gratia sit semen & radix gloriæ : charitas autem & gratia , sin distinguntur , ut plures credunt ; certè , quod verius est , eodem passu currunt , eodemque intensiōis gradu gaudent. Ergo si Scotus concedit , in hac vita non augeri charitatem per actus remissos , sed solùm si homo se ferventiori actu disponat , inconsequenter omninò docet , hominem nihilominus in futura vita intensiorem gloriæ gradum habiturum actuum remissorum merito respondentem.

Quorum omnium firmamentum invictissimum tomo superiori , dum de commendatione vitæ interioris , latè stabilivimus , dum ostendi-

nus

dimus totam bonitatem, totumque subinde meritum uni actui interno deberi, ac proinde meritum pro intensiōe actus interni crescere, incremento essentiali. Quæ doctrina tam pura, quæve meo quidem iudicio, totius vitæ spiritualis medulla est, nonnullis tamen modernis difficilis visa est, cum tamen totius sit difficultatis spiritualis levamen & condimentum. Unde miror, nonnullos non timuisse scribere, plus præmii obtenturum eum, qui totam suam, eamque ingentem substantiam ex charitate dederit, quam illum, qui ex æquali, imò & majori dilectione unum denarium dederit. Quam quidem doctrinam totius solidæ pietatis & Christianismi essentia, quæ tota quanta in amore sita est, inimicam arbitrâmur; ad eamque confutandam clarissima possunt S. Thomæ & Patrum testimonia adduci. *Quantitas meriti*, inquit S. Doctor 1. p. quæst. 95. art. 4. *ex duobus pensari potest: uno modo ex radice charitatis & gratia; & talis quantitas meriti respondet premio essentiali, quod consistit in Dei fruitione; qui enim ex majori charitate aliquid facit, perfectius Deo fruitur: alio modo pensari potest quantitas meriti ex quantitate operis, quæ respondet premio accidentali, quod est gaudium de bono creato.* Idem perspicue docet 1. Cor. 3. lect. 2. in illa verba: *Unusquisque propriam mercedem accipit secundum suum laborem.* Ubi inter multa præclara sic habet: *Qui ex majori charitate laborat, licet minorem laborem patiatur, plus de premio essentiali accipiet.* Quibus verbis nihil apertius. Quam doctrinam è Patribus deprompsit S. Thomas: Augustinus enim lib. 83. quæst. quæst. 46. ait, quod anima quantum charitate adhærescit, tantum

lumine gloria illustrabitur. Et Magnus Gregor. hom. 5. in Evangel. exponens illud Matth. 4. Petrus & Andreas, ait: Sed fortassis aliquis tacitus secum cogitationibus dicat: Ad vocem dominicam uterque iste piscator quid, & quantum dimisit, qui penè nihil habuerit? Sed in hac re, fratres charissimi, affectum debemus potius pensare, quàm censum. Et post aliqua: Cor namque, & non substantiam pensat Deus; nec perpendit quantum in ejus sacrificium, sed ex quanto proferatur. Hinc vir Apostolicus S. Vincen- tius Ferrerius serm. 4. Dominica in Septuag. inquit: Meritum gratia in hoc mundo, & pramium gloria in alio magis venit ex affectione cordis, & fervore spiritus, quàm ex multiplicatione bonorum operum. Unde August. Non numerositas operum, non diuturnitas temporum, sed major charitas, majorque voluntas auget pramium. Et ratio horum omnium est, quia perfectio vitæ Christianæ in sola dilectione consistit, ut tradit Apost. Coloss. 3. Super omnia charitatem habete, quæ est vinculum perfectionis. Et demonstrat D. Thomas infrà quest. 184. art. 1. & 3. ex eo, quod unumquodque dicitur perfectum, in quantum attingit proprium finem, qui est ultima rei perfectio: charitate autem attingimus ultimum finem nostrum, eique unimur, juxta illud: Qui manet in charitate, in Deo manet, & Deus in illo. Patet autem, quod perfectioni essentiali vitæ Christianæ correspondere debet præmium essentialiale beatæ vitæ: Ergo uni charitati debetur merces essentialis, & majori charitatis fervori intensior gloriæ gradus.

Nec dicas, ex nostra sententia sequi, negligendum piorum operum exercitium, nec ardua esse

esse intrepido animo suscipienda, sed duntaxat facilia, modò in charitate efficere illa conemur. Non, inquam, id dicas. Hanc etenim objectio- nem loco citato prævidit Magnus Gregorius, eamque his verbis solidè confutavit. *Ante Dei oculos nunquam est vacua manus à munere, si fuerit arca cordis repleta bona voluntate. Ad vosmetipsos, fratres charissimi, introrsus redite (inquit idem Pater hom. 30.) Si Deum verè amatis, exquirite. Nec tamen sibi aliquis credat quidquid sibi animus sine operis attestazione responderit. Nunquam est Dei amor otiosus; operatur enim magna, si est; si autem operari renuit, amor non est. Unde qui credunt se amare Deum, & nihil, vel parum operantur, sibi ipsi blandiuntur, suntque fallentes semetipsos, ut dicitur Jacobi 1. Certè si non sequitur effectus ex voluntate, signum est eam esse sterilem, inefficacem, amore Dei vacuum; ex abundantia enim cordis os loquitur, & manus instanter pro virili operatur. Unde qui sunt ad bona opera multiplicanda propensiores, regulariter sunt in charitate fervidiores.*

REFLEXIO.

Continens charitatis nostræ clementum postulat, qui toto corde nostro, tota mente, tota anima, totis viribus vult amari: totum petit, ut sibi homo de se nihil relinquat: totum vult, divisionem nullam admittit, ut hominis mundanus non haberet quod violaret affectus: totum postulat, nullamque vitæ nostræ partem derelinquit, quæ vacare debeat, ut cuncta in illum conferamus, à quo habemus omnia, quæ conferimus; totum denique requirit, ut charitas ma-

gis, magisque abundet; ut si totum dare non possumus quod debemus, geminato fervore reddere contendamus.

Sed proh dolor! non charitas quotidiana suscipit incrementa virtutis, sed concupiscentia ad peccandum prona, ad progrediendum, prolabendumque proclivis, continuò & insensibiliter crescit, nec adjumentis eget ut moveatur, nec incentivis novis ut currat; ipsa sponte sua, sine duce, sine comite, facili impetu & læto procedit, viresque acquires cundo, non ubi volumus accipit finem. Et quemadmodum (comparatio est Chrysostomi *orat. advers. Gent.*) in materiam aridam cadens scintilla statim accenditur, nec subsistit, donec quod reliquum est, depascat, fortiùs se armante incendio; sic & natura peccati procedens ulteriùs pejor semper fit, magisque indomita. Unde verè scripsit Psalmographus Psalm. 41. *Abyssus abyssum invocat*; hoc est, peccatum peccato viam parat, scelus accersit scelera, & ruina ad ulteriorem ruinam gradus est.

Hæc cum ita sint, quid superest, nisi ut petamus adveniat in nos regnum charitatis, ut solus vivat, solus agat, solus in nobis dominetur Deus & totus, ut juxta Apostolum sit Deus omnia in omnibus; ut alieni à vitiis, segregati à peccatis, nihil habentes commune cum sæculo, non inflummati libidine, non stimulari avaritiâ, non lasciviâ effœminati, non decolorati luxuriâ, non invidiâ macerati, non turgidi superbiâ, denique nullâ terrenorum curâ solliciti, totis Deo sensibus adhærëamus. Hoc sibi optabat Bernardus homil. 3. in *Missus est*; hoc idem, Lector, mecum à Deo postula his Mellifui Doctoris verbis:

bis : O si mei peccatoris meminerit Iesus in bene-
placito populi sui, cum venerit in regnum suum!
Veni interim, Domine Iesu, aufer scandala de
regno tuo, quod est anima mea, ut regnes tu-
qui debes, in ea. Venit enim avaritia, & ven-
dicat in me sibi sedem; jaſtantia cupit domi-
nari mihi, superbia vult mihi eſſe rex. Luxu-
ria dicit: Ego regnabo. Ambitio, invidia, de-
tractio certant in meipſo, cujus ego potiſſimum
eſſe videar. Ego autem quantum valeo, reſiſto;
renitor quantum juvor: Dominum Ieſum meum
reclamo, ipſo me defendo, quia ipſius me juris
agnosco; ipſum mihi Deum, ipſum mihi Domi-
num teneo, & dico: Non habeo Regem, niſi Do-
minum Ieſum. Veni ergo, Domine, diſperge illos
in virtute tua, & regnabis in illa, quia tu es
ipſe Rex meus, & Deus meus, qui mandas ſalu-
tes Iacob.

SPECVLATIO II.

*Habitus charitatis ſemper actū auge-
tur per actum aequalem, & à for-
tiori per intenſiorem in hac vita
eliciendum; augetur, inquam, ſe-
cundum totam actus intenſi lati-
tudinem.*

DVO diciunt, quibus totam hanc mate-
riam ex mente S. Thomæ definimus.
Primum eſt, charitatem habitualemente augeri ne.

dum per actum intensiorem, sed etiam per æqualem habitui, modò tamen hic actus intensus in hac vita eliciatur. Altero contendimus habitum augeri secundùm totam actus latitudinem, ita ut tot gradibus habitus crescat, quot sunt in actu elicto gradus intensiōis.

Primum probatur contra quosdam modernos Thomistas, qui antiquorum ad unum omnium D. Thomæ discipulorum deferentes sententiam, mirabilem adinvenere glossam, quâ satis frigide Doctorem sanctum explicantes, in opinionem Scoti incurrerunt, quam tamen impugnare præseferunt. Dicunt ergo, quod licet charitas actibus remissis non augeatur in via; attamen quia per actus illos meritis est præmium gloriæ essentialis, ut non fraudent actus remissos suo præmio, comminiscuntur animam in instanti separationis elicere actum intensissimum, omnium præteritorum actuum remissorum dispersos gradus adunantem, quo ad augmentum charitas disponitur ex æquo, & de facto augetur, eique sic auctæ correspondent tot gradus gloriæ, quot extiterunt gradus charitatis in singulis illis actibus remissis divisivè acceptis.

Nescio planè, an isti moderni artem ariolandi, seu divinandi didicerint. Hoc unum scio, me neque Prophetam esse, neque filium Prophetæ, neque in Theologia mea vatem velle me agere, aut conjectorem. Hoc etiam scio, S. Thomam multis in locis hanc difficultatem de augmento charitatis versantem, ubique quidem actum, sin perfectiorem, saltem æqualem requisivisse; an verò actus ille in instanti separationis eliciendus sit, nunquam prophetasse, sed po-

rius oppositum apertè docuisse in 2. dist. 27. quæst. 1. art. 5. ad 2. *Non oportet*, inquit, *quod quilibet actus meritorius augmentum gratia consequatur*, quia non in quolibet actu meritorio invenitur illa conditio, per quam ex actu consequitur augmentum habitus; sed solùm in illo actu, quo quis utitur gratia accepta secundùm proportionem suarum virium, ut in nullo gratia Dei desit per negligentiam. Quæ verba non possunt verificari, nisi de statu viæ, in quem solum cadunt illa verba Apostolica, ad quæ S. Doctor alludit: *Videte ne quis desit gratia Dei.* Sed clariùs adhuc loquitur in 4. dist. 49. quæst. 1. art. 4. quæst. 4. *Diversitas in merendo tota reducitur ad diversitatem charitatis: & sic charitas viæ disponit mansiones per modum meriti.* Deinde cùm S. Doctor in omnibus doctrinæ suæ libris determinaverit tempus augmenti charitatis, dicens, quod tunc statim augetur charitas, quando homo actum ferventem elicerit, frustra aliud tempus con fingimus S. Doctori incognitum. Denique hoc commentum esse prorsus ab Angelica doctrina alienum, inde potissimùm colligo, quòd præcipuæ difficultates, quibus nostram sententiam impugnant adversarii, & duplicem titulum præmii ejusdem essentialis irrident; illæ, inquam, difficultates à S. Doctore prævisæ sunt, ab eodemque solutæ; atque illud, quod pro magno inconvenienti illi habent, Sancto Thomæ veritas fuit indubitata.

Ratio etiam à nobis stat: Quanvis enim verum sit, quod in Beatis charitas perficitur velut ex parte objecti, quatenus, ut postea ampliùs elucidabimus, objectum amoris per lumen gloriæ magis, meliusque applicatur, & charitas, ex

præsentia amici veluti liquefcere soleat ; attamen illa perfectio non se tenet ex parte subiecti, ita ut ipsa magis intendatur & crescat propter actus remissos viæ, eique major gloria respondeat. Etenim vt charitas habitualis intensius in subiecto radiceretur in ordine ad maiorem gloriam, necesse est quod producat actum magis intensum, vel saltem æqualem, qui mereatur tale augmentum : siquidem prædictum augmentum charitatis, sicut & ejus infusio, commensuratur dispositioni actuum in adultis ; nec Deus sine ejusmodi dispositione infundit, vel auget charitatem, vt fatentur ipsi adversarij contra Nominales. Præsertim quia licet infusio non exigeret hujusmodi actuum apparatus, illum tamen requireret augmentum gratiæ, & gloriæ, quia utrumque cadit sub meritum. Atqui post mortem in patria non elicitur hujusmodi actus meritorius, cum nullus amoris Dei in patria actus sit liber libertate indifferentiæ, quam ad merendum, vel demerendum in statu naturæ lapsæ desiderari Innocentius X. ab universali Ecclesia Catholica. receptus definivit. Imò dato, & non concessio, quod in instanti separationis elicitur actus amoris Dei habituali charitate intensior, & intensissimus ; propterea tamen per huiusmodi actum nunquam augeretur habitus gratiæ & charitatis, subindeque nec plenior luminis gratiosi gradus illi responderet. Etenim ille actus, quantumlibet intensus, quantumlibet actuum omnium remissorum, etiam possibilium gradus in se uniret ; tamen actus ille extra statum viæ, subindeque meriti, produceretur, & lumen ac visionem Dei sequeretur, non præcederet. Quare sicut per continuatio

novationem ferventissimi amoris per totam æternitatem duraturi, nihil de novo meretur. Beatus, tametsi continuatio illa dilectionis bona sit, parsque felicitatis, quia tempus merendi præterit, excessit, abivit, evasit, erupit, nec tunc merendi tempus est, sed fruendi; non seminandi, sed merendi: ita nec per primam amoris illius, quàmlibet intensi, productionem quidpiam Beatus mereretur. Quare longè perfectò plausibilior foret Nominalium opinio commento illo recentiorum; non enim tam absurdum est, augmentum illud fieri in via, quàm si fiat in patria; cum illud in via, non in patria voluntas mereatur.

Scio adversarios respondere, justum in primo beatitudinis suæ exordio elicere actum charitatis intensum, illicque non ut merito quidem, cum sit extra viam, sed ut physicæ dispositioni, augmentum charitatis, proindeque gloriam ampliores respondere. Verùm hæc solutio adversariorum nihilo melior est eorum positione. Nam præterquam quod semper fingunt, & nunquam probant, initio felicitatis justum in virtute actuum remissorum viæ elicere actum intensiorem charitate, in qua mortuus est, quod gravis Theologus rationi, non divinationi innixus nunquam credidit, nunquam credit, nunquam credet: præter hoc, inquam, semper urget ratio, à qua nunquam se expedient: quia nimirum non augetur charitas, vel gratia, nisi per actum meritorium, aliàs fingam. Beatos per totam æternitatem singulis momentis novas meritorum divitias magis magisque accumulare: & juxta communem sententiam Theologorum omnium calculo probatam, sicut gloria

gloria in adultis non datur in exequutione, nisi propter merita; ita major gloria nisi propter majora merita non confertur: Ergo dato, quod in limine, ut ita dicam, paradisi, & initio felicitatis eliciatur actus ex parte subjecti intensissimus, si augmentum illi non correspondeat ut merito, non correspondebit etiam ut dispositioni, quia sola ad augmentum dispositio meritum est, ut ex dictis hactenus satis, superque demonstratum manet.

Si dicas, non mereri quidem justum per illum actum, sed per actus vitæ remissos promeruisse, ut augmentum illud initio separationis conferretur: hæc, inquam, si dicis, figmentum figmento addis, & veritati contradicis: Nam si justus per actus remissos meritus est tale augmentum, meritus est etiam sibi conferri auxilium ad actum illum ferventiozem eliciendum; si autem meruit, qua ratione, quo fundamento distulit Deus illius auxilii collationem, cum posset illud idem auxilium in via, quæ status merendi est, conferre? Adde, quod absurdum non leve est, quod homo per actus tepidos multiplicatos promereatur auxilium ad actum intensissimum eliciendum, cum tamen in pœnam tepiditatis sæpe Deus auxilia subtrahat: absurdum etiam, & incredibile, & D. Thomæ contrarium, intensionem luminis gloriæ non intensiori desiderio viæ, sed multiplicationi tepidi desiderii respondere; & illum qui gratiæ defuit, qui in vacuum eam recepit, qui talentum abscondit, eandem recepturum esse mercedem, quâ donabitur ille, qui toto desiderio ad Deum contendit, qui gratiæ non defuit, qui tot talenta superlucratus est, quot à Domino acceperat ser-

vus bonus, & fidelis. Itâne eadem erit merces teporis, quæ fervoris? Itâne frustra hortatur nos Scriptura, hortabuntur nos & Patres, ut in hac die indefessè laboremus, ut dum tempus habemus, operemur bonum; quia quæ semina-verimus, hæc metemus; quia ubi ceciderit lignum, ibi erit; quia veniet mortis atra nox, in qua nullus poterit amplius operari? Si propter actus remissos multiplicatos augetur post mortem charitas, augetur & gloria; quare illud tam seriò Matth. 25. dictum est: *Habenti dabitur, & abundabit; ab eo autem qui non habet, & quod videtur habere, auferetur ab eo?* Quare Apocalypseos 2. reprehenditur Episcopus Ephesus, quòd reliquerit primam charitatem, idest primum charitatis fervorem; & quòd opera ejus non inveniantur plena coram Deo? Quare D. Thomas post venerandum Patrum omnium chorum, auferri sæpe ab eo gratiam docet, qui gratiis semel datis negligenter utitur! Hinc Bernard. serm. 54. in Cant. *Time cùm arriserit gratia; time cùm abierit; time cùm denuò reverteretur. Succedant sibi invicem in amore tres isti timores. Cùm adest, time, ne non dignè opereris ex ea; nam hoc monet Apostolus: Videte ne in vacuum gratiam Dei recipiatis, &c.* Quare demùm tam severè ait Joan. Apocal. 3. *Vinam calidus esses, aut frigidus; sed quia tepidus es, incipiam te evomere ex ore meo.*

Ultima pars, quæ docet, gratiam & charitatem augeri secundùm totam & adæquatam actus latitudinem, ita ut qui cum habitu charitatis ut quatuor elicit actum dilectionis ut quinque, statim consequatur novem charitatis habitualis graduum augmentum; hæc, inquam, pars ne-
gatus

gatur à Bannesio asserente habitum augeri duntaxat secundum excessum actus intensioris, ita ut in casu adducto homo consequatur solum unum gradum charitatis, quæ proinde manebit aucta ut quinque. Verum nostra sententia patet ex dictis supra, ubi ostendimus, charitatem, habitusque infusos per actus æquales augeri; quia cum tunc homo non desit gratiæ Dei, meretur etiam ut statim gratia augeatur à Deo, qui solus est gratiæ author: tunc autem non augeatur habitus secundum excessum actus supra habitum, cum actus supponatur æqualis: ergo aliquo alio modo augeatur habitus: sed non est major ratio cur augeatur penes unum gradum, quam penes omnes, qui sunt in actu: ergo secundum totam actus latitudinem augeatur. Quod si actus æquales id præstent, irrationabiliter illud de actibus habitus intensioribus inficiabimur. Maximè quia, ut sæpe diximus, eadem proportionem augeatur charitas, quâ & infunditur: sed in infusione correspondent habitus dispositioni, & intensiori actuum præcedentium, vel comitantium justificationem, ita ut si actus sit intensus ut quatuor, charitas infusa quatuor gradibus constet: ergo pariformiter idem in augmento continget. Ex quo solidissimo principio obiter infer, qualis & quantus sit meritorum thesaurus, quæ quotidianis clementis habitum augment, si totis viribus Deum diligant, qui solus dignus est qui ametur. Ex eodem etiam alibi deducemus, quàm immensa sit Mariæ meritorum copia, quæ singulis horis, & fermè momentis gratiam altero tanto geminabat.

Porro fundamentum M. Bannes supra eversum est. Ratio enim ejus in hoc consistit, quod
in.

in naturalibus qualitas non augetur per actum intensiorem, nisi juxta gradum excedentem: v.g. calidum ut quatuor in præsentia calefactiva ut quinque acquirere solum quintum gradum caloris, non verò novem gradus. Sed hæc ratio suprà refutata est, quia actus naturales concurrunt efficienter physicè ad qualitatis productionem & augmentum: actus verò supernaturales nec efficiunt physicè gratiam, nec eam physicè augent, sed ad illius clementiam à solo Deo efficiendum moraliter, & meritoriè disponunt. Et hanc esse S. Thomæ mentem patet ex verbis ejusdem S. Doctoris, quæ habet in 1. dist. 17. q. 2. art. 3. *Quando, inquit, actus charitatis procedit ex tota virtute habitus, & quantum ad virtutem naturæ, & quantum ad virtutem habitus infusi, tunc unus actus disponit, & meretur augmentum, ut statim fiat.* Ergo sentit D. Thomas, non solum per actum ferventiorē augeri habitum, sed etiam per actum æqualem habitui, quo homo secundum totam habitus virtutem operatur.

REFLEXIO.

Euge, Lector, ne dicas, Satis est: ne in arrepti propositi vigore torpescas, quia sicut sine charitate nihil facis, ita sine charitatis fervore nihil proficis. Hinc monet Sapiens Proverb. 4. *Ne verearis usque ad mortem justificari.* Et ibidem comparat justorum semitas splendenti luci procedenti, & crescenti usque ad perfectum diem. Hinc communis illa Patrum vox: *In via Dei non progredi, regredi est.* Vel ut ait Magnus Leo erm. 2. Quadrag. *Hæc est perfectorum vera*
justitia,

justitia, ut nunquam præsument se esse perfectos, ne ab itineris nondum finiti intentione cessantes, incidant in deficiendi periculum, ubi proficiendi deposuerint appetitum.

Ne credas charitatem mox ut nascitur, statim esse perfectam, quia ut rectè ait Augustinus tract.5. in epist.1. Joan. *ut perficiatur, nascitur; cum fuerit nata, nutritur; cum fuerit nutrita, roboratur; cum fuerit roborata, perficitur; cum ad perfectionem venerit, quid dicit? Mihi vivere Christus est, & mori lucrum.* Adstipulatur Gregorius expendens illud Levitici 6. *Ignis in conspectu meo semper ardebit, quem nutrit Sacerdos subjiciens ligna per singulos dies.* Altare Dei, inquit lib.25. Moral. cap.7. *cor nostrum est, in quo jubetur ignis semper ardere, quia necesse est ex illo ad Dominum charitatis flammam indefinenter accendere.*

Hæc cum ita sint, bonum facientes non deficiamus, sed charitas magis, magisque abundet, ut illi placeamus, qui ignem venit mittere in terram, nihil volens nisi ut accendatur. Quæramus Dominum, & confirmemur: quæramus faciem ejus semper; nam sine fine querendus est, inquit Augustinus, qui sine fine amandus est. Mariam quoque beatissimam imitemur, quæ plena gratiâ, gratiam pulsando, petendo, quærendo invenit ampliorem; digna prorsus invenire quod quæreret, cui propria non sufficiebat plenitudo; nec suo volebat bono esse contenta, sed quemadmodum scriptum est: *Qui edit me, adhuc esuriet; qui biberit ex hac aqua, sitiet iterum.*

SPECVLATIO III.

Latitudo , & terminus augmenti charitatis , necnon gradus illius explicantur ; an etiam possit diminui , resolvitur.

UT ea , quæ ad augmentum charitatis pertinent , brevius , & juxta clarius exponamus , omnia paucis quæsitis absolvemus.

Quæres primò , quantum charitas augeri possit.

Respondeo , charitatis augmento nullum præfigi terminum in hac vita , ut patet ex locis superiori reflexione relatis. Unde in Clementina *Ad nostram* , damnatur error Begardorum asserentium , quod potest homo in hac vita ad talem perfectionem pervenire , quâ adeptâ nec in charitate crescere , nec amplius peccare possit. Ratio etiam D. Thomæ artic. 7. id suadet. Augmento alicujus formæ potest præfigi terminus tripliciter : primò ratione ipsius formæ , quæ habet determinatam mensuram , ultra quam si procedatur , destruitur forma antiqua , & nova generatur ; sic pallor per continuam alterationem transit in albedinem , vel nigredinem. Secundò præfigitur terminus augmento ex parte agentis , cujus virtus exhausta nequit perfectiorem in subiectum formam inducere.

Tertiò

Tertiò præscribuntur limites formæ ex parte subjecti, quando non est capax vterioris augmenti, & perfectionis. Sed nullo ex his tribus modis præfigi potest terminus augmento charitatis in via; non quidem primo modo, charitas enim secundum rationem propriæ speciei terminum augmenti non habet, cum sit participatio Spiritus sancti, qui est charitas infinita: non etiam secundo modo, quia causa infundens, augensque charitatem, solus est Deus, cujus virtus est infinita: non denique tertio modo, tum quia charitate crescente, crescit etiam habilitas ad charitatis augmentum; charitas enim dilatat cor Deum amantis; tum quia charitas non recipitur in subjecto secundum potentiam naturalem, sed secundum obedientialem, quæ nullius formæ receptione limitatur. Hæc est enim differentia inter perfectiones ordinis naturalis, & perfectiones ordinis supernaturalis, quod priores participant divinam perfectionem secundum mensuram substantiæ creatæ, quæ ex intrinseco finita est; posteriores verò participant divinam perfectionem secundum mensuram divinæ voluntatis elevantis naturam prout vult.

Quæ ratio D. Thomæ, si bene penetretur, non solum convincit charitatem viæ omni carere termino augmenti, sed etiam id ei ex natura sua competere, quidquid in contrarium cum Scoto asserant quidam recentiores, quibus nonnihil favere videtur Caietanus hîc. & 3. *p. quest. 7.* Si enim charitas, ut asserit D. Thomas, secundum rationem propriæ speciei terminum augmenti non habet, quia est participatio infinitæ charitatis; evidens est secundum mentem

D. Thom.

D. Thomæ, hoc illi ex propria ipsius natura convenire. Quod magis inde confirmatur, quia charitas Dei hoc ipso, quod est infinita, est etiam in infinitum participabilis. Ergo charitas creata, quæ est formalis participatio divinæ, magis magisque participare charitatem increatam potest; nec enim divina foret in infinitum participabilis, nisi eam creata posset magis in infinitum participare. Sanè sicut quia Deus magis, & magis in infinitum visibilis est, ideo data quacumque creata visione, potest dari major; ita cum magis, ac magis diligibilis sit fons ille divinæ bonitatis inexhaustibilis, ideo quacumque posita charitate potest dari alia, & alia magis & magis sine fine diligens. Quia nimirum quacumque intensiōe charitatis adveniente semper manet quod est formalis participatio infinitæ Dei charitatis, subindeque quod in infinitum augeri potest. Cum his tamen stat, charitatem habere terminum in patria, non quidem ratione suæ quidditatis, sed ratione conditionis status Beatorum, qui non sunt in via, sed in termino. Cum his etiam stat, quod licet quivis justus possit semper in charitate crescere, non transiliet tamen terminos à divina prædestinatione positos; unde nullus gratiæ Salvatoris, vel Deiparæ gradum unquam assequuturus est.

*Quæres rursum, an charitas viæ possit
adaquare charitatem patriæ?*

Responsioni præmitto primò, certum esse charitatem viæ & patriæ esse ejusdem speciei, tam
quoad

quoad habitum, quàm quoad actum physicè sumptum, ut ex D.Thoma 1. 2. *quæst.* 67. *art.* 6. colligitur, necnon ex illo Apostoli 1. Cor. 13. *Charitas nunquam excidit.* Et ratio est, quia & in via, & in patria idem est objectum formale charitatis, divina nimirum bonitas immediatè amata: ab objecto autem desumi unitatem specificam habituum & actuum, suppono ex Philosophia. Dixi actum charitatis viæ, & patriæ esse physicè ejusdem speciei, quia in esse moris constans est, amorem viæ ab amore patriæ specie distingui; quia ad moralitatem libertas requiritur, quæ in patria non invenitur, sicut in via.

Præmitto secundò, certum etiam esse, charitatem patriæ speciali prærogativa esse decoratam; cum enim amor præeuntem cognitionis lucem sequatur, sicut visio beata amorem patriæ dirigens ferè immensum fide præstat, ita amor patriæ amore viæ singularibus privilegiis antecellit. In quo autem sita sit illa amoris patriæ præcellentia, difficultas est haud mediocris. Ad cujus tamen qualemcumque elucidationem præ oculis habendum est, charitatem duplici statu constare, connaturali scilicet, & veluti præternaturali. Statum connaturalem fortitur in patria; cum enim de ratione charitatis sit amor benevolentiae in bonorum communicatione fundatus, fundansque amorem amicitiae inter Deum & hominem; & aliunde amicitiae proprietas sit suavis amicorum conviæctus & amœna conversatio, quam in patria duntaxat perfectè inveniri constans est: statum verò præternaturalem habet charitas in via, in qua peregrinatur à Domino, quia extra locum suum & centrum

centrum detinetur; diverso illi statui distincta etiam perfectio correspondet, quæ etiam in sacris literis diversis nominibus appellatur: charitas enim viæ 1. *Cor.* 13. pueritiæ comparatur, charitas autem patriæ virilitati; charitas viæ luci matutinæ, *Proverb.* 4. charitas verò patriæ diei perfectio assimilatur: Justorum enim semitæ quasi lux splendens, procedit, & crescit usque ad perfectum diem. Unde fit, quod sicut puer, quantumcunque crescat, nunquam tamen ad perfectionem viri pervenit, nec lux matutina diei perfecti splendorem meridianum attingit; ita charitas viæ nunquam perfectionem charitatis patriæ exæquabit. His præmissis

Respondeo, quod licet charitas viæ intensivè sumpta, & ex parte subjecti considerata, possit adæquare, imò superare charitatem patriæ; obiectivè tamen considerata charitas patriæ etiam minima, perfectior est excellentissima charitate viæ. Ratio est, quia ex una parte indubitatum est, charitatem viæ B. Virginis, & aliorum Sanctorum insignium pluribus intensiōis gradibus charitate Sanctorum Innocentium antecellere; ex alia verò parte objectum amatum melius in patria voluntati applicatur, intimius coniungitur, suavius possidetur: Etenim cum cognitio objecti influat vel physicè, vel saltem motivè in voluntatem, & amorem; perfectio perfectior visio perfectius influit in amorem, subindeque in perfectiorem amorem, ob indivulsam utriusque facultatis, intellectus scilicet, & voluntatis sympathiam. Ergo licet actus charitatis patriæ non sit semper perfectior ex parte subjecti & habitus, est tamen perfectior ex parte objecti, quatenus objectum cognitum est causa amoris,

distinctiones, ratione quarum unum augmentum
seccernitur ab aliò; infantilis enim ætas à pu-
bertate, & ista à virilitate distinguitur. Similiter
ergo in proposito charitas habet diversos status
ratione diversorum studiorum animæ justæ. Pri-
mò namque in infantia vitæ spiritualis conatur
homo à peccato recedere, concupiscentiis re-
sistere, & omnia divini amoris impedimenta
præscindere. Deinde charitas proficiens, & ve-
luti adolescens, virtutum omni praxi incumbit,
& pietatis exercitiis seriam operam navat. De-
mum perfecta uni Deo adhæret, ut ipso fruatur.
Explicatur magis: Omnis quidem charitas
etiam in principio Deo uniri avet; est enim ig-
nis sursum tendens, & amor ad unionem cum
amato sponte sua proclivis; attamen pro ratio-
ne subjecti diversa officia exercet in ordine ad
illam unionem capeffendam. Sic incipiens ad
hoc omnes vires, & studia confert, ut pravas pec-
candi radices nimis post peccatum fruticantes,
sin convellat planè, certè quotidie amputet, ut
sublatis impedimentis, Deo quem diligit, copu-
letur; non secus ac solent inferiores arboris ra-
mi abscindi, ut in superioribus sursum crescat.
Sic proficiens quantum consequi viribus licet,
omnibus nervis enititur, ut piorum operum ube-
res fructus ferat, & post domitam concupiscen-
tiæ rebellionem actus virtutum suaviùs eliciat,
unâ quidem manu faciens opus, aliâ verò strin-
gens gladium; in eam semper curam incum-
bens, ne aliqua intestini passionum belli scintilla
relinquatur, & ut profligata, confectaue con-
cupiscentia, operum sanctorum praxim rur-
sum impedire non possit. Sic demum perfecta,

quantum in ipsa positum est, summe conatur, ut apertis interioribus animi brachiis dilectum amplectatur, illi uniatur, illum in corde gerat, illi ex intimis tenerrimæ amicitiae medullis, & totis præcordiorum affectibus agglutinetur. De hoc triplici charitatis gradu sic loquitur August. tract. 5. in Canoa. Joan. *Nunquid mox ut nascitur charitas, jam prorsus perfecta est? Imò ut perficiatur, nascitur; cum fuerit nutrita, roboratur; cum fuerit roborata, perficitur; cum ad perfectionem venerit, dicet: Cupio dissolvi, & esse cum Christo.* Et hic triplex status similis est motui locali, in quo primò est recessus à termino à quo, secundò accessus ad terminum ad quem, tertio quies in termino. Ita charitas incipiens, à nugis nugarum, à variis & umbrosis creaturarum amoribus (sic eos vocat Augustinus) recedit; charitas proficiens it de virtute in virtutem, quia scit quod juxta Patres, nostrum non progredi, jam regredi est; & quod incidunt in periculum, qui proficiendi perdiderunt appetitum: charitas verò perfecta, uno Deo vulnerata, amat quia amat, nec aliud querit, quàm amare.

Dices: Charitas in hac vita non potest esse perfecta; tum quia si in aliquo esset perfecta, maximè in Apostolis, in quibus tamen non fuit numeris omnibus absoluta, dicente Apost. Philipp. 3. *Non quòd jam comprehendam, aut perfectus sim.* Tum quia in hac vita sanctiores viri, excepta B. Virgine, non vixerunt, nec vivent absque peccato, & aliquo cupiditatis motu. Tum quia in hac vita, ut antea demonstravimus, charitas magis, magisque crescere potest. Ergo
malè

malè divisimus charitatem in incipientem, proficientem, & perfectam.

Respondeo, perfectionem charitatis posse dupliciter attendi: Primò ex parte objecti diligibilis, ut diligatur aliquid quantum amabile est; & hoc modo charitas nullius creaturæ potest esse perfecta, quia Deus tantum est amabilis, quantum bonus, id est infinitè. Secundò potest considerari perfectio charitatis ex parte diligentis, si nimirum tantum diligat, quantum potest. Et hoc potest tripliciter contingere. Primò si cor amantis Deum motu actuali & continuo feratur in Deum; & hæc perfectio statum & infirmitatem viatoris excedit, patriæ & comprehensorum privilegium est. Secundò si homo totis viribus contendat, ut uni Deo vacet, iis omnibus prætermisissis, quæ absoluta necessitas non requirit. Quæ quidem perfectio in hac vita possibilis est, sed rara avis in terris. Tertiò si aliquis de corde puro Deum super omnia diligens, & in actus dilectionis identidem prorumpens, nihil voluntariè cogitat, nihil deliberatè vult, quod sit divinæ dilectioni contrarium. Et hæc perfectio est essentialis charitatis, omnibus utilis, omnibus necessaria.

Si autem interrogas, quibusnam mediis charitas potissimum proficit, ut tandem perfecta evadat? Respondebo, hac de re consuli posse, & debere libros spirituales, in quibus leges charitatem operibus pietatis nutriri, consolationibus divinis impinguari, tribulationibus roborari, consiliorum praxi perfici. Léges ad illum perfectum exigi primùm fervens proficiendi desiderium, quia ut ait Bernardus: *Magna pars pro-*

fectus est velle proficere. Et iterum : Indefessum proficiendi studium , jugis conatus ad perfectionem , perfectio reputatur. Leges quod in oratione præcipue , & meditatione exardescit ignis amoris. Nam ut alicubi Bernardus : Amorem Dei in homine à gratia genitum lætat lectio , meditatio pascit , oratio confortat. Leges quod præteritorum beneficiorum memoria , præsentium experientia, spes & expectatio futurorum, amorem ciet , & ferè rapit. Hæc , & alia leges, quorum hæc summa est: Si de Deo cogites , Deum amabis; si amas , non poteris non cogitare: cognitio enim amorem parit , amor cogitationum jugis est scaturigo. Ultrò amat voluntas bonum sibi notum , libenter cogitat intellectus de objecto amato.

Quares quartò , utrum charitas , sicut augeri potest , ita diminui valeat?

Respondeo charitatem non posse directè diminui, ut docet D. Thomas *art. 10.* quia nimirum charitas comparari potest vel in ordine ad objectum, vel in ordine ad subjectum: neutro autem modo diminui potest; non quidem per ordinem ad objectum, quia minima charitas diligit omnia, quæ sunt ex charitate diligenda: non etiam ex parte subjecti, quia vel hoc fieret per solam actus cessationem, vel per aliquem actum positivum: non per solam actus cessationem, (nisi in casu, quo illa cessatio foret peccatum, & tunc etiam non minueretur, sed corrumpetur omnimodis charitas,) quia cum charitas ab
humanis

humanis actibus non causetur, sed à solo Deo infundatur & augeatur, non potest per cessationem actus humani charitas imminui. Non potest etiam charitas diminui per aliquem actum positivum peccaminosum, quia peccatum illud charitatis intensiorem diminuens, vel erit mortale, vel veniale; si mortale, non minuit, sed extinguit funditus charitatem; si verò veniale est, non potest diminui charitatem, nec effectivè, nec meritoriè; non quidem effectivè, cum charitatem non attingat, charitas enim est circa finem ultimum; veniale autem est quædam inordinatio circa ea, quæ sunt ad finem: non minuitur autem amor finis ex eo, quod committatur aliqua inordinatio circa ea, quæ sunt ad finem, sicut aliquando infirmi multum sanitatis amantes, inordinatè tamen se gerunt in dietæ observantia; & in speculativis scientiis falsæ opinionationes circa ea, quæ deducuntur ex principiis, non minuunt certitudinem principiorum. Non potest etiam veniale charitatem meritoriè minuere: nam qui delinquit in minori, non meretur detrimentum pati in majori; Deus namque non plus se avertit ab homine, quàm homo se avertat à Deo. Ergo qui inordinatè se habet circa ea, quæ sunt ad finem, non meretur pati detrimentum in charitate, quæ ordinatur in ultimum finem.

Et confirmatur: Si peccata venialia minuerent charitatem, ut arbitratur Altissiodorensis *lib. 3. tract. 5.* nec omnino dissentit Victorius, censens opinionem illam non esse ita improbabilem, uti credi in Scholis assolet; si, inquam, vera foret illa sententia, sequeretur quod multiplica-

tis peccatis venialibus, tandem gratia funditus
 destrueretur, cum omne finitum per ablationem
 finiti consumatur. Consequens autem est inau-
 ditum in Ecclesia Catholica, quæ semper docuit
 solis mortalibus amitti gratiam; ideo namque
 mortalia dicuntur, quia necem animæ inferunt.
 Unde Tridentinum *sess.6. cap.11.* docet propter
 peccata venialia Sanctos non desinere esse ju-
 stos. Nec huic argumento ulla adhiberi potest
 solutio, quæ non sit error, vel figmentum. Di-
 cere enim, quod ultimum veniale sit mortale ex
 circumstantia, quâ quis tenetur servare gratiam;
 id, inquam, dicere est erroneum & intolerabile:
 quis enim potest scire, vel cui revelatum est il-
 lud ultimum veniale, quod mortale evadit?
 Respondere verò minimam gratiam baptisma-
 lem plures habere partes, quàm sunt peccata ve-
 nialia possibilia, & per peccata venialia subse-
 quentia gratiam remitti minus & minus in in-
 finitum: id, inquam, respondere, & chimericum
 est, & falsum. Quis enim credat, in infimo gra-
 du gratiæ plures esse gradus intensiōis, quàm
 sint peccata venialia possibilia? Quis credat,
 peccatum veniale subsequens, tamen sit æquale
 vel gravius (ut sæpe contingit) non æquè, vel
 magis imminuere gratiam, quàm primum. De-
 nique dicere, quod licet justus plura venialia
 committat, tamen quia multa bona opera inter-
 miscet, quibus quod deperditur, compensatur,
 ideo charitas non corrumpitur; id, inquam, est
 paulò verosimilius, reapse tamen à veritate alie-
 num est, quia qui in peccata venialia, præser-
 tim voluntaria, crebrò labitur, vix, ac ne vix qui-
 dem fervidos charitatus actus elicit, sed tantum
 debiles,

debiles, & remissos, quibus non augetur charitas, saltem in via, secundum omnes Thomistas. Ergo per peccata venialia in via destruitur charitas: quod si destruat in via, ne expectes quod reinfundatur post mortem.

Dices: Videmus, & experimur, quod venialium frequentia fervorem charitatis imminuit; unde &abilitas, promptitudo, & vigor charitatis languescit: ergo imminuitur ipse habitus; si enim idem habitus permaneret, eandem facilitatem, eundemque fervorem conferret.

Respondeo, hoc argumento probari, solum peccatis venialibus remitti fervorem, & impediri exercitium charitatis, & etiam ipsam charitatem non solum minui, sed saepe etiam indirectè corrumpi per peccata venialia, quatenus multiplicatis culpis venialibus, & tepida vivendi ratione, ac intermissis charitatis motibus, pravæ cordis inclinationes radices agunt penitiores, in eoque firmatæ charitatem veluti suffodiunt, in rationem insurgunt, & ad peccata, quibus destruitur charitas, alliciunt & pertrahunt voluntatem. Moraliter etiam indirectè ad charitatis exterminium concurrunt, quatenus meretur homo tepidus, ut Deus auxilia specialia subtrahat ad eas vincendas tentationes necessaria, quibus siue speciali gratia succumbit. Hac de causa dicitur Deus tepidos evomere. *Vtinam*, inquit Apocal. 3. *calidus esses, aut frigidus; sed quia tepidus es, incipiam te evomere ex ore meo.* Qui vomitus, & expulsio denegationem auxiliorum specialium significat. Unde Patres fugam peccatorum venialium, & cordis custodiam tantopere inculcant. *Nolite contemnere venialia*, inquit

August. lib. de decem chord. quia minima sunt, sed timete, quia plura. Plerumque enim bestia minuta multa necant. Nunquid minutissima sunt grana arena? Sed si arena amplius in navi mitatur, mergit illam ut pereat. Quàm minuta gutta pluvia? nonne flumina implent, & damos deji- ciunt? Timenda est ergo ruina multitudinis, et si non magnitudinis. Quæ omnia in sensu dispo- sitivo intelliguntur, quatenus venialia sensim pravos habitus pascunt, qui charitatis exitium moliantur.

Pro intellectu literæ D. Thomæ art. 10. expli- canda sunt breviter duo, quæ nonnullam possent ingerere difficultatem. Primò cum ait initio corporis, charitatem in comparatione ad obje- ctum minui non posse, nec augeri: & tamen superius diximus, charitatem in patria esse ob- jectivè majorem. Secunda difficultas est in eo, quod ait, peccatum mortale effectivè corrup- pere charitatem, id enim videtur falsum. Nam sicut à solo Deo producit charitas, & conser- vatur, ita ab illo destrui potest, & à nobis mo- raliter duntaxat dispositivè.

Respondeo ad primam difficultatem, aliter accipi à D. Thoma ly *ex parte objecti*, aliter à nobis suprà acceptum fuisse. Loquitur enim S. Præceptor de quantitate extensiva objecti, ut sit sensus, minimam charitatem diligere omne objectum diligibile: nos verò loquuti sumus de quantitate objecti applicativè, & accommoda- tivè, quatenus idem objectum, quod respicit cha- ritas, melius in patria, quàm in via potentia ap- plicatur; unde melius illic, quàm hîc voluntas operatur. Ad secundam dicendum, quod sicut
in

in naturalibus licet anima rationalis à solo Deo producat in corpore, tamen quia compositum ex anima & corpore ex parte subjecti subjacet agenti naturali, puta igni, si ignis agendo in corpus humanum tantum calorem producat, ut eo dissolvatur corporis compages, ignis dicitur effectivè expellere animam à corpore; & si tunc anima desineret esse, diceretur eam corrumpere: ita licet à solo Deo charitas efficiatur, attamen in voluntatis libera facultate positum est elicere peccatum mortale, quod magis repugnat vitæ spiritali, quàm nimius calor vitæ corporali; ideo peccans mortaliter effectivè charitatem expellit: & quia charitas expulsa desinit esse, ideo eam peccatum mortale physicè corrumpere dicitur. Quorum omnium ratio est, quia forma, sicut in fieri, ita in conservari exigat subjectum dispositum: unde sicut produci nequit in subjecto contrariis dispositionibus instructo, ita nec in eodem conservari. De amissione charitatis agit S. Doctor *art. xi.* Sed de eodem argumento sermo redibit in materia de gratia.

REFLEXIO.

Satis, & plusquam satis de charitate diximus, quam sentire magis quàm definire expediret. Nam etsi habuerimus prophetiam, & noverimus mysteria omnia, & omnem scientiam, charitatem autem non habuerimus, nihil sumus. Quid prodest nobis de charitate tam operosa dissertatione disputare, si dum spiritus in contemplanda charitate emicat, cor terrena sapit, mun-

danis inhiat, & incumbit? Quò tempus terimus, dum Deum non amamus; Deum, inquam, cujus amoris erga homines prodigium amorem nostrum vendicat totum sibi?

Igitur uno Dei amore flagremus, in ipsum sine modo intendatur affectio nostra, qui dilexit nos ultra omnem modum, ut nihil prorsus in animæ facultates irrepere sinamus, quod summam erga Deum dilectionem nostram minuat, aut transferat; sed in omnibus illi soli, & semper magis, magisque placere satagamus, qui sic dilexit mundum, ut Filium suum unigenitum daret. *Sic*, inquam, id est incredibili amoris vehementia, conatu, excessu, vi, suavitate, nimietate. *Deus*, inquam, nos amavit, non Rex, non Imperator, non Sanctus, non Angelus, non Seraphim, sed Deus infinitus, immensus, sufficientissimus. *Dilexit*, inquam, amore dignitatis oblito, & majestatis fore nescio, dignatione divite, affectu potente, suasu efficaci. *Dilexit* amore electionis, libero, gratuito, benefico, merita excedente, & nos. *Mundum*, inquam, amavit damnationis reum, peccato sordidum, miseriis scatentem, beneficiorum immemorem, Dei hostem: & mundum totum, quia vult omnes salvos fieri, & ad agnitionem veritatis venire. *Ut filium*, inquam, pro nobis traderet, non Angelum, non alium mundum, non divitias, non virtutes; sed filium, inquam, *suum*, non adoptivum, sed naturalem, in pretium redemptionis, in socium peregrinationis, in cibum refectionis, in præmium resurrectionis. *Daret*, inquam, non venderet, non mutuaret, sed daret gratis; parvulus enim datus est nobis, & nobis natus,

Hæc cum ita sint, charitatem sectemur, quæ est vita fidei, spei robur, & omnium intima vis, & medulla virtutum. Charitatem amemus, quæ vitam ordinat, affectus inflammat, actus informat, excessus corrigit, mores componit, valet ad omnia, & sine qua nihil valent omnia.



DISSERTATIO V.

Appendix.

*Commendatio Fidei, & Religionis
Catholicæ, seu Romanæ; ejus-
demque triumphus de infidelibus
reportatus.*



VÆ ad demonstrandam Eccle-
siæ Catholicæ, siue Romanæ cre-
dibilitatem desiderari possent, dis-
sertatione præambula secunda vo-
luminis præfixa operosè prose-
quuti sumus; de Ecclesiæ etiam præfidiis,
siue fidei regulis & nervis, in fronte tertii vo-
luminis, ubi locos theologicos, seu inexhau-
sta veræ Theologiæ promptuaria aperuimus,
fusè disputavimus; quibus omnibus Christianæ
Catholicæque Religionis veritas & præstan-

ria omni genere probationum invictè , & nū fallor perspicuè , ante Lectoris oculos expansa est.

Verùm quia Theologis de fide tractantibus solenne est in laudes Ecclesiæ excurrere, ut in hac materia infinita consuetudini morem geram, & tuæ (Lector) eruditioni, & pietati consulam, operæpretium duxi, si Religionis Catholicæ gloriosos de innumeris hostibus triumphos exponerem, quibus & fidei credibilitas firmari, & filialis fidelium erga matrem Ecclesiam amor accendi faciliè potest.

Et sanè ea libens iterum, atque iterum verso, & reverso, quæ ad illius Ecclesiæ commendationem conferunt, cujus non solum amore teneor, sed veritate ita convincor, ut faciliùs dubitarem vivere me, quàm esse vera, quæ ab illa audiui. Quanvis ergo materiam istam occupasse aliàs videamur, verba tamen suggeret non solum amor, sed & copia Ecclesiæ illius, quàm rectè dixeris favorum cœlestium acervum, & universale divinarum gratiarum depositum. Hoc unum timeo, ne nie inopem copia reddat, dum sermo est de Ecclesia, cujus antiquitas omnem transcendit memoriam, cujus duratio finem nescit, cujus amplitudo metas omnes prætergreditur, cujus filiorum multitudo arenam superat maris, & stellas cœli; cujus sanctimonia nec similem habet, nec parem habebit: Ecclesia, inquam, cujus sponsus Deus, cujus dos gratia, cujus rector Spiritus sanctus, cujus testimonium verbum Dei, cujus cibus caro Dei, cujus custodes Angeli, cujus præmium summum bonum: Ecclesia, inquam, cujus Legislator sapientia Dei, cujus:

cujus semen sanguis Christi, cujus fortitudo virtus Crucifixi, ab omnibus portarum inferi concussionibus secunda: Ecclesia, inquam, quæ uni capiti obediens Romano Antistiti, est omnium Domina; quæ in varias dispersa nationes, est una; quæ nonnullorum filiorum sordibus obscurata, est sancta; quæ in plures distincta gradus, est consona; quæ innumeris sæcunda filiis, est virgo; quæ divitiis abundans, spiritu pauper est; quæ adversitatibus exagitata, est pacifica; quæ expugnata, est, & fuit semper victrix, semper triumphans; tot ornata palmis, quot fuit Infidelium armis & irruptionibus lacerata.

Nemo sanè Ecclesiæ illatas injurias, & persecutiones enarrare sufficeret. Profectò *non mihi, si lingua centum sint, oraque centum, omnia pœnarum percurrere nomina posim.* In illam enim cruentum & obfœcratum bellum moverunt Judæi, Gentiles, Hæretici, qui licet erroribus dispares, in unum tamen unius fidei exterminium certatim conspirarunt. Judæi felicitati & clemente Ecclesiæ antiquarum caeremoniarum specioso zelo invidebant: Gentiles ob idololatriæ destructionem paternâ superstitione commovebantur: Hæretici pro obbibiti erroris defensione insurgabant. Duo priores, ne à principatu, & possessione deturbarentur; postremi, ut novum adversus Ecclesiæ regnum, principatumque bellum inducerent, altare contra altare erigerent, & de Ecclesiæ victoriis ipsi gauderent.

Sed quomodo, inquires, fuit victrix Ecclesia, in suis cunis semper victa, in membris suis vel gladiis cæsa, vel in exilium relegata, vel in carcere captiva, vel fame consumpta, vel in aquis

suffocata, vel flammis exusta, vel in fornacibus
 liquata, vel sagittis confossa, vel lapidibus ob-
 ruta, vel novaculis excarnificata, vel pectinibus
 ferreis sulcata, vel in equuleis suspensa, vel
 plumbatis contusa, vel à feris discerpta, vel æneis
 tauris accensis & candentibus inclusa, vel melle
 piceque oblita, ut post vesparum aculeos fierent
 nocturnarum vigiliarum candelæ? Ita planè, sed
 noli mirari, quia ut ait Ambrosius, *Ecclesia tun-*
ditur fluctibus, sed non subruitur; caditur, sed
non labefactatur. Videbatur quidem illa devicta
 falsis accusantium testimoniis, obstrepentibus
 populorum querelis, opprimentibus tyranno-
 rum sententiis, mactantibus tortorum immanis-
 simorum suppliciis. Sed inter tot imminentes
 ruinas florentior erat & vegetior, quia ut ait Hi-
 larius libro 6. de Trinit. *Proprium est Ecclesiæ, ut*
tunc vivat, cum caditur; tunc intelligat, cum ar-
guitur; tunc obtineat, cum deseritur. Unde, teste
 Gregorio lib. 9. *Moral.* assimilatur Arcturo, qui
 tametsi semper in cœlo versetur, nunquam ta-
 men occidit. *Arcturus, inquit, semper versatur,*
& nunquam mergitur; quia & sancta Ecclesia
persecutiones iniquorum sine cessatione tolerat,
& usque ad mundi terminum sine defectu perdu-
rat. Arcturus dum versatur, erigitur; quia tunc
sancta Ecclesia valentiùs in veritate reficitur, cum
ardentiùs pro veritate fatigatur. Non esset Ec-
 clesia similis Christo, nec illius capitis corpus,
 nisi per tribulationes triumpharet: *Christus enim,*
uti Paulinus epist. 3. ait, vicit, cum judicatus
est; cedendo superavit, & cadendo in mortem, re-
surrexit in gloriam.

Quare necessaria fuit illa Ecclesiæ probatio,

ut

ut triumphum campum aperiret hostilis infidelium pugna. Nulla enim sunt, ut Patres clamant, sine tentationum experimentis opera virtutis, nulla sine perturbationibus fides, nullum sine hoste certamen, nulla sine congressione victoria. Sic semina messium gelu cooperta, & mortua germinant: sic ignis flatu premitur, ut crescat: sic unguenta commota redolent: sic aromata fragrantiam suam cum incenduntur, expandunt: sic vinea putata uberior redditur & fecundior: sic arca Noë ab undis sepellenda diluvii, ab iisdem altius ferebatur, ejusque concussio, ipsius erat erectio: sic Luna videtur deficere, & non deficit, & obumbrata non obscuratur. Ita planè Ecclesia per filiorum infinitorum mortem vivida, per dispendia dives, per ruinas gloriosa effecta est, ut singulorum inductione sæculorum clarebit, ut verum sit illud Tertul. in Apolog. *Plures efficiuntur, quoties à vobis metimur: sanguis Martyrum semen est Christianorum.*

§. I.

Primum Ecclesie sæculum.

DE isto sæculo verè illud Davidis varicinium impletur, quod Psal. 128. fudit: *Sapè expugnaverunt me à juventute mea, etenim non potuerunt mihi.* In juventute enim, in cunis potissimum vexata, gloriosius quoque triumphavit: *expugnaverunt, & non potuerunt*, id est, ut ibi Augustinus exponit, *valuerunt mihi*
sicut

sicut ignis ad aurum, non sicut ignis ad fœnum. Tunc mundus sub sole totus in Christianum armatus sæviit; tunc fremuerunt gentes, & populi meditati sunt inania; inania planè, quia *expugnauerunt, & non potuerunt.* Unde impleta est etiam Prophetæ Evangelici, Isaïæ nimirum, sententia: *Congregamini populi, inquit cap.8. & vincimini; confortamini, & vincimini; accingite vos, & vincimini; inite consilium, & dissipabitur; loquimini verbum, & non fiet, quia nobiscum Dominus.* Vana ergo fuit hominum tota quanta industria & furia in Christianos, quia non est consilium contra Dominum, qui per hostes suos consilia sua implet, cui adversarii manus commodant & industriam, etiam dum suis studiis velificantur, ut sapientiam sapientum confundat, & præpostera humanæ prudentiæ consilia reprobet. Quia sicut Christus est Christianorum Legislator, ita Christiani character crux est, & persecutio. Sed potissimum ei in cunis paratum excidium fuit. Decurramus pugnas, ut numeremus triumphos.

Prima persecutio à Judæis mota est. Num Christum ipsum legis novæ latorem, flagellis cæsum, colaphis percussum, sputis fœdatum, appositâ ad manum arundine pro sceptro, & ad caput spinea corona pro diademate, per crudele ludibrium adoratum in crucem egerunt. Sed tanti parricidii, vel potius Deicidii horrorem totus mundus significavit; nam terra tremuit, dissiliere saxa, obtenebrescere per diem Sol coepit. Vides quomodo certamen sequatur triumphus, qui magis effulsit in resurrectione,
quâ

quâ vitæ se ipsemet reddidit, & quasi novus & redivivus Phœnix, suis è cineribus pulchrior emicuit, & per quadraginta dies resurrectionis fidem constabilivit, & ad gloriæ coronamentum, stupentibus qui viderunt, in cœlos se sustulit. Unde qui mortem in aliis vicerat, in se passus est, ut gloriosius de hostium ferocia triumpharet, & suo cresceret casu, nisi talis esset, cujus majestas augmentum non capit. Cui enim nihil ad augendum fastigium superest, hoc unum restat, si descendat.

Cum nihil amplius in Christum possent Judæi, in discipulos exarserunt. Isti enim palam Christum Deum clamantes, ejus fidem omni linguarum genere cum stupore omnium explicantes, & sermonem confirmantes sequentibus signis, catenis onerantur, in carcerem truduntur, verberibus crudelissimè lacerantur, & cum eis non possent resistere loquendo, saviendo voluere. Nam Stephanum incurrentium densè lapidum grandine obruerunt, & obruendo coronarunt. Sed frustra nititur sæva crudelitas; nam dum Diaconorum clarissimum inhonorant, ad tam dignum spectaculum inspiciendum paradisi mirabundus, & miraturus apertus est, & Christus ipse è cœlis stans, applaudere dignatus est. Cæteros deinde discipulos in fugam agunt, sed unde Christianismum extinguere satagunt, inde Christianismum promovent. Nam expulsi Jerosolymis Apostoli Gentilismum, id est orbem totum illustrare cœperunt, & ab Asia in Africanam, Europamque radios effuderunt. Ergo non obfuit, sed mirè profuit Hebræorum persecutio, & Stephano illata mors. Perierat orbis,
nisi

nisi ille periisset, fugatique discipuli fuissent. Quia orationi & morti Stephani dedit Christus Paulum, pro quo convertendo iterum venit qui pro toto mundo semel venerat, quia unus Paulus æquivalet mundo. Gentes omnes per discipulos sibi Christus subdidit. Paulum per seipsum redegit. An quia Paulus superatu difficilior, ut de Saulo victoria Christo eximia esse debuerit? An quia per Paulum mundus convertendus totus, & Pastor ovilis Christi fieret, ad quod disperdendum ibat ut lupus? In Jacobum tandem furunt, & Regis Agrippæ jussu capite cædunt; sed in Tyrannum illum, cujus sævitiâ extinctum iri Christianismum avebant & putabant, recidit malum consilium, quia eum vermes Cæsareæ absumere non cessarunt. Dignus sanè qui talibus carnificibus periret, qui Judæorum invidiæ vermium pessimo placens, plexuerat innocentem.

Quàm benè Deus implet voluntatem suam per illosinet, qui contra suam se voluntatem armarunt! Adeo namque divinis consiliis ancillati sunt Judæi, dum obsistere crediderunt, ut inde fides in omnem terram diffundi cœperit. Expulsus enim à Judæa Petrus post constitutam per septennium Antiochenam Ecclesiam, Romæ Ecclesiam omnium futuram principem & magistram fundavit, ut latiùs præsideret religione divina, quàm dominatione terrena; nec Imperium Christi per clades, sicut olim Scipiones & Cæsares, sed per beneficia Petrus proveheret. Pulsus quoque Paulus Asiam, Græciamque, non tam passibus, quàm victoriis peragravit, ut Romæ tandem triumpharet. Ni pulsi fuissent si-
militer

militer alii Apostoli, nec Andreas Scythas superasset, nec Philippus in superiorem Asiam iuxta Christi promovisset, nec Thomas Parthos, Medosque cum Indis Christi subjugasset Imperio, nec Bartholomæus Armenos, Albanosque ritibus Christianis informasset, nec Matthæus Æthiopes Baptismatis sacris undis dealbasset, nec Simon cum Thaddæo Mesopotamiam simul & Persidem subegissent, nec Mathias Africanorum animos flammis purioribus accendisset, quàm quibus corpora & regio adurantur. Accessit deinde ad vindictam Judæorum Jerosolymorum excidium, quo Gens illa Christum expertus est ultorem, quem Salvatorem abjecerat, ut suo mergeretur in sanguine, quæ se per summam impietatem divino polluerat. Sed de his Judæorum obsessorum cladibus fusè *in tract. de Incarn.* disseremus.

Non solum ab exteris, sed quod non minus noxium est, etiam à domesticis fidem scindere molientibus Ecclesia passa est. Porro Hæreticorum primipilus & coryphæus fuit Simon Magus, qui circa annum 68. ejurato Christianismo, cum operandorum miraculorum virtutem ab Apostolis pecuniâ emere non potuisset, eam à dæmonibus nefandâ apostasiâ sibi asciscere conatus est. Ex eo nedum simoniæ sordida pestis, quâ spiritalia pro temporalibus veneunt, nomen sortita est; sed etiam impura soboles propagata ex eo quasi putrido cadavere verminavit. Menander quippe, Saturninus, Basilides, Carpocrates, Cerdo, Marcion, Elxay, Cerinthus, Ebion, Nicolaitæ, Gnostici, Adamitæ, veluti ex stercoris spurcitiis pullularunt. Earum
fordes

fordes enrovere, & reficere nec placet, nec decet. Quibusdam eorum placuit libidinum confusio, aliis Judæorum ritus, sed pessima omnium, communisque sententia fuit negata Christo Servatori divinitas, quam sibi scelestissimus Simon arrogarat.

Sed perfidorum consilia evertit Deus: nam Simon in cælum evolare tentans, Petri oratione Romæ deturbatus est elatus in altum, ut lapsu graviore rueret, & effractis casu cruribus humi reperet, nec gradi posset, qui Icarica temeritate volare præsumpserat. Archihæretici verò discipulos Apostoli doctrinæ malleo tuderunt; calyculos verò regerminantes, & infeliciter fruticantes Apostolicis traditionibus Ignatius martyr, Polycarpus, Irenæus, aliique putaverunt. In Christianismum sævit etiam Nero omnis boni impatiens; nam quomodo Christi Apostolis Petro & Paulo pepercisset, qui nec matri, nec uxori, nec præceptori pepercerat? Occasio autem persecutionis fuit urbis à Nerone combustæ conscientia: credidit enim atrox tyrannus innocentem se habitum iri, si conflagrationis invidiam in Christianos derivaret, & afflictum crimen immaniter puniret. Quasi verò scelera sceleribus purgare potuerit innocentie publicus hostis? Quasi innocentie argumentum non esset tam nocentis, tamque innocentium accusatio?

Itaque Petrum Tyranni crudelitatem in Christianos pœnas congerentis liberè increpantem, in crucem verso deorsum capite affixit. De quo Petri suspensi situ multa multi scripsere præclara. Alii Apostoli humilitati talem corporis

ris habitum adscripserunt, indignum quippe se arbitrabatur in ea figura mori, quâ Christus orbem redemerat. Alii, ut cœlum, quò inhiabat, liberiùs aspiceret, & aspectu patientiam suam animaret. Sed hanc Petri circumstantiam eximie expendisse P. Labbeum Societatis JESU, in quodam elogio aliàs me legisse memini. Inversum, inquit, est hoc Petri caput, & rectum. Jacere sic debuit, ut rectà cœlum aspiceret. Nunquam rectiùs aspexit, quàm dum sic vidit. Puto sic aspexerat, dum Christo respondit: Tu es Christus filius Dei vivi. Penè naufragium in mari fecit, dum aliter aspicit. Invertit caput ad Christum, & evasit. Nac fugisset in horto, nec negasset in Palatio, si sic aspexisset. Nemo peccaret in cœlum, si cœlum aspiceret. Inversus cruci affigi voluit, ne posset aufugere. Inversus, ut à terra iter ad cœlum faceret. Inversus, ne aliud præter Deum, & cœlum videret. Inversus, ut pendentem à cruce Magistrum cerneret. Inversus, indignum se ratus, qui rectus penderet. S. Petre, nunquam rectiùs ambulasti, quàm capite. Scilicet itur ad cœlum magis affectibus, quàm pedibus. Evolare rectus in cœlum Simon Magus tentavit, & corruit. Tentavit inversus Simon Petrus, & rectà ivit.

Verùm nihil profuit sævâ crudelitas; nam & Apostolorum mortem illustrare miracula, & tyranni immanitatem ipsamet Neronis manus ultâ est, ut se occideret, qui tot clades intulerat, tot parricidia, tot Christianorum neces patrarat. Illud porro in Apostolorum morte contingit. Nam Petrus in carcere fontem elicuit, ut futuram doctrinæ suæ ubertatem præsignaret.

E Pauli verò resecto collo, capiteque reciso non cruor de more, sed lacteus manavit humor, ut qui tanquam nutrix in medio fidelium lac vivens dederat, Ecclesiam etiam moriens doctrinæ suæ lacte nutriret. *Rorat hoc caput lacte, non sanguine*, inquit laudatus P. Labbe; *perfudit hic liquor carnifices, & fecit martyres. Manant lacte epistola Pauli. Orbis totus vivit hoc lacte.*

Quavis Ecclesia à Vespasiano & Tito non-nihil in suis primordiis passa sit, damna tamen ab eis illata prolusiones duntaxat fuerunt, & præludia persecutionis sub Domitiano circa annum 92. instaurandæ. Sed nihil mirum, si non parceret Christianis vir naturâ ferox, & sanguinis sitibundus, qui cum se humano saturare cruore non posset, in muscis necandis, & acupungendis summa cum voluptate occupabatur. Post Clerum, Pontificemque Cletum interfectos, post Christianos toto quàm latè patet orbe mactatos, totam Religionem everfurus erat in Joanne Evangelista, nisi magno prodigio magis inde amplificata fuisset. Joannes namque Romanam accitus non solum fervens oleum sine noxa ingressus est & egressus, sed etiam fidem inde propagavit, unde Tyrannus extinguendam arbitrabatur: relegatus quippe in insulam Pathmos, & incolas fidei jugo subjecit, & totum Christianismum scripta Apocalypsi erudit. Sic Deo militant, quæ Deo obfistere nituntur: sic Domitianum domuit virtus Christi, quæ domanda videbatur. Quia nimirum, non absimili modo recreavit Deus mundum, quo initio creavit. E nihilo eduxit orbem omnium conditor

Deus;

Deus; è nihilo etiam formavit Ecclesiam, quæ humilitate crevit, quæ assurrexit ex cladibus, quæ funeribus vixit, quæ martyriis coronata, suorum cruore veluti semine propagata est. Quis non agnoscat digitum Dei, & potentiam quam fecit in brachio suo adoret, postquam per aliquos numero paucos gentes sub cœlo totas illustravit, per ignobiles de Imperatoribus triumphavit, per destitutos viribus humanis, & unâ demùm suâ infirmitate nixos, omnes terræ & orci potestates devicit? Sed virtus crucis in infirmitate perficitur; cùm infirmatur, tunc potens est; inter adversa invalescit, & per adversa, quia in sola spe gratiæ cœlestis innititur, Deo uni fidit, qui mediis contrariis finem assequitur, qui dat nivem sicut lanam, nebulam sicut cinerem spargit. Et sanè justum planè erat, ut Ecclesia sponsa sponso Christo conformaretur, qui è cœlis ad terram homo factus descendens infirmitate crevit, persecutione adolevit, paupertate ditatus est, ex pœnis impassibilitatem elicit, ex morte immortalitatem.

§. II.

Secundùm Ecclesiæ saculum.

TRanquillitatem Ecclesiæ spondere videbatur benigna Trajani indoles; verùm persecutionem accendit ipsa speciosa pietas, quâ nitebat: credebat namque vir superstitionibus addictus, sacrificium se præstare Diis suis, si no-
men

men Christianum, quod omnium criminum instar erat, penitus circa annum 101. deleteret. Et quanvis vel tantâ carnificinâ fatigatus, vel innocentium patientiâ permotus, non nihil de sua feritate remiserit, sub Adriano tamen circa an. 120. recrudit tempestas, sed sedata parùm sub Antonino fuit; pertæsus enim tot impietatum pius Imperator, edicto cavit, ne cuiquam Christianum nomen crimini foret, aut torturæ. At breve sub Antonino gaudium fuit; post brevem enim pacis parenthesis, circa annum 140. & sequentes adeo per Aurelium, & Verum instaurata fuit carnificina, ut non interrumpi visa sit, nisi ut vires interim augeret, & atrocior evaderet post quietem & inducias.

Sed quid tot machinis, tot artibus, tot tormentis melimini, ô Tyranni? Frustra ferociâ, & doloribus conspiratis in illos, quos patientia faciet & vestri victores, & mundi triumphatores. Frustra in Clementes, Anacletos, Ignatios, Dionysios Areopagitas, & alias Athletarum myriades ferrum distringitis; frustra legiones integras absumitis, frustra militum millia cruci affigitis: nihil inde, nihil omninò proficitis, nisi ut fidelium soboles excisis stirpibus vegetior succrescat, & floridior.

Non solùm foris pugnas, sed intus quoque sensit timores Ecclesia, agnovitque deteriores esse domesticos hostes, quàm extraneos. Id experta est in Valentino, qui & novos Deos cudit, quos Æonas, seu sæcula dixit; & Servatorem non è Virgine, sed è cœlis assumpsisse carnem effutiit, & resurrectionem ut impossibilem inficiatus est, & alias innumeras cùm circa dogmata,

ra, tum circa mores sordes invexit : quarum fœtore & horrore ipsemet stupefactus palinodiam sub Higino cecinit, sed corruptum peccatis judicium in priores impietates relapsum est, sed non impunè : nam & ab Eleutherio proscriptus est, & Justinì, Irenæi & Tertulliani Scriptorum molibus veluti malleis & fulminibus obtrititus est.

Sed vix opus erat adversus Valentinum & gregales ac discipulos tot illustrium militum ense; sponte sua ruebat hæc insana secta, similis enim erat Valentini Scholæ domibus illis, in quibus recluduntur furiosi, adeo fœdè & variè delirabant. Nam & Ophitæ serpentis sapientiam adorabant ut numen, & Caiani salutem solis turpitudinibus deberi blasphemabant, magis an insaniebant, vix discernas: Judam quoque super omnes divos efferebant, legitimâ quidem infandæ doctrinæ consequutione. Ex eadem Valentini cloaca egressi sunt Sethiani, sic dicti, quia Christum non alium esse, quàm Seth Adami filium, per summam ineptiam asseriebant, aliasque proferebant non tam hæreses, quàm somniantium & lunaticorum exerrationes. His accesserunt Bardeſanistæ, duce Bardeſane Syro; Ascodrytæ, qui & Sacramenta rejecerunt, rati corporalia ad spiritalia significanda, efficiendâque esse inepta. Illos imitati sunt Apostolici, ab abdicatione temporalium sic dicti, ut eo fucò errores præcolorarent. Illis sese adjunxerunt Marcitæ, seu Marcossii, à Marco apostata dicti, qui hæresim magiæ fictis miraculis obliniebant. Hos sequuti sunt Encratici, qui etiam Aquarii, vel Hydroparastatæ dicti sunt, quia & matrimonio, & esu car-

nium, & potu vini etiam in mysteriis suis interdicebant, ut hoc temperantiæ colore à communis Magistri Valentini sordibus alienos se esse profiterentur. Sed nihil aliud tanta errorum sylva, nihil tam putida errantium colluvies fecit, quàm ut contrariorum oppositione & discordia fidei splendor & unitas magis eniterent.

Sub idem tempus Ecclesiam deformare nissus est Hermogenes arte pictor, sed crassarum hæreseon architectus. Nam materiam ingenitam fingebat, unde & discipuli Materiarii dicti sunt, iusta appellatione; adeo enim materiæ immersi sunt, ut & Deum corporeum, in Soleque morantem fingerent, & animas rationales ex igne & spiritu ab Angelis fabricatas delirarent. Sed hæc deliramenta citò fides expunxit, quæ ipsi rationis naturalis lumini, & saniorum Philosophorum placitis adversantur.

Periculosior fuit Montani tentatio novam sectam specie arctioris disciplinæ, & sanctimonix invehenti, falso castitatis amore secundas nuptias parum ab scortatione sejungenti: in martyrio autem pro Christo tolerando ita intrepidos volebat esse Christianos, ut inter transfugam fidei, & persecutionis profugum vix, ac ne vix quidem distingueret. Virtutes morales in mediocritate sitas, ita ultra modum Montanistæ colebant, ut jejunia, abstinentias, & temperantiam intemperanter observarent. Denique in doctrina, in moribus, in vitæ cultu nihil non asperum, nihil non rigidum, nihil non in speciem sanctum præferebant. Magna certè tentatio, quia ut præclare Lirinenfis, in Ecclesia Dei tentatio est populi error Magistri, & tanto major

jor tentatio, quanto ipse est doctior, & in speciem sanctior, qui errat. Et profectò magna tentatio est, inquit, cum ille, quem tu Prophetam, quem Prophetarum discipulum, quem Doctorem & assertorem veritatis putes, quem summa veneratione & amore complexus sis, is subito noxios latenter subinducat errores, quos nec citò deprehendere valeas, dum antiqui magisterii ducis praesidio; nec facile damnare fas ducis, dum Magistri veteris impedis affectu.

Verum impostoris vecordia citò claruit, dum se Paracletum à Patre ad calamitatum solatium missum stultissimè finxit. Unde mirum est, & judiciorum inscrutabilium Dei abyssus multa, quod tantæ insanix portentum non deprehenderit Tertullianus, vel quod deprehensum amarit. Quod Montano adhæserint Priscilla, & Maximilla scæminæ arreptitix, & insanorum novitii dogmatis somniorum curiosæ, non mirandum; quod exurgentes novellas Montani furias obviis ulnis exceperint suprâ memoratî Pseudo-Apostoli, affectatum paupertatis, aliarumque virtutum studium ostentantes, credere præclive est. At quod iis nugamentis adhæserit Tertulliani ingenium acre, post multos ex errorum tenebris ad veram fidei lucem revocatos, quis credere audeat, aut possit? Et tamen reapse ita contigit. Ille, ille Tertullianus, de cujus onifaria eruditione, & ingenii acumine plena sunt Authorum monumenta; ille, quem Cyprianus tanti fecit, ut ne diem quidem absque ejus lectione transigeret, illumque Magistrum per anthoniasiam dictitaret; ille, cujus laudes Hieronymus qualibet data, & sæpe accepta occa-

sione passim eloquitur, quòve nihil acutius, nihil eruditius esse in epistola ad magnum Oratorem pronuntiat; ille qui in Apologetico, quem adversus Gentes conscripsit libro, cunctam sæculi disciplinam complectens, omnesque ingenii sui nervos in Christianismi defensionem intendens, incomparabiles eruditionis, ac eloquentiæ suæ opes plena manu effudit; ille, inquam, investigabili Dei judicio in tam fœdos, ac pudendos postea errores lapsus est. Verùm deficiente, & Ecclesiæ militiam deserente Tertuliano, non defuerunt Ecclesiæ alii milites: nam præter Zephirinum Apostolica autoritate sectam reprobantem, præter varias Asiæ, Græciæque Synodos, accurrerunt statim Claudius Apollinaris, Milthiades, Apollonius, alique scriptis fortissimis hæresim illam contudentes. Sed à nullo gravius vulnus sibi infligi sensit hæc secta, quàm ab authoribus Montano ipso, & Maximilla, qui suspendio voluntario necem sibi intulerunt.

Circa annum 198. de celebratione Paschæ orta est in Ecclesia adeò gravis contentio, ut nonnulli Asiatici maluerint matrem conscindere, quàm à Judæorum Pascha decimaquarta luna Martii celebrantium, ritu discedere: unde & Quartadecimani vocati sunt. Porro illorum schisma, & errores & Victor Papa, & Nicænum deinde Concilium proscripserunt.

§. III.

Tertium Ecclesie seculum.

Quieverat nonnihil sub Commodo, & aliis Religio, vel ut modica intercapedine ad tolerandum vires extinctas Fideles resumerent, vel ut hostium furor lassus, interpositis aliquot annorum induciis, veluti respirans, & robur redintegrans, atrocius ingravesceret. Totum itaque severitatis amarorem in Religionem Severus circa annum 205. adhibuit, qui post vitam Christianorum precibus obtentam, totam debuerat effundere lenitatis suavitatem. Hinc sub eo Victor Papa morti traditus; inde Irenæus Galliarum lumen extinctum; hinc Africam, illinc Galliam cruentavit.

Sed hæc fuerunt præludia ad Maximini, & Decii persecutionem, quæ nisi Deo disponente brevis fuisset, totam Christianitatem perditum ibat. Tam sæpe temporibus illis, id est ab anno 224. ad annum 253. flammis absumebantur, ut Christiani Sarmentitii vulgò dicerentur; ita crebriò leonibus objecti, ut in proverbium & parabolam cesserit: *Christianus ad leonem*. Commoverentur, Lector, viscera tua, si multiplex exquisitarum pœnarum genus referre liceret, quo Christiani toto orbe contrucidati sunt: & nisi Deus abbreviasset dies illos, nisi cita mors Maximinum, & Decium vindicasset, non fuisset salva omnis Christianorum caro.

Non posset reverà inter cruentas exterorum

persecutiones, & internas domesticorum scissuras Ecclesia Christi consistere, nisi in petra solidata, & Dei virtute freta, continuo protegentis Dei auxilio muniretur. Schismati Novati occasionem præbuit atrox, & vix tolerabilis Decii persecutio, cujus pavore alii vel idolis ehus adolebant, vel privatim impetratis pecuniâ libellis, sibi ab inquisitione, & cultu verito cavebant, qui idcirco Libellatici dicebantur. Porro pace Ecclesiæ reddita, dum voluerunt in gratiam pristinam restitui, senserunt non momento expiari facinus, quod momento committitur, & zelo Cypriani, & Cleri Romani vigore plenissimo ad veniam non nisi post seriam pœnitentiam admissi sunt. Inde stomachati Felicissimus, & Novatus Novatianum Episcopali dignitate sublimarunt, ut se contra Romanum Antistitem erigeret, & novo erecto capite monstrum conflaret: sed contra errantium vota in extremum errorem incidit, & qui antea nulli lapso negabant veniam, postea nulli post lapsum veniam dandam prædicabant Novatiani, idcirco Cathari & Mundi nominati. At Ecclesia mediâ viâ incedens, sic lapsos ad veniam admittendos sanxit, ut tamen pœnitentiæ sancta disciplina servaretur, & facilitas veniæ non esset incentivum culpæ: Novatianos se solos labis puros existimantes, & Phariseorum more se à cæteris discernentes detestata est; illos etiam crudeles appellavit, eo quòd in peccatum prolapsi, & ad Ecclesiam lacrymis, gemitu, & dolore pulsantibus divinæ pietatis, & paternæ lenitatis solatia & subsidia clauderant. Hinc Lirinensis in Commonitorio: *Quis ante crudelissimum Novatianum,*

num,

*num, crudelem Deum dixit, eo quod mallet mortem morientis, quam ut revertatur. & vivat? Cyprianus etiam epistola adversus Novat. Ecce, inquit, obortus est alius hostis, & ipsius paternæ pietatis adversarius hæreticus Novatianus, qui non tantum, ut in Evangelio significatum est, sicut Sacerdos, vel Levites jacentem vulneratum prateriret, sed ingeniosâ, & novâ crudelitate sauciatus potius occideret. Videtis Ambrosium in libris de pœnitentia, ubi tyrannicum, ac prorsus sanguinarium Novatianorum dogma gravissimè premit. Festivè etiam illos Constantinus irrisit, dum in Concilio Nicæno cuidam Præsuli Novatiano dixit: *Scalas admove, & solus in cælum ascende.**

Non minùs periculosum fuit schisma Rebaptizantium, qui ducè Agrippino Carthaginensi Episcopo, dum plus justo Hæreticos insectantur, in hæresim impingunt. Incredibile est quantum virium illi schismati attulerit societas & autoritas Cypriani, Dionysii Alexandrini, & Firmiliani Cappadocis, latiùsque grassatus fuisset error, nisi Romanæ Sedis Præsul Stephanus summâ quâ pollebat autoritate obstitisset. Unde non offecit Cypriani sanctimonix discordia sententiarum, quia in illa contentionum æstu se à Romanæ Ecclesiæ omnium Dominæ & Magistræ sensu nolle recedere professus est martyr Christi. De illo Agrippino sic fatur Vincentius Lirinensis: *Agrippinus Carthaginensis Episcopus, primus omnium mortalium contra divinum canonem, contra universalis Ecclesiæ regulam, contra sensum omnium Consacerdotum, contra morem ac instituta Majorum, rebaptizan-*

dum esse censebat. Quæ præsumptio tantum mali invexit, ut non solum hæreticis omnibus formam sacrilegii, sed etiam quibusdam Catholicis occasionem præbuerit erroris. Cum ergo undique ad novitatem rei cuncti reclamarent, atque omnes quaquaversum sacerdotes pro suo quisque studio reniterentur, tunc Beata memoria Papa Stephanus Apostolica Sedis Antistes, cum cæteris quidem collegis suis, sed tamen præ cæteris restitit; dignum, ut opinor, existimans, si reliquos omnes tantum fidei devotione vinceret, quantum loci auctoritate superaba.

Subversura erat universæ Ecclesiæ fidem antiquam hæc tempestas, nisi Romanæ Sedis infallibili decreto diffundens se venenum veluti cauterii ustione cohibitum fuisset. Nam præter insignes viros hujus erroris suffragatores, Episcoporum insuper Africanorum Concilium, præfide præfato Agrippino, nullum esse Hæreticorum baptismum, proinde iterandum sanxerunt. Quod decretum ipse Cyprianus coactis tribus aliis in Africa Synodis confirmavit, & contra Stephani rescriptum plenam querelarum epistolam 74. transiliens moderationis limites scripsit. Nitebantur autem potissimum verbi Pauli Ephes. 4. *Una fides, unum baptisma.* Maximè, inquebant; quia ab infidelibus dari Spiritum sanctum & fidem, credi non potest.

De hac gravissima dissertatione, deque Agrippini, & sequacium in confirmando illo errore solertia, ac de toto negotio sic ait prælaudatus Lirinensis: *Quis ergo tunc universi negotii exitus? Quis unquam, nisi usitatus, & solitus? Retenta est scilicet antiquitas, explorata novitas.*

Sed

Sed forte ipsi novitia adinventioni patrocinia defuerunt? Imò verò tanta vis ingenii adfuit, tanta eloquentia flumina, tantus assertorum numerus, tanta verisimilitudo, tanta divina legis oracula, sed planè novo, ac malo mere intellecta, ut mihi omnis illa conspiratio nullo modo destrui potuisse videatur, nisi solam tantimolimini causam ipsa illa suscepta, ipsa defensa, ipsa laudata novitatis professio destituisset. Postremò ipsius Africani Concilii, seu decreti quæ vires? Donante Deo nulla. Sed universa tanquam somnia, tanquam fabula, tanquam superflua, abolita, antiquata, calcata sunt.

Ex his liquet primò, in Ecclesia perpetuos de novitate triumphos antiquitatem egisse. Unde Stephanus Papa in epistola, quam ad Africam scripsit, nihil novandum, inquit, nisi quod traditum est. Intelligebat enim vir Sanctus & prudens (inquit idem elegantissimus Vincentius) nihil aliud rationem pietatis admittere, nisi ut omnia, quæ fide à Patribus suscepta forent, eadem fide filiis consignarentur; nosque Religionem non quæ vellemus ducere, sed potiùs quæ illa duceret, nos sequi oportere: idque esse proprium Christiana modestia & gravitatis, non suâ posteris tradere, sed à majoribus accepta servare.

Secundò inde claret, Synodum quameunque, refragante Romano Pontifice, nullius esse roboris, vel momenti, cum istis Conciliis Africanis præcipua interfuerint Christianismi decora, & ut sic dicam, Ecclesiastici cœli primæ magnitudinis sydera; & tamen quantiquanti fuerint illi viri, eorum tamen decreta semper ab Ecclesia reprobata fuerunt, quia non solum non fua-

runt Romani Antistitis approbatione communita, sed ejus etiam decretis proscripta sunt.

Nondum sævitix finis, sed innovari visa est sub Valeriano circa annum 255. & latè per orbem bacchari. Hinc præcipua Ecclesiæ capita decussata, sed nequaquam obscurata fuerunt Ecclesiæ decora, sed morte magis illustria evasere. Quid enim moriente Cypriano, & mortem veluti beneficium aureis emente gloriosius? Quid nitentius Massa candida, id est trecentis martyribus, qui maluerunt in fornacem calcariam præcipites agi, quàm idolis cultum deferre? Quid Laurentio illustrius, cujus victoria toto orbe clarissima, & juxta notissima est?

Persecutio sub Valeriano, quàmlibet immanis, exundare visa est circa annum 269. & sequentes, sub Claudio & Aureliano; sed orbem replevit toto hoc sæculo sub Diocletiano, ejusque consortibus Maxentio, Licinio, & Maximino, quando nimirum ad fontes publicos, ad fora, ad vicos, rerumque venalium, ad vitamque sustentandam necessariarum officinas apppositi custodes, & exposita idola, ut dura necessitate, vel prostantia idola adorare, vel fame perire, vel fidem suam propalare, subindeque diris suppliciis mactari Christiani cogerentur. Tunc non aliqui successivè, ut aliàs, sed legiones integræ demessæ, civitates amplæ depopulatæ, templa Christianis plena combusta. Cæsorum, aut exulantium numerum, vel potiùs myriades non magis facile numerare est, quàm stellas cœli. In summa duorum sæculorum tyrannis prælagium duntaxat fuit procellæ, nimbùm cum totius orbis pavore, horrore, & cruore rupturæ. Sategerunt etiam

ad eradicandam penitus christianitatem sacros libros conflagrare, nescientes Christi legem cordibus fidelium insculpi, non litera, sed spiritu.

Sed revera nihil aliud tot cladibus effectum est, quàm ut Tyrannorum furore Christianorum gloria emereret. Felix persecutio enixa Caium, Gabinum, Susannam Imperatoris consanguineos, qui maluerunt sanguinem pro Christo fundere, quàm communem cum Diocletiano servare. Absque persecutionum fluctibus caruisset Ecclesia heroibus illis, qui thermis construendis additi, post productionem pœnam mortem non evaserunt, sed superstites supra decem millia trucidati, vel potius post multas, & quotidianas mortes semel mortui. Nisi invaluisset, & redintegrata fuisset atrocitas, orbaretur Religio luminibus infinitis, Sebastiano, Vincentio, Petro Alexandrino, Genesio mimo, Philemone choraule, Virgini-
bus immaculatis, ultrò quidem ad leones currentibus, sed ad lenones vi tractis, ut spurcitia Paganismi, & Christianismi castimonia claretur. Quæ Religionis gloria, quæ infidelium confusio, Diocletianum cum consortibus & ministris, per triginta carnificinæ annos incredibili duritia continuos victum fuisse à puellis, à Luciis, ab Agnetibus, à Theodoris, à Catharinis, non tantum pœnas, sed & delicias, sed & libidines infracto animo superantibus? Ita planè debuit Crucifixi virtus hoc sexu infirmo fortia quæque confundere, & testimonium invenire ab illa ætate tenera, quæ nondum idonea pœnæ, jam erat matura victoriæ, jamque divinitatis Christi testis existeret locuples, quæ adhuc arbitra sui per ætatem esse non poterat.

Sed quisnam quæso fuit torturarum exitus? An extincta Religio? An fortunati, remunerationeque tortores? Minimè gentium. Hinc potius conspicuum fuit & compertum, Christianismum esse petram, in quam non prævalent inferorum portæ, ad quamve infringitur collisus quisquis illam attentat infringere. Debuit sanè inter prefurarum mœrores nasci & adolescere Religio Crucifixi, ut tot experimentis probaretur nihil illam habere humani, nihil non habere divini; quam tota hominum conspirantium armata potestas tentare potuit ad exercitium, convellere non potuit ad exterminium. Agnoscatur ergo operata divinitas, dum tot suppliciis vexata non cessit infirmitas, nec pugnam deseruit, sed acrius iteravit, fortius vicit, gloriosius triumphavit.

Vim etiam triumphantis fidei ipsi tyranni experti sunt. Testis est Decius, cujus sitim, quam Christianorum sanguis non sedaverat, vorago in Mæsia, ubi victus à Gothis demersus est, extinxit. Testis Valerianus, qui à Persis victus, captusque, Sapor equum conscendenti pro suppedaneo ministravit. Testis Aurelianus, qui inter scribendum adversus Christianos impium edictum, solutis momento digitorum commissuris ultricem Dei digiti virtutem sensit. Testis Aurelius & Severus, qui filiorum appetiti insidiis, ipsi se inedia, & languore confecerunt. Testis Galerius vermibus ex fœdo ulcere formicantibus exesus. Testes Diocletianus & Maximianus, quorum prior conscientiae moribus supra equuleos, supra fidiculas, diris exagitatus, mortem quam aliis iniquissimè intulerat,

pro solamine optabat, nec inferre sibi audebat veritus æterni Judicis justissimam ultionem. Posterior verò laqueo sibi mortem intulit, propria manu propria scelera ulciscente: Unde invicti fuerunt Christi martyres ipsi Tyranni, claudibus enim suis de fidei veritate volentes nolentes testimonium perhibuerunt. Innumera mitto miracula, quibus excæcati judices, terra mota; mitto diluvia, & sterilitates; pestilentias; aliaque id genus flagella more insolito immissa, quibus ultionum Dominus contra impios universum mundum armavit. Mitto prodigiorum gloriam, quibus prætensorum reorum innocentiam illustrabat Deus, dum aliis feræ blandiebantur, alios reverebatur flamma, sub aliis labilis unda sistebat, aliis morbi, mors, dæmones obsequebantur, & tota natura, tametsi insensibilis, Christo stipendiaria, in Christum illatas sentiebat injurias, nec sentiebat modò, sed ulcisccebatur, & signis insolitis testabatur ikum esse verum Deum.

§. I V.

Quartum Ecclesie sæculum.

VERUM (quæ solita Dei clementia, solida agendi ratio est) post tot agones, tot procellas, pacis successit suavitas. Postquam enim crux Solis conflata radiis Constantinum illustravit, eique victoriam promisit & contulit, novam faciem totus induit orbis, quia totus factus est brevi Christianus; eoque major, plenior,

nior , ac vividior erat felicitas, quò ad illam per-
 tot discrimina rerum pervenerant. Saavius quip-
 pe percipitur valetudo post morborum incom-
 moda , post exilia placere magis solent patriæ
 deliciae , & post bellorum strepitus bonum pa-
 cis melius agnoscitur , dulcius gustatur. Deus,
 ah Deus ! Quæ lætitia , qui plausus, quando illi
 miseri, nec miserabiles, illi ignoti, illi contemp-
 ti, & mundo exosi Christiani, non solum liberta-
 ti redditi, sed honoribus aucti fuere ! Quæ mu-
 tatio dexteræ Excelsi, quando gens infamis, so-
 boles Crucifixi, opprobrium hominum, abjectio
 plebis , purgamentum mundi , peripsēma usque
 adhuc, in Constantino regnare cœpit, mundoque
 præesse visi sunt, quibus dignus non erat mun-
 dus ! Sed quæ gloria, quis decoris cumulus, quod
 honoris culmen , quando crux Judæorum scan-
 dalum , Gentium stultitia , non instrumentum
 pœnæ haberi cœpit, sed gradus ad gloriā , &
 ē carnificina transvecta est ad altaria ! Porro ut
 ad honorum fastigium & coronamentum ni-
 hil deesset, non dedignatus est Imperator tra-
 ctare ligonem , corbes terrā opplere, & expor-
 tare ad fundandam in Laterano Basilicam, ubi
 Crucifixi erigeret trophæum, & Crucifixi cultor-
 ibus templum. Agnovit pientissimus Impera-
 tor , in sola sibi Cruce gloriandum , magisque
 esse honorificum servire Christo , fierique ru-
 derarium Apostolorum , quàm orbi sub Sole
 toti principari. Accessit ad gaudiorum coro-
 nidem Crucis archetypæ inventio. Tandiu la-
 tere debuit cœlestis thesaurus , quandiu latita-
 bant Christiani ; sed coruscare debuit , quando
 Christianitas jam non lucifuga, sed ubique aper-

ta splendebat. Adornarunt inventionem illam miracula, nam mortuo tactu restituit vitam corporis, quæ fuerat instrumentum vitæ spiritualis : & sæpius divisa, nunquam imminuta deficiebat, quia virtus ejus infinita non exhauritur effusione, postquam ei vim indidit sanguis Hominis Dei.

Vix intermicabat aliquis radius pacis, cum statim nova, sed intestina excitabatur ab aliquo Novatore tempestas : quia nimirum necesse est hæreses esse, tum ne fides, quæ adversis creverat, prosperitate deficeret : tum *ut probati manifesti fiant*, inquit Apostolus 1. Corinth. 12. id est, ut exponit Lirinensis : *Unusquisque quàm tenax, & fidelis, & fixus Catholica Fidei sit amator, appareat. Et revera cum quaque novitas ebullit, statim cernitur frumentorum gravitas, & levitas palearum : tunc sine magno melimine excutitur ab area quod nullo pondere intra aream terebatur. Namque alii illico prorsus avolant, alii verò tantummodò excussi, & perire metuunt, & redire erubescunt, saucii, semineces, semivivi : quippe qui tantam veneni hauserint quantitatem, qua nec occidat, nec digeratur, nec mori cogat, nec vivere sinat.*

Hinc Sabellius sæculo præterito Trinitatem à divinis ablaturus, personas nomine & officio tenus distinxit : & quia Patrem passum affirmabat, hinc Patripassiani dicti sunt, quos Dionysius Alexandrinus & Romanus, Gregorius Thaumaturgus, ac Synodus Alexandrina sub Sylvestro Pontifice congregata validè confutatos confudère. Illinc etiam Paulus Samosatensis Episcopus (à quo discipuli Pauliniani

nisiæ

nistæ dicti sunt) unam in Deo cum Sabellio personam admittens, duas finxit in Christo, sæculi præteriti anno 265. Hinc Manes non solum fidei, sed etiam lumini naturali bellum indixit. Nam & plura principia confinxit, & libertatem hominibus ademit, & veram carnem à Christo abstulit, eique imaginariam suffecit. Manes, seu insanus voluit appellari, vir planè nominis sui, quippe qui quidquid in aliis ineptiarum insulsiſſimarum dispersum uspiam fuit, collegisse in unum visus est: & tamen tam fatuus Hæresiarcha Paracletum se esse effutire non erubuit. Sed hoc stultiloquium ad stultitiarum complementum & confirmationem desiderabatur.

Hinc etiam à scopulo in scopulum semper incurrens Ecclesia, gravi hoc sæculo Donatistarum schismate jactata est. Illius occasio & origo fuit Lucilla mulier Hispana, autoritate quidem valens, sed ambitione turgida, & propriæ voluntatis adoratrix. Cum enim à Cæciliano egregio Carthaginensis Ecclesiæ Diacono reprehensa fuisset, quòd Martyris nondum vindicati, idest, quem Ecclesia nondum in Sanctorum album retulerat, reliquias palam venerabunda exoscularetur, correctionis impatiens mulier (quæ benè ab aliquo, Animal vanum definitur) vindictam de Cæciliano sumere proponit: ultionis porro occasionem sic nacta est. Contigit ut Mensurius Carthaginensis Episcopus à tyranno Maxentio Romam vocatus, ante discessum pretiosa Ecclesiæ vasa senioribus servanda crediderit. Interim peregrè moritur Mensurius, ejusque Sedi sufficitur Cæcilianus, qui statim promotus vasa Ecclesiæ à depositariis repetit,

repetit. Sed quid non mortalia pectora cogis auri sacra fames? Maluerunt sacrilegi unitatem Ecclesiæ scindere, & legitimum Episcopum repudiare, quàm depositum fidei ipsorum commissum restituere. Ad schismaticos simultatis antiquæ stimulis concitata Lucilla accurrit, & quidquid opibus & autoritate valebat, toto studio contulit, ut Majorinus suus domesticus, Donati à Calis Nigris nuncupati amicissimus in eas insulas intruderetur. Inde Donatistæ vocati sunt, quæ nomenclatura firmata est ab alio Donato, qui mortuo deinde Majorino sussepectus est. Unde patet pecunia movente, & fœmina insufflante divisionis ignem arsisse, quam dissidii flammam veluti oleo superfuso aluit multiplex error, ut postea dicam.

Tanta autem fuit conflagratio, ut opus fuerit Melchiadis Romani Pontificis, & Apostolicæ autoritate Sedis, quæ semper fuit veritatis asyllum, & persecutionem pro justitia patientium refugium. Statuit autem Summus Pontifex, approbante Concilio ad Donatistarum causæ iudicium indicto, Cæcilianum Carthaginensi Ecclesiæ esse restituendum, & alium quemvis tanquam Pseudoepiscopum exauthorandum. Tam justo decreto obedientiam detrectantes Donatistæ omnem lapidem moverunt, ut tumultibus & dissidiis Ecclesiam inturbarent: nam & Constantinum appellarunt, & ad novam Synodum provocarunt. Cogitur Synodus Arelatis innumeris constans Patribus, & præsidentibus Sedis Apostolicæ Legatis Claudio & Avito presbyteris, Eugenio & Quiriaco Diaconis, anno Domini 314. Sed nec tam venerandi cœtus
anathe

anathematis aut decretis domita eorum superbia est, sed ascendens semper iterum Constantinum appellarunt, ut iterum damnarentur; & usque ad Arcadii & Honorii tempora tumultuati sunt, ut magno Augustino triumphandi materiam suppeditarent.

Donatistis adjunxerunt se Traditores, sic dicti, quia libros sacros infidelibus tradiderunt, ut pœnas illas effugerent, quas Diocletianus suo de sacris Codicibus ad Magistratus deferendis edicto minitabatur. Qui omnes auctoritate Honorii, agentibus Africanis Præsulibus, Augustini præsertim opera convicti, vel ad Ecclesiam sine mora redire, vel patria exulare jussi sunt. Sub eadem tempora Ægyptum divisit schisma Meletii Lycopoleos Episcopi, qui à Petro Alexandrino in pœnam idololatriæ, in quam tempore persecutionis inciderat, exauthoratus, maluit totam Ægyptum dissidiis & bellis turbare, quàm justa pœnitentia crimen purgare.

Sed excitatæ ab Ario tempestatì parem nunquam Religio passa est. Quæ tum Deus, Ecclesiarum facies! quæve Catholicorum omnium comploratio, quando, ut ait Hieronymus, totus orbis Arianum se esse miratus est, & ex modica scintilla tantum toto orbe conflagravìt incendium: quando, ut addit Lirinensis, pestiferi erroris venenum non jam portiunculam quandam, sed penè orbem totum contaminaverat. Quantum verò malorum Ariana perfidia invexerit, sic refert præfatus Lirinensis: *Tunc non solum parva res, sed etiam maxima labefactata sunt. Nec enim tantum affinitates, cognationes, amicitia, domus; verum etiam urbes, populi, provin*

provincia, nationes, universum postremo Romanum Imperium funditus concussum & emotum est. Namque cum prophana ipsa Arianorum novitas, velut quadam Bellona aut Furia, capto prius omnium Imperatore (nimirum Constantio Constantini filio, quem Eusebia uxor ad hærcsim pellexerat, ad id etiam Eusebio cubiculario non parùm incumbente) cuncta deinde palatii culmina legibus novis subjugasset, nequaquam deinceps destitit universa miscere, atque vexare; privata, ac publica; sacra, prophanaque omnia; nullum boni & veri gerere discrimen; sed quoscumque collibuisse, tanquam de loco superiori percutere. Tunc temerata conjuges, depopolata vidua, prophanata virgines, monasteria demolita, disturbati Clerici, verberati Levita, acti in exilium Sacerdotes, oppleta Sanctis ergastula, carceres, metalla: quorum pars maxima interdictis urbibus protrusi, atque extorres, inter deserta, speluncas, feras, saxa, nuditate, fame, siti affecti, contriti, & tabefacti sunt.

Et quanvis Arij Christi Domini divinitatem & consubstantialitatem inficiantis blasphemiam in Ebione & Cerintho olim ab Apostolis damnatam præscripserit primùm Synodus Alexandrina, & Oecumenicum deinde trecentorum & octodecim Patrum Nicææ coactorum Concilium; tot tamen anathematis non cessit impietas, quæ nec Ario inter exonerati ventris sordes animam efflante & extincto concidere potuit. Nam è stercore suo quamplures hæreticos super aspidem & basiliscum pestilentes Eudoxium, Eunomium, Aëtium, Acacium, Semiarianos, aliosque similis iniquitatis viros effudit. Sed certè
necel

necessaria fuit illa tentatio, ne Ecclesia nimiam pacis abundantiam diffuens, ipsis suis incrementis deperiret. Certè nisi Arium orcus excitasset, nisi crudelissimis utriusque Eusebii, Nicomedienfis & Cæsarensis molitionibus Ecclesiam malignus spiritus divexasset, nec magni Athanasii de Constantii, Juliani, & Valentis Imperatorum viribus triumphantis gloria claruisset, nec innumerorum Præsulum sanguis Ecclesiam rigasset; nec fidei benè fundata antiquitas suæ firmitudinis à Deo promissam immobilitatem ostendisset.

Ario in Filium blasphemanti successit Macedonius Spiritus sancti divinitatis hostis, in Alexandrina primùm Synodo proscriptus, à Gregorio deinde Theologo fortissimè debellatus. Sed omnes hostium furores longè superavit Valentis Imperatoris ferocia Episcoporum alios opprimens, alios flammis absumens, nec parcitura Basilio, nisi viro Dei prodigia patrocinata fuissent. Sed per Gothos justitiæ suæ vindices monstrum illud profligavit Deus, illudque flammis extingui voluit, cujus furore Orientalis diu Ecclesia exarserat. Sed necessarii fuerunt tot & tanti hæreticorum insultus, tum ut christiana fides probaretur orta de cælo, in quam per administratos orcus nihil potuit, quæve ex cladibus invalescebat, dum videbatur excisa. Nisi vapores suos in cælum hæretici emisissent, non coruscassent illa primæ magnitudinis sydera, Hilarius Pictaviensis in Orientem relegatus, ut Catholicam veritatem ubique terrarum propugnaret; & Ambrosius vir ille divinus, qui Justinæ Imperatricis aures contudit, Magnum Theodosium severè pœniten

pœnitentium disciplinæ ob Thessalonicæ internecionis crimen intrepidè deinde suppositurus.

Novum fidei trophæum paravit Apollinaris Arianarum impietatum suscitator, & novarum architectus; nam Dei Verbum non assumpsisse hominem, sed hominis tantum carnem, cui esset ipsum pro anima, commentus est. Ejusdem furfuris fuit Photinus, non tam errores inveniens, quàm ex collectis erroribus spectra constans. Illum Athanasius tum scriptis, tum Concilii Alexandrini decretis coërcuit: istum Hilarius, Sardicensis Synodus Dei verbo, Gratianus deinde & Theodosius edictis compressere, quorum zelum œcumenica deinde Constantinopolitana Synodus fortunavit. Unde qui damnis fidei crescere voluerunt, fidem ipsi suis damnis ornarunt. Per hæc etiam tempora Ecclesiam incessère Pseudomonachi, qui tum maligni spiritus afflatu, tum nimia jejuniorum & solitudinis asperitate in varia deliramenta mentis potius inopiâ, quàm hæreticâ vafritie prolapsi sunt. Alii enim Eustathiani nomine in Armenia nati solos Monachos salvandos mentiebantur, & Lucifero superbiâ non impares (superbia autem fatuitatis frequenter comes) sibi solis deferendum cultum inanissimè jactitabant. Alii Massaliani dicti, vel à sua fatuitate Precatores & Enthusiastæ, adeo desipuerunt, ut orationem exclusis Sacramentis & piis operibus, unum esse ad beatitudinem medium, eaque Deum corporeis oculis posse videri, per summam ignorantiam infinitâ vanâ gloriâ cumulatam effutierint. Priores Osius Cordubensis Apostolico Sylvestri Pæ

pax gladio in Concilio Gangrensi confecit. Posteriores Sydenfis & Antiochena Synodi profligarunt.

Cæterum dum senescere hæreses visæ sunt, cœpitque reflorescere Religio orthodoxa, nova ingruit in Perside persequutio, ne religionem, quæ per damna creverat, pax nimia demergeret. In Christianos ergo sævit Sapor, bona, fortunaſque dilapidans, basilicas solo adæquans, sanguinem profundens non solum plebis, sed Magnatum, quorum unum crimen pietas erat & religio. Sed quantaquanta fuerit illa tyrannis, umbra fuisse credenda est, si Juliani Apostatæ sævitæ conferatur, ab ejurato Christianismo & professo Ethnicismo nominati. Ut Christi fidem ad nihilum redigeret, fictis primum beneficiis, dolis deinde & fraudibus, exauthoratione postea, è publici insuper magistrarii gradibus amotione, bonorum deprædatione, apertâ demum lanienâ Christianos aggressus est. Restaurari ad tempus Ethnicismus visus est, ut lapsu graviore rueret, & Christi amplius victoria clareret, dum jaculo divinitus vibrato confixus Apostata, Galilæi (sic Christum per ludibrium nominabat) triumpho materiam ipse suppeditavit. Respirare tamen nonnihil superstitioni ab anno 388. ad 399. licuit consiliis Symmachi, armis Eugenii, indulgentiâ Valentiniani, ope Maximi, ut Theodosii victoriis subacta in perpetuum tandem concideret. At quâmlibet illustris fuerit Theodosii reportatus de superstitione triumphus, ille tamen illustrior fuit, quo victâ victoriâ seipsum Ambrosii disciplinæ & pœnitentiæ publicæ ob fusum Theſſalonicensium

cenſum ſanguinem permittit. Quàm grandis fidei virtus, quæ & Tyrannos victricibus Theodoſii armis, & Theodoſii victoris cor inſpiratâ gratiæ ſuavitate ſectere potuit!

Inclinante hoc ſæculo Urſicini in Romanum Pontificatum intruſio, & Luciferianorum factio duplex inito conſortio Eccleſiæ pacem nonnihil interturbavit: ſed illum juſſu Valentiniani I. in exilium relegatum, iſtos Hieronymus ſcriptis, Theodoſius ediſtis compreſſerunt. Sævior fuit à Priscillianiſtis excitata procella, quæ & Manetis deliria ſuſcitavit, & cum Sabelio Trinitatem evertit, ſed ſuam demùm falſitatem tunc maximè indigitavit, cum falſitati veniam dans, tritum illud uſurpabat: *Iura, perjura, ſecretum prodere noli.* Quia tamen hominibus diligentibus vanitatem, & quærentibus mendacium falſitas arridere ſolet, ut peſtis graſſans cohiberetur, multiplicis Synodi in Galliis & Hiſpaniis coactæ cauterio opus fuit.

S. V.

Quintum & Sextum Eccleſiæ ſæculum.

INitium huiusce ſæculi celebre fecit Origeniſtarum nomen, quo non ſoli Origenis ſectatores, ſed multi etiam Catholici, & ipſemet Catholicorum decus Chryſoſtomus donati ſunt, errantium mala paſſi, erroris labiſque puri. Et quidem iniquiſſimè: ſicut enim tolerare hæreſes, & in lupos vocem non contendere
ſumnum

summum piaculum ; ita veros Catholicos specioso tuendæ religionis umbone aggredi , & persecutionem religionis colore oblinire , ac pietatis fucō adumbrare , non minus est detrimentum.

Sed longè celebrius Chrysostomi causâ sæculum istud evasit ; Chrysostomi , inquam , causâ ; melius dixerim Dei & Ecclesiæ. Nihil ergo mirum, si adversus superbæ Eudoxiæ, Theophili Alexandrini , & Synodi ab eodem ad Chalcedonis suburbium , cui à quercu nomen , coactæ crudeles similitudines , Dei innocentia suæ prodigiis patrocinantis protectionem expertus est. Miraculis nonnihil permota ferocia Chrysostomum ab exilio revocat , in deterius postea relegandum. Fallor , nihil illi malum accidere potuit , cui solum peccatum malum apparebat ; nec ingratum exilium censendum est , ubi vices Episcopi implens , gentes Christo lucrabatur , exilium convertens in Apostolatū , quem morte sanctissima , nisi mavis martyrio , coronavit. Si tamen ille mori tunc potuit , cujus animâ ad vitæ immortalis felicitatem migrante , memoria in tot divinis voluminibus permanens æternū vivet. De ejus laudibus alibi.

Per hæc etiam tempora Anthropomorphitarum vesanus & pinguis error Deo corpus affingens intonuit : Millenariorum etiam commenta circa illa tempora audita sunt , quibus homines mille annos post resurrectionem , affluentem deliciis vitam ducturos somniabant. Porro in his non tam opinionibus , quàm nugis referendis immorari pudet.

Famosior fuit & savior Pelagianorum hydra
in

in varios status veluti totidem pullulantia capita sese fundens, ut in uno hoste plures victorias inveniret Hercules! Hipponensis, ille inquam, cujus nomen plenum elogium est, incomparabilis Augustinus, quem sicut gratia sibi devicit, ita gratiæ hostes ipse contrivit; dubiumque ferme est, an plus Augustino gratia, quam Augustinus gratiæ debeat. Et certè plus gratia ipsa deberet, nisi per gratiam vinceret Augustinus à gratia olim devictus. De hac hæresi fusè alibi dicemus.

Pelagii blasphemias æquarunt Nestorius & Eutychetes; ille duas in Christo personas confingens, iste unicam in eadem persona substantiam ex duabus sacrilega commixtione confans; ille Deitatem humanitati copulatam voluit non hypostaticè, sed affectivè; iste humanitatem in divinitatem ita transformatam & conversam voluit, ut creatam cum increata natura identificarit; ille Deiparæ monile Mariæ abstulit unius mutatione literæ, non *Θεοτόκου*, uti debebat, sed *Θεοτόκου* appellans; iste Mariam vix matrem hominis esse volebat, humanitatem fictitiâ sua naturarum confusione extinguens. De utroque Hæresiarcha in tractatu de Incarnatione plura dicemus.

Idem sæculum non soli' Redemptoris gratiæ & personæ, sed & nitentissimo Deiparæ virginitatis candori in Elvidio, Joviniano, Vigilantio super porcos fœtidis belluis injuriam fuit: eorum tamen putores à Hieronymo, Damaso, & Siricio fortissimis scopariis abradi sunt, & eximium Mariæ decus assertum. Nam sicut exhalantibus è sterquilinio vaporibus non minuitur Solis gloria, sed clarescit: ita matris hono-

rificatæ fulgorem suis spurciloquiis inviti illustrarunt, qui infuscare attentaverant.

Difficile dictu est, quantas per hæc tempora Ecclesia clades tulerit laceratione Imperii à Sarracenis, Gothis, Wandalis, Hunnis, Ostrogothis, Wisigothis divisi: sed quia fidei nihil persecutione favorabilius, inter tot bellorum strages non solum apud barbaros propagata Religio fuit, sed & inclytum Galliarum Regnum infidelitate posita, Christi se iugo subdidit, nec unquam meliùs Franci, seu liberi Galli dici debuerunt, quàm cum evangelicam libertatem nacti sunt. Christianismum mirè promovit conversio Clodovei, hortante Remigio, adorantis quod incenderat, incendientis quod adorarat. Tuncque verè Rex evasit, cum Christo servire cœpit. Quin & Regni perpetuitatem obtinuit, dum sacro oleo misso de cœlo in phiala æternum duratura asservato inauguratus est, quo & Christianissimi Reges nostri inunguntur.

Per hæc tempora Arrianæ impietatis procella iterum recrudit, Hispaniam sub Leovigildo, Africam per Gensericum, Hunerium & alios, Italiam per Theodoricum, Totilam, ac hujusmodi æterni Verbi hostes vastatura; nisi renovatam rabiem solitâ pugnandi arte, id est patientiâ, fides vicisset. Obscurari & penè deficere ad tempus religio visa est, ut post caliginem clariùs, post contritionem vegetiùs sobolesceret. Ita planè pulchriùs tum rutilavit, excitatis à Deo viris insignibus in Hispania Hermenegildo martyre & Rege, & Leandro Episcopo; in Italia Boëtio, & Paulino Burdegalensi, qui è Nolano Præsule captivus factus vices Redemptoris implevit, dum se alterius captivi pretium dedit; in Africa de-

mum

anum Fulgentio Ruspensi, & Eugenio Carthaginiensi Antistitibus, aliisque innumeris, quorum persecutione & fides micantior, & Mauritaniæ interioris conversione dilatior evasit.

Mitto minutiores hujus sæculi sequentis non tam hæreses, quàm vertiginosorum hominum vitiligationes. Talis fuit Corrupticolarum & Incorrupticolarum inanissima de Christi corporis incorruptibilitate contentio. Mitto Agnoitarum fatuitates, & Themistianorum somnia, Christo ignorantiam affingentium. Mitto Justiniani Imperatoris luctuosam prolapsionem, qui post amplificados Imperii fines, post conditas vel digestas leges, post Ecclesiam potestate sua defensam, Sylverium, Vigiliumque summos Pontifices furentis conjugis ultioni mactavit, & Eutychium Bysantinum Præsulem in exilium misit, & eâ tandem morte interiit, quæ poenitentiam dubiam, salutem reddidit ambiguam. Mitto excitatas Zenonis Henotici turbas, Acaicii in Catholicos furores, Theopassitarum, auctore Petro Cnaphæo, seu Fullone, impia additamenta, quibus celebri illi trisagio divinitus probato, *Sanctus Deus, Sanctus Fortis, Sanctus Immortalis*, subjungi illud voluit, *Qui passus est pro nobis*, Patripassianismum suscitaturus. Mitto excitatas à Diolcoro contra Bonifacium II. Antipapa, & à Vigilio contra Sylverium in summum Pontificatum ope Belisarii intruso turbas, post obitum tamen Sylverii resipiscente, & in Pontificatum deinde assumpto canonica electione Cleri, qui ex Antipapa verum Papam constituere, quàm laceratam schismate Ecclesiam diutius interturbare maluit.

Celebrior fuit ab anno 546. de tribus capitu-

lis controversia Catholicos à Catholicis ipsis divellens. Cùm enim Theodorus Cappadociæ Episcopus Imperatori persuaderet Hæreticos Concilio Chalcedonenſi obtemperaturos , si tria capitula præscriberentur (agebatur porro in illis capitulis de prohibitione Theodori Mopsuesteni, & epistolæ Ibæ Edesseni, quam in laudem Mopsuesteni, Nestoriique ediderat, necnon librorum Theodoretæ adversus Cyrillum ;) inde turbæ innumeræ ortæ, quibus orbis Christianus non parum vexatus fuit.

His tumultibus successit schisma Laurentii antipapæ à Festo Romano Patricio intrusi; successit & Constantinopolitanorum Patriarcharum ambitio Universalis Episcopi titulum sibi arrogantium. Hoc morbo jamdudum laborabant Byzantini Præsules , ad sacrum aspirantes Imperium ex quo prophanum suam in civitatem translatum videbant. Sed tantæ superbiæ virus Joannes dictus Jejunator , potissimum effudit; ejus tamen imaginariam magnitudinem repressit primùm Pelagius , deinde Gregorius Magnus.

Verùm ingentia illa damna , quæ per tot rerum discrimina Ecclesia passa est , majori lucro compensavit Deus : nam præter ingentes , quos in Gallia , Italia , Africa , & Hispania progressus fecit, conversi exinde sunt Lazarorum populi ad portas Caspias, & Auximitæ in Æthiopia, & Suevi ab idololatria revocati, & Boii , & alii quamplures Orientales , & Abasgi , & Hunni ad Rofphorum cum suo Rege Gorda , ut quo magis ab Hæreticis & Schismaticis vinea Domini putata fuerat, eo sacris propaginibus dilataretur.

Declinante sexto sæculo non pauca tulit Ecclesia

clesia à Longobardorum tyrannide , qui Arianarum blasphemiarum impietatem superstitionibus ethnicis admiscentes , in utriusque Imperii perniciem conspiraverant. Exarchorum etiam , & Præsulum Ravennatum , Romani Pontificis imperium detrectantium savitia tunc infremuit , ut Romanæ petrae soliditas infractior appareret.

§. VI.

*Saeculum septimum, octavum,
& nonum.*

HIS sæculis in fidem insurrexit crebus persecutionibus iteratis. Nam & Cosroës Persarum Rex imperium vastat , armis illud suis vastaturus , nisi Ecclesiam opprimere statuisset. In illum Heraclius bellum parat , injuriam Dei , & Crucis , quam in Persidem abduxerat , vindicaturus. Fortunavit pios conatus Deus : post innumeras namque clades , post generalem fidelium complorationem , post supra nonaginta Christianorum millia vendita ad lanienam , omnes Tyranni copiae profligatae sunt. Et certè non potuit non vincere Christianus Imperator , cujus tota in cruce fiducia erat ; crux enim captiva captores vicit , non secus ac Arca quondam Philisthæos , fuitque eo gloriosius Jerusalem reportata , quo indecorius fuerat in Persidem delata. Triumphale lignum humeris impositum reportavit pius Imperator in Calvariam. Sed cum vellet procedere , immotus mansit , donec

posita purpura vilem induit vestem; quia alienis vestium ornamentis non egebat qui pretiosissimum instrumentum gestabat, nec luxum compatitur totius humilitatis lignum. Quæ gloria crucis talem habere bajulum, nunquam magis Regem,quàm dum crucem portat, quàm Christus orbem & tartara superarat, juxta illud Magni Leonis serm.8. de Pass. *Traditus itaque Dominus scientium voluntati, ad irrisiōem regia dignitatis, supplicii sui jussus est esse gestator, ut imple-
retur illud: Cujus imperium super humerum ejus, quia pulchra specie triumphi sui portabat trophæum, & signum salutare adorandum regnis omnibus inferebat.*

Molestior fuit Monothelitarum hæresis integro ferè sæculo Ecclesiæ pacem redditam inturbans, quæ dum unicam personam contra Nestoriam, duas naturas contra Eutychetem in Christo confitetur, unicam tamen in illo voluntatem & operationem comminiscitur. De his hæreticis in tractatu de Incarnatione ex professo differemus.

Sed quantaquanta fuerit à Monothelitis in-
vecta in Ecclesiam turbarum calamitas, à nullo tamen hoste atrociora unquam passus est Christianismus, quàm à Mahomete, à cujus infanda sobole, totius orbis flagello, & impietatum omnium sentina, tot mala etiamnum sentit. Mirum est, quomodo secta, quæ quidquid prophæ-
num in Ethnicis, quidquid superstitiosum in Judæis, quidquid impium in Hæreticis, quidquid execrandum in Magis collegit, & tam citò re-
cipi, & tam latè potuerit propagari. Sed præter alias hujus divini judicii rationes alibi à nobis memoratas, opportuna illa occurrit, ut fides quæ

in pace Christianorum marcessit, importuni adversarii instantiâ veluti antiperistasi provocata reflorescat. Ineffabile dictu, & impossibile representatu est quis fuerit templorum collabentium fragor, quàm ater conflagrantium fumus, quàm cruenta occisorum mactatio, quàm tristitia profugorum lamenta. At necessaria fuit illa probatio, vel potius fidelium purgatio, qui vitiis suis Mahometanorum victoriis, & per illas divinæ justitiæ viam paraverant. Citò enim in Infidelium jugum incidunt, qui fidem suam inhonorantes, divinæ legis imperium detrectant.

Irrumpentis adversarii crudelissimi ferociam & Hispanias divexantem, & Gallias invadentem Carolus Martellus Francorum Rex repressit, tercentis septuagintaquinque Sarracenorum millibus profligatis. Hinc fortassis Turcarum in Gallos reverentia, expertorum frustra Christianismum appeti, ubi Reges sunt Christianissimi, & timentium invenire malleos, postquam à Martello contusi sunt.

His nihilominus cladibus fides resurgere inde cœpit, ubi videbatur peritura, & in alia regna dilatata est. Nam & Mahometani in Hispaniis victi sunt, & Religio in Angliam per Gregorium Magnum, in Germaniam & Boreales plagas per Bonifacium Moguntinum Præsulem promota est. Fides porrò frigidis in illis regionibus tantum concepit pietatis calorem, ut sanctitas nedum in Presbyteris & Monachis, sed in Regibus, præsertim Anglis eminuerit. Exinde fides ad Frisios promota, & ad Saxones diffusa fuit. Denique in Occidente decus suum Religio restituit, idololatriâ expulsâ, elisis Sara-

cenis , Longobardis per Pepinum & Caroloman-
num extinctis. Vix optata pace Occidens
fruitur , cū ecce Oriens Iconoclastarum , seu
Iconomachorum in sacras imagines bellum in-
dicentium , furore flagrare cœpit. Eorum im-
pietatem promovit Leo Isaurus , & Constanti-
nus Copronymus, Imperium magis stercorea sua
indole inquinans , quàm fontem lustricum,
quando iatgebatur , excrementis conspur-
carat. Inde in Joannem Dāmascenum , Step-
hanum Papam , & alios athletas rabies sub Leone
Armenio instaurata , cui comprimendæ vel Ni-
cæna secunda Synodus œcumenica impar fuit.
Sed de his dum de cultu sacrarum Imaginum
agemus , plura dicemus.

Per hæc etiam tempora, initio potissimum sæ-
culi noni , sollicitavit Ecclesiam Manichæorum
repullulantium & clam virus effundentium im-
pietas , Hormisdæ Papæ zelo , & Justini Impe-
ratoris armis, utriusque etiam Michaëlis, Curo-
palatis & Porphyrogeniti rescissa; & cū in Oc-
cidente sylvesceret , Roberti Regis & Henri-
ci II. edictis per ignem , ferrum , & suspendia
deleta. Sed inter tot insurgentes undequaque
fluctus attollebatur Ecclesiæ arca , nec depri-
mere eam potuit novum Photii in Constanti-
nopolitanam Sedem, expulso vero Pastore Igna-
rio , intrusi schisma. Nam Dei beneficio & Im-
peratoris Basilii Macedonici autoritate , ac
Constantinopolitani sub Hadriano II. Concilii
decretis restituto Ignatio , Photius exauthora-
tus, Photiani ablegati sunt. Post Ignatii obitum
dolis revocatus Photius, Joannis VIII. suffragio
restitutus est, non sine sanctæ Sedis injuria. Tan-
ta enim Pontificis facilitas occasionem absur-
de

dæ de Papilla Joanna fabulæ locum dedit. Nam pro fœmina habitus est virorum & Ecclesiæ Hierarcha, qui Pseudopatriarcham eunuchum, id est, semivirum, timuit & promovit. Advertant quæso animarum Rectores, indignos illos esse regimine, qui in consiliorum suorum consortium eunuchos vocant. Meminerint turbatum ab Eutropio eunuchò excitatarum, quibus sub Theodosio Imperium commotum est, & Magnus Chrysostomus divexatus. Meminerint Arianismum non parum sub Constantio promovisse Eusebium cubicularium cum gregalium spadonum globo, qui eo amplius Arianæ impietati adstipulabantur, quo ignominia suæ solatium & sterilitatis decus reputabant, si nec in Deo generatio agnosceretur. Meminerint eunuchi Phœcii, & fallacis & furore constantis, qui quantum erat generationis temporalis exfors, tantum erat paternitatis spiritualis & prælaturæ avidus. Certè tam perniciosi fuerè huiusmodi eunuchi.

Inclinantis hujus sæculi finem non pauciores inceserunt clades. Nam & Gallias Ludovici Pii abdicatio conturbavit; & Ludovici Balbi in Imperium provectio Italiam commovit; & Normannorum in Gallias incursionibus florentissimum Regnum fumavit incendiis, rivisque cruoris immaduit; & Danorum invasionibus Anglia infrenuit. Sed tot malis oppressa fides non est, quæ cladibus purgatur ut inclarescat, Deo fidei authore & defensore ex hominum vitis electorum lucra eliciente. Non enim tam cruoris copia scedavit orbem, quàm Ecclesiam illustravit Virginum illarum heroica virtus & supra virilem fortior, quàm præcise sibi unà cum

superiori labro naso, horrorem lascivientibus incussere barbaris. Danorum quoque conversio illata damnata refarcivit.

S. V I I.

Decimum, undecimum, duodecesimum & decimumtertium Ecclesie seculum.

INitium hujus sæculi obscuravit excitata in Romanam Sedem à Sergianis opaca nubes: ut enim Sergius hominum nequissimus, & juxta ambitiosissimus Pontificatum raperet, & Romæ cædibus, & sacra dignitas sacrilegiis conspurcata est. Progredi ulterius nequivit lævitia, quàm cum Formosi Pontificis exhumatum cadaver in Tyberim mergi jussum est. Mirum est quantum, & quandiu intrusiones & extrusiones Pontificum per sæculum fermè integrum Ecclesiam turbinibus, ambitiosorum memoriam dedecore impleverunt. Sed quàmlibet atri fuerint privati quorundam hujus ævi Pontificum mores, violatæ tamen nunquam potuit etiam ab indignis sacra dignitas, adversus quam nunquam sunt portæ inferi prævalituræ. Sedent interdum inscrutabili divinorum judiciorum consilio super cathedram Petri Scribæ & Pharisei, ut in illis solum Christum, cujus vices gerunt, inspiciamus, & divinitus traditam potestatem in illis etiam veneremur, quorum vita contemptui est & opprobrio. Sanè nisi Sedes illa, quæ facta caput mundo, quidquid non possidet armis, religione tenet.

tenet, divinitus esset super firmam petram ædificata, perennique miraculo fulta, jamdudum & Tyrannorum assultibus, & Hæreticorum odiis, & ministrorum sordibus, & quorundam Pontificum nimis sceleribus concidisset. Quàm firma illa statio, quàm solida, quæ externis non valet moribus concuti; quàm sancta sedes, quæ nec sedentium potest sceleribus violari.

Passas in ipso Religionis centro jacturas refarcivit fides in Boreales tractus longè, latèquè diffusa. Planè Soli similis aliud hemisphærium illustranti, dum à nostro recedit: splendorem quippe fidei nobismet eripimus flagitiis, at non ipsi. Ejus sese effundentem lucem receperunt Sclavi, Dani, Norvegi, Bohemi, Poloni, Hungari, Rusci, Rossolani, & Moschi.

Undecimum sæculum turbis opplevit Henrici III. Imperatoris omnigenis ex flagitiis concietæ schisma nefarium, quo & Clericorum cœlibatum, Cadolao Antipapa opitulante solvit, & sacras dignitates horrendo nundinationis commercio vendidit, & Ecclesiasticam libertatem sub jugum gemendum redegit, & jus investituræ Prælatorum per omnem injuriam extorsit. Quæ tunc! (Deum immortalem!) defectiones, qui furiales stimuli, quot clades, quot sacrilegia! Nihil enim non audebat impius, cuivis suppetebat unde furorem exple-ret, resque insociabiles sacras cum profanis, fusque deque misceret. Procellas auxit Henricus IV. Imperator investituris vi obtentis, & Burdini Antipapæ promotione. Sed eas complevit Friderici Ænobarbi impietas, qua & Alexandrum III. deponere, & primas infusas Octavianum adjudicare, illique Guidonem Cremen-

sem primum, deinde Joannem Srumensem sufficere præsumpsit.

Hoc etiam sæculo audaciæ in sacra, quâ nunc laborat Anglia, præiverunt Guillelmus & Henricus I. ac II. Reges Ecclesiastica sibi arrogantes. Sacrilegæ præsumptioni dum restitit Martyr, evadit victima Religionis. Decessorum ausibus impietatem ampliolem addidit Joannes Rex, cui opportuna mors medelam tulit. Gillias etiam non parum infecit vendibilium dignitatum profanatio, & indignorum ad sacros Ordines promotio. Nam & puerum quinquennem in Rhemensem Episcopum inaugurari, & pueros duodennes duabus etiam Ecclesiis principari, ut patrimonium Christi, & pauperum in hæreditatem transmissum, luxui materiam præberet & spurcitæ, obstupescens orbis miratus est.

Tot clades sequuta est Sacramentariorum, duce Berengario Andegavensi Archidiacono, nefanda pestis, beneficiorum divinatorum summum & summam, divinam nimirum Eucharistiam, & realem Christi corporis sub speciebus præsentiam omnium sæculorum perpetua fide stabilitam aggressa, pro vero corpore umbras substituens, & in limpidissimis verbis Salvatoris metaphoras cõminiscens. Sperabant impij Ecclesiæ corpus citò corruptum iri, si vitæ fructu submoto, subtractoque pabulo vitali sensim exanimaretur. Impietatis architectum Berengarium pœnitentiam egisse ferunt, sed eo magis timendam suspectamve, quo non solùm bis relapsus est, sed etiam peccatis alienis oneratus decessit, non paucos relinquens suæ incredulitatis successores.

§. VIII.

*Decimumtertium Ecclesiæ
sæculum.*

NON fuit paucioribus hæreseon & bellorum æstibus jactatum hoc sæculum. Calamitatum author fuit Petrus Wäldus, à quo Wäldenses dicti sunt sectarii, qui & Pauperes de Lugduno à simulatæ paupertatis vana ostentatione, sicut ab urbe quam incolébant, Albigenfes nominati sunt. Fuit hæc secta non errorum modò, sed & turpissimorum deliriorum sentina. Romanam Ecclesiam ut Apocalypseos meretricem traducebant; cultum Sanctorum, quin & Sacramenta abdicabant; brutorum etiam ad esum eadem homicidio nihilo minus damnandam effutiebant; Clericis bonis temporalibus interdicebant, & alia id genus novitatum monstra per Gallias & vicina Regna spargebant. Contorquere in illos anathemata variis in Conciliis, Albiensi, Tolosano, Turonensi, & Lateranensi œcumenicis sub Alexandro III. Ecclesia fategit: sed cohiberi non potuisset grassans lues, nisi Crucesignatorum copiis & armis Ducis Simonis Montfortii profligata fuisset.

Præluferant dudum Albigenfium cladibus schismata & hæreses: illa fovit Petrus Leonis sub Anacleti nomine intrusus; istas Albertus de Brixia, Ecclesiam bonis exuens ut proceres impleret, redderetque latrones & sacrilegos; Petrus Abaillardus, Gilbertus Porretanus, & alii
filii

fili iniquitatis; sed omnia à Bernardo eximio sui ævi ornamento sopita sunt.

Addiderunt tot malis majora crementa Turcarum progressus. Repressit quidem jamdudum eorum impetus, vires contrivit, consilia dissipavit Dux Godefrédus Bullionius post infinitas victorias Jerosolymæ Rex inunctus. Proculcarunt etiam eorum copias Balduinus I. & II. innumeris barbarorum myriadibus usque ad internecionem deletis. Verùm tot gaudiorum amœnitatem non solum interruptit famosa illa cladibus expeditio, hortante Bernardo & sermonem suum confirmante sequentibus signis suscepta, in qua & Conradus Germaniæ Rex cæsus, & Ludovicus VII. Galliarum Rex citò ad propria reverti coactus est: sed præcipuè doloris campum amarissimum aperuit Jerosolymitani Regni amissio, Jerosolyma capta, Religio polluta, Crucis archetypa traductæ per compita, & virgis cæcæ injuria. Sumpta identidem novarum expeditionum consilia, sed Christianorum Principum discordiâ, aliisque divinæ æquitatis judiciis irrita. Orienti desolato accurrit S. Ludovicus, hostes initio fugans & vincens, sed invadente exercitum suum lue victus & captivus. Redemptus in propria reversus est non ad otium, sed ut milites colligeret, & in Africam copias suas reparatas & auctas traduceret; sed cum capta Carthagine, fugatisque barbaris vestigia passim victoriis signaret, ad majorem cœlestis triumphi gloriâ tot heroicis virtutibus debitam à Deo vocatus est. Innumeras sanctissimi Regis dotes omnibus notas hic proferre supervacaneum est. Id solum dicam, solam Ludovici sanctimoniam, etsi alia omnia deessent,

copio

copiosissimum esse sæculi illius cladium lenimentum. Adde virum illum divinum usqueadeo præ pietatis odore fuisse orbi toti admirationi, ut Sarraceni virum sanctum apud se captivum in Regem eligere voluerint, & è vinculis in solium illum assumere, qui carcerem intraverat, ignominiam turpi loco detracturus.

Accessit ad fidei victoriam & fidelium solamen pietas in Occidente renovata, postquam ab Oriente defecit. Etsi enim tanta evaserit Saracenorum tyrannis, tamque terribilis potentia, ut eâ major Orbis pars ruerit, & quæ superest tremat; inde tamen oculata fides fructus non prænitendos colligit, etiam dum videtur peritura. Illi prodest hostis ferox etiam dum obesse molitur, quia flagellum Dei convertit in virtutum pabulum, & electorum coronamentum. Exemplo esse possunt innumerabiles Religiosorum Ordinum etiam militarium excitata in Occidente cohortes, ut damna Orientis sarcirentur. Etenim orti tunc ex hospitum Xenodochiis Equites Hospitalarii ad bella fortissimi, qui Rhodon deinde occuparunt, & tandem Melitem. Eis affines Templarii & Teutonici Equites, Templi se custodiæ, & Turcarum infectioni addixerunt. Collapsa etiam vitæ Regularis disciplina, vel restituta, vel in novis Ordinibus inchoata reffloruit, qui solidam pietatem in claustris etiam ipsa senectute labantem repararunt, Cluniacenses nempe, Cistercienses, Clavallenses, Carthusienses, Grandimontenses, Præmonstratenses, Camaldulenses, Vallombrusenses, Carmelitani, Augustiniani varii, Franciscani, & nostri Dominicani. Plenæ sunt sacrarum. historiarum Annales præclarissimis gestis.

ab Ordinibus illis in Dei honorem, & Ecclesie tutamen patratis: attamen inter tot sanctitatis heroes à sacris illis cœtibus partos, præ cæteris eminuit Bernardus Doctor Mellissus, non tam Monachorum Pater, quàm Regum & Pontificum mirâ suâ sapientiâ, & majori pietate Rector; & Bruno ex hominibus Angelos faciens, & cretum in cœlum vertens. Ibi silentium perpetuum, quod sola interrumpit psalmodia, ut Angelos agant Carthusiani, & prælibent immortalitatem ante mortem. Quid ergo mirum, si stellas venientes vidit Hugo Episcopus; facit enim cœlestes silentium, psalterium, jejunium. Non indiget Ecclesia miraculis (quibus tamen identidem fulget:) habet in sanctissimo Brunonis Instituto nunquam corrupto miraculum perpetuum, stellarum incorruptibilitate pretiosius. Et Franciscus, viva illa Christi pauperis, & patientis imago: nam si Franciscum cucullo exuas, nonne corpus illud ad Christum dixeris pertinere, in cujus manibus, & pedibus apparere videris signa clavorum, & in latere lanceæ transfexionis rubram cicatricem? Sed quantaquanta fuerit corporis stigmatibus redemptionis insigniti similitudo, major tamen fuit Francisci animi virtutum Christi imitatio, quarum bono odore orbem sub cœlo totum implevit, quibusve etiam dum nihil diceret, prædicabat. Et Dominicus Prædicatorum Pater, qui quantum in hæreticis confundendis & contundendis, quantum in pietate promovenda laborarit, alii dicant, quia laus propria proprio sordescit in ore & calamo. Pangat ergo elogium Dominici eximius Societatis Jesu Theologus Joannes l'Abbe, Petro à Valle-Clausæ Dominicani Instituti hosti

jurato

jurato notissimus. Illud à paucis annis præfatus L'Abbe Viennæ in Delphinatu edidit die ipsi Dominico sacra, in concione apud Prædicatores ab ipso habita, ut à Patribus oculatis illac transiens audivi.

S. DOMINICI ELOGIVM.

Sta, quisquis es, ad Stellam, Rosam, & Columnam.

*Dominicus ante ortum stella, postquam adolevit.
Sol fuit.*

Gravida mater intra uterum stellam sensit.

*Dum stellam gerit, nonne hic uterus cælum
fi i?*

Illustravit hec stella orbem terrarum.

Et Dominus tot stellis Ordinem implevit,

Ut stellarum Ordo appellari hic Ordo possit.

Et Rosa Ecclesiæ Dominicus fuit.

*Ante Dominicum Ecclesiæ spinarum hortus erat,
non florum.*

Inseruit rosas Dominicus, & Rosariis orbem implevit.

Placere rosa Deipara Virgini.

Et per Rosaria Dominicus ad cælum iuit.

Et nunc per Rosas Dominici patet iter ad cælum.

Et columna fuit Ecclesiæ Dominicus.

Ne dubites, Innocentius rem definiuit, dum vidit:

Vidit nutantem Ecclesiam, & Dominicum subcollantem.

Grande decus, athlantem esse Ecclesiæ, non fabulosum, sed verum.

Funda.

Fundamentum Ecclesiæ Petrus est, & Columna Dominicus.

Plus aliquid diceret Columna, quàm Petra, Nisi Petra esset Petrus.

Deesse nihil videtur magno Ordini, nisi Ecclesiæ claves:

Gerunt illas Inquisitores fidei, & doctrinæ Censores.

Dixi qualis sit Dominicus.

Minor est Domino, sed est Dominicus.

Et quanvis sacra Religionum variarum, præsertim Mendicantium instituta, multiplices passa sint ab adversariis, & nominatim à Guillelmo à Sancto Amore, vexationes; nihil aliud tamen odia illa profecerunt, quàm eorum virtuti splendorem addere, quos acriùs & indigniùs insectabantur. Fert namque stylus divinus, ut opera sua tribulationum instantiâ probet, dicente Apostolo: *Omnes qui volunt in Christo piè vivere, persecutionem patientur. Et ideo*, ut Magnus Leo addit, *nunquam deest tribulatio persecutionis, si nunquam desit observantia pietatis.*

Horum Ordinum ingentes fructus non solum in Aquinate, Bonaventura, & aliis luminibus claruerunt; sed in tutandis Sedis Apostolicæ juribus adversus Imperatores Othonem, & Fridericum II. cum suis Gibellinis in Guelfos, seu Pontificios armatis, Italiam in lanienam mutantem, non parvo adjumento fuerunt Religiosorum preces, consilia, & hortamenta. Non licet per hujus dissertationis angustias infinitas illas recensere clades, perfidias, parricidia, sacrilegia, quæ Guelforum illæ & Gibellino-

rum

rum infensissimæ factiones invexerunt. Quot inde pro Sicilia bella, quot funera, quis sanguis fusus, quæ discordiæ, dum tota Italiæ facies suorum discerpta est manibus, & inundata sanguine, & ossibus exhorrenda? Tumultus illos non sedavit Bonifacii VIII. assumptio, sed auxit, dum in Gallias discordiarum semina transmisit Pontifex, ratus se posse Phil'ppum Pulchrum ea facilitate facere Exregem, qua fecerat Expontificem Petrum de Murrhono, dictum magis à virtute quàm à dignitate Cœlestinum.

§. IX.

Decimumquartum, & decimumquintum Ecclesiæ seculum.

Romanæ Sedis in Gallias translatio per Bertrandum Agutium Bardegalensem Archiepiscopum, Clementem V. nominatum, quam Itali dixerunt Babylonicam, quia septuaginta annos duravit, orbem Christianum conturbavit. Has turbas cumulavit Italicorum discordia, concitata Florentinorum dissidiis Evelini tyrannide, Turrianorum invasione, Vicecomitum & Longobardorum Regulorum bellis, Venetis Ferrariam occupantibus, Ludovici Bavari schismate, Petri Corbarii antipatæ intrusione, Romanorum politicis dissidiis, Ochami tumultibus, Fraticellorum & Bizochorum fatuitatibus, quos intereminuit Guilhelma quædam Spiritum sanctum hypostaticè sibi junctum delirans, & scæminas, ad quas salvandas se missam comminiscabatur, in
romine

nomine Patris, & Filii, & suo baptizans; & Beguinorum superstitionibus, errore & impietate scatentibus. Palmarium illius sectæ flagitium erat, licitam esse fornicationem patientibus libidinem, & simul sectæ discipulos eò perfectionis venire posse, ut Deo frui in hac vita plenissimè valerent: quasi impuritas sit apta ad Deum intuendum via; quasi non scriptum sit: *Beati mundo corde, quoniam ipsi Deum videbunt.* His contermini fuerunt Apostolici, vel meliùs Apostatici, opum & nuptiarum usum damnantes; necnon Flagellantes, tantam vim suis flagellis asserentes, ut abrogatis Ecclesiæ Sacramentis ritibusque omnibus, solum baptisma sanguineum, idest flagellorum ictibus expressum suffecerint. Ejusdem furfuris fuerunt Lolhardi, & Fossarii, qui præter alias hæreses ab Albigensibus aliisve depromptas, hoc docebant singulare, licitam esse in subterraneis obscœnitatem, quasi non esset verum illud Prophetæ oraculum: *Quò ibo à spiritu tuo, & quò à facie tua fugiam? Quia tenebra non obscurabuntur à te, & nox sicut dies illuminabitur: sicut tenebra ejus, ita & lumen ejus.* Rectè tamen subterranea quærebant filii tenebrarum, & erebi ministri: nam qui malè agit, odit lucem, & omne malum pudore natura perfudit.

Ex eadem fatali translatione ortum est schisma illud nefandissimum, quo Christianus sub incerto capite orbis in tot partes divisus est. Dum enim Pontificum in Gallias regressum adeo sibi funestum Romani verentur, eligi à Cardinalibus Gallum intentatis minis vetant. Sors interim super Præsulem Barensem cecidit, Urbanum deinde dictum. Illa electioni illata

vi, & electi ipsius austeriori regimine exacerbati Cardinales, Anagniam, mox Fundos pergunt, ibique priore electione irritata & annullata, novam solita libertate eligunt Pontificem Robertum Gebennensem, Clementem VII. nominatum. Habuit sua quilibet regna, suos Cardinales, suos successores, suos, quod mirum est, Sanctos; nam priori Catharina Senensis, posteriori Petrus Luxemburgius, & Vincentius Ferrerius obtemperarunt. Tanto scandalo providere sategit Pisana Synodus, sed ex remedio deterior morbus; dum enim novus ibi Pontifex eligitur, ut sub uno tandem capite disiecta membra colligarentur, triceps Ecclesia facta est, dum quilibet prætenso jure potiri voluit: quot inde dissensiones, quot libelli, quot bella in tam horrendis quadraginta annorum tumultibus! Neque enim pax ulla haberi poterat, *donec auferretur Luna*, ut verè & lepidè aiebat Gerson ad Petrum de Luna alludens. Quod Concilio Constantiensi præstitum est, ubi exauthoratis tribus prætensis Pontificibus, ambitionis spectris, & quæ sua sunt, non quæ JESU CHRISTI queritantibus, Martinus V. electus est.

Schismatis calamitates augebant hærescon procellæ, duce præsertim Wiclefo, Sacramenta, traditiones, Pontificum jura, festorum observantiam conculcare, & abolere moliente. Invaluit aliquandiu in Anglia exitiosa pestis, sed latius per Bohemiam grassata, auctore portentosæ iniquitatis filio Joanne Husso Constantiæ cum Hieronymo Pragensi combusto. Nec tamen in cinerem redacta est hæresis, innumeræ enim inde in Bohemia excitatæ tragædiæ, & sub umbone ablati sibi calicis & pretio Christi Sanguinis, hu-

manum

manum effundere non cessarunt, & in Regem ipsum, hæreticorum more, arma sumpserunt, & exercitus coëgerunt.

Vix aliquis pacis radius post Concilium Constantiense intermicabat, ecce Concilii Basileensis Præsules Martini, & ipsius Eugenii jussu congregati, specie reformandæ Ecclesiæ in caput armantur; nam omni sibi arrogata auctoritate, Vicario Christi Romano Antistiti, sine quo (si certus est, & non dubius, quod dico propter factum Concilii Constantiensis) omne Concilium generale est synagoga sathanæ, & diem sæpius dixerunt, & leges eas imposuerunt, quibus nec minimus orbis Episcopus supponi se sineret, idque tanto supercilio, tamque intolerabili typho, ut Pontificem suspendere, exauthorare, illique Amadeum à Sabaudia Felicem dictum sufficere non dubitarint. Despexit Basileensium ausus Eugenius, & nihil moratus suspensiones & minas, anathemate Basileenses ferit, & Synodum Ferrariam transtulit.

Porro schismatum omnium funestissimum illud meritò dixerimus, quod Græci à tot annis omni data & accepta occasione invexerunt, & etiamnum foveant. Universalis Episcopi nomen amplissimum ambiverunt quondam, orbi Christiano principari voluerunt, Romanæ Ecclesiæ primatum tota traditione consecratum ægrè tulerunt Præsules præsertim Constantinopolitani, rati se non majori negotio Romano Antistiti crepturos gradum, quàm Alexandrino, Jerosolymitano, & Antiocheno abstulerunt. A schismate in hæreses prolapsi sunt, negata Spiritus sancti à Filio processione, &
aliis

aliis erroribus ibi facile subnascentibus, ubi à vero capite receditur. Inde ortæ in Ecclesiam Latinam similtates; & quanvis sæpè utriusque Ecclesiæ concordia tentata sit, in Lugdunensi præsertim & Florentino Conciliis, frustra tamen; etenim viri levissimi in vomitum redire suum Græci, brevi in tanti facinoris pœnam, Turcarum armis perituri. Justo namque Dei judicio factum est, ut qui à vero Dei cultu tandiu defecerant, transirent in Tyranni principatum. Inde quotidianæ Turcæ victoriæ, quibus subjugato Oriente, Hungariam & Poloniam his diebus, ingemiscente Clemente X. & orbe Christiano, ac Catholico torpente, invadunt.

§. X.

Decimum sextum, & decimum septimum Ecclesiæ sæculum.

IN hæc duo postrema sæcula præcedentium clades confluisse videntur; nam & infidelium Turcarum progressus regna divexant, & Lutheranorum, Calvinistarum, & aliorum Anticatholicorum hæreses radices agunt venenosas. Importata ab illis hæreticis infortunia, insectæque hæreses notiora sunt, quàm ut ea latiori calamo describam; plura, quàm ut longa lucubratione enarrari possint. Uno verbo, quid aliud fecit Lutherus, quid aliud præsertim Calvinus præstitit, quàm ex omni monstrorum genere monstrum unum, dum omnia cunctorum sæculorum doctrinæ flagitia in suam sectam velut

luti cloacam derivarunt. A tristibus autem tragædiis, quas in orbe egerunt, referendis supersedeo, quæ magis lacrymas cient, quàm verba postulent. Id scit Gallia nostra, quæ quidquid scirlegiorum ab impiis, quidquid rapinarum ab avaris, quidquid cædium à truculentis, quidquid spurcitiarum ab immundis, quidquid inhumani à barbaris, quidquid brutale à feris, quidquid tartareum à dæmonibus timeri poterat, Calvinistarum furore experta est. Contra prophanas eorum novitates sæpe, & ex professo disputavimus, nec opus est de illis, aliisque historiæ Ecclesiasticæ capitibus orationem protrahere, quæ aliquando rerum uti fusiùs, ita fortassis accuratiùs, benedicente Domino prosequemur. Id solùm addam, fidem ubique lucra facientem sua, expulsam à Turcis, & expugnatam à Lutheranis, ad fidelium solamen & sui tutamen in Americam extendisse propagines, Indias irradiasse, & doctrinæ lumen, pietatisque calorem in novis sacrarum Religionum institutis, vel antiquiorum reformationibus restaurasse, nimirum in Minimis, Theatinis, Capucinis, Recollectis, Jesuitis, Barnabitis, Sommaschis, Doctrinæ Christianæ, & Oratorii Presbyteris. De quibus, aliisque horum sæculorum sanctitatis miraculis fusè egimus, dum Ecclesiæ Catholicæ sanctitatem initio secundi voluminis demonstravimus.

Adde fidem ipsam divinitus armatam, de hæreticis vindictam sumpsisse, non solum Lutheranorum inter se dissidiis infinitis, sed famosâ præsertim illa Regis. Angliæ truncatione, quæ anno 1649. contigit, ut per Regem Henricum fides expulsa, in Carolo de Stuart successore apostata

apostasiam propriis Anglorum manibus puniret. De hoc Anglorum flagitii portento hæc fatetur Gratianus Lucius Hibernus in suo Cambrensi everso, pagina mihi 265. Scelus illud Anglorum, quo Regi suo caput amputarunt, quo nomine appellem nescio. Parricidium nominabo, quod Reges & Magistratus patriæ parentes nuncupantur? Sed hæc vox ad privatos homines cæde se paternâ inquinantes astringi solita, non satis laxa est ad tam tetri facinoris atrocitatem exprimendam. An rebellionem, aut perduellionem dicam? Sed cogitationes ad afficiendum Regem susceptæ, aut levior contumelia eidem illata, siue arrogantior Regis compellatio his vocabulis denotantur, etsi hujus flagitii gravitatem non exæquent. An furorem & insaniam nuncupabo? Leve illud est. An belluinam sub larva vultus humani immanitatem? Ne istud quidem sufficit. An florentissimæ Britanniaë foedissimam maculam, immò exitium, flammam, atque peniciem? Quàm possum atrocia, ac detestanda nomina mente efformavero, vincit omnia sceleris horrendi atrocitas, ac ne cogitatione quidem capi, nedum oratione satis exprimi, explicarique potest.

E Regibus alii à subornatis prævaricatoribus confossi, alii veneno sublati, alii per insidias in lecto suffocati sunt. At nemo per omnes omnium gentium historias, quantumvis lectione versatus, ex iis eruere potuit, Regem adhuc ullum suprema regni potestate vigintifex annos jam functum, & suspensas regendi rationes à populo non habentem, à plebeio suæ gentis ordine quæstionibus in judicio ita reum capitis per nefas pronuntiatum, & carnificis manu (non qui-

dem ordinarii carnificis à tanta impietate abhorrentis, ut historia Anglicana proditum est, sed carnificis sub larva latentis; suspicantur plures impium fuisse Cromwellum totius iniquitatis compendium) orbe terrarum obstupescente necatum. Quàm atrociter in hujusce sceleris Authores Cicero invcheretur, qui Verrem accusans: *Facinus est*, inquit, *vincire civem Romanum, scelus verberare, parricidium necare, verbo satis digno tam nefaria res appellari non potest.* Vocem igitur aliquam novam à Cicerone excogitari oportebat sceleris hujus atrocitati satis indicandæ accommodatam, in quo peragendo divina, humanaque jura conculcata sunt non tanta patientis acerbitate, quanta condemnantium turpitudine, qui facinus ediderunt tam superioribus inusitatum sæculis, quàm futuris execrandum & abominabile. Cui edicendo sicut proprium nomen, sic plectendo idonea pœna inveni non potest. Porro ab hac execrabili novorum hæreticorum erga Reges malè affectorum disciplina abhorreere nedum Catholicos universos, sed ipsos præcipuè Summos Pontifices suo loco demonstravimus, & ex Clementinis constitutionibus liquet, in quibus habetur: *Regia potestati resistere nefas est.*

MONITVM ET REFLEXIO.

Videsis plura apud Annalium Christianorum & Ecclesiasticorum Scriptores, historiæ præsertim Catholicæ Patrem Cardinalem Cæsarem, Baronium, aliosque, apud quos & fidei triumphos, & Sanctorum per fidem victorias
mirabe

mirabere. Sancti enim per fidem vicerunt regna, & hæc est victoria quæ vincit mundum, fides nostra. Quo quidem studio nihil Theologo nec dignius, nec utilius, cum ad eruditionem, tum potissimum ad pietatem. Quia ut benè S. Bernardus *tract. de rebus gestis S. Malachia*, annotavit: *Semper quidem operapretium fuit illustres Sanctorum describere vitas, ut sint in speculum, & exemplum, ac quoddam veluti condimentum vita hominum super terram. Per hoc enim quodammodo apud nos etiam post mortem vivunt, multosque ex his, qui viventes mortui sunt, ad veram provocant & revocant vitam.*

Atque obiter ex his quæ tota hac dissertatione percurrimus facile conjectu est, quantum vero Theologo necessaria sit sacræ historiæ non perfunctoria instructio; ut enim præclarissimè Theologus omniscius Melchior Canus *lib. ii. de locis*, fusè prosequitur: *Ut viri omnes docti consentiunt, rudes omninò Theologi illi sunt, in quorum lucubrationibus historia muta est.* Unde tantum abest, prolixam istam, quam præsentī tomo adjicimus, dissertationem ab instituto esse Theologico alienam, quin potius ad ejus non mediocre ornamentum non parum conferre arbitratus sum. Utinam per præstitutam nobis, & accuratè observandam brevitatem in plura spatium licuisset, ut omnibus palam foret, multa nobis è thesauris suis historiam suppeditare, quibus si careamus, & in Theologia, & in quacumque fermè alia Facultate inopes sæpe & indocti reperiemur. Et quidem historiam esse Theologo differenti pernecessariam, tum sæpe aliàs, tum novissimè in ultimis de facto & sensu Jansenii controversiis orbi notis animadverti potuit, ubi

magis sacra historia Theologo nedum perutilis, sed necessaria censenda est, tum in disputatione adversus fidei Catholicæ hostes, tum ad speculationes exemplis locupletandas, tum ut in moralibus casuum decisionibus quidpiam justum esse suadeat, vel injustum, prout à viris aut probis, aut improbis usurpatum est; tum *ne turpiter in rebus ad se maximè pertinentibus erret, eaque ignoret, qua ignorari non sine imprudentia modò, sed ne imperitia quidem possunt. Historia quippe cum magistra vite est, tum lux etiam veritatis*, inquit prælaudatus Cano.

Nec dicas plurima in historiis etiam sacris extare vel dubia & apocrypha, vel falsa & fabulosa; ingentis etiam esse molis & majoris difficultatis de historia præsertim veteri judicare, antiquitatis memoriam in numero habere, Historicos omnes internoscere, mendaces à veracibus secernere: quod totum desideratur ut historia alicujus sit vel utilitatis, vel autoritatis.

Non, inquam, id dicas: Quanvis enim, ut verum profitear, arduum sit & laboriosum sacræ historiæ studium, non ideo tamen Theologo negligendum est, quia labor quàmlibet amarus, cum magnitudine tamen & suavitate utilitatis comparatus non modò omnes absterget studiorum molestias, sed efficiet operam illam mollem etiam & jucundam. Quapropter Theologum rudem esse omnino in historiis cum sacris, tum prophanis, aut inertissimæ segnitæ est, aut fastidii delicatissimi. Quod verò in Annalium monumentis nonnulla aut dubia, aut falsa veris permixta sint, non solum ab historiæ sacræ studio nos detertere non debet, sed ad illius vehemen-

tiorem amorem concitare, & veluti calcaribus stimulare debet, ut multiplici rerum gestarum, Authorumque collatione veritas pateat. Præsertim quia multa, eaque præcipua, & scitu magis necessaria certam habent fidem, cum in eam recensendam probati omnes ac graves Historici concurrant, quibus detrectare fidem non solum iniquum est, sed insulsum planè, ac etiam inhumanum.

Etenim, ut Augustinus libro de utilitate credendi, aliquè Patres egregiè prosequuntur, necessarium est homines hominibus credere, nisi vita pecudum more degenda sit: necessarium est non amicitiam modo, verum omnem omnino humanæ societatis necessitudinem interire, nisi amicus amico, maritus uxori, parentibus filii, fratres fratribus, civibus cives, sociis sociis fidem habeant; sique nihil credere statuerimus, quod non nisi manu, oculis, vel sensu percipiamus.

Si Theologus tantum curæ impendit & vigiliarum in quæstionibus speculativis sæpe frigidis considerandis, si totum adhibet tempus & diligentiam, si anticipent vigilias oculi ejus, ne in controversiis alioquin non admodum necessariis incognita pro cognitis, incerta pro certis habeantur; si ad hunc finem doctissimorum virorum conciones frequentes, si in Academiis Christiani orbis insignioribus literas discat, ut eruditissimorum hominum dissertationibus & sapientia instruat, & condiscipulorum exercitissimorum quotidianis conflictationibus vexatus veritatem, cujus amans est, assequatur, qua sine dispendio caruisset: quanto justius, & utilius, & Theologo vero dignus censendum est


carum

earum rerum notitia pulcherrima imbui, quæ traditioni confert & pietati. Proh dolor! per sex aut octo annos spinosas & interminabiles quæstiones verſamus in ſcholis, eaſque controverſias latiffimè proſequimur, quas nec juvenes portare poſſunt, nec ſenes ferre, quæve ingenia non tam juvant, quàm obruunt. Non piget, nec tædet nos magnum ſtudio, multamque operam in res obſcuras atque difficiles conferre, eaſdemque non neceſſarias, & ſæpe vanas, quas recensere hic nec libet, nec decet. Et tamen per aliquot otii noſtri horas tædet operam navare Eccleſiaſtica hiftoriæ, vitæ magiſtræ, prudentiæ ſubſidio, luci veritatis, & potiſſimo vitæ & conſociationis humanæ instrumento, quod probatorum Authorum testimoniis innixum eſt.

Scio quidem modernos hæreticos omnes præter canonicas hiftorias floccifacere, è canonicis etiam quaſdam è ſacris libris pro ſuo arbitratu expungere. Sed quid mirum ſi poſt abjectam fidem, neceſſitudinem & pietatem duo generis humani ſanctiſſima vincula violent, atque diſſolvant? Dolendum planè quòd erroribus ſuis obcæcati non videant, nihil adeo vitæ humanæ neceſſarium eſſe, quàm ut homines hominum, præſertim gravium & locupletum dictis credant. An neſciunt fidem eſſe artium omnium baſim, ſcientiarum fundamentum, diſciplinarum crepidinem; ita ut verum ſit illud Ariſtotelis effatum: *Addiſcentem oportet credere*; verum itidem illud propheticum oraculum: *Niſi credideritis, non intelligetis*? Nam oculis & quotidianis experimentis cernimus pueros elementarios nomina literarum, aut ſyllabarum nexus non niſi fide accipere, omnemque cognitionem

præcedere fidem, subsequi scientiam veritatis. Hinc tanta nobis & talis ad audita credenda à natura indita pronitas est. Hinc sicut citos ad credendum corde leves, ita ad rationabilia credenda tardos, obduratos & pervicaces nominamus. Hinc homines benè constituti, & ad vitam humanam rectè compositi viro gravi rem credibilem affirmanti fidem adhibent. Hinc denique ea quæ communi Historicorum consensione traduntur, non modò negare, sed de his etiam dubitare stultissimum apud omnes reputatur.

Illud etiam in hujus dissertationis coronide observabis, fidem de hostibus suis etiam per propria damna victricem quotidie à malis Catholicis vinci, qui dum vitiis serviunt, fidem faciunt, imò & Deum servire iniquitatibus suis. Væ nobis, in quibus Christus patitur opprobrium, & fides Christiana servitutem; qui enim veritates fide notas in injustitia detinent, si intellectum & affectum non captivant in obsequium fidei, sed fidem obsequi cogunt regnanti in se peccato, & concupiscentiæ dominanti. Plura alibi, prolixiores enim hactenus fuimus.



DISSERTATIO VI.

Appendix.

Commendatio & elogia Charitatis.

PRÆCIPUA charitatis encomia & laudum ejus veros fontes in superioribus tetigimus, dum ejus objectum declaravimus, & eâ iniri cum Deo amicitiam, qua nihil pretiosius esse potest, demonstravimus. Insignem etiam, & longè præstantissimam charitatis prærogativam tomo superiori ex professo prosequuti sumus, dum in ea vitæ hujus beatitudinem sitam esse, ejusque actus esse contemplatione vitæ nedum moraliter, sed & physice perfectiores, variis rationum, autoritatumque momentis comprobavimus. Quare ea iterum non prosequemur, quæ tamen latissimum laudandæ charitatis campum aperirent. Alia ex eis veluti consuetudina præconiorum in præfatis virtute inclusa derivabimus.

Primum elogium: Charitas vita anima.

Illud expressè tradit D. Thomas q. 23. art. 2. ad 2. ubi ait quod charitas, est formaliter vita

anima , sicut anima est vita corporis. Cujus ratio est , tum quia per charitatem Spiritus sanctus animæ illabitur , illam vivificat , fitque tota Trinitas speciali modo præsens. Vita autem supernaturalis animæ in unione cum Deo sita est , juxta illud Augustini *serm. 5. de verbis Domini : Sicut anima est vita corporis , sic anima vita est Deus. Sicut exspirat corpus cum animam emittit , ita exspirat anima cum Deum amittit: Deus amissus mors anima. Anima emissa mors corporis.* Tum quia cor est principium vitæ hominis , vita autem cordis est amor quo movetur ; dum autem cor amat mortalia , & caduca , è nihilo producta , & in nihilum proclivia , moritur , & ad nihilum quadantenus redigitur. Dum verò Deum immortalem diligit , vivit , quia amor amantem in objectum transformat , juxta illud præclarum Augustini oraculum aliàs memoratum : *Qui non potest vivere de se , moritur utique amando se : non ergo se amat , qui ne vivat se amat. Cum verò ille diligitur , de quo vivitur , non se diligendo magis se diligit , qui propterea non se diligit , ut eum diligat , de quo vivit.*

Difficilius est quod S. Doctor ibidem ait , charitatem uniri immediatè animæ , sicut anima unitur corpori ; nam illud videtur esse proprium gratiæ sanctificantis , quæ cum in consortium naturæ divinæ nos evehat , essentiam animæ immediatè afficit ; charitas verò , cum sit amor summi boni , voluntatem ornat & accendit. Verum ita explicari debet S. Præceptor , quod quia gratiam inter & charitatem intima affinitas & indivulsa societas est , quælis est inter essentiam & nobiliorem proprietatem ; & aliunde quod
 perti

pertinet ad essentiam, interdum proprietati ascribitur, sicut ut laudetur homo, commendatur ejus ingenium; ita quod pertinet ad gratiam charitati sæpè tribuitur.

Secundum elogium : Charitas facit & confert effectum infinitum.

Hæc sunt verba longè præclarissima D. Thomæ *ibidem ad 3.* quibus charitatem supra omne quod dicitur magnum, immensum attollit : *Dicendum*, inquit, *quod charitas operatur formaliter ; efficacia autem forma est secundum virtutem agentis, qui inducit formam : & ideo patet, quod charitas non est infinita, sed quod facit effectum infinitum, dum conjungit animam Deo justificanti ipsam ; hoc demonstrat infinitatem virtutis divinæ, quæ est charitatis auctor.* Ad cuius profundissimæ doctrinæ intellectum sciendum est, charitatem dupliciter considerari posse : primò ut est quædam qualitas creata ; secundò ut ex specifica sua ratione est participatio divinæ bonitatis, voluntatis, & amoris, Deum ut in se est supernaturaliter attingens. Primo modo considerata est finita, & habet effectum finitum, ut constat : sed secundo modo spectata quamdam habet infinitatem, quia hoc modo est ordinis divini, nec procedit à Deo prout rerum omnium est auctor, sed prout est connaturalium perfectionum communicator. Unde sicut calor ignis præcisè ut qualitas est, habet tantum reddere subjectum quale, scilicet calidum ; tamen in virtute ignis, cujus est proprietas, producit effectum longè seipsum perfectione excedentem, nimirum substantiam : ita charitas pro-

ut est accidens habet solum adornare subiectum, sed prout est imago divinæ bonitatis, & vinculum perfectionis, habet illud deificare. Unde prout est participatio naturæ superioris, est suo subiecto perfectior, imò & seipsa prout qualitas est, imò & omni substantiâ creabili. *Accidens*, inquit D. Thomas art. 3. ad 3. *quod causatur ex participatione alicujus naturæ superioris, est dignius subiecto, in quantum est similitudo superioris naturæ, sicut lux diaphano.* Cùm ergo Doctor Sanctus ait, quod charitas non est infinita, intelligendum est de ea, ut qualitas est: cum verò addit, quod facit effectum infinitum, intellige quod secundum rationem speciei quandam infinitatem habet, quia conjungere Deo est quid infinitum, utpote excedens omnem vim naturæ creatæ & creabilis, & quia Dei possessio est bonum, saltem objectivè infinitum.

Tertium charitatis elogium: Minimæ charitatis gradus habet statum virtutis simpliciter.

Probatur: Minima charitas hoc ipso quod est amicitia cum Deo, nosque illi tanquam ultimo fini conjungit, facit bonum habentem, & opus ejus bonum & perfectum reddit, multò meliùs quàm ulla virtus moralis, quantumlibet numeris omnibus absoluta; quia nimirum per charitatem homo conjungitur Deo, opera sua refert in ultimum finem simpliciter, meretur vitam æternam & ipsum Deum; imò ita firmiter Deo adhæret, ut teste D. Thoma 3. p. *quest.* 70. *art.* 4. minima charitas plus diligit Deum, quàm cupidi

cupiditas aurum & argentum; & quod sufficiens sit ad vitanda omnia peccata, & ad quascunque tentationes vincendas, ut tradit *in 3. dist. 37. quest. 1. art. 3.* Ergo minima quæque charitas habet rationem virtutis simpliciter. Imò implicat esse charitatem, & non habere statum perfectæ virtutis, cum implicet dari charitatem, quæ non conjungat fini simpliciter ultimo, quæve opera hominis non reddat meritoria præmii infiniti, Dei scilicet visione beata possidendi.

Dices : Virtus secundum statum perfecta promptè & delectabiliter suas elicit operationes, charitas autem remissa & incipiens in eliciendis frequenter actibus non levem patitur difficultatem, præsertim in peccatore post inveteratam peccandi assuetudinem è cæno vitiorum resurgente : Ergo in illo charitas non habet statum virtutis simpliciter.

Respondeo difficultatem ab extrinsecis impediementis ortam nequaquam perfectioni virtutis obesse, sed illam solum quæ ex imperfectione virtutis proficiscitur. Aliàs S. Paulus qui sentiebat aliam legem in membris suis repugnantem legi mentis, & cogentem clamare : Quis me liberabit de corpore mortis hujus ? veras & perfectas virtutes non habuisset. Difficultas autem bene operandi, quam peccator de novo conversus post infusam charitatem patitur, ab extrinsecis duntaxat impediementis à peccato relictis, non ex defectu charitatis proficiscitur : quia ut ait D. Thomas 3. p. q. 89. art. 1. ad 1. quantum est ex ipsa inclinatione charitatis & aliarum virtutum, pœnitens opera virtutis delectabiliter & sine difficultate operatur. Ergo charitas etiam remissa, non obstante passionum impetu, non
obstan

obstantibus antiquæ corruptionis reliquiis, perfecta gaudet virtutis ratione. Præsertim quia per eam instruitur homo, & valet insurgentes passionum motus, quàmlibet rapidos & turbulentos compescere & sedare, eosque rationi subigere.

Instabis: Vera virtus non facilè amittitur, sed altis radicibus nixa ægrè evellitur: charitas autem remissa facilè deperditur, ut nimis constat: ergo non est simpliciter perfecta virtus, sed infirma, sed tenera, sed fragilis. Unde D. Thomas 1. 2. *quest. 65. art. 1.* monet virtutes incipientium non esse simpliciter virtutes.

Respondeo charitatem, quantum est de se, difficillimè amitti, quia bono immobili Deo intimè agglutinat, & potens est omnem tentationem vincere, omnem passionum insultum domare. Quare per accidens duntaxat facilè amittitur, quia in vase fictili, in flexibili nimirum libero arbitrio recipitur. Ut enim dicitur 1. Joan. 3. *Omnis qui natus est ex Deo, peccatum non facit, quoniam semen ipsius in eo manet; & non potest peccare, quoniam ex Deo natus est.* Quod intellige quantum est ex parte & inclinatione charitatis. D. autem Thomas loco citato loquitur de virtutibus moralibus, quæ in incipiente statum perfectæ virtutis habere nequeunt, quia licèt disponant hominem ut sit bonus, cum tamen perfectè bonum non efficiunt, nec ultimo fini conjungunt, nec ad superandas quascunque tentationes vires suppeditant. Quod sanè de minima charitate dici nequit. Unde vir Dei Thomas à Kempis alicubi: *Qui scintillam haberet vera charitatis, profecto sentit omnia terrena esse plena vanitatis.*

*Quartum charitatis elogium : Caritas
gratuitum Dei donum est.*

Idest, caritas nullis præcedentibus actibus à solo Deo nobis infunditur, non secundum capacitatem naturalis virtutis, sed ex sola voluntate Spiritus Sancti dona sua prout vult dividens. Ratio desumitur ex articulo 2. & 3. questionis 24. & ex dictis consequitur: Caritas est amicitia cum Deo super communicationem æternæ beatitudinis fundata. Ergo sicut communicatio illa non est secundum dona naturalia, sed gratuita, juxta illud Rom. 6. *Gratia Dei vita æterna*: ita caritas omnem naturæ facultatem excedit, subindeque omnem vim causarum creaturarum transcendit: atque adeo sola tribuitur infusione Spiritus Sancti, qui est amor Patris, & Filii, juxta illud Rom. 5. *Caritas Dei diffusa est in cordibus nostris per Spiritum Sanctum, qui datus est nobis*. Et licet Deus in quantum est beatitudinis objectum, sit maximè amabilis, tamen propter ingentum & peccato originali immensum augmentum erga visibilia & sensibilia bona affectum, ad erigendum corda nostra in terram inflexa, necesse est, quod illis divinitus caritas infundatur secundum mensuram donationis Christi: si enim caritas non dependet ex aliqua naturali virtute, sed ex sola gratia Spiritus Sancti, ab ipso etiam gradus & intensio charitatis dimanat, cum quantitas uniuscujusque rei à propria causa dependeat; unde videmus, quod universalior causa effectum majorem, & uberius producit. Cujus etiam arbitrarie gratiæ & charitatis dispensationis

lationis signum est, quod naturæ omnium intellectualium infimæ, scilicet humanæ, & in specie humana sexui infirmiori, scilicet fœmineo in persona Deiparæ majorem gratiam Deus quàm omnibus Angelis conferre dignatus est; quia dum inæqualiter confert quod nulli debet, nulli etiam injurius est.

Dices: His rationum momentis non posse charitatem actibus & viribus naturalibus produci convincitur, non tamen quod non possit actibus supernaturalis dilectionis ex auxilio actuali procedentibus generari; quidni enim hujuscemodi actus, sæpiùs iterati non poterunt producere habitum absque eo, quod speciali infusione opus sit?

Responden, actus præcedentes aliquem habitum non posse illum efficienter causare, nisi principium nobilius permanens præsupponatur, in cujus virtute, & à cujus virtute habitus generetur: unde habitus virtutum moralium non per solam iteratorum actuum assuetudinem, sed ex influxu rationis superioris in appetitu sensitivo producuntur. Similiter ergo actus supernaturales præcedentes charitatem, cum non supponant principium nobilius permanens, à quo charitas habitualis talibus actibus generetur; sequitur hujusmodi actus se habere duntaxat ut dispositiones ad charitatis infusionem dono Spiritus sancti communicatas.

Instabis: Homo per actus suos vitales, fidei scilicet, spei, charitatis, contritionis ultimò se ad justificationem disponit: Ergo efficienter concurrat ad charitatem in justificatione collatam; hac enim sola de causa dicitur homo generare alium hominem, quia ad ultimam formæ dispositionem, qua posita infunditur anima
ratio

rationalis, concurrir. Et licet daretur hominem in prima justificatione charitate à Deo perfundi, ipso nihil effectivè concurrente : tamen productâ gratiâ & charitate, rationabile videtur, ut ipse per frequentatos charitatis actus possit præ-existentm habitum augere, sicut acquisitam, vel etiam infusam scientiam iteratis actibus intendere, & extendere valet. Quemadmodum enim licet animal seipsum generare non possit, genitum tamen seipsum auget per potentias à natura institutas : sic homo in ordine supernaturali ex Deo natus, factusque nova creatura seipsum in eodem ordine Deo dante juvare poterit : aliàs actus supernaturales deterioris conditionis, minorisque essent efficaciam, quàm sint naturales virtutum moralium actus, quorum repetitione habitus augetur. Certè sicut licet ante justificationem non possimus charitatem actibus naturalibus quâlibet bonis & honestis promereri, quia ad meritum requiritur gratia personam gratam faciens ; tamen post gratiæ, charitatisque infusionem potest justus charitatis augmentum mereri : quidni similiter poterit esse causa realis augmenti illius per actus reales supernaturales, quos ex habitu charitatis semel infuso producit ? Unde disparitas ?

Respondeo, actus præcedentes charitatem non posse illam producere defectu principii nobilioris permanentis ; unde etiam fit, non posse hominem charitate præditum efficienter ejus augmentum producere : quia ut homo per habitum infusum posset ipsius augmentum efficere, præhabere deberet formam nobiliorem, qua constitueretur in actu, fieretque principium potens & proportionatum ad productionem habitus

bitus intensioris : pater autem quod antequam intendatur charitas, non habet homo formam charitate producenda nobiliorem & excellentiorem, siquidem in augmento perficitur charitas quam habet : ergo ante augmentum nec perfectius, nec æquale principium habet, cum tamen omnis causa, si perfectior, certè æqualis in perfectione effectui esse debeat.

Ad argumentum ergo dicendum, actus supernaturales justificationem præcedentes posse considerari, vel ut sunt à nobis, vel ut eleventur à Deo per auxilium suum supernaturaliter movente : priori modo non sunt dispositiones ad gratiam & charitatem, sed tantum posteriores, quatenus per eos intendit Deus assimilare sibi filios adoptionis per gratiam & charitatem à se per huiusmodi actuum apparatus producibilem. Porro in omnibus illis adductis exemplis discrimen grande reperitur. Homo enim per habitum primorum principiorum sufficienter in actu constituitur, ut possit habitum scientiæ producere : animal etiam satis, superque facultatibus naturalibus instruitur, ut possit sui augmentum efficere : At verò in ordine supernaturali homo ante charitatem non habet principium permanens productionis illius, nec post infusam charitatem habet principium æquale augmento. Unde etiam confutatur exemplum de merito, quod fundatur in beneplacito Dei, qui misericorditer voluit, ut actus à charitate profluentes & augmentum gratiæ, & præmium gloriæ promererentur : cuius signum est, quod huiusmodi actus in patria nihil merentur. Nec sequitur, actus supernaturales charitatis esse deterioris conditionis, vel minoris efficaciam, quàm
finit

sint actus naturales; tum quia, ut docet D. Thomas *q. 17. de verit. art. 1. ad 4.* ex iteratis actibus charitatis producitur aliquid naturale per modum habitus inclinans in similes actus, ut patet in eo qui postea incidit in peccatum mortale: talis enim amissa charitate quandam in actus dilectionis eliciendos pronitatem experitur. Tum quia licet nihil ex huiusmodi actibus produceretur, inde non imperfectio huiusmodi actuum colligi deberet, sed summa & ferè infinita perfectio charitatis, quæ omnem creaturæ cuiusvis potestatem excedens, à solo Deo produci potest.

Dices secundò: in Concilio Trid. *sess. 6. c. 7.* dicitur, quod verè iusti nominamur & sumus, justitiam in nobis recipientes, unusquisque secundum mensuram, quam Spiritus sanctus partitur singulis prout vult, & secundum propriam cuiusque dispositionem & cooperationem. Idem docet D. Thomas *in 1. dist. 17. q. 1. art. 3.* ubi dicitur charitatem secundum conatum recipientium. Et *3. part. q. 39. art. 2.* docet formas, quæ possunt recipere clementiam, magis & minus intendi & remitti secundum diversam dispositionem subiecti; & secundum quod motus liberi arbitrii est intensior, vel remissior, pœnitentem majorem vel minorem consequi gratiam. Ergo quantitas charitatis non ex solo Spiritus sancti arbitrio, sed etiam ex recipientis dispositione pensanda est.

Respondeo, causam charitatis, ejusque quantitatis sive intensioris esse duplicem, unam simpliciter, alteram ex suppositione. Causa simpliciter est divina virtus, dividens singulis prout vult; causa verò ex suppositione est conatus liberi

liberi arbitrii non merè naturalis, sed ab auxilio Dei moventis excitatus. Quia igitur ipsemet liberi arbitrii se disponentis conatus ab ipsa gratia efficaciter movente proficiscitur; ideo D. Thomas aliquando quantitatem gratiæ ex sola causa simpliciter, interdum ex causa & suppositione mensus est. Unde cùm charitatem ejusque intensiorem ex Dei solùm voluntate pendere affirmavit, per *ly solum*, purè naturalem causam, & vires liberi arbitrii à Deo supernaturaliter movente non dispositas duntaxat exclusit. Hanc esse genuinam S. Doctoris mentem ex solutione ad 1. liquet: ibi enim exponens illud Matth. 26. *Dedit unicuique secundum propriam virtutem*; ait quod illa virtus, secundum quam Deus sua dona dat unicuique, est dispositio, vel præparatio præcedens, sive comitans gratiam accipientis: sed hanc dispositionem, vel conatum prævenit Spiritus sanctus movens mentem hominis plus vel minùs secundum suam voluntatem; unde & Apostolus dicit Colos. 1. *Qui dignos nos facit in partem sortis Sanctorum in lumine*. Et ita exponendum esse Tridentini locum citatum constat, & in materia de gratia apparebit.

Instabis: Valde connaturale & congruum videtur, ut charitas, ejusque quantitas non solùm ex voluntate vel motione Dei pensetur, sed etiam dispositioni agentis respondeat & attemperetur: id enim videtur ordini consueto universi magis consonum; unde etiam docent Thomistæ, quod perfectior anima rationalis in perfectiorem, meliusque dispositam materiam infunditur: & D. ipse Thom. 1. p. q. 62. docet in Angelis gratiam, charitatem, aliaque dona gratuita secundum

dum capacitatem naturalem fuisse collata, & quod in creatione Angelorum fuit illis data gratia, & simul conatus liberi arbitrii permotus, qui est ultima dispositio ad illam. Quod idem docet de Adamo *quæst. 95. art. 1. ad 5.* & de Christo Domino *3. p. quæst. 34. art. 2.* Ergo similiter secundum maiorem vel minorem virium liberi arbitrii conatum homines plus vel minus de gratia accipiunt.

Respondeo tunc solum formas dispositionis subiecti coaptari, quando dicunt ordinem conaturalem ad subiectum, vel subiectum naturalem earum exigentiam habet, ut in formis ordinis merè naturalis contingit. Cæterum si forma producta sit superioris ordinis, qualis est charitas & gratia, quibus ad ordinem divinum provehimur, tunc sicut forma est præter omnem naturæ exigentiam, & in sola potentia obedientiali recipitur; ita nullum petit naturalis dispositionis apparatus.

Ad instantiam de Angelis respondet D. Thomas *art. 3. ad 3.* Quod Angelus est intellectualis naturæ, & secundum suam conditionem competit ei, ut totaliter feratur in omne id, in quod fertur: & ideo in superioribus Angelis fuit major conatus, ad bonum quidem in perseverantibus, & ad malum in cadentibus. Et ideo superiorum Angelorum persistentes facti sunt meliores, & cadentes facti sunt pejores aliis. Sed homo est naturæ rationalis, cui competit esse quandoque in potentia, quandoque in actu, & ideo non oportet quod feratur totaliter in id, in quod fertur, sed ejus qui habet meliora naturalia potest esse minor conatus, & è converso. Unde non est simile. Quorum verborum sensus non est, ipsa
bona

bona naturalia fuisse dispositiones ad gratiam ex meritis subjecti, sed ex gratuita & suavi Dei providentia, quæ voluit ut sicut gratia perficit naturam, ita & ut naturali proportioni & perfectioni responderet, & quod liberi arbitrii à Deo moti & excitati infusionem gratiæ præcederet, aut comitaretur. Videsis quæ aliàs diximus de gratia Angelorum.

*Quintum charitatis elogium : Effusio,
seu extensio charitatis ad
diversa objecta.*

Non solum Deum diligit charitas, sed cum sit imago divinæ bonitatis & expressio voluntatis, cætera vasto suo sinu complectitur, & in quandam veluti infinitatem extensa, nihil est quod se abscondat à calore ejus. In primis à Deo in proximum diffunditur, ut in imagine prototypum diligat, in creaturis Creatorem. Certè sicut divina bonitas non permisit Deum manere sine germine, sed post effusam ad intra duplici processione Deitatem, ad extra etiam creatione inundavit; ita charitas uni necessario primum adhærens, eoque tendens unde effluxit, in proximum deinde diffluit, ut ipsum ad Deum pertrahat, cui ipsa unita est. Quanvis enim quæcumque charitas etiam infima, sic tota feratur in Deum, ut nihil Deo æquet, illum omnibus anteponat, illi si non semper, saltem sæpe vacet, impedimenta sacratissimæ cum Deo unionis diligentissimè removeat; nihilominus otium illud sanctum charitas negotiis sanctis si non rumpit, interrumpit, & Deum deserit, ut proximi utilitatibus studeat
prop

propter Deum, eumque ad Deum, quem diligit, secum trahat. Etenim ex intima cum Deo ultimo fine & summo bono adhæſione vim sortitur aliis charitas effundendi bona ſua, bonum quippe eſt ſui diffuſivum; & quia ſervire Deo regnare eſt, dum ſe omnium Reſtori ſubjicit, juſ alios Deo ſubjiciendi conſequitur & meretur. Nam ut ait Magnus Gregor. *Charitas ad cuncta virtutum facta dilatatur. A duobus præceptis incipit, ſed ſe ad innumera extendit.* Et in Paſtorali: *Tunc ad alta charitas mirabiliter ſurgit, cum ad ima proximorum ſe miſericorditer attrahit; & quæ benè gñè descendit ad infima, valenter incurrit ad ſumma.* Inſinitatem Dei imitatur charitas, dum omnibus omnia ſit, inſima cum debilibus, mœſta cum triſtibus, alios erigens, ad alios ſe inclinans; aliis blanda, aliis ſevera; nulli inimica, omnibus effuſa. *Semper enim habet unde det,* inquit Auguſt. in Pſalmum 36. *cui plenum eſt pectus charitatis.* Nec illa ad proximum diffuſione minuitur amor Dei, ſed mirum in modum accenditur, & fovetur. Nam ut alicubi ait Magnus Gregor. *Per amorem Dei amor proximi gignitur, & per amorem proximi amor Dei nutritur.* Nam qui amare proximum negligit, proſectò Deum diligere nescit. *Amor Dei amorem proximi generat, & amorem proximi calefacit amor Dei.*

Secundò nedum ad juſtos, ſed ad peccatores etiam viſcera ſe charitatis extendunt: charitas namque peccatorum diligit naturam, ratione cujus ſunt capaces beatitudinis, ſuper cujus communicatione charitas fundata eſt. Peccatoris tamen culpam deteſtatur charitas, quia ſic peccator Deo odio & execrationi eſt, & ſibi ipſi
impedi

impedimento quominus beatitudinem consequatur. Porro circa modum dilectionis eorum notat S.Doctor *art.6.ad 2.* quod amicis peccantibus non sunt subtrahenda amicitiae beneficia, quousque non habeatur spes sanationis eorum, sed magis est eis auxilium dandum ad recuperationem virtutis : sed quando in maximam malitiam incidunt & insanabiles fiunt, tunc non est eis amicitiae familiaritas exhibenda, hoc enim exigit perfectum peccatoris odium quo prosequimur peccantes, quos simul ex charitate diligimus, non volentes quod ipsi volunt, vel gaudentes de his, de quibus ipsi gaudent; sed ut faciamus eos velle quod volumus, & gaudere de his bonis de quibus gaudemus. Unde etiam ex amore eorum cum ipsis convivimus, ut eos convertamus. Sic enim Dominus cum peccatoribus manducabat, & bibebat. Nec eorum societas cavenda est, nisi quantum ad consortium peccati, vel propter periculum subversionis, quod infirmis semper imminet, vel cum Ecclesia per excommunicationem nobis eorum convictu interdicat.

Quomodo autem intelligendae sunt imprecationes quas frequenter Scriptura adversum peccatores ingeminat, explicat S.Doctor *ad 3.* Uno modo ut intelligantur per modum praenuntiationis, non per modum optationis, ut cum dicitur Psal. 9. *Convertantur peccatores in infernum*, sensus est, convertentur peccatores in infernum. Alio modo per modum optationis, ita tamen ut desiderium optantis non referatur ad poenam hominum, sed ad justitiam punientis, secundum illud Psalm. 57. *Latabitur justus cum viderit vindictam*. Tertiò demùm ut desiderium
refera

referatur ad remotionem culpæ, non ad ipsam pœnam, ut scilicet peccata destruantur, & homines remaneant. Et hoc præcipuè intendit charitas, quæ more Dei non vult mortem peccatoris, sed magis ut convertatur & vivat. Unde præclare Bernardus in quadam epist. *O bona mater charitas, quæ sive foveat infirmos, sive exerceat provectos, sive arguat inquietos, diversis diversa exhibens, sicut filios diligit universos. Cum te arguit, mitis est; cum blanditur, simplex est, piè solet savire, sine dolore mulcere, patienter novit irasci, humiliter indignari.*

Tertiò ad inimicos etiam protenditur virtus charitatis. Ad cujus evidentiam advertendum est cum D. Thoma *art. 8.* dilectionem inimicorum tripliciter posse considerari. Primò, ut inimicus, & in quantum inimicus est, diligatur; secundò ut inimicus in quantum homo est, & beatitudinis capax, ametur; tertiò ut speciali amore diligatur. De primo non potest esse controversia, cum diligere inimicos ut tales perversum sit & charitati repugnans, cum hoc esset diligere malum alterius: repugnat etiam legi naturali id amare quod sibi contrarium, & in quantum contrarium est; inimici autem quæ tales, nobis contrarii sunt, unde hoc in eis odisse debemus. De tertio etiam non est difficultas; si enim non tenemur omnibus promiscuè hominibus etiam non infensis specialia amoris indicia exhibere, multò minùs inimicis; sed illud ad perfectionem charitatis pertinet, quæ quis nedùm non vult vinci à malo, sed etiam vult vincere in bono malum, nec solum cayet vindictam sumere de inimico, sed etiam studet illius amorem flectere, & beneficiis demereri. V. g. non tene-

tur quis hostem transeuntem salutare, & singularis honorificentiae signo venerari, nisi forte vel ipse salutet, vel oriatur inde scandalum, aut inimicitiae & rixarum occasio; sed tamen Christianus charitate fervidus inimicum honore praevenit, & si opus fuerit, amplexatur, osculatur. Cæterum in secundo sensu nullus Christianus dubitat, quin eos ut homines sunt, & beatitudinis capaces, diligere teneamur. Ita enim expresse determinatur Matth. 5. *Ego autem dico vobis: Diligite inimicos vestros.* Illud autem mandatum omnibus omnino imponi patet ex eo, quod Veritas subdit: *Ut sitis*, inquit, *filii Patris vestri.* Unde sicut nemo salutem sperare quit, nisi sit filius Patris Cœlestis, qui bonis & malis benefacere non desinit: ita nisi inimicos sincera dilectione prosequatur, eis de corde puro & optimo parcat, esurientes cibet, sitientes potet, aliasve Christianae charitatis significationes in articulo necessitatis exhibeat. Quod sanè præceptum crebrò Salvator, crebrò ejus discipuli inculcaverunt, ut esset veluti tessera Christianismi. Nam ut Tertull. ad scap. cap. I. ait: *Hæc perfecta, & propria bonitas nostra, non communis: amicos diligere, omnium est; inimicos, solorum Christianorum.* Illud mandatum à se impositum mirè Christus implevit, dum moriens in cruce pro crucifixoribus mortem inferentibus oravit, pro illisque obtulit sanguinem, quem crudeles fundebant, ut Crux Christi non tam pendentis patibulum foret, quàm cathedra docentis, exemplumque daret nobis, ut quemadmodum ille fecit, ita & nos faciamus. *Non dedignetur quod fecit Christus, facere Christianus*, inquit August. tract. 52. in Ioan. Nec expectavit mortem, ut
inimi

inimicis benefaceret, qui propter inimicorum peccatorum salutem in mundum venit; qui nec peccatricem lacrymantem, nec Chananæam supplicantem, nec in adulterio deprehensam, nec in telonio sedentem, nec publicanum supplicantem, nec discipulum negantem, nec Saulum minarum & cædis spirantem sprexit; qui Malchialapam auriculæ præcisæ restitutione vindicavit, proditorem amicum vocavit, ipsique donasset veniam, si voluisset expectare misericordiam. In odorem horum Christi unguentorum curre, Lector, sicut Sancti cucurrerunt. Imitare Stephanum, qui non tantum pro Deo, sed ut Deus moriturus, non statui lapidantibus peccatum, positis genibus rogavit, qui pro se stans rogaverat; & nullam frementium hostium sævitiam formidans, dum lapidantium ictibus corpus devictum succubuit, *per charitatem Dei sævientibus Iudais non cessit, & per charitatem proximi pro lapidantibus intercessit*, ut S. Fulgentius ait. Imitare Theodosium, qui ut refert Ambrosius de obitu Theodosi. Beneficium se putabat accepisse, cum rogaretur ignoscere; & tunc propior erat venia, cum fuisset commotio major iracundia; & optabatur in eo, quod timeretur in aliis, ut irasceretur. Tu ergo similiter tam liberaliter omnem dona injuriam, ut inimicum nec punias ulciscendo, nec confundas impropinando, quia fidens pro peccatis tuis veniam petes, si in te peccantibus libenter ignoscere non detrectaveris. *Homo sine peccato esse non potes*, inquit Chrysologus serm. 67. & qui vis semper tibi dimitti, dimitte semper; quantum vis dimitti tibi, tantum dimitte. Quoties vis dimitti tibi, toties tu dimitte; imò quia vis totum dimitti tibi, totum dimitte. Homo in-

rellige, quod remittendo alii, veniam tibi tu ipse dedisti.

*Quæres, utrum homines, tum in lege
natura, cum in lege scripta à Mose
inimicos diligere tenerentur?*

Respondeo affirmanter: & primò quidem præceptum illud esse naturale, satis superque patet ex illo principio signato super nos lumine vultus divini: *Quod tibi non vis fieri, alteri ne feceris.* Nullus autem vult odio haberi, nullus tibi malum pro malo reddi, nisi iudicium occæcatum, vel voluntatem vitiis habeat corruptam: Ergo nullus alium odio habere, nullus malum pro malo reddere debet. Nec obest quod aliquando Patres dicant, amorem inimicorum esse opus perfectionis christianæ, subindicantes amorem illum non à lege naturali, sed ab Evangelio nobis imponi. Non obest, inquam: tum quia Patres sic loquuti sermonem habent de specialis amoris significatione, qua inimicos mollire satagimus, & malum in bono vincere, ac carbones dilectionis super caput eorum ponere studemus; quæ quidem effusio charitatis non lege naturæ præcipitur, sed Evangelica perfectione suaderetur. Tum quia ad servandum legis illius naturalis mandatum, ad tolerandos patienter inimici impetus, ad par pari non referendum, opus est gratia, & perfectione christiana non ulciscente injurias, quia qui perfectioni christianæ operam non dederit, inultam non relinquet injuriam, paremque reponet, vel majorem.

Dices:

Dices: Unaquæque res naturaliter suum contrarium odit, & ipsum destruere nititur quantum potest, ut aqua ignem: ergo non est contra legem naturalem odisse inimicum, sicut non est contra, sed juxta naturam ovium lupum odio prosequi.

Respondeo in primis, magnum interesse discrimen inter inanimata & irrationalia ex una parte, & creaturas rationales ex alia; in illis enim, utpote ratione carentibus, non inest cognitio & amor honestatis, nec adest dictamen illud, Quod tibi fieri non vis, alteri ne facias; sed est mera & cæca in proprium bonum propensio, & proprii mali fuga; unde bruta nihil nisi quod delectat & prodest, amant; quicquid verò nocet, toto impetu sine discretionem odio persequuntur. At creaturæ rationales & ratione diriguntur, & honestate alliciuntur: unde in hostibus malitiam discernunt à natura, & quanvis eis displiceat quod inimici sunt, amant tamen quod homines sunt, Dei filii, æternitatis capaces, sub qua ratione non sunt hostes, sed fratres.

Quantum verò ad legem scriptam, opinatus est Maldonatus, legem veterem jussisse inimicos non solum odio habere, sed etiam delere, illis fretus verbis Salvatoris, Matth. 5. *Audistis quia dictum est antiquis: Diliges proximum tuum, & odio habebis inimicum tuum. Ego autem dico vobis: Diligite inimicos vestros, benefacite his qui oderunt vos.* Quibus verbis satis aperte significatur, Deum in veteri lege odium inimicorum præcepisse. Verum hæc sententia (errorem verius dixerim) divinæ legis immaculatæ, convertentisque animas sanctimonix injuria est. Illam

porrò confutat S. Thomas *in 3. dist. 31. -quæst. 1. art. 1.* ex illo Levitici 18. *Non quaras ultionem, nec memineris injuria civium tuorum.* In veteri lege, inquit ibi S. Doctor ad 2. *etiam homines tenebantur ad dilectionem inimicorum, sicut patet per authoritatem Levitici inductam.* Unde quod dicitur: *Odio habebis inimicum tuum, non est ex lege sumptum, quia nusquam hoc in litera invenitur; sed est additum ex prava interpretatione Iudaorum, qui ex eo, quod præcipiebatur dilectio proximi, concludebant quod inimici erant odiendi.* Idem docet 1. 2. *quæst. 107. art. 2. ad 2. ibi: Circa odium inimicorum removit Christus falsum Pharisaorum intellectum, nos monens ut persona non odio habeatur, sed culpa.*

Ex quibus manifestissimè claret, quàm immeritò præfatus Maldonatus scripserit, Christum in verbis relatis non Scribarum & Pharisaorum tra litiones, pravasque legis divinæ interpretationes, sed legem ipsam correxisse, nostramque verborum Christi explicationem ex hæreticorum officina esse depromptam. Quis ferat æquis auribus & pacato animo inorosi recentioris atrocem censuram, qua nedum legem veterem inhonorat, sed & expositionem D. Thomæ ab hæreticis mutuata in frunitè effutit? Audin' Petre à Valleclausa, quis Syriacorum tale, vel tantum spurciloquium protulit unquam. Soline Syriaci sunt erga sacra & Sanctos irreverentes? Scilicet, scilicet? Sed ut ad rem redeamus, ut manifestè liqueat expositionem verborum Christi adductam non ab hæreticis, sed à Sanctis esse derivatam, placet adducere verba Augustini *lib. 18. contra Faustum, cap. 24.* & sunt hæc: *Non est contrarium quod in antiqua Scriptura dictum est,*

Oderis

Oderis inimicum tuum; & in Evangelio, Diligite inimicos vestros: quia unusquisque iniquus homo in quantum iniquus est, odio habendus est, in quantum autem homo diligendus. Audito igitur & non intellecto quod antiquis dictum erat, Oderis inimicum tuum, ferebantur homines in hominis odium, cum deberent non odisse nisi vitium. Hos corrigit Dominus dicendo: Diligite inimicos vestros; ut qui jam dixerat, Non veni legem solvere, sed adimplere. Ideoque de odio inimici quod scriptum est in lege, non solverat, præcipiendo utique ut diligamus inimicos, sed cogebat nos intelligere quod possumus unum, eundemque hominem & odisse propter culpam, & diligere propter naturam. Sentit ergo Augustinus Christum non legem correxisse, sed depravantes adulterantium Phariseorum interpretationes. Et sic intelligendi sunt alii Patres, quorum longum syllabum refert præfatus Maldonatus; nullus enim eorum vult Christum legem correxisse, sed eam vel duntaxat explicuisse, vel consilia superaddidisse, vel pravam Scribarum, Phariseorumque intelligentiam sustulisse.

Potest etiam veritas nostræ sententiæ aliis veteris paginæ testimoniis confirmari. Dicitur enim Exodi 23. Si occurreris bovi inimici tui, aut asino erranti, reduc ad eum: & si videris asinum odientis te jacere sub onere, non pertransibis, sed sublevabis cum eo. Quis credat Deum has exiguas officiorum minutias in favorem inimici præcepisse, & simul odium personæ statuisse? Plurisque est apud Deum bos errans, aut asinus lassus homine sui imaginæ & creaturarum principe? Sed clariùs adhuc Proverb. 24. Cum ceciderit inimicus tuus, ne gaudeas, & in ruina ejus

ne exultet cor tuum. Et cap. 25. Si esurierit inimicus tuus, ciba illum; si sitit, da ei aquam bibere; prunas enim congregabis super caput ejus, & Dominus reddet tibi. Ex quo loco desumpsit Magnus Apostolus id quod Rom. 12. tam magnificè, & ferè totidem verbis prædicat. Ecclesiastici 28. Qui vindicari vult, à Domino inveniet vindictam. Cui succinit illud Deuteron. 32. Mea est ultio, & ego retribuam. Denique omis-
 sis aliis locis, Job 31. dicitur: *Qua est iniquitas maxima, & negatio contra Deum altissimum, si gavisus sum ad ruinam ejus qui me oderat, & exultavi quòd invenisset eum malum: non enim dedi ad peccandum guttur meum, ut expeterem maledicens animam ejus.* Quibus verbis effugium Maldonati aientis prohiberi solum Judæis inimicitias gerere cum confratribus legem Mo-
 sis profitentibus; hoc, inquam, effugium evanescit: adductis enim testimoniis indiscrimina-
 tim & absque ulla gentis distinctione inimico-
 rum odium apertissimè prohibetur.

Dices: Locus ille, *Dictum est antiquis, odio habebis inimicum tuum*, non potest ita exponi, ut dictum sit à Scribis & Phariseis: tum quia Scribæ & Pharisei non fuerunt antiqui, sed proximè ante Christi adventum, asserente D. Hieronymo Samaï & Hallo, ex quibus orti sunt Scribæ & Pharisei, non multò ante Christi nativitatem ortos esse in Judæa. Tum quia Christus ibidem *Matth. 5.* multa corrigit, quæ constat non fuisse à Phariseis adulterata, sed in lege expressa, quale est illud Deuter. 24. *Quicumque dimiserit uxorem suam, det illi libellum repudii.* Quod tamen Christus corrigit. Tum quia, si à Phariseis inducta fuisset talis legum corruptio, non eru-
 buisset

buisset Christus eos propriis nominibus indigere, cum patenter cavere à fermento Phariseorum, quod est hypocrisis, prædicaret, eis multiplex vae intentaret, anathematis pœna eos percelleret, & diris omnibus ob infanda ipsorum facinora devoveret.

Respondeo, ex dictis duplici solutione has omnes instantias confutari. Primò enim cum Augustino, gratis concedi, vel potius permitti potest, dictum illud à Christo correctum in scriptura aliqua haberi, sed juxta sensum scripturæ & legis de odio inimici reduplicativè ut inimici & iniqui intelligi illud verbum, tamen ab antiquis in pravam sensum detortum. Secundò cum S. Thoma sustineri potest, nusquam verbum illud in Scriptura canonica scriptum inveniri, sed prava Judæorum corruptela fuisse adductum. Contra priorem solutionem instantiæ adductæ nihil urgent, quatenus verò militare videantur contra posteriorem, dicendum ad primam, quidquid sit an Scribæ & Pharisei essent valde antiqui, de quo variè varii sentiunt, nihil vetare per antiquos intelligi Judæos antiquiores, Scripturarum perversa interpretatione odium inimicorum præcipientes, quorum traditiones apud Scribas & Phariseos vel vigeant planè, vel obsoletæ suscitabantur.

Ad 2. dico Christum nullatenus fuisse legi adversum, quando uxorem non esse dimittendam mandavit. *Præcepta Domini* (inquit post D. Augustinum S. Thomas 1. 2. quæst. 107. art. 2. ad 2.) *non sunt contraria præceptis veteris legis. Quod enim Dominus præcepit de uxore non dimittenda, non est contrarium ei quod lex præcepit; neque enim ait lex: Qui voluerit, dimittat uxorem; cui esset*

contrarium non dimittere : sed utique nolebat uxorem dimitti à viro, qui hanc interposuit moram, ut in dissidium animus præcepti libelli conscriptione refractus absteret. Vnde Dominus ad hoc confirmandum, ut non faciliè uxor dimittatur, solam causam fornicationis excepit. Quare Christus etiam hanc legem non correxit, sed Judæorum errorem existimantium dimissionem uxoris cum libello repudiî, ob quamcunque vel levissimam causam pro hominum arbitrato fieri posse.

Dices iterum : Deuteronomii 25. præcipitur Israëlitis, ut injuriam ab Amalecitis illatam quamprimùm ulciscerentur, eosque usque ad internecionem delerent. *Delebis, inquit sacer textus, nomen ejus sub cælo, cave ne obliviscaris.* Ergo odium inimicorum, de eisque vindicta lege veteri præcipiebatur.

Respondeo ibi præcipi Israëlitis, ut injuriam Deo, populoque sancto irrogatam, non privata authoritate, sed publici belli jure vindicarent. Exterminium autem hostium justo bello, & præsertim Deo, qui est Dominus v. & necis, impetrante, non solum non est licitum, sed justum & honestum. Sed hæc satis de dilectione inimicorum, ad quam non tam rationum momenta, quam Christi exempla compellunt : *Quis enim appetitus, inquit Ambros. lib.2. de fide, c.3.) non discat ignoscere, quando pro persecutoribus Christus, & crucifixoribus orabat ?* Argumentis ex omni lege petitis non moveare, per me licet; sed quod cordis tui quamlibet adamantinam duritiem non emolliat Christi morientis sanguis, & suavissimus extremorum ejus verborum sonus, vix credam, multò minùs feram. *Pater ignosce illis.*

Id

Id est, Pater, si me amas, si me filium agnoscis, si paterna misericordiæ viscera sint, ignosce illis. Post illud exemplum vindictam sume, si audes. Divinè Augustinus sermone 223. de temp. *Quid vis? Vindicari? Vide pendentem, & tibi de ligno tanquam de tribunali precipientem. Vide pendentem, & tibi languenti de suo sanguine medicamentum facientem. Vide pendentem, si vindicari vis. Vide pendentem, audi precantem: Pater ignosce illis.*

Quartò ad ipsam charitatem se extendit charitas, tametsi non per se primò: nam de ratione amoris est quod possit supra seipsum reflecti; tum quia est liber & spontaneus motus amanti ad amatum, unde ex hoc ipso, quod aliquis amat, se amare amat: tum quia hoc habet ratione suæ potentiæ & facultatis, scilicet voluntatis, cujus objectum cum sit bonum universale, quidquid potest cadere sub rationem boni, potest etiam sub actum voluntatis cadere; & quia velle est quoddam bonum, potest voluntas velle se velle. Tum demùm, quia charitas non est simpliciter amor, sed amicitia, per quam aliquid amatur dupliciter: primò ut amicus, cui bonum volumus; secundò ut bonum, quod ipsi volumus: & hoc modo charitas per charitatem amatur, cum sit bonorum maximum, quod iis quos ex charitate diligimus, optare possumus, est enim communicatio spiritalis vitæ, per quam ad beatitudinem pervenitur. Quod diximus de charitate, posse nimirum ex charitate diligere tanquam bonum amico optatum, de creaturis irrationalibus proportionè servata dici potest; eas enim amico velle possumus, eas etiam ad honorem Dei, & utilitatem proximi conservare. *Ca.*

terum cum illis nulla charitatis amicitia iniri potest, quippe quæ tota super communicatione beatitudinis æternæ, cujus creaturæ irrationalis incapaces sunt, fundatur.

Quintò ad proprium subjectum se charitas extendit. Potest enim homo seipsum ex charitate diligere secundum propriam rationem charitatis, prout est amicitia hominis ad Deum principaliter, & ex consequenti ad ea quæ sunt Dei, inter quæ etiam est ipse homo charitatem habens. Unde tunc homo solum se ex charitate diligit, cum Deum in se diligit. Nam ceteroquin secum amicitiam strictam, quæ necessariò est ad alterum redamantem, habere nequit: unicuique autem ad seipsum non est unio & redamatio, sed unitas & identitas: unde circa nos ipsos non est propriè amicitia, sed aliquid majus; sicut de principiis non habetur scientiâ, sed aliquid altius, scilicet intelligentia.

Ob eandem rationem potest homo diligere corpus suum, non quidem secundum infectionem culpæ & corruptionem pœnæ, sub qua ratione ab eo separari optandum esset cum Apostolo dicente: *Quis me liberabit de corpore mortis hujus?* Et iterum: *Cupio dissolvi, & esse cum Christo.* Sed potest diligi corpus secundum naturam ejus, prout eo ad obsequium Dei uti possumus. Præsertim quia corpus sicut laborum & pœnitentiæ socius est, ita & beatitudinis particeps futurum est, gloriâ animæ in corpus redundaturâ. Maximè quia opera & officia pietatis, quæ per corpus gerimus, in Dei gloriam, ejusque obtinendam fruitionem referre possumus & debemus. Et licet corpus non possit redamare, amatur tamen non solum amore benevolentiae, sed

sed etiam amicitia, quia est aliquid pertinens ad amicum, nempe Deum, propter quem corpus diligimus. Et hoc usque adeo verum est, ut sine charitate nec animam nostram, nec corpus nostrum verè diligamus. Unde præclare ostendit S. Thomas q. 25. art. 7. peccatores non diligere seipsos, *quia mali principale estimant in seipsis naturam sensitivam & corporalem: unde non rectè cognoscentes seipsos, non verè diligunt seipsos, sed diligunt id quod seipsos esse reputant.*

Quod etiam confirmari potest ex quinque amicitia notis, quas tradit Philosophus 9. Ethic. amicus enim vult primò amicum suum esse & vivere: mali autem nolunt vivere vita rationali & Christiana, nec volunt in integritate interioris hominis conservari. Secundò amicus vult amico bona: mali autem spiritualia bona, quæ sola boni nomine digna sunt, non concupiscunt. Tertiò amicus operatur bona ad amicum, quia verus amor non est tantum affectivus, sed effectivus: mali autem nulla spiritualia bona, quæ sola sibi ad salutem conferunt, student operari. Quartò amicus amico delectabiliter convivit: mali autem nullatenus secum convivere delectantur, quia dum redeunt ad cor, ibi mala præsentia, præterita, & futura, à quibus abhorrent, inveniunt. Quintò amicus cum amico concordat, de bonis ejus congaudens, moerore ejus ipse percipiens: mali autem sibi ipsis consentire nequeunt, propter continuos excedenti conscientia remorsus, secundum illam à Propheta intentatam minam: *Arguam te, & statuam contra faciem tuam.* Ergo mali non se diligunt, nec est in eis vera dilectio, sed apparentis amor etiam naturalis, licet non totaliter tollatur.

tur ab eis, in illis tamen pervertitur, & illud Davidicum impletur: *Qui diligit iniquitatem, odit animam suam.* Soli ergo boni diligunt se, quia & interiorum hominem studiosè conservant in æternum, & bonis officiis insudant votis, & operibus, & bonæ conscientiae veluti paradiso anticipato, & jugi convivio perfruuntur, quia ibi piarum cogitationum præsens solatium, & præteritorum beneficiorum suavem memoriam, & spem futurorum bonorum, ex quibus delectatio causatur, indeficienter inveniunt. Denique nullam in seipsis voluntatis dissensionem patiuntur, quia tota eorum anima in unum tendit, ut una uni Deo unicè hæreat, ubi solida pax invenitur.

Denique ad Angelos etiam se extendit charitas, amicitia quippe charitatis fundatur super communicatione beatitudinis æternæ, cujus homines non minùs quàm Angeli participes sunt: unde *Matth. 22.* dicitur, quod in resurrectione erunt homines sicut Angeli Dei. Unde beati Angeli nobiscum convivere, quod amicorum proprium est, nequaquam dedignantur, sed amant & lætantur; unde orantibus adstant, offeruntque Deo vota & preces hominum, si sine deceptione levare puras manus prospexerint. Adsunt, ut aliàs ex Bernardo didiscimus, non modò præsentibus nobiscum, sed etiam pro nobis; adsunt, ut protegant; adsunt, ut proficiant. Ergo simus devoti, simus grati tantis custodiis; redamemus eos quantum possumus, quantum debemus: eos, inquam, futuros aliquando rerum cohæredes, actores interim & tutores à Patre positos, & præpositos, & amatores nostros. Væ autem nobis, si quando pecca-

tis nostris provocati indignos nos judicaverint præsentia & visitatione sua, quæ & protegere nos, & propulsare poterat.

Sextum elogium : Ordo Charitatis.

Vidimus ad quæ extendat se charitatis effusio, quæ sicut ignis contineri, & intra cordis secreta, intercludi nequaquam potest: jam operæ pretium est videamus quem illa ordinem servet; neque enim dubitandum est, quin in his quæ charitas diligit, ordinem servet virtus illa, quæ mater est pacis, pax autem est tranquillitas ordinis. Et ratio est, quia ordo attendendus est secundum relationem ad aliquod principium; eo enim ipso quod aliquid habet rationem Principii alterius, constituitur ordo inter principium, & illud quod ab eo procedit: charitas autem maxime importat comparisonem & ordinem ad primum principium, cum tendat in principium beatitudinis, in cujus communicatione amicitia charitatis fundatur: beatitudo autem & finis ultimus, in quem tendit charitas, habet rationem principii in appetibilibus & agendis: ergo in his quæ ex charitate diliguntur, servare quemdam ordinem necesse est, id est magis vel minus diligendi sunt pro majori vel minori habitudine, quam ad Deum referunt. Unde sacra Sponsa dicebat Cant. 2. *Introduxit me Rex in cellam vinariam, ordinavit in me charitatem.*

In primis certum est, Deum esse magis & principalius proximo diligendum. Amicitia enim respicit principaliter id, in quo præcipue
inve

invenitur illud bonum, super cujus communicatione fundatur: amicitia autem charitatis fundatur super communicatione beatitudinis, quæ in Deo sicut in fonte invenitur, unde in alios derivatur. Necessè est enim ut eo majori impetu feratur charitas unde effluxit; & sicut vis insita sursum movet aquam ab alto manantem, eamque urget donec eam eò provexerit unde delapsa est: sic charitas quasi fons aquæ salientis in vitam æternam ex divinæ naturæ confortio ad Deum jugiter ciet, nec quiescit sacer motus, donec in eo quiescat unde processit. Hinc est quod ad unum Deum anhelat, illum unum necessarium quærit, in eo prosequendo tota est, nec aliud curat nisi Deum. Magdalenam, quæ optimam partem elegit, imitatur, uni Deo vacans, uni hians, & totum ab uno Deo hauriens, quod illi instar est omnium.

Dices: Similitudo est radix & origo amicitiae: sed major est similitudo hominis ad proximum quàm ad Deum: ergo major est amicitia charitatis ad proximum quàm ad Deum.

Respondeo similitudinem quam habemus ad Deum, esse priorem & causam similitudinis quam habemus ad proximum; ex hoc enim quod participamus à Deo illud etiam quod proximus habet, similes proximo efficimur: & ideo ratione similitudinis priùs & principalius Deum quàm proximum diligere debemus, quia similitudo nostri ad Deum & antiquior est, & solidior, & aliarum omnium causa. Similitudo autem fundata in causalitate, intimioris amoris origo est; unde major est amicitia inter filium & matrem, quàm fratrem, quia licet filius sit si-

milior

milior fratri, à matre tamen id, quò assimilatur fratri, accepit.

Est tamen difficultas inter Interpretes D. Thomæ, an proximus possit ex intensiori charitatis affectu diligì quàm Deus. Quia in re concedunt quidem omnes, charitatem non obligare actus erga Deum ferventiores elicere, quàm erga proximum, quia gradualis actuum quantitas non cadit sub præceptum; & constat apud omnes, sincero actu dilectionis, tametsi remisso, adimpleri præceptum amandi Dei. Quia nimirum intensio actuum discerni non potest; unde sicut non cadit sub scientiam, ita nec sub legem. Fatentur etiam omnes, Deum esse magis appretiativè diligendum; ita ut qui verè Deum amat, ita debeat esse comparatus, ut omnia terrena bona propter Deum deferere, omnia mala æquo tolerare animo malit, quàm Deum charitate dilectum culpa mortali offendere, & ejus amicitiae fœdus violare. In confessio etiam est apud omnes, charitatem ex natura sua ad Deum intensius diligendum inclinare; quia sponte sua ad illud intensius amandum proclivis est, quod magis est amabile. Talis autem est Deus, qui est omne bonum, & totius bonitatis fontale principium, ex toto corde, totis viribus, tota mente diligendum. Sed controversia est, an de facto & in exercitio possit homo ex charitate magis intensè diligere proximum quàm Deum, ita ut hæc major intensio ab habitu charitatis procedat.

Partem negativam cum B.ñez sustinent aliqui, quia charitas habet essentialiter quod sit participatio divinæ voluntatis, cujus actus & intensio à supernaturali Spiritus sancti motu procedit

dit , tenditque ex natura sua in Deum ut objectum formale. Hæc est propria charitatis natura & character , unde tres consequentiæ deducuntur. Prima: Ergo sicut implicat , quod divina voluntas intensius feratur in bonitatem creatam quàm increatam ; ita repugnat posse à charitate elici ferventiorum motum in proximum quàm in Deum. Secunda consequentia : Ergo sicut Spiritus sanctus non potest magis inclinare ad dilectionem creaturarum quàm Dei , ita nec ex Charitate oriri intensior amor proximi quàm Dei. Tertia consequentia : Ergo sicut omnis habitus immediatius , connaturalius , & vehementius inclinatur ad objectum formale quàm ad materiale , cum in istud non nisi propter illud feratur : ita charitas non potest intensius in proximum , qui est objectum materiale , quàm in Deum qui est objectum formale propendere. Certè sicut lumen principiorum intensius inclinatur ad principia cognoscenda , illaque uberius illustrat , quàm conclusiones ex principiis derivatas ; & voluntas ardentius fertur in finem quàm in media , quæ non nisi propter finem amat : ita charitas fortius & efficacius in Deum finem ultimum fertur , quàm in proximum , quem non nisi propter Deum amat.

Alii tamen cum Magistris Serra , & Joanne de la Pena affirmantem sententiam docent , & sic probant : Charitatis habitus nobis secundum connaturalem voluntatis modum infunditur , qui exigit ut illo liberè utamur : Ergo licet habitus charitatis magis naturâ suâ in Deum quàm in proximum propendeat , eo tamen ad proximum fervidiùs , intensiusque diligendum uti poterimus : sicut habitu Spei intensius

intensiùs possumus gloriam corporis, quæ est objectum materiale, vel alia bona secundaria desiderare, quàm beatitudinem animæ, quæ est objectum spei formale: sicut etiam habitu Theologico remissiùs in Dei speculatione utimur, intensiùs in contemplatione aliorum à Deo; cum tamen Deus sit objectum formale, & cætera quæque objectum materiale Theologiæ. Nec obest quod dilectio charitatis nobis à Spiritu sancto inspiretur: non obest, inquam, quia sicut Spiritus sanctus interdum movet ad minus bonum & perfectum, putà matrimonium, quàm ad majus & perfectius bonum, putà cælibatum: ita potest intensiorem amoris proximi quàm Dei motum infundere, & homo magis ad illius, quàm istius dilectionem conari: nec est necesse, quod sicut dilectio proximi causatur à dilectione Dei, ita intensio unius ab intensiōe alterius derivetur.

Probabilis sanè hinc inde sententia. Verùm si profundius veritatem indagemus, & quæ antea ex D. Thoma diximus, recolamus, prior sententia videbitur posteriore solidior. Cùm enim in via D. Thomæ certum sit per charitatem in proximo nos non diligere nisi Deum, manifestum erit implicare, nos posse per charitatem magis proximum quàm Deum diligere, cùm ratio diligendi proximum ex charitate sit Deus; & propter quod unumquodque tale, & illud magis. Quare diligentissimè distinguendum est inter amorem naturalem proximi, & inter amorem supernaturalem, quo eum ex charitate diligimus: licèt enim fieri possit ut voluntas habentis charitatem intensiùs prosequatur proximum amore naturali ex motivo humano proxime

Sic
dic
Sic
dic

ximè elicitò , tametsi fortassis in Deum relato ex imperio charitatis , quæ sibi actus naturales subordinare potest : nunquam tamen ille intensior proximi amor à charitate elicitivè procedet , quia in terminis implicat charitatem magis diligere proximum propter Deum , quàm ipsum Deum , cùm hoc ipso quod diligit propter Deum , magis utique diligit ipsum Deum.

Ex quibus absque negotio argumentis negativæ sententiæ fit satis : licèt enim habitibus uti ad libitum possimus , iis tamen intra sphæram suæ activitatis , quam transilire non possunt , uti valemus : non enim uti possumus habitu fidei , vel spei ad eliciendos actus temperantiæ ; nec eodem habitu ad melius , magisque prosequendum objectum secundarium quàm primarium , quia istud est ratio attingendi illius ; unde illud magis vel minùs attingitur pro ratione & modo intensiōis , quo primarium objectum attingitur. Unde argumentum falsò supponit spem vehementiùs ferri in bona creata quàm in Deum summum bonum , & in beatitudinem corporis ardentius quàm in beatitudinem animæ ; id enim virtuti Theologicæ planè repugnat , & ordinis rectitudini adversatur. Quod verò dicitur de habitu Theologico non urget , tum quia ægrè probaretur habitum Theologiæ intensius circa creaturas quàm Deum occupari , cùm vehementior illa creaturarum consideratio non Theologiæ , sed Theologo optimè tribui possit. Et certè sicut elementa sponte & toto impetu feruntur in centrum ubi quiescunt suaviter , nec gravitant alibi onerosa : ita vera Theologia toto conatu in Deum cietur , sed quia in illum suaviùs & connaturaliùs fertur , & in ejus
contem

contemplatione sine onere quiescit dulcius, videtur quandoque majori conatu ferri in alia à Deo, quia cum illa sint veluti extranea, quasi violentè ad illa rapitur: qui proinde conatus, quia sensibilior est, apparet etiam vehementior. Sed ut ut sit, est etiam grande discrimen inter Theologiam & virtutes Theologicas, quia Theologia, tametsi sit habitus entitativè supernaturalis, est tamen acquisitus & assensibus supernaturalibus studio frequentatis partus, ac proinde speciali Spiritus sancti instinctu non producuntur in nobis actus Theologiæ, sicut fidei, spei, & charitatis: unde non mirum si in consideratione & decursu Theologiæ intellectus humanus ardentius interdum circa creata occupetur, quibus amplius delectatur, vel quæ melius percipit, sicque in speculativis interdum nec modum, nec ordinem teneat. At quæ à Deo sunt, ordinata sunt: unde nequit Spiritus sanctus vehementius in creaturas, quam in Deum inclinare. Et licet Spiritus sanctus non semper moveat ad id quod objectivè perfectius est, id tamen indubitatum esse debet, Spiritum sanctum non posse ad actum contra naturam & inclinationem habitus, destructâ recti ordinis œconomiâ permovere: repugnat autem inclinationi charitatis magis proximum, quam Deum amare, cum proximum amare nisi propter Deum nolit, nec possit.

Secundò ordo charitatis postulat ut Deum magis quam nosmetipsos diligamus. Si enim omnis creatura suo modo plus & vehementius fertur in Deum, seu in bonum commune totius universi, quod utique Deus est, quanto magis verum id esse probatur in amicitia charitatis, cum
Deus

Deus sit omnis boni bonum, principium fontale totius participatæ bonitatis, origo & objectum veræ felicitatis, & totius universi, creaturæ potissimum rationalis finis.

Neque huic veritati, ad quam non tam sumus docti quàm nati, obsunt duo illa Philosophorum axiomata; *Amicabilia ad alterum veniunt ex amicabilibus ad seipsum; Amabile bonum, unicuique autem proprium.* Non obsunt, inquam: primum enim intelligitur de amicabilibus quæ sunt ad alterum, in quo bonum secundum aliquem particularem duntaxat modum invenitur: non autem de amicabilibus quæ sunt ad alterum, in quo bonum secundum rationem totius invenitur. Et ratio discriminis est, quia licet bonum alienum sit postponendum proprio, unde amor sui est regula amoris aliorum: attamen tam bonum proprium quàm aliorum, bono totius cedit, unde manus pro incolumitate & conservatione totius suppositi ictui in caput illato se objicit, ut propulset cum sui jactura interitum totius. Idem in politicis apparet; nam cives pro bono communi, & propriarum rerum & personarum dispendia interdum sustinent. Unde si homo esset pars naturalis civitatis, hæc propensio foret ei naturalis.

Dices: Homo facilius se amore naturali diligit quàm Deum; in diligendo enim se nullam invenit difficultatem, quam in diligendo Deo experitur, cum amor Dei qualiscumque, si sit verus & efficax, superet naturæ totas vires.

Respondeo quod si homo rectam rationem sequeretur, si se naturali etiam propensione à Deo institutæ permetteret, facilius & suavius Deum diligeret, quàm seipsum: cum enim voluntas sit

appe

appetitus rationalis, inclinatio rectæ voluntatis rationis ductum sequi debet: unde sicut recta ratio Deum esse magis diligendum dicitur, ita inclinatio voluntatis propensius in ipsum ferri debet. Unde fit, nulla esse opus virtute speciali ad Deum amore naturali diligendum, cum voluntas sit magis ad Deum quam proprium subiectum diligendum naturaliter propensa: unde sicut ad diligendum se sola sufficit non corrupta voluntatis inclinatio, ita ad diligendum Deum summum & universale bonum nullo indiget virtutis additamento. Si quam verò in Deo diligendo difficultatem experitur dura voluntas, non ex impotentia voluntatis nascitur hic torpor, sed ab inordinato appetitus gustu divina fastidientis, & non quæ sursum sunt sapientis, sed quæ super terram.

Tertiò ordo charitatis exigit, ut homo magis seipsum diligat quam proximum. Amicitia enim charitatis super communicatione & participatione æternæ beatitudinis tota fundatur, & in tantum proximus diligitur, in quantum boni illius æterni socius esse potest: sed non potest iniri hæc amicitia, nisi homo participet bonum divinum; quod fit per gratiam & charitatem: Ergo prius & principalius debet homo diligere bonum spirituale proprium quam quodcumque bonum proximi; quia si careat spiritali bono, nec Deo unietur, nec bonorum ejus supernaturalium particeps erit, nec ullam cum proximo societatem spiritalem contrahet, quia hæc omnia præsupponunt hominem bonis esse spiritalibus & divinis charismatibus exornatum. Unde post Deum debet homo magis se diligere quam quemcumque alium, secundum naturam
spiritua

spiritalem, quæ est principale hominis bonum, quod Apostolus 2. Corinth. 5. appellat interio-rem hominem. Unde in *spiritualibus non debet homo pati detrimentum peccando, ut proximum liberet à peccato*, ut ait D. Thomas *quest. 26. art. 4. ad 2.* quod iisdem verbis inculcat in corpore articuli, dicens: *Homo non debet subire aliquod malum peccati, quod contrariatur participationi beatitudinis, ut proximum liberet à peccato.* Quæ verba sanctissima & notatu dignissima ponderare debent viri Evangelici, & animarum rectores, quibus nihil prodest si alios lucrentur, ipsi verò animæ suæ detrimentum patiantur. Quare, mi Theologe, si experiaris in sacro vel pœnitentiæ tribunali, vel apostolico divini verbi ministerio jacturam pati animam tuam, te in peccata lethalia, acceptâ sacris ex his functionibus occasione labi, fuge, amabò, fuge longè, citò, tardè; longè in solitudinem & recessum; citò, ne amor peccati radices agat; tardè verò ad illa humeris angelicis formidanda munia revertaris, nisi post longam seriæ pœnitentiæ moram, mundo crucifixus, tibi mortuus fructum absque ullo proprii dispendii periculo non mediocre afferre valeas. Memento quod charitas bene ordinata incipit à seipso, & juxta vetus adagium, Qui sibi nequam, cui bonus erit?

Quartò ordo charitatis petit ut plus diligamus proximum quantum ad salutem animæ, quàm corpus proprium; salus enim proximi magis est ex charitate diligibilis, quia *consociatio in plena participatione beatitudinis, quæ est ratio diligendi proximum, est major ratio diligendi quàm participatio beatitudinis per redundantiam, quæ est ratio diligendi proprium corpus.* inquit

inquit D. Thomas *art. 5.* Id est, quia amicitia charitatis fundatur in participatione & communicatione beatitudinis, debet homo magis ex charitate diligere illud quod secum beatitudinem magis participat: anima autem proximi melius participare beatitudinem, meliusque Deo summo bono frui potest, quàm proprium corpus: unde salus animæ proximi proprii corporis incolumitati præferenda est. Unde in casu in quo homo habet curam animarum, earumque salutem ex injuncto & acceptato ministerio providere tenetur, proprium pro salute proximi corpus exponere debet. *Sed quod aliquis* (curam animarum non habens) *sponte ad hoc se offerat,* inquit S. Thomas ibidem ad 3. *pertinet ad perfectionem charitatis.* Hinc viri sancti pro salute animarum corpus voluntaria macerant tortura, jeuniis, disciplinis, vigiliis, laboribus, peregrinationibus affligunt. Porro quàm damnanda illa est, & utinam non adeo communis, Prælatorum & Rectorum animarum incuria, qui animas sibi commissas negligunt, ut toti corporis, familiæ, status, dominiis, aliorumve temporalium utilitatibus quàm studiosissimè incumbant. An nesciunt quod Augustinus ait: *Anima etiam pessima melior est optimo corpore; & quod, sicut Deus omnem creaturam, sic anima ceteras creaturas dignitate præcellit?* An nunquam legerunt apud Ambrosium lib. 1. de offic. *Si magna mercedis est à morte eripere carnem quanquam morituram, quanti est meriti à morte animam liberare in cælesti patria sine fine victuram?* An fortè dignitatem ignorant animarum? Nam cadit asinus, & invenit qui se sublevet: cadit acina, & non est qui manum apponat; anima, inquam, substantia

invisibilis, incorporea, immortalis; anima, inquam, insignita Dei imagine, decorata similitudine, desponsata in fide, dotata in spiritu, redempta sanguine, deputata cum Angelis, capax beatitudinis, hæres bonitatis. Ergo si Deum amas, proximum ama, & ut illius prosis animæ, exponere corpus, prædicare corporis & fortunæ bona ne formida. Quia si Deum diligere te dicis, & proximo viscera clausuris, mentiri te dicet discipulus veritatis. Quia teste Gregor. *lib. 5. Moral.* nunquam plenè in Dei dilectione proficies, nisi in ejusdem dilectionis gremio prius fueris proximi charitate lactatus; unde ille in amore Dei major est, qui ad ejus amorem plurimos trahit. Proximum autem quomodo amat, qui pro salute proximi nec leve corporis incommodum ferre desiderat? Tunc ergo proximum verè diligimus tanquam nos ipsos, cum illum ad id bonum, ad quod ipsi tendimus, adducimus; cum eum aut quia justus est, aut ut justus sit, diligimus; cum amorem erga ipsum nostrum plus bona opera loquuntur, quàm lingua; cum pro ipso mala aliqua ferre non refugimus, pro quo Christus mortuus est: ut in ipso bono opere proximus amari se videat, & si non tantum facimus quantum pro eo vellemus operari, amoris tamen flammam sentiat vel ex parte.

Quintò ordo charitatis exigit, ut in ipsa proximi dilectione inæqualem amoris affectum pro personarum diversitate impendamus, & eos intensiori charitatis affectu prosequamur, quibus convenit nos magis esse beneficos. Ordo namque charitatis attenditur secundum comparationem ad unum aliquod principium; principium dilectionis charitatis est Deus, & ipsemet diligens:

gens : unde necesse est , quod secundum majorem vel minorem ad alterum istorum principiorum propinquitatem major vel minor sit affectus charitatis. Quanvis enim ex parte boni optati omnes homines æqualiter diligamus, quia eis idem æternæ beatitudinis bonum sincerè exoptamus : attamen ex parte intensiōis actus non omnes æquè diligimus , quia non omnes æqualiter ad Deum , vel nos se habere jure meritò censendi sunt. Sic rationabiliter eos magis diligimus, qui magis nobis sunt secundum carnalem originem conjuncti, quia intensio, & veluti intimitas dilectionis ex conjunctione dilecti ad diligentem proficiscitur ; conjunctio autem naturalis originis major est & prior : unde amicitia consanguineorum auctior est , & stabilior, *utpote naturalior existens*, ut ait D. Thomas, quia est secundum id quod pertinet ad substantiam, aliæ autem conjunctiones sunt accidentariæ & supervenientes , quæ proinde facilius removeri possunt. Sic etiam civis in his quæ pertinent ad civilem conservationem plus debet diligere concives , quos communio civilis conjungit. Sic etiam miles in bellicis plus commilitones diligit, quos communicatio militaris adunat. Sic pater spiritualis strictissimè diligit filios , quos in Christo genuit, quos gratiæ & educationis communio purissimè copulat. Unde Ambrosius *lib. 1. offic. cap. 7.* ait : *Non minùs vos diligo , quos in Evangelio genui , quàm si in conjugio suscepissem : non enim vebementior est natura ad diligendum , quàm gratia. Plus certè diligere debemus quos perpetuos nobis computamus futuros , quàm quos tantùm in hoc saculo.* Sic socii & familiares tenerimè se & juxtà solidissimè redamant.

quos cordis & bonorum libera communio connectit. Unde dicitur Proverb. 18. *Vir amabilis ad societatem magis erit amicus, quàm frater.* Unde interdum videmus consanguineorum amicitiam, quam natura firmat, minorem esse familiarium fœdere, quod incoacta voluntas contraxit. Sic patres licet magis reveantur suos parentes, magis tamen diligunt filios, utpotè aliquid sui existentes, quos proinde intimiori ac suaviori amoris sensu complectuntur: quanvis certum sit, filios amore appretiationis magis diligere parentes, qui cùm habeant rationem principii, habent etiam rationem eminentioris & majoris boni. Et quia pater habet rationem excellentioris principii naturalis originis, cùm sit principium per modum agentis, ideo per se loquendo magis est diligendus quàm mater, quæ est principium generationis per modum patientis & materiæ. Dico per se, seu loquendo de amicitia quæ debetur patri & matri secundum generationis rationem; nam per accidens, & ex aliis amicitiaë titulis plus debemus vel solemus diligere matrem. Tum quia magis amantem debemus magis diligere: mater autem plus ordinariè diligit filium quàm pater, quia mater in generatione & educatione filii magis laborat, quàm pater; & aliunde melius & certius sit filium esse suum & legitimum. Sic etiam maritus, tamen amore appretiationis magis diligit parentes, utpote habentes rationem principii & eminentioris boni, nihilominus amore teneritudinis & conjunctionis diligit intensius uxorem, cui ut uni carni conjungitur, secundum illud Matth. 19. *Iam non sunt duo, sed una caro.* Unde & deserit homo patrem & matrem, ut adhæreat

reat uxori. Sic demùm licet amore appretiationis magis diligamus benefactores; qui cùm sint principium boni nobis collati, excellentioris boni rationem habent: attamen magis amore intensiōis diligimus beneficiatos, seu illos quos beneficiis demeremur, & nobis quadantenus donorum compedibus devincimus, ut probat quatuor egregiis rationibus S. Thomas art. 2. *Primò, quia beneficiatus est quasi quoddam opus benefactoris, unde consuevit dici de aliquo, Iste est factura illius: naturale autem est cuilibet, ut diligat opus suum, sicut videmus quod Poëtæ diligunt poemata sua; & hoc ideo, quia unumquodque diligit suum esse, & suum vivere, quod maximè manifestatur in suo opere. Secundò, quia unusquisque naturaliter diligit illud, in quo inspicit suum bonum. Habet quidem & benefactor in beneficiato aliquod bonum, & è converso; sed benefactor inspicit in beneficiato suum bonum honestum, & beneficiatus in benefactore suum bonum utile. Bonum autem honestum delectabilius consideratur quàm bonum utile; tum quia est diuturnius, utilitas enim citò transit, & delectatio memoriæ non est sicut dilectatio rei præsentis; tum etiam, quia bona honesta magis cum delectatione recolimus, quàm utilitates quæ nobis ab aliis provenerunt. Tertiò, quia ad amantem pertinet agere; vult enim, & operatur bonum amato: Ad amatum autem pertinet bonum pati (seu recipere.) Et ideo excellentius est amare; & propter hoc ad benefactorem pertinet ut plus amet. Quirò, quia difficilius est beneficia impendere, quàm recipere: ea verò, in quibus laboramus, plus diligimus; qua verò nobis de facili proveniunt, quodammodo contemnimus. Quin-*

tam rationem addit *ad 1.* quia licet ex Augu-
stino *lib. de catechizandis rudibus, cap.4.* nulla
major sit provocatio ad amandum,quàm præve-
nire amando, nimis enim durus est animus, qui
dilectionem etsi non vult impendere, nolit re-
pendere: tamen quia in benefactore prævenien-
te aliquid est unde beneficiatus provocetur ad
ipsum amandum, benefactor verò diligit benefi-
ciatum, non quasi provocatus ab illo, sed ex seip-
so motus, & aliunde quod est per se, potius est eo
quod est per aliud; ideo benefactor magis dili-
gere censendus est. Hinc est quod amor benefi-
ciati ad benefactorem est magis debitus, & ideo
ingratitude habet rationem majoris peccati:
sed amor benefactoris ad beneficiatum est ma-
gis liber & spontaneus, & gratuitus, & ideo
majorem promptitudinem, & majorem inten-
sionem per se habet.

Dices: Secundum unamquamque amicitiam
illud est magis amandum, quod magis pertinet
ad id supra quod amicitia fundatur; unde ami-
citia naturali magis diligimus eos qui sunt no-
bis secundum naturam conjunctiores: sed ami-
citia charitatis fundatur super communicatio-
ne beatitudinis, ad quam magis pertinent me-
lio- res quàm naturâ conjunctiores: ergo ex
charitate debemus magis diligere meliores
quàm conjunctiores.

Respondeo, in dilectione charitatis duplicem
inveniri amorem appretiati-onis scilicet, & inten-
sionis; primus est major vel minor pro majori
vel minori dignitate objecti; secundus verò est
intensior vel remissior pro modo conjunctionis
amati ad amantem. Itaque meliores, utpote
Deo propinquiore, magis appretiative diligi-
mus,

mus, majusque proinde bonum illis ex charitate volumus: quia licet bonum quod omnibus vult charitas, scilicet beatitudo æterna, sit unum secundum se, habet tamen diversos gradus secundum diversas beatitudinis participationes diversitati meritorum ex divinæ justitiæ distributione correspondentes. Cum his tamen stat, quod conjunctiores intensius amamus, quia intensio dilectionis per comparisonem ad diligentem attendenda est: sicut motus habens speciem ex termino intensiorem velocitatis sortitur ex dispositione mobilis, & virtute moventis. Et hoc est, quod tam frequenter repetit D. Thomas in quest. 26. dum ait: *Charitas non solum elicit actum dilectionis secundum rationem objecti, sed etiam secundum rationem diligentis.* Et iterum: *Gradus dilectionis ex duobus pensari potest; uno modo ex parte objecti, & secundum hoc id quod habet majorem rationem boni, & quod est Deo similis, est magis diligendum: alio modo computatur gradus dilectionis ex parte ipsius diligentis, & sic magis diligitur quod est conjunctius.*

Instabis: Charitas cum sit participatio divinæ voluntatis, & donum præcipuum spiritus sancti, divinis debet potissimum inclinationibus conformari: sed Deus semper diligit meliorem, nullâ habitâ ratione conjunctionis; unde Christus magis sanctiores discipulos, vel de Gentibus conversos diligebat, quàm consanguineos, vel Judæos perversos. Ergo homo per charitatem magis meliores quàm conjunctiores debet diligere.

Respondeo, charitatem satis inclinationi divinæ voluntatis per hoc conformari, quod me-

liores amore appetiatiuo magis diligat. Accedit, in Deo non posse distinguere duplicem illum amoris gradum petiit ex bonitate objecti & conjunctione amati, quia qui melior est, Deo conjunctior est, & etiam Christo, qui dicebat: *Qui facit voluntatem Patris mei, hic mater, frater, & soror est.* Cum quibus stat, Christum ut hominem Judæos speciali dilectione, & dilectionis intensione & beneficentia aliis prætulisse: nam & illis prædicavit, & apud illos miracula patravit, & totius vitæ, conversationis, mortis, & resurrectionis beneficia illis primùm contulit. Addit etiam D.Thomas *art.9. ad 2.* quod licet charitas divinæ voluntati conformetur quantum potest, non tamen exigit hæc conformitas, ut eadem quæ Deus vult, & eodem modo velimus. *Quidam enim, inquit, possumus ex charitate velle, quia sunt nobis convenientia, qua tamen Deus non vult, quia non convenit ei, ut ea velit.* Quia nimirum particularis provisor alia velle debet quàm generalis, qui toti debet consulere universitati. Sic filius ex charitate erga patrem conatur servare illum incolumem, & à morte liberare, quem tamen Deus vult morti tradere. Sed de his fusiùs tomo superiori. Charitas ergo facit hominem conformari divinæ voluntati secundum proportionem, ut scilicet ita se habeat homo ad id quod suum est, sicut Deus ad id quod suum est.

Urgebis: Charitas, utpotè donum spirituale, istas naturalis conjunctionis differentias parùm curare debet; & sicut spiritalem hominem constituit, spiritalem amorem dumtaxat inspirat, qui à natura, à carne & sanguine, à patria præscindere debet: ergo ordo, & inæqualitas charitatis

ritatis malè à nobis ex diversitate conjunctionis amati ad amantem petitus est, sed omnes quantum ad effectum peræquè diligendi sunt, quanvis secundùm exteriorem effectum quidam possit ordo stabiliri, quatenus exteriora beneficia magis proximis impendere deceat, quàm alienis. Unde Augustinus lib. 1. de doctr. Christ. cap. 28. *Omnes homines, inquit, æquè diligendi sunt. Sed cum omnibus prodesse non possis, his potissimum consulendum est, qui pro locorum, vel temporum, vel quarumlibet rerum opportunitatibus constri-*

ctiùs tibi quasi quadam sorte iunguntur. Respondeo, gratiam perficere naturam, unde non minus est ordinatus affectus charitatis quàm est inclinatio gratiæ, quàm appetitus naturalis; qui est inclinatio naturæ, cum utraque inclinatio ex divinæ sapientiæ ordinatione procedat. Videmus autem in naturalibus, inquit S. Thomas art. 6. quòd inclinatio naturalis proportionatur actui vel motui, qui convenit naturæ uniuscujusque; sicut terra habet majorem inclinationem gravitatis quàm aqua, quia competit ei esse sub aqua. Oportet ergo quod etiam inclinatio gratiæ, quæ est effectus charitatis, proportionetur his quæ sunt exteriùs agenda: ita scilicet ut ad eos intensiorem charitatis affectum habeamus, quibus convenit nos magis beneficos esse. Et ideo dicendum est, quod etiam secundùm affectum oportet magis unum proximorum quàm alium diligere. Et ratio est, quia cum principium dilectionis sit Deus, & ipse diligens; necesse est quod secundùm propinquitatem majorem ad alterum istorum principiorum major sit dilectionis affectus: Non est ergo carnalis, sed spiritalis charitatis dilectio, tametsi alios aliis intensius, & conjunctiores arctius;

diligat, quia & omnibus indiscriminatum beatitudinis bonum operatur, & meliores amore appetitionis antepōnit, majusque bonum eis vult, majorem scilicet beatitudinis participationem. Observat etiam S. Thomas *art. 10.* quod licet per se loquendo amor intensior sit erga conjunctiores arctior, firmior, & sensibilibior; potest tamen interdum in conjunctioribus *tanta esse distantia virtutis & malitia, ut amicitia solvatur vel minuat*, ut Philosophus dicit in 8. *Ethic.* Et ideo, ut Ambrosius dicit: *Beni domestici sunt malis filiis prapenendi.* Quā notandissimā doctrinā patet etiam major solutio ad id quod suprà de Christo Gentes Judæis præferente objiciebatur: quia tanta erat in istis malitia, ut amicitiam ad illos sin solvi, certè minui necesse erat.

Insistes: Si ordo charitatis à nobis constitutus esset legitimus, & inæqualitas sacræ amicitiae non solum ex objecti diversâ bonitate, sed etiam ex arctiori conjunctione peteretur, ordo etiam charitatis, qui ad illius perfectionem non parum conducit, ibi remanebit. Atqui ordo charitatis à nobis stabilitus non remanet in Patria; quia cum tota ratio dilectionis in Patria Deus sit, qui erit omnia in omnibus, ille magis diligetur, qui erit Deo propinquior; unde meliorem magis diligit quàm seipsum, & extraneum sanctiorem magis quàm conjunctum minus sanctum, illique magis & majus bonum volet, ut per omnia divinæ voluntati consummata charitas conformetur, quæ cum perfecta est, plus potiora bona, & minus minora diligit. Ergo ordo charitatis malè à nobis est cum D. Thoma constitutus.

Respon

Respondeo, quod cum natura non destruat per gloriam, sed perficiatur, & consummetur; ordinem charitatis, in natura à Dei sapientia ordinata fundatum, in patria, ubi nullus horror, nulla confusio, sed sempiternus ordo inhabitat, remanere fatendum est. Cum enim ibi remaneat, & clarius appareat primum dilectionis principium Deus facie ad faciem visus, totoque voluntatis eo fruētis impetu dilectus, necellum est ut ibi maximè charitas servet ordinem, qui secundum comparisonem ad unum principium potissimè & unicè attenditur. Et quia non omnes beati æqualiter se habent ad Deum, sed quidam per abundantius beatitudinis participium sunt ei propinquiore, idè beatiores magis diligeret, majusque bonum eis Sanctus quisque volet, altiore scilicet beatitudinis gradum, juxta modum à divinæ justitiæ æquissima distributione præfinitum; nec celsiorem sibi, vel aliis gradum optabit, quia tunc non merendi, sed fruendi tempus erit in mansione divinitus determinata. Insuper, quia homo est principium dilectionis, non poterit se homo ex charitate non diligere, & plus cæteris diligere, cum amor fortiùs, & suaviùs ad illud feratur unde procedit, & intimiùs in illud propendeat in quo vivit. Præsertim quia ad hoc donum charitatis unicuique potissimùm confertur, ut primum mentem suam in Deum ordinet, quod pertinet ad dilectionem suam, & deinde ordinem aliorum in Deum velit, & pro virili operetur. Hinc est quod homo in patria post Deum seipsū maximè diligit: & quia non cessabunt, vel aberunt ab animo Beati honestæ dilectionis causæ, Beatus sibi conjunctos pluribus modis diligeret, & per ordi-

nem ad Deum charitatis & beatitudinis fontem, & per ordinem ad seipsum actus dilectionis causam efficientem. Veruntamen, quia tota vita beata in ordinatione mentis ad Deum consistit, & quia etiam in patria cessabit provisio præsentis vitæ necessaria, qua quis magis sibi conjuncto consulit, ratione cujus ex ipsa inclinatione charitatis homo sibi conjunctiorem amplius & intensius diligit; ideo totus ordo beati amoris per ordinem ad Deum observabitur, & ille omnibus modis magis diligetur, qui erit beator, quia propinquior sibi ille ab unoquoque habebitur, qui erit Deo similior; unde omnibus naturalibus dilectionis motivis & rationibus ex diversæ conjunctionis necessitudine petitis præferetur incomparabiliter ratio dilectionis ex propinquitate ad Deum desumpta.

Perfistes demùm: Tota illa de ordine charitatis à S. Thoma constituta doctrina acceptionem personarum videtur inducere, quam idem sanctissimus Præceptor inferiùs q. 63. validissimè à se confutatam reprobatur & condemnat. Etenim in hoc consistit virus seu malitia acceptionis personarum (quo vitio mundus laborat universus) quando impenditur alicui bonum non propter meritum & condignitatem personæ, sed propter rationem aliunde petitam & ad gratiam collatam impertinentem. V. g. si Prælatus, vel Cancellarius Universitatis promoveat aliquem ad Magisterium propter scientiæ & eruditionis sufficientiam, tunc attenditur causa debita, non persona: si autem illum promoveat, quia est dives, vel consanguineus suus; tunc est acceptio personæ, quia divitiæ vel consanguinitas sunt ad promotionem & gradum Magisterii impertinentes.

nentes ; & peccatum tunc contra justitiam distributivam committitur, illius enim virtutis est diversis personis diversa tribuere secundum proportionem ad dignitates personarum : unde dicitur, quod justus iudex causas discernit, non personas. Atqui in ordine charitatis à nobis instituto manifestè committitur personarum acceptio, cum amorem, qui primum & maximum donorum est, magis parentibus, filiis, consanguineis, concivibus, commilitonibus, confratribus impendamus : Ergo ordo charitatis à nobis institutus vitiosus est, & magis perversitas ordinis dicendus est.

Respondeo, nullatenus ab ordine charitatis à nobis post S. Thomam concinnato vitii acceptionis personarum labes contrahi. Tum quia dilectionem charitatis in amorem appretiationis ex objecti dignitate petitur, & in amorem intensioris serió distinximus : & licet ipsum posteriores conjunctionibus justè impendamus, illum tamen melioribus, ut par est, reservamus, eisque majus bonum, majorem scilicet beatitudinis gradum, ut servetur justitia distributiva, concupiscimus. Nec propterea personas accipimus, dum natura vel aliis necessitudinis vinculis conjunctiores intensius & tenerius diligimus ; quia ut benè observat D. Thomas quæst. citata, art. 1. *Contingit aliquam conditionem persona facere eam dignam respectu unius rei, & non respectu alterius. Sicut consanguinitas facit aliquem dignum ad hoc, quod instituaturs hares patrimonii, non autem ad hoc ut conferatur ei prelatus Ecclesiastica. Et ideo eadem conditio persona in uno negotio considerata facit acceptionem personæ, in alio autem non facit.* Unde etiam art. 4,

eiusdem.

eiusdem q. & q. 58. art. 10. ad 3. & q. 61. ant. 2. ad 3. monet S. Doctor, quod diversitas personæ inducit sæpe diversitatem rei & causæ: unde gravior est injuria, graviusque punienda, quæ infertur Principi quàm plebeio. Ex quibus patet, interdum ex ipsa persona oriri aliquam causam, ob quam alteri præfertur: conjunctio autem personæ amatae cum amante justè exigit arctiorem amorem, quia cum homo seipsum primò & intimiùs post Deum diligat, æquum est, ut sibi conjunctiora, quasi aliquid sui, magis & arctiùs amet. Certè si *consanguinitas facit aliquem dignum ad hoc, quod instituaturs hæres patrimonii*, quidni ad hoc, ut sit particeps specialioris amoris?

Altera ratio convincens in constituto à nobis ordine charitatis nullam committi acceptionem personarum, est quia ut docet D. Thomas q. 63. art. 1. ad 3. *duplex est datio: una quidem pertinet ad justitiam, quâ scilicet aliquis dat alicui quod ei debetur; & circa tales dationes attenditur personarum acceptio: alia est datio ad liberalitatem pertinet, quâ scilicet gratis datur alicui quod ei non debetur: & in hac donatione non habet locum acceptio personarum; quia quilibet absque injustitia potest de suo dare quantum vult, & cui vult, secundum illud Matth. 20. An non licet mihi quod volo facere? Tolle quod tuum est, & vade.* Quibus verbis liquet hominem peccaturum quidem peccato acceptionis personarum, si charitatem, quam omnibus debet, alicui denegaret, vel si nollet aliquem diligere, nisi quia consanguineus, vel alio necessitudinis vinculo sibi devinctus est. Cæterum teneriorem amoris suavioris & juxta familiarioris sensum omnibus peræquè impendere nec possu-

possumus, nec debemus: unde unum præ alio ratione conjunctionis vel amicitiae intensioris amoris affectu absque ulla acceptionis personarum labe prosequimur.

R E F L E X I O.

Quatuor sunt diligenda, ut monet August. *lib. 1. de doctr. Christ. cap. 29.* Unum, quod est supra nos, scilicet Deus: alterum, quod nos sumus: tertium quod juxta nos est, scilicet proximus: quartum, quod infra nos est, nimirum corpus proprium. Amicitia quippe charitatis supra beatitudinis æternæ futuram communionem fundata unum considerat ut principium influens beatitudinem, scilicet Deum bonitatis totius fontem: aliud ut beatitudinem divinam participans, scilicet semetipsum: aliud ut ejusdem beatitudinis socium, Angelum scilicet, & alium hominem: aliud demum ut beatitudinis propriæ accidentale complementum, scilicet corpus proprium, in quod beatitudinis essentialis plenitudo redundans derivatur. Primum diligitur ut causa beatitudinis, secundum ut subiectum felicitatis, tertium ut commercium beatæ societatis, quartum ut participium & extensio beatitudinis. Et tamen, ô perversitatem ordinis minimè tolerandam! ab amore corporis incipit ferè omnis homo: homo, inquam, cujus Pater Deus est, cujus hæreditas regnum cælorum, cujus felicitas summum & omne bonum. Hinc est, quod malorum omnium summum & summam, peccatum intelligo, non timent, & illud sicut aquam bibunt. Hinc, ut observat Salvianus, omnia amant, omnia æstimant, *Solus Deus* (quæ est.

est indignitas indignitatum) in comparatione aliorum illis vilis est. Hinc minimum corporis, cujus sunt idololatræ, damnum, summam reputant miseriam; & crucem ac tribulationem, in quibus Christus discipulorum suorum felicitatem posuit, extremæ habent miseriæ loco. Hinc ut lepidè & juxtà præclarè observavit Catechism. Roman. *part. 4. cap. 16. n. 3.* contra Christi Domini jussu præpostero utuntur ordine precationis, & orationem inde semper incipiunt, unde eam terminare debuissent: liberationem à malo, quæ est petitionum ultima, & primò, & semper, & solùm postulant; sanctificationis verò nominis divini, adventus regni, divinæ voluntati conformitatis, à quibus exordiri tenentur, nec meminisse dignantur. *Qui jussit nos ad se confugere in die tribulationis* (verba sunt libri laudati) *idem orationis ordinem nobis præscripsit: voluit enim, ut priùs quàm precaremur, ut nos liberaret à malo, peteremus uti nomen Dei sanctificaretur, & adveniret regnum ejus, & reliqua postularemus, quibus quasi gradibus quibusdam in hunc locum perveniretur. Sed quidam si caput, si latus, si pes condoluit, si rei familiaris jacturam faciunt, si mina, si pericula ab inimicis intenduntur, in fame, in bello, in pestilentia, ommissis mediis dominica precationis gradibus, tantùm petunt ut ex ullis eripiantur malis. At huic consuetudini repugnat Christi Domini jussu: Querite primùm regnum Dei.* At verò hujus sæculi adscriptitii, & nomine tenus Christiani regnum mundi, regnum carnis inquirentes, ventrem pro Deo habentes, totum charitatis ordinem pervertunt, rationis etiam leges susque deque miscent. Usquequò, Christiane, tam malus æstimator, tam

insul

insulsus mercator, tam iniquus iudex eris? Uti-
que quod corpus animo; concupiscentiam ratio-
ni, te ipsum Deo impiè juxta, & iniuste præpo-
nes? *Quid est quod velis habere malum?* (verba
sunt Augusti. in quodam serm.) *Dices mihi nihil
omnino, non uxorem, non filium, non filiam, non
servum, non ancillam, non tunicam, postremo non
caligam, & tu vis habere malam vitam?* Rogo te,
præpone animam tuam caligæ tue. Itane cæcus
& occæcatus, itane durus es & obduratus, ut ne-
scias quod nihil est aliud caro tua, quam adoras,
nisi spuma caro facta, de peccato nata, in pecca-
to nutrita, facta sordibus, ex omnium immundi-
tiarum colluvie conflata, irretita vitiis, pruriens
concupiscentiis, occupata passionibus, polluta
illusionibus, in malum prona, in bonum tarda.
Nihil aliud, inquam, est caro, quàm sperma fœ-
tidum, saccus stercorum, cibus vermium; post
hominem vermis, post vermes fœtor & horror,
ut in non hominem vertatur omnis homo car-
nalis, & in limum transeat sterquilinium. Sed
parum esset quod esset misera, nisi etiam foret
inversa; quocumque enim pergimus, nobiscum
inimicum. quod corpus est, portamus, ubique
laqueum nostrum nobiscum gestamus, ubique
hostem circumferimus.

Sed esto, per me licet, ames corpus; sed ff
illud amas, si illi consulis, æternæ illius provide
felicitati. An nescis præclarum illud Chrysost.
lib. de recuper. lapsi: *Si animam negligamus,
nec corpus saluare poterimus. Non enim anima
pro corpore, sed corpus pro anima factum est. Qui
ergo quod primum est, negligit, & quod inferius,
excollit, utrumque corrumpit. Qui verò ordi-
nem servat, & quod primum est colit, etsi negli-*

gat quod secundum est, per primi salutem saluabitur & secundum. Ergo ordinem serva, corpus animæ, caro rationi, ratio Deo obsequatur: quæ supra te sunt, primò inspicere; ad ea quæ intra te sunt, voluntatem & rationem, descende; ad ea quæ juxta te sunt, proximi nimirum salutem, deinde accede; & ultimò ad quæ infra te sunt corporis emolumenta convertere. Audi Bernardum: *Dominam ancillari, & ancillam dominari, magna abusio est.* Quod si Ecclesiæ Doctore non credis, audi Ethnicum, & erubescere: *Major sum, & ad majora natus*, aiebat Philosophus Moralis, *quàm ut mancipium sim corporis mei.* Contemptus corporis sui certa libertas est. Fateor nos gerere corporis nostri tutelam, sed non indulgendum illi est, serviendum nego. Sic nos gerere debemus, ut non tanquam propter corpus vivere debeamus, sed tanquam non possimus sine corpore. Circumscribe corpus tuum, & animo locum laxa. Corpus hoc animi pœna ac pondus est: premendo illo urgetur, in vinculis est. Sapiens itaque multùm cum meliore, ac divina sua parte versatur; cum hac querula ac fragili, quantum necesse est. Sursum animum vocant initia sua: erit autem illic etiam antequam hac custodia exsolvatur, si vitia sua deseruit, purusque ac levis in cogitationes divinas emicuit. Hæc variis in locis Seneca, quibus corpus animo servire, & animum interiori homini vacare, & interiori hominem sursum ad divina suspirare debere christianè & ordini charitatis consonè dixit. Pudeat impios post fidem eò non ire, quò ante fidem Philosophia pervenit.



AD LIBRVM VII.

Appendix unica:

S E V

Brevis de peccatis tractatio.

PRÆLOQVIVM.

QUIA contraria contrariis opposita magis elucescunt, splendenti virtutum materie obscuras subnectere peccatorum umbras, operæ pretium duxi. Porro etsi nulli tractatui minùs præfari congruat, quàm præfenti, quia nec sine fœtore commoveri sordes, nec sine inquinamento tangi pix, nec sine contagione pestis contrectari possunt: at tamen quia initium salutis notitia peccati est, & tam horrendum monstrum nosse sit penè vicisse; de illo expedit verba facere, de quo non licet ad concupiscendum cogitare. Certè sicut olim prompta adversùs serpentis morsum medela viso serpente conferebatur, tamque cita erat salubritas medicandi, quàm velox aderat felicitas intuendi: sic dum crimen criminis ductâ picturâ odium sui ingenerat, & hor

horrorem, peccatum peccati cognitione curatur, ut illud idem, quod malè cogitatum impulerat in perditionem, benè in amaritudine animæ recogitatum gradus sit ad salutem. *Tu peccatum tuum ante faciem tuam converte* (inquit August. in Psal. 50.) *si vis ut inde Deus faciem suam avertat. Nam si agnoscis & ille ignoscit.*

Agedum ; ergo, Lector, de peccatis disputationem, ut peccatum nostrum contra nos sit semper : peccatorum recordemur, ut illorum obliviscatur Deus, qui dixit : *In quacumque die ingemuerit peccator, omnium iniquitatum illius non recordabor amplius.* Tanti mali, & puri mali deformitas ob oculos cordis versetur semper, insit memoriæ, mente revolvatur, non ut facultates animæ ingenua turpitudine decoloret, sed ut in interiori animi judicio accusetur, damnetur, puniatur. Sicut enim venenum malâ hostium fraude propinatum, rursus veneno artificiosè elaborato expellitur, sitque medicina salutis exterminium sanitatis : ita planè peccatum dæmonis humani generis hostis fraude irrepens, à nobisque imprudenter obbibitum, iterum cordis cum dolore cogitatum mundatur, extinguitur, aboletur. *Ipsa est prima hominis justitia* (inquit August. in Psalm. 84.) *ut sentias te malum, & faciat te Deus bonum : ipsa sit via Deo ut veniat ad te Deus. Confitere vitam, & aperiis viam.*

Sed quomodo, inquires, monstrum illud ante oculos expandemus, quod committi quidem potest, describi certè non potest ? *Quis revelabit faciem indumenti ejus*, inquit Job, *& in medium oris ejus quis intrabit ? Portas vultus ejus quis*

*quis aperiet? Quâ quæso, arte, quo calamo, quo penicillo, quibus coloribus repræsentare licet portentum illud atramento atrius, nocte obscurus, inferno horribilius, merum non ens, infame nihilum, & ad nihilum nescientes redigens, qui se amarunt? Fateor equidem: nam in privatione peccati malitiam superiori tomo constituimus. Verùm quia privationes per formas oppositas agnoscimus, & iterum quia peccatum, tametsi vultu careat, faciem tamen ementitur blandam illam quidem & amœnam, ut incautos alliciat; exponenda est peccati & arri-
dentis nequitiae facies quidem læta, sed calamitatis abstrusæ illecebris fallens, quæ teste Cypriano *epist. ad Donatum*, instar cujusdam veneni, ubi in lethales succos dulcedine aspersa, calliditate fallendi, sapore medicato, poculum videtur esse quod sumitur, ubi epotaveris perniciēs hausta grassatur. Hac de causa primùm de peccato in genere, deinde de speciebus peccatorum in speciali, tum de causis eorum, denique de effectis putido de fonte manantibus sermonem instituemus. *Peritus medicus*, inquit Chrysost. *serm. 44. qui plenam agris desiderat conferre medicinam, impuritatis profundos patefacit recessus, opertos peccatorum nudat morbos, impietatis ostendat secretum virus, vitiorum naturas, origines delictorum, radices criminum mirabili ratione depromit.**



DISSERTATIO I.

De vitiis & peccatis generatim.



R o eodem in solito loquendi modo vitium & peccatum usurpantur, tametsi nomina illa strictè sumpta diversa significant: vitium namque habitum vel dispositionem permanentem; peccatum verò actum pravam, vel ab habitu prodeuntem, vel habitum generantem rigorosè importat. Sicut enim tria in virtute reperire est, essentiam nimirum, qua aliquis convenienter se habet secundum modum suæ naturæ; bonitatem ad modum proprietatis consequentem, siue bonitas propriè & physicè, siue latè duntaxat, logicè, & secundum nostrum concipiendi modum consequatur; & denique actum, ad quem virtus ordinatur, cum unumquodque sit propter suam operationem: ita servatis servandis de malo discurremus; essentia quippe virtutis opponitur vitium, quod malam sonat subjecti dispositionem; bonitati malitia adversatur, dum eâ privat; bono verò operi correspondet peccatum. Quorum omnium radix est, quia habitus cum bonus, tum malus dicunt triplicem habitudinem, ad subjectum nimirum quod disponunt; ad rationem, cui conformantur vel dissonant; & ad actus nefandos, quorum sunt principia.

Juxta

Juxta hanc non contemnendam divisionem, primò vitii, seu peccati habitualis contrarietates; deinde malitiæ, tam peccati commissionis, quàm omissionis deformitates; tertio peccati actualis distinctionem generalem in hoc capite speculabimur, in sequenti de specialibus eorum divisionibus acturi.

CAPVT I.

*Peccatorum contrarietas, deformitas,
& malitia exponuntur.*

DE existentia peccatorum nullus Theologus disputat, nullus unquam Philosophus dubitavit. Quavis enim Stoïci virum bonum eò usque perducere affectum velint, ut non tantum peccare non optet, sed etiam non possit; illum tamen etiam laternâ quæsitum invenire non potuerunt viri turgidi, & mentem chimæris pascentes. Quare statim ad peccati essentiam considerandam nos accingimus, quæ ex contrarietate ad virtutem, cui adversatur, magis innotescet. Sit ergo

SPECVLATIO I.

Vitii, seu peccati habitualis horrores, & contrarietates representantur.

Verè dicebat Propheta : *peccatum meum contra me est semper.* Verè etiam Patres peccatum dicunt esse *nihilum armatum* ; nihil enim est quod non aggredi moliatur ; nihil cui bellum non indicat. Hominem pugnis intestinis interfecat, homines impetit, in superos tela vibrat, Acheronta movet. Naturam debilitat, gratiam extinguit, rationem floccifacit, virtutes ad imis subruit fundamentis. Decurramus, quæso, communis hostis insultus, ut victoriam de eo, totque triumphos, Deo donante, reportemus, quot molitur hostilitates : justum namque est, ut sicut manus ejus contra omnes, ita manus omnium contra ipsum armentur.

Prima vitii hostilitas.

Primò ergo vitium propriè & strictè contrariatur virtuti, virtus enim & vitium sub eodem genere habitus maximè distant, & ab eodem subjecto se expellunt, ut constat experienciâ, qua videmus accrescente habitu virtutis decrescere vitium, & istius pariter augmento illam minui. Ergo vitium & virtus sunt verè contraria, unde & nominibus contrariis explicantur, virtus enim justitia, vitium injustitia ; virtus æquitas, vitium iniquitas appellantur. Quod satis opportunè explicant

explicant aliqui exemplo Esaii & Jacob, qui licet fratres essent, simul tamen esse non poterant.

Dices: Idem habitus potest transire de bono in malum, v.g. postquam quis diu ex malo sine jejunavit, si depuratâ intentione jejunia frequenter, facilitas abstinendi initio mala, fit intentionis mutatione sancta: Ergo vitium & virtus non se mutuò expellunt à subjecto, nec sunt contraria.

Respondeo, abstinendi facilitatem pravis actibus comparatam, nunquam virtutem evadere, nec principium directum operis boni; indirectè tamen ad virtutem generandam viam parare, quatenus removet impedimenta, quibus ablatis citò generatur habitus temperantiæ uno aut altero actu; quia pro majori vel minori impedimentorum obstaculo acceleratur vel retardatur virtutum casta generatio.

Instabis: Idem actus sæpe de bono fit malus, quidni similiter idem habitus moralis de perverso in bonum convertetur? Sicut in habitibus intellectualibus idem de obscuro in clarum transit, ut patet in Theologia, quæ in via fidei subordinata obscuritatem sortitur, in patria verò perseverans claritatem participat visionis.

Respondeo, magnum interesse discrimen inter actus & habitus, & iterum inter habitus speculativos & morales; inter actus quidem & habitus, quia licet multi probabiliter doceant, non posse eundem actum de bono transire in malum, quia variato intellectus judicio, variatur si necessariè, certè regulariter motus voluntatis: dato tamen actum bonum posse malum evadere, haud rectè tamen idem de habitu colligitur;

quia tametsi non sit inconueniens, eundem actum modò rectè, modò perversè tendere in objectum pro diversitate iudiciorum practico- rum: attamen! habitus est essentialiter determinatus ad producendos actus similes illis, à quibus! est genitus, aliàs produceret quod non haberet, & causa non intenderet sibi assimilare effectum, quod tritæ Philosophorum maximæ ad- versatur. Habitus ergo ex pravis actibus, pravis- que motivis generatus quid potest nisi malos actus parere, cum nec arbor mala bonos fructus facere, nec putrida radix plantas salubres possit emittere? Unde etiam patet disparitas quæ ha- bitum moralem inter & speculativum interce- dit: etenim habitui virtutis sin essentialis, certè intrinseca est & inseparabilis, cum virtus sit bo- na qualitas mentis, qua rectè vivitur, quæ bonum facit habentem, & opus ejus bonum reddit. Quod idem dic, proportionè servata, de vicio, cum contrariorum eadem sit disciplina. Cæte- rum claritas, vel obscuritas per accidens ratione diversæ subjecti dispositionis contingunt, ut pa- ret in Theologia, quæ ad obscuritatem, vel clari- tatis evidentiam apta est pro diversitate status viatoris vel comprehensoris, ut ex dictis initio Theologiæ satis, superque liquet.

Pro solutione aliarum objectionum nota pri- mò, quod licèt teste Aristotele uni non sit nisi unum contrarium, hoc tamen non impedit quo- minus uni virtuti plura vitia opponantur, quia extrema illa vitia uni, eidemque virtuti opposi- ta in genere moris, sunt quid unum dissonans rationi, & virtuti contrarium.

Nota rursus, quod licèt sint aliqua vitia, quæ non habent virtutem strictè sumptam sibi op- positam,

positam, ut inverecundia, seu impudentia, & incontinentia, quia verecundia & continentia non sunt strictè virtutes, secundum Aristotelem & D. Thomam; illa quidem, quia potest esse cum turpi facto, nec operatur intuitu honestatis, sed dedecoris; ista verò, quia potest esse cum passionibus immoderatis. Licet, inquam, hæc ita sint, id tamen nequaquam veritati nostræ sententiæ adversatur; tum quia verecundia & continentia, ut pertinent ad voluntatem, sunt virtutes imperfectæ, quod sufficit; tum quia non oportet, ut omne illud, cui directè opponitur vitium, sit virtus, quanvis omne vitium opponatur virtuti, saltem originaliter: sicut inverecundia impudorata, in quantum ex nimio turpitudinis amore pariente quasi ex adipe iniquitatem, vel nimio elevationis & superbiæ semper ascendentis ambitu, opponitur temperantiæ, vel humilitati.

Secunda vitiorum hostilitas.

Secundò vitia non solum virtutibus acquisitis, sed etiam infusis adversantur. Explicatur, & probatur. Virtus naturalis & infusa in hoc conveniunt, quod utraque respicit idem objectum materiale, sub ratione tamen formali diversa: v.g. temperantia acquisita & infusa eundem moderantur ciborum usum; sed illa ratione boni naturalis, putà sanitatis honestè conservandæ; ista ratione subjectionis carnis ad spiritum & legem Dei, ut corpus in servitutem redactum christiana animi exercitia non impediat, à cibis abstinet immoderatis. Sed hoc non impedit, quominus intemperantia naturalis illud tollat, in

quo conveniunt temperantia acquisita & infusa, ciborum nimirum moderationem. Ergo necessarium, cum acquisita, tum infusæ virtuti vitium opponitur, cum eliciat actus oppositos, eamque à subjecto expellat rationem, putà moderationem, sine qua virtus temperantiæ non consistit. Hæc tamen oppositio non est directa & immediata, quia non est inter objecta formalia, nisi fortè intemperans eo fine vino & cibis plus iusto indulgeret, ut lege Dei violatâ divinorum contemplationem præpediret, & christianæ vitæ castimoniam gulæ sordibus infuscarer. Immo quia in actu exercito id vitium efficit, tamen si peccator in actu signato non prætendat, ideo simpliciter dicendum est, vitium virtutibus infusis contrariari.

Quæ doctrina adeo vera est, ut non solum in eximio elevationis statu, in quo conditi sumus, vitia quæque specialiter virtutibus infusis repugnent propter subordinationem finis naturalis ad supernaturalem, ratione cuius nequit homo à fine naturali deciscere, quin à supernaturali retrocedat: sed etiam in homine in puris naturalibus constituto vitia cum virtutibus infusis oppositionem habuissent; quia vitia quæque ob ingenitam malignitatem sunt per se destructiva materiæ virtutis infusæ, eamque per se expellunt, si inveniunt: quod autem in aliquo statu inveniantur, vel non inveniantur, per accidens est. Sicut licet frigus non possit recipi in igne, tamen calor ignis est verè contrarius frigori aquæ, quia absolute se expellerent, si possent eodem in igne subjectari. Sed hæc magis elucidabuntur, quando explicabimus quomodo vitia virtutibus supernaturalibus adversa, naturæ etiam infusa

infensa sint ; ex his enim apparebit quomodo etiam illa quæ contra naturam sunt , ordini etiam supernaturali adversentur.

Sed inquires : In homine recens è luto peccatorum emerso remanent putredines vitiorum, habitus nempe illi perversi , quibus sicut ante justificationem, ita & post conversionem ad antiqua stercora nimium propendet ; & tamen Deus in justificatione pretiosa virtutum infusarum supellectile animam induit. Ergo vitia virtutibus acquisitis opposita compatiuntur in eodem subjecto virtutes infusas, quas proinde non expellunt , subindeque contraria non sunt.

Respondeo, contraria posse esse simul in gradu remisso, & præcipuè si alterum contrariorum sit in via corruptionis : constans autem est, post veram conversionem infusis virtutibus debilitari vitia, suffodi, & tandem evelli. Unde optimè observavit D. Thomas q. 1. de virt. art. 10. ad 16. quod licet per actum unicum non soleat corrumpi habitus vitii ; tamen actus contritionis virtute gratiæ habet quod corrumpat habitum vitii ; unde in eo qui habuit vitium intemperantiæ , cum sincerè conteritur , id est verè Dei gratiâ , & Sacramento pœnitentiæ mutatur , *non remanet habitus intemperantia cum virtute infusa in ratione habitus , sed in via corruptionis.* Quæ solida Angelici Doctoris verba , ut aliàs monuimus , nec iterare piget , indicant quàm suspecta sit innumerorum conversio , quàm falsa, quàm mutilata pœnitentia. Ille enim solus, & non alius verè conteri, verè confiteri , verè pœnitere censendus est , qui mutatur, in quo non remanent veteres habitus nisi in via corruptio-

nis. Ergone illi verè confessi sunt, qui sapiùs in peccata lethalia labuntur, & in quibus habitus pravi sunt quadantenus vegetiores? Quid quæso operatur in illis justificatio, quid contritio, quid attritio, quid confessio? Invenies Probabilistas illis quidem veniam dantes: sed ego timeo sacrilegium post Sacramentum. Nam ubi emendatio nulla, ibi pœnitentia vana. Et pœnitentem hominem dico, qui diligit quod antè neglexit, & quod mali fecerat, derelinquit, inquiunt Patres.

Unde non placet sententia P. Philippi, quem sequitur P. Gonet, existimantis in magnis peccatoribus conversis vitia acquisita cum virtutibus infusis sociari, putà in Maria Ægyptiaca, quæ post conversionem intensissimâ in intemperantiam inclinatione propendebat. Non placet, inquam, quia hæc doctrina S. Thomæ relato manifestissimè adversatur. Tum quia falsum supponit, nimirum in insignibus illis pœnitentibus, quales fuerunt Maria Magdalena, & Ægyptiaca, intensas & vehementes permanere in præteritis sordes propensiones; omnipotentissima enim Dei gratia & simul cor replebat divinorum delectationibus mandatorum, & terrenorum amarorem inspergebat; ut ibi superabundaret gratia, ubi delictum abundaret. Cujus signum optimum afferunt Patres petiti ex fervore dilectionis & operationis Mariæ pœnitentis, quo extinctas pravæ inclinationes demonstravit. Consideravit quid fecit, ait Magnus Gregorius, & noluit moderari quid faceret. Discite quo dolore ardet, quæ flere & inter epulas non erubescit. Quia semetipsam graviter erubescibat intus, nihil esse credidit quod verecundaretur foris. Quæ prius frigida

frigida peccando remanserat, post nodum amando fortiter ardebat. Quot ergo in se habuit oblectamenta, addit venerabilis Beda hom. 23. tot de se invenit holocausta. Convertit ad virtutum numerum numerum criminum, ut totum serviret Deo in pœnitentia quidquid ex se Deum contempserat in culpa. Idem dicendum de Maria Ægyptiaca, cujus pravos habitus non intensissimos, ut fingunt adversarii, sed post conversionem in via corruptionis extitisse demonstrat tam dura, tam austera pœnitentia voluntaria. Nec obest quod graves carnis stimulos in eremo senserit; nam illos virgo Paulus, & virgo Catharina Senensis dæmone instigante experti sunt.

Itaque post veram conversionem, & justificationis beneficium, non remanet ullus habitus pravus, aliàs voluntas posset dici bona & mala, & in malum, non minùs quàm in bonum peræquè propensa. Fateor tamen ex præcedentium malorum actuum frequentia quandam in peccata titillationem & internam tentationem permanere; sed ut dicebat D. Thomas, *in via corruptionis*; quia victrix gratiæ delectatio, si vera sit pœnitentia, falsam concupiscentiæ delectationem sin extinguit prorsus, certè domat & sensim absumit.

Tertia vitiorum hostilitas.

Tertiò omne vitium est contra naturam. Nam ut rectè discurret S. Thomas, illud est contra naturam hominis, quod est contra ordinem rationis: natura enim uniuscujusque potissimè per formam agnoscitur; forma autem hominis est anima rationalis. Atqui vitium est contra

ordinem rationis, sicut virtus est maximè juxta ordinem rationis; quid enim magis naturæ rationali consentaneum, quàm ducatum rationis sequi? quid magis dissentaneum quàm ab eo recedere? Ergo vitium omne est contra naturam, quia cuilibet homini quædam inclinatio insita est, ut secundùm rationem agat. Et certè si homo habet propensiones communes brutis, quia animal est, necessum est ut illi quæ homo & rationalis est, specialis conveniat inclinatio, quæ procul dubio in bonum honestum sponte sua fertur. Unde virtus est quadantenus hominì naturalis, non quòd sit illi essentialis, sed quia est in natura radicata, & hominem juxta naturæ suæ exigentiam disponit, ad idque inclinat, quod est naturali hominis formæ consentaneum. Unde Seneca epist. 122. *Omnia vitia contra naturam pugnant: omnia debitum ordinem deserunt.* Alia hujus veritatis ratio traditur ab eodem S. Thoma *quest. 85. art. 4.* quia omne cuiuslibet naturæ bonum in numero, pondere & mensura, in modo, specie, & ordine situm est: peccatum autem est privatio modi, speciei, & ordinis, quatenus vel illa minuit, vel penitus tollit: ergo peccatum est contra naturam. Vide ibi S. Doctorem.

Dices: Homo est naturaliter peccabilis hoc ipso, quod est ex nihilo: Ergo peccatum non contra naturam, sed in ipsa natura plantatum est.

Respondeo, quod licèt hominì è nihilo producto, & enti potenciali conveniat peccandi possibilitas, ipsum tamen peccatum eidem hominì ratione actualitatis ipsius, scilicet formæ, repugnat; & quia in composito actus & forma
præci

præcipuum locum habent, id quod est contra inclinationem formæ, contra naturam ipsam esse simpliciter dicendum est. Sicut licet mors sit juxta inclinationem materiæ compositi dissolutionem semper machinantis, quia tamen repugnat inclinationi formæ, quæ est principium existentie & perfectionis, ideo mors simpliciter inimica naturæ nominatur. Addunt aliqui, quod licet peccandi potestas sit homini connaturalis, peccatum tamen naturæ infestum est; quia licet quando potentia perfecta & bonis actibus fœta est connaturalis, actus etiam illius sint naturæ consoni: attamen quando potentia est defectiva, actus illius naturæ adversi sunt: sicut corruptibilitas est quidem homini naturalis, actualis tamen corruptio non modò non est naturalis, sed naturam destruit & evertit.

Dices iterum: Omnes fermè homines per viam latam, quæ ducit ad perditionem, incedunt; sensus etiam & cogitatio humani cordis in malum prona sunt ab adolescentia sua: ergo peccatum est juxta naturæ inclinationem, quæ ex his, quæ in pluribus contingunt, colligitur.

Respondeo fatendo in statu naturæ corruptæ majorem hominum partem post concupiscencias suas ire, & in hoc præsertim sæculo verius probari id, quod de suo lib. 6. de provident. dixit Salvianus: *Omnes admodum in perditionem ruunt, aut certè, ut aliud dicam levius, penè omnes. Ecce in quid recidimus, ecce in quid post illam Christiani populi puritatem, qua omnes quondam immaculati erant, ecce in quid reducti sumus, ut beatam fore Ecclesiam judicemus, si vel tantum in se boni habeat, quantum mali. Nam quomodo beatam non arbitremur, si mediam plebis partem*

658 *De peccatis. Dissert. I. Cap. I.*

haberet innoxiam, quam penè totam nunc esse plangimus criminofam. Non tamen propterea peccatum desinit esse contra naturam rationalem, tametsi sit juxta naturam brutalem, quæ post peccatum in homine dominatur, juxta illud: *Comparatus est jumentis insipientibus, & similis factus est illis.* Ad cujus evidentiam considerandum est, quod cum homo sit in consinio creaturæ spiritualis & sensitivæ, utriusque propensiones participat; imò & propter conjunctionem animæ cum corpore, ejusque ab eo dependentiam, non pervenit homo ad operationes rationis nisi per sensum; prius enim est quod animale, deinde quod spirituale. Hinc est quod homo sæpe allicitur, sæpe detinetur ab his à quibus incipit, non aspirans ad consummationem, finem in mediis quærit, nefanda perversitate utendis fruitur, & delectationibus sensus, quibus magis afficitur, ut plurimum inescatur; notioribus enim capimur, & sensibilibus irretimur, præsertim post primigenii peccati labem; quia infirmata vis rationalis, carnalis verò propensio immensum adaucta est. Addo inclinationem sensitivam non appetere malum ut malum, sed delectabile quærere ut sibi conveniens: ad rationem porro ut ad magistram spectare motus ancillæ moderari, & in officio continere; sicut si esset præceptum moriendi, illud refugeret naturalis inclinatio ad vitam prona, non ad peccatum sub ratione peccati.

Quam doctrinam adeò veram existimo, ut crediderim ipsa quoque vitia opposita virtutibus infusus esse contra naturam, ut de infidelitate docet D. Thomas 2. 2. q. 10. art. 1. & de simonia q. 100. art. 2. Quia recta ratio dicat, credendum esse

esse Deo revelanti, dicitur non esse vendendas res, quarum non sumus domini, quales sunt sacra. Quia ratione docetur in materia de Angelis, Angelos apostatas indirectè peccasse contra naturalia, quia recta ratio dicitur, obediendum esse superiori legitimè præcipienti. Hac etiam ratione docetur in tractatu de pœnitentia, secretum confessionis esse de jure naturæ, quæ omnibus inspirat nostræ fidei commissa servare.

Quorum omnium radix est, quia qui ponit obicem naturæ inferiori, ne perficiatur à superiori cui subordinatur, censendus est illi naturæ repugnare, eique contrarius esse: sicut qui fluxum & refluxum maris impediret, contra naturam aquæ ageret; non secundum se spectatam, sed prout mobilem à causa superiori, & ab impressionibus lunæ. Quia ergo homo in statu elevationis, in quo jam est, ordinatur ad supernaturalia, peccatum contra præcepta supernaturalia patratum, quod perfectionem naturæ consummativam impedit, contra naturam est. Certè sicut supposita revelatione hujus propositionis, *Christus est homo*, recta ratio dicitur, Christum non esse risibilem; supposita veritate Eucharistiae, ratio suadet Christum ibi esse adorandum: ita supposita revelatione fidei, & elevatione hominis ad statum supernaturalem, multa de illis recta ratio disponit. Hinc teste Augustino, virtutes supernaturales, licet formaliter non sint secundum naturam, sed supra illam, radicaliter tamen, & quadantenus juxta illam sunt, quia natura illarum capax est. *Posse habere fidem*, inquit libro de prædest. SS. cap. 5. *natura est hominum*. Ergo à contrario, peccata contra hujusmodi virtutes sunt contra naturam, quatenus ponunt

in natura impedimentum respectu gratiæ, quod non habet natura secundum se. *In natura humana est*, inquit S. Doctor 2. 2. q. 10. art. 2. *ut mens hominis non repugnet interiori instinctui, & exterioris veritatis predicationi : unde infidelitas secundum hoc est contra naturam.* Sunt tamen aliqua crimina, quæ specialiter peccata contra naturam dici solent, ut sodomia, & bestialitas, quia sunt contra ordinem ab auctore naturæ in generatione prolis præscriptum, de quibus impræsentiarum non disserimus.

Ex quibus patet, Thomistas illos, è quorum numero sunt Philippus, & Gonet, qui ex una parte nolunt vitia virtutibus infusis esse contraria, ex alia verò volunt vitia opposita virtutibus infusis esse contra naturam, non esse consequenter loquutos. Tùm quia si vitium repugnet ordini naturali, magis etiam se opponit & adversatur ordini supernaturali, qui perfectior est & purior, ac proinde vitii impatientior. Tum quia licet virtus infusa non sit debita naturæ hominis, unde ejus per se subiectum est potentia obediens : attamen virtutes infusæ sunt perfectiones naturæ rationali consentaneæ, ut ostendimus, nec inficiantur adversarii, quia nimirum inclinant ad actus rationi convenientes. Ergo quod opponitur perfectioni hominis naturali, & rationalem naturam destruit, maxime adversatur perfectioni naturam illam modo congruo perficienti; perfectivum enim naturæ, & si dicere fas est, imperfectivum naturæ maxime opponuntur, maxime distant, maxime se à subiecto expellunt. Tum quia, si vitia opposita virtutibus infusis sunt contra naturam, quia rectæ rationi adversantur, quomodo vitia naturalia, quæ illam

illam moderationem funditus evertunt, quam virtutes infusæ secum invehunt, & subjecto conciliant, ipsis virtutibus non adversabuntur, præsertim si sint intra ejusdem objecti materialis sphaeram? Quomodo ebrietas, v. g. temperantiæ infusæ non opponetur? cum illa destruat quod ista ædificat.

R E F L E X I O.

Si adversus hostem communem omnis homo miles est, unde est, unde quæso, quod adversus vitiorum hostilitates omnia susque deque miscentes, nullique parentes non modò arma non sumimus, sed ministramus? O miseriam lacrymabilem! ô miseriam luctuosam! ô cæcitatem incredibilem, & veram! Inimicum ultrò excipimus, amplectimur, fovemus, dum mala incessabiliter malis addimus, & peccatis peccata cumulamus. Unde est quod partem felicitatis libertatem esse peccandi arbitramur? Nam si Deus pacificos nobis dies, proventus uberes, divitem bonis omnibus tranquillitatem, & abundantiam dederit supra vota crescentem: tanta secundarum rarum prosperitate corrumpimur, tanta morum insolentium pravitate vitiamur, ut & Dei penitus obliviscamur & nostri. *Et cum omnem fructum*, inquit Salvianus lib. 6. de provid. data à Deo pacis in hoc consistere Apostolus dicat, ut quietam & tranquillam vitam agamus in omni pietate & castitate: ad hoc tantum datâ à Deo quiete utimur, ut in luxuria, ut in flagitiis, ut in rapinis, ut in omni scelere, atque improbitate vivamus. Quasi verò beneficium data pacis vacatio sit probrositatis, & ad hoc inducias tranquillita-

tis:

*ris Deo donante capiamus, ut licentius, securius-
que peccemus.*

Unde rursus est, quod nedum corrumpimur prosperis, sed adversis non corrigimur? Quare quos intemperantes pax longa fecit, turbatio non efficit moderatos? Quare viri divitiarum, qui avari in sanitate fuerant, infirmitatibus oppressi pejores fiunt & tenaciores? Quare tot videmus minùs everfos rebus, quàm moribus? Quare tot & tantis depopulatis jam, atque nudatis, aliquid superest de substantia, de christiana nihil superest disciplina? Gemit universa dudum Europa sub bellorum & tributorum pondere: anne propterea aliquid de luxu, de libidine, de conviviis, de fastu remissum est? Lugubre est referre quæ à testibus oculatis audiui annis præteritis de Metropoli Candia, quinque supra viginti annos continuos obfirmata crudelissimi Turcæ obsidione vexata. Ibi visi sunt viri honorati, & ætate provecti, & Christiani, & Catholici, imminente excidio civitatis, vel saltem impendente vitæ proximo periculo, inter æneorum tormentorum impetus & fragores gulæ & lasciviæ servientes. Quid in illis primum accusandum sit, nescio. An quod honorati, an quod provecti, an quod Christiani, an quod periclitantes? Quis enim hoc fieri posse credat, vel in securitate à provectis, vel in discrimine à pueris, vel unquam à Christianis? Vidisses homines in deliciis & spurcitiis nefandis sepultos, oblitos honoris, oblitos ætatis, oblitos professionis, oblitos periculi, oblitos nominis sui: vidisses, inquam, confectos cibo, vino languidos, luxuria dissolutos, libidinibus præposteris debilitatos. Vidisses illic res lacry-

mabiles,

mabiles , nihil scilicet pueros inter & viros differre : una quippe erat scurrilitas , una levitas , simul omnia luxuria occupabat. Et miramur post omnia ista , si sanctissimi Clementis IX. preces , & vota repulit Deus ? Miramur , si ruinam rerum suarum passi sunt , qui tantò antè mentibus corruerant. Nemo credat Metropolim illam in excidio tantùm suò periisse. Pius perierat , quàm periret. Væ nobis , & servis nequissimis nequioribus , & insipientibus parvulis stultioribus , quos nec quasi malos servos tormenta corrigunt , nec quasi infantulos blandimenta convertunt. Væ nobis qui bona accipimus , ut in Deum arma sumamus. Ille nobis ad hoc bona præstat , ut boni simus ; nos bona recipimus , ut mala nostra cūmulemus. Ille nos beneficiis suis vocat ad probitatem , nos ruimus in improbitatem : ille beneficiis suis provocat ad compunctionem , nos ruimus in dissolutionem. Sic compensare Domino Deo nostro beneficia quæ ab eo accepimus , adnitimur ? Sic referimus gratias fœneratori gratiarum , & vicem munerum reddimus muneranti ? Sic , præclare scilicet , sacris muneribus respondemus ? Sic , præclare scilicet , dona ejus vel accipimus , vel honoramus , qui quantum ab eo beneficiorum accepimus , tantum ei rependimus injuriarum.

SPECVLATIO II.

*Peccati actualis, tum commissionis,
cùm omissionis malitia & deformi-
tates describuntur.*

SI partus sequitur ventrem, si flos & fructus radicis fugit exprimitque naturam, ex faculento vitiorum fonte quid sperare possumus, nisi peccati actualis foetores, & deformitates? Disputant aliqui an vitium habituale sit pejus peccato, an nefandus parens sit deterior filio iniquitatis? Et concors sententia est, quod si aliqua sit inter hæc duo. mala comparatio, peccatum actuale vitio ipso deterius est. Tum quia pro actu vitioso aliquis justè punitur, non autem pro habitu, si non prorumpat in actum; nam juxta viridicam Augustini lib. de predest. SS. cap. 10. doctrinam: *Nemo meretur, aut demeretur per id, quod facere potest, sed per id quod facit.* Tum quia, habitus medio modo se habet inter potentiam & actum; manifestum est autem, quod actus in bono & malo præeminet potentiae, ut dicitur 9. *Metaph.* melius est enim benè agere, quàm posse benè agere: unde habitus in bonitate & malitia medium gradum obtinet inter potentiam & actum, ut sicut habitus bonus, vel malus superat in bonitate, vel malitia potentiam; ita actus bonitati, vel malitiae cedat. Tum quia habitus non dicitur bonus vel malus, nisi ex hoc, quod inclinatur in actum bonum vel malum: ergo major est bonitas vel malitia in actu quàm in habitu: nam
proq

propter quod unumquodque tale, & illud magis. Tum quia habitus est causa actus in genere causæ efficientis : actus autem est causa habitus non solum in genere causæ efficientis (actus enim generant habitum,) sed etiam in genere causæ finalis , secundum quam in moralibus consideratur ratio boni & mali : ergo bonitate & malitia actus habitu antecellit. Ex quibus sponte sequitur, quod si tanta sit vitii turpitudine, qualem precedenti speculatione representavimus, longè intolerabilior est peccati actualis fœtor, cum sit actualis expressio, succus, & eliquatio putoris vitii, quod est vulnus animæ, & plaga tumens conscientiæ cauteriatæ. Emoveamus, quæso, hos putidæ paludis vapores, ut sacro horrore perciti imposterum peccata vitemus.

Malitia peccati commissionis.

Primò igitur circa malitiam peccati commissionis, in quo consistat, nihil addendum iis superest, quæ superiori tomo de constitutivo malitiæ moralis operosè tradidimus, ubi peccati malitiam in privativo sitam esse omni genere argumentorum demonstravimus ; ubi etiam ostendimus, esse de essentia mali moralis, ut importet disconvenientiam & difformitatem ad legem : unde si per impossibile nulla daretur lex, nullum daretur peccatum formaliter, sed tantum fundamentaliter, quia nulla daretur regula, à qua humana actio recederet. Illud solum in hoc loco observare placet, quod alicubi apud P. Chalvet aliàs legisse me memini, nimirum in hoc peccati actualis naturam perversè divinam imitari, quod sicut Deus ratione perfectionis
illimi

illimitatæ incomprehensibilis est, ita peccati turpitude & deformitas infinita comprehendī etiam nequaquam potest. Unde de peccato non secus ac de Deo, dispari tamen ratione, pronuntiare possumus, peccatum cū dicitur, dici non potest; cū æstimatur, non potest æstimari; cū definitur, non potest definiri; ipsa definitione decrescit. Quia sicut Deus est quod est, ita peccatum est quod non est. Hinc est, quod sicut triplici via ad Dei notitiam pervenimus; negationis, quā omnes imperfectionum labe removemus; affirmationis, quā illi omnes perfectionum dotes asserimus; causalitatis & eminentiæ, quā omnes creaturarum perfectiones simpliciter simplices modo altiori illi attribuimus: ita similiter peccatum cognoscimus negatione, dum ab eo omnem prorsus boni rationem removemus, unde de eo dicitur Job 40. *In umbra dormit, & umbram ejus protegunt umbra.* Quia nimirum peccatum umbra est, totque umbris fordet, quot sunt bona quibus peccantem privat; Deo enim privat, ratione, lege æterna, naturali, humana, gratia, virtutibus, donis, auxiliis, protectione, aliisque animæ & corporis bonis. *Ecce quid facit cupiditas ad peccandum praeceptis*, ait Chrysol. serm. i. *Filium nudavit, non ditavit: filium tulit è gremio patris, ejecit de domo, exemit patria, spoliavit fama, exuit castitate. Quod vita, quod morum, quod est pietatis, quod libertatis, quod est gloria, nihil reliquit.* Secundò viâ affirmationis peccatum describiemus, si congregatis in unum omnium malorum monstris, totum peccato asseras, quod est summum malum, & malorum omnium summa. Unde teste Tertull. *lib. de pudicit. cap. 3.* peccatum
totius

totius mali cētus est , quia nullum aliud præter peccatum malum censendum est. Denique per viam eminentiæ & causalitatis peccatum habet omnia cæterorum malorum incommoda , & aliquid amplius. Horrenda est mors , horribilior est peccati nex : crudeles belluæ , sævior peccati immanitas ; obscura nox , obscuriores peccati tenebræ. Uno verbo , & fœtore spurcius , & horrore confusus , & dolore acrius , & mœstitia tristius , & confusione implicatus , & infirmitate languidius peccatum est. Quia nimirum peccatum est cæterorum malorum omnium causa universalis , unica , & totalis : ergo cæterorum malorum omnium virus eminenter præcontinet.

Malitia peccati omissionis.

Secundò circa malitiam peccati omissionis plura superiori tomo, dum de voluntario, tetigimus. Unde totam istam materiam non tam profundè scrutabimur, quàm recolemus, & paucis decurremus. Sciendum ergo primò, per hoc distingui peccatum omissionis à peccato commissionis , quòd primum est contra præceptum affirmativum , & consistit in hoc , quod non fit quod jubetur ; secundum verò est contra præceptum negativum, & consistit in hoc, quod fit aliquid lege prohibuitum. Unde fit peccatum omissionis in sua essentia non includere aliquem actum , etenim ad non implendum præceptum non requiritur actus , sed carentia , vel cessatio illius. Ad voluntarium quippe indirectum non requiri actum formalem , vel interpretativum, sed sufficere potestatem & debitum non omit-
tendi

tendi, aliàs demonstravimus. Et quidquid contra hoc objici potest, probat solum peccatum omissionis exigere actum, non qui sit de essentia, sed qui sit occasio, vel causa præsens, vel præcedens illius; quod ibidem ex professo suavimus. Quorum summa est, quia secluso omni actu voluntas non potest esse determinata in actu secundo, nec formali, qui est actus expressus, nec virtuali, quia hic supponit alium formalem, ex quo sit relicta inclinatio in voluntate. Maxime quia non potest intelligi exercitium voluntatis, sive indirectum, sive directum, nisi ex motione alicujus boni & finis, quod est adæquatum voluntatis objectum: motio autem finis est ipse actus voluntatis, ut à fine allectus: ergo ad omissionem voluntariam necessario requiritur, vel præsupponitur actus, quo exerceatur libertas & vitalitas voluntatis. Tanta enim est voluntatis cum intellectu sympathia & colligatio, tanta actuum, tamque correspondens consonantia, ut posito rationis judicio, voluntas necessario in aliquem actum prorumpat, licet ad ipsam pertineat quem in particulari actum operetur eligere. Ex quibus obiter inferes, Theologos illos, è quorum numero est noster Gonetius, qui primâ parte, dum de voluntate Dei disputant, docent voluntatem divinam potuisse manere suspensam; & tamen in tractatu de actibus humanis, vel de peccatis docent, non posse dari omissionem peccaminosam sine aliquo actu; inferes, inquam, Authores illos sibi contradicere & pugnantia loqui: ideo namque probant omissionem non esse sine actu peccatum, quia non est voluntaria, utpotè non procedens ex inclinatione voluntatis; voluntas enim sine actu manet

in

in statu actus primi, in quo nullum est exercitium, nulla actualis inclinatio; vita enim actualis, seu exercitium vitale, est motus ab intrinseco, qui per negationem, vel suspensionem non habetur. Rationem illam diffusè prosequitur Gonet *tract. de peccatis, disp. 3. art. 2. §. 2.* oblitus suæ de suspensione voluntatis Dei doctrinæ. Voluntati enim actus puri magis repugnat suspensio, quàm voluntati potentiali creaturæ.

Nec dicas, malitiam peccati omissionis non provenire ex actu, qui est causa, vel occasio omittendi; cum sæpè talem actum esse bonum, vel indifferentem constet; unde potius habet esse malum ex omissione peccaminosa: ideo enim quis peccat largiendo eleemosynam tempore, quo debet audire Missam, non quia largitur, sed quia omittit. Non, inquam, id dicas, quia essentialis peccati omissionis malitia non emendicatur ab actu, sed potius pensatur ex ratione specifica actus, quo privat; actum tamen supponit tanquam causam, vel occasionem, ut sit voluntaria: quanvis etiam ab eo accidentalem possit haurire malitiam; pejor enim est omissio Missæ ad furandum, quàm ad studendum; finis quippe malitiam electionis auger, vel minuit.

Sciendum secundò, voluntatem dupliciter posse ferri in omissionem, directè scilicet, & indirectè. Fertur directè voluntas in omissionem, non quidem ipsam appetendo propter se, quia negatio rationem boni & appetibilis habere nequit, sed in ordine ad aliquem finem amatum, v. g. fertur voluntas in omissionem Missæ ex inordinato amore studii; indirectè verò fertur voluntas in illam, quando voluntas illam non
in

in se, sed in alio objecto vult. V.g. in ludo vult
 • omissionem Missæ, licet de Missa non cogitet,
 qui audire & cogitare tenetur. De utroque actu
 variae sunt difficultates, pro quarum dilucida-
 tione

Sciendum tertio, actum qui directe fertur in
 omissionem peccaminosam, eandem formaliter
 habere malitiam, quam habet omissio. Illa enim
 eandem specificam malitiam sortiuntur, quæ ad
 idem objectum ordinantur, ex eodemque moti-
 vo procedunt: talia autem sunt omissio, & vo-
 luntas omittendi. Quorum radix est, quia vo-
 luntas peccati per se ad peccatum illud pertinet,
 quod concupiscit, juxta illud: *Qui viderit mu-*
lierem ad concupiscendum illam, jam moechatus
est eam in corde suo. Unde actus qui est causa
 omittendi, non distinctum specie, imò nec nu-
 mero est ab omissione peccatum; omissio enim
 actualis se habet ad voluntatem omittendi, sicut
 actus exterior ad interiorem, cui nullam boni-
 tatem, nullamve malitiam adjicit. Et idem dic-
 de actu, qui est occasio omittendi: si enim vo-
 luntas omittendi idem sit cum omissione pecca-
 tum, quidni similiter actus qui est occasio illius?
 Nam eodem præcepto & omissio, & actus cau-
 sans illam prohibentur; præceptum quippe af-
 firmativum Missæ includit virtualiter negati-
 vum interdicens omnibus, quibus Missæ audi-
 tio impediri solet.

Si dicas: Omissio Missæ est solum peccatum
 contra Religionem, vel obedientiam; actus ve-
 rò, qui est causa illius, v.g. studium, est contra
 aliam virtutem studii moderatricem, scilicet stu-
 diositatem, cujus est præscribere studium quando
 duntaxat licitum est; quod in nostro casu non
 fit:

fit: ergo studium distinctam habet ab omissione Missæ deformitatem. Respondebo virtutes morales moderari actus humanos circa propria objecta, non circa objecta aliarum virtutum; unde studiositatis quidem est disponere tempus studii, quantum ad ipsum spectat, ut, nimirum nec nimium sit, nec minus quàm par est. Porro ad illam non spectat, videre, utrum tempus quod aliunde studio opportunum est, debeat officii religionis impendi, quia hæc circumstantia cum sit extra sphaeram objecti sui, illi omninò accidentalis est, & extrinseca; unde tunc studens non contra studiositatem, sed contra virtutem religionis peccat. Sicut qui tempore Missæ consecrato moderatè pranderet, non utique contra temperantiam, sed contra præceptum audiendæ Missæ peccaret.

Sciendum quartò, actum dupliciter se habere ad omissionem: primò quidem per se, ut causa, vel occasio ex natura rei impeditiva adimpletionis præcepti: secundò concomitanter. Difficultas tamen est non mediocris in discernendo, quandonam actus per se, quando verò concomitanter omissionem causat, præsertim si præcesserit directa omittendi voluntas; si enim non præcessit, quicumque actus voluntariè ponatur, si præcepti adimpletionem impediat, causa erit omissionis. Aliqui ergo hanc statuunt regulam generalem: Quicumque firmiter decrevit omissionem, putà Missæ, concomitanter se habebit actus ad illam, nec erit ullatenus peccatum, si sit de se bonus, vel indifferens. Neque enim homo post tale propositum, tametsi malum, tenetur manere otiosus, & peccatum peccato addere. Quæ regula cum hac limitatione intelligenda

genda est, ut nimirum non eliciatur actus qui reddat hominem adimplendi præcepti impotentem, si fortè facti, decretive pœniteret. Sic Clericus in alto mari navigaturus, qui post impium nunquam recitandi officii propositum, Breviarium in mare projiceret, in novum scelus incurreret, quia se legendi Breviarii impotem efficeret, etiam in casu pœnitentiæ. Sic qui post expressam non audiendæ Missæ voluntatem rura dislita peragraret, novum crimen patraret, quia non solum non obedire præcepto audiendi sacri malum est, sed etiam illius adimplendi potestatem sibi adimere, & impossibilitatem sibi ingenerare peccatum est, & cordis duri argumentum. Sic qui post non servandi castitatis voti propositum nuberet, matrimoniumque consummaret, majori se peccato inquinaret, quia non solum peccatum admitteret, sed in miseram peccandi necessitatem ultrò se inferret.

Alii aliam regulam assignant, nihilo fortè faciliorem, dum aiunt, omnem primum actum impossibilem cum observantia præcepti esse novum peccatum, & causam omissionis, tamen si præcesserit expressa omittendi voluntas; actus verò primùm consequentes, concomitanter se habere. V.g. si quis post decretum non audiendi Missam statuat manere domi, hoc statutum, illaque mansio peccatum erit, secus verò alia opera, quæ domi acturus est. Indiget tamen hæc regula sicut præcedens limitatione, ita ut intelligatur de electione actus ita impossibilem cum adimplitione præcepti, ut etiam si propositum omissionis corrigeretur, non posset præceptum adimpleri; si enim primò eligeretur actus, qui adimplendi præcepti impos-

sibilitatem

sibilitatem non invehret, actus ille non esset novum peccatum, quia per se non redderet impotentem in casu pœnitentiæ; solus autem actus reddens præceptum observatu impossibile, per se influit in omissionem: unde in illo peccat, si præcellerit expressa omittendi voluntas, si non; sicut mortaliter peccat infligens vulnus lethale homini, etiam habenti aliud vulnus lethale. An autem aperiendi sint in confessione hi actus impossibilitatem adimplendi præcepti inferentes, negant aliqui, quia actus illi non sunt distinctum ab omissione peccatum; crediderim tamen, tutius esse omnia aperire, quia actuum impossibilem & peccandi necessitatem inferentium appositio saltem peccandi granditatem exaggerat, & pravi cordis duriciem, ac malitiæ intensiorem patefacit.

Tertia regula in medium proferri potest, meo quidem iudicio planior, si dicamus, post suppositam expressam omittendi voluntatem, actus deinde eliciendos tunc se habere per se, & in omissionem moraliter influere, si actus illi idcò ponantur, ut omissio consequatur, apponaturque adimplendo præcepto impedimentum. Quod si actus velit homo, eliciaturque ratione ipsorum, non prout conducunt ad omissionem, sitque operans ita comparatus, ut etiam si actus illos non eliceret, nihilominus Sacro non interesset; tunc actus illi concomitanter se habent, nec per se sunt causa omissionis, ac proinde non sunt peccatum, quia propter illos non omittit homo facere quod debebat, nec in illis vult omissionem. Sicut è contra, quando actus est per se causa omissionis, quantumcunque aliàs sit bonus, malus esse incipit, quia

prava circumstantia inficitur ; fit enim quando non debet , causatque id quod prohibitum est ; unde cùm sit virtualis malæ omissionis voluntas , peccatum esse convincitur : malum quippe est quod parit iniquitatem.

Quæres , quandonam incipiat malitia omissionis , quandonam consummetur ?

Respondeo , malitiam omissionis incipere cum actu qui est causa , vel occasio illius , quia tunc incipit , cùm exoritur peccandi voluntas : qui autem voluntariè ponit actum impediens præcepti observantiam , omissionem vult , saltem indirectè ; unde hinc incipit peccatum. Consummatur verò peccatum omissionis per effectivam omissionem ; quando nimirum expirat tempus obligationis , quidquid in contrarium credat Vasquez existimans , tunc solum peccatum committi , quando causa voluntariè apponitur. Sed nostra sententia , quam sæpe D. Thomas inculcat , vera est. Tum quia sicut in peccato commissionis tunc consummatur , non quando innascitur alieni subripiendi voluntas , sed quando reapse auferitur alienum : ita similiter tunc completur malitia omissionis , quando expirat tempus obligationis , quia tunc verum est , præceptum esse violatum , quod hactenus poterat observari. Sicut etiam qui peccat ex ignorantia crassa & vincibili , non solum peccat in causa ignorantiae , sed etiam dum actum malum ex ignorantia admittit : ita similiter non solum peccat qui vult omittere , causamque

causamque omittendi apponit, sed & qui in fine temporis urgentis opus imperatum omittit. Tum deinde, quia non solum voluntas & causa omissionis, sed & ipsa actualis omissio debent in confessione aperiri, non minus quam actus exterior ex efficaci voluntate consequutus; maxime quia per expressionem causæ sæpe innotescere nequit numerus omissionum, qui tamen debet Sacerdoti declarari. Nam post expressam Breviarii projectionem explicandum superest, quot vicibus post illam projectionem divini officii lectionem prætermisit, vel utrum projectionem nefariam retractaverit. Denique si lata foret excommunicationis sententia contra non audientes Missam, non per solam omittendi sacri voluntatem, sed per actualem omissionem excommunicationis vinculo quis teneretur. Ergo signum est, quod in actuali omissione completur, consummaturque peccatum.

Dices: Ad peccatum requiritur libertas: at homo sæpe sæpius libertate caret cum consummatur omissio, utpote si dormiat, vel sit ebrius: ergo tunc non peccat, sed solum cum liberè causam malæ omissionis apposuit.

Respondeo in primis, sæpe hominem esse sui compotem & libertate præditum, quando expirat tempus obligationis: unde tunc hoc argumentum, quod apud adversarios palmarium est, abit in fumum. Absolutè etiam contendo, semper peccatum omissionis compleri, cum expirat tempus urgentis præcepti; quia ad peccatum sufficit voluntarium in sua causa: sic ebrius peccat contra præceptum de audiendo sacro, etiam dum in vino sepultus edormit crapulam, & exhalat; quia liberè hoc impedimen-

tum apposuit; sicut peccat peccato commissio-
nis, dum vino immersus occidit servum, vel an-
cillam constuprat, si hos excessus è vino se-
quuturos præviderit, vel prævidere debuerit.
Maximè quia non major requiritur libertas ad
consummandum peccatum, quàm ad compleh-
dum meritum, vel recipiendum Sacramentum.
At si quis in vigilia habens propositum marty-
rii, vel baptismatis, nocte vel baptizaretur in
somnia, vel pro Christo occideretur, verè & bap-
tismatis gratiam, & Martyrum aureolam in illo
fortunato somno sibi compararet, tametsi actua-
lis libertatis exercitium ligatum, impeditum-
que foret. Non tamen in somno posset Sacerdos
conficere Sacramenta, tametsi ante somnum in-
tentionem ea conficiendi habuerit; quia Sacra-
mentorum confectio non ex sola hominum vo-
luntate, sed potissimùm pendet ex institutione
Christi, qui non dormientes, sed vigiles mini-
stros elegit, ut ex perpetua Ecclesiæ traditione
liquet. Nec in his, quæ à Dei voluntate fiunt,
valet argumentum à simili, vel disputandi sub-
tilitas quidquam evincit.

Dices: Non imputatur culpa homicidii ho-
mini venenum propinanti, quando sequitur
mors, sed quando fuit apposta causa mortis:
Ergo similiter non imputatur omissio, nisi in
causa.

Respondeo, quod illi qui venenum propinavit,
si perversam postea retractet voluntatem, cer-
tum est, non imputandam iri mortem; si verò non
retractet, tunc completur homicidii peccatum,
quando sequitur mors in propinatione incho-
ta. Accedit, satis magnum interesse discrimen,
quia propinatio transit; unde tempore mortis
nihil

nihil facit homicida, quod sit causa mortis, sed fecit; unde non censetur causa mortis, nisi quando apposuit causam illius. At verò actus, qui est causa, vel occasio omissionis, tandiu durat, quandiu urget præceptum; & quia omissionem vult homo in illo actu, tunc solum completur peccatum omissionis, quando expirat tempus præcepti, & quando actus, qui est causa, vel occasio, desinit esse impedimentum adimplendi præcepti.

Quares rursus, an peccatum omissionis, & commissionis distinguantur.

Respondeo, peccata illa in esse physico distinguuntur plusquam specie, & plusquam genere, cum peccatum commissionis per actum privatum rectitudine exerceatur, peccatum verò omissionis per cessationem actus & carentiam illius. Quantum autem distinguatur actus, & carentia actus, nemo non videt. Porro si peccata illa considerentur in esse moris, ejusdem speciei erunt, si ad idem objectum ex eodem motivo procedant. Ita asserit expressè S. Doctor *art. 6.* quod declarat exemplis. Primò non jejunare, & cibos immoderatè ex eodem satisfaciendi gulæ incitamento comedere, sunt peccata ejusdem speciei; & tamen non jejunare est peccatum omissionis oppositum actui virtutis abstinentiæ, quo transgredimur præceptum affirmativum; comedere verò cum excessu est peccatum commissionis. Displicet hoc exemplum Vasquesio contendenti, non jejunare non esse peccatum omissionis, quia non est privatio actus, sed

potius jejunare est privatio actus comestitionis, nec frangitur jejunium nisi per actum. Sed facile responderetur jejunium, de quo loquimur, esse actum virtutis abstinentiæ, ut docet D. Thomas 2.2. *quæst.* 147. *art.* 1. & 2. quo quis ex proposito abstinet à cibis, quod vocat jejunium jejunantis: unde non jejunare est peccatum omissionis, seu carentia illius actus, vel propositi. Deceptus est autem Vasquez, quia confudit jejunium virtutis cum jejunio naturæ, quod utique est pura negatio, vocaturque à D. Thoma jejunium jejunii. Aliud exemplum est: Rapere aliena est peccatum commissionis; non dare verò pecuniam raptam, est peccatum omissionis; & contra præceptum affirmativum restituendi, præcipiens actum justitiæ commutativæ: & tamen illa duo peccata non distinguuntur specie, si ex eodem motivo avaritiæ, vel injustitiæ admittantur.

Ratio verò fundamentalis hujus responsionis est hæc: Duplex est finis actionum humanarum; alius dicitur finis operis, alius finis operantis. Primus est essentialis actui humano; secundus verò accidentalis, & adventitius, ut ex dictis de moralitate manifestum manet. Ergo quando omissio & commissio ordinabuntur ad eundem finem operis, erunt ejusdem speciei essentialis in ratione peccati, ut contingit quando omissio, & commissio ad idem specie vitium spectant. Sic eadem homicidii labe sordet, & esurientem in extrema necessitate non pascere, & panem veneno infectum impartiri. Quando verò ordinabuntur ad eundem finem accidentalem, erunt ejusdem speciei accidentalis, ut si ad mœchiam referatur furtum, & omissio Missæ.

Ad quorum profundiolem intellectum consideran

siderandum est, signanter & advertenter dixisse S. Thomam, tunc solum commissionem & omissionem esse ejusdem speciei, quando ad idem objectum ordinantur. Per quod explicari potest, quod 2. 2. *quæst.* 79. *art.* 2. & 3. ait idem S. Doctor, commissionem, & omissionem distinguere specie, non solum quando opponuntur diversis virtutibus, sed etiam quando opponuntur illis duabus partibus justitiæ, quæ sunt declinare à malo, & facere bonum. Hoc enim verum est, non solum in genere naturæ & materialiter, ut exponit Cajetanus; sed etiam in esse moris, si ad diversum finem ordinantur: unde ommissio & commissio etiam contra eandem virtutem possunt esse diversæ speciei morales, si ad diversum finem referantur. Si verò ad eundem finem, tam operis, quam operantis ordinantur, certum est ad eandem speciem moralem, quæ à fine desumitur, pertinere: sicut recessus à termino à quo, & accessus ad terminum ad quem, ad unam & integram motus speciem spectant; nam omissione à bono recedimus, commissione in malum turpiter prouimus. Fateor tamen interdum in commissione majorem quàm in omissione apparere gravitatem; malignius enim est Deum odisse, quàm ab eo, urgente præcepto, amando abstinere.

REFLEXIO.

Vidisti quid sit peccatum commissionis, & omissionis: attende quale sit. Parum, vel nihil reputas, dum vel omittis quod præcipitur, vel quod prohibetur admittis. Erras, peccator; erras, & vehementer erras. O perverse rerum

æstimator ! ô mendax fili hominis in stateris !
 Tûne illud leve putas , quod Deus infinito pro-
 sequitur odio , ad cuius iniquitatem mundi Dei
 oculi , testante sacro eloquio , respicere nequeunt ;
 ad cuius horrorem tangitur dolore cordis in-
 trinsecus , pœnitetque quod fecerit hominem ; in
 quod toto furoris æstu excandescens desævitur ,
 peccatoribus occurrens quasi leæna , quasi pardus
 in via Afsyriorum , quasi ursa raptis catulis , dis-
 rumpens interiora jecoris eorum , & consumens
 eos quasi leo , quasi bestia agri scindens eos , con-
 gregans super eos mala , & sagittas suas com-
 plens in illis , ut divina ingeminat Scriptura ?
 Tûne illud floccifacis , & leve suspicaris , qui pec-
 catum sicut aquam bibis , qui semper vel mala
 agis , vel bona præcepta , ut delinquas , derelin-
 quis : illud , inquam , cuius pondus immensum ,
 gravitas infinita , & scientiam Dei non timet , &
 potentiam vilipendit , & dominium aspernatur ,
 & vitam , si posset , adimeret , divinitatem eneca-
 ret , unitatem destrueret , dum rationem ultimi
 finis in mediis collocans , utendis fruitur , utitur
 & fruendis ? Tûne illud parvipendis , quod na-
 turæ infestum est , quod legem impugnat , vir-
 tutes obliterat , gratiam extinguit , adversus
 Deum levat manum suam , contra omnipoten-
 tem roboratur , religionem conculcat , in publi-
 cam , privatamque perniciem conspirat , autho-
 rem ipsum suum corrodit , lacerat , exedit ?

Væ nobis cæcis , leve arbitrantibus pondus il-
 lud , cui Christus succubuit ! Væ nobis , qui omni
 studio , omnique nisu non solum jussa non faci-
 mus , superbâ omissionem , sed contra id facimus
 quod jubemur , nefariâ commissione . Jubet quip-
 pe Deus ut omnes invicem diligamus ; nec tan-
 tum

tum amare definimus, sed mutua nos infestatione laceramus. Jubet Deus, ut egentibus nostra tribuamus, & non solum dare negligimus, sed aliena avidi pervadimus, si valemus. Jubet Deus, ut omnis qui Christianus est, etiam oculos castos habeat, & non solum oculos continere floccificamus, sed totos nos luto fornicationis involvimus. *Et quid plura?* (inquit Jeremias Christianus, Salvianum appello lib. 3. de Provid.) *Grave & luctuosum est, quod dicturus sum. Ipsa Dei Ecclesia, qua in omnibus debet esse placatrix Dei, quid est aliud, quam exacerbatrice Dei? Aut prater paucissimos quosdam, qui mala fugiunt, quid est aliud penè omnis cœtus Christianorum, quam sentina vitiorum. :: Et quod diximus, ne nimis forsitan gravis videatur esse censura, plus multò dicam: facilius invenias reos maiorum criminum, quam non omnium; facilius majorum criminum, quam minorum: id est facilius, qui & majora crimina cum minoribus, quam qui minora tantum sine majoribus perpetrarint.*

Si te tantum læderet peccatum, esses quidem deplorandus, sed tamen esses ferendus: hoc verò quis ferre possit, homuncionem Deo, vermem Omnipotenti, nihilum Enti per essentiam, creaturam Creatori bellum inferre? Et tamen ita est; peccatum enim, teste Augustino lib. 22. contra Faust. cap. 27. est essentialiter dictum, vel factum, vel concupitum contra legem æternam, à qua omnes aliæ leges, positiva scilicet, & naturalis, tanquam radii à sole, rivuli à fonte profluunt; quia ut dicitur Proverb. 8. *Per me Reges regnant, & legum conditores iusta decernunt.* Quod etiam de peccato omissionis verum esse tradit D. Thomas quest. 71. art. 6. ad 1. quia affirmatio.

682 *De peccatis. Dissert. I. Cap. I.*

Et negatio reducuntur ad idem genus; Et ideo pro eodem est accipiendum dictum, non dictum-factum, non factum. Ergo cum peccatum Dei legem cordibus nostris impressam, & signatam super nos conculcet, profecto peccator supremum legislatorem contemnit, eumque creaturæ nefanda comparatione postponit. Nam ut ait Tertull. lib. de pœnit. cap. 5. Nonne diabolus Domino praponit? Comparationem enim videtur egisse, qui utrumque cognovit, & iudicando pronuntiassse esse meliorem, cujus se rursus esse maluerit.

Subscribit S. Thomas quest. 28. de verit. art. 2. sic: *Quicumque aliquem digniorem indigniori postponit, injuriam ei facit, & tanto amplius, quanto res est dignior. Quicumque autem in re temporali finem sibi constituit, quod facit omnis mortaliter peccans, ex hoc ipso quantum ad affectum suum praponit creaturam Creatori, diligens plus creaturam, quàm Creatorem. Hæc cum ita sint, perpende cum Augustino, quàm magnus puteus sit profunditas iniquitatis humanæ, in quam & committendo, & omittendo corruis. Cave ne te tantum profundum absorbeat, vel urgeat super te puteus os suum. Ad tanti monstri fœditatem exhorresce, ne tibi sempiternus horro- obveniat.*

SPECVLATIO III.

*Specifica peccatorum distinctio, nec-
non eorum inequalitas potissimum
ex objecto petenda est, & deinde
ex circumstantiis.*

PRima pars per se ferè patet; quia siue pec-
catum constituitur essentialiter per aliquid
positivum, siue per aliquid privativum, siue per
utrumque, semper stat, in peccato commissio-
nis dari habitudinem actus ad objectum, siue
hæc habitudo sit de essentia, siue sit tantum
fundamentum malitiæ. Atqui stante diversa ha-
bitudine ad objecta diversa, non possunt non
esse diversa peccata; siue peccatum sit in illa
habitudine, ut patet; siue peccatum situm sit in
privatione, quia ex diversa habitudine diversa
consequitur privatio. Ergo peccata distingun-
tur specie penes diversa specie objecta forma-
lia, seu habentia diversam difformitatem ad
rationem.

Hic etiam pro nostra sententia peccatum in
privativo constituyente annotare lubet, quod cū
S. Doctor q. 72. art. 1. ait distinctionem peccato-
rum sumi non ex parte inordinationis, sed ex
parte objecti, loquitur de distinctione peccato-
rum, ut sunt actus humani & voluntarii. Unde
signanter in corpore, & ad 2. dixit; peccata ma-
gis distingui specie ex parte actuum & objecto-
rum, quam ex parte inordinationis in peccato
existentis. Nec valet instantia M. Serræ dicentis

684 *De peccatis. Dissert. I. Cap. I.*

D. Thomam loqui de specie peccatorum, non in esse physico, sed morali, subindeque malitiam moralem in illa habitudine sitam esse. Non, inquam, valet: licet enim Angelicus Doctor non loquatur de actu peccati physico physicè sumpto, loquitur tamen de illo ut est fundamentum malitiæ, sub qua ratione genus moris, si non formaliter, saltem fundamentaliter ingreditur. An verò peccata ex præceptis quæ violant, distinctionem sortiantur, dicemus *cap. seq. Speculat.* 1. circa quartam divisionem.

Secunda pars supponit, omnia peccata non esse æqualia: cujus ratio traditur à S. Thoma *q. 73. art. 2.* efficax illa quidem, sed explicacione indigens, & fundata in destructione fundamenti Stoïcorum oppositum sentientium, nixorumque hoc argumento, vel potius sophismate: Peccatum consistit in privatione: privationes autem omnes sunt æquales, utpote consistentes in indivisibili, subindeque incapaces suscipiendi magis & minus: ergo & peccata omnia sunt æqualia. Hoc autem fundamentum sic convellit profundissimus D. Thomas: Privationum aliæ sunt in facto esse, nihil omninò de forma opposita relinquentes, ut mors & tenebræ; aliæ in fieri, quæ formam oppositam non omninò tollunt, subindeque habent latitudinem tantò majorem vel minorem, quantò plus, vel minùs de forma opposita relinquunt. Privatio autem quam importat peccatum, est secundi generis; non solum juxta opinionem eorum (quibus superiori tomo adstipulati sumus) qui censent in actu peccati posse aliquem bonitatis secundum quid radium inesse, ut si actus sit ex fine bonus, ex sola verò duataxat circumstantia vitiatus; sed
etiam

etiam secundum illos, qui ponunt, per peccatum nihil de rectitudine formali actus relinqui, sed totam extinguere. Quia privatio formæ dicentis ordinem ad aliam, tanquam sui radicem, habet magis, & minus; quatenus licet totaliter tollat formam, quâ immediatè privat, potest tamen magis vel minus relinquere de ordine ad formam illam ulteriorem & radicalem, quam non evertit, tametsi in eam veluti cuniculis agat. Exemplo fiet res hæc illustris: *Ægritudo* privatio est removens ab humano corpore sanitatem: attamen quia vitam, in quam molitur, non destruit, radicem sanitatis non evellit, sed magis vel minus ad eam tollendam disponit: ideò ratione formæ viventis, quæ est sanitas radicalis, cuique mediatè opponitur, rectè dicitur suscipere magis & minus. Idem de peccato dici potest, quia non solum rectitudini virtutis immediatè opponitur, sed etiam principiis virtutis, synteresi nimirum, & ingentis ad bonum honestum propensione mediatè adversatur. Unde secundum quod magis, vel minus de inclinatione illa radicaliter sibi opposita diminuit, magis, minusve suscipere, & latitudine quadantenus gaudere dicitur.

Quam rationem magis penetrabis, magisque firmabis, si perpendas, vix, ac ne vix quidem ullum esse peccatum omnes funditus destruens circumstantias, quodve non possit cum majori conatu, duratione, plurium perversorum finium adunatorum intensione, & veluti complicatione patrari. Ergo peccatum licet sit privatio, potest suscipere magis & minus; quia peccatum minus, nec tot, nec tantis bonis privat, quibus spoliatur majus. Sicut licet qualibet à civitate expul-

sione:

sione, ea privemur; gravius tamen, molestiusque exilium est, quo quis in novum orbem relegaretur, quàm si miliari duntaxat distans exularet. Neque dicas S. Thomam *lib. 3. cont. Gent. c. 139.* docere, illud interesse discrimen inter ea quæ sunt intrinsecè mala, & illa quæ non mala sunt, nisi quia prohibita, quòd in primis datur inæqualitas malitiæ, quia non totaliter tollunt bonum oppositum; secus verò in secundis, quia licèt recedere à virtute sit malum, subindeque magis recedere, majus malum; tamen facere opus prohibitum non est de se malum, sed per accidens, in quantum prohibitum. Non, inquam, id dicas; quia licèt hæc doctrina sit vera attento præcisè jure positivo, tamen quia habet semper pro motivo diversas virtutes, hinc etiam est, in peccatis solo jure positivo veritatis inæqualitatem inveniri. Hoc supposito

Probatur secunda pars, vel potius ex prima sponte fluit. Si enim peccata multiplicantur, & distinguuntur specie secundum objecta, à quibus specificantur, clarum est inæqualitatem peccatorum ex objectis primò & principaliter desumi, cum inæqualitas essentialis ex distinctione specifica & essentiali petatur: ac proinde peccatum tanto est gravius, quanto objectum est pejus. Unde peccata contra Deum, contra virtutes Theologicas, religionem, & pœnitentiam, sunt omnium gravissima: deinde peccata contra hominem secundum occupant locum, ut homicidium & calumnia; postea peccata contra res exteriores sunt tertiæ classis, ut furtum. Porro peccata ejusdem classis eo sunt atrociora, quo majori, & præstantiori virtuti opponuntur, quia tunc objectum deterius est, utpote privans ob-

jecti.

jecti melioris bonitate. Peccata verò opposita eidem virtuti tanto graviora censenda sunt, quanto magis illi adversantur: illi autem magis adversari constat, quando magis inclinationi virtutis repugnant, vel quando primariæ, & præcipuæ ejus inclinationi se opponunt. Si enim virtus inclinatur in medium impellendo, sicut fornicatio & liberalitas, peccatum quod ab illa inclinatione retrahit, gravius merito reputatur: sic peior est avaritia prodigalitate, peior timiditas audaciâ. Si verò virtus in medium refrænando inclinatur, vitium impellens erit atrocius: sic intemperantia insensibilitate, & nimia corporis austeritate deterior est. Sic denique licet odium Dei repugnans primariæ inclinationi charitatis sit pejus infidelitate; non tamen schisma repugnans bono proximi, in quod charitas secundariò inclinatur, est pejus infidelitate, quæ divinæ veritati adversatur.

Verumtamen has regulas, cæteris paribus intelligito, & nisi casus circumstantiarum pondere mutetur. Nam peccata venialia contra præstantiorem virtutem commissa, non utique graviora, sed sunt leviora mortalibus contra minùs excellentem virtutem patratis. Imò mortale in materia minori virtutis potest esse gravius alio excellentiorem virtutem offendente, ratione nocumenti insigniter notabiliis: sic utique homicidium omissione Missæ gravius est. Unde præfatæ regulæ intelligendæ sunt, quando oppositio est æquè immediata & directa. Sic idololatria, & odium Dei sunt homicidio pejora. Ex quo etiam fit, timiditatem, quam diximus supra audaciâ, spectatis duntaxat meritis objecti, graviores, sæpe, & fere semper esse ratione circumstantiarum

stantiarum illâ leviozem, quia minus de voluntario, minusve de malitia habere solet. Quâ etiam ratione D. Thomas 2.2. *quest. 142. art. 3.* dixit intemperantiam esse peccatum timiditate gravius, licet istud opponant præstantiori virtuti, scilicet fortitudini. Per se tamen, & ex objecto timiditas est deterior; imò potest esse mortalis, putà si quis metu mortis fidem negaret, vel patriam proderet.

Ex his rectè colligit D. Thomas *q. 73. art. 5.* peccata spiritualia esse carnalibus graviora: quod à viris spiritualibus observari velim, & pervelim, ñe dum vident alios in peccata carnis incidere, illos sibi postponant, contemnant, & in superbiam longè deteriorem ipsi labantur. Ratio autem hujus doctrinæ petitur tum ex parte subjecti nobilioris, quod deformant & inficiant immediatè vitia spiritualia; spiritum enim à Deo avertunt, in quo peccati perversitas potissimùm sita est. Peccata autem carnalia in corpore exercentur, & in conversione ad bonum commutabile consummantur: quæ conversio minùs mala est, imò nec mala est, nisi quia à Deo avertit. Unde non ita pridem aiebat sapiens Prælatus, doctore se plurimùm, quòd in Communitatibus laxioris disciplinæ advertisset *peccata hominum*, in aliis strictiorem foris vitam profitentibus, *peccata demonum*; id est spiritualia, invidiam, superbiam, ambitionem, & alia, quæ Scotus vocat *luxurias spirituales*. Tum ex parte objecti, quia peccata spiritualia contra Deum, proximum, & præstantiores virtutes pugnant; carnalia verò corpus offendunt & maculant: corpus autem sicut minùs est ex charitate diligendum, ita minor habetur culpa in ipsum patrata. Tum ex parte

motus,

motivi, ad carnalia namque peccata pluribus, vehementioribusque impellimur incentivis, propter legem membrorum legi mentis repugnantem, propter corpus quod corrumpitur, aggravatque animam, propter terrenas cogitationes sensum deprimentes, propter concupiscentiam carnis omnibus innatam, & primigenii peccati granditate, & exundatione immensum auctam. Ergo excusabiliora sunt peccata carnalia spiritalibus, seu ut ait Gregorius Magnus lib. 33. Moral. cap. 11. *Peccata carnalia sunt minoris culpa, & majoris infamia.* Dicuntur autem majoris infamiae, quia ut Philosophus 3. *Ethic. cap. 3.* observat, peccata intemperantiae sunt maximè exprobrabilia, quia sunt circa illas delectationes, quae sunt communes nobis & brutis. Unde sæpe superbos in vitia illa corporea justo Dei judicio prolabi, ut confundantur, notant Patres spiritalis.

Tertia pars, affirmans alias peccatorum inæqualitates ex circumstantiis opus pravam comitantibus obvenire, est probatu facilis, nec nisi expositione eger. Primò enim peccatum est intensivè majus, quando ex majori voluntatis conatu procedit. Unde fit, peccata ex ignorantia, passione antecedente, infirmitate, vi, metu, & tentatione commissa, minùs intensa, minusque proinde gravia esse; quia cum minùs voluntaria sint, à minori etiam voluntis conatu procedunt: peccata verò ex deliberatione, finisque intenti amore patrata, esse per se graviora, & intensiora, eoque ampliùs, quo finis magis allicit; quia finis movet voluntatem, & causat conatum ejus.

Secundò: Peccatum erit extensivè majus, si fiat.

fiat vel in personam Deo conjunctiorem, ut occisio Sacerdotis aliâ hominis communis nece-
 gravior est, unde de illis dicitur Zachar. 2. *Qui*
vos tetigerit, tangit pupillam oculi mei; vel si in
 personam ipsi peccanti conjunctiorem committitur,
 sic horribilius longè est occidere patrem,
 cognoscere matrem, quàm in alios similia atten-
 tare; vel si in personam in dignitate, vel aucto-
 ritate constitutam aliquid moliamur, sic deterius
 est Magistros (quibus sicut nec parentibus par
 nunquam referre possumus) offendere, quàm
 discipulos, vel æquales; sic peccatum quod fit in
 personam publicam, putà Regem, Principem, qui
 gerit personam totius multitudinis, longè co-
 gravius est, quod in privatam personam com-
 mittitur, quia injuria illis illata in nocumentum
 communitatis redundat. Unde specialiter *Exo-*
di 22. dicitur: *Principi populi tui non maledices.*
 Peccatum etiam augeri ex conditione personæ
 peccantis, docet D. Thomas *art. 10.* cujus do-
 ctrinam in reflexione speculationis primæ capi-
 tis sequentis expendimus.

Tertiò non parum accrescit granditas pec-
 cati ex nocumento sequuto, vel sequi nato, præ-
 fertim si nocumentum sit prævisum & inten-
 tum; tunc enim quia directè volitum est, directè
 etiam novam infert & invehit peccato gravita-
 tem. Si verò nocumentum prævisum duntaxat
 sit, & non intentum, peccatum indirectè auget;
 quia tunc nocumentum indirectè, virtualiter, &
 in sua causa volitum est. Si verò nocumentum
 non sit intentum, nec prævisum, sed contingat ob-
 prævidendi negligentiam, pro granditate incu-
 riæ crescit gravitas culpæ; si verò omnis dili-
 gentia moralis adhibeatur, & nocumentum per
 acci

accidens, rarò, & ut in paucioribus consequatur, non imputatur ad culpam, etiamsi dederit operam rei illicitæ, nisi fortè in foro exteriori, in quo qui dat operam rei illicitæ, præsertim periculosa, & ob periculum vetitæ, semper præsumitur negligens. Unde Sacerdos non foret irregularis, qui facta omni necessaria diligentia putans occidere feram, interficeret hominem. Excipe, nisi opus illicitum sit per se inductivum mortis: nam Sacerdos irregularis in utroque foro meritò censeretur, qui immoderatis flagri ictibus discipulum eo vulnere feriret, unde mors consequeretur, nec excessum suum posset excusatione tegere, vel adumbrare; quia & modum in impingendis fustibus tenere, & periculum mortis prævidere, non verò carnificinam exercere debet. Bonum quippe est, imò necessarium pueros in culpam lapsos, vel labi solitos, à Magistris nedum verbis, sed etiam verberibus castigari; cavendum tamen est, ne unquam crudelitati locus sit. Absit à Sacerdote, absit à Religioso, absit à viro Christiano, id est Agni Christi discipulo, ut specie juveniliū impetuum refranandorum crudelitati aditum iter patefaciat. Quod libenter hîc annotare placuit propter quosdam Ludimagistros ætate magis quàm sapientiâ juniôres, qui partem felicitatis invenisse se putant, si miseros juvenes opportunè importunè verberibus operiant; nec tam volunt eorum culpas punire, quàm eos in culpas incidere avent, ut eorum flagellandorum optatissimam sibi occasionem nanciscantur. Quod nedum Sacerdotis & Religiosi modestia, sed etiam sapientis gravitate, & moderatione prorsus indignum est. Quod si nocumentum per se sequatur, tametsi nec prævisum.

sum, nec præintendum sit, peccatum proculdubio aggravat etiam directè, quia virtualiter velle censetur quidquid ex eo, quod volumus per se fluit. Unde in illis ignorantia non excusat.

Sed inquires: Hæ regulæ in multis deficiunt. Nam mulier prævidens ob ornatum accuratum, vel ingressum in Ecclesiam, se turpiter amandam, non tenetur se jure suo privare, modò nihil mali intendat. Ergo periculum, nocumentumve prævisum, non causat etiam indirectè peccatum. Ergo prima regula certa non est. Nec secunda etiam; nam si ego videam ex actione mea per accidens damnum alteri inferri, & peccandi materiam ministrari, teneor ab illo opere abstinere. V. g. si sciam Confessarium illum ex peccatorum meorum exomologesi lapsurum, vel talem cibum pollutionem voluntariam causaturum, teneor & alium adire Confessarium, & hujusmodi me cibo non necessario privare. Ergo falsum est, nocumentum per accidens sequutum non aggravare peccatum. Tertia etiam regula nihilo melior est; nam sollicitans mulierem ad peccatum dispositam, non peccat peccato scandali, si solum carnis propriæ delectationem, non spiritale illius damnum intendat. Ergo nocumentum per se sequutum non semper aggravat operis iniquitatem.

Respondeo, has regulas firmas utrasque consistere. Ad primum facilis responsio est; mulier enim tale nocumentum nec causat, nec ex ejus ornatu, vel incessu sequi natum est, sed ex sola oritur petulantia juvenis, qui & imaginibus & sacramentis sæpe nimis ad peccandum abutitur. Unde mulier si christianæ modestiæ limites non præter

prætergrediatur, juvenis peccatis minime onerabitur. Sed hic non atramento, sed lacrymis, sed sanguine describenda, deplorandaque foret mulierum hujus sæculi luxuriantium vanitas infruita, quæ solæ perire nolunt, nisi aliis causa perditionis existant; quæ incredibili amentia dum picturas quærunt, effigiem naturæ mutant, opus Creatoris adulterant, imaginem à Deo fictam delent, quia vultum materiali candore obliniunt, exquisito rubore perfundunt, collum catena constringunt, pedes compedibus arctant, corpus obruunt indumentis. Considerent, quæso, quod juxta patres, mulieres illæ antichristianæ, & paganismi spiritu plenissimæ, dum crines calamistro rotant, dum se totas inanibus fucant pigmentis, adulterinisque fallaciis, ut vultus hominum ad se provocent, etsi nullum inde sequatur damnum, judicium tamen patientur æternum, quia venenum attulerunt, si fuisset qui biberet. Attendant quod juxta sacrum, quo uno iudicabimur, Evangelium, subtilium, pretiosarumque vestium cultus peccatum habetur; si enim, ut Gregorius Magnus notat, culpa non esset, nequaquam sermo Dei tam vigilanter exprimeret, quod dives, qui torquebatur apud inferos, bysso & purpura indutus fuisset. Denique cogitent vanum cor magis cultui vestium, quam virtutum insistere, & exteriorem corporis superfluitatem interioris vanitatis indicium esse. Mollia indumenta animi molliem indicant, nec tantum curaretur corporis cultus, nisi prius neglecta fuisset mens inculta virtutibus. Scio equidem ornatum mulierum, & exquisitum cultum, tamen à christiana simplicitate & humilitate per se abhorrentem, ideoque ab Apostolo *circumpositiones*

nes auri improbante vetitum, interdum fieri licitum, & rectum, si nimirum maritus, cui subesse jubetur uxor, præcipiat, nec possit exorari. Sed tunc licet quidem cultus, sed non lascivia; debetque mulier verè Christiana in superbo cultu cor humile, in splendido vestitu Esther Reginae animum retinere, quæ cultum suum tanti faciebat, quanti pannum inenstruatæ.

Ad secundum respondeo, quod licet per se non sequatur tale nocumentum, teneor tamen & proximo, & mihi in extremis periculis ex charitate subvenire: & quia peccatum malorum omnium summum est, teneor & aliena, & propria, si per me solum stet, peccata impedire. Quomodo enim Deum syncerè & super omnia amare ille dici potest, qui perituræ utilitatis, vel fluxæ delectationis jacturam pati detrectat, ut mortem spiritalem proximi, vel suam cum infinita Dei injuria conjunctam devitet?

Certè sicut licet jure meo utar, dum propria bona expendo, vel servo ex charitate, tamen me tali jure privare, & pauperibus superflua erogare teneor: ita à fortiori ob memoratas in argumento commoditates teneor mortem spiritalem propriam, vel alienam corporali deteriorem declinare.

Ad tertium dicendum, sollicitationem mulieris dispositæ non infici malitia peccati scandali, quia meretrix illa ad peccandum parata est, nec pervertitur voluntas, sed materia datur perversæ voluntati, ubi tota residet malitia peccatorum. Nec est simile de muliere, quæ inducitur, & ad peccandum attrahitur; quia ista non supponitur ad peccatum præparata, sed tentatione corrumpitur voluntas, & malo opere corpus.

Non

Non est etiam simile de fornicatione publica, quæ licet solius causâ delectationis quærat, scandalo tamen plena est, quia est virtualis sollicitatio & provocatio omnium sive dispositorum, sive non dispositorum, quatenus dum in verecundè erigitur vexillum iniquitatis, peccandi facilitas deposito pudore aperitur. Unde Patres peccatum scandali Deicidio Judæorum conferre non timent. *Num tibi videtur*, inquit Bernardus, *graviores ab eo Christum suslinere persecutionem, qui suggestionem malignam, exemplo pernicioso, scandali occasione ab eo pervertit animas, quas redemit; quam à Iudæo, qui sanguinem suum fudit?*

R E F L E X I O.

Quavis inæqualia sint, distinctaque peccata, nec inter se connexionem habeant, quia bona apparentia, quæ concupiscunt peccatores, sæpius nedum disparata sunt, sed opposita; amor enim sui, ut docet D. Thomas q. 93. art. 1. ad 3. *disgregat affectum hominis in diversa, prout scilicet homo se amat, appetendo sibi bona temporalia, quæ sunt varia, & diversa.* In quo differt ab amore Dei, qui ut ait idem S. Doctor, *est congregativus, in quantum affectum hominis à multis ducit in unum: & idcirco virtutes, quæ ex amore Dei causantur, connexionem habent, quia nimirum ad unum omnes tendunt, quod sine omnibus haberi perfectè nequaquam potest, nimirum rectitudinem, & bene operandi facilitatem juxta regulas prudentiæ, & legis divinæ, ut aliàs ostendimus; vitia verò ab uno, scilicet medio rationis recedunt: patet autem, quod per tendentiam*

tiam in unum distincta connectuntur, sicut lineæ ad unum punctum confluentes uniuntur, à quo dum recedunt, à se etiam divelluntur. Quavis, inquam, hæc ita sint, formidanda tamen est Apostoli Jacobi vox, quam *cap. 2.* emittit? *Quicumque totam legem servaverit, offendat tamen in uno, factus est omnium reus.* Fit autem omnium reus, qui peccat in uno, non solum quia omnia merita quàmlibet eximia æquè mortificat, ac si omnium criminum sordibus inquinaretur; non solum quia omnibus operibus peccatum comitantibus meritum adimit; non solum quia non minus Deo privatur, quàm si in omnia fuisset scelera prolapsus; non solum quia quolibet mortali charitatem extinguit, in qua universa lex pendet & Prophetæ; non solum quia in quolibet peccato superbia, & ingratitude inveniuntur, in quibus criminum omnium virus veluti compendio includitur: sed etiam quia qui semel positos à ratione aggeres disruperint, qui præfinitos à lege limites & lineas transilierint, post resoluta divinæ legis, quibus à peccato prohibebantur, vincula, postque perruptum sacrum hunc obicem humanis cupiditatibus oppositum, in omnia facile vitia quadratâ portâ ruunt. Peccatum enim, juxta tritum Gregorii axioma, quod per pœnitentiam non deletur, suo pondere in aliud trahit.

Hinc est, quod peccator apponit iniquitatem super iniquitatem, & abyssus abyssum invocante, ita eum nefaria inflammat æmulatio, ut sicut boni optant cunctos honestate mentium vincere, & virtutum universalium culmen ascendere, sic ille cupiat ceteros pravitate superare, optetque palmas sibi universorum scelerum vendicare. Ubi-

nam

nam gentium sumus, ô Christiane Lector? Quò abiit primævi Christianismi sanctimonia? Vellem mihi in hoc loco ad exæquandam rerum dignitatem, parem negotio eloquentiam dari, ut scilicet tantum virtutis esset in querimonia, quantum doloris in causa. Et quæ tandem, rogo, spes emendationis in nobis est, qui nequitiam pro sapientia diligimus; qui tantò prudentiores esse nos credimus, quantò peiores sumus; quive non errore opinionis ad malum ducimur, sed studio malæ voluntatis adnitimur, ut semper peiores esse videamur?

O ubi estis fontes lacrymarum! vel quomodo temperant à fletibus oculi, dum vident præsentis faciem Christianismi? Prætermitto rabiem cupiditatis, vitium totius generis humani. Prætereo avaritiæ inhumanitatem, cui omnes student. Relinquantur ebrietatum & gulæ comestiones nobilibus, ignobilibusque cōmunes. Taceantur superbia & tumor, peculiare olim divitum vitium, nunc ubique sparsum. Omittatur omne fraudum, falsitatum, & perjuriarum nefas, omnis spurcitiarum libido. Singularia, inquam, vitia silentio prætermittantur, quia nulla improbitas est, quæ apud Christianos non redundet. Et verius apud nos esse probatur, quod olim lugens deplorabat. *lib.6. de provid. Salvianus: Sicut in sentinam profunda navis colluviones omnium sordium; sic in mores nostros quasi ex omni mundo vitia fluxerunt. Cateri homines etsi nonnullis flagitiorum vitiis obligati sunt, quibusdam tamen non implicantur: multos etsi accusat incontinentia corporum, simplicitas commendat animorum. In nobis nihil horum est, quia totum admodum malum. Exceptis enim paucissimis, ubi*

... ut de exterioribus
interioribusque partibus ordinem oblatum.
et adhibere debentur : & sunt. Fama ipsa
est natura humana infirmas , sic totius
universi agendi modum determinante paginam
universalem legibus regit : Quis addit
quidam non videtur : nec videretur
magis quod dicitur per se quidem talis,
sed magis universaliter videtur. Et tunc
per se ipsum agendum.

CAPT II

[Faint handwritten text]

cundum, sed sterile censendum, cum nos orbet fructu virtutum.

SPECVLATIO I.

Peccatorum multiplex divisio sub brevitate transcurritur.

Primò dividuntur peccata in spiritualia & carnalia : priora in delectatione spirituali, posteriora in carnali consummantur. Hæc divisio licet sit adæquata, non est tamen essentialis, ut quidam credunt. Cujus ratio est, non solum quia carnale, & spirituale non sunt differentię essentialis peccati ut sic; sed etiam quia delectationes carnales, & spirituales non sequuntur operationes specie moralī diversas; ejusdem enim specificæ malitiæ est superbia interior & exterior: ergo & delectationes utramque consequentes: eadem malitiæ moralis labe sordescunt; delectationes quippe non ex se bonæ, vel malæ sunt, sed totam ab actibus vnde fluunt, honestatem, vel turpitudinem mutuuntur.

Secundò peccatorum, alia sunt contra Deum, alia contra seipsum, alia contra proximum. Licet enim omnia & singula peccata contra Deum sint, à quo avertunt, contra ipsum etiam peccatorem sint, cum naturæ adversentur; in nonnullis tamen injuria Dei, in aliis nocumentum proprium, in cæteris proximi damnum magis eminent ratione objecti quod respiciunt, & virtutum quibus adversantur. Sicut enim virtutum aliæ rectè nos circa Deum disponunt, qua-

les sunt Theologicæ, religio, & pœnitentia; aliæ nos ipsos rectè informant, ut fortitudo, & temperantia; aliæ in ordine ad proximum nos benè instituunt, ut justitia, misericordia, & mansuetudo; unde sententiosè dicebat Apostolus Tit. 2. *Sobriè, & justè, & piè vivamus.* Piè erga Deum, justè erga proximum, sobriè erga nosmetipsos. Ita vitiis virtutibus illis adversis specialiter vel Deum, vel nosmetipsos, vel proximum lædimus. Quæ divisio utique essentialis censenda est, cùm ab objecto specialiter dissona, unde dignoscitur habituum character, desumatur.

Tertiò dividitur peccatum in peccatum cordis, oris, & operis. Quæ divisio tripliciter intelligi potest. Primò ut per peccatum cordis illud accipiatur, quod interiùs consummatur, ut hæresis; per peccatum oris illud, quod loquutione perficitur, ut mendacium; per peccatum operis illud, quod opere completur, ut adulterium, vel homicidium. Secundò sic exponitur hæc divisio, ut illa tria distinguantur solùm ex intentione peccantis, & unum ab alio secernentis, ut si quis mœchari vellet, turpia tamen desideria executioni mandare non vult, quia vel aperire nefandam voluntatem erubescit, vel pœnam timet. Tertiò sic non incommodè intelligitur hæc divisio, ut illa tria distinguantur sicut inchoatio, progressus, & consummatio; & tunc non sunt distincta etiam numero peccata, sed varia ejusdem peccati membra, unde sola operis consummatio in confessione aperienda est, quia cùm aliquis de adulterio se accusat, & illud voluisse, & verborum lenociniis mulierem prolectasse satis superque intelligitur.

Quartò

Quartò aliud est peccatum commissionis, aliud omissionis, de qua divisione abundè satis superioribus speculationibus disputavimus. Ad intellectum tamen doctrinæ D. Thomæ q. 72. art. 6. ubi hanc divisionem exponit, placet observare, quod licèt communiter, & verè asseratur peccatum omissionis à peccato commissionis distingui, quòd primum sit contra præceptum affirmativum, secundum verò contra negativum; notat tamen S. Præceptor ibidem *ad 2.* peccata non distingui, nec diversificari secundum diversa præcepta legis. Quia peccata non habent speciem ex parte aversionis, quia secundum hanc rationem privatio sunt, sed ex parte conversionis ad objectum, unde actus humani, & voluntarii speciem sortiuntur; sicut motus non specificantur, nec distinguuntur ex termino à quo recedunt, sed ex eo ad quem tendunt. Esse autem contra legem ad aversionem spectat, non ad conversionem: Ergo ex diversitate legum non provenit formaliter diversitas peccatorum. Unde furtum à lege civili, ecclesiastica, naturali, & divina prohibitum, eiusdem speciei est, sicut & prohibitio à diversis Prælatis subordinatis indicta, quia non novam obligationem inducit, sed eandem repetit & inculcat.

Ad quorum claritatem advertendum est, cum supradictis stare, ex legum, superiorumque præceptum inculcantium multiplicatione non parùm aggravari peccatum, quia tunc transgressio obfirmatam cordis duritiem, peccatoris malitiam, mandatorum contemptum, & iniquitatem quasi ex adipe prodeuntem & transeuntem in affectum cordis significat.

Advertendum rursus, ex diversitate legum

sum, nec præintentum sit, peccatum proculdubio aggravat etiam directè, quia virtualiter velle censemur quidquid ex eo, quod volumus per se fluit. Unde in illis ignorantia non excusat.

Sed inquires: Hæ regulæ in multis deficiunt. Nam mulier prævidens ob ornatum accuratum, vel ingressum in Ecclesiam, se turpiter amandam, non tenetur se jure suo privare, modò nihil mali intendat. Ergo periculum, nocumentumve prævisum, non causat etiam indirectè peccatum. Ergo prima regula certa non est. Nec secunda etiam; nam si ego videam ex actione mea per accidens damnum alteri inferri, & peccandi materiam ministrari, teneor ab illo opere abstinere. V. g. si sciam Confessarium illum ex peccatorum meorum exomologesi lapsurum, vel talem cibum pollutionem voluntariam causaturum, teneor & alium adire Confessarium, & hujusmodi me cibo non necessario privare. Ergo falsum est, nocumentum per accidens sequutum non aggravare peccatum. Tertia etiam regula nihilo melior est; nam sollicitans mulierem ad peccatum dispositam, non peccat peccato scandali, si solùm carnis propriæ delectationem, non spiritale illius damnum intendat. Ergo nocumentum per se sequutum non semper aggravat operis iniquitatem.

Respondeo; has regulas firmas utrasque consistere. Ad primum facilis responsio est; mulier enim tale nocumentum nec causat, nec ex ejus ornatu, vel incessu sequi natum est, sed ex sola oritur petulantia juvenis, qui & imaginibus & sacramentis sæpe nimis ad peccandum abutitur. Unde mulier si christianæ modestiæ limites non præter-

prætergrediatur, juvenis peccatis minimè onerabitur. Sed hic non atramento, sed lacrymis, sed sanguine describenda, deplorandaque foret mulierum hujus sæculi luxuriantium vanitas infruita, quæ solæ perire nolunt, nisi aliis causa perditionis existant; quæ incredibili amentia dum picturas quærunt, effigiem naturæ mutant, opus Creatoris adulterant, imaginem à Deo fictam delent, quia vultum materiali candore obliniunt, exquisito rubore perfundunt, collum catena constringunt, pedes compedibus arctant, corpus obruunt indumentis. Considerent, quæso, quod juxta patres, mulieres illæ antichristianæ, & paganismi spiritu plenissimæ, dum crines calamistro rotant, dum se totas inanibus fucant pigmentis, adulterinisque fallaciis, ut vultus hominum ad se provocent, etsi nullum inde sequatur damnum, judicium tamen patientur æternum, quia venenum attulerunt, si fuisset qui biberet. Attendant quod juxta sacrum, quo uno judicabimur, Evangelium, subtilium, pretiosarumque vestium cultus peccatum habetur; si enim, ut Gregorius Magnus notat, culpa non esset, nequaquam sermo Dei tam vigilanter exprimeret, quod dives, qui torquebatur apud inferos, bysso & purpura indutus fuisset. Denique cogitent vanum cor magis cultui vestium, quam virtutum insistere, & exteriorem corporis superfluitatem interioris vanitatis indicium esse. Mollia indumenta animi molliem indicant, nec tantum curaretur corporis cultus, nisi prius neglecta fuisset mens inculta virtutibus. Scio equidem ornatum mulierum, & exquisitum cultum, tametsi à christiana simplicitate & humilitate per se abhorrentem, ideoque ab Apostolo *circumpositiones*

nes auri improbante vetitum, interdum fieri licitum, & rectum, si nimirum maritus, cui subesse jubetur uxor, præcipiat, nec possit exorari. Sed tunc licet quidem cultus, sed non lascivia; debetque mulier verè Christiana in superbo cultu cor humile, in splendido vestitu Esther Reginae animum retinere, quæ cultum suum tanti faciebat, quanti pannum menstruatae.

Ad secundum respondeo, quod licet per se non sequatur tale nocumentum, teneor tamen & proximo, & mihi in extremis periculis ex charitate subvenire: & quia peccatum malorum omnium summum est, teneor & aliena, & propria, si per me solum stet, peccata impedire. Quomodo enim Deum sincere & super omnia amare ille dici potest, qui periturae utilitatis, vel fluxae delectationis jacturam pati detrectat, ut mortem spiritalem proximi, vel suam cum infinita Dei injuria conjunctam devitet?

Certè sicut licet jure meo utar, dum propria bona expendo, vel servo ex charitate, tamen me tali jure privare, & pauperibus superflua erogare teneor: ita à fortiori ob memoratas in argumento commoditates teneor mortem spiritalem propriam, vel alienam corporali deteriorem declinare.

Ad tertium dicendum, sollicitationem mulieris dispositæ non infici malitia peccati scandali, quia meretrix illa ad peccandum parata est, nec pervertitur voluntas, sed materia datur pervertitæ voluntati, ubi tota residet malitia peccatorum. Nec est simile de muliere, quæ inducitur, & ad peccandum attrahitur; quia ista non supponitur ad peccatum præparata, sed tentatione corrumpitur voluntas, & malo opere corpus.

Non

Non est etiam simile de fornicatione publica, quæ licet solius causâ delectationis quærat, scandalo tamen plena est, quia est virtualis sollicitatio & provocatio omnium sive dispositorum, sive non dispositorum, quatenus dum inverecundè erigitur, vexillum iniquitatis, peccandi, facilitas deposito pudore aperitur. Unde Patres peccatum scandali Deicidio Judæorum conferre non timent. *Num tibi videtur*, inquit Bernardus, *graviores ab eo Christum sustinere persecutionem, qui suggestionem malignam, exemplo pernicioso, scandali occasione ab eo pervertit animas, quas redemit; quam à Iudæo, qui sanguinem suum fudit?*

R E F L E X I O.

Quavis inæqualia sint, distinctaque peccata, nec inter se connexionem habeant, quia bona apparentia, quæ concupiscunt peccatores, sæpius nedum disparata sunt, sed opposita; amor enim sui, ut docet D. Thomas q. 93. art. 1. ad 3. *disgregat affectum hominis in diversa, prout scilicet homo se amat, appetendo sibi bona temporalia, quæ sunt varia, & diversa.* In quo differt ab amore Dei, qui ut ait idem S. Doctor, *est congregativus, in quantum affectum hominis à multis ducit in unum: & ideo virtutes, quæ ex amore Dei causantur, connexionem habent, quia nimirum ad unum omnes tendunt, quod sine omnibus haberi perfectè nequaquam potest, nimirum rectitudinem, & bene operandi facilitatem juxta regulas prudentiæ, & legis divinæ, ut aliàs ostendimus; vitia verò ab uno, scilicet medio rationis recedunt: patet autem, quod per tendentiam*

tiam in unum distincta connectuntur, sicut lineæ ad unum punctum confluentes uniuntur, à quo dum recedunt, à se etiam divelluntur. Quavis, inquam, hæc ita sint, formidanda tamen est Apostoli Jacobi vox, quam *cap. 2.* emittit? *Quicumque totam legem servaverit, offendat tamen in uno, factus est omnium reus.* Fit autem omnium reus, qui peccat in uno, non solum quia omnia merita quàmlibet eximia æquè mortificat, ac si omnium criminum sordibus inquinaretur; non solum quia omnibus operibus peccatum comitantibus meritum adimit; non solum quia non minùs Deo privatur, quàm si in omnia fuisset scelera prolapsus; non solum quia quolibet mortali charitatem extinguit, in qua universa lex pendet & Prophetæ; non solum quia in quolibet peccato superbia, & ingratitude inveniuntur, in quibus criminum omnium virus veluti compendio includitur: sed etiam quia qui semel positos à ratione aggeres disruperint, qui præfinitos à lege limites & lineas transilierint, post resoluta divinæ legis, quibus à peccato prohibebantur, vincula, postque perruptum sacrum hunc obicem humanis cupiditatibus oppositum, in omnia facile vitia quadratâ portâ ruunt. Peccatum enim, juxta tritum Gregorii axioma, quod per pœnitentiam non deletur, suo pondere in aliud trahit.

Hinc est, quod peccator apponit iniquitatem super iniquitatem, & abyssus abyssum invocante, ita eum nefaria inflamat æmulatio, ut sicut boni optant cunctos honestate mentium vincere, & virtutum universalum culmen ascendere, sic ille cupiat ceteros pravitate superare, optetque palmas sibi universorum scelerum vendicare. Ubi-

nam

nam gentium sumus, ô Christiane Lector? Quò abiit primævi Christianismi sanctimonia? Vellem mihi in hoc loco ad exæquandam rerum dignitatem, parem negotio eloquentiam dari, ut scilicet tantum virtutis esset in querimonia, quantum doloris in causa. Et quæ tandem, rogo, spes emendationis in nobis est, qui nequitiam pro sapientia diligimus; qui tantò prudentiores esse nos credimus, quantò peiores sumus; quive non errore opinionis ad malum ducimur, sed studio malæ voluntatis adnitimur, ut semper peiores esse videamur?

O ubi estis fontes lacrymarum! vel quomodo temperant à fletibus oculi, dum vident præsentis faciem Christianismi? Prætermitto rabiem cupiditatis, vitium totius generis humani. Prætereo avaritiæ inhumanitatem, cui omnes student. Relinquantur ebrietas & gulæ comestationes nobilibus ignobilibusque cômunes. Taceantur superbia & tumor, peculiare olim divitum vitium, nunc ubique sparsum. Omittatur omne fraudum, falsitatum, & perjuratorum nefas, omnis spurcitiarum libido. Singularia, inquam, vitia silentio prætermittantur, quia nulla improbitas est, quæ apud Christianos non redundet. Et verius apud nos esse probatur, quod olim Iugens deplorabat *lib.6. de provid.* Salvianus: *Sicut in sentinam profunda navis colluviones omnium sordium; sic in mores nostros quasi ex omni mundo vitia fluxerunt. Cateri homines etsi nonnullis flagitiorum vitiis obligati sunt, quibusdam tamen non implicantur: multos etsi accusat incontinentia corporum, simplicitas commendat animorum. In nobis nihil horum est, quia totum admodum malum. Exceptis enim paucissimis, ubi*

non omnia execratione digna? Sed ut de cæteris taceam, quis nescit totum fermè orbem obscenis libidinum cædis ardere; & sicut Ætna interstinis naturæ ferventis ardoribus, sic totum, quàm latè patet, mundum abominandis jugiter fornicationum ignibus æstare? Quis nescit scaturientes vitii civitates, urbes omnium iniquitatum genere furentes, plenas quidem turbis, sed magis turpitudinibus, vincentes se invicem, & certantes nequitia flagitiorum?

CAPVT II.

De variis & specialibus peccatorum divisionibus.

Licet solius boni sit esse sui diffusivam, subindeque sola virtus multiplex esse debeat, nescio tamen quo fato malum ipso bono fecundius in ramos fundatur infinitos; & cum unica sit ad quamlibet virtutem via, innumeræ sint semitæ iniquitatis, quibus ab eadem virtute recedimus. Sed absit ut ex fecunditate oriatur vitiorum multiplicitas, quæ non nisi ex corde arido & sterilegente procedit. Absit ut ferax terra illa dicatur, quæ spinas & tribulos germinare duntaxat nata est, & ad nihilum valet ultra, nisi ut conculcetur ab hominibus. Absit ut pestis momento grassata, & provincias depopulata fertilis esse dicatur, quia mortes invehit, funera multiplicat, sepulchra implet. Sic ergo malum, quàmlibet diffusum, & ubique sparsum, non fecundum,

cundum, sed sterile censendum, cum nos orbet fructu virtutum.

SPECVLATIO I.

Peccatorum multiplex divisio sub brevitate transcurritur.

Primò dividuntur peccata in spiritualia & carnalia : priora in delectatione spirituali, posteriora in carnali consummantur. Hæc divisio licet sit adæquata, non est tamen essentialis, ut quidam credunt. Cujus ratio est, non solum quia carnale, & spirituale non sunt differentię essentialis peccati ut sic; sed etiam quia delectationes carnales, & spirituales non sequuntur operationes specie morali diversas; ejusdem enim specificę malitię est superbia interior & exterior: ergo & delectationes utramque consequentes eadem malitię moralis labe sordescunt; delectationes quippe non ex se bonę, vel malę sunt, sed totam ab actibus unde fluunt, honestatem, vel turpitudinem mutuuntur.

Secundò peccatorum alia sunt contra Deum, alia contra seipsum, alia contra proximum. Licet enim omnia & singula peccata contra Deum sint, à quo avertunt, contra ipsum etiam peccatorem sint, cum naturę adversentur; in nonnullis tamen injuria Dei, in aliis nocumentum proprium, in cæteris proximi damnum magis eminent ratione objecti quod respiciunt, & virtutum quibus adversantur. Sicut enim virtutum alię rectè nos circa Deum disponunt, qua-

les sunt Theologicae, religio, & poenitentia; aliae nos ipsos rectè informant, ut fortitudo, & temperantia; aliae in ordine ad proximum nos bene instituunt, ut iustitia, misericordia, & mansuetudo; unde sententiosè dicebat Apostolus Tit. 2. *Sobriè, & justè, & piè vivamus.* Piè erga Deum, justè erga proximum, sobriè erga nosmetipsos. Ita vitiis virtutibus illis adversis specialiter vel Deum, vel nosmetipsos, vel proximum laedimus. Quae divisio utique essentialis censenda est, cum ab objecto specialiter dissona, unde dignoscitur habituum character, desumatur.

Tertiò dividitur peccatum in peccatum cordis, oris, & operis. Quae divisio tripliciter intelligi potest. Primò ut per peccatum cordis illud accipiat, quod interiùs consummatur, ut haeresis; per peccatum oris illud, quod loquutione perficitur, ut mendacium; per peccatum operis illud, quod opere completur, ut adulterium, vel homicidium. Secundò sic exponitur haec divisio, ut illa tria distinguantur solum ex intentione peccantis, & unum ab alio discernentis, ut si quis mœchari vellet, turpia tamen desideria executioni mandare non vult, quia vel aperire nefandam voluntatem erubescit, vel poenam timet. Tertiò sic non incommodè intelligitur haec divisio, ut illa tria distinguantur sicut inchoatio, progressus, & consummatio; & tunc non sunt distincta etiam numero peccata, sed varia ejusdem peccati membra, unde sola operis consummatio in confessione aperienda est, quia cum aliquis de adulterio se accusat, & illud voluisse, & verborum lenociniis mulierem prolectasse satis superque intelligitur.

Quartò

Quartò aliud est peccatum commissionis, aliud omissionis, de qua divisione abundè satis superioribus speculationibus disputavimus. Ad intellectum tamen doctrinæ D. Thomæ q. 72. art. 6. ubi hanc divisionem exponit, placet observare, quod licèt communiter, & verè asseratur peccatum omissionis à peccato commissionis distingui, quòd primum sit contra præceptum affirmativum, secundum verò contra negativum; notat tamen S. Præceptor ibidem ad 2. peccata non distingui, nec diversificari secundum diversa præcepta legis. Quia peccata non habent speciem ex parte aversionis, quia secundum hanc rationem privatio sunt, sed ex parte conversionis ad objectum, unde actus humani, & voluntarii speciem sortiuntur; sicut motus non specificantur, nec distinguuntur ex termino à quo recedunt, sed ex eo ad quem tendunt. Esse autem contra legem ad aversionem spectat, non ad conversionem: Ego ex diversitate legum non provenit formaliter diversitas peccatorum. Unde furtum à lege civili, ecclesiastica, naturali, & divina prohibitum, eiusdem speciei est, sicut & prohibitio à diversis Prælatis subordinatis indicta, quia non novam obligationem inducit, sed eandem repetit & inculcat.

Ad quorum claritatem advertendum est, cum supradictis stare, ex legum, superiorumque præceptum inculcantium multiplicatione non parùm aggravari peccatum, quia tunc transgressio obfirmatam cordis duritiem, peccatoris malitiam, mandatorum contemptum, & iniquitatem quasi ex adipe prodeuntem & transeuntem in affectum cordis significat.

Advertendum rursus, ex diversitate legum

fuæ mandato teneretur; si enim diverfa sint Ecclefiæ, & Regulæ motiva, plura etiam ab eo peccata committi indubitatum est, putà si Ecclesia motivo temperantiæ, Regula motivo cultus passionis Christi, vel alio quovis jejunia illa præfcriberet: & tunc Franciscanus duplex peccatum patraret, imò & triplex secundùm Cajetanum 2. 2. q. 88. art. 5. nimirum contra religionem ratione voti, contra obedientiam ratione præcepti in Regula denunciati, & contra temperantiam ab Ecclesia constitutam. Idem contingit in specialis inobdientiæ peccatis, quia inobedientia non solùm respicit violationem præcepti ex parte aversionis & per modum termini à quo, quod aliis peccatis commune est, sed insuper violationem illam per modum termini ad quem prosequitur: unde non mirum si inobedientia ex diversitate præceptorum distinguatur; cùm distincta præcepta, quæ conculcat, diverfa etiam sint illius objecta, quæ respicit.

Quintò alia dicuntur peccata superabundantiæ, alia peccata defectus: priora recedunt à medio virtutis per excessum, ut prodigalitas: posteriora verò ab eodem medio per defectum discedunt, ut avaritia, inter quam & prodigalitem media incedit liberalitas. Similiter temperantia media est inter intemperantiam, quæ infrunito delectationum amore capitur, & insensibilitatem, quæ omnem, tametsi honestam, nedum despicit, sed & odit voluptatem. Unde hujusmodi peccata non solùm specie differunt, sed etiam è diametro contraria sunt.

Sextò alia sunt peccata ignorantiae, alia infirmitatis, alia malitiæ. Peccatum ignorantiae contingit, quando quis perpetrat opus malum, quod

ignorat esse malum; contrahitur autem macula peccati, si ignorantia vincibilis sit & inexcusabilis. Peccatum infirmitatis est illud, quod passione alliciente & impellente patrat; sunt enim passionibus animi ægritudines, quibus partis superioris functiones vel impediuntur, vel præoccupantur, vel obscurantur. Unde Philosophus *lib. 7. Ethic.* comparat incontinentem paralytico, cujus partes moventur in contrarium ejus quod ipse disponit. Peccatum denique malitiæ est illud, quod homo ex industria, sciens, eligens & advertens committit, non quod malum sub ratione mali intendat, sed quia bonum temporale amat, eoque potiri vult, quanvis inde passurum se bonorum spiritualium dispendium sciat, proprium & apparens bonum ordini rationis, legi divinæ, & charitatis præferens. *Malum*, inquit D. Thomas quæst. 78. art. 1. ad 2. *non potest esse secundum se intentum ab aliquo, potest tamen esse intentum ad vitandum aliud malum, vel ad consequendum aliud bonum. Et in tali casu aliquis eligeret consequi bonum per se intentum absque hoc, quod pateretur detrimentum alterius boni: sicut aliquis lascivus vellet frui delectatione absque offensa Dei. Sed duobus propositis magis vult peccando incurrere offensam Dei, quam delectatione privetur.*

Ad hujus divisionis majorem claritatem observandum est, tria esse humanorum actuum principia, è quibus peccatum oriri potest & assolet, quæ sunt ratio, appetitus sensitivus, & voluntas: unde si defectus se teneat ex parte intellectus speculativi legem ignorantis, vel non advertentis, peccatum erit ex ignorantia; si autem se teneat ex parte appetitus passionum tumultu rationem

tionem pertrahentis aut obnubilantis, peccatum erit ex infirmitate; si autem defectus se teneat ex parte voluntatis opus aliquod contra ordinem rationis & legis ex industria, animoque, ut ita dicam, frigido, sedato, & tranquillo eligentis, peccatum erit ex malitia voluntatis, non ab extrinseco impulsæ, sed propria iniquitate in malum proclivis.

Septimò peccata alia dicuntur capitalia, alia consequuta. Prima sunt quædam veluti peccatorum radices, è quibus omnia peccata originantur. Posteriora sunt germīna iniquitatis è radicibus illis nata & propagata. Ad cujus divisionis illustrationem non erit supervacaneum observare, quod sicut caput membrīs cæteris motum, vitam, vigoremque diffundit; sic quædam vitia in peccatorum nefando agmine ducatum tenent & primatum. Unde Greg. 31. *Moral.* huiusmodi vitia ducibus exercituum comparat, quia vitium capitale non solum est principium aliorum, sed etiam est directivum, & ductivum eorum. Sic docente D. Thoma q. 77. art. 4. amor sui dicitur principium omnis peccati, & ædificare usque ad contemptum Dei civitatem Babylo- nis, quia omnis actus pravus ex aliquo inordinato temporalis boni appetitu procedit. *Quod autem aliquis appetat inordinate aliquod temporale bonum, procedit ex hoc, quod inordinate amat seipsum, hoc enim est amare aliquem, velle ei bonum.* Unde manifestum est, quod inordinatus amor sui est causa omnis peccati. Et ad 3. Omne peccatum provenit vel ex inordinato appetitu alicujus boni, vel ex inordinata fuga alicujus mali: sed utrumque horum reducitur ad amorem sui; propter hoc enim homo vel appetit bona vel fugit mala, quia

706. *De peccatis. Dissert. I. Cap. II.*

amat seipsum. Nec obest, quod aliquando peccet homo ex inordinato amore proximi, quia amicus est quasi alter ipse, inquit ad 4. & ideo quod peccatur propter amorem amici, videtur propter amorem sui peccari. Sic teste Apostolo 1. *Timoth. ult.* cupiditas dicitur radix omnium malorum, sive per cupiditatem intelligatur inordinatus temporalium amor, quia omnia peccata transcendit, in eisque imbibitur, cum in omni peccato sit inordinata ad bonum commutabile conversio, sive per cupiditatem accipiamus perversam naturæ corruptæ ad bona corruptibilia inordinatè appetenda propensionem specialem, & ex vi peccati primigenii insemnatam, quæ meritò dicitur radix omnium peccatorum, quia sicut à radice ministratur toti arbori alimentum, sic ab amore corruptibilium cordibus filiorum Adam implantato corpus peccati cujusvis nutrimentum sugit: sive per cupiditatem intelligamus inordinatum divitiarum appetitum. Videmus enim, inquit D. Thomas q. 84. art. 1. quod per divitias homo acquirit facultatem perpetrandi quodcumque peccatum, & adhibendi desiderium cujuscumque peccati, eo quod ad habenda quæcumque temporalia bona potest homo per pecuniam juvari, secundum quod dicitur *Eccl. 10.* Pecunie obediunt omnia. Et secundum hoc pater, quod cupiditas divitiarum est radix omnium peccatorum. Et ad 2. & 3. Appetitus pecuniarum dicitur esse radix peccatorum, non quidem quia divitiae propter se quaruntur tanquam ultimus finis, sed quia multum queruntur, ut utiles ad omnem temporalem finem. Et quia universale bonum est appetibilis, quàm aliquod temporale bonum: ideo magis movet appetitum, quàm quædam bona singula

singularia, qua simul cum multis aliis per pecuniam haberi possunt. :: In moralibus consideratur, quod ut in pluribus est, non autem quod semper est, eo quod voluntas non ex necessitate operatur. Non igitur dicitur avaritia radix omnium malorum, quin interdum aliquod aliud malum sit radix ejus, sed quia ex ipsa frequentius alia mala oriuntur.

Sic etiam juxta Sapientem Eccl. 10. *superbia est initium omnis peccati.* Quia in omnibus bonis temporalibus acquirendis finis peccatoris est, ut per illa quandam singularem excellentiæ perfectionem consequatur. Vel etiam quia in omni peccato diffunditur virus superbiæ, quatenus per quodvis crimen subtrahit se homo à subjectione Dei, eique se supponere detrectat, cujus legem conculcat, & voluntatem intolerabili elatione floccifacit. Unde ibidem dicitur, quod *initium superbia hominis est apostatare à Deo*: ad superbiam enim pertinet nulli velle subjici superiori, & præcipue nolle subdi Deo, cui tamen servire, regnare est; cui mancipari gloria est sempiterna. Hinc Bernardus *serm. 3. vigil. Nativit.* observat, peccatorem extollere se supra Deum: *Vult enim Deus fieri voluntatem suam, & superbus vult fieri suam. Deus quidem in his tantum, quæ ratio approbat, vult suam fieri voluntatem; superbus verè, & cum ratione, & contra rationem.*

Sic denique septem dicuntur esse vitia capitalia, superbia, avaritia, luxuria, gula, acedia, ira, & invidia. Quia nimirum fines hujusmodi vitiorum habent, quasdam primarias rationes movendi appetitum; unde ex eis frequentius alia peccata oriuntur. Ad cujus evidentiam

considerandum est, quod quia voluntas naturaliter amat bonum & felicitatem, illud majorem habet vim movendæ voluntatis, quod participat aliquid de proprietate felicitatis, quam naturâ concupiscimus; de ratione autem felicitatis est bonum perfectum, & excellens; bonum sufficiens, & bonum delectabile: excellentiam ambit superbia, sufficientiam appetit avaritia: in divitiis eam promittentibus, delectationem quærunt luxuria & gula: Hinc etiam laborem, quo interturbatur felicitas, refugit acedia; & bonum alienum, quo propriæ excellentiæ singularitas impeditur, ægrè fert invidia, illi ique cum impetu & vindictâ extinguere molitur ira. Et quia ex illis fontibus profluunt omnia vitiorum reliquorum venena, ideo capitalia nominantur. Vide Gregorium Magnum *lib. 31. Moral. cap. 31.*

Octavo peccatum dividitur in mortale & veniale. Per primum corrumpitur vitæ spiritualis primum principium, quia per illud *deordinatur anima*, inquit D. Thomas q. 72. art. 5. *usque ad aversionem ab ultimo fine*; scilicet Deo, cui vivimus per charitatem: principium autem totius ordinis in moralibus est finis ultimus, qui ita se habet in operatiuis, sicut principium indemonstrabile in speculatiuis: & ideo dicitur mortale, quia etiam in naturalibus tunc contingit mors, quando tanta est inordinatio complexionis, ut destruaturs principium vitæ. Per peccatum verò veniale fit deordinatio citra aversionem à Deo, quia tametsi mediis non utatur peccans venialiter prout exigit finis, amorem tamen finis retinet, & principium vitæ spiritualis conservat. Sed de hac divisione, quæ latissimè patet,

patet, inferiùs speciatì speculatione differen-
dum erit.

Nonò, peccatum aliud est originale, aliud
actuale. Secundum est illud, quod propria
adulti voluntate patrat, dum homo in actus
pravos sponte prorumpit. Originale verò est
illud, quod à protoparentibus per generatio-
nem in posteros transfunditur, de cujus exi-
stentia, essentia, & propagatione operosiùs in-
frà disputabimus..

R E F L E X I O.

Ultimò alia sunt peccata Infidelium, alia pec-
cata Christianorum, & Catholicorum. Hæc di-
visio non tam expositione eget, quàm pavore.
Ne dubites, Lector, graviora esse, & ferè im-
mensum grandiora peccata tua, hoc ipso, quod
Christianus es. An nescis illud Isidori lib. 2. de
sum. bon. c. 19. *Tantò majus cognoscitur peccatum
esse, quantò major qui peccat, habetur?* Nunquid
legisti quod ait D. Thomas infrà quæst. 89. art. 5.
*Nunquam dignitas persona diminuit peccatum,
sed magis auget: unde nec peccatum est minus in
fidei, quàm in infidei, sed multò majus. Nam
& infidelium peccata magis merentur veniam
propter ignorantiam, secundum illud 1. Timot. 1.
Misericordiam Dei consequutus sum, quia igno-
rans feci in incredulitate mea. Et peccata fide-
lium aggravantur propter gratia Sacramenta,
secundum illud Hebr. 10. Quantò magis puta-
tis deteriora mereri supplicia, qui sanguinem
Testamenti, in quo sanctificatus est, pollutum
duxerit.*

Sed audiamus Jeremiam Christianum sui sæ-
culi

culi peccata deflentem, & veluti propheticè nostra scelera prævidentem; Salvianum, inquam, hoc argumentum variis suis de providentia libris persequentem, è quo nonnullas legimus gemmas, vel potiùs sagittas cor tuum, nisi planè duruerit, transfixuras. Quid tibi de recta in Christum fide, quid tibi de nomine Christiano adularis? Perdis, perdis planè vim tanti nominis vitio pravitatis. Omnino enim nihil prodest nomen sanctum habere sine moribus, & vita à professione discordans abrogat illustris tituli honorem per indignorum actuum vilitatem. Quid ergo est in quo tibi de Christiano nomine blandiaris, cum utique hoc ipso magis per nomen sacratissimum reus sis, si à sacro nomine moribus discrepes? Cur Deum sub religionis titulo lædis, ludis, & illudis, qui positus in regione amplius peccas? Ne te, quaso, sponte fallas, qui ab eximia Christiani nominis prerogativa discedis. Quia vix credimus te in Christum credere, qui Christi mandata conculcas; difficile namque est ut malè vivat qui benè credit. *Qui Christiani nominis opus non agit, Christianus non esse videtur: nomen enim sine actu, atque officio suo nihil est. Nam quid est dignitas in indigno, nisi ornamentum in luto?* ait laudatus Pater.

Hæc cum ita sint, quæ ratio est ut ipsi nos falsa opinione fallamus, existimantes scilicet, quia Christiani esse dicimur, quod opitulari nobis inter mala quæ agimus, nomen bonum possit? Cum Spiritus sanctus, nec fidem quidem dicat hominibus Christianis sine operibus bonis posse prodesse: & utique multò plus est, habere fidem, quàm nomen; quia nomen eff-

vocabulum hominis, fides autem fructus est mentis. Et tamen hunc ipsum fidei fructum infructuosum Apostolus sine operibus bonis esse testatur, dicens : *Fides sine operibus mortua est.* Subjungit etiam ad pudorem, & peccatorum hominum confusionem, non credere solum dæmones Dei nomen, sed etiam timere, & contremiscere. Hoc est dicere, quid tibi blandiris, o homo, quisquis es, credulitate, quæ sine timore, atque obsequio Dei nulla est? Aliquid plus te dæmones habent. Tu enim unam rem habes tantummodò, illi duas. Tu credulitatem habes, timorem non habes : illi credulitatem habent pariter & timorem.

Quid ergo injustius Christianis malis, aut quid perverse, sius esse potest? Christianis, inquam, qui tales dicuntur, & non sunt; qui per flagitia & turpitudines suas nomen religionis infamant; qui ore fatentur se nosse Deum, factis autem negant, per quos via veritatis blasphematur, & sacrosanctum Domini Dei nomen sacrilegorum hominum maledictione violatur; qui in lege gloriantur, & per prævaricationem legis Deum inhonorant. Nonne hoc ipso deteriores sunt, quòd meliores esse deberent? quia impugnant moribus suis professionem suam. *Longè magis damnabilis est malitia, quam titulus bonitatis accusat: & reatus impii est pium nomen.*

O perverse Christiane, utinam calidus esses, aut frigidus; utinam aut calorem fidei haberes bonorum Christianorum, aut certè frigus & ignorantiam paganorum. Quia aut te fides amore calida sanctum redderet, aut certè legis ignorantia quad intenus excusaret. Nunc autem quia Christum jam agnovisti, & negligis quem agnovisti.

agnovisti, qui susceptus es quasi intra os Dei pes fidei agnitionem, projicere, & evomere ex ore Dei per teporem. Nonne melius fuisset tibi non cognovisse veritatem, quàm retrorsum reflecti à tradito tibi mandato. Quia longè culpabilior est qui legem Dei habet, & spernit, illo qui nec habet omninò, nec novit; & *minoris criminis reatus est legem nescire, quàm spernere.*

SPECVLATIO II.

Divisio peccati in mortale, & veniale operosius explicatur. Verum utriusque discrimen est, quod mortale repugnat Dei gratiæ & amicitia, quam veniale compatitur.

VERITAS Catholica est, admittenda esse aliqua peccata mortalia, seu animæ mortem spirituales per privationem gratiæ & reatum pœnæ æternæ omni morte durioris inferentia; & alia esse venialia, quæ cum vita animæ, scilicet gratia, sociari possunt. Habetur apertè hæc veritas ex illis sacrarum Scripturarum apertissimis testimoniis, in quibus sæpè sæpius ea recensentur peccata, quorum patratorebus à regno cœlorum exilium, & æterni ignis gehennam Deus minatur, ut *Matth. 5. 18. & 25. cap.* nec non *Rom. 10.* claret. Peccata verò venialia colligit *S. Augustinus epist. 108. & lib. 50. homiliarum, homil. 19.* ex illo *Matth. 6. Dimitte nobis debita*

debita nostra, id est peccata venialia quotidiana, pro quibus etiam quotidiana sacrificia eleemosynarum, jejuniorum, & orationum offerre non cessamus. Colligit etiam ex illo 1. Joan. 1. *Si dixerimus, quoniam peccatum non habemus, ipsi nos seducimus.* Quod de viris sanctissimis à gravibus quibusque offensis abstinentibus verum est, qui non possunt terrenorum actuum pulvere non respergi, & ut ait Magnus Leo serm. 4. Quadrag. *Dum per varias actiones vita hujus sollicitudo distenditur, necesse est de mundano pulvere etiam religiosi corda sordescere.* Denique serm. 41. *de Sanctis.* colligit admittenda esse peccata venialia ex illo 1. Cor. 3. *Si quis autem superedificat ligna, fenum, stipulam, salvus erit, sic tamen quasi per ignem.* D. verò Hieronymus hanc veritatem deducit ex illo Proverb. 27. *Septies in die cadet justus, & resurget: impij autem corrueunt in malum.* Ubi apertè dicitur, justum cadere, nec tamen perdere justitiam, nec corrue- re in malum, id est peccatum mortale, sicut im- pium: *Quomodo, inquit, justus appellatur, qui cadere, id est peccare memoratur, nisi quia de levibus, quotidianisque loquitur peccatis?* Et hæc semper fuit Ecclesiæ Catholicæ fides, perpetua traditione & multiplici Conciliorum Milevitani & Tridentini definitione firmata. Hoc posito, jactoque fundamento,

Probatur speculatio: Essentia peccati mortalis est, quod mortem spiritalem animæ inferat destruendo & veluti eradicando principium vitæ spiritualis; in quo distinguitur à veniali, quod cum non convellat principium vitæ, conservat etiam principium veniæ, quæ tali potest princi- pio obtineri. Atqui vita animæ est gratia, cha-
ritas.

ritas, & amicitia Dei, quam tollit mortale, compatitur verò veniale. Unde ait D. Thomas q. 7. de malo, art. 1. *Si charitas excludatur, est peccatum mortale: si autem sit talis defectus rectitudinis, qui charitatem non excludat, erit peccatum veniale.* Ergo prima, per se, & essentialis differentia peccati mortalis à veniali, est quod veniale amicitiam Dei compatitur, quam mortale penitus à fundamentis subruit, unde oritur animæ mors ex culpabili Dei privatione proficiscens, juxta illud Augustini *serm. 4. de verbis Domini: Sicut anima est vita corporis, sic anima vita est Deus: Sicut exspirat corpus, dum animam emittit, ita exspirat anima, cum Deum amittit. Deus amissus mors anima; anima emissæ mors corporis.* Deum autem moraliter amittimus, cum ejus amicitiam dissolvimus.

Confirmatur radicitus enumeratione aliorum discriminum, quæ peccatum mortale inter & veniale interponi possunt. Illud discrimen est essentialis, primarium, & per se, ex quo omnia alia discrimina per modum proprietatis & corollariorum liquidò consequuntur. Atqui ex eo, quod peccatum mortale destruat charitatem, gratiam, & amicitiam Dei, eamque compatiatur veniale, omnia alia discrimina derivantur. Ergo illa differentia à nobis assignata est essentialis, primaria, & per se conveniens. Major patet, illud enim censetur essentialis in aliqua re, & constitutivum, subindeque distinctivum illius, quod primum in ea invenitur, ex eoque cætera veluti consecutaria fluunt: ideo enim rationale est differentia essentialis hominis, quia est primum ex prædicatis propriis & caracteristicis hominis. Minor verò probatur inductione.

Ex.

Ex eo enim, quod peccato mortali extinguitur charitas, sequitur primò, per peccatum mortale destrui ordinem ad ultimum finem, in quem charitas hominem convertit; per veniale ordinem illum non violari, quia cum amicitiam Dei non dirimat, ab ultimo fine non avertit, sed circa media duntaxat cæpistat venialiter peccans.

Sequitur secundò, per peccatum mortale constituere hominem finem ultimum in creatura, secus per peccatum veniale; quia cum peccans mortaliter amicitiam Dei floccifaciat, fit inde peccatorem illum plus appretiativè creaturam quàm Deum diligere. At verò peccatum veniale, cum Dei amicitiam non dissolvat, ordinem ad ultimum finem, & omnium affectuum saltem habitualement ad Deum relationem non tollit. Quid ingentem perversitatem diffusè satis tomo præcedenti, *dissert. 2. cap. 1. specul. 2. & 3.* in solutionibus argumentorum exposuimus, ostendimusque peccatorem in actu exercito habere proprium bonum pro Deo suo, & dicere cum Judæis Luc. 19. *Nolumus hunc (Christum) regnare super nos;* & ob hanc causam degulosis affirmare Saulum Philipp. 3. quod eorum *Deus venter est.* Et Ephes. 5. avaritiam esse *deorum servitutem*, quia ut ait Chrysologus: *Avari statera iniquissima est; plus enim in ea ponderat obolus, quàm Deus; plus nummus, quàm anima.* In hanc porrò perversitatem, seu ordinis inversionem non incurrit qui venialiter peccat, quia charitatem, quâ in ultimum finem ordinamur, non lædit. Et ideo tam frequenter docet D. Thomas, peccatum veniale referri habitualiter in Deum, quatenus vel charitatis habitum.

habitum compatitur, qui ex natura sua omnia in Deum referre natus est, nisi per accidens opus sit hujusmodi relationis incapax; vel quatenus peccans venialiter peccatum in proprium bonum refert, quod habitu charitatis in Deum permanenter relatum est; vel tandem quia licet charitas non habeat dominium directum in peccata venialia, quæ non potest in Deum referre, neque enim potest fieri propter Deum quod displicet Deo, habet tamen dominium indirectum, quatenus prohibere potest ne ea fiant, licet non semper impediat: sicut dispositiones prauæ remanentes post iustificationem subji-ciuntur dominio charitatis, non quod hæc possit eorum actus imperare, sed quia ne prorumpant in actus, prohibere jure potest. Sed de his plura loco citato, ubi objectiones contra has veritates militantes ex dependentia actionum humanarum ab ultimo fine petitas diximus.

Sequitur tertio, per peccatum mortale induci inordinationem per se irreparabilem, secus per peccatum veniale, quia cum peccatum mortale destruat charitatem & ordinem ad ultimum finem, convellit etiam omne principium intrinsecum vitæ spiritualis, quod cum non tollat peccatum veniale, salvat etiam principium, quo damna ab ipso impetrata refarciri queant. Unde D. Thomas *quest. 72. art. 5.* ait: *Deordinatio mortis, quæ est per remotionem principij vitæ, est irreparabilis secundum naturam; inordinatio autem agnitæ reparari potest propter id, quod saluatur principium vitæ. Similiter est in his, quæ pertinent ad animam. Nam in speculâri vis, qui errat circa principia, imper-suasibilis est; qui autem errat salvatis principijs, per ipsa*

ipsa principia revocari potest. Et similiter in operativis, qui peccando avertitur ab ultimo fine, quantum est ex natura peccati, habet lapsum irreparabilem; & ideo dicitur peccare mortaliter, aternaliter puniendus. Qui verò peccat citra aversionem à Deo, ex ipsa ratione peccati reparabiliter deordinatur, quia salatur principium; & ideo dicitur peccare venialiter, quia scilicet non ita peccat, ut mereatur interminabilem pœnam. Quam doctrinam repetit, & pro more nova luce perfundit S. Præceptor quæst. 88. art. 1. dicens: Peccatum aliquod mortale dicitur ad similitudinem morbi, qui dicitur mortalis ex eo, quod inducit defectum irreparabilem per destitutionem alicujus principii. Principii autem spiritualis vite, quæ est secundum virtutem, est ordo ad ultimum finem; qui quidem si destitutus fuerit, reparari non potest per aliquod principium intrinsecum, sed solum per virtutem divinam; quia inordinationes eorum, quæ sunt ad finem, reparantur ex fine: sicut error, qui accidit circa conclusiones, per veritatem principiorum. Defectus ergo ultimi finis non potest per aliquid aliud reparari, quod sit principalius, sicut nec error qui est circa principia. Et ideo hujusmodi peccata dicuntur mortalia, quasi irreparabilia. Peccata autem quæ habent inordinationem circa ea quæ sunt ad finem, conservato ordine ad ultimum finem reparabilia sunt, & hæc dicuntur venialia.

Sequitur quartò, peccatum mortale destruere omnes virtutes infusas, secus verò veniale. Quia cum quodlibet mortale funditus evertat charitates infusas, interire virtutes necesse est, utpote quæ uni charitati, cujus sunt proprietates, in-

nixæ

nixæ sunt. Fidem tamen, & spem post tantum tot virtutum naufragium remanere, aliàs ostendimus, sed languidas illas, informes, & ut ita dicam decoloratas, nec sub ratione virtutis simpliciter. At verò peccatum veniale ordinem ad ultimum finem non destruit, charitati non adversatur, nec divinæ infusioni obicem ponit: Ergo compatitur virtutes infusas in charitate radicatæ, tametsi non negem, iterata peccata venialia ad eorum disponere corruptionem, sicut & ad interitum charitatis viam parant. Quin & verè affirmari potest, peccatis venialibus virtutes infusas diminui, sin entitative, certè operative, quatenus venialium frequentia impediuntur virtutum actus, vel saltem retardantur; imò frequentatis venialium culparum actibus possunt sensim, & paulatim generari habitus, quibus virtutes acquisitæ suffodiuntur, saltem in ratione virtutis perfectæ, quæ exigit ut promptè, suaviter, & expeditè in actus suos prorumpat.

Sequitur quintò, peccatum mortale secum invehere reatum pœnæ æternæ, veniale verò temporalem duntaxat pœnam promereri; quia cum peccatum mortale destructione charitatis, & extinctione ordinis ad ultimum finem inordinationem naturâ sua irreparabilem inducat, consequens est illum, qui in peccatum mortale prolabitur, pœnam mereri interminabilem. Quod de peccante venialiter propter oppositam rationem dici nequaquam potest.

Sequitur sextò, peccatum mortale inferre homini malum, sin simpliciter, certè quadantenus infinitum, secus verò veniale. Quia nimirum mortale privat hominem non solum recto rationis

tionis ordine, non solùm harmoniam & dependentiam inferiorum potentiarum à superioribus pervertit, non solùm gratiam, & omnium infusarum virtutum comitatum à charitate indivulsum abigit, sed etiam hominem Deo ipso privat, quæ est jactura infinita: tantum enim est malum, quantum est bonum quo privat: Deus autem est summum bonum & infinitum. Et licet peccatum importet solùm privationem Dei ut participatur à nobis gratiâ, charitate, & visione, quæ participatio finita est, & limitata; hoc tamen non impedit jacturam esse quodammodo infinitam: sicut enim visio beata, teste D. Thoma 1. p. quæst. 25. art. 6. ad 4. quandam infinitatem habet, nec eâ potest aliquid excellentius fieri, quanvis per eam non nisi finitè, & non comprehensivè Deus videatur, & participetur: ita quia peccatum nos privat Dêo videndo, infinitum homini detrimentum importat, nec eo potest aliquid deterius cogitari. Peccatum verò veniale è contra Deum à nobis non expellit: unde non nos privat eo bono, cujus possessio est summum bonum, & beatitudo nostra.

Sequitur septimò peccatum mortale esse in ratione offensæ Dei gravitatis & malitiæ simpliciter in genere moris infinitum. Quia per peccatum mortale offenditur Deus quantum offensus est; non enim gravius, vel atrocius offendi potest Deus, quàm dum ab eo quoad affectum ratio ultimi finis aufertur, ut vilissimæ creaturæ asseratur. Quid enim horrendius esse, vel cogitari eo potest, qui Deum vult non esse, & desiderat ejus potentiam, justitiam, & sapientiam interire, quod peccatum mortale, quantum est de se, molitur? Unde Bernard. *epist.* 42. vocat peccata

quadam in Deum convitia; atque esse veluti vapores de cœnoso lacu prurientis pectoris ebullientes, inundantes, & impingentes in serenitatem præfulgentis vultus Dei.

Et licet in quolibet actu peccati mortalis non inveniatur totus conatus possibilis ad offendendum Deum, hoc tamen nihil vetat, quia non contendimus peccatum mortale in ratione actus esse infinitum, sed in ratione injuriæ: quod autem major possit esse conatus, probat quidem, peccatum in ratione actus humani volutarii esse finitum, sed non injuriam esse finitam, quia gravitas istius attenditur ex detrimento personæ offensæ illato, vel intentato: sicut si quis Regem de throno depellere machinaretur, omnium humanarum injuriarum maximam illi inferret; quia etsi majori voluntatis conatu posset illum regno dejicere, non tamen potest illum majori injuriâ afficere, magisque inhonorare, quam dum illum à regis majestatis dignitate ad vilis mancipii conditionem deprimere attentavit. Plures hujus veritatis rationes dabimus tractatu de Incarnatione, *dissert. 2. c. 1. spec. 2. vbi ostendimus gravitatem injuriæ crescere ad incrementum dignitatis personæ offensæ, sicut valor & pretium satisfactionis, ad incrementum dignitatis personæ satisfaciens augetur: ostendimus etiam quod licet persona offensa sit extrinseca injuriæ, ordo tamen ad personam illam est injuriæ intrinsecus; unde dignitas personæ tota quanta est, in injuriam refluit & redundat: ostendimus etiam, quod licet peccata inæqualia sint pro diversitate objectorum & circumstantiarum, tamen in ratione injuriæ majestatem Dei occifacientis omnia conveniunt, omnia infinita*

nita sunt : sicut opera Christi inæqualis erant meriti , & valoris , attentâ objecti dignitate ; omnia tamen ex infinita personæ dignitate infinitam etiam hauriebant & veluti sugebant dignitatem. Objectiones contra hanc doctrinam militantes loco citato de Incarnatione contritas invenies. Porro gravitatem illam infinitam non convenire peccato veniali planum est , cùm non sit injuria simpliciter , nec à Deo rationem ultimi finis auferre moliatur , ut abundantius quoque loco præfato de Incarnatione , *Specul.* 3. stabiliemus.

Ex quibus omnibus vis rationis in probationem speculationis allatæ claret ; si enim omnes quæ mortale inter & veniale intersunt differentia ex illa capitali profluunt , quod nimirum mortale divinam amicitiam dissolvit , planè relinquitur , illam essentialem habendam esse.

Dices : Videtur esse alia prior , illa nimirum , quam tradit D. Thomas *q.* 88. *art.* 1. *ad* 1. in hoc consistens , quod peccatum mortale sit contra legem , peccatum verò veniale non sit propriè contra legem , sed præter , vel extra legem. Verba S. Doctoris sunt hæc : *Perfecta ratio peccati , quam Augustinus ponit , convenit peccato mortali. Peccatum autem veniale dicitur peccatum secundum rationem imperfectam , & in ordine ad peccatum mortale ; sicut accidens dicitur ens in ordine ad substantiam , secundum imperfectam rationem entis : non enim est contra legem , quia venialiter peccans non facit quod lex prohibet , nec pratermittit id , ad quod lex per præceptum obligat : sed facit præter legem , quia non observat modum rationis , quem lex intendit. Quod autem illa ratio sit primaria , & essentialis in pec-*

cato, patet; tum quia peccatum ut sic, est dictum, vel factum, vel concupitum contra legem: ergo esse contra legem simpliciter, vel secundum quid, est prima, immediata, & proximior differentia; sicut substantia & accidens sunt primariæ differentiæ entis. Tum quia omnes aliæ differentiæ à nobis assignatæ ex illa veluti è fonte fluunt; ideo namque peccatum expellit gratiam, eliminat charitatem, quia est contra legem, eamque violat; nisi enim eam violaret, charitatem minimè fugaret. Ergo differentia assignata est primitiva, per se, & essentialis.

Respondeo, hæc omnia benè intellecta vera esse, nec à nobis dictis adversari. Etenim cum asserimus, differentiam essentialem, quæ peccatum mortale inter & veniale intercedit, esse extinctionem & violationem divinæ amicitiae & charitatis, non intelleximus de amicitia & charitate habituali, talis enim privatio est potius effectus peccati; ideo enim quis his supernaturalibus habitibus orbatur, quia amicitiam Dei per peccatum mortale & transgressionem legis violavit; sed intelleximus de perpetracione alicujus operis amoris Dei & proximi repugnantis, quod reapse idem est, ac si dixissemus, essentialiam peccati mortalis esse operari vel omittere contra legem, cum amor Dei & proximi sit legum medulla, finis legis, & ut Veritas dixit: *Vnde universa lex pendet, & Propheta.* Imò nostra differentia est veluti formalior & accuratior: ideo namque peccatum aliquod est simpliciter, & non tantum secundum quid contra legem, quia per illud divina amicitia dirimitur, ut cum tollitur subjectio, & reuerentia hominis ad Deum, putà blasphemia, idololatria, & hujusmodi;

modi ; & quia per illud convictus societatis humanæ dirimitur, putà furto, homicidio, aliisque hujuscemodi peccatis : Ergo id quod est primordiale in peccato mortali, est divinæ amicitiae læsio ; tandiu enim peccatum nondum est mortale, quandiu per illud divina amicitia non violatur. Ex quibus facile respondere est probationibus in contrarium : fatemur enim, esse contra legem simpliciter esse peccatum mortale, esse contra legem secundum quid esse peccatum veniale ; sed illud solum habet esse contra legem simpliciter, quod amicitiae Dei legum omnium summæ adversatur ; illud est præter legem, quod amicitiam Dei non lædit. Secunda verò probatio concludit solum, exclusionem gratiæ habitualis esse effectum consequentem actum contra legem patratum. Unde esse contra legem simpliciter, præcedit quidem privationem habitus gratiæ, sed non violationem amicitiae Dei, sed vel ad illam sequitur, vel indispensabiliter comitatur. Unde D. Thomas *quest. 7. de mal. art. 1. ad 1.* ait : *Communiter dicitur, quod peccatum veniale non est contra legem, sed præter legem, quia si in aliquo recedit ab ordine legis, non tamen ipsum corrumpit, quia non corrumpit dilectionem, quæ est plenitudo legis.*

Ex his confutatae manent variæ hæreticorum exerrationes, varia etiam Catholicorum placita non ita veritati consentanea. In primis confutatur hæresis Lutheri, Zuinglii, & Novatorum existimantium, peccatum mortale non distinguere à veniali, nisi penes personæ peccantis conditionem, ita ut in prædestinato, vel fidei omnia sint venialia ; in reprobo, & infidei omnia sint mortalia. Confutata manet, inquam, hæc hæ-

reſis: tum quia in omnibus, ſive prædeſtinatis, ſive reprobis, ſemper illud, quod amicitiam Dei violat, quodve ordinem ad ultimum finem invertit, mortale eſt ob rationes allatas, quibus tota hæreticorum natio nunquam ſatisfaciet. Tum quia multi Sancti in peccata mortalia interdum lapſi ſunt, ut de Davide, Petro, Magdalena ſacræ Scripturæ teſtantur; & tamen eos fuiſſe fideles & prædeſtinatos nemo inficiatur. Tum demùm, quia contra apertam rationem eſt, ut peccatum ex circumſtantia perſonæ dignioris, majoribuſque beneficiis cumulatæ minuatur, cum potiùs gravius inde evadat, ut fuſè ſuprà demonſtravimus.

Confutatur ſecundò opinio Gerſonis 3. p. tract. de vita ſpirit. exiſtimantis peccatum veniale non ex natura rei à mortali ſecerni, ſed ex mera Dei duntaxat miſericordia, unum & non aliud peccatum ad mortem æternam imputante. Sed ex dictis clarum eſt, multa eſſe peccata, quæ Dei amicitiam non ſolvunt, ordinem ad ultimum finem & media cum illo neceſſariò connexa non deſtruunt, unde illa ex natura ſua lethalia non ſunt. Imò ideo potiùs peccatum hoc, quàm aliud Deus morti non addicit æternæ, quia de ſe veniale eſt. Hinc eſt, quod in Scripturis peccata venialia rebus per ſe minimis comparantur, ut culici *Matth. 23.* feſtucæ *Luc. 6.* fœno & ſtipulæ fundamento ſuperpoſitiſ *1. Cor. 3.*

Dices: Omnis offenſa Dei poteſt à Deo puniri pœna mortis cum temporalis, tum æternæ, tum etiam annihilationis: ergo quod Deus hanc pœnam non infligat, ex miſericordia ejus proficiſcitur.

Reſpondeo, quod licèt Deus quæcumque pœnam

pœnam possit venialiter peccanti infligere, ut est supremus Dominus, non tamen ut justus iudex; peccatum enim veniale, ut antea diximus, & iterum postea dicemus, reatum pœnæ æternæ non inducit.

Dices iterum: Minima culpa venialis est deterior omni pœna, unde potius omnis foret fubeunda pœna, quàm ulla vel minima culpa admittenda. Ergo quod non infligatur tanta pœna, ex misericordia Dei est, infirmitati sese nostræ attemperante.

Respondeo, malum culpæ, & malum pœnæ esse diversi ordinis; unde quod minima culpa sit peior omni pœna, probat solum, culpam esse malum superioris ordinis, sed non quod omni culpæ etiam minimæ debeat omnis pœna. Sicut licet minimus actus virtutis sit melior omni bono ordinis purè naturalis, non tamen sequitur, cuilibet actui virtutis deberi in præmium omne omnino bonum ordinis naturalis, sed bonum virtutis esse ordinis superioris.

Insistes: Quod est contra legem, est de se & ex natura sua peccatum mortale, ut ex D. Thoma diximus: sed peccatum veniale, putà leve furtum, est contra legem non furandi, mendacium jocosum contra legem non fallendi: Ergo illa peccata sunt de se mortalia, tametsi ex liberalitate Dei pœna æterna in temporalem commutetur.

Respondeo, peccatum veniale esse in triplici differentia: aliud est veniale ex genere suo, quod semper manet veniale, & intra propriam materiam nunquam fit mortale, ut verbum otiosum: aliud est veniale ex levitate materiæ, ut furtum pomi: aliud ex imperfecta deliberatione.

ne, ut turpis cogitatio, vel motus infidelitatis iudicium antevertens. Nullum autem ex his venialibus est simpliciter contra legem; non quidem primum, quia actus otiosus est de se indifferens, & caret solum ordine ad bonum finem: non etiam secundum peccatorum venialium genus, nec tertium, quia per huiusmodi actus lex simpliciter non violatur, lex quippe cum agentibus liberis imponatur, ab iis solum violatur qui liberè & deliberatè operantur: & cum bonum commune intendat, non violatur etiam simpliciter illis actibus, qui ob parvitatem materiæ nulum notabile nocumentum inferunt.

Urgebis: Illa peccata non differunt ex natura rei, quæ non differunt specie, id est quæ eandem habent specificam malitiam: atqui peccatum mortale & veniale habent eandem specificam malitiam; malitia enim moralis sin formaliter, saltem fundamentaliter petitur ab objecto dissono regulis morum; idem autem est objectum peccati mortalis & venialis, putà furti in magna vel parva quantitate; magis enim, & minus non diversificat speciem, sed maiorem, vel minorem perfectionem intra eandem speciem importat: unde D. Thomas 1. 2. *quæst.* 18. *art.* 11. ait: *Tollere alienum in magna vel parva quantitate, non diversificat speciem peccati.* Ergo peccatum mortale & veniale non ex natura rei, sed ex divina duntaxat misericordia distinguuntur.

Respondeo, ex tam multis differentiis suprâ assignatis inter peccatum mortale, & veniale intercedentibus, manifestè constare, malitiam mortalis, & venialis specie inter se differre. Et licèt, idem materiale objectum respiciat

utrum

utrumque peccatum ; formaliter tamen , & moraliter objectum specie distinctum est , cū ob-
jectum mortalis sit simpliciter regulis morum
dissōnum, & legi contrarium , secus verò peccati
venialis objectum. Quando verò D. Thomas
ait : *Tollere alienum in parva , vel magna quan-*
titate , non diversificat speciem peccati , dupliciter
intelligi potest : primò ut velit, quod cū tolli-
tur alienum intra quantitatem ad peccatum
mortale sufficientem , tunc major vel minor
quantitas non mutat speciem, sicut intra quanti-
tatem, & ut ita dicam, sphæram venialem, major
vel minor non mutat speciem. V. g. si furtum
centum assium sit peccatum mortale, non mutat
speciem furti qui ducentos asses furatur ; & si
furtum assis sit peccatum veniale, furtum semias-
sis non mutat speciem venialis. Vel vult S. Do-
ctor parum , vel magnam quantitatem non di-
versificare speciem , id est non addere novam
speciem supra speciem furti, sicut furtum in loco
sacro addit speciem sacrilegii , furtum cibi ad
victum omninò necessarij addit speciem homi-
cidij. At verò magna quantitas non extrahit
furtum à ratione furti , quanvis magna quanti-
tas supra parvam addat majorem , & specie di-
versam oppositionem cum ratione.

REFLEXIO.

Ad illius monstri concitandum horrorem
multis non opus est, cuius ipsum quidem nomen
terrorem incutit & indignationem. Si mors, quæ
corpus interimit, teste Philosopho , terribilium
est terribilissimum ; quâ, quæso, execratione dig-
num est peccatum illud , quod mortem animæ

infert, dum Deum, qui est vita animæ, à corde summovet peccatoris. Quin quomodo detestandum non est portentum illud abominabile, quod nedum animæ, sed Deo ipsi (horribile dictu!) necem inferret si valeret? Peccator enim pro virili Deum molitur destruere, cuius attributa ad nihilum redigere conatur. Nam summum bonum floccifacit, qui apparentem creaturæ bonitatem essentia & fonti bonitatis anteposit. Supremum Dominum aspernatur, qui Regi Regum obedientiam detrectat. Primum principium contemnit, qui se illi subducit, seque primam causam peccando erigit, facitque Deum servire iniquitatibus suis. Summum & æquissimum Legislatorem offendit, cujus leges calcitrat, eoque libentius ea patrat, quæ sint ejus interdicta mandatis. Judicem non agnoscit, cujus nec minis cietur, nec pœnas timet, nec indignationem reveretur. Omniscium ubique præsentem, omnia intuentem petulanter irridet, & veluti subsannat, in cujus oculis inverecundè provocat spectatorem. Benefactorem bonevolum & præamantem, ejusque amorem & beneficia despiciatui habet, cujus donis injuriis respondet, & quod nefarium est, beneficia convertit in instrumenta injuriæ. Ultimum denique finem ingenti contumelia lædit, non contentus ab eo recedere, nisi finis ultimi & felicitatis rationem in vili creatura turpissimè collocet.

Quàm mortale est, unde mors intravit in mundum, quod corpus interimit, quod nos in Adamo immortalitate exuit, quod animæ mortem infert sempiternam, quod ipsi Regi sæculorum immortalis & invisibili mortem afferre reutatur. Et tamen homo naturâ mortis pavidus.

pecca.

peccatum mortale amat, & ita amat, ut illi sit loco Dei, quod summa malorum est, & summum malum. Nam quod de quibusdam Apostolus dixit, de omnibus verum est peccata lethalia patrantibus: *Quorum Deus venter est, & gloria in confusione ipsorum.* Nam Deum sibi fingit in creatura, qui creaturam diligit supra Deum. Opportunè Hieronymus in Psalm. 80: *Quaecumque vitia habemus, & quaecumque peccata, tot recenses habemus Deos. Iratus sum, iram mihi Deus est. Vidi mulierem, & concupiui; libido mihi Deus est. Vnusquisque enim quod cupit, & veneratur, hoc illi Deus est.* Porro quæ majoris mentis cæcitas, quæ durior cordis iniquitas, quàm mortem sic diligere, ut illi per quem omnia vivunt, præferatur, & sæpe, & quotidie, & animi gratiâ, & voluptatis ergò præferatur? Non enim peccant, quia vel ignorant, vel coguntur, sed quia placet, & peccare delectatur. Ubinam gentium sumus? Ubi religio? Ubi ratio? Ubi sensus communis?

Mortem peccati poenam execrantur homines, & peccatum mortis causam amant: & ut S. August. in Psalm. 32. & 37. ait: *Flagella sua dolent homines; quare flagellantur, non dolent. Perversi sunt homines qui mali volunt esse, miseri nolunt.* Nec poenam peccando fugiunt, quæ à peccato indivulsa est; nam omnis inordinatus animus poena est sibi; & quisquis malus est, torquatur necesse est seipso tormento. *Ipsè enim poena sua, quem torquet conscientia sua,* inquit August. in Psalm. 32. conc. 2. Et ideo observat idem Pater, omne peccatum esse mendacium, quia promittit vitam & voluptatem, & mortem infert, amaritudinem invehit. *Non frustra dicunt*

potest, inquit lib. 14. de civit. cap. 4. omne peccatum esse mendacium; non enim fit peccatum, nisi ea voluntate, qua volumus, ut bene sit nobis, vel nolumus ut male sit nobis. Ergo mendacium est, quod cum fiat ut bene sit nobis, hinc potius male est nobis: vel cum fiat ut melius sit nobis, hinc potius pejus est nobis.

Sed dicis: Non mortem, non pœnam, non vitium, non peccatum amo, creaturas duntaxat amo, memetipsum amo, non ut moriar, sed ut dulcius, suaviusque vivam. Audio, sed doleo. Non prohibuit teipsum, aliosque amare Deus, qui charitas est: dilectionis præceptum iteravit, qui ignem amoris venit mittere in terram, volens ut accendatur: sed ordinatum vult amorem, alia amari præcipit ut mediâ, seipsum ut finem. Itane creaturas amare vis, solum Deum amare non vis? Quàm præclare, quàm ignitè Augustinus in Psalm. 79. *Quid amas, ut Deum non ames? Dic mihi; ama si potes aliquid, quod ille non fecit. Circumspice universam creaturam, vide utrum alicubi cupiditatis vitio tenearis, & à diligendo Creatore impediaris, nisi ea re, quam creavit ipse, quem negligis. Quare autem amas ista, nisi quia pulchra sunt? Possunt esse tam pulchra, quàm ille à quo facta sunt? Miraris hæc, quia illum non vides: sed per ea, qua miraris, ama quem non vides. Interroga creaturam; si à seipsa est, mane in illa; si autem ab alio est, non ob aliud perniciosum est amatori, nisi quia præponitur Creatori.*

SPECVLATIO III.

Præfiniuntur regula, quibus peccatum mortale à veniali discernatur.

Licet periculosum admodum sit, & lubricum in hac materia aliquid definire, unde dixit August. in Enchirid. cap. 72. *Quæ sint levia, & quæ sint gravia peccata, non humano, sed divino pensanda sunt iudicio.* Casum tamen salebroso in itinere Deo donante cavebimus, si S. Thomæ vestigia premamus, ex quo sequentia documenta eliciemus.

Sciendum ergo primò, ad peccatum mortale requiri perfectam deliberationem. Ita D. Thomas quæ. 74. art. 6. ubi docet, contingere peccatum esse in ratione dupliciter: *Uno modo quando imperat illicitas passionēs, sicut quando homo ex deliberatione provocat sibi motum iræ, vel concupiscentiæ: alio modo quando non reprimit illicitum passionis motum, sicut cum aliquis postquam deliberavit, quod motus passionis insurgens est inordinatus, nihilominus circa ipsum immoratur, & ipsum non expellit.* Et ad 3. *Delectatio dicitur morosa, non ex mora temporis, sed ex eo, quod ratio deliberans circa eam immoratur, nec tamen eam repellit, tenens, & volvens libenter, quæ statim ut attingerunt animum, rejici debuerunt.* Et ratio est, quia motus nostri in tantum sunt culpabiles, in quantum sunt voluntarii; in tantum autem sunt perfectè voluntarii, in quan-

tum sunt deliberati. Porro ad peccatum mortale, quod est plena & consummata culpa, requiritur perfectum voluntarium: ergo ad peccatum mortale requiritur perfecta deliberatio; subindeque imperfecta deliberatio se habet ad peccatum sicut parvitas materiæ, quæ excusat à mortali.

Ex quo sequitur, requiri etiam ad peccatum mortale advertentiam, sine qua utique non poterit esse deliberatio. Illud tamen diligenter observandum est, non exigi semper ad peccatum mortale deliberationem, vel advertentiam formalem, aut actualem, cum sæpè ex ignorantia peccemus, & multi sint rebelles lumeni, scientiam viarum Domini nolentes; sed sufficere virtualem, quæ contingit quando quis potest & tenetur advertere, nec advertit; tunc enim est voluntarium indirectum, & in causa, ut in dissertatione de probabilitate, tomo superiori fasissimè declaravimus. Porro tunc adest deliberatio formalis, vel virtualis ad peccatum sufficiens, quando iudicium non est, absorptum, ligatum, vel impeditum: quod poterit homo dignoscere, si possit sese supra suos actus reflectere, si impetu passionis non obruatur, ut contingere in motibus primò primis assolet, in quibus tamen peccatum sæpè timendum, in viris præsertim parum timoratis, qui raro peccato obstant, & in quibus vix motus primò primi à secundo primis discerni queunt.

Sciendum secundo, positâ advertentiâ & deliberatione rationis, prolabi hominem in peccatum mortale, nedum si voluntas consentiat; sed etiam si se habeat negativè, nec conetur
ipsum

ipsum peccati motum reprimere. Ita enim aperte tradit D. Thomas *art. 7. citato*, & *q. 15. de verit. art. 4.* Quia nimirum tunc voluntas præbet consensum interpretativum, cum prævum motum in rationem insurgentem teneatur cohibere obligatione naturali longè arctiori ea, qua tenetur Magistratus tumultuarios populi seditiosi imperus comprimere. Et tunc maximè verum probatur tritum illud adagium: *Qui tacet, consentire videtur.*

Non inficior tamen, justis interdum de causis voluntatem ad resistantiam positivam non teneri, putà si sit periculum consensus; quædam enim diu revolvì mente non possunt, quin afficiant vel emolliant, ut patet in tentationibus luxuriæ, & vanæ gloriæ, aliisque illecebrosis, quas propterea Patres spiritales fugâ potiùs, quàm impugnatione superandas docent, quia sæpè tentatio augetur, dum illi tentatus conatur obistere. Quod præsertim à scrupulosis, illis maximè, qui constantem non peccandi voluntatem Dei gratiâ sentiunt, observandum velim. Illis enim suadent viri spiritales, ut animum à tentatione avocent, ne continua voluntatis pugna mentem, cerebrumque lædant, & pacem animi, spiritusque dulcedinem viris piis adeo ad sacra exercitia necessariam bellis intestinis & superstitiosis anxietatibus interrumpant. Similiter non sunt necessariò cohibendi hujusmodi involuntarii motus, si propterea cessandum foret ab occupatione honesta, putà prædicatione, doctrina, sacramentorum administratione, à quibus nequaquam abstinendum est, nisi sit periculum consensus: quod à Rectoribus animarum observari omninò velim; quid enim illis

illis proderit mundum, animasque sibi creditas lucrari, animæ verò suæ vel per unius peccati mortalis consensum detrimentum pati? Aut quam commutationem dabunt pro anima sua? Quid dixi de occupatione spiritali, de corporali, proportionem servata intelligendum est. Medici enim & Chirurghi corpus nudum videre, & tangere citra periculum consensus possunt, aliasque suæ artis operationes edere, quæ forent in speciem indecoræ, & reipsa malè sonantes essent, nisi boni communis, & Reipublicæ utilitate, atque christiana erga infirmos sanandos charitate honestarentur.

Quarum exceptionum ratio est; quia licet præceptum non consentiendi malo sit negativum, subindeque obliget semper & pro semper; præceptum tamen motibus involuntariis resistendi est affirmativum, sicque non obligat, nec urget, cum adest excusatio rationabilis. Monent etiam Doctores videndum esse, an illa actio per se licita, ex qua sequitur motus concupiscentiæ, vel tentatio prava, sit parum, vel multum ad tentationem causandam proclivis; & si non sit cum illa non nisi remotè connexa, sufficere honestam utilitatem, ut operatio illa minimè relinquatur. Sic non tenetur Christianus ab equitando, certisque cibis in communi usu apponi solitis, tametsi fortè calidioribus abstinere, ne motus sensualitatis citra periculum consensus insurgant, modò tamen motus illos nec quærat antequam sint, nec amet cum adsunt. Viri tamen spirituales, & christianæ perfectionis amantes ad illis debent utilitatibus temporalibus, quantum per vires & prudentiam licet, sibi temperare, qui ad perfectionem castitatis, sicut & aliarum virtutum

tum

tum continuis votis aspirare debent. Unde Sal-
vianus expendens illud Matth. 5. *Qui viderit
mulierem ad concupiscendum eam, &c.* sic egre-
gè fatur: *Perfecta ac sincerissima sanctitatis vo-
lens cultores suos facere Salvator, jussit ab iis cau-
tissime etiam minima vitari: scilicet ut quàm pu-
ra est pupilla oculi, tam pura esset Christiani ho-
minis vita: & sicut salva intuitus incolumitate
pudoris labem in se oculus non reciperet; sic vita
nostra labem in se penitus impudicitia non habe-
ret. Quod confirmat ex illis verbis Marc. 9. Si
oculus tuus scandalizat te, erue eum, &c. Quæ
vera esse ait, non quòd membris suis quis privare
se debeat, sed quia tam necessaria nobis sunt qua-
dam domesticorum obsequiorum necessitudines, ut
his quasi oculis, interdum quasi manibus utamur,
& rectè nobis presentium ministeriorum officia sub-
trahamus, ne aeterni ignis tormenta patiamur. Si
juxta Sanctos necessariis nos ultrò privare de-
bemus, ne peccemus, quantò magis utilia rese-
canda sunt?*

Sciendum tertio, cogitationem voluntariam
& deliberatam de objecto illicito, & sub mortali
prohibito, esse peccatum mortale, etiamsi desit
operis executioni mandandi voluntas. Quæ
cogitatio dicitur morosa, non ex mora temporis,
sed quia ex libero voluntatis imperio intellectus
in illo objecto sordido revolvendo occupatur.
Porro de quibusdam cogitationibus morosis res
est adeo constans, ut sit penè de fide. Colligitur
enim ex illo Matth. 5. vers. 29. *Omnis qui viderit
mulierem ad concupiscendum eam, jam moechatus
est eam in corde suo.* Ubi Chrysost. hom. 17. id
explicat etiam de eo, qui aspicit ut oblectet ejus
aspectu. Et Hilar. can. 4. ait: *Cùm fornicationis
operari*

opere punitur illecebrosa visus transeuntis affectio. Colligitur etiam ex illo Job 31. vers. 1. Pepigi fœdus cum oculis meis, ut ne cogitarem quidem de virgine. Quod de cogitatione cum delectatione morosa intelligit glossa interlinearis. Quam cogitationem morosam esse peccatum mortale satis indicat idem Propheta patiens, dum subdit: Quam enim partem haberet in me Deus? Id ipsum probat D. Thom. q. 74. art. 8. ex August. lib. 12. de Trinit. cap. 12. ibi: Totus homo damnabitur, nisi hac, quæ sine voluntate operandi, sed tamen cum voluntate animum talibus oblectandi, solius cogitationis sentiuntur esse peccata, per Mediatoris gratiam remittantur. Ut autem rectè subsumit S. Thomas, nullus damnatur nisi pro peccato mortali. Ergo consensus in delectationem morosam est peccatum mortale. Hinc Gregorius, Hieronymus, Bernardus, alique Patres tam sollicitè monent, cogitationes malas statim extinguere, incentiva cogitationum in mente jugulare, & parvulos Babylonis allidere ad petram: & quia semper caro superflua generat, ideo cogitationes pravas vir sanctus ferro sollicitudinis rescindit, pœnitentiæ ardore consumit, nec cogitationes suas dilatarî carnali voluptate permittit; quia eò semetipsum judicans subtiliùs ferit, quò districtum judicem præstolatur vicinum.

Ratio etiam D. Thomæ id suadet, quia nullus voluntariè delectatur, nisi de eo, quod est conforme appetitui, non solum sensitivo, sed etiam rationali seu voluntati; aliàs illa delectatio non foret voluntaria. Ergo quod aliquis morosè cogitet, seu delectetur de malo opere cogitato, ex eo provenit, quod erga illud opus afficitur; nec potest in tali cogitatione delectari, nisi consen-

tiam,

tiar, quod affectus suus sit in opus illud inclinatus. Atqui habere affectum deliberatum erga peccatum mortale, non potest non esse mortale peccatum: ergo cogitatio & delectatio morosa de objecto illicito, & sub mortali prohibito peccatum mortale est. Quorum omnium profunda radix sæpe ab Aristotele, sæpius à D. Thoma inculcatur; quia nimirum delectationes eo modo sunt bonæ vel malæ, subindeque licitæ vel prohibitæ, quo operationes quas consequuntur: ergo quando operationes sunt illicitæ, delectari vel cogitatione de illis, licitum esse non potest, & corruptum affectum omninò supponit hujusmodi sordidarum cogitationum agitatio, quia libenter cogitare de iis delectamur, quæ amamus, & ut Veritas ait: *De corde exeunt cogitationes.*

Nec obest si dicas, actum illum esse inefficacem. Non obest, inquam, quia hoc non impedit, quin actus cogitationis morosæ ebibat objecti cogitati malitiam: actus quippe non sumit speciem ab objecto producto, sed movente, & inspecto: quia ergo objectum pravum morosè cogitatum affectum allicit, & rationem movet, non potest non refundere malitiam in actum. Aliàs cogitatio morosa de opere perpetrato, putà fornicatione, vel homicidio, absque intentione illud iterum non perpetrandi, non foret culpa lethalis; quod omni rectæ rationi repugnat.

Ex his plura confectaria, necnon tacitarum plurium objectionum solutiones derivantur.

Sequitur enim primò, delectationem morosam eadem infici malitia, quâ sordet opus, subindeque delectationem morosam de furto in Ecclesia

sia esse sacrilegium ; delectationem morosam
 cum rapta , nupta , virgine Deo sacra diversam
 induere fœditatem. Cum enim delectatio mo-
 rosa speciem sortiatur ab objecto , ab specie di-
 stincto objecto distinctam quoque haurire tur-
 pitudinem necesse est. Nec valet subterfugium
 quorundam Neotericorum dicentium hujusce-
 modi cogitationum inanibus oblectamentis non
 intendi injuriam loci sacri, conjugii, vel personæ
 Deo dicatæ ; sed solius avaritiæ , vel libidinis
 expletionem. Non , inquam , valet ; hoc enim
 non impedit , quominus his cogitationum , ta-
 met si sterilium fordibus peccet qui eas versat
 contra justitiam, & religionem : ut enim virtu-
 tes violentur , non exigitur ut per se intendatur
 earum injuria , sed ut ametur actus in quo talis
 injuria invenitur, quia tunc indirectè vult inju-
 riam, qui vult actum injuriosum. Et ita con-
 tingit in omni fermè peccato mortali , in quo
 peccator vellet si posset citra Dei injuriam, so-
 lius cupiditatis satietatem , sed *ex hoc ipso* (ver-
 ba sunt D. Thomæ q. 88. art. 2. ad 1.) *quod aliquis*
eligit id quod repugnat divinæ charitati, convin-
citur præferre illud charitati divinæ, & per conse-
quens plus amare ipsum, quàm Deum. Et certè
 si morosus ideo non incurreret in sacrilegii, vel
 adulterii labem , quia hunc actum inefficaciter
 solù n. desiderat, nec etiam incideret in furti, vel
 simplicis fornicationis malitiam, quam indire-
 ctè duntaxat, & inefficaciter concupisceret, quod
 à veritate prorsus alienum est. Quare sicut qui
 in cogitatione sacrilegi furti amaret injuriam
 loco sacro illatam , directè sacrilegium , sed in-
 directè furtum committeret : ita qui directè de-
 lectatur de furto sacrilegio annexo, directè qui-
 dem

dem furatur , sed indirectè sacrilegus est , & utrumque peccatum committit necessariò in confessione aperiendum.

Sequitur secundò, quod qui delectatur de esu carnum die prohibito , si talis dies se teneat ex parte objecti, contrahit peccatum mortale ; secus si delectatio sit de carnibus solùm secundùm se spectatis , sub qua ratione non sunt prohibita. Unde à veritate aliena est regula illa quorundam Casuistarum existimantium , quod in his , quæ sunt jure duntaxat positivo prohibita, possumus cogitatione delectari, quia de se possunt non esse mala, sublatâ lege, & quia legislator solos actus externos prohibere sollicitus est. Verùm falluntur , quia sicut stante prohibitione non licet interiùs concupiscere opus vetitum; ita nec in ejus cogitatione morosa delectari. Quia hoc ipso quod Legislator actum externum, licèt de se indifferentem prohibuit, opus externum sit objectum prohibitum & malum , si aliqua formalis , vel virtualis ad legem reflexio fiat : unde nullum terminare potest affectum voluntatis , nisi ipsum inficiat.

Sequitur tertio , quod qui cum delectatione spectat & videt duellum, bellum injustum , ludum impudicum, peccat mortaliter, si delectatio sit de opere illo malo, quia tunc affectus in opus illud incl' natur; si autem delectatio sit de sola visione, curiositate, pugnantium agilitate. & dexteritate, à mortali fortassis excusabitur. Sed hæc omnia periculis plena sunt, quia vir Christianus ex opere malo quomodocumque , vel à quocumque fiat, non gaudium, sed mœrorem elicere debet : & industria mali & in malo horrenda est bonis. Maximè quia homo pronus ad
malum.

malum ab adolescentia sua non solum ex inclinatione dexteritatis sæpe fertur in amorem vitii, subindeque periculo se exponit; sed etiam internum amorem vitii, & in recessu cordis latentem tegit specie curiositatis, & amoris proprii tenebris occæcatus intus ardentem cupiditatem non discernit, quia sæpe mentitur iniquitas sibi, & mens sibi ipsi blanditur; & aliud est in superficie mentis, aliud in radice cordis.

Sequitur quartò, delectationem morosam de opere, quod est peccatum veniale, esse etiam peccatum veniale: v.g. delectatio de mendacio, cogitatio de risu superfluo, de scurrilitate, de comestione lauta & oppipara iisdem sordent inquinamentis, quibus opera illa inficiuntur.

Sequitur quintò, quod si delectatio non sit de opere ipso, sed de cogitatione sola, asserendum est cum D. Thoma *quest. 78. art. 9.* per se non esse peccatum mortale, sed quandoque veniale, quandoque nullum. *Quia delectatio de cogitatione sequitur inclinationem affectus in cogitationem ipsam: cogitatio autem ipsa secundum se non est peccatum mortale, immò quandoque est veniale tantum, putà cùm aliquis inutiliter cogitat de ea; quandoque autem sine peccato omninò, putà cum aliquis utiliter de ea cogitat, sicut cùm vult de ea prædicare, vel disputare.* Porro ad discernendum, an delectatio sit de cogitatione, vel de opere cogitato, licet sæpe difficile sit, & laqueis septum, dignosci tamen potest ex motivo delectationis; si enim moveatur ab opere cogitato, delectatio de illo est; si verò à cogitatione rarâ, novâ, acutâ, eruditâ, utili, piâ, à cogitatione moveri delectationem, in viris præsertim timoratis censendum est. Sed in his eximiâ spiritus.

ritus prudentiâ , & magnis precibus opus est.

Sequitur sextò , pro nuptis hanc regulam servandam esse : Cogitationes , & delectationes sunt licitæ , quando operatio licita est , sive sit præsens , sive præterita , sive futura ; quia differentia præteriti & futuri non variant speciem moris de bono in malum. Sæpè tamen in illis cogitationibus peccatum veniale contingit , ut cum solius delectationis gratiâ hæc mente revolvuntur , quia etiam opera licita solo voluptatis amore elicta , culpâ non vacant , vel cum hujusmodi rerum memoria justâ necessitate , vel piâ utilitate caret. Immo potest in his peccatum mortale tunc accidere , si periculum voluntariæ pollutionis , vel mali consensus immineat.

Sequitur septimò , peccatum esse delectari de malo actu , licet non malè , & absque culpa patrato. V.g. licuit quidem Jacob , quandiu per ignorantiam facti arbitrabatur Liam esse uxorem suam , in opus , delectationemque consentire : sed non licuit illi in eo actu depulsâ ignorantia delectari , quia actum per se malum , & per accidens solum excusatum , amare illicitum esse certum est , sicut non licet de homicidio in somnis , vel furore patrato gaudere. Vide plura de his materiis apud Authores : illas aliquando rerum latius Deo dante persequemur , si Theologiam moralem , quam adornamus , consummare per vires liceat. Illud tamen , mi Theologe , monendum es , ut periculosis molliculorum opinionibus non credas , si sis christianæ puritatis inquisitor.

REFLEXIO.

Cum sæpè non parva sit venialia à moralibus
discer

discernendi difficultas, si salutis tuæ amans es, si Deum, cui unum peccatum displicet, sincerè diligis, sicut à facie colubri fuge quodcumque peccatum. Quauvis enim in venialia sæpè sæpiùs prolabi nos infirmitas humana compellat, divinaque providentia sinat; quia ut Greg. Magnus lib. 5. in lib. Regum, ait: *Magna pralia electis permittit Deus, qua vincant, levia excitat, in quibus cadant, ut victoria fortium magna sit, casus innoxius; ut cadentes se facillè erigant, & eos fortia, in quibus victores steterant, non extollant.* Sed tamen miseræ peccandi venialiter necessitati liberæ non adjicias voluntatis electionem; peccata ex subreptione venialia te nimium & frequentius invadunt, quàm ut ad deliberata sponte venialia prolabaris. Ne tibi frequentia actuum familiare tibi sit quodcumque peccatum, quia ut Cyprian *serm. de unit. Eccles.* monet: *Plus metuendus est & cavendus inimicus, cum latenter obrepit. Semper diabolus bono operi imminet,* addit Hieron. lib. 4. comm. in Jer. *ubique gradientibus ponit laqueos.*

Ne ultrò quæras peccata venialia, quibus opera tua etiam justa facta sunt & obscurata. An non sæpè apud Augustinum lib. 10. *Confess.* per multa capita legisti, quod dum ad quietem satietatis ex indigentia molestia transimus, in ipso transitu nobis insidiatur laqueus concupiscentiæ; & quod cum salus sit causa edendi & bibendi, adjungit se tanquam pedissequa periculosa jucunditas, & plerumque præire conatur, ut ejus causâ fiat, quod salutis causâ nos facere vel dicimus, vel volumus: nec idem modus utriusque est, nam quod saluti satis est, delectationi parum est. *His tentationibus,* inquit humillimus Augustinus cap. 37. *quotidie conor resistere: certo quotidie adversus*


ad versus concupiscentiam manducandi, & bibendi. Quis est, Domine, qui non rapiatur aliquantulum extra metas necessitatis? Quisquis est, magnus est, magnificet nomen tuum; ego autem non sum, quia peccator homo sum. Delectatio carnis mea, addit cap. 33. sæpè me fallit, dum rationem sensus non ita comitatur, ut patienter sit posterior; sed tantum quia propter illam meruit admitti, etiam præcurrere ac ducere conatur. Ita in his pecco non sentiens, sed postea sentio.

Idem in aliis innumeris, singulis horis, & fermè momentis accidit; hinc curiositas, inde loquacitas, illinc vanitas multiplices insidias struunt. Nam ut idem sanctissimus Pater cap. 35. deplorat: In quam multis munitissimis & contemptibilibus rebus curiositas nostra quotidie exoritur, & quàm sæpè labamur, quis enumeret? Quid autem dicemus de peccatis linguæ, quàm Jacobus universitatem iniquitatis, Augustinus cap. 37. fornacem quotidianam appellat? Quavis enim Tullius effutierit, nullum unquam verbum, quod revocare vellet, se emisisse; attamen ut ait Augustinus epist. 7. Hac laus, quanvis præclarissima videatur, credibilior est de nimium fatuo, quàm de sapiente perfecto. Porro quis vanæ gloriæ & proprii amoris ubique sua quærentis, & in omnia opera nostra irrepentis circumstantia decipula enumeret? Cùm sæpè homo de ipso vanæ gloriæ contemptu vanius gloriatur, ideoque non jam de ipso gloriæ contemptu gloriatur; non enim eam contemnit, cùm gloriatur intus. Hinc libro laudato, cap. 38. ait August. Sermo ore procedens, & facta qua innotescunt hominibus habent tentationem periculosissimam ab amore laudis, qua ad privatam quandam

dam excellentiam contrahere emendicata suffragia tentat.

Hæc cum ita sint, peccata venialia ubique occurrentia, & insidiantia timeamus, & caveamus, ne quibusdam ruinæ suæ gradibus desidiofa mens in foveæ lapsus impellatur. Quia si teste Gregorio lib. 5. Moral. cap. 8. *Solus in illicitis non cadit, qui se aliquando & à licitis cautè restringit*: quomodo non cadet qui à peccatis venialibus per se illicitis sibi non temperat? Si Deum times, peccata venialia time, quia etsi veniale, ut docet D. Thomas, nunquam fieri possit mortale, cum essentiale inter utrumque discrimen interfit; ad mortalia tamen sensim disponitur, qui spernit modica, & contemptui legis assuescit, qui eam tametsi leviter, frequenter tamen transgredi delectatur: *Quid autem interest ad naufragium*, inquit August. epist. 108. *utrum uno grandi fluctu navis operiatur, & obruatur, an paulatim subrepens aqua in sentinam, & per negligentiam derelicta atque contempta impleat navem, atque submergat.* Ergo si mortalia times, venialia ne prosequaris. Si pœnam times, peccata venialia time, nec ea contemnenda putes, quibus Deus ignem paravit flammis inferni sola duratione inferiorem. Ergo per quotidianum examen conscientia suæ ascendat homo adversum se tribunal mentis suæ, & constituto in corde judicio adsit accusatrix cogitatio, testis conscientia, carnifex timor. Inde quidam sanguis animi confitentis per lacrymas fluat. Nam ut ait August. lib. 50. humiliarum, hom. 50. *Nec multa remanebunt peccata, sive parva, sive magna: quia aut ab homine pœnitente, aut à Deo judicante plebuntur.*

DISSER



DISSERTATIO II.

De causis peccatorum.

IN confesso est apud omnes, voluntatem esse causam omnium peccatorum, cum scilicet producit actus inordinatos, & debita ad regulas morum, quæ sunt ratio & lex, commensuratione destitutos. Hanc porro inordinationem causat voluntas, quatenus cum in actum prorumpit, cui difformitas annexa est. Si autem interroges, an voluntas antequam peccet, aliquo defectu laboret quo peccet? Respondebo, quod non solum in voluntate, prius quam in actum peccati fundatur, inest naturalis ille defectus creaturis omnibus intellectualibus insitus, nimirum peccabilitas, quæ naturæ ex nihilo productæ consecutivum est, utique prioritate temporis actualis peccati partum præcedens; sed insuper voluntas peccato gravis, & ad peccatum accincta prius naturâ, quam actu peccet, laborat defectu voluntario, & actuali, in hoc consistente, quod in illo priori, antequam pariat iniquitatem, veluti concipit, seu est liberè ad malam operationem determinata, constituitque se primum principium actuale prævæ operationis per voluntarium à ratione & lege recessum, seu non subjectionem ad superiorem. Causa enim est prius determinata ad effectum quam ipsum producat; & principium

actuale operationis præcedit naturâ operationem ; operatio quippe non proficit nisi à principio actuali , & à causa ad agendum determinata. Et quia voluntas in ordine deficiendi & peccandi prima causa est à nullo dependens , ideo ipsamet liberè seipsam principium actuale deficiens constituit , & Deum ad concurrendum ad materiale pertrahit , facitque illum servire iniquitatibus suis. Nec sequitur voluntatem peccare ante peccatum , quia nullum est peccatum , nisi sit actus , qui nondum intelligitur. Nisi malis dicere , esse peccatum non consummativè , completè , & in facto esse , sed in procinctu , initiativè , & in fieri. Hoc , quod summè notandum est , supposito , interiores , exterioresque causas peccati examinemus.

CAPVT I.

De internis peccatorum causis.

AD interiores causas peccati pertinent & subjectum in quo recipitur , & defectus interiores , tam ab intellectu , & voluntate , quàm ab appetitu sensitivo proficiscentes. De illis ergo omnibus ordine dicendum est.

SPECVLATIO I.

Non solum voluntati, sed etiam appetitui sensitivo, imò & rationi inesse peccatum, nedum quoad materiale, sed etiam quoad formale, probabilius est.

TRia supponit hæc speculatio, quorum duo apud omnes recepta sunt. Primum est contra Manichæos, nimirum hominem esse subiectum peccati, & non solum cacodæmonem. Cum enim homo sit liber, & bonitatis, & malitiæ capax est. Secundum est contra Pharisæos, solam malitiam in actibus externis constituentes, quos reprehendit Veritas *Matth. 5.*

Sed eorum error patet & ex illo Psalm. 60. *Iniquitatem si aspexi in corde meo; & ex nono, decimoque præcepto, & evidenti ratione.* Quia maximè actui interiori convenit libertas, quæ potest & à bono incommutabili averti, & ad commutabile converti. Tertium, quod supponit, est in actibus membrorum exteriorum formale peccati non inveniri; quod negant illi, qui censent, actum externum addere aliquid malitiæ actui interiori. Sed nostra doctrina, tanquam constans, supponenda est; quia potentiæ exteriores non sunt formaliter liberæ, ut est evidens: ergo non possunt producere actum formaliter liberum: ergo nec formaliter bonum, vel malum, aliàs ferrentur extra objectum suum speci-

ficativum & adæquatum; solùm ergo materiale peccati possunt producere. Difficultas ergo restat de appetitu sensitivo, & ratione.

Prima pars de appetitu sensitivo.

Probatur prima pars asserens, non solùm in actibus voluntatis, sed etiam in motibus appetitus sensitivi, prout est in homine, posse formale peccati venialis inveniri. Probatur, inquam; verbis, & ratione D. Thomæ, qui q. 74. articulo secundo (ubi concludit solam voluntatem non esse subiectum peccati) tertio loco sibi objicit hoc argumentum, quo veluti fulcro innititur opposita sententia recentiorum: *Omne peccatum est actus voluntatis, quia ut dicit August. in lib. de lib. arbitr. peccatum adeo est voluntarium, quod si non sit voluntarium, non est peccatum. Sed actus aliarum virium non sunt voluntarii, nisi in quantum illæ vires moventur à voluntate; hoc autem non sufficit ad hoc ut sint subiectum peccati, quia secundum hoc etiam membra exteriora, quæ moventur à voluntate, essent subiectum peccati. Ergo sola voluntas est subiectum peccati.* Cui argumento sic respondet: *Dicendum, quod membra corporis non sunt principia actuum, sed solùm organa. Vnde & comparantur ad animam moventem, sicut servus, qui agitur, & non agit. Potentiæ autem appetitivæ interiores comparantur ad rationem quasi liberi, quia agunt quodammodo, & aguntur, ut patet per id, quod dicitur 1. Politic. Ubi manifestum est, S. Doctorem non loqui de materiali peccati; tum quia membra externa possunt esse subiectum materialis peccati,*

cati, ut oculus aspectus impudici, manus percussionis nefariæ; tum quia *art. 4.* docet, quod in appetitu sensitivo non potest esse peccatum mortale, sed tantum veniale: ubi necessario loquitur de formali, cum cæteròquin materiale mortalis possit in appetitu sensitivo inveniri. Nec valet interpretatio Curielis aientis, D. Thomam ideo tribuere peccatum veniale appetitui, non mortale, quia prima radix venialis est indeliberatio plena, & imperfecta libertas, quæ potissimum ex passione appetitus causatur. Nam S. Doctor *totag. 74.* de proprio, & immediato subjecto peccatorum, non de eorum radicibus, & occasionibus sermonem habet, ut ex lectione textus relinquatur manifestum.

Ratio verò hujus assertionis duplex à D. Thoma tradita est. Prima indigitata est, & consistit in convellendo adversariorum principio in hoc sito, quod appetitus sensitivus non est liber, cum reguletur per cogitativam, quæ nequit proponere objectum cum indifferentia boni & mali, sed sub sola delectabilis ratione; ex opposito autem principio argumentatur D. Thomas: Appetitus sensitivus, ut subordinatur voluntati, participat libertatem, ut docet Philosophus 3. *Policorum*, ubi ait, animam dominari corpori despotico principatu, appetitui verò politico & regali; quia nimirum appetitus regulatur per cogitativam, quæ teste eodem D. Thoma 1. *part. quest. 78. art. 4.* dicitur ratio particularis versans non solum circa bonum delectabile, sed etiam circa honestum in particulari; quia cum ad illam pertineat discurrere circa singularia, ad ipsam etiam ea dirigere spectat. Sed quod est capax libertatis, potest esse subjectum peccati. Ergo

in appetitu sensitivo, prout est in homine, peccatum reperiri possibile est.

Confirmat id ipsum D. Thomas *art. 2.* alia ratione : Ejusdem potentiae est actus & habitus, praesertim si actus sit simmanens, qui in ea potentia recipitur, à qua efficitur ; unde cum actus efficiatur à potentia mediante habitu, in ea facultate simpliciter recipi dicitur actus, in qua habitus subiectatur. Atqui in appetitu sensitivo recipiuntur habitus virtutum, & vitiorum. Ergo in appetitu illo actus interiores recipiuntur, subindeque eorum bonitas & malitia.

Sed dices : Vnde habet appetitus sensitivus, qui convenit homini, ut est animal, quive est nobis, brutisque communis, quod sit capax libertatis, quæ naturam intellectualem, ejusque amplitudinem consequitur ?

Respondeo, hanc esse à divina providentia constitutam legem, quam à D. Dionysio edocti sumus, supremum infimi attingere infimum supremi, istiusque perfectionem fin exprimere, certè adumbrare, vel imitari : sic perfectissima corpora, scilicet cœlestia, incorruptibilitatem spirituum æmulantur : sic in istis sublunaribus perfectissimum elementorum ignis ad motum, & actionem viventium accedit ; inter plantas ea, quæ dicitur sensitiva, sensum animalium, si non imitatur, certè ementitur : sic inter animalia simia hominis motus, vulpes industriam, elephas religionem exscribunt : sic homo per simplicem, & quietam veritatis intelligentiam, quæ discursus fructus est suavissimus in contemplatione perceptus, ad modum angelicæ cognitionis accedit ; sic Angeli & Beati omnes (quia in cœlo eadem est Angeli,
homi

hominisque mensura) visione beata vitam divinam, ejusque æternitatem participant. Quid ergo mirum, si appetitus sensitivus in homine ex conjunctione ad voluntatem aliquem libertatis & amplitudinis radium consequatur, cum appetitus in homine sit appetituum sensitivorum perfectissimus, sicut homo animalium princeps, non solum propter rationem quâ eis dominatur, sed etiam propter exquisitiorem structuram, & majores vitæ animalis dotes, quæ longè adhuc antecellerent, nisi per peccatum mors, aliæque infirmitates obvenissent. *Vires sensitivæ partis*, inquit D. Thomas art. 3. ad 1. *et si sint communes nobis & brutis, tamen in nobis habent aliquam excellentiam ex hoc quod rationi junguntur, sicut nos præ aliis animalibus habemus in parte sensitiva cogitativam & reminscentiam.* Et per hunc modum etiam appetitus sensitivus in nobis præ aliis animalibus habet quandam excellentiam, scilicet quod natus est obedire rationi: & quantum ad hoc potest esse principium actus voluntarii, & per consequens subiectum peccati.

Dices iterum: Sed quare potius appetitus sensitivus capax est libertatis sufficientis ad veniale, non ad mortale? Ergo voluntaria est nostra doctrina.

Respondeo, differentię veram rationem ex D. Thoma art. 4. colligi. Quia nimirum in actu appetitus sensitivi possunt omnia inveniri necessaria ad veniale, secus ad mortale, ad quod requiritur perfecta libertas, & deordinatio ab ultimo fine. Actus autem appetitus imperfectam duntaxat libertatem participant, nec ab ultimo fine avertere possunt; inordinatio enim & recessus à fine non est nisi ejus, cujus est ordinare in

finem, quod solius rationis est. Ad veniale verò sufficit imperfecta libertas, & inordinatio circa media, vel fines particulares, qui possunt ab appetitu attingi, præsertim ex concursu, influxu, & motione, virtuali saltem, indirecta, & interpretativa voluntatis in appetitum radium actualis libertatis derivantis.

Licet autem hæc ita sint, non approbo tamen sententiam Gregorii Martines, existimantis actus appetitus sensitivi posse, esse subjectum malitiæ moralis, secluso omni voluntatis tam actuali, quàm virtuali, & interpretativo motu, propter intrinsecam libertatem, quam appetitus ex habituali subordinatione ad rationem participat. Cui subscribunt Salmanticenses, & novissimè noster Gonet. Non approbo, inquam, tum quia D. Thomas suprâ, q. 24. dixit, malum non esse in passionibus, nisi ex imperio rationis. Et hic q. 74. art. 2. ad 1. ait: *Non peccatur, nisi voluntate, sicut primo movente; aliis autem potentiis peccatur, sicut ab ea motis.* Et in 2. dist. 24. q. 3. art. 2. docet, quod motus præcedentes rationem ex eo sunt peccata, quatenus ratio eos potest impedire, & debet, unde importatur consensus interpretativus. Tum quia non potest esse peccatum in sensualitate, nisi voluntas possit motum illum impedire, ut innumeris locis repetit D. Thomas, & fatentur adversarii: sed voluntas non est potens & expedita ad reprimendum sensualitatis motum sine aliquo actu formali, vel interpretativo, quia si voluntas potest impedire, tenetur motum cohibere; unde si non cohibeat, interpretativè consentit, maximè quia non potest motum illum retrahere & reprimere, nisi adsit aliqua intellectus advertentia; in incognitum enim

enim ferri voluntas non potest : intellectu autem advertente , voluntas non manet suspensa, propter indivulsam utriusque potentia colligationem. Ergo nunquam veniale est in appetitu, nisi adsit saltem interpretativus voluntatis consensus.

Et certè si omnes motus appetitus rationem omnem prævenientes essent peccata venialia independentem omnino à voluntate, per hoc ipsum quod procedunt ab appetitu voluntati habitua-liter subordinato, sequeretur quod tunc etiam in peccatum incideremus , cum voluntas actu resistit, cum reprimit, & pro virili motum extinguere conatur; subindeque tunc simul mereremur per veram voluntatis resistantiam, & demeremur per peccati venialis culpam. Consequens autem item repugnat Tridentino sess. 5. & D. Thomæ q. 7. de malo, art. 6. asserentibus, concupiscentiam resistantibus non nocere. Imò videtur esse contra Apostolum Rom. 8. aientem : *Nihil ergo nunc damnationis est his , qui sunt in Christo Iesu , qui non secundum carnem ambulant.* Id est, ut exponit Bernardus serm. 1. Ascens. *Nulla damnatio his qui sunt in Christo Iesu , concupiscentia sensus absque consensu.* Et sanè secundum Patres spirituales, erumpentes motus imprævisi , si à voluntate comprimantur , non peccati, sed meriti materiam præbent. Unde trita est, & apud omnes recepta distinctio motuum, quorum alii dicuntur primò primi, qui sunt naturaliter excitati, nec sunt in nostra potestate : alii dicuntur secundò primi, qui licèt plenam deliberationem antecedant, sunt tamen semiplenè deliberati, & possent impediri : tertii perfectè deliberati, quæ advertente ratione, & consentiente voluntate

erumpunt. Tertii sunt peccata mortalia, secundi venialia, primi nulla. *Quando motus illicitus est in sensualitate*, inquit D. Thomas quæst. 7. de malo, art. 6. ad 6. *tripliciter se potest ad ipsum habere ratio; uno modo sicut resistens, & tunc nullum est peccatum; alio modo sicut imperans, puta cum ex proposito motus concupiscentie illicita excitat, & tunc si sit illicitum in genere peccati mortalis, erit peccatum mortale: aliquando autem se habet, ut neque prohibens, neque imperans, seu consentiens, & tunc est peccatum veniale.* Ubi vides, quod ut peccatum veniale sit in sensualitate, exigitur ut voluntas sit neque imperans, neque prohibens, sed negligentia suâ veluti permittens, & imperfectè volens.

Nec te moveant quædam Scripturæ, & Patrum testimonia indicantium, omnes istos motus esse peccata. Rom. 7. *Non quod volo bonum, hoc facio; sed quod odi malum, hoc ago.* Ubi loquitur de motu sensualitatis, qui teste August. lib. 5. cont. Iul. cap. 3. peccatum est, *quia inest illi inobedientia contra dominatum mentis.* Et apertius D. Thomas quæst. 25. de verit. art. 5. ad 5. ait: *Non dicitur esse peccatum in sensualitate propter interpretativum consensum rationis. Quando enim motus sensualitatis prævenit iudicium rationis, non est consensus nec interpretativus, nec expressus: sed ex hoc ipso, quod sensualitas est subijcibilis rationi, actus ejus, quanvis præveniat rationem, habet rationem peccati.* Quibus verbis nihil clarius.

Non, inquam, te moveant; motus enim concupiscentiæ in tantum dicitur malum ab Apostolo, in quantum ex peccato est, & ad peccatum inclinatur, ut dicitur in Trident. sess. 5. D. autem Augustinus loquitur de motibus secundò primis,

mis, unde ait ibidem: *Alioquin frustra dictum est, Post concupiscentias tuas non eas, si jam quisque reus est, quod sentit eas.* Et lib. de vera Relig. cap. 14. *Aut negandum est peccatum committi, aut fatendum est, voluntate committi.* Quo etiam modo exponendus venit S. Thomas, cum ex aliis S. Doctoris locis liquidò constet, tunc solum motus illos esse peccata, cum supponitur vel formalis, vel virtualis voluntatis advertentia; unde loco de veritate citato de motibus plenam deliberationem antecedentibus, semiplenè tamen deliberatis, sermonem habet. Unde verba S. Doctoris claritatis gratiâ sic possunt distinguui: Non dicitur peccatum in sensualitate, propter interpretativum consensum rationis plenè deliberatæ, concedo; imperfectè solum deliberantis, nego. Similiter quando motus sensualitatis prævenit iudicium, non est consensus, nec interpretativus, nec expressus, plenè liber & deliberatus, qui supponit expressum iudicium, concedo; imperfectè deliberatus, & à voluntate veluti oscitante proficiens, nego.

Nec rursus te moveat rationum illarum, quas suprâ adduximus, momentum, seu singularis illa participatæ libertatis prærogativa, quam appetitui, ut est in homine, asseruimus. Non, inquam, moveat; quia illud libertatis participium, ille radius, illud vestigium intelligitur de libertate in actu primo, quæ tamen in actum secundum exire nequit absque voluntatis aut moventis, aut non prohibentis, aut negligentis consensu, aut licentia, saltem interpretativa. Cum enim libertas appetitus non sit in homine prima, sed subordinata, & à voluntate participata, nequaquam in actum sine aliquo voluntatis in-

756 *De peccatis. Dissert. II. Cap. I.*

fluxu prorumpere potest. Per quod differt sensualitas à membris externis, quæ intrinsecæ malitiæ capacia non sunt defectu intrinsecæ libertatis in sensualitate participatæ, tametsi nonnisi dependenter ab actuali, vel virtuali rationis, voluntatisque influxu exercendæ : sicut etiam cogitativa non participat vim discurrendi circa singularia, nisi *secundum quandam refluentiam rationis universalis in illam*, ut loquitur S. Thomas 1. p. *quæst. 78. art. 4. ad 5.*

Neque valet, si dicas, quod si ratio vigilaret, posset omnes motus appetitus impedire; quod ergo non impediatur, quod non vigilet, facit motus illos esse peccata. Non, inquam, valet. Tum quia perpetua vigilia est in hac vita impossibilis, nec est humanæ facultatis. Tum quia nimia vigilia, seu nimia attentio motus illos excitat, ut videre est in scrupulosis, in quibus tentationis timor tentationes fovet, quia imaginationem circa objectum tentationis occupat. Tum quia licet daretur continua vigiliæ attentio, & non intermissus labor, frustra tamen motus omnes reprimere niteremur, & quia resistente ratione invalescunt, & quia dum unum motum reprimimus, insurgit alius insperatus. Unde D. Thomas q. 74. art. 3. ait : *Corruptio fornicis non impedit, quin homo rationabili voluntate possit reprimere singulos motus, si presentiat, putà divertendo cogitationem ad alia. Sed dum homo cogitationem ad aliud divertit, potest etiam circa illud aliquis inordinatus motus insurgere : sicut cum aliquis transfert cogitationem suam à delectationibus carnis, volens concupiscentia motus vitare, ad speculationem scientiæ, insurgit quandoque motus inanis gloria impræmeditatus. Et ideo non potest*

*potest homo vitare omnes huiusmodi motus, propter corruptionem prædictam. Sed hoc solum sufficit ad rationem peccati voluntarii, quod possit vitare singulos. Quibus in verbis duo pondero. Primum, hominem tunc posse solum voluntate reprimere singulos motus, si præsentiat. Ergo si non præsentiat motum, sed potius ab eo præveniatur, non potest illum vitare, ac proinde motus tunc non habet rationem voluntarii, subindeque nec peccati. Secundum est, quod ideo motus secundò primi sunt peccata, quia licet voluntas præsentiens non possit omnes reprimere, singulos tamen cohibere divertendo se ad alia posset: motus autem primò primos, utpote naturales, & omnem rationis advertentiam, quis comprimere potest? Unde Pater Gonet. postquam *disp. 5. art. 2.* omnes nervos suos contendit in probando, peccatum veniale esse in appetitu & sensualitate, absque ullo etiam interpretativo voluntatis actu, postea *art. 3.* (qua consequutione doctrinæ, alii viderint) probat motus primò primos non esse peccata venialia, sed tamen secundò primos, qui fiunt cum aliqua advertentia & semipleno voluntatis consensu, quibus totam illam rationum molem, quam contra Alvarem nostræ sententiæ patronum una manu struxerat, alterâ destruit.*

Dices: Si peccatum veniale sit in appetitu, nec possit esse in eo nisi dependenter à voluntate, idem peccatum in duplici potentia recipietur, inficietque simul appetitum & voluntatem: quod non minùs repugnare videtur, quàm quod idem accidens duobus inhæreat subiectis.

Respondeo, non esse inconveniens, malitiam
partiam

partim in voluntate, partim in aliis potentiis
 subjectari. Sicut enim virtus moralis, ejusque
 bonitas, & in voluntate, & in appetitu reperi-
 tur, ita & de malitia dicendum est. Unde ait
 D. Thomas art. 4. ad 4. *Actus virtutis non perfici-
 citur per id, quod est sensualitatis tantum; sed
 magis per id, quod est rationis & voluntatis, cu-
 jus est eligere; nam actus virtutis moralis non est
 sine electione. Unde semper cum actu virtutis mo-
 ralis, qua perficit vim appetitivam, est etiam
 actus prudentia, qua perficit vim rationalem. Et
 idem est etiam de peccato. Nec sequitur, idem
 numero accidens futurum in diversis subjectis,
 si quælibet pars malitiæ sit in suo; malitia enim
 non est una unitate simplicitatis, sed composi-
 tionis, ex pluribus partibus resultans; sicut fi-
 gura domus ex lapidibus, & lignis.*

Altera pars de ratione.

Secunda pars affirmans, in ratione posse pec-
 catum, etiam quoad formale, inveniri, tan-
 quam probabilior, & S. Thomæ art. 5. confor-
 mior, à nobis eligitur, & iisdem rationibus
 suadetur, quibus præcedens confirmata est. Pri-
 ma, quâ destruitur fundamentum Adversario-
 rum, sic procedit: Si qua esset ratio, cur in in-
 tellectu non posset esse formale peccati, maxi-
 mè illa, quâ nituntur adversarii, quia nimirum
 actus intellectus non sunt formaliter liberi, sed
 solum extrinsecè, denominatione ab actu vo-
 luntatis petita. Sed hæc ratio non convincit.
 Tum quia non semper requiritur intrinseca li-
 bertas ad infectionem peccati; docent enim
 plures, peccatum originale, quod est formaliter
 in

in nobis, esse solum voluntarium denominatione extrinseca ab actu voluntatis protoparentis petita. Tum præcipue, quia intellectus non se habet ad actus malos sicut membra externa, quæ sunt mera operationum organa, & instrumenta, nullum rationis, nullum libertatis radium, vel stillam participantia: intellectus vero est unum ex principiis actus humani, rationalis facultas, & saltem radicaliter libera. Imò non est à veritate abhorrens illa sententia, quæ ponit actus intellectus, ut antecedunt voluntatem, esse quidem radicaliter duntaxat liberos; verumtamen ut voluntatem consequuntur, libertatem ejus formalem exprimere, & participata libertate multò magis, quàm appetitum gaudere; sicut voluntatis motus rationis lucem, & directionem exscribere ex mutuo ambarum fructuum fluxu, & refluxu credendum est. Unde præclare D. Thomas *art. 5. ad 2.* ait: *Voluntas quodammodo movet, & præcedit rationem: & ratio quodammodo voluntatem. Unde & motus voluntatis dici potest rationalis; & actus rationis potest dici voluntarius. Et secundum hoc in ratione invenitur peccatum, vel prout est defectus ejus voluntarius, vel prout actus rationis est principium actus voluntatis.* Nec propterea fertur intellectus extra suum objectum specificativum, ut obijciunt adversarii, tum quia de appetitu idem illi respondere tenentur; tum quia non participat intellectus hanc libertatem appetendo, sed discernendo.

Secunda ratio sic formatur: In eadem potentia est actus malus formaliter, in qua est habitus vitiosus formaliter; nam ut ait D. Thomas *art. 2.* *eiusdem potentia est actus, & habitus.* Sed
in

in intellectu potest esse habitus formaliter vitiosus, putè infidelitas, & imprudentia, sicut & eorum contrarii, fides scilicet, & prudentia; contrariorum quippe idem est subjectum, cum ab eodem subjecto se expellant. Ergo in intellectu possunt esse actus formaliter mali, infidelitatis scilicet, & imprudentiæ. Cum his tamen omnibus simpliciter, & absolutè stat, voluntatem esse subjectum peccati, quia ut ait August. lib. 7. retract. cap. 9. *Voluntas est, quâ peccatur, & rectè vivitur.* Unde D. Thomas q. 2. de malo, art. 2. ad 2. ait: *Peccatum dicitur esse voluntas, non quòd tota essentia peccati sit in actu voluntatis, sed quia totum peccatum consistit in voluntate, sicut in radice.*

R E F L E X I O.

Si nullum sive in intellectu, sive in appetitu sensitivo absque voluntatis influxu peccatum est; si, ut inculcat Augustinus, *non nisi voluntate peccatur*; si, ut inculcat in 2. dist. 24. quest. 3. repetit, *ibi incipit genus moris, ubi primò dominium voluntatis invenitur*: Ergo solam voluntatem tuam time: ergo tuam formida libertatem. Ne terrearis, si tumultuantes, & ad mala trahere nitentes concupiscentiæ impetus sentias, nisi consentias; non te dejiciat circumstans te peccatum, si non regnat peccatum in corpore tuo mortali: non regnat autem, nisi per consensum approbetur, dicente Augustino lib. 6. contra Julian. cap. 15. *Pariens est concupiscentia, parit peccatum; sed concupiscentia non parit, nisi conceperit; non concipit, nisi illexerit, idest ad malum perpetrandum obtinuerit voluntatis assensum.* O felix,

felix, fortunataque pugna, in qua nemo vincitur, n' si velit ! Sed ô deploranda magis eorum ignavia, qui hosti cedunt, fatenturque se victos, qui uno poterant dissensu esse victores ! Internam cordis tui turrem cingit, obsidet, circumvallat dæmon ; sed perperam aggreditur, perperam oppugnat, perperam collatis omnibus temptationum copiis irrumpit ; nunquam invadet, si dicas, & verè dicas, & constanter dicas : Nolo. Quàm veridicè August. *serm. 12. de verbis Domini*, dicit : *Potes aurum perdere, & nolens : potes & domum : bonum autem, quo bonus es, nec invitatus accipis, nec invitatus amittis.*

SPECVLATIO II.

Ad peccatum etiam concurrunt ex parte intellectus ignorantia, ex parte appetitus passiones, ex parte voluntatis malitia.

TOta hæc speculatio, suppositis iis, quæ in superioribus, & tomo præcedenti diximus, liquet, nec probatione eget, sed recensione : quia tamen iis in locis quædam prætermisimus, quæ tractare non erat opportunum, quædam omissa annotationibus sequentibus supplebimus. Plura etiam addemus infra secundum peccati effectum explicantes.

Notandum igitur primò, quod licèt à sententia de ignorantia juris naturalis nunquam excusante, utpotè semper vincibili, non desistam, sed
magis,

magis, magisque persistam ; fatendum tamen, ignorantiam illam in nonnullis excusare magis, in aliis minori esse veniâ dignam. Ut enim observat D. Thomas in 4. dist. 27. q. 2. art. 2. triplex est status rationis : primus cùm quis nec intelligit per se , nec ab alio intelligere potest, ut ante primum septenarium : secundus , cùm quis per se quidem erudiri nequit, ab alio doceri valet, ut post primum septenarium ; tertius cùm & ab alio, & per seipsum homo addiscere potest, ut in fine secundi septenarii. Nemo autem jure dubitare potest, quin excusabilior sit pueri septennis, vel duodennis, quàm viri ignorantia. Imò nonnulli nostræ sententiæ sectatores volunt posse interdum contingere, puerorum rudium nonnullos initio , & veluti in aurora rationis posse circa remotiora juris naturalis consecraria sine culpa cæcutire, quia circa illa in illis exordiis se habent quasi rationis usum non habentes, nec reverà tunc rationis usum habent, nec naturaliter, supposita hebetudine, habere possunt. Sed hæc, inquiunt, non obsunt veritati sententiæ nostræ, quæ asserit, ignorantiam juris naturalis semper esse culpabilem, utpote semper vincibilem ; quia de viris pleno rationis usu præditis intelligitur, & casus illi vel nunquam, vel rarò contingentes, & ferè metaphysici, non cadunt sub scientiam moralem. Ut sit de illa exceptione, de qua multa dicere non vacat :

Notandum secundò, quod licet loco de probabilitate citato asseruerimus , circa jus humanum, Ecclesiasticum & civile posse dari ignorantiam invincibilem , quia ejusmodi iuris notitia non est rationi nostræ implantata, & difficiliùs acquiritur, cùm ex voluntate hominum pendeat,

&

& lectione interdum benè longa librorum innotescat; fatendum tamen est, sæpiùs hujusmodi ignorantiam esse culpabilem, ob eorum ignorantiam, qui jura illa scire possunt, & tenentur. Porro ad dignoscendum in particulari, an & quando talis ignorantia sit culpabilis, relinquendum est pio prudentum judicio, qui circumstantias librent, tum personæ, quæ solet, vel non solet negligentiam laborare; tum legis, quæ vel est publica, vel occulta; & alia hujusmodi.

Notandum tertio, quod circa ea, quæ ad statum, vel officium personæ pertinent, vix ac ne vix quidem contingere potest ignorantia invincibilis. Quia unusquisque ea seriò, & diligenter tenetur inquirere, quæ ad ipsum spectant. Vel si ob ingenitam mentis crassitiem, vel aliæ vitæ humanæ impedimenta nequit illa nec per se, nec ab alio edoceri, debet officio se abdicare. Quod à Parochis, Episcopis, Prælatibus, Confessariis, Judicibus, & Magistratibus notatu dignissimum est, & in hoc sæculo verâ totius everse disciplinæ imagine necessarium. Eos facile excusarim à mortali, qui scientia habituali sufficienti instructi nonnunquam, sed involuntariè, & inadvertenter quædam status officia positivâ lege imperata prætermittunt; quia superat hominum infirmitatem, quod omnium reminiscantur; nec tenentur homines non intermissâ attentione status sui munia semper mente revolvere, cum periculo cerebri & judicii. In omnibus tamen cum cautela procedere, & in timore & tremore salutem operari dignum, & justum est.

Notandum quarto, ignorantiam juris naturalis

ralis non excusantem à culpa, posse tamen excusare à pœna ecclesiastica & civili. V.g. ignorans usuram esse peccatum, & excommunicationis sententiam latam in usurarios, tamen si peccet contra justitiam, non irretitur tamen vinculo excommunicationis: quia Ecclesia non fert excommunicationem, aliàsque censuras, nisi in mandata sua non audientes, vel audita respicientes, vel contemnentes. Ille autem, qui ignorat mandata Ecclesiæ, ea nec audit, nec contemnit, unde in pœnas Ecclesiasticas non incurrit. Et ideo in jure, *cap. si verò, de sentent. excomm.* dicitur, quod si quis in Clericum nutriendum comam manus injecerit violentas, propter hoc non debet excommunicatione notari, dummodo ipsum esse Clericum ignoraverit. Et *cap. Apostolicus*, dicitur quod qui tempore suspensionis ignari celebrant divina, redduntur excusabiles ob ignorantiam probabilem. Hinc etiam Prælati, ipsique summi Pontifices, Ecclesiasticarum legum conlitores, solent scientiam verbis expressis, aut æquipollentibus desiderare. Si quis, inquiunt, *attentare præsumpserit, indignationem Omnipotentis Dei se noverit incursum.* Quibus verbis eam scientiam videntur exigere, quæ temeritatem, & præsumptionem arguat, aut contemptum. Ecclesiam verò non contemnit, qui ejus voces non audit.

Non approbo tamen laxam quorundam extensionem, qui propter adducta testimonia arbitrantur, eos etiam anathemate non feriri, qui censuras Ecclesiæ ignorantiam crassâ, & affectatâ nesciunt. Non approbo, inquam: tum quia sic facile omnis Ecclesiasticæ disciplinæ vigor resolveretur & enervaretur, omnisque eluderetur pœna,

pœna, & censura, Tum quia ipso jure hanc laxitatem præviderunt, & evertunt, dum solam ignorantiam probabilem excusare voluerunt. Et in cap. cum animarum, de const. in Sexto, dicitur: *Ut animarum periculis obvietur, sententiis per statuta quorumcumque Ordinariorum prolati ligari nolumus ignorantes, dum tamen eorum ignorantia crassa non fuerit, aut supina.* Quæ ignorantia dicitur supina, quia hominis supini juxta se posita non advertentis socordix similis est.

Sed pro majori hujus materiæ moralis, & non parùm necessariæ intelligentia, duæ observandæ sunt regulæ generales, & peræquæ certæ. Prior est: *Semper excusatur à pœna, qui à culpa excusatur.* Quia pœna est correlativa culpæ; nemo enim jure multatur, nisi reus; nec reus censendus est, qui est culpæ, labisque purus. Unde qui ex ignorantia invincibili occideret hominem, putans adhibitâ omni diligentia occidere feram, in irregularitatem nequaquam incideret. Hinc etiam si ignorantia excusaret à peccato mortali, & non à veniali, in pœnam etiam non incurreret, quia gravissimam pœnam non imponi à Matre Ecclesia ob levem culpam, credendum est. Posterior regula est: *Qui ratione probabilis ignorantia non incidit in pœnam, ita tamen in foro exteriori se gerere debet, ac si eam contraxisset;* præsertim si censura annexa sit operi intrinsecè malo, quod patravit. Tum quia potest esse dubium, an ignorantia fuerit crassa; tum propter eximiam morum præbendam probationem, tum ob Ecclesiasticarum legum reverentiam. Unde eorum laxitas fugienda est, qui contendunt, hæreticum exteriori posse à quovis approbato

con

confessario absolvi, si in hæreticos latam excommunicationis sententiam ignoraverit. Fugienda, inquam, est; tum quia excommunicationis ab Ecclesia in hæreticos lata, est solum excommunicationis à Christo intentatæ declaratio, & expressio; diserte enim Veritas dixit: *si quis Ecclesiam non audierit, sit tibi sicut Ethnicus & Publicanus*. Tum quia licet excommunicationis vinculo in foro interiori minimè teneretur, cā tamen irretitur in foro exteriori, cui satisfacere tenetur, ob pervenerabilium Ecclesiæ canonum observantiam. Hinc etiam liquet, non esse audiendos eos, qui asserunt, illum qui scienter ad consanguineam uxoris accessit, ignoravit tamen privationem juris petendi debiti in nefandi criminis detestationem ab Ecclesia imponi; illum, inquam, talem pœnam non promereri, nec ad petendum debitum dispensatione egere. Nam hæc doctrina omnem Ecclesiæ disciplinam evertere molitur, ejusque consuetudini, ac cordatorum omnium praxi maximè repugnat. Præsertim quia hæc privatio non tam pœna est, quàm impedimentum appositum ab Ecclesia, quæ sola proinde illud tollere potest.

Dices: pro Adriano existimante illum pœnam Ecclesiasticam verè promereri, qui scienter culpam admittit, tametsi pœnam ignoret: Ignorantia quæ non excusat à culpa, non excusat etiam à pœna à legitimo Superiore intentata. Sed sæpè ignorantia pœnæ non excusat à culpa, verè enim homicida, & sacrilegus est, qui advertenter occidit Sacerdotem, quanvis ignoret tali facinori annecti pœnam excommunicationis. Ergo ignorantia pœnæ non excusat à pœna.

Proba

Probatur major propositio ex differentia, quæ est inter culpam, & pœnam: illa enim, ut imputetur, debet esse cognita, vel cognitu possibilis, & debita, quia debet esse volita: pœna autem non debet esse volita, cum sit potius violenta. Qua de causa peccans mortaliter, licet ignoret pœnas inferni, illis tamen punietur, quia peccato lethali jure debentur. Merito etiam suspenditur homicida, licet agendum se in crucem propter facinus illud fortassis ignorarit. Quidni similiter pœnas ab Ecclesia intentatas promerebitur, eique jure infligentur, qui crimen illud malignè patrat, quod tali dignum pœna sapiens Ecclesiæ judicium arbitratum est?

Respondeo, hoc argumento erudito, & gravi probabilem effici Adriani sententiam; attamen juxta principia tradita facile responsum est distinguendo duplex genus pœnarum, quarum aliæ sunt veluti connaturaliter debitæ, aliæ extraordinariæ, insolitæ, & à Legislatore ad incutiendum delicti horrorem superimpositæ. Licet autem non requiratur cognitio prioris pœnæ, ut illi peccans sit obnoxius; benè tamen cognitio posterioris, quæ tunc solum contrahitur, quando est contemptus superioris, ut suprà ostendimus. Patet autem, pœnas Ecclesiasticas ad secundam classem pertinere. Esse autem quasdam pœnas peccatis mortalibus, & ex natura rei debitas, & pro eorum gravitate diversas, declarat D. Thomas q. 73. art. 8. quia sunt quædam nocumenta, quæ per se sequuntur ad peccatum, licet non sint prævisa, vel intenta; & tunc gravius peccatum inducit gravius nocumentum. *Si nocumentum, inquit, per se sequatur ad actum peccati, licet*

licet fortè non sit praviſum, nec intentum, tunc majus nocumentum non facit gravius peccatum, ſed è converſo gravius peccatum inducit gravius nocumentum. Sicut aliquis infidelis, qui nihil audivit de pœnis inferni, graviorem pœnam in inferno patietur pro peccato homicidii, quàm pro peccato furti: quia enim hoc nec intendit, nec praviſit, non aggravatur ex hoc peccatum. Sicut contingit circa fidelem, qui ex hoc ipſo videtur peccare gravius, quòd majores pœnas contemnit, ut impleat voluntatem peccati. Vides quaſdam pœnas delictum per ſe conſequi, alia pœnæ inflictæ cognitionem ſequi.

Circa ſecundam etiam partem affirmantem, ad peccatum ex parte appetitus concurrere paſſiones, nihil ferè addendum eſt iis, quæ tomo ſuperiori diximus, dum explicuimus, quomodo concupiſcentia cauſet voluntarium. Legenda eſt etiam litera D. Thomæ q. 77. ubi articulo primo docet, voluntatem moveri indirectè ab appetitu ſenſitivo, quatenus & per intenſum paſſionis motum remittitur, aut impeditur motus voluntatis; & per paſſionem appetitus in imaginatione imprimitur fortis objecti repræſentatio, unde ſæpè divertitur, impeditur, vel turbatur judicium rationis, & conſequenter motus voluntatis, qui judicium rationis ſemper ſequi natus eſt.

In ſecundo articulo concludit, paſſionis impetum rationem interdum pertrahere, ut judicet in particulari aliquid eſſe hîc & nunc bonum, quod tamen in univerſali ſcit eſſe malum; tum quia vis paſſionis mentem advocat; tum quia ſæpè paſſio objectum falſa bonitate obliniſcit, iſſeque pigmentis, & fucis rationem inclinât ad
contra

contrarium hujus, quod scientia universalis habet; tum demum, quia sæpè infrunitus passionis æstus corpus ipsum adeò immutat, & organa depravat, ut inde ligata ratio in actus suos liberè prorumpere nequeat. Sed de hac re fusiùs speculatione sequenti disseremus.

Articulo tertio docet, peccatum ex passione rectè dici peccatum ex infirmitate, quia passionibus sunt ægriitudines animæ; sicut enim corpus dicitur infirmum, quando propter temperamentum perturbati alterationem vel debilitatur, vel in executione propriæ operationis impeditur; ita anima dicitur in via virtutis infirma, quando propter inordinatos irascibilis, vel concupiscibilis motus, nequit in actus virtutis erumpere, sed vel frigide incedit & tepide, aut quod deterius est, nullus virtutis fructus edere potest; & dum conatur, venit usque ad partum, sed non habet vires pariendi. Unde Philosophus 7. *Ethic. c. 8.* comparat incontinentem paralytico, cujus partes moventur in contrarium ejus, quod ipse disponit. Hanc infirmitatem egregie describit Bernardus *lib. 1. de consid. cap. 1.* dicens: *Quoties vis, & in cassum? Quoties moves, nec promoves? Quoties conaris, & non datur ultra? Eniteris, & non obtines; parturis, & non paris; tentas, & abriperis; & ubi incipis, ibi desicis; & dum adhuc ordiris, succidunt te.*

Quod articulo quarto docet S. Doctor, nimirum amorem sui esse principium omnis peccati, ut suprà exposuimus. Unde infert *art. 5.* concupiscentiam carnis, concupiscentiam oculorum, & superbiam vitæ esse triplicem fontem unde passionibus ad peccatum inclinantes dimanant. Ex immoderata concupiscentia carnis, quæ est im-

moderatus appetitus ciborum, & venereorum; & ex concupiscentia oculorum, quæ est nimia curiositas, vel nimia exteriorum cupiditas, quâ oculorum, vel cujuscunque apprehensivæ virtutis delectatio quæritur, profluunt omnes passionibus concupiscibilis. Passiones verò irascibilis, quæ respiciunt bonum sub ratione ardui, ex superbia vitæ progerminant; appetitus enim inordinatus boni ardui pertinet ad superbiam vitæ: nam superbia est appetitus inordinatus excellentiæ.

Articulo sexto tradit, passionem antecedentem diminuerè peccatum, sicut diminauit voluntarium; passionem verò consequentem non minuerè peccatum, sed magis augere, seu potius esse signum magnitudinis ejus, in quantum propensæ voluntatis intensiorem, & ad peccandum promptitudinem demonstrat. Affirmat tamen *art. 8.* passionem nunquam excusare totaliter à peccato, quando *non totaliter intercipit usum rationis*; quia tunc ratio potest passionem excludere divertendo ad alias cogitationes, vel impedire ne suum consequatur effectum, quia membra non applicantur operi, nisi per consensum rationis. Unde tunc ex passione peccatum mortale committi potest, ut concludit *art. 9.* Si autem passio tanta est, ut rationis usum auferat, sicut patet in his, qui propter amorem, vel iram insaniunt, tunc si talis passio à principio fuerit voluntaria, imputatur actus ad peccatum, quia est voluntarius in sua causa; si verò causa sit naturalis, actus omninò involuntarius efficitur, & consequenter totaliter à peccato excusatur.

Denique de tertia parte speculationis affirmante

manente malitiam ex parte voluntatis concurrere ad peccatum, diximus dum de distinctione peccatorum. Legenda tamen est quaestio 88. D. Thomae, ubi *art. 1.* docet, tunc hominem peccare ex certa malitia, quando eligit pati detrimentum in bono minus amato, ad hoc, quod potioratur bono magis amato, puta cum scienter plus amat voluptatem, vel divitias, quam ordinem rationis, vel legis divinae, vel charitatem Dei: unde mavult dispendium in aliquo bonorum spiritualium pati, quam aliquo temporali bono privari. Unde infert *art. 2.* quod qui utitur habitu vitioso, ex malitia peccat, quia ex electione in malum prorumpit: *Vti enim habitu,* inquit D. Thomas, *non est necessarium, sed subiacet voluntati habentis. Unde & habitus definitur esse, quo quis utitur cum voluerit.* Ex quo tamen non sequitur, illum qui peccat ex certa malitia, peccare semper ex habitu, ut tradit *art. 3.* Quamvis semper supponatur prava aliqua dispositio corrupta inclinans ad malum, ratione cuius malum apparet peccatori bonum, & quasi conveniens, & aufertur omne frænum, & omnia illa repagula perrumpuntur, quibus voluntas à peccato retinebatur. Quæ prava dispositio, si non est habitus, vel est tepiditas, vel personæ temperamentum ad vitia nimis proclive, vel carentia virtutum; unde sequitur ariditas animæ, & insensibilitas divinorum, nimia præsumptio, vel superbia, ob quam sæpe destituimur ope gratiæ, & relinquimur in infirmitate naturæ. Nam, ut alicubi ait Magnus Gregor. *Piâ conditoris dispensatione agitur, ut de se confidens anima dispensatoriâ tentatione pulsetur, quatenus infirmata, quid sit, inveniat, & præsumptionis propria*

*fastum deponat. Potest etiam hæc dispositio esse invecundia, vera malitiæ radix; unde consequitur sacri depulsio timoris, & nec mala divinities intentata veremur, nec spiritalia æstimamus, nec divina reveremur. Hinc etiam exoritur falsa facilè recuperandæ amissæ gratiæ fiducia; nam custodiri negligentius solet quidquid facilè creditur posse reparari. Unde Patres tam crebrò, tam seriò falsam securitatem condemnant in hac vita, quæ tota tentatio nominatur; quia sæpe mens dum virtutis suæ securitate resolvitur, insidiante adversario inopinatæ culpæ telo perforatur; & quem tentationis certamen superare non valuit, sua deterius securitas stravit. *Va nobis miseris*, inquit Gregorius, *qui de electione nostra nullam adhuc Dei vocem cognovimus, & jam in otio quasi de securitate torpemus. Debet profectò in spe esse securitas, sed etiam timor in conversatione, ut & illa certantes foveat, & torpentes pungat.**

Si autem quæras, unde proficiat malitiæ inæqualitas? Respondebo cum S. Thoma 3. cont. Gent. cap. 139. ex majori voluntatis à debita mensuratione recessu. Libet præclarè ejus verba referre. *In omnibus, quorum perfectio, & bonum in quadam commensuratione consistit, quantò magis à debita mensuratione receditur, tantò majus erit malum. Sicut sanitas consistit in debita commensuratione humorum, & pulchritudo in debita proportionem membrorum, veritas autem in commensuratione intellectus, vel sermonis ad rem. Patet autem, quod quantò est major inæqualitas in humoribus, tantò est major infirmitas; & quantò est major inordinatio in membris, tantò est major turpitudine; & quantò magis à veritate recedi*

receditur, tantò est major falsitas; non enim est tam magna falsitas æstimantis tria esse quinque, sicut ejus qui æstimat tria esse centum. Bonum autem virtutis in quadam commensuratione consistit; est enim medium secundum debitam limitationem circumstantiarum inter contraria vitia constitutum: quantò igitur magis ab hac harmonia receditur, tantò est major malitia.

R E F L E X I O.

Ex ignorantia peccare ferè necessarium, ex infirmitate humanum, ex malitia diabolicum est. Nam ut ait August. lib.2. contra Donatist. *In nullo aliter sapere, quàm res se habeat, angelica perfectio est. Quandiu ergo non habemus perfectionem Angeli, non habeamus presumptionem diaboli.* Heu quot inter homines, & Christianos, invenire diabolos est, qui ex proposito, & industria malis cognitis prono animo consentiunt; quos nec innocentia sistit, nec patientia retardat, nec timor frænât, nec pudor inhibet. Quis non obstupescat Christianos infinitos, nec correctione proficere, nec sacramentis molliri, sed durescere, & occallere, atque ad illam consummatam infelicitatem pervenire, ubi turpia non solum delectant, sed etiam placent, & desinit esse remedio locus, ubi quæ fuerant vitia, mores fiunt. B. Magdalensæ à Pazzi Christianum posse peccatum mortale ultrò patrare, mysterium erat, & ænigma intricatissimum. Quid ergo de illis dixisset, quibus ut ait Augustinus, peccatum consuetudine vilescit, fitque illis quasi nullum sit; quive obduruere jam, inò mortui sunt, quia non dolent. Nam *quando aliquid pungitur, & dolet,*

aut sanum est, aut est in illo spes aliqua sanitatis. Quando autem tangitur, pungitur, calcatur, nec doler, pro mortuo habendum, ac de corpore pracidendum est.

Considerent, quæso, qui hujusmodi sunt, propriæ iniquitatis horrorem, & quàm crescat immensus culpæ cumulus malitiæ electione. Attendat, quod ut ait D. Thomas artic. 4. *Cum ex certa malitia peccatur, motus peccati est magis proprius voluntati, quæ ex seipsa in malum movetur, quàm quando ex passione peccatur, quasi ex quodam extrinseco impulsu ad peccandum.* Ex seipso, proprio motu, spontè, & frigidè moveri contra Deum, in illum bellare, ipsum floccifacere, iniquitatis summa est, & ire ulterius pervertitas non potest, nisi quæramus aliquid post omnia. Qui talis est, & diu peccat, & sæpe peccat, & ferè semper, & quasi connaturaliter. Nam ut ait S. Doctor ibidem: *Passio quæ inclinatur ad peccandum, citò transit, & sic homo citò redit ad bonum propositum poenitens de peccato. Sed habitus, quo homo ex malitia peccat (sive sit habitus strictè, sive aliqua alia prava dispositio, ut antea ex D. Thoma explicabamus) est qualitas permanens, & ideo qui ex malitia peccat, diuturnius peccat.* Vnde Philosophus in 7. Ethic. comparat intemperatum, qui peccat ex malitia, infirmo, qui continuo laborat; incontinentem autem, qui peccat ex passione, ei qui laborat interpolatè. Quid eo animæ statu deplorandum magis, in quo durâ consuetudinis vi, quâ premitur anima, nec resurgere potest, nec respirare permittitur, quia ut ait Gregorius hom. 31. in Evang. *Visitata culpa obligat mentem, ut nequaquam surgere possit ad rectitudinem; conatur, & labitur, quia ubi diu sponce.*

sponte perstitit, & ibi cum noluerit, coacta cadit. Et ut alibi ait: Anima malorum actuum pondere oppressa, in mala consuetudinis carcere inclusa, à semetipsa exire non potest. Quis autem hujus status pericula enarrare facile posset? Quis Prædicator hunc peccatorem ad meliorem frugem reducere? Quis Sanctus hunc mortuum suscitare, qui vitam moralem à fine petitam & extinxit, & irreparabilem sciens, & volens ipse fecit? Nam ut profundè idem Angelicus Doctor: Qui peccat ex certa malitia, est malè dispositus quantum ad ipsum finem, qui est principium in operabilibus; & sic ejus defectus est periculosior, quàm ejus, qui ex passione peccat, cujus propositum tendit in bonum finem, licèt hoc propositum interrumpatur ad horam, propter passionem. Semp̃r autem defectus principii est pessimus. Unde manifestum est, quod gravius est peccatum, quod est ex malitia.

Ergo si, quod absit, talis es, Lector, abscinde, abscinde ferro acutæ compunctionis ulcus inveteratæ malitiæ; & si acerbus est dolor, leni unguento devotionis. Emolli sanguine cordis, id est lacrymis, duritiem supra adamantem rigidam, quam formasti; aliàs non diabolo te duntaxat, sicut antea, similem dicam, sed pejorem. Nam ut præclarè lib. de cas. diaboli, Anselmus observavit: Diabolus nullâ precedentis peccati vindictâ superbiens peccavit; tu visâ ejus poenâ non continens, ad peccatum properasti; ille in innocentia constitutus; tu verò restitutus: ille perstitit in malitia Deo reprobande; tu verò Deo revocante: ille obduratur ad punientem; tu verò ad blandientem, & sic uterque contra Deum: ille contra non requirentem se; tu verò contra morientem

pro te. Ecce cujus imaginem horrebas, sed horrorem aspicio in te horribiliorem.

SPECVLATIO III.

Nullum unquam contingit in voluntate peccatum absque prævio intellectus defectu.

HAnc assertionem, quam Scriptura, & Patres in reflexione referendi non obscure docent, tradit apertè D. Thomas in præsentibus *quæst. 77. art. 2.* ubi licet reprobet opinionem Socratis aientis, nunquam scientiam posse superari à passione, subdit tamen S. Doctor, aliquantulum Philosophum illum sapuisse, quia cum voluntas sit veri, vel apparentis boni, nunquam in malum moveretur, nisi id, quod non est bonum, aliquantulum rationi bonum appareret; & propter hoc voluntas nunquam in malum tenderet, nisi cum aliqua ignorantia, vel errore rationis.

Ratio fundamentalis ex illa S. Thomæ doctrina eruitur, & formatur in hunc modum: Non potest voluntas, quæ est inclinatio in bonum rationis, eligere malum morale, seu rationi dissonum, formaliter ut malum est, cum nemo intendens malum operetur, & malum quia malum, non possit esse objectum voluntatis: ergo nequit voluntas malum appetere, nisi sit aliqua boni veri, vel apparentis ratione illitum. Sed error est, imò error errorum, id quod est malum, practicè apprehendere, & eligere ut bonum. Ergo
quod

quodcumque peccatum præcedit semper aliquis rationis defectus.

Quam rationem clariùs intelliges, profundiusque penetrabis, si consideres, quod ut voluntas eligat actum malum, v.g. fornicationem, non sufficit ut intellectus judicet, hanc actionem esse bonum delectabile, sed etiam requiritur, ut intellectus hic, & nunc judicet, & in actu exercito pronuntiet, fornicationem esse eligendam; voluntas enim cum non possit ferri nisi in id, quod proponitur ab intellectu, non potest etiam eligere, nisi quod ab intellectu ut eligendum proponitur: in tantum autem intellectus proponit aliquid voluntati ut eligendum, in quantum practice affirmat objectum illud dignum esse, quod eligatur: quod utique iudicium falsum est practice erroneum, & à veritate alienum, cum per illud enuntietur res aliter, ac sit in se, nimirum opus prohibitum esse dignum, quod eligatur. Præsertim quia quotiescumque voluntas eligit aliquid, non solum vult illud, sed etiam vult se velle, potius quam non velle per virtuales in suum actum reflexiones, & ratione dominii, quod habet in actus suos. Ergo debet dictari ab intellectu, objectum illud esse potius volendum, quam non volendum (liceat his verbis uti expressionis majoris ergo) ne voluntas feratur in incognitum, & in non propositum ab intellectu. Ergo quantumcunque peccator speculative cognoscat, opus illud esse malum, quantumcunque de industria peccet, latens cum malè fecerit, & exultans in rebus pessimis, quantumcunque sit servus ille nequam, sciens & non faciens; tamen hic & nunc errat, & ut D. Thomas 2. 2. q. 20. art. 2. ait: *Qui fornicatur eli-*

*gendo sibi fornicationem, ut nunc habet corruptam
æstimationem in particulari, cum tamen retineat
universalem æstimationem secundum fidem, sci-
licet quod fornicatio sit mortale peccatum.*

Sed Dices: Quomodo fieri potest, quod stan-
te iudicio universali affirmante bonum rationis
esse præeligendum, possit intellectus formare
practicum dictamen illi veritati oppositum, &
dicere: Non est bonum rationis hic & nunc
eligendum?

Respondeo, falsum illud iudicium practicum
speculativo universali contrarium nasci vel ex
aliqua dispositione ipsius intellectus non satis
bonum rationis ponderantis, vel ex infirmitate
voluntatis pronæ ad malum ab adolescentia sua,
cui proclivitati ob naturalem utriusque potentiæ
sympathiam blanditur, & adulatur intellectus;
vel ex corruptione appetitus allicientis, & ad
turpia pertrahentis. Ut enim sæpe diximus, nec
iterare piget, licet vitio originis humana volun-
tas, appetitusque sensitivus evaserint intellectu
corruptiores; attamen ex offusis per concupis-
centiam nebulis mens non solum ad veritatis
speculativæ intelligentiam sæpe obtorpet, sed
veritates præsertim practicas, quibus à concu-
piscentiis suis iubetur temperare, refugit, &
aversatur. Quia nimirum bona sensibilia sensus
externos cient, his imaginatio excitatur, ima-
ginatione boni sensibilis allicitur appetitus, &
inescatur; ex appetitu ascendunt primùm in-
phantasiam, deinde in rationem concupiscentiæ
vapores; quibus mentis, quæ in parvo mundo
cælum est, serenitas infuscat, cæcatam verò, vel
obscuratam rationem sequens voluntas in fo-
veam cadit, & quasi quibusdam terræ motibus
nedum

nedum quatitur, sed & corrui mobilis animi
nutantis affectus.

Instabis: Sæpe sæpius affirmant Patres præ-
lucentem rationis scientiam non nisi tardum se-
qui voluntatis affectum. Et certè experienciâ
compertum est, multos esse rebelles lumini, &
iniquitate quasi ex adipe prodeunte veritatem
notam aspernari; alios verò non ita obduratos,
non nisi cum conscientia remorsu, subindeque
notitia criminis operari malum: ergo nullus in-
tervenit tunc intellectus error; non enim dicit:
intellectus, opus pravum esse honestum, in quo
utique graviter erraret; sed ait, opus illud esse
utile, vel delectabile, & reapse ita est.

Respondeo omnia Patrum testimonia, quæ
hæc in re justis voluminis cuilibet non indocto
materiam suppeditabunt, si eam, quam poterit,
copiam velit sectari; testimonia illa, inquam,
si non intelliguntur de scientiâ habituali, & fide,
quam floccifacit peccator dum malè agit, expli-
cari tamen sine negotio possunt de scientiâ
actuali universali, vel etiam particulari merè spe-
culativa. Quo sensu dixit Philosophus. 2. Ethic.
cap. 4. *Scire parum, vel nihil prodesse ad virtutes.*
Ubi loquitur de scientiâ prudentia dis-
juncta, quæ magis inflat, quàm ædificat. Ex qui-
bus patet ad omnia illa exempla ab experientia
deprompta; licet enim & rebelles lumini, &
conscientiâ acti judicium speculativum verum
formet, practicum tamen erroneum eliciunt,
peccantque non contra fidem, sed contra pru-
dentiam; quia non solum dicit intellectus pec-
cantis opus pravum esse delectabile, sed esse hic
& nunc dignum, quod eligatur, & bono honesto
preferatur, & lege reclamante exerceatur. Qui

est error practicus, & ut quidam bellè dicebat, hæresis operis, & infidelitas Catholicorum.

R E F L E X I O.

Errant omnes, qui operantur iniquitatem, inquit Spiritus sanctus Proverb. 22. Omnis peccator stultus fuit in culpa, ait Magnus Gregor. lib. 15. Moral. cap. 23. Hac de causa in sacris literis peccatum vocatur insipientia, & error: Non est sanitas in carne mea à facie insipientia mea. Erravi sicut ovis, qua periit, aiebat post peccatum David Psalm. 37. & 118. Hinc peccatores filii tenebrarum à Veritate dicti sunt, quia oculati ad humana, cæcutiunt ad divina. Ob eandem rationem non solum pueris auro vitrum, margaritis quisquillas præferentibus, sed etiam bestiis ratione carentibus peccator comparatur. Homo, inquit Psalmographus, cum in honore esset, non intellexit, comparatus est jumentis insipientibus, & similis factus est illis. Unde Chrysolog. ponderans illud de Prodigio Luc. 15. dictum, In se reversus, ait: In se redit, qui à se antè recesserat. A se enim migrat peccator, & totus transit in bestiam. Quin & ipsis bestiis bestialior dicitur à Bernardo peccator, utpote ratione vigens, ratione non utens. Nec hæc veritas Philosophum latuit; ait enim 1. Ethic. cap. 3. Omnis pravus est ignarus.

Errant profectò qui operantur malum, quia peccati granditatem non attendunt, oculos à divina regula avertunt: ergo si non vis errare, nec errando peccare, audi Augustinum in Psalm. 122. monentem: *Peccatum tuum sit ante te, ut non sit ante Deum. Si tu non avertis faciem tuam à peccatis*

peccatis tuis, tu agnoscis, & ille ignoscit. Errant sanè, quia dum felicitatem in peccato invenire se credunt, veram in eo miseriam experiuntur. Multi miseri sunt magis habendo quod amant, quàm carendo. Amando res noxias, miseri sumus; habendo, miseriores. Errant, dum virtutis imaginem tetricam sibi fingunt, & asperam, labore & dolore duntaxat stipatam comminiscuntur. Nam etsi alumnos suos asperam, ac pœnitentem colere vitam, per arctam viam incedere, crucem jugiter ferrè velit Christianismus, quia ut monet Augustinus in Psalm. 96. Nemo sibi promittat, quod Evangelium non promittit. Attamen cruce ungit consolatio, mirisque ac veris modis cor hominis Deus infusa cœlesti suavitate carnis delectationem superante ad se allicit. Ergo fratres mei, inquit August. serm. II. de verb. Apost. habet delicias suas iniquitas, & iustitia non habet? Delectat malum, & non delectat bonum. Delectat omnind, sed dominus dabit suavitatem, & terra nostra dabit fructum suum.

CAPVT II.

De externis peccatorum causis.

DE tribus potest esse difficultas. Primò de Deo, quia cùm concurrat ad actum peccati, videtur etiam, quod sit causa peccati. Deinde quæri potest de diabolo; & terriò de homine. Et de his certum est, diabolum, & etiam hominem

nem malum posse alios ad peccandum inducere, vel offerendo aliquid appetibile sensui, vel persuadendo rationi, objectum malum esse bonum, vestiendo ipsum mentitis coloribus bonitatis. Unde August. lib. 4. de Trinit. cap. 12. ait: *Diabolus sua societati malignos affectus inspirat.* Et Beda in cap. 5. Actor. sic: *Diabolus animam in affectum malitia trahit.* Et Isidor. lib. de sum. bon. cap. 5. sic: *Diabolus corda hominum occultis cupiditatibus replet.* Id autem præcipue efficit diabolus commovendo phantasiam & appetitum sensitivum, quia cieri potest spiritus & humores, unde variae formantur in imaginatione representationes, varique insurgunt in corde motus, unde passionες cōcitantur. Contingit autem non raro, ut illud bonum æstimet esse peccator, quod imaginationi arridet, & appetitum demulcet: unde expugnato, captoque imaginationis, appetitusque suburbio, facile rationis arcem aggreditur hostis communis, irrumpit, & invadit; non quidem interiùs inclinando voluntatem, quæ soli Deo patet, sed suggerendo, vel aliqua appetibilia proponendo, quibus in affectum peccati permovetur, non tamen necessitatur; quia nequit cacodæmon libertatem tollere quandiu usum rationis non impedit: si autem impediat, ita ut ratio sit totaliter ligata, ut in arreptitiis, & energumenis contingit, nullum tunc hominē peccatum imputatur. Unde dæmon arte solum & dolo homines aggreditur, & ut ait Magnus Gregorius, prius complexionem uniuscujusque perspicit, & tunc tentationis laqueos opponit. *Alius namque latis, alius tristibus, alius timidis, alius elatis moribus existit. Quo ergo adversarius occultus facile capiat, vicinas complexionibus*
deceptis

deceptiones parat. Quia latitia voluptas proxima, letis moribus luxuriam proponit. Et quia tristitia in iram facile labitur, tristibus peccatum discordia porrigit. Quia timidi supplicia formidant, paventibus terrores intemat. Et quia elatos extolli laudibus conspiciat, eos ad quacumque voluerit, blandis favoribus trahit. Singulis igitur omnibus vitiis conniventibus insidiatur. Ideo de adversario illo dicit Scriptura: Circuit querens quem devoret; quia blanditur, ut fallat; arripit, ut noceat; allicit, ut occidat; laqueos tendit, lapsus parat, foveas fodit, aptat ruinas, stimulat corpora, pungit animas, cogitationes suggerit, immittit iras, dat virtutes odio, vitia addit amori, errores serit, discordias nutrit, pacem turbat, affectus dissipat, humana violat, divina tentat; sed præcipuè bona primordia pulsant, captat rudimenta virtutum, sancta proposita in ipso ortu conatur extinguere, sciens quod ea subvertere fundata non possit. Hinc merito mali omnis author, homicida ab initio occidens animas, nequitiae origo, rerum omnium hostis, corruptor sæculi, hominis capitalis inimicus appellatur. Sed si dæmonum est mala suggerere, nostrum est non consentire; quia etsi latrare possit, mordere tamen, nisi velimus, non potest, si ad Deum præsertim confugiamus, qui visitat, ut pugnemus; adjuvat, ut vincamus; consolidat, ne deficiamus; coronat, ut cum ipso regnemus.

His præmissis, circa causas externas peccati duo supersunt explicanda. Primum quomodo Deus non sit causa peccati, tamen totum actum peccati quoad entitatem, & materiale producat, atque ad ipsum, in sententia Thomistarum, præ-
determini

determinet. Secundò, quomodo homo possit esse causa peccati alterius, non solum exterius suggerendo, vel materiam peccandi administrando, sed etiam speciali modo peccatum per originem propagandò, in quo consistit veritas catholica de peccato originali. Verùm de priori commodius, latiusque in libro de Deo motore disseremus, omnia, quæ ad divinum concursum spectant, uno in loco opportuniùs complexuri. Quare de posteriori causa peccati, nimirum de originali labe, operosè tractandum superest.

SPECVLATIO I.

Nullus Catholicus peccatum originale negare potest, quod in omnes & singulos intrinsecè transfunditur.

PRImam partem negabant mordicus Pelagiani, ut ex epistolis Conciliorum Mileviani & Carthaginensis ad Innocentium, atque ex omnibus ferè Augustini libris constat. Ex quo errore in alios hæretici impingebant; ut enim viciatam non esse nostram naturam superbissimè sustinerent, asserabant concupiscentiam non esse malam, nec per ipsam peccatum posse trajici; ignorantiam quoque veri, difficultatem recti, mortem corporis, aliasque, quas experimur, animi, corporisque misérias, non pœnam peccati, sed primordia naturæ esse dicebant. Unde inferebant, hominem in hoc statu, in quo vivimus, naturam perfectam, ac integram.

gras liberi arbitrii vires habere, nec ulla esse prava inclinatione corruptum, nulla sui parte sauciatur. Ad effugiendam etiam vim insolubilis argumenti ex necessitate baptismatis petiti, comminiscabantur, pueros sine baptismo decedentes, non quidem regnum cœlorum, sed quandam vitam æternam, inter regnum cœlorum, & æternam damnationem mediam obtenturos. Quavis vi argumenti fermè oppressi in hac parte dubii forent, & ancipites. Unde Pelagius apud August. 1. lib. *de pecc. orig. cap. 21.* aiebat: *Sine baptismo parvuli morientes quò non eant scio, quò eant nescio.*

Sententia autem Catholica in Concilio Milevit. *can. 2.* in Afric. *can. 77.* & in Trident. *sess. 5. cap. 4.* expressa, perpetuâ, & constanti Patrum traditione edocta, & non interrupto Ecclesiæ sensu praxi firmata variis potest Scripturarum, iisque clarissimis testimoniis comprobari. Rom. 3. *Per unum hominem peccatum intravit in mundum, in quo omnes peccaverunt.* [2. Cor. 5. *Si unus pro omnibus mortuus est: ergo omnes mortui sunt.* Ephes. 2. *Eramus naturâ filii iræ, sicut & ceteri.* Et in veteri Testamento Psal. 50. *Ecce enim in iniquitatibus conceptus sum, & in peccatis concepit me mater mea; id est in peccato originali, quod dicitur peccata, & iniquitates, quia omnium est culparum seminarium.* Et Job 14. *Quis potest facere mundum de immundo conceptum semine?* Quem locum paraphrasis Chaldaïca de immunditia peccati exponit; & Septuaginta Interpretes: *Nemo mundus à sorde, ne infans quidem, cujus est unius diei vita super terram.* Nec valent effugia Pelagianorum aientium his locis probari, peccatum originale ab Adamo ad posteros,

ros, non transfusione, sed exemplo duntaxat & imitatione transire. Non valet, inquam: tum quia pueri in conceptione antequam Adamum imitari possint, in iniquitatibus sordere dicuntur. Tum quia, ut rectè arguit August. *lib. 2. Operis perfecti*, sic potius in diabolo nos peccasse diceremur; prius quippe ipse peccavit, & peccandi exemplum præbuit.

Non desunt etiam rationes theologicæ. Prima petitur ex redemptione Salvatoris, quâ omnibus meruit gratiam à peccato liberatricem; neque enim Christus venit salvare justos, sed peccatores; nec est opus bonè valentibus Medico. Secunda ex necessitate circumcisionis in veteri lege, & baptismatis in nova desumitur. Cum enim eorum effectus sit gratiam Dei restituere, signum est, eam esse per aliquod peccatum amissam. Tertia ex effectibus peccati efficitur, quos quotidie experimur, & ipsi infantes vix nati patiuntur. Cum enim miseriæ, & pœnæ non possint à Deo summè bono, & peræquè justo, nisi propter peccatum infligi, saltem de potentia ordinaria, ut alibi dicemus, vel certè nunquam infligantur, necesse est, in parvulis aliquod inesse peccatum, in quibus tot miseriarum cernimus varietates. *Ostende justum esse*, inquit Augustinus *lib. 1. Operis jam perfecti*, alloquens Julianum, *ut cum in tam manifesta miseria, vel ad tam manifestam miseriam nascatur, à quo peccatum originale non trahitur.*

Secunda pars affirmans, peccatum originale intrinsecè in omnibus, & singulis inveniri, est contra Catharinum, & Albertum Pighium, existimantes peccatum originale non esse posteris Adami intrinsecum, sed extrinsecam duntaxat impor-

importare denominationem petitam ab actu Adami, in quo interpretativè alii peccasse dicuntur. Unde secundùm illos nihil intrinsecum, nisi sola pœna traducitur. Cui sententiæ nimis affinis est opinio Durandi, qui licèt fateatur, traduci aliquem defectum, illum tamen esse propriè peccatum inficiatur, quia propriè voluntarium dici non potest. Sed non video has sententias posse modò post Tridentinum sustineri, postquam sacrum Concilium *sess. citata, can. 3.* definivit, peccatum originale esse *unicuique proprium, ex propagatione, non imitatione.* Et *can. 4.* per Baptismum tolli id, quod *habet veram, & propriam rationem peccati.*

Ratio verò est, quia in omnibus Adæ posteris invenitur privatio justitiæ originalis, ad quam removendam ordinatur Baptismus; quæ quidem privatio est malum hominis, utpote tanti boni, quod est gratia, carentiam importans: malum, inquam, morale & voluntarium, ex actu peccati nobis voluntario relictum eo modo, quo transacto peccato macula remanet, ob quam dicimur non peccantes, sed peccatores; non malè agentes, sed mali. At macula ex actu voluntario peccati remanens, inest intrinsecè: ergo peccatum originale inest unicuique proprium, & intrinsecum. Minor, & consequentia patent. Major verò non solum difficilis, sed inintelligibilis videtur adversariis: quis enim capiat, inquiunt, illud quod est necessarium, quod est inevitabile, quod non est à principio intrinsecum cum cognitione, quod non est in potestate nostra, esse, vel dici posse nobis voluntarium, quanvis vices nostras alteri non commiserimus, nec factum ratum habeamus, nec illud impedire potuerimus?

Non

Non potest autem ullum esse peccatum, ubi non invenitur voluntarium, teste Augustino lib. 3. *de liber. arb. cap. 17. & 18.* dicente: *Peccatum adeo est voluntarium, quod si non sit voluntarium, non est peccatum.* In hoc tota sita est difficultatis summa, & summitas: & sanè difficultas summa est, nec parum Ecclesiæ Patrum ingenia, quàmlibet ampla, & præclara fatigavit, & torfit,

Probatum tamen major, & explicatur. Licet ex vi juris naturalis, vel humani Adamus non ita fuerit caput morale posterorum, ut pro eis justitiam, & sanctitatem pro arbitrio conservaret, vel amitteret, aliàs omnia parentum peccata in filios transfunderentur; id tamen Protoparenti convenire potuit ex institutione, pacto, decretoque divino, quo omnium filiorum voluntates in ipsa primi parentis, voluntate conclusit. Quod quidem pactum colligit August. lib. 16. *de Civit. cap. 29.* ex illo Gen. 17. *Masculus, cujus præputii caro circumcisa non fuerit, peribit anima ejus de populo Dei, quia pactum meum irritum fecit;* non in se quidem, sed in Adamo, qui pactum illud violavit. Illud etiam colligit D. Hieron. ex illo Osee 6. *Ipsi autem, sicut Adam, transgressi sunt pactum.* Igitur si ex pacto Dei voluntates nostræ fuerunt in voluntate Adami, transgressio Adamo voluntaria, nobis quoque voluntaria meritò dici potest. Cùm enim Deus magis habeat in potestate sua voluntates hominum, quàm ipsi suis, si nos possumus propriam in alienam transferre voluntatem, quidni Deus supremus Dominus id poterit? Nec nobis injuriam fecit, quod proprium non expectavit consensum: tum quia justitiæ originalis sanctimo

timonia, & felicissimi status prærogativarum beatissima copia in nos transfusæ fuissent, si Adamus voluisset: tum quia Adamum gratiis ornavit, auxiliis munivit, & contra tentationes vallavit: tum quia propter tale peccatum gratuitis nos duntaxat spoliavit, naturalibus saltem materialiter, & physicè manentibus.

Quare licet pueri non sint capaces actus formaliter ratione propriæ voluntatis, benè tamen interpretativè ratione voluntatis Adami, quæ omnium erat pusterorum voluptatibus facta. Unde August. lib. 1. retract. cap. 23. ait: *Id quod in parvulis dicitur originale peccatum, cum adhuc non utantur arbitrio voluntatis, non absurdè vocatur etiam voluntarium, quia ex firma hominis voluntate contractum, factum est quodammodo hereditarium.* Et lib. 2. de nupt. & concup. cap. 28. Pelagianò petenti, quomodo cum nec peccet qui nascitur, nec qui genuit, nec qui condidit, peccatum subrepat, & per quas rimas inter tot præsidia innocentiae culpa subintret; respondet sanctus Pater: *Quid quaris latentem rimam, cum habeas apertissimam januam? Per unum hominem, ait Apostolus, per unius delictum, ait Apostolus, per inobedientiam unius hominis, ait Apostolus. Quid quaris amplius? Quid quaris apertius? Quid quaris inculcatius? Quare tota, quam adversarii patiuntur, difficultas ex eo provenit, quod non satis advertunt, vel advertere nolunt discrimen, quod peccatum personale inter, & originale intercedit. Licet enim peccatum personæ actum à persona elicatum supponere debeat, non tamen peccatum originale, seu naturæ, quod relinquitur ex actu capitis*

pitis totius naturæ, supposito Dei pacto, voluntatibus omnium gravidis, & plenis.

Faciliùs se ab hac difficultate expediunt alii Theologi, etiam Thomistæ, existimantes; peccatum origiuale esse unicuique intrinsicum, quanvis non sit nisi extrinsecè voluntarium, denominatione petità ab actu voluntatis Adami. Sicque intelligendum putant D. Thomam, dum ait peccatum originale non esse voluntarium voluntate propria, sed voluntate Adami, sicut actus membri corporalis, putà manus, non est voluntarius voluntate ipsius manus, sed voluntate animæ: unde homicidium non imputatur manui ad peccatum, si consideretur manus secundum se ut divisa à corpore; sed imputatur ei, in quantum movetur à primo principio motivo hominis. Pater autem peccatum esse manui voluntarium extrinsecum duntaxat denominatione. Nec sequitur peccatum originale esse duntaxat extrinsecum denominatione peccatum, quia non eadem semper ratione, eodemque modo aliquid peccatum est, quibus est voluntarium. Probabile namque est, actus imprudentiæ & infidelitatis, esse verè, & intrinsecè peccata, licèt non sint intrinsecè voluntaria, & libera. Inculcat quidem Augustinus, voluntarium requiri ad peccatum; sed non propterea eodem modo aliquid debet esse peccatum, quo est voluntarium. Et certè si non à veritate aliena eorum sententia est, qui volunt, peccatum habituale personæ non nisi extrinsecum denominatione à præterito peccati actu petità esse voluntarium, tametsi internum sit peccatori, quia transacto actu nihil remanet, nisi privatio gratiæ, & virtutum, ac mors animæ: sicut homo

tran

transacto motu locali dicitur quidem verè, & intrinsecè distans à loco unde profectus est, non dicitur tamen motus, nisi denominatione extrinseca à motu fluxo petita: ita actus voluntarius peccati est motus recedendi à Deo; peccatum verò habituale est veluti spiritalis distantia, quæ intrinsecè manet, licet non maneat voluntarium: unde magnum illud chaos inter Deum & peccatorem firmatum est. Si hæc, inquam, vera sunt de quolibet peccato habituali, quanto magis peccato originis accommodari poterunt, & debebunt?

Sed dices: Nondum quiescit animus, sed magis, magisque difficultate pulsatur, & premitur; quid enim mirum, quod post actum peccati mortalis, quo gratia extinguitur, peccator dicatur intrinsecè gratiâ privatus, & peccati maculâ sordidus, qui gratiâ antea, & intrinsecè afficiebatur, & eâ se liberè spoliavit? At quod puer in primo conceptionis momento dicatur habere peccatum propter actum voluntatis alienæ; & quod peccatum illud ipsum intrinsecè afficiat æquè, ac si ipse antea peccasset, ut contingit in peccato habituali connotante peccatum actuale; & quod illud peccatum generatione propagetur, & intrinsecè inficiat animam de manu Creatoris è nihilo eductam; hæc, inquam, mysteria sunt inexplicabilia, & toto cælo ab exemplis à nobis adductis discrepantia.

Respondeo, quod si nulla foret in explicando peccato originali difficultas, frustra tot annis in confundenda Pelagianæ hæresis superbia fatigatus fuisset fortissimus Patrum Augustinus, quem propterea continua ad mortem usque fluctuatione circa peccati originalis transfusionem

nem fuisse ancipitem, & in concilianda divina justitia cum puerorum nullius adhuc actualis peccati reorum innocentia non parum laborasse, non semel significavit. Sed propterea rationis humanæ argumentis, vel potius sophismatis, & tenebris, à Catholicæ veritatis luce ne latum quidem unguem discedere licet, sed ea potius in obsequium fidei captivanda, & fidei servire cogenda est. Ut autem salebrosa difficultas complanetur, & explicetur quomodo virtute seminis peccatum originale generatione propagetur, traducaturque in omnes, & singulos culpa illa primigenia, considerandum est, peccatum Adæ, quod est origo nefandæ propaginis, non posse dici causam physicam illius transfusionis. Quia nimirum peccatum Adæ per veram, longamque pœnitentiam deletum, nec existit in Adamo justo, nec in ulla virtute ab Adamo decisa, putà in semine; quia cum corpus non possit agere in spiritum nisi virtute Dei; in Deum refundetur peccatum, si corpus peccatum in animam derivaret. Et sanè eodem modo ratiocinandum est de traductione peccati originalis, supposito Adami lapsu, quo loquendum foret de transfusione justitiæ originalis, si Adamus non peccasset. Hæc autem non diffunderetur causalitate seminis physicè influente: Ergo nec illud hoc modo traduci credendum est. Relinquitur ergo, ut peccatum Adami sit causa duntaxat moralis; & sicut Adam est causa peccati, non prout est caput naturale, sed prout est caput morale (ideo enim proximi parentes licet sint caput naturale filiorum, non transfundunt tamen sua peccata in liberos, quia non sunt caput morale eorum:) ita etiam Adam non poterat dici nisi causa moralis,

ralis, influxus enim capitis moralis non nisi moralis esse potest.

Explicatur ampliùs, & fortè profundius. Dissidium quidem est inter Theologos, an peccatum Adami sit causa moralis demeritoria, necne? Et partem affirmativam tenent nonnulli, quia hoc meretur peccatum capitis, ut in suis membris puniatur: & sicut Adamus conservans justiciam, illius transfusionem, sin ex justitiæ rigore, certè ex Dei paciscentis fidelitate promeritus fuisset; ita peccato suo Adamus maculari omnes posteros promeruit. Alii verò id negant; quia, inquiunt, aliàs sequeretur peccatum originale in parvulis non peccati, sed pœnæ rationem habere, quomodo infamia à patre in posteros derivatur. Sed utut sit de illa utraque sententia, certum est, peccatum Adæ esse causam moralem peccati originalis per quandam naturalem resultantiam, sicut si homo in peccato mortali existēs ad nihilum redigeretur, & postea è nihilo extraheretur, resuleret in eo peccatum habituale, non ex actione Dei, sed ex peccato actuali præcedente, tanquam ex causa moraliter influente. Sicut etiam infamia, & nominis obscuritas, quam à patre nefando contrahit liberorum progenies, non effectivè producitur vi generationis, quæ se ut conditio duntaxat habet, quâ posita, ex delicto paterno, tanquam ex causa morali infamia propagatur: ita generatio non causa, sed conditio est, sine qua non contraheretur originale peccatum, quò non inuritur homo, nisi quia est membrum Adæ, quod utique per generationem sortitur. Sicut denique si in loco tenebroso produceretur corpus diaphanum, quod non reciperet lucem propter obicem opaci cor-

poris, affulgentis Solis ingressum impredientis, hujusmodi corporis productio non esset causa tenebrarum, quæ in solum ponentem obstaculum refunderentur: ita causa peccati originalis non est generatio, sed peccatum præcedens, quod ingens divinæ gratiæ influxui ponit obstaculum; generatio verò, sine qua non esset homo, est etiam conditio sine qua non esset peccatum. Ex quo etiam intelliges, quomodo actus legitimi matrimonii non sint illiciti; quia culpa illa generalis ex illis non per se, sed per accidens; non ex actu generantis, sed ex peccato Protoparentis derivatur.

Instabis: Scrupulus nondum benè evulsus est; nam si Adam antequam accederet ad Evam erat mundatus à primo peccato, quomodo ratione illius infici potest proles, & propago?

Respondeo, semel deletum Adami peccatum non formaliter quidem, sed virtualiter in generante mansisse, & in omni generatione etiamnum manere, sicut in tritico paleis mundato producendarum palarum virtus perseverat. In semine ergo est virtualiter venenum primigenium, non quòd semen attingat productionem peccati, sed quia peccatum comitatur naturam, cujus semen est virtualiter productivum. In quo sensu dixit D. Thomas quæst. 81. art. 1. ad 2. & 3. *Per virtutem seminis traducitur natura humana à parente in prolem, & simul cum natura natura infectio. Ex hoc enim fit iste, qui nascitur, consors culpa primi parentis, quòd naturam ab eo sortitur per quandam generativam motionem. Etsi enim culpa non sit actu in semine, est tamen ibi virtute humana natura, quam concomitatur talis culpa.*

Et

Et q.83. art. 1. *Peccatum originale omnium hominum fuit quidem in ipso Adam, sicut in prima causa principali, secundum illud Rom. 5. In quo omnes peccaverunt. In semine autem corporali est peccatum originale sicut in causa instrumentali, eo quod per virtutem activam seminis traducitur peccatum originale in prolem simul cum natura humana. Nec obest, quod Adam esset mundatus ab illo peccato antequam ad Evam accederet, sicut de facto ejus culpæ puri sunt post Baptismum Christiani cognoscentes uxores suas. Non obest, inquam, quia ut benè ait S. Doctor quæst. 81. art. 3. ad 2. Peccatum originale per baptismum (& in Adamo per pœnitentiam) auferitur reatu, in quantum anima recuperat gratiam quantum ad mentem: remanet tamen peccatum originale actu, quantum ad fomitem, qui est inordinatio partium inferiorum anima, & ipsius corporis, secundum quod homo generat, & non secundum mentem. Et ideo baptizati traducunt peccatum originale. Non enim parentes generant, in quantum sunt renovati per baptismum, sed in quantum retinent aliquid de vetustate peccati. Quam doctrinam ex Magistro suo Augustino deprompserat Aquinas. Miraris, inquit August. serm. 14. de verb. Apost. quare peccator nascatur de semine justî; non te delectat mirari, quare oleaster nascatur de semine olive. Accipe aliam similitudinem: non attendis, quia de grano purgato frumentum cum palea nascitur, sine qua seminatur. Ideo de baptizato non justus nascitur, quia non eum generat unde regeneratus est, sed unde generatus est.*

R E F L E X I O.

Exaggeravimus morbum, inquit Auguſt. in Pfalm. 101. *laudemus & Medicum*: amemus liberatorem totis medullis cordium, totis præcordiorum affectibus diligamus redemptorem, qui ſolus unus eſt, qui ſine peccato natus eſt in ſimilitudinem peccati; ſine peccato vixit inter aliena peccata; ſine peccato mortuus eſt propter aliena peccata: & licet particeps factus ſit noſtræ infirmitatis, non tamen iniquitatis, ut ex quo nobiſcum communicavit infirmitatem, ſolveret noſtram iniquitatem.

Quid retribues Chriſto Domino, anima mea pro his quæ retribuit tibi, quæ cum tenereris antè captiva ſub diabolo, redempta es à captivitate, & tam copioſè, ut ſi non abnuas, fieri poſſis ſocia menſæ, ſocia regni, ſocia thalami. Vide quibus charitatis brachiis amplectendus, redamandusque ſit ille Salvator, qui tanti te æſtimavit, tanti te fecit tantillam & talem. Ergo planè dignum, & verè juſtum eſt, ut ſicut ille redemptio tua eſt ita amor tuus, deſiderium tuum Jeſus ſit. O beneficium immenſum, & omnem æſtimationem ſuperans! *Nullum miſus donum præſtare Deus poſſet hominibus*, ait Auguſt. in Pfal. 85. *quàm ut Verbum ſuum, per quod condidit omnia, faceret illis caput, & illos ei tanquam membra coaptaret: ut eſſet Filius Dei, & filius hominis & unus Deus cum Patre, unus homo cum hominibus: qui & oret pro nobis, & oret in nobis, & oretur à nobis. Orat pro nobis, ut Sacerdos noſter: orat in nobis, ut caput noſtrum: oratur à nobis, ut Deus noſter.* Porro ut à tanta, quam peccatum

catum originale in sevit, infirmitate saneris, opus est ut sanari velis. Sanat ille omninò quemlibet languidum, sed non sanat invitum. *Quid autem in te beatius*, inquit August. in Psalm. 101. *quàm ut tanquam in manu tua vitam, sic habeas in voluntate sanitatem tuam?*

SPECVLATIO II.

Septem corollaria ex prajactis fundamentis derivantur.

SVppositâ existentia, & transfusione peccati originalis, plura occurrunt dubia ex dictis facile resolvenda. Unde sequitur primò, alia à primo Adami peccata in posteros non transfundi. Quia, ut vidimus, in tantum traducitur peccatum originis, in quantum Adam est caput morale hominum: unde fit, ut ait D. Thomas, omnes homines ex Adamo nascituros, considerari ut unum hominem cunctorum voluntatibus plenum, sicut diversa corporis membra pro uno homine reputantur. Porro tamdiu mansit homo caput morale totius generis humani, quandiu status innocentia duravit; non enim constat de pacto inito pro tempore lapsu consequente: ergo subsequencia Adami peccata in posteros minimè transfunduntur. Et hoc est, quod vult D. Thomas, dum ait, ideo solum primum peccatum, non posteriora traduci, quia primum erat *peccatum natura*, alia verò peccata erant *purè personalia*: id est in primo peccato vices totius naturæ gerebat Adamus, eratque veluti totius humani generis procura-

tor; in aliis verò peccatis vices suas duntaxat agebat, & privatarum rerum satagebat.

Sequitur secundò, à fortiori patere, peccata aliorum parentum in posteros non traduci, cùm omnium vitia personalia sint. Nec obest illud Exod. 20. *Ego sum Deus zelotes, visitans iniquitatem patrum in filios, in tertiam, & quartam generationem.* Quem rigorem imitatur etiam justitia humana in criminibus læsæ Majestatis puniendis, ob quæ plectuntur & nati natorum, & qui nascuntur ab illis. Non obest, inquam, quia hæc justī Dei comminatio non de culpis, sed de pœnis intelligitur. Quod si statim replices, iniquè infligi illi pœnam ob peccatum alienum, qui nullam culpam, sive per originem, sive per perversi actus imitationem contrahit. Respondeo pœnas corporales justè posse infligi filiis sine culpa filiorum in vindictam paterni peccati, quia filii pertinent ad patrem, & sunt in numero bonorum ejus: pater autem peccans justè in iis puniri potest, quæ ad ipsum pertinent, & inter bona ejus annumerantur. Et hic est, ni fallor, subtilis D. Thomæ intellectus, dum *art. 2. quest. 81.* ait: *Pœnâ spirituali nunquam puniuntur filii pro parentibus, nisi communicent in culpa. Sed pœna corporali interdum judicio divino, vel humano puniuntur filii pro parentibus, in quantum filius est aliquid patris secundum corpus.* Quia nimirum pater est Dominus corporis, ac proinde in corpore filii ad se pertinente justo Dei judicio puniri potest, nisi pœnitentia, & pietate filiorum Deus misericors comminatoriam revocet sententiam. Qua de causa dicitur: *Filius non portabit iniquitatem patris.*

Sequi

Sequitur tertio, quod si quis ex humana carne miraculosè producta formaretur, non contraheret peccatum originale, quod solum generatione, & seminis humani decisione propagari potest, quia per solam rationem feminalem posteri moventur ab Adamo per generationem, sicut membra moventur ab anima ad peccatum actuale. Si quis autem miraculosè ex semine formaretur, peccato originali inficeretur, si tale semen ad formationem hominis activè concurreret; ut si semen sterile divinitus prolificum efficeretur, vel si decisum è viro matrici mulieris absentis divinitus infunderetur: si verò semen materialiter duntaxat concurreret, idem dicendum foret, ac de formatione miraculosa ex humana carne.

Sequitur quarto, quod si Adam non peccasset, Evâ tamen peccante, posteri peccatum originale non contraherent, ut colligitur ex illo Rom. 5. *Per unum hominem peccatum in hunc mundum intravit.* Ubilý *unum*, tam in Græco, quàm in Latino est generis masculini. Ratio est, quia Eva non est constituta caput generis humani, sicut Adam. Unde quod dicitur Eccles. 25. *A muliere initium factum est peccati*, non intelligitur de initio, seu principio transfusionis, sed occasionis; quia scilicet Eva priùs peccavit, quàm Adam, & consequenter priùs amisit justitiam originalem, quæ si non distinguebatur à gratia, certè inseparabilis erat ab illa.

Sequitur quinto, quod si Adam genuisset filios ante peccatum, & postea peccasset, filii illi in innocentia prægeniti peccatum originale non contraherent; quia vel illi filii essent adulti, & sic possent motu charitatis parentis rebel-

Adæ jam rei, & peccatoris : unde semen esset infectum, cum non sit tale per transfusionem alicujus physici positivi à patre in filios generatione traducti, sed per relationem ad primum principium humanæ prolis ; unde primo principio remanente bono, semen esset immaculatum ; factò verò peccatore, infectum evaderet : relatorum enim alterum extremum mutari potest sola mutatione in alio extremo facta.

Sequitur sextò, peccatum Adami, quod in posteros transfunditur, fuisse transgressionem illius præcepti Genes. 2. *De ligno scientiæ boni & mali non comedes* ; quia peccatum illud fuit primum, quo violavit mandatum divinum, cujus transgressioni mortem, & justitiæ originis privationem in omnes posteros diffundendam comminatus est : non quod alia interiora non præcesserint, superbia nimirum, & inobedientia ; sed quia hæc comestio fuit primum peccatum exterius, quod cum interioribus pro eodem reputatur, ut in materia de actibus moralibus monstratum est. An verò si Adam præceptum illud minimè violasset, in aliud tamen peccatum lapsus fuisset ; an, inquam, illud peccatum fuisset in posteros diffundendum, difficultas est, & opinionum verisimilium varietas. Ex una quidem parte : Cum de his, quæ ex mera Dei voluntate pendent, nihil determinare possimus, nisi secundum id, quod in Scripturis accipere possumus ; ex Scripturis autem constet, soli illius præcepti transgressionem Deum mortem fuisse comminatum, Genes. 2. *In quacumque die comederis ex eo, morte morieris*, relinquatur aliud quodvis peccatum non fuisse transfundendum. Ex alia verò parte : Cum ex

D. Thoma per illud peccatum transfundat Adamus culpam primigeniam, per quod amisit justitiam originalem toti humano generi in Proto-parente collatam, quam utique per quodvis peccatum mortale amisisset; consequitur, per aliud quodvis peccatum traductum iri peccatum originis. Nec, inquiunt Authores hujus sententiæ, comminatus est Deus mortem, fructus vetiti esui, quasi soli illi peccato eam alligaret, sed ut ostenderet comestionem illam aliàs licitam, evasuram suâ interdictione lethalem; unde ei comminatus est mortem, in quam etiam fuisset per quodlibet mortale incursumus, ut intelligeret peccatum illud esse mortale. Et huic sententiæ subscribendum est, quia eam apertissimè D. Thomas in 2. dist. 33. & alibi sæpè docet.

Sequitur ultimò, peccatum originale non naturaliter, seu ex ipsa natura rei, ac naturali quadam sequela à parentibus in posteros non trajici. Deducitur apertè ex dictis; si enim, ut ostendimus, peccatum Adami in posteros non transfundatur, nisi ex Dei lege posterorum omnium voluntates in voluntate parentis includente, adeo ut quidquid circa justitiæ originalis conservationem, vel excidium voluisset caput, & veluti tutor ac curator naturæ, ipsi etiam posterius voluisse moraliter censeantur: omninò consequens est, non naturali sequela, sed morali causalitate peccatum illud transfundi, ut etiam suprâ in responsione ad primam instantiam ex professo ostendimus. Tum quia, si peccatum originale ideo ex natura rei in filios trajicitur, quia devitiata radicè nascuntur, omnia parentum, & majorum peccata in filios peræquè transibunt; quod in Ecclesia inauditum est, & intolerabile credi

credidit Augustinus in *Enchir. cap. 47.* quia alias, inquit, *nimia sarcina in ipsa sua aeterna damnatione premerentur, si cogerentur ab initio generis humani omnium precedentium parentum suorum originaliter peccata contrahere.*

Nec satisfacis si dicas, cæterorum peccata parentum non ita vitiare naturam, sicut primi peccati granditate vitiata est. Non, inquam, satisfacis; esto enim peccata actualia originale consequentia non ita corrumpant, corrumpunt tamen, & aliquando immensam ferè corruptionem adjiciunt; cum videamus plures satis bonæ indolis juvenes colloquiis pravis, perversorum consuetudinibus, actuum iteratorum frequentia ita vitiari, ut tandem sentiant voluntatem initio in malum minus proclivem, consuetudine in necessitatem conversa, in quodvis peccatum omni data & accepta occasione veluti datâ portâ ruere. Supponit quidem peccatum actuale corruptionem primigeniam, sed eam non rarò ultra modum auget: quidni ergo transfundetur in liberos illa major genitoris corruptio, si peccatum naturali sequela propagetur?

Scio quidem, & D. Augustinum, & S. Thomam docere, peccatum originis virtute seminis, quæ utique naturalis est, propagari; radicem corruptam coinquinare fructus; peccatum concupiscentiâ trajici, sicut morbus de morbo, malum de malo contagione trahitur; omnes de uno fonte manare: & quia ille unus in amaritudinem versus est, omnes ex oliva oleastrum factos esse: bona quidem semina, sed vitiato semel semine, propagatis filiis propagari & vitia: denique vitium illud habere semen à concupiscentia in ipsas hominûs membris medullitus in-

fixa, totum hominem afficiente, vel potius inficiente.

Hæc, inquam, scio, & lubens audio: verumtamen superiùs adhibito interpretamento, commodè & Patribus illis consentaneè hæc omnia explicantur dicendo, in semine virtualiter latere venenum primitivum, ejusque actione trahici, & veluti posteris propinari: non quòd semen attingat productionem peccati, sed quia peccatum concomitatur naturam, cujus semen est productivum. Quare autem peccatum naturam humani seminis decisione generatam semper comitetur, ideo est, quia omnes gratiâ privati nascuntur, quam omnibus in persona primi parentis Deus promiserat; steteritque promissis fidelis Deus, si homo in veritate steterit.

Hac de causa veridicè à Sanctis dicitur, Adam omnes homines in sua voluntate occidisse, priùs fuisse peremptorem, quàm patrem, & ut D. August. *lib. de peccat. mer. & remiss. cap. 19.* ait: *Occulta tæbe concupiscentia sua tabificasse in se omnes de sua stirpe venientes.* Adde quod cùm secundum nostram sententiam speculatione sequenti stabiliendam, concupiscentia importetur de materiali in peccato originali, ideoque peccatum dicitur, quia à peccato est, & in peccatum inclinat; cùm, inquam, hæc ita sint, meritò peccatum originis naturali consequutione traduci quadantenus dici potest, cùm concupiscentia omnibus, & singulis hominibus post peccatum insita, sit jam facta naturalis, id est naturæ corruptæ corvæ, & innata. Unde absque negotio explicatur Augustinus.

R E F L E X I O.

Et si solum peccatum originale, non personale, transfusione in posteros trajiciatur, totumque inficiat genus humanum sola illa culpa, in quam corrumpit totius naturæ tutor, & vices gerens; nihilominus privata personarum scelera in alios imitatione diffundi, pravis exemplis longè, latèque propagari, perversorumque morum segetem ad fidelium perniciem nimiam fruticare, constantissimum est. Scio quidem ex D. Dionysio solum bonum esse sui diffusivum, quia quod plenum est, exuberat: sic Sol fons luminis plenus, ubique effundit radios; sic à mari exeunt flumina; sic à Deo immenso totius esse pelago dimanant intus Filius & Spiritus Sanctus in æternitatem, fluunt foris in tempore creaturæ; amor namque divinus non reliquit Deum esse sine germine. Verùm nescio quo fato hanc boni fecunditatem, & effusionem, nedum imitari, sed longè superare malum videtur, cùm modicum fermenti totam massam corrumpat, & morbida facta pecus totum corrumpat ovile: ideoque moneant Sancti, haud magni laboris esse exorientem improbitatem retundere, sed progredientem, serpentem, grassantemque reprimere, hoc opus, hunc laborem esse. Hinc non solum nascentibus corporis, sed maxime animi morbis occurrendum esse inculcatur, ne ferò medicina paretur, néve è scintilla incendium concitetur.

Ita sanè peccatum hydra est septem capitibus portentosa, simul & fecunda, quia uno avulso non deficit alterum, sed turpi generatione pululat,

lulat, & erumpit; sed verbo, consilio, & exemplo veluti obstetricibus emittitur nefanda peccati proles. An nescimus, quod juxta Philosophum moralem Senecam epist. 105. *Homo hominis lupus est?* Ab homine homini quotidianum periculum, quo nullum frequentius, nullum pertinacius, nullum blandius. Parum est instigatores illos, & ad peccatum impulsores belluas appellasse, quia etsi hominum effigies habeant, animos tamen nedum ferarum, sed & dæmonum possident; cum nedum corporibus noceant, nedum bona externa expilent, boni nominis famam dilacerent, sed etiam animarum salutem insidientur. Nonne in malum concitator crudelior est dæmone, qui acceptâ à Deo in totum sæviendi licentiâ, corpus quidem ulcere pessimo percussit, filios interemit, domos solo adæquavit, armenta combussit, bona externa dilapidavit; verumtamen animam ejus servavit. Planè dæmone deterior est, qui dæmonis voluntarium organum est; nam sicut sine armis non nocet hostis, ita sine adjuvante homine inermis foret cacodæmon, & impotens. Tales, Lector Christiane, morum corruptores, obscænos animarum lenones, dæmonum ministros, vitiorum prodromos, malitiæ magistros, iniquitatis filios & patres, dissolutionis præcones, humanæ salutis hostes, Antichristi præcursores, illa vasa nequitiae, instrumenta mortis, genimina viperarum execrare, fuge, detestare: ab illis magis quàm à peste longè, citòque discede; quia sicut lues halitu, & contactu virus fundit suum, sic illi nequitiae propagatores, modò verbo & consilio, modò factis & exemplo incautos alliciunt, pertrahunt, & occidunt.

SPECVLATIO III.

Peccatum originis de formali privationem iustitiæ ; de materiali verò concupiscentiam importat.

Primam partem tradit apertè D. Thomas *quæst. 83. art. 2.* ubi ex professo probat, privationem iustitiæ originalis, per quam voluntas subordinatur Deo, esse formale in peccato originali. Et ratio est, quia primum, quod in aliquo concipitur ut radix cæterorum essentialem constituit rationem, alia verò non nisi proprietates, appendices, accidentia, vel corollaria dicuntur. Atqui prima difformitas, prima inordinatio, quam in peccato originali concipere est, non est alia, quàm privatio iustitiæ originalis, unde veluti è lethifero fonte fluunt fomes concupiscentiæ, reatus pœnæ, aliæque humanæ vitæ miseriæ, quibus indefinenter affligimur; reatus enim pœnæ culpam supponit, & passionum tumultus, corporisque repugnantis rebellionis Deo se subdicere detrectantis superbiam iustissimè consequuntur: quomodo enim, ut Augustinus, & alii Patres tradunt, caro erit subiecta animæ, si animus non est subditus Creatori? Quâ iustitiâ vis, ut serviat caro tua animæ tuæ, si Deo non serviat anima tua? Debes regi, ut possis regere. Et certè non est mirum, quod sublato repagulo, & destructo aggere undas continente irrumpant aquæ: iustitiâ autem origi-

originali veluti mole, & fræno vires inferiores tenebantur. Ergo in privatione justitiæ fixa est essentia peccati originalis. Cujus etiam signum est, quod post baptismum (quod ad delendum peccatum originale institutum est) remanent fomes, concupiscentia, aliæque calamitates, & privatio subjectionis mentis ad Deum tollitur. Et licet non permaneat æternæ pœnæ reatus, hoc solum consequenter contingit, quia deletâ culpâ removetur & pœna.

Dices primò cum Curiele exultimante privationem rectitudinis moralis peccatum originale constituere: In peccato originali invenitur privatio conformitatis ad legem, seu rectitudinis moralis; Ademus quippe iustitiam originalem divinitus sibi datam custodire tenebatur, non aliquo peculiari præcepto, sed omnibus legibus, quibus malum quodvis vetabatur. Prius ergo violavit legem, & honestatem, quàm se justitia originali privavit. Ergo privatio rectitudinis est omnium prima, subindeque peccati illius constitutiva.

Respondeo in privatione præfatæ conformitatis essentiam peccati originis nequaquam posse consistere, quia vel est privatio habitus debiti parvulis, & hoc non, quia cum non possit assignari alius habitus parvulis debitus, quàm justitia originalis, haberemus intentum: vel est privatio conformitatis, quæ relinquitur in subiecto post actum malum, quæve dicitur habitualis, non quòd sit semper habitus, sed quia distinguitur ab actu, & tandiu permanet, quandiu per pœnitentiam non retractatur; & hoc etiam dici nequit, quia hæc privatio in eo duntaxat invenitur, in quo fuit, vel esse debuit.

Ad fundamentum Curielis dicendum, quod sicut licet modò non teneamur conservare gratiam vi alicujus præcepti peculiaris; attamen peccatum mortale consistit in privatione gratiæ, non absolutè, sed in ordine ad suam causam, quæ est peccatum actuale: quâ de causa privatio gratiæ pertinet reductivè ad eandem speciem, ad quam spectat peccatum actuale, unde profluxit. Ita similiter privatio, justitiæ originalis ut connotat inobedientiam, & prævaricationem Adami, essentiam peccati originalis constituit.

Dices secundò cum Martine: Præter inordinationes recensitas est alia etiam positiva, scilicet conversio habitualis ad creaturam ut ultimum finem, in quem peccator conversus est: tum quia peccatum originale in nobis nihil est aliud, quàm peccatum habituale, quod habuit Adam post actum suum malum. Adam autem post peccatum suum habitualiter erat in creaturam conversus; unde nos etiam per peccatum originale in creaturam convertimur: tum quia non est potior ratio, cur transfundatur aversio à Deo, & non conversio in finem pravum, cum implicet esse recessum à terminò à quo, nisi sit accessus ad terminum ad quem.

Respondeo, non posse essentiam peccati originalis in illa conversione sitam esse: tum quia D. Thomas q. 5. de mal. art. 5. formaliter ait: *In peccato originali non est conversio, sed sola aversio, vel aliquid aversioni respondens, scilicet destitutio animæ à justitiâ originali; & ideo peccato originali non debetur pœna sensus, sed solam pœna damni, scilicet carentia visionis divinæ.* Et in q. 24. de verit. art. 12. ad 2. per hoc peccatum originale à personali distinguit, quòd
istud

istud præter aversionem, quam solam originale importat, includit etiam conversionem ad finem pravum. Tum quia si peccatum originale conversionem ad finem pravum essentialiter includeret, deberet hæc conversio retractari, & pueri nascerentur conversi ad pomum vetitum, sicque nascerentur potissimum intemperati, & gulosi. Quid si per conversionem ad finem pravum intelligat Martines concupiscentiam, quæ prærupto justitiæ aggere fortius insurgit, & frequentius, verum dicit; sed illa concupiscentia peccatum originale non constituit essentialiter, sed in ejus essentia de materiali importatur. Et ideo à Sanctis sæpe vocatur originale peccatum, & quia ab illo est, & quia in illa, ut subest aversioni, consistit peccatum originale; & quia in ipsa maxime relucet peccati originalis venenum, dum rebellione fomitis tota concutitur interioris Reipublicæ concordia, & harmonia. Si autem per conversionem habitualement intelligat Martines habitum aliquem positivum ad bonum commutabile inclinantem, magis adhuc à veritate recedit; nulla enim potest causa illius assignari. Non Deus, ne illi, ut auctori speciali transfusio peccati asseratur: Non peccatum Adami: tum quia ex quolibet actu non producitur habitus conversionis: tum quia peccatum Adami est moralis duntaxat causa transfusionis: tum quia peccatum Adami non existit, nec subinde physicè operari quit. Non denique semen, quia in illo deberet esse qualitas morbida, quam antiqui Theologi, Gregorius, Richardus, Henricus somniarunt ex sibi serpentis derivatam: quæ sententia jam obsolevit.

Instabis

Iustificatio : Quod habet rationem pœnæ , non est essentia peccati , sed effectus ejus : atqui privatio iustitiæ originalis habet rationem pœnæ , ut ait D. Thomas *quest. 85. art. 5.* & patet , quia eâ in pœnam peccati originalis privamur , Deo lumen gratiæ suæ subtrahente.

Respondeo , quod licet privatio physica iustitiæ sit pœna , sitque à Deo ; tamen privatio moralis iustitiæ , quæ præter carentiam ejus importat debitum eam habendi , vel eam non amittendi , & connotat voluntariam gratiæ repulsam , & liberum ejus contemptum , non est pœna solum , sed culpa , sicque non est à Deo , qui in pœnam peccati dona revocat. Sed hæc privatio physica , quæ est pœna , moralem naturâ priorem præsupponit , quia non deserit Deus nisi sui desertores , nec aufert Deus iustitiam originalem , nisi quia eâ privari homines in Adamo voluerunt.

Secunda speculationis pars , concupiscentiam de materiali importari in essentia peccati originalis affirmans , ad minus docetur à D. Thoma in omnibus illis locis , ubi tam sæpè repetit , peccatum originale esse quadantenus habitum , & inordinatam dispositionem similem ægritudinî , quæ habet aliquid positivi. *Alio modo* , inquit *quest. 82. art. 1. dicitur habitus dispositio alicujus naturæ ex multis composita , secundum quam benè se habet , vel malè ad aliquid , & præcipuè cum talis dispositio fuerit quasi in naturam versa , ut patet de ægritudine , & sanitate , & hoc modo peccatum originale est habitus ; est enim quadam inordinata dispositio proveniens ex dissolutione illius harmoniæ , in qua consistebat ratio originalis iustitiæ : sicut etiam ægritudo corporalis,*

812 *De peccatis. Dissert. II. Cap. II.*

lis est quadam inordinata dispositio corporis, secundum quam solvitur aequalitas, in qua consistit ratio sanitatis: unde peccatum originale languor natura dicitur. Et art. 3. sic luculenter concludit: Peccatum originale materialiter quidem est concupiscentia, formaliter verò est defectus originalis iustitia.

Id ipsum etiam evincunt clara illa Augustini testimonia, quibus asserit, concupiscentiam esse malum illud nuptiarum in posteros propagatione trajectum; quam tamen negat Doctor sanctus esse peccatum in regeneratis, quando illi ad illicita opera non consentiunt, atque ut ea perpetrent, à regina mente membra non dantur: sed quodam loquendi modo peccatum vocari, quòd peccato facta est, & peccatum, si vicerit, facit: sicut vocatur lingua loquutio, quam facit lingua, & manus vocatur scriptura, quam facit manus.

Sed petes, quid sit illa concupiscentia fatalis omnibus hominibus inseminata, quam importari in peccato originali veluti quoddam materiale, cum Ecclesiae luminibus asseruimus?

Respondeo, omisissis variis opinionibus, vel per se falsis, vel antiquatis, vel minùs verisimilibus, concupiscentiam non solum esse pronitatem appetitus sensitivi præter, & contra imperium rationis in bonum sensibile propensi, sed etiam omnium potentiarum, in quibus potest esse peccatum, & ipsius quodammodo animæ, prout est huiusmodi potentiarum radix. Quanvis enim fatear in appetitu sensitivo magis esse conspicuam huiusmodi propensionem; & ideo, inquit D. Thomas q. 82. art. 3. ad 2. *concupiscentia*

atri

attribuitur tanquam principaliori, & in qua quodammodo omnes alie passionis includuntur: attamen quia concupiscentia, de qua loquimur, quæve de materiali in peccato originali importatur, teste eodem D. Thoma, est quædam inordinata dispositio proveniens ex dissolutione illius harmoniæ, in qua consistebat ratio originalis iustitiæ, relinquitur quod sicut hæc harmonia omnes potentias afficiebat, ita concupiscentia omnes inficit. Ex aversione voluntatis à Deo (inquit idem S. Doctor q. citata, art. 2.) consequuta est inordinatio in omnibus aliis animæ viribus. Sic ergo privatio originalis iustitiæ, per quam voluntas sublebat Deo, est formale in peccato originali. Omnis autem alia inordinatio virium animæ se habet in peccato originali sicut quoddam materiale: inordinatio autem aliarum virium animæ præcipuè in hoc attenditur, quod inordinate convertuntur ad bonum commutabile, qua quidem inordinatio communi nomine dici potest concupiscentia. Ergo per concupiscentiam ex peccato originali relictam intelligenda est generalis illa corruptio omnes animæ vires, facultatesque inficiens.

Quod ut clariùs, & penetrantiùs intelligatur, considerandum est, in ipsa etiam voluntate hominis esse duplicem inclinationem naturalem; alteram ad bonum rationis, quæ est ipsi propria hoc ipso, quod est appetitus rationalis; alteram ad bonum conveniens subjecto, in quo est, subordinatam tamen rationis regulæ. Sicut enim in appetitu sensitivo duplex est inclinatio, naturalis altera ad bonum sensibile sibi proprium, altera in bonum honestum, quam secundam habet ex conjunctione cum voluntate & ratione, quibus

quibus naturaliter subjecta est : ita in voluntate ob conjunctionem cum anima sensitiva in anima radicata, rectè admitti potest inclinatio moderata in bonum sensibile, subordinata inclinationi in bonum honestum ; quia nimirum voluntas est inclinatio totius suppositi : suppositum autem humanum est simul sensibile, & rationale.

Quid ergo facit peccatum originale, quid concupiscentiæ strages ? Facit ut inclinatio in bonum sensibile nullo rationis limite, nullo retinaculo contineatur : facit ut amor terrenorum veluti quoddam pondus mentem aggraveret, rationem deorsum trahat, animumque ad sensibilia inflectat, & detorqueat æternis natum, æternorum candidatum. Unde sicut liquor in viciato vase corrumpitur, sic anima facta est carnis permixtione carnalis ; non naturâ, sed affectu, quo corpori subditur spiritus immortalis. Et ideo concupiscentia illa in sacris literis appellatur vetus homo, homo carnalis, & animalis, corpus peccati, cor lapideum, membra iniquitatis, quia hominis naturam pravis, carnalibusque propensionibus infecit. Neque enim credendum est, importunam illam, & impuram pronitatem nos totos ad sensibilia rapientem esse naturæ puræ proprietatem : nam ut veridicè Angelicus Doctor attestatur q. 82. art. 3. ad 1. *In tantum concupiscere est homini naturale, in quantum est secundum rationis ordinem. Concupiscentia autem, qua transcendit limites rationis, inest homini contra naturam ; & talis est concupiscentia originalis peccati.*

Ex his faciliè intelliges totam quæstionem 82. D. Thomæ, ubi de subjecto peccati originalis disputat,

putat, ubi docet peccatum originale non habere pro subiecto carnem, quæ culpæ capax non est, sed animam, cuius essentiam prius inficit, sicut voluntatem primò inclinât, quanvis in viribus inferioribus magis appareat, in illis potissimum, quæ ad generationem humanam concurrunt, scilicet facultas generativa, vis concupiscibilis, & sensus tactus; quæ partes dicuntur specialiter corruptæ, & infectæ, quia corruptio originalis peccati eorum actione propagatur.

Difficultas duntaxat est in eo, quod *artic. 2.* asserit Doctor S. subiectum proximum, & immediatum peccati originalis esse substantiam animæ, ut à potentiis distinctam, propter Scotum, & Durandum existimantes, peccatum originale prius inficere voluntatem; tum quia peccatum originale consistit in aversione à Deo ut ultimo fine: ergo sicut subiectio & conversio ad Deum fit per voluntatem; ita hæc aversio primitus in voluntate sita est. Tum quia primum peccatum Adæ non fuit in essentia animæ, sed in voluntate: eadem autem est ratio de nobis, ac de Protoparente.

Sed nihilominus vera est propositio D. Thomæ, & solida ejus ratio. Quia peccatum originis in posteros generatione transfunditur: ergo prius peccatum illud inficit, quod primitus generatio attingit; generatio autem prius animam, quàm potentias attingit, cùm animam corpori immediatè uniat, potentias verò non nisi mediante anima uniat. Porro dicitur generatio attingere animam, non quòd ejus entitatem efficiat; vel è materiæ sinu educat, cùm anima immortalis, & entitativè spiritalis, sola creatione è
nihilò

Non ergo mirum, si peccatum Adæ prius inferret voluntatem, cum ut benè alicubi D. Thomas observavit, in Adamo persona corruperit naturam, in posteris verò natura vitiata corrumpat personam: unde in Adamo peccatum ex voluntate in animam, cæterasque animi, & corporis vires inundavit; in posteris verò corruptio ab anima in vires serpit, & grassatur.

R E F L E X I O.

Vidisti (Lector) quid, & qualis per peccatum originale factus sis, inimicus scilicet Dei, gratiâ nudatus, justitiâ orbatus. oneratus sordibus, irritus vitiis, captus illecebris, affixus membris, confixus curis, distentus negotiis, contractus timoribus, afflictus doloribus, erroribus vagus, suspicionibus inquietus, totus carnalis, & animalis, ut tuis doctus experimentis veridicè illud Apostolicum, & Propheticum usurpare possis: *Infelix homo! quis me liberabit de corpore mortis hujus? Non quod volo bonum, hoc ago; sed quod odi malum, hoc facio. Scio quia non habitat in me, hoc est in carne mea bonum. A planta pedis usque ad verticem non est in me sanitas, sed vulnus, & livor, & plaga tumens.*

Sed ne propterea despondeas animum: non sine alto divinæ sapientiæ consilio factum est, ut materiale peccati originalis in ipsis regeneratis adhuc regnet, ardeatque in viris sanctis nefariæ illius flammæ scintilla, quam etiam Apostolus post mentis excessum, post raptum ad tertium cælum expertus est. Ne mœrore conficiare, ne repleatur anima tua amaritudinibus, Lector amabilis, si membrorum legem repugnantem

§ 18 *De peccatis. Dissert. II. Cap. II.*

legi mentis tuæ præsentias ; quia Deo dante , & aurum tuum in fornace probabitur , & virtus in infirmitate perficietur. Quia ut ait August. de doctr. Christ. cap. 10. *Quanto magis regnum cupiditatis destruitur , tanto magis regnum charitatis augetur.* Manet ergo cupiditas ad agonem , ut in te charitas & pugnet fortiter , & vincat semper , & gloriôsè triumphet. An nescis , quod nemo , teste Apostolo 1. Timoth. 2. *coronabitur , nisi qui legitime certaverit ;* quia ut ait Ambrosius lib. 1. de officiis , cap. 15. *Non est gloriosa victoria , nisi ubi fuerint laboriosa certamina.* Nihil frequentius , nihil inculcatius , quàm quod vita nostra militia est super terram , & quod in hac peregrinatione nemo sine tentatione vivit , & quod profectus noster , per tentationem fit ; & sicut nemo potest coronari , nisi qui vicerit , ita vincere nequit nisi qui certaverit ; nec certare , nisi inimicum , & tentationes habuerit. Appositè August. in Psalm. 57. *De iraduce natus es cum eo , quod vincas : noli tibi hostes addere ; vince cum quo natus es. Ad stadium vita hujus cum illo venisti ; congregere cum eo , qui tecum processit. Sed certamen tantùm non sufficit , addit serm. de Psalm. 128. ad coronam legitime certandum est , id est omnia passionum bella peragenda sunt. Non sufficit semel , neque unius certaminis bello militasse.*



DISSERTATIO III.

Peccati effectus recensentur.

Æc dissertatio brevior cæteris futura est, quia si singula prosequi more solito vellem, justî voluminis metas excedam. Damnant plerique solennem illam à novis Galliarum Concionatoribus frequentatam methodum, quâ sermones in tres partes, & harum subinde singulas in alias totidem perpetuâ divisionum, & subdivisionum serie secant; quia, inquiunt, nulla dicendi methodus eâ vitiosior est, cui tametsi præstantissimæ, Orator quasi ad saxum Polypus semper adhærescit. Observare potuisti, Lector, me in toto Theologiæ decursu perpetuum, & sollicitam dissertationum nostrarum in duo capita, capitum in tres speculationes partitionem adhibere solitum, ut tuæ consulerem memoriæ, quæ ordinis, & distinctionis uniformitate non parùm juvatur. Novi enim, & à doctioribus traditum legi, hoc distare Oratorem à Philosopho & Theologo, quod Oratori imitanda natura est, quæ corpora, præsertim animata, multiplici organorum, & facultatum supellectile instruit, partium tamen distinctionem, artuumque colligationem induta carne veluti velo tegit & obvolvitur; ita ut etsi distinctio singulorum extet, lateat tamen singulorum. At verò Philosophia, ejusque unitatrix Scholastica Theologia, anatomicam, seu in-

cidendi artem æmulatur, ut singulis in sua genera, species, & varia prædicamenta distributis, accuratiùs, & juxta nitidiùs discutiantur rerum essentia, partes, proprietates, & accidentia; vel methodo synthetica, seu compositiva, ab effectibus ad causas, à mediis ad finem progrediente; vel analytica, seu resolutiva, totum in partes, causam in effectus, finem in media solvente, & ab universalioribus ad particularia, à principiis ad conclusiones procedente.

Ut tamen clareat, Theologiam meam non esse anxio perpetuæ ejusdem methodi tenori alligatam, quia reverà nihil affectatum probari potest, & teste Horatio, *Ridetur chorda, quæ semper oberrat eadem*; hac de causa novam disputandi rationem inibo: tum ut fusa, quæ paraveram, in compendium redacta volumen hoc complectatur; tum ut illi non pateam Senecæ sugillationi: *Nonne etiam qui accuratè loquitur, idem & putidè loquitur?* Maximè quia omnes peccatorum effectus ad certum numerum revocando, non est opus inculcata capitum, & speculationum distinctione.

*Primus peccati effectus : Diminutio
inclinationis naturalis ad
bonum.*

Certum est primò, per peccatum, sive originale, sive personatè, non corrumpi intrinsecè naturam, nec facultates naturales entitativè minui; cum nec à natura, nec à potentiis quidquam physicum auferatur: unde docet Dionysius,

nyfius , naturalia in demonibus integra perman-
fiffe.

Certum est fecundò, per nullum etiam peccatum extingui penitus inclinationem ad bonum honestum , nec evelli omnia virtutum semina; quia homini rationali implantata , & insita est inclinatio ad bonum rationis. Sicut ergo nullo peccato destruitur rationalitas , ita nec deletur inclinatio ad bonum honestum , ne in homine destruaturs imago Dei; quæ tamen, teste Bernardo , est tunica inconsutilis , quæ non scinditur, sed quòcumque pervenerit anima , ibi erit; quippe quæ in gehenna ipsa uri poterit , non exuri; ardere, sed non deleri. Unde August. lib. de Spiritu & lit. cap. 27. *Non adedò, inquit, imago Dei peccatis est addicta, quin etiam in impietate vita possint homines in hac vita facere aliqua legis opera, de quibus fortè dicere possumus quod habent opus legis scriptum in cordibus eorum, id est, non omninò deletum.*

Verùm cum his stat , per peccatum, sive originale , sive actuale mortale , inclinationem illam in bonum honestum imminui , nec mediocriter debilitari. Ratio est, quia per peccatum actuale produciturs, sin habitus, certè dispositio inclinans ad similem actum peccaminosum; originale verò auferendo justitiam, avertit ab ultimo fine : sed utroque illo impedimento maxime infirmatur inclinatio præfata in bonum rationis propensa. Priori quidem , quia malus habitus , aut dispositio prava ad actus rationis regulis oppositos inclinant. Posteriori etiam, quia sicut qui caret assensu principii parum est ad derivandas conclusiones idoneus , ita averfus ab ultimo fine , qui se habet in operabilibus sicut

primum principium in speculabilibus, ægrè est ad benè moraliter operandum paratus, imò totus est ad malè agendum ab adolescentia sua proclivis; quia perrupto justitiæ originalis obice, quo pars inferior tenebatur, contra rationem concupiscentia insurgit. Idcirco Patres hominem lapsum sauciato comparant, & infirmo. *Hoc est peccatum natura*, inquit Chrysostomus. *III. quod est fumus oculis, quod febris corpori, quod dulcissimis fontibus amara salcedo. Utique purissimus, & lucidissimus est oculus per naturam, sed per fumi conurbatur & obscuratur injuriam. At corpus membrorum partibus, & sensibus suis per hoc, quod est à Deo conditum, viget; sed ubi vis febrium cœperit dominari, totum efficitur imbecillum: tunc oris amaritudo, tunc oculorum caligo, tunc gressuum nutabunda vestigia, tunc inimica aura. Et fontes quàm grati sunt per suam dulcedinem & naturam, tantùm efficiuntur ingrati, cùm aliquod vitium susceperint. Non dispari ratione concupiscentia potestas videtur in opere, inquit, sentitur in pœna, impugnat animam, vulnerat mentem, ipsam violat, confunditque naturam. Sed de his fortassis plura, dum de gratia.*

Secundus peccati effectus: Ignorantia mentis.

Docet D. Thomas q. 82. art. 8. quatuor homini infigi vulnera per peccatum; nam & ignorantia intellectum obscurat, & malitia voluntatem pervertit, & infirmitas partem irascibilem enervat, & cupiditas partem concupiscibilem

lem sensibilibus delectatione inficit, & veluti putrefacit. Sicut enim in corporalibus vulnus dicitur separatio partium unitarum, ita in spiritualibus vulnus est separatio, & divisio potentiarum, quæ erant invicem per justitiam unitæ, & colligatæ, dum pars inferior superiori, & superior Deo consentiebat. Per peccatum autem dissoluta est præclara illa harmonia, & quælibet pars in suum mansit inclinata bonum, nullâ habitâ ad superiorem potentiam subordinatione. Hinc appetitus nullo repagulo cohibitus in delectabilia toto impetu cietur, & voluntatem, cui parere debuerat, in suas partes trahit. In tanta porrò facultatum confusione, & intestino tumultu, inter tot passionum æstus concitantur, addensanturque peccatorum nubes, quibus ratio obscurata dicit malum bonum, & bonum malum; tenebras lucem, & lucem tenebras.

Nunc de ignorantia primùm agimus. Et ut magis constet, ignorantiam esse effectum peccati, sciendum est, ignorantiam legis saltem naturalis, quæ per rationem cognosci potest, esse grande malum; cum enim verum putamus, quod falsum est; vel falsum, quod verum est, vel certum, quod incertum est; vel incertum, quod certum est, veritate privamur, quæ ingens bonum est, cujus proinde privatio malum est. Vnde Augustinus in Enchir. cap. 19. *Ipse, inquit, per seipsum error, aut magnus in re magna, aut parvus in re parva, semper est malum.* At Deus non creavit, nec de potentia saltem ordinaria creare potest creaturam innocentem, tanto malo laborantem, cui titulo connaturalitatis debetur scientia, & noticia legis naturalis,

ut possit benè velle, & agere; quod sine veri cognitione non potest. Ubi ergo reperitur ignorantia legis naturalis, ibi manifestum est esse effectum peccati. Ergo ignorantia veri est poena peccati. Hinc videmus, tantas etiam in dubiis morum sententiis ex offusis humanæ menti tenebris ortas. Hinc quæ reverà falsa sunt, & divinæ legi adversa, vera, vel probabilia multis apparent. Hinc quæ probabilia uni, alteri certa, & explorata videntur; quia sicut magna est inæqualitas tenebrarum, unde probabilium opinionum supra modum luxuriantium varietas fluit; ita est magna ingeniorum, magna doctrinæ, magna virtutis & pietatis, magna unctio- nis docentis omnia, magna cœlitus illapsi luminis diversitas.

Porrò quanvis illa ignorantia, prout habet rationem nescientiæ, & carentiæ luminis veritatis, poena sit; prout tamen habet aliquid voluntarii, peccatum est. Hac de causâ sæpè diximus omnem juris naturalis ignorantiam esse culpabilem, quia ex criminiosis à voluntate offusis proficiscitur. Quia Deus humani generis sator, & salutis omnium amator, ubique præsens, omnibus suos veritatum necessariorum affundit radios, cum velit omnes salvos fieri, & ad agnitionem veritatis venire: affundit, inquam, nisi ostium cordis invenerit actualibus criminibus clausum. Unde legis naturalis insciti- tia in sola hominum negligentia, socordia, & culpa voluntatis consistit. Qua de causâ dixit S. Justinus quæst. III. ad *Orthod. Voluntate ignorare illos, qui res ad cognitionem ducentes habent, nec de scientia laborant. Et sanè si ille, qui clausis oculis viam ingreditur periculis,*
præci

præcipitiisque refertam, mali in quod deinde incidit, author est, nec alteri assignare illud, quàm sibi debet: ita planè, qui in via morum tot difficultatibus, tot periculis, tot luxuriantium opinionum præcipitiis circumvallata, vel curam & studium necessarium abjicit, vel eorum, qui sibi saluti esse possent, consilium spernit, vel Patrem luminum non satis consulit, vel à notis, perspectisque peccatis diuino sese lumi- ni objicientibus non abstinet, sed in quamcun- que sententiam aliquo tantùm fuce coloratam præceps fertur, proculdubio in Dei inimicitiam, subindeque in peccatum mortale incidit, talis- que ignorantia neminem excusat, ut æterno igne non ardeat, sed fortassis ut minùs ardeat; quod ex Augustino olim retulimus.

Id à fortiori verum est de ignorantia crassa, supina, & affectata, quæ culpam non modò non extenuat, sed eam non parum auget; quia ut benè ait Richardus *in 4. dist. 15.* consilium ex ignorantia crassa fraudulentum est, & negligencia crassa est propriè dolus; quia cùm posset necessariam veritatem cognoscere, in compa- randa sibi scientia non quam debet, operam ponit. Et ideo ignorantia illa crassa nominatur, quia oritur ex studendi, laborandique pigritia, crassis & pinguibus hominibus familiari. Supina etiam dicitur, quia sicut jacere supinum, indicium hominis est languidi, remissi, & soluti: sic etiam eâ ignorantia laborans, quia mentem habet totam ad terrena inclinatam, nec vult ad æterna, & salutaria se erigere, mavult effœminatam, otioque, & socordia diffluentem ducere vitam, quàm in rerum utilium, & necessariorum notitia capeffenda nonnihil laboris experiri.

Unde Scotus *in 6. di. 6. quæst. 8.* hanc ignorantiam phrasi quidem nitore carente, sed sale sparsa vocat *Truffaticam*, quia homines inertiam liquefcentes, divinam legem & Legislatorem irrident: apud Aquitanos enim (& ni fallor) Italos, *Truffe*, & irrisio idem sunt.

Tertius peccati effectus: Malitia voluntatis.

De Malitia satis supra loquuti sumus. Illud addere libet, peccatum malitiæ quodvis, cum cognitam æquitatem spernat, esse quoad antenus peccatum in Spiritum sanctum. Quod usque adeò verum est, ut concors Patrum, solidorumque Theologorum sententia confirmet, periculosissimo eos in statu degere, qui in peccata venialia ex deliberatione, atque adeò cognita, etsi levis malitiæ turpitudine, scientes, & volentes passim, & crebrò labuntur, quia censent contemnendam esse illa peccata, nec magnum quid in illis permanere. Unde Bernardus *serm. 1. de convers. Pauli*, ait: *Nemo dicat in corde suo, Levia sunt ista: non est magnum, si in his maneam venialibus, minimisque peccatis. Hec est enim, dilectissimi, impœnitentia: hæc blasphemia in spiritum sanctum, blasphemia irremissibilis.* Quia nimirum oppugnare veritatem cognitam, peccatum est in Spiritum sanctum. At veritas cognita Catholicis est, quod qui spernit modica, paulatim decidit, ut dicitur *Ecclesiastis cap. 9.* Et quod nullum est peccatum adeò parvum, quod non crescat negligentia, ut August. *lib. de vera, & falsa pœnit. cap. 8.*

testa

testatur. Et quod aliquatenus grave censendum est, quod *non permittit animam ad sublimia levare*, ut Gregor. hom. 2. in Ezechielem monet. Et quod, qui in unoquoque peccato dicere edoctus est, *Non in hoc positum est salutis momentum*, is pedetentim omnia pessundabit, ut ait Chrysost. hom. 12. in cap. 7. Epist. ad Rom. Ergo qui negligendas, nec magnificiendas culpas veniales dicit, veritatem catholicam lædit, cum affirmet, injurias Deo factas non esse curandas, nec magnum esse in illis permanere. Præclare Augustinus tract. 1. in 1. epist. Ioan. ait: *Ista levia, quæ dicimus, noli contemnere. Si contemnis, quando appendis; expavesce, quando numeras.* Illudne leve censendum putas, quod animi ægritudines, angores, cruciatus conscientix, ictus tabifici, mentis terrores, & quasi carnificina comitari solent? Illudne ponderis exigui arbitraris, cui æquus Dominus, & bonus Pater Deus? Purgatorii flammæ paravit, quibus nulla in hoc mundo par reperitur? Illudne floccifaciendum dicis, quod omne pœnæ malum infinito ferè intervallo vincit, adeò ut deferenda potius, non dico propria, non dico unius, sed cunctorum hominum, vita sit, totiusque mundi extinctio ferenda, quàm vel minima culpa patranda.

Quartus peccati effectus : Libido , & amor sensibilis voluptatis in parte concupiscibili.

Hæc est altissima plaga, quæ cordis intima, & abditos quosque animi recessus pervasit, ratione:

cujus pars concupiscibilis ordinem à natura, seu à Deo naturæ authore pervertit; & cum inferiora superioribus subdi debeant, ipsa facit, ut & superiora inferioribus turpiter serviant, & inferiora superioribus contumaciter reluctentur. Hanc autem concupiscentiæ vehementem propensionem, & rebellionem esse pœnam peccati, docetur à Tridentino sess. 5. declarante, ideo concupiscentiam ab Apostolo peccatum appellari, quia *ex peccato est, & ad peccatum inclinatur.*

Quod usque adeo verum esse existimo, ut si homo in natura pura conditus fuisset (possibile ne hoc sit, vel impossibile, alibi disputabitur;) in eo tamen statu concupiscentiæ rebellionem minimè persensisset. Ita enim expressè tradit Angelicus noster Doctor 1. 2. 7. 82. art. 3. ad 2. his verbis: *Quia in homine concupiscibilis naturaliter regitur ratione, in tantum concupiscere est homini naturale, in quantum est secundum rationem: concupiscentia autem que transcendit limites rationis, inest homini contra naturam.* Id ipsum docuerat S. Præceptor in 2. dist. 30. quest. 1. art. 1. in corp. his verbis: *Quod vis concupiscibilis in suum objectum tendat irrefrenatè, hoc non est naturale sibi, in quantum est humana, sed contra naturam ejus, in quantum hujusmodi.* Et ad 4. *Vis concupiscibilis hoc habet naturale, ut tendat in delectabile secundum sensum; sed secundum quod est vis concupiscibilis humana habet ut tendat in suum objectum secundum regimen rationis.* Et ideo idem S. Doctor sæpe docet, assimilari motus nostros motibus cœlorum: in motu autem cœlesti sphaera superior trahit inferiorem, quæ motum primi mobilis absque renitentia sequitur.

quitur : & ita similiter appetitus sensitivus , nisi præcessisset culpa, motum partis superioris sponte sua sequeretur. Et sicut in mixtis , tamen ex contrariis elementis, si formaliter, certè virtualiter remanentibus constant , unum tamen aliis prædominatur, ut iusta sanitatis temperatura sequatur : ita in homine distinctis licet appetitibus composito , una tamen ratio omnibus in natura pura fuisset principata.

Hanc veritatem didicerat à Magistro suo Augustino S. Thomas. Etenim nostram doctrinam non solum apertissimè docet, sed etiam invictissimè probat Doctor gratiæ, ut patebit ex rationibus ab eo depromendis , quarum prima est : Quia à Deo sunt , ordinata sunt , nec quidquam Deus producit, nisi in numero, pondere, & mensura, quia Dei perfecta sunt opera , & valde bona; ordinis autem perversitas, & confusio, utique nec perfecta, nec per se valde bona est. Atqui ordo naturalis exigit , ut anima dominetur corpori, & appetitus rationalis sensitivo principetur : tum quia , quo forma est perfectior , eo amplius subjicit sibi materiam , ut patet in forma cœlorum, quorum materia formæ destructionem nunquam machinatur, anima autem est omnium formarum naturalium perfectissima. Tum quia pars superior inferiorem regit , nec ab inferiori regi debere , per se notum est , nec minùs notum in homine rationem esse appetitus sensitiui reginam à natura præpositam. Ergo in statu naturæ puræ homo nec inordinatos carnis motus , nec appetitus concupiscentis rebellionem expertus fuisset. Vnde August. *lib. 2. cont. Iul. cap. 8.* hanc Ambrosii sententiam laudat : *Princeps & anima carnis naturaliter anima est.*

inferiori, quæ ipsi ante peccatum plenè subjecta erat, indicium est peccati, quo adversus Deum rebellavit. *Hincine non erubesceret humani libertas arbitrii*, inquit lib. 1. de nupt. & concup. cap. 5. *qua contemnendo imperantem Deum, etiam in membra propria proprium perdidisset imperium?* Cum igitur de concupiscentia erubescamus, manifestum est, ipsam esse non naturæ puræ corollarium, sed peccati consecrarium. *Itaque*, ait idem Pater lib. 1. ad Bonif. cap. 16. *Suâ culpâ sibi accidens malum natura humana permittatur agnoscere, ne cogatur aut, quod est impudentissimum, de his suis motibus non erubescere; aut, quod est ingratisimum, de sui Creatoris operibus erubescere.* Hujus nos pudet, & meritò pudet, addit lib. 2. de nupt. & concup. cap. 9. *Nam si hoc non esset, quid nobis esset ingratus, quid irreligiosius, si in membris nostris non de vitio, vel de pœna nostra, sed de Dei confunderemur operibus?* Plura circa hæc tractatu sequenti dicemus, ubi etiam P. Gonet, & aliorum oppositum sentientium argumenta diluemus.

Sed dices: Homo non solùm est rationalis, sed etiam animalis: sed non minùs naturale est homini, quàm animali, sensibilia concupiscere, quàm ei, quàm rationali, intelligibilia, honesta, & spiritalia optare. Ergo quos experimur appetitus sensitivi motus, non pœna peccati sunt, sed hominis quàm animalis effectus. Cujus signum est, quòd hujusmodi motus in brutis reperiuntur, in quibus utique mali non sunt, sed merè naturales, & à Deo naturæ authore procedunt.

Respondeo, quod licet homo animalis simul sit,

fit, & rationalis; ratio tamen in ipso sibi naturaliter principatum vindicat: unde licet appetitus sensitivus, conveniens homini, quæ animali, bona sensibilia naturaliter concupiscat; ipsi tamen ut appetitui rationali subiecto non est naturale sensibilia contra ordinem rationis concupiscere, ut antea expressissimè nos docuit S. Th. idque naturalis ordo necessariò exigit, ut inferiora superioribus subdita sint. Quod egregiè explicat August. lib. 2. de *Genesi cont. Manich.* cap. 11. exemplo mulieris, quæ viro naturæ subiecta est: *Ad huius rei exemplum*, inquit, *fœmina facta est, quam rerum ordo subjugat viro; ut quod in duobus hominibus evidens apparet, id est in masculo & fœmina, etiam in uno homine considerari possit: ut appetitum anima, per quem de membris corporis operamur, habeat mens interior, tanquam virilis ratio subjugatum, & iuxta lege modum impenat adjutorio suo, sicut vir debet fœminam regere, nec eam permittere dominari in virum. Quod ubi contingit, perversa, & misera est domus.*

Ex quo manifestum oritur discrimen inter appetitum sensitivum hominis, & bruti; quia in bruto sola est sensitiva pars, nulla rationalis; unde cum in sensibilia toto impetu fertur, nulli superiori adversatur. At in homine duplex est appetitus, sensitivus, & rationalis; & ille isti obtemperare naturaliter debet, ut in interiori republica sit pax, quæ est tranquillitas ordinis; ibi autem non ordo; sed horror inhabitat, ubi pars inferior superiori principatur. *Hæc libido*, inquit Augustinus omnia Adversariorum argumenta præoccupans, lib. 4. cont. Jul. cap. 5. *ideo malum non est in belluis, quoniam non repugnat ratio*

rationi, quæ carent. Ex quo discrimine humanæ naturæ præcellentiam deducit incomparabilis Doctor lib. 1. de pec. orig. cap. 40. his aureis verbis: Pecori comparatur homo per vitium, non per naturam; non pecoris vitio, sed nature. Tanta namque excellentia est in comparatione pecoris homo, ut vitium hominis natura sit pecoris.

*Quintus peccati effectus: Difficultas
recti, & torpor appetitus
irascibilis.*

Sequitur hic effectus ex præcedenti; cum enim appetitus toto impetu sensibilia concupiscat, non potest nisi ægrè in spiritalia, & divina contendere; difficile namque ardua conscendit, & sursum vehitur, qui ad inferiora multiplici pondere inclinatur. Unde Augustinus lib. 3. de lib. arbit. & serm. 105. de tempore, ait: *Non est in earendo difficultas, nisi cum est in habendo cupiditas. Noli ergo amare impedimentum, si non vis invenire tormentum. Quod amas in terra, impedimentum est, viscus est pennarum spiritualium, hoc est virtutum, quibus volatur ad Deum. Capi non vis, & viscum amas? Nunquid non caperis, quia dulciter caperis? Quanto magis te delectat, tanto magis strangulat.*

Difficultas ergo recti ex concupiscentia oritur, sed peccatorum actualium frequentiam immensum augetur, quia ut rectè docet idem Pater, ex peccatis suis sibi unusquisque restem texit; vinculis namque peccatorum quisque constringitur, quibus se olim constrictum lugebat

Augu

Augustinus, suspirans ligatus non ferro alieno, sed ferrea voluntate. Sicut autem ferro, & catenis onustus ægrè admodum incedit, sic propriis peccatorum vinculis illigatus jacet paralyticus, nec bonum vult, vel si vult, non benè vult, ibi deficiens ubi inceperat.

Hinc etiam voluntatem languor tantus invadit, ut voluntas naturâ domina, suam sibi auferat libertatem, & famulabus suis durâ, & simul voluntariâ necessitate ancilletur. Nam dum servitur libidini, fit consuetudo; & dum consuetudini non resistitur, fit necessitas. Hanc voluntatis infirmitatem sibi met compedes injicientem, & motum in divina præpedientem, sic præclarè explicat Bernardus lib. de grat. & lib. arbit. *Peccato factum est, ut corpus quod corrumpitur, aggravet animam, non mole, sed amore: nam quod anima per se jam surgere non potest, qua per se cadere potuit, voluntas in causa est, qua corrupti corporis vitiato, ac vitioso amore languescens, & jacens amorem justitiæ non admittit. Ita nescio quo pravo, & iniro modo, ipsa sibi voluntas peccato quidem in deterius mutata necessitatem facit, ut necessitas cum voluntaria sit, excusare voluntatem non valeat, nec voluntas cum sit illecta, excludere necessitatem. Est enim necessitas hac voluntaria, favorabilis vis quadam, premendo blandiens, & blandiendo premens; unde sese rea voluntas, ubi semel peccato consenserit, nec excutere jam per se, nec excusare ulla ratione queat. Qualis autem, & quanta est illa infirmitas, quæ non alio premitur impedimento, quàm voluntariæ cujusdam servitutis; pro servitute quidem miserabilis, sed pro voluntate inexcusabilis?*

*Sextus peccati effectus : Mors , & alia
vita hujus arumna.*

Ita docet Apostolus Rom. 5. *Per unum hominem peccatum intravit in mundum , & per peccatum mors.* Et cap. 6. *Stipendia peccati mors.* Et cap. 8. *Corpus mortuum est propter peccatum.* Eandem veritatem vetus quoque Testamentum aperte significat Sapient. 2. *Deus creavit hominem inexterminabilem ; sed invidia diaboli mors intravit in mundum.* Et Eccles. 25. *A muliere factum est initium peccati. & per illam omnes morimur.*

Porro hanc Catholicam assertionem variis in locis contra Pelagianos probat Augustinus, quia creatura intellectualis innocens, sub justo, & omnipotente Deo misera esse non potest. Unde serm. 139. de Temp. *Malorum, inquit, omnium nostrorum causa peccatum est, non enim sine causa mala ista homines patiuntur : Justus est Deus omnipotens, non ista pateremur, si non mereremur.* Et lib. 3. de lib. arb. cap. 18. *Omnis poena, si justa est, peccati poena est. & supplicium nominatur : si autem injusta est, quoniam poenam esse nemo ambigit, injusto aliquo donante imposita est.* Hinc variis in locis idem Doctor sanctus peccatum originale parvulis nascentibus inesse demonstrat. Legendus est serm. 14. de verbis Apostoli, ubi sic fatur : *Hic defende justitiam Dei, quare vel parva poena infligitur innocenti, in quo nullum invenitur omnino peccatum ? Responde si potes, sed rationem affer.* Sub justo Deo, addit generatim lib. 1. operis jam perfecti, *miser esse quosquam,*
nisi

n. si mereatur, non potest. Et lib. 2. de civit. c. 22. Quoad primam originem pertinet, omnium mortalium progeniem fuisse damnatam, ut ipsa vita, si vita dicenda est, tot & tantis malis plena testatur. Et cap. 14. Deo cuncta, quae fecit, administrante, & summam potestatem, summamque habente justitiam, nunquam profecto in has misérias decidisse, nisi nimis grande peccatum in homine primo, de quo exorti sunt ceteri, praecessisset. Quam doctrinam non solum ratione, quæ innocentem miserum esse vetat, confirmat, sed etiam præclaris Scripturæ testimoniis illustrat, potissimum verò ex illo Sap. 10. Cum ergo sis justus, justè omnia disponis: ipsum quoque, qui non debet puniri, condemnare, exterum aestimas à tua virtute; virtus enim tua justitia initium est. Tu autem dominator virtutis cum tranquillitate judicas, & cum magna reverentia disponis nos. Ubi spiritus sanctus cam esse indolem Dei asserit, quæ nunquam miseriam sine culpa inferat, & hominem ad imaginem, & similitudinem suam formatum cum reverentia disponat: non esset autem cum reverentia de homine disponere, ipsum immeritis onerare miseriis.

Hanc etiam Christianam doctrinam confirmat, illustratque D. Augustinus ipsorum infidelium omni fidei luce destitutorum testimoniis, qui ipsa veritate coacti, persuasique, nullam justè infligi posse absque peccato poenam, & aliunde nihil de peccato originali, sive scientes, sive credentes, dicere maluerunt animas nostras ob quædam in superiori vita, antequam corpori unirentur, patrata scelera, in corpora fuisse immissa, quàm tot mala in Deum bonum & justum
refun

refundere. Sed operæpretium est audire Augustinum lib. 4. cont. Jul. cap. ult. *Hujus evidentia miseria Gentium Philosophos nihil de peccato primi hominis, siue scientes, siue credentes compulit dicere, ob aliqua scelera suscepta in vita superiore, pœnarum luendarum causâ nos esse natos, & animos nostros corruptibilibus corporibus eo supplicio, quo Etrusci pradones captos affligere consueverunt, tanquam vivos cum mortuis esse conjunctos.*

Id ipsum illustrat Doctor sanctissimus libro eodem, cap. 12. dicto Tullii, qui lib. 3. de Republica, ut à miseriis, quas patimur, Deum vendicet, illas naturæ, quam idcirco novercam vocat, ascribit; quia non poterat sibi suadere Deum bonum peræquè ac justum, hominem condere voluisse corpore nudo, fragili, & infirmo, animo verò anxio ad molestias, humili ad timorem, molli ad labores, prono ad libidines. *Rem vidit, ait Augustinus, causam nescivit: latebat cum cur esset grave jugum super filios Adam, quia sacris literis non eruditus, ignorabat originale peccatum. Quam Ciceronis, cæterorumque Philosophorum doctrinam conferens cum Juliani sententia, quæ tot miseriis hominem sine peccato subjiciebat, sic ait: Nonne qui ista senserunt, multò quàm tu melius, grave jugum super filios Adam, & Dei potentiam, justitiamque viderunt; etiamsi gratiam, quæ per Mediatorem liberandis hominibus concessa est, non viderunt?*

Hac etiam evidenti veritatis luce compulsi alii hæretici in varias sententias, vel potiùs sententiarum monstra abierunt, quàm ut Deum pœnarum sine culpa inflictorem assererent. Hinc hære

hæretici illi, quos Tertullianus Materiarios appellat, tot mala in materiam refuderunt. Hinc Manichæi, cum bonum Deum ab omni prorsus injustitia vindicare vellent, aliud primum principium per se malum omnis mali architectum confinxerunt, quem errorem æquiores esse Pelagianismo, ex eoque sequi docet Augustinus lib. 6. operis jam perfecti: *Negando enim mala, inquit, qua de origine vitiata homines nascentes trahunt, non id agis ut nulla credamus esse mala naturalia, quoniam nimium manifesta sunt; sed potius agis, ut de aliena mala natura putentur esse ista, quam nobis esse commixtam Manichæorum fabulatur insania.* Hinc ipsi Pelagiani tanto luminis obsistere non valentes, ne Deum pœnas sine culpa infligere dicere cogerentur, maluerunt, quantumvis absurdè, asserere, illas quas in infantibus deprehendimus misérias, mala pœnæ non esse, contra quos lib. 2. operis jam perfecti, exclamat August. *O dementiam singularem! Hoc disputare est, an insanire? Cum miseria se natos esse parvuli flendo testantur, & felices eos dice?*

Has omnes Augustini rationes compendiosè complectitur Concilium Arausicanum II. can. 2. his verbis: *Si quis mortem tantum corporis, non autem & peccatum per unum hominem in omne genus humanum transisse testatur, injustitiam Deo dabit.* Complexus est etiam S. Thomas lib. 4. cont. Gent. cap. 52. ubi existentiam peccati originalis contra infideles probat ex morte, aliisque miseræ vitæ ærumnis, quibus obnoxii sumus: quibus argumentis nihil conficeret, si mors, alique defectus non essent pœnales, id est propter solum peccatum nobis impositi. Vide ibidem S. Doctorem.

Dices:

Dices : Mors, morbi, & aliæ vitæ hujus calamitates sunt defectus naturales, naturaliter hominis conditionem comitantes ; cùm enim homo ex materia sublunari alias formas appetente, necnon ex primis quatuor elementorum qualitatibus inter se pugnantibus constet, consequens est, hujusmodi corporales miseras non esse peccati effectus. Unde homo in natura pura conditus, & moriendi necessitati, & morbis, & laboribus, & doloribus, aliisque hujus vitæ incommodis obnoxius extitisset.

Respondeo, quod licet homini sibi relicto, & à Deo propter peccatum derelicto, vel præcisè juxta materiæ sublunaris conditionem considerato, miseriæ & mors naturaliter conveniant, ad suavem tamen Dei boni & justi providentiam pertinet animam rationalem innocentem his miseriis non subicere. Et hac de causa dicitur alibi, statum naturæ puræ, tametsi absolute, & metaphysicè, seu de potentia Dei extraordinaria possibilem, de potentia tamen ordinaria, vel ut loquitur D. Thomas ordinatam, non esse possibilem. Unde simpliciter, & sine addito mors, aliæque ærumnæ, non conditiones naturæ, sed poena peccati dicendæ sunt, quia juxta solitum divinæ providentiæ cursum, Deus illas non infligit, nec infligere de potentia ordinaria potest, nisi peccatum aliquod præcesserit.

Observe tamen longè magis repugnare, hominem conditi cum concupiscentia rationi rebellem, quàm cum his miseriis corporalibus ; quia hæ vitæ corporalis ærumnæ non sunt defectus morales, sicut est concupiscentia rebellis ad peccatum inclinans, & inordinatis motibus semper sollicitans. Quam notandissimam differentiam
satis

facis Augustinus insinuat lib. 9. cont. Jul. cap. 7. *Continentia*, inquit, est à Patre, quia non expugnaretur concupiscentia, nisi non esset à Patre. Hac ergo ipsa, contra quam si continenter vivis, acriter pugnas, non est à Patre: non enim contra eam pugnares, nisi repugnaret: nec verò repugnaret tibi agenti quod donatur, & amatur à Patre, si esset à Patre. Sed alia sunt rerum corporaliū qualitates, quæ secum à contrariis temperantur, ut bene valeamus; & cum sint in diverso genere bonæ, tamen cum discordant, malam valetudinem faciunt: & alia sunt anima cupiditates, quæ propterea carnis dicuntur, quia secundum carnem anima concupiscit, cum sic concupiscit, ut ei Spiritus, id est pars ejus melior, & superior debeatur repugnare. Unde patet, quod licet conflictus qualitatum morbum, & mortem inferens, sit naturalis; non tamen pugna concupiscentiæ, quæ semper est contra naturam, ut suprâ ex SS. Augustino, & Thoma demonstravimus: docent enim aperte, concupiscentiam, quæ est naturalis in brutis, esse contra naturam in hominibus, quibus propterea dicitur Psal. 31. *Nolite fieri sicut equus & mulus, quibus non est intellectus. Quique Jerem. 5. redarguuntur, eo quod equi amatores, & emissarii facti sunt; unusquisque ad uxorem proximi sui hinniebat.*

Septimus peccati effectus: Macula, & turpitudine anima peccantis.

Constat hæc veritas ex Scripturis, in quibus peccatum appellatur *inquinamentum*, Jerem. 2. & Ezech. 36. *Sordes*, Apoc. 22. & Thren. 1. *Macula*, Psal.

Psalm. 14. Eccles. 47. & Ephes. 5. Dicitur autem peccatum causare maculam, ad similitudinem maculæ, quæ corporibus nitidis ex contactu alterius accidit; sicut enim vestis, vel facies splendida, commixtione luti sordescit; sic animus dum creaturis amore permiscetur, nitorem illum amittit, quem à divinæ sapientiæ, & gratiæ lumine mutuabatur. Unaquæque enim res sicut unione ad nobiliora perficitur; ita permixtione cum inferioribus deturpatur, & vilescit: non enim dicimus argentum esse impurum ex permixtione auri, quo melius & pretiosius evadit, sed ex permixtione plumbi, vel stanni, quo inficitur, & vitiatur. Unde D. Thomas verè post Augustinum docet opusc. 61. *Animam mediam inter Deum & creaturas, conversione ad Deum illuminari, meliorari, & perfici; & conversione ad creaturas obtenebrari, deteriorari, & corrumpi.*

Porro, quid sit macula peccati originalis, satis, superque suprà expositum est; quid sit verò macula ex peccato actuali consequuta, quæ & peccatum habituale dicitur, non quòd semper supponat habitum vitii productum, sed quia permanenter; & tandiu durat, quandiu non est per veram pœnitentiam retractatum; quid, inquam, sit hujusmodi macula, variè opinati sunt antiqui Theologi, & moderni. Sed sententia D. Thomæ, quam statuit *quest. 86. art. 2. & 4.* est omnibus præferenda, quæ docet, maculam peccati ut sic, seu abstrahentis à mortali & veniali, esse privationem rectitudinis, honestatis, & conformitatis ad legem connotantem actum peccati unde causata est; maculam verò peccati

mortalis esse privationem gratiæ, & amicitiae Dei, supponentem actum peccati lethalis, quo homo à Dei amore recessit; maculam autem peccati venialis esse privationem fervoris charitatis, ratione cujus habitus charitatis propter peccata venialia quadantenus ligatus minus promptè in actus funditur, minusque expedite edit præclaros illos flores, qui sunt simul fructus honoris, & honestatis.

Ratio una, & eadem est, quâ triplex assertionis illius pars stabilitur. Per maculam nihil intelligere possumus, quàm privationem nitoris animæ. Ergo in illius privatione macula consistit, ex quo nitor animæ proficiscitur; siquidem per absentiam illius anima nitore caret, & sordescit. Atqui nitor animæ ex triplici causa proficiscitur, primò ex refulgentia luminis naturalis rationem dirigentis; ad quod dum homo actiones suas exigit, bonus, & honestus dicitur. Secundò ex refulgentia divini luminis, fidei scilicet, & gratiæ, quo homo ad sanctè vivendum perficitur, & juvatur; quæ refulgentia, ut loquitur D. Thomas, seu fulgor, est effectus formalis divini luminis gratiâ suâ animam illustrantis & profundentis; & cùm effectus formalis sit ipsa forma communicata, nitor gratiæ, & ipsa gratia idem sunt. Tertiò oritur nitor, & decor animæ, imò & ipsius gratiæ, & charitatis ex actibus elicitis, quibus interior decor exteriorè apparens magis splendescit. Ergo ex peccato ut sic oritur privatio rectitudinis, & conformitatis ad rationem & legem æternam, & opus pravum, dictum, factum, vel concupitum contra legem; consequitur post actum peccati

tati macula, & turpitudine, ratione cujus homo dicitur habitualiter malus, & peccator: ex peccato mortali, quo læditur, & contemnitur amicitia Dei, consequitur privatio mitoris gratiæ, subindeque macula, & scditas, quæ est essentialiter macula, ratione cujus homo dicitur Dei inimicus. Ex peccato verò veniali oritur privatio pulchritudinis in actibus charitatis promptè elicitis relucens, ac proinde macula venialis, ratione cujus justus dicitur torpens, & languidus.

Quod autem omnes illæ privationes ut sint maculæ, debeant importare ordinem ad suam causam, id est connotare peccatum, manifestum est. Quia ut macula illa habeat rationem culpæ, debet esse moralis, & voluntaria. Ergo necessarium importat ordinem ad actum voluntatis, à quo fuit causata. Et hinc oritur diversitas macularum, quibus propter peccatorum varietatem homo sordescit; diversa enim peccata diversas maculas inducunt, & veluti incurrunt. *Et est simile*, inquit D. Thomas q. 86. art. 1. ad 3. *de umbra, quæ est privatio luminis ex objecto alicujus corporis, & secundum diversitatem corporum objectorum distinguuntur umbra.* Unde etiam fit, omnes maculas non esse æquales, quia inæqualia peccata supponunt, quæ majus, vel minus obstaculum ponunt. Ex quibus solum manet præcipuum aliter opinantium fundamentum, inde petitum, quòd cum privatio gratiæ sit indivisibilis, sit ejusdem speciei, sit unica in quolibet; sequeretur omnes à peccato illatas maculas esse ejusdem speciei, esse æquales, & in uno peccatore, etiam post

multa scelera esse unicam. Sed hæc omnia, aliaque similia contrita manent, quia macula peccati non utcumque privationem gratiæ connotat, sed in ordine ad causam talis privationis, quæ est peccatum.

Denique totam istam nostram sententiam quoad triplicem ejus partem placet verbis S. Doctoris illustrare, quæ habet in art. 3. hujus quæst. & in 4. distinct. 16. quæst. 2. art. 2. quæst. 1. ad 1. *Anima hominis duplicem habet nitorem, unum quidem ex resurgentia luminis naturalis rationis, per quam dirigitur in suis actibus; alium verò ex resurgentia divini luminis, scilicet sapientia, & gratia, per quam etiam homo perficitur ad benè, & decenter agendum. Macula autem, addit loco memorato Sententiarum, potest esse dupliciter: uno modo per privationem pulchritudinis, & sic ex veniali non manet aliqua macula, quia non tollit gratiam, qua est anima decor: alio modo per hoc, quod pulchritudo, qua est gratia, impeditur ne exterius appareat, sicut per pulverem pulchritudo faciei sædatur; & talis macula est in veniali, quia impeditur decor gratia, ne actibus exterius ostendatur.*

Dices: Si quis in puris naturalibus, seu in statu naturæ positus graviter peccaret, incidere utique in peccatum mortale, unde & contraheret maculam ab illo peccato indivulsam: sed non haberet privationem gratiæ, privatio namque est carentia formæ debitæ, & gratia non est debita naturæ puræ: ergo macula peccati mortalis non est in privatione gratiæ sita.

Respon

Respondeo, gratiam in nullo statu esse simpliciter homini debitam, cum gratia sit semper collata gratis, subindeque omni debito opposita. Sed homo in omni statu, etiam naturæ puræ, est capax gratiæ, habetque ad illam à Deo recipiendam aptitudinem; per peccatum verò grave habituale non retractatum capacitati illi, & aptitudini ponit objectaculum, quia seipsum positivè incapacem, positivè ineptum efficit divinæ gratiæ suscipiendæ, quandiu peccati non pœnitet. Unde etiam in illo statu homo, tametsi gratiâ nudus, per peccatum in privationem gratiæ incideret, cujus antea negativam duntaxat carentiam haberet; quia ostium clauderet gratiæ, quod erat antè apertum; id est non privaret se gratia, quam non habebat; sed privaret se capacitate non impedita recipiendi gratiam, hoc ipso quod Dei inimicus peccando evaderet. Addunt alii, quod licet tunc peccatum hominem gratiâ non privaret, hoc tamen esset per accidens, quia illam in subjecto non inveniret, à quo illam per se summovere natum est: sicut macula, quæ peccatori per nova peccata advenit, non privat quidem ipsum gratiâ, quâ spoliatus est, sed ipsum eâ privare nata est, si haberet. Hæc autem suppositis supponendis de possibilitate naturæ puræ dicta sunt.

Dices iterum: Nonne facilius esset, & expeditius dicere, peccatum mortale in statu naturæ puræ futurum alterius rationis, quàm sit modò, & constitutum iri per privationem subjectionis, seu conversionis habitualis in Deum ut ultimum finem naturalem. Ergo in priva-

tione gratiæ, quæ in statu naturæ puræ non daretur, macula non consistit. Ita philosophantur quidam recentiores Thomistæ, quibus favet noster Gonet *disput. 8. de peccatis, artic. 3.* in priore ad quartam objectionem responsione.

Respondeo, nequaquam id posse dici; tum quia, ut antea diximus, essentia peccati mortalis, quæ mortalis, est læsio divinæ gratiæ, amicitia, & charitatis. Ergo macula ex illo peccato confurgens, est privatio illius gratiæ, amicitia, & charitatis, quam licet in statu naturæ puræ non haberet homo, esset tamen illius capax, & per peccatum mortale capacitatem illam obstrueret, & obseraret. Tum quia per peccatum mortale homo eam maculam contraheret, quæ in sola posset justificatione abstergi, cum justificatio sit remissio peccatorum: non posset verò tunc justificari, nisi per gratiæ infusionem, quia non est alia assignabilis justificationis forma: ergo macula injustitiæ habitualis in privatione gratiæ, quæ in justificatione infunditur, sita est.

Dices tertio cum Scoto & Durando: Verisimilius est, maculam peccati nihil esse aliud, quàm reatum pœnæ æternæ, seu relationem ordinationis ad pœnam ex actu peccati consequutam. Nam in humanis, qui in alium peccat, nihil aliud per offensam suam contrahit, quàm reatum, deputationem, & obligationem ad pœnam.

Respondeo, nequaquam in hujusmodi ordinatione ad pœnam consistere posse essentiam maculæ peccati; tum quia ordinatio ad pœnam,
sive:

sive activè sumpta ex parte Dei pro sua justitia pœnam decernentis, sive passivè sumpta pro subjectione ad pœnam, est conformis ordini divinæ sapientiæ, & æquitatis, subindeque bona est, Deo placet, & à Deo est; justum enim est, ut peccatis addicatur, eisque subiaceat, qui peccatorum delictis indulgit: macula autem ex peccato relicta, nec à Deo est, nec illi placere potest. Tum quia etiamsi Deus statuisset nullam peccantibus inferre pœnam, adhuc tamen patrato peccato homo esset maculatus, & peccator: nam damnati quotidianis peccatis, licet in novas pœnas non incidant, novas tamen contrahunt sordes: & etiam in justificatione, deletâ per gratiam maculâ, remanet reatus pœnæ, quæ licet mutetur in temporalem, hoc tamen non ex natura rei, sed ex misericordia oritur Dei, qui reum cujusvis peccati mortalis etiam justificatum æternis posset addicere pœnis, ut injuriam infinitam resarciret.

Si dicas, reatum, seu ordinem ad pœnam, esse condignitatem, seu meritum pœnæ actum peccati consequutum, quæ condignitas non est à Deo, Deus enim non facit hominem pœnâ dignum; unde etiamsi Deus nullam infligere peccatori pœnam constituisset, peccator tamen ob patratum scelus pœna dignus esset, sicut justus ob bona opera dignus est, cui merces rependatur. Si, inquam, hæc dicas, adhuc non satisfacis, etenim non ideo aliquis est peccato sordidus, & maculatus, quia dignus est pœna; sed idcirco pœna dignus est, quia peccati maculâ inficitur. Et idem ferè accidit in humanis; qui enim offendit Regem, primò amicitiam ejus dissolvit,

quæ si esset intrinseca homini, sicut est amicitia Dei per gratiam diffusa, peccatum in Regem causaret maculam intrinsecam, eo modo, quo priuatio potest esse intrinseca: sed quia amicitia Regis in fauore duntaxat extrinseco consistit, peccatum in Regem maculam moralem, & civilem solummodò causat, ratione cuius homo ille dicitur inimicus Regis, eique exosus; & quia talis est, dignus est etiam qui puniatur. Ex quibus responsum manet exemplo in objectione ab humanis petito. Ex illis etiam confutata manet Vasquesii sententia, existimantis peccatum habituale, seu maculam, esse duntaxat denominationem extrinsecam à præterito peccati actu moraliter, donec per poenitentiam retractetur, perseverante petita; confutata, inquam manet, quia macula est aliquid intrinsecum, & permanens, sicut nitor gratiæ, quo priuat: unde sicut nitor gratiæ non est denominatio petita ab actu amoris Dei; ita macula non est sola denominatio petita ab actu peccati, sed est priuatio intrinsecè suo modo afficiens animam, sicut tenebræ afficiunt aërem, & mors corpus.

Dices ultimò cum Lorca & Martines: Macula peccati importat aliquid positivum, nempe conuersionem habitualement ad bonum commutabile, cui tanquam ultimo fini adhæret, & habitualiter mancipatur, quæ sanè grandis est animi turpitudine: illa autem conuersio importat aliquid positivum, sicut auersio aliquid privativum, ut ex ipsis terminis videtur esse per se notum: Ergo peccatum habituale non per solam gratiæ privationem, sed etiam per aliquid positivum,
conver

conuersionem nimirum habitualem ad bonum commutabile constituitur.

Respondeo, hanc sententiam non videri S. Thomæ menti consentaneam; expresse enim q. 86. art. 1. ad 3. affirmat S. Doctor, *maculam non esse aliquid positivè in anima, sed significare priuationem quandam nitoris anima in ordine ad suam causam, quæ est peccatum.* Et ratio est, quia licet post peccatum mortale voluntas maneat in bonum commutabile habitualiter conuersa, tamen hæc habitualis conuersio in finem ultimum prauum non ab habitu ex actu peccati relicto proficiscitur, sed est ipsamet peruersæ voluntatis inclinatio, quæ bono proprio tanquam ultimo fini permanenter adhæret: voluntas autem in proprium bonum absque illius habitus aduentitii accessione satis inclinatur; cum enim voluntas sit essentialiter inclinatio, vel in nullum, vel in proprium bonum propendet, præsertim cum bonum proprium nihil habeat voluntatis facultatem excedens. Postquam ergo voluntas per peccatum mortale nefariè proprium bonum in ultimum finem elegit, ipsi manet habitualiter mancipata, ipsi seruit, ipsi omnes affectus subijcit. Quare illa conuersio positivæ est inclinatio voluntatis priuatae charitate, & peruersè in proprio bono, tanquam ultimo fine sistentis.

Ad maiorem horum claritatem, & variorum S. Thomæ locorum in speciem pugnantium, & revera concordium intellectum, observandum est, quod cum habitus producantur per actus, per actum peccati mortalis, etiam primi produciuntur, vel saltem inchoatur habitus, qui nondum

habet statum, & conditionem habitus, sed dispositionis : nam ut ait D. Thomas in 4. dist. 18. q. 1. art. 2. *Ex peccato non remanet positivè aliquid in anima, nisi dispositio, vel habitus, qua consequuntur peccatum ex parte actus, ex quo aliquid ponit.* Si non remanet positivè aliquid aliud, illud certè manet, imprimaturque à positiva tendentia, quam peccatum actuale, vel de materiali, vel de formali importat. Si ergo Martines nihil aliud velit, quàm ex peccato actuale relinqui, vel inchoari pravam aliquem habitum, sicut ex actu virtutis producitur, vel inchoatur habitus virtutis, à vero non aberrat, nec D. Thomas dissentit, qui non solum passim docet, actus sive bonos, sive pravos habitum ingenerare, sed specialiter q. 28. de verit. ar. 6. ait : *Culpa aliquid ponit, & non solum absentiam gratia.* Sed in hoc à veritate recedit, quòd in illo positivo essentiam maculae constituat ; licet enim ex pravis habitibus non parum sordescat homo interior, in illis tamen turpitudine, & essentialis macula non consistit : tum quia macula peccati est in essentia animae Dei inimicae, Deo exorsa, Deo propter foeditatem invisae, & ingratae : habitus autem pravi potentias inficiunt, & deturpant. Tum quia pravi habitus per contrarios actus expelluntur, & à fortiori dispositiones, quæ sunt facile mobiles ; & tamen etiam destructis pravis dispositionibus tandiu remanet macula, quandiu non infunditur gratia : non enim potest intelligi remissio culpa, si non adsit infusio gratia, ut S. Thomas q. 113. art. 2. docet. Tum demùm, quia in justificatione peccati labes eluitur, & oblitescitur ; & tamen non expunguntur pravae dispositiones,

sitiones, tametsi sint in via corruptionis. Ergo in privatione nitoris gratiæ macula animæ; in privatione splendoris virtutum infusarum macula facultatum primò, & essentialiter consistit.

Instabis in favorem Vasques: Per id homo maculatur, per quod voluntas unitur, & veluti permiscetur creaturis; sicut sordidatur tunc argentum cum stanno conjungitur. Atqui homo non permiscetur creaturis, nisi per amorem, quo veluti amplexatur stercora: Ergo in actu peccati essentialis macula consistit, & eo transacto in denominatione ab illo actu non retractato petita.

Respondeo certum esse, actum peccati multis obsolescere, & squallere sordibus, cum sit actualis à Deo recessus, & vilissimarum creaturarum amplexus. Unde præclare observat S. Doctor q. 86. art. 1. ad 2. illud inter actus intellectus & voluntatis interesse discrimen, quòd intellectus etiam dum speculatur vitia, & sordida, non vilescit, nec sordidatur, quia trahit res ad se, & dat illis esse intelligibile & elevatum. At verò voluntas amore fertur & trahitur ad res, in ipsasque transformatur; unde & earum sordibus inficitur, sicut earum nobilitate perficitur, juxta illud ex Augustino decantatum: *Si terram amas, terra es; si Deum amas, audeo dicere, Deus es.* Si audiamus Angelicum Præceptorem: *Actio intellectus perficitur secundum quod res intelligibiles sunt in intellectu per modum ipsius intellectus; & ideo intellectus ex eis non inficitur, sed magis perficitur. Sed actus voluntatis consistit in motu ad ipsas res; ita quod amor rei amara ani-*

nam conglutinat; & ex hoc anima maculatur, quando inordinate inhaeret, secundum illud Ozea 9. Facti sunt atominabiles sicut ea, quae dilexerunt. Sed malè inde infertur, peccatum habituale, & maculam ex peccato consequitam, esse duntaxat denominationem extrinsecam ab actu perverso petitam; sicut malè inferretur, nitorem, & pulchritudinem animæ esse duntaxat denominationem desumptam ab actu conversionis in Deum, in quo utique eximius decor invenitur: quare sicut præter decorem bonorum operum inest animæ splendor gratiæ & virtutum; ita præter fœditatem actuum permanet habitualis animæ turpitudine in privatione gratiæ sita.

Octavus peccati effectus: Infamia.

Peccatum, & peccatores comitari dedecus, & infamiam, ipsa natura docet, quæ propterea, ut docet Tertullianus in *Apologet.* omne malum pudore, & timore perfudit, ita ut nec ipsi perversi malum quod patrant, defendere pro bono audeant; unde & qui malè agunt, lucem fugiunt, latère gestiunt, trepidant deprehensæ, negant accusati, & convicti non sibi attribuunt, sed naturæ, vel fato, vel astris. Et ratio est, quia sicut gloria est clara alicujus cum laude notitia, ita infamia est alicujus cum vituperio notitia. Porro quemadmodum honor, & gloria virtutem sicut umbra corpus indivulsè comitatur, ita vitium contemptus. Nam ea facîle contemnimus, quæ vilipendimus; peccatorem autem non solùm mi-

nima

nimi habent Deus & Justi, sed etiam odio habent, & execrantur; nam etsi nihil eorum odit Deus, quæ fecit, odio tamen illi est impius, & impietas ejus, atque abominabile Domino cor pravam. Et meritò vilescit homo, fitque despicibilis, dum à creaturæ rationalis dignitate deciscens in brutalem transit ignobilitatem; homo autem cùm in honore esset, non intellexit, sed peccando comparatus est jumentis insipientibus, & similis factus est illis. Vilis est conditio servi; at qui facit peccatum, servus est peccati, dum carni animus servit, fitque rerum corruptibilium mancipium, quibus debuerat ingenuitatis dignitatis privilegio principari. Quare sicut boni hominis justis moribus suavissimam afflant odorem, juxta illud: *Christi bonus odor sumus*; & illud iterum: *Odoratus est Dominus odorem suavitatis*; ita graveolentem, intolerandumque fœtorem fundunt peccatores, juxta illud præclarum, & celebre Anselmi pronuntiatum lib. de similit. cap. 190. *Si hinc peccati pudorem, & illinc cernerem inferni horrorem, & necessario uni illorum deberem immergi, prius me in infernum mergerem, quàm peccatum in me immitterem; malletque purus à peccato in gehennam intrare, quàm peccati sorde pollutus cælorum regna tenere.*

Hinc intelliges quo sensu verum sit illud axioma, quo tantoperè nonnulli abutuntur: *Honor vitâ potior, & carior est.* Si enim intelligatur de honore mundano, vel si honos consideretur quatenus est bonum ejus, qui dicitur honorari, nec ad Dei gloriam, Ecclesiæ, proximique utilitatem refertur, falsa prorsus est illa sententia: *minimè*

nimum est enim, & ferè nullum bonum, quod in alienis fallacium hominum judiciis, non in ipso, cujus bonum dicitur, positum est: unde & illud bonum primò quærere, & propter se desiderare, mera ambitio, putida vanitas est; & de illo gaudere, levitas cordis. Si verò bonum illud intelligatur de honore à virtute indivulso, qui ad Dei gloriam propagandam, proximique utilitatem procreandam totus refertur, juxta illud: *Sic luceant opera vestra bona, ut glorificent Patrem vestrum, qui in cælis est*; tunc verum habet prædicta maxima sensum, ita ut amittenda sit potius vita, quàm aliquid committatur, unde aliqua nostro honori labes aspergatur. Sic generosè Seneca: *Major sum, & ad majora natus, quàm ut sim mancipium corporis mei*. Sic heroicè de sacris Martyribus una: *Malo mori, quàm scèdari*. Sic intrepidè Christiani athletæ mori potius, & dira quævis tormenta pati, quàm in negatæ Christi fidei, vel alicujus criminis suspicionem venire elegerunt; quia gloriosa mors ignavæ, turpique vitæ longè est anteponenda. Hinc Sancti non solum malum, sed etiam speciem mali fugiunt, bonique nominis curam habent; nec aperta solum mala fugiunt, sed etiam quæ probabiliter fingi possunt, mala devitant, ut fraternæ utilitati consulentes, ea non faciant in oculis infirmorum, quibus mali velent suam perversitatem, vel justorum infuscent serenam simplicitatem.

*Nonus peccati effectus : Nova
peccata.*

Ratio est, quia qui non habet cor in Deo firmatum, sed ab eo potius aversum, & ad creaturas conversum, illud procul dubio frequenter data occasione eligeret, quod est suo fini accommodatum, suæque propensioni consentaneum: inclinatio autem voluntatis per peccatum corruptæ ad peccatum propendet: unde si non semper, saltem sæpè malos fructus proferret arbor mala. Hinc Gregorius docet, peccatum pœnitentiâ non deletum, suo pondere in aliud trahere. Hinc Chrysostomus peccatorem comparat navi, malo, velis, & clavo destitutæ, quæ non quò vult nauta, sed quò turbinum, & tempestatis impetus propellit, fertur. Maximè quia voluntas ab æterno, & incommutabili bono aversa, & ad commutabilia, & caduca conversa, præter ingenitam creatæ libertati inconstantiam, longè majorem acquirit instabilitatem; amor enim transformans amantem in amatum, refundit etiam objecti conditiones, & proprietates in eum, qui amat: unde ex objecti variabilitate non nisi mutationem haurit voluntas; & quia objectum, quod amat, vicissitudinì obnoxium est, ideo pro illius mutatione voluntas mutatur, & in tot peccata ruit, in quot ipsam trahit creaturæ mutantis affectus. Unde & Propheta *Thren. 1.* rectè intulit, *peccatum peccavit. Ierusalem, ideo instabilis facta est.*

Hæc.

Hæc deploranda peccatorum ex se invicem pullulantium consequutio præcipuum est divini in peccatores odii signum; unde propter infanda peccata nonnullos tradidisse Deum in desideria cordis eorum, & in passionem ignominia, & in reprobum sensum, Apostolus Rom. 1. attestatur. Peccatoribus etiam induratis iniquitatem super iniquitatem imprecatur David: *Appone*, inquit Psalm. 68. *iniquitatem super iniquitatem eorum*. Quare gravissima peccati pœna est permissio ulterioris peccati, eorumque subtractio auxiliorum, à quibus homo desertus traditur voluntati suæ, sibi ipsi permittitur, ut sine fræno omnibus sese dedat iniquitatis obscœnitatibus.

Notat tamen D. Thomas *quæst. 87. art. 1.* ex ea doctrina non sequi, peccatum habere rationem pœnæ, non quia pœna repugnat voluntati, culpa autem est semper voluntaria; imò si non sit voluntaria, desinit esse culpa. Tum quia Deus pœnæ author est, ut per eam injurias sibi illatas ulciscatur, & de hostibus suis justam vindictam sumat. At Deus non est causa peccati, nec malitiæ illius: ergo peccatum in se spectatum rationem pœnæ habere nequit. Dico *peccatum in se spectatum*, id est sub ratione malitiæ, & inordinationis: nam cæteroquin prout habet adjunctum mœrorem, remorsum conscientia, afflictionem spiritus, aliaque admixta dispendia, tunc utique rationem pœnæ habere potest, quin & indivulsam secum pœnam fert, juxta tritum illud Augustini: *Iussisti Domine, & ita est, ut omnis inordinatus animus pœna sit sibi*. Et illud Senecæ: *Scelus in scelere supplicium est*.

Dices

Dices hanc rationem è D. Thoma depromptam, non esse efficacem, quia multa sunt, quæ possunt habere rationem pœnæ, tametsi sint voluntaria; nam cœnis maceratio sponte assumpta pœna est, per eamque Deo satisfacimus; & tamen est voluntaria, utpote libere electa. Peccatum etiam habituale personale, seu macula peccati, est voluntaria, utpote à libero voluntatis actu proficiscens; & tamen habet rationem pœnæ, cum nos privet bono gratiæ sanctificantis: ergo non obstante, quod peccatum actuale sit voluntarium, poterit nihilominus habere rationem, cum privet actum rectitudine, & honestate morali illi inesse nata.

Respondeo sapienter advertisse D. Thomam in 2. distinct. 36. quæst. 1. artic. 3. *Contingere idem esse culpam, & pœnam; non tamen secundum eandem rationem, quia omnis pœna, in quantum pœna est, voluntati contraria invenitur.* Quod & repetit S. Doctor quæst. 1. de malo, artic. 4. ad 1. dicens: *Idem secundum diversæ potest esse culpa, & pœna; non tamen secundum idem.* Igitur licet culpa secundum rationem culpæ voluntariæ non sit pœna; tamen secundum aliam rationem potest juxta D. Thomam habere rationem pœnæ. Unde venanda est, & investiganda illa ratio, sub qua peccatum potest habere rationem pœnæ: & duplex, ni fallor, potest afferri. Prima est ratio lapsus, ut provenientis ex subtractione divini auxilii; & sub hac consideratione habet rationem pœnæ, potestque à Deo infligi in pœnam voluntatis deficientis prius in genere causæ

causæ materialis volentis deficere, quàm Deus subtrahat auxilium: illa ergo prolapsio, quâ à Deo, & à seipsâ cadit creatura rationalis, & in brutalem labat vilitatem, pœna est. Altera ratio pœnæ, quæ in actu peccati invenitur, est privatio physica rectitudinis debitæ, & consonantiæ ad regulas morum; nam sicut grande hominis malum est carere gratiâ subjiciente hominem Deo, & participium divinæ naturæ conferente; ita homo gravem jacturam patitur, dum morali actuum honestate, & rectitudine caret; cùm illa rectitudo sit actibus intrinseca, & homo non mediocrem hauriat ab actibus suis perfectionem. Itaque privatio rectitudinis, in qua secundùm nos essentialiter consistit peccatum, potest considerari & ut est voluntaria, seu prout suo modo à voluntate deficiente procedit; & ut actui voluntario annexa est, & hoc modo non est pœna, sed culpa: potest etiam considerari ut est remotio, & expulsio gratiæ, & rectitudinis sibi debitæ; & tunc est pœna: cujus signum est, quod illam sequi ex actu nollet peccator appetens soli satisfacere libidini, quam vellet, si posset salvâ Dei amicitia, & honestate morali implere. Remotio ergo bonitatis actualis pœna est, non à Deo, sed ab ipso peccatore volente nolente sibi inflicta, ut in seipso inveniat flagellum suum rebellis adversus Deum, sitque sibi bellum, sibi tortor, sibi tormentum, qui pacem noluit habere cum Deo.

*Decimus peccati effectus : Reatus
pœna.*

Irruites, ô homo, licet, aut splendore nobilitatis, aut fastigio potestatis; semper tibi spina proxima est, si tibi culpa non sit aliena, inquit Ambros. lib. 3. hexaëm. cap. 11. Et certè nunquam à pœna vacat culpa, quia pœna peccato debetur; exigat namque ordo divinæ justitiæ unicuique quod suum est tribuentis, ut sicut bonis operibus præmium statuitur, ita & pro criminibus plectendis pœnæ decernantur. Tum quia justum est, ut qui perversa voluntate amittit quod amare debuit, amittat cum dolore quod amavit, tantumque detur peccatori tormentorum & luctus, quantum se glorificavit. Tum quia ut præclarissimè discurret S. Thomas 1.2. *quæst. 98. art. 1.* naturaliter videmus id, quod contra aliquid insurgit, ab eo detrimentum pati, cui voluit bellum, vel detrimentum inferre. Hinc videmus unum contrarium ab alio obsessum vehementiùs agere, & adversarii impetum efficacius repellere, ut in antiperistasi manifestum est. Porro homo peccans contra triplicem ordinem insurgit; nam & rationi, cui voluntas subditur, adversatur; & leges humanas, quibus subjectus est, contemnit; & divino regimini, à quo omnia gubernantur, se subtrahit. Ergo æquissimum est, ut à Principe illius ordinis, contra quem rebellat, cujusque imperium detrectat perduellis, deprimatur, conteratur, concutatur, triplicemque pœnam subeat, à ratio-

ne:

ne remorsum conscientiam corrodentem ; à Principe temporali temporalem multam ; à Deo sempiternam , & aliquando temporalem. Hunc autem divinæ providentiæ ordinem fugere nequeunt peccatores , quia ut ait August. epist. 120. *Non efficit anima perversè utens creaturis , ut ordinationem effugiat Creatoris ; quoniam si illa malè utitur bonis , ille benè utitur etiam malis : ac per hoc illa perversè bonis utendo fit mala , ille ordinatè etiam malis utendo permanet bonus : qui enim injustè se ordinat in peccatis , justè ordinatur in pœnis.* Hic tractandum esset de reatu pœnæ æternæ , quem peccatum mortale per se inducit ; sed de illo , aliisque affinibus , uti commodiùs , ita & opportuniùs agemus in fine Theologiæ , ubi omnia ad futuram vitam spectantia simul complectemur. In hoc etiam tractatu disputari solet , tum an Adamus potuerit primò peccare venialiter , tum an veniale possit esse cum solo originali ? Cujus resolutio ex ea quæstione pendet , an homo in primo instanti usus rationis teneatur se ad Deum convertere. Sed primum dubium quando agemus de statu justitiæ originalis decidetur , de pesteriori verò dum de præcepto charitatis sermonem habebimus , de quo tractatu sequenti pluribus agemus.

REFLEXIO.

Vide Christiane , quales per peccatum evadamus. Ita planè denigratur super carbones facies peccantis dum per peccatum impressam animæ

animæ ejus divinæ faciei imaginem delet, comparatusque jumentis ferinam faciem induit, bestiis bestialior, ratione vicens, ratione non utens. Ergo tales cum simus, tamque miseri evaserimus, quid superest, nisi ut humiliati sub potenti manu Dei, & ad nihilum miserè redacti, mentis, cordisque profunda demissione ante eum procidamus, qui ex nihilo magna facere, suscitare à terra inopes, erigere de stercore pauperes potest, & amat. *Descendite, ut ascendatis*, ait Augustinus lib. 4. confess. capite 12. *& ascendatis in in Deum; cecidistis enim ascendendo contra Deum.* Itaque post enumeratos, perspectosque peccati effectus, tot calamitatum radicem unam pro virili evellamus. Peccatum, inquam, execremur malorum fontem, malorum summum, & summam. Illud solum time, sine quo nihil obest, quocum nihil prodest. Peccatum pestis est corrumpens animum, venenum est omnes inficiens virtutes, incendium est omnia devastans, mors est spiritalem extinguens vitam, infamia est omnem decolorans gloriam, jactura est bona cuncta exterminans; & tamen monstrum illud amatores invenit, & adoratores. Monstrum, inquam, suâ sævitiâ omnia devastans, suo felle castis mentis deliciis amaritudinem concilians, suis discordiis honestas dissolvens amicitias prudentiam infatuans, lumen rationis obscurans; cor obdurans, libertatem captivans, quodque, ut Chrysostomus ait, verus est infernus, quem peccator in corde circumfert, passionibus veluti daemonibus torquentibus vexatus, concupiscentiis tanquam incendiis adustus, inveteratis consuetudinibus veluti vinculis alligatus, conscientiae remorsu

remorsu quasi verine non morituro corrosus, Dei oblivione veluti magno firmato chaos à Deo sejunctus, divinatorum ignorantia veluti offusis tenebris coopertus, & resurgendi sine speciali gratia impossibilitate miseræ æternitati similis.

Hæc cum ita sint, Lector Christiane, *cave ne aliquando peccato consentias*. Tob. 4. Malum illud detestare, cujus infinitam malitiam solus Deus comprehendit; maculam illam desle infinitis creaturarum lacrymis minimè abstergendam, sed solo Homini Dei cruore eluendam. Offensam illam formida, quâ Deus contemnitur, perfectiones immensæ floccifunt, Filius ipse Dei, teste Apostolo, conculcatur. Ergo qui diligitis Dominum odite malum, quo contristatur Spiritus sanctus. Ephes. 4. quo molesti estis Deo meo, & affligitur Spiritus sanctus ejus: Isai. 7. & 63. quo & ipse, quantum in peccatore est, Deus perimitur. *Quomodo possum hoc facere?* aiebat castissimus Ioseph impurissimæ dominæ suæ. At quomodo possumus nos hoc facere, quo supremi Domini & Patris potentia arctatur; sapientia Filii, & ab eo statutus ordo pervertitur; bonitas Spiritus sancti ingratitude compensatur? Quomodo possumus hoc facere, quo operibus creationis abutimur, quo quantum possumus, œconomiam redemptionis evertimus; quo Spiritui gratiæ contumeliam facimus, quove quæ tota pro nobis Trinitas perfecit, destruere molimur. Quomodo possumus hoc facere, quo nedum gratias Christi expugnamus, opes ejus despiciamus, sacramenta polluimus, Salvatorem persequimur, & ipsum rur-

sus

sus in nobismetipsis crucifigimus Filium Dei? Quomodo possumus hoc facere, propter quod à Deo deserimur, spernimur, odio habemur, à sanctis Angelis derelinquimur, & dæmonum servituti mancipamur? Quomodo possumus hoc facere, quod ut Chrysostomus occinere non desisteat, *una est res pertimescenda peccatum;* quo nimirum & bonis animi spoliatur, acquisita perdimus, acquirenda impedimus, promissa obtinere nequimus; quo interiùs exedimur, positique contrarii nobis, sumus nobismetipsis graves. *Nam cuiquam cum malo bene esse non potest; quisquis autem malus est, malè secum est,* quo & in tempore plectimur, & æternis suppliciis reservamur.


Væ ergo genti peccatrici, populo gravi iniquitate; væ nobis, quia peccavimus; væ deterior, si peccemus. Quia malum est, & amarum reliquisse nos Dominum, & non esse timorem Dei apud nos. Verùm quia in hac valle plorationis à peccatis abstinere omninò non possumus, ex jacturis infirmitatis lucrum reportemus humilitatis, ut omnia nobis in bonum cooperentur: & quia in multis offendimus omnes, inde sumus mansuetiores ad correptionem, patientiores ad laborem, ardentiores ad amorem, sagaciores ad cautelam, humiliores pro conscientia, acceptiores pro verecundia, ad obediendum paratiores, ad gratiarum actionem devotiores ac sollicitiores; & sanctos imitemur, qui ut ait Magnus Gregorius: *Unde iniquitatis stimulos passi sunt, inde pietatis lucra mercantur.* Verùm quia id infirmæ naturæ superat vires, ad gratiam divinam tomo sequenti
expo

exponendam confugiamus; ut sicut nos de medicamento vulnus non rarò facimus, dum virtutum dona in vitiorum usum retorquemus: sic faciat Deus de valnere medicamentum, vitiorum mala assumens in artem virtutum.

*Finis libri septimi Theologia mentis
& cordis.*









*image
not
available*